



Tuhun cha sañahá ra Jesucristo chi yo

Jamiltepec Mixtec New Testament

Contents

Tuhun Nyoo Cha Tyaa San Mateo	1
Tuhun Nyoo Cha Tyaa San Marcos	61
Tuhun Nyoo Cha Tyaa San Lucas	98
Tuhun Nyoo Cha Tyaa San Juan	163
Tyño Cha Casacuví Ra Apóstol: Ra Cha Tyatyño Ra Jesucristo Chi	208
Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo	264
Carta Cha Xihna Ri Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo	288
Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo	310
Carta Cha Sacuhun Ra Apóstol Pablo Chi Ñáyivi Ityi Galacia Cha Yihí Cuenda Nyoo	326
Carta Cha Sacuhun Ra Apóstol Pablo Chi Ñáyivi Ñuu Éfeso Cha Yihí Cuenda Nyoo	335
Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo	344
Carta Cha Sacuhun Ra Apóstol Pablo Chi Ñáyivi Ñuu Colosas Cha Yihí Cuenda Nyoo	350
Carta Cha Xihna Ri Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo	356
Carta Cha Cu Uvi Cha Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo	361
Carta Cha Xihna Ri Sacuhun Ra Apóstol Pablo Chi Ra Timoteo	364
Carta Cha Cu Uvi Cha Sacuhun Ra Apóstol Pablo Chi Ra Timoteo	371
Carta Cha Sacuhun Ra Apóstol Pablo Chi Ra Tito	376
Carta Cha Sacuhun Ra Apóstol Pablo Chi Ra Filemón	379
Carta Cha Chino Cha Cuenda Ñáyivi Israel, Ñu Cahán Sahan Hebreo	381
Carta Cha Sacuhun Ra Santiago Chi Ñu Yihí Cuenda Ra Cristo	399
Carta Cha Xihna Ri Cha Sacuhun Ra Apóstol Pedro Chi Ñáyivi Yihí Cuenda Nyoo	405
Carta Cha Cu Uvi Cha Sacuhun Ra Apóstol Pedro Chi Ñáyivi Yihí Cuenda Nyoo	412
Carta Cha Xihna Ri Cha Tyaa Ra Apóstol Juan	416
Carta Cha Cu Uvi Cha Tyaa Ra Apóstol Juan	422
Carta Cha Cu Uñi Tyaa Ra Apóstol Juan	423
Carta Cha Sacuhun Ra Apóstol Judas Chi Ñáyivi Yihí Cuenda Nyoo	424
Cha Sañaha Ra Jesucristo Chi Ra Apóstol Juan	427



Tuhun cha sañahá ra Jesucristo chi yo

New Testament in Mixtec, Jamiltepec (MX:mxt:Mixtec, Jamiltepec)

Language: Mixtec, Jamiltepec

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 1983 Wycliffe Bible Translators, Inc.

Copyright © 1983 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

22b7598f-f26c-5c14-bd3e-823e94f358b9

ISBN: 978-1-5313-0457-7

Tuhun Nyoo Cha Tyaa San Mateo

Ñáyivi vachi ra Jesucristo tata

(Lc. 3.23-38)

1 Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra. ³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram. ⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón. ⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí. ⁶ Ta sehe ra Isaí cuví chi rey David. Ta sehe rey David chihin ñaha cha cuví ñasihí ra Urías cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza. ⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías. ⁹ Sehe ra Uzías cuví chi ra Jotam, sutu ra Acaz. Ta sehe ra Acaz cuví chi ra Ezequías. ¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías. ¹¹ Sehe ra Josías cuví chi ra Jeconías ta yañi ra. Cacacü ra quivi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel. ¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor. ¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud. ¹⁵ Ta sehe ra Eliud cuví chi ra

Eleazar sutu ra Matán. Ta sehe ra Matán cuví chi ra Jacob. ¹⁶ Ta ra Jacob cuví sutu ra José yíi cu María. Ican ña cuví sihi ra Jesús ra cuví Cristo, o cuñí chi catyí, ra cha saquichi Nyoo vatyí cuví ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacü ra David. Ta ra David chicoo uchi cumi tahan tata ra nyacua nya quivi tiñ ñu Babilonia chi ñu Israel. Ta nyacua nya quivi cuan chicoo uchi cumi ca tahan tata ñu nyacua nya quivi cacü ra Cristo.

Nu cacü ra Jesucristo

(Lc. 2.1-7)

¹⁸ Tyehe caa cacü ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí Ii Nyoo. ¹⁹ Ta ra José ra cua cuví yíi ña, cuví ra noo ra vaha. Ta ña cuñí ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña. ²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuví ña ñasihun, vatyí sehe ña cha cua cacu, cuenda Tatyí Ii Nyoo cuví. ²¹ Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyí cusacacu ra chi ñáyivi chihin cuatyí ñu.

²² Tandihí ihya cuví tacuhva nachino cava tuhun cha cahán Sutu Mañi yo chihin yuhu ra cacuvi profeta ra ta cha naha, ra cachahá cuenda tuhun cahán ra.

²³ Ta catyí ra tyehe caa: Ñaha tyivaa cha ta coo ca rayíi chí, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴Cuhva cha nducachí iñi ra José, sacuví ra tari cuhva catyí ángel cuan chi ra. Ta quehen ra chi cu María vatyi cuvi ña ñasihí ra. ²⁵Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

Nu cuahan coyo ra chiñi tuñi cua nyehe ra nu cacu ra Jesús

2 Cacú ra Jesús noo ñuu cha nañí Belén. Ta ñuu cuan nyaá chi nu cuví Judea. Ta rey Judea cuan nañí ra Herodes. Tyicuan ta chaá coyo suhva ra nya ñuu Jerusalén. Quichí coyo ra ityi nu caña ñanyii. Ta ra cachiñi tuñi xaan cacuví ra. ²Ta candaca tuhun ra chi ñáyivi tyehe caa:

—¿Nya nyaá ra cuvi rey cuenda ñu Israel? Vatyi ityi nu caña ñanyii nyehe ndi tiño cha chahá cuenda tyi cacú ra ityi ihya. Ta vachi ndi vachi sacahnu ndi chi ra —cacatyí ra.

³Ta quivi cha chito rey Herodes tuhun cuan cutyoño cuñí ra. Ta tyicuan caa tucu tandihí ñáyivi ñuu Jerusalén cuan. ⁴Tyicuan ta cana ra Herodes chi tandihí ra cacuví nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahán chi cacu ra Cristo. ⁵Ta canacahan ra cuan ta cacatyí ra tyehe caa:

—Nuu Belén ityi Judea, yucuan tahán chi cacu ra vatyi tyehe caa catyaa ra profeta Nyoo nu tutu ta cha naha:

⁶Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyi Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷Tyicuan ta cana xehe ra Herodes chi ra chiñi tuñi cuan, ta ndaca tuhun ra chi ra ñáa cuhva ta ñáa quivi caña tiño cuan. ⁸Tyicuan ta tachí ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyi ndo chii, tacuhva vatyi cuhun tucu yuhu cusacahní chi cue —catyí ra Herodes chi ra.

⁹Cha yaha cachiñi ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiño cha canyehé ra ityi nu caña ñanyii cuan, cuahan ti ityi nuu ra. Ta chicuñi ti maa maa siqui nu catuví cha lee cuan. ¹⁰Ta cuhva cha canyehé ra chiñi tuñi cuan tyi chicuñi tiño cuan, sii xaan cacuñi ra. ¹¹Ta caquihvi ra chichi vehe nu catuví cha lee cuan. Ta cananyehé ra chi cue chihin cu María sihi cue. Ta chicuñi chiti ra vatyi sacahnu ra chi cue. Tyicuan ta canuñá ra yuhu caha cha canyisó ra. Ta catavá ra regalo cha cuví xuhun cuan, ta cutu vixi chahán, ta ndutya vixi chahán cha nañí mirra. Ta cachahá ra chi cue. ¹²Yaha cuan ta catahan ra ñumahna ta cutuñi iñi ra vatyi ña tahán chi canayaha ra ityi nu nyaá ra Herodes, yucuan chaha siin ca ityi cuanuhu coyo ra.

Nu chingo xehe ra José ta cu María chihin cha lee nya Egipto

¹³Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tuví nuu ra José chichi ñumahna. Ta catyí ra chi ra:

—Ndícuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyi ra Herodes cunanducu ra chi cha lee ihya vatyi cahni ra chi cue.

¹⁴Tyicuan ta ndicuita ra José cha cuaa cuan. Ta quehen ra chi cha lee cuan ta chi sihi cue. Ta cuahan nu nya Egipto. ¹⁵Ta yucuan chinyaa nu nyacua nya cha chihj ra Herodes. Tyehe caa cuvı tacuhva na chino cava tuhun cahán Nyoo cha tyaa ra profeta ta cha naha. Tyehe caa catyı ra: “Nya nuu Egipto cane chi Sehi”, catyı ra.

Nu tachı ra Herodes na cahni ra chi ra cuatyaa

¹⁶Cha tuvı iñi ra Herodes vatyı ra cachiñı tuñi cuan sandavı ñaha ra chi ra, nduxaan vavaha ra. Ta tachı ra tyiño na cacahni ra chi ra cuatyaa cha iyó nuu Belén cuan ta ndaha nuu ñandihi, ra cuatyaa cha ni cacu nyacua nya cha uvi cuiya. Tyicuan caa sacuvı ra vatyı nandichi xiñi ra vatyı tyicuan tahan cuiya ra Jesús tari cuhva catyı ra chiñi tuñi cuan chi ra. ¹⁷Tyicuan caa chino cava tuhun cahán Nyoo cha tyaa ra Jeremías profeta Nyoo ta cha naha, ta catyı ra tyehe caa:

¹⁸Tyacú noo ndusu nuu Ramá, cha chacú chaa ñáyivi, ta iyo tahan nu. Ta ican cuvı ñáyivi tata cu Raquel, ñáyivi Israel, chacú chaa nu cha cuenda sehe nu.

Soco ña cuñı nu cha naquehen ndahvi nu chi nu cha cuenda cha cachihı sehe nu, catyı chi nuu tutu Nyoo.

¹⁹Soco cha yaha cha chihı ra Herodes, tyicuan ta tuvı tucu noo ángel cha tachı Sutu Mañi yo nuu ra José nu quixı ra nuu Egipto. Ta catyı ra chi ra:

²⁰—Ndıcuıta ta quehen chi cha lee chiña, ta chi sihi cue. Ta cuanuhu ndo nya nuu Israel, vatyı cha chihı ra nducu cahni chi cue.

²¹Tyicuan ta ndicuita ra José, ta quehen ra chi cha lee cuan ta chi sihi cue. Ta cuanuhu coyo nu nya Israel. ²²Soco quıvi chito ra José vatyı ra Arquelao cuvı ra rey tyiño nuu sutu ra, ra Herodes, nya

Judea, nayuhvi ra ta ña cuñı ra cahun ra yucuan. Ta vatyı sacoto Nyoo chi ra chichi ñumahna, yucuan chaha cuanuhu nu nya Galilea. ²³Cha chaa nu yucuan, cuahan nu nya nuu Nazaret, cua coo nu. Ta yucuan chiyó nu. Tyehe caa cuvı tacuhva chino cava tuhun cha cahán Nyoo, cha catyaa ra profeta ta cha naha. Vatyı catyı ra tyı ra Jesús ra nuu Nazaret cucunañi ra.

Ra Juan ra sacondutyı chi ñáyivi cahán ra tuhun Nyoo chihin nu

(Mt. 1.1-8; Lc. 3.1-9, 15-17; Jn. 1.19-28)

3 Quıvi cuan ra Juan ra sacondutyı chi ñáyivi cuahan ra noo chiqui ndiı ityi Judea. Ta quichaha cahan ra tuhun Nyoo chihin nu. ²Ta catyı ra:

—Ndu uvi iñi ndo cuatyı ndo vatyı cha yatıyn nyaá Nyoo ra cua cunyaca ñaha ańima yo.

³Ican tuhun ra Juan ihya cuvı cha tyaa ra Isaías ra cuvı profeta Nyoo ta cha naha. Tyehe caa tyaa ra:

Chiñı yo cha caná chaa noo ra noo nu chiqui ndiı ta catyı ra:

“Tari sanduvahá ndo noo ityi, tyicuan caa sanduvaha ndo ańima ndo, vatyı cua quichi Sutu Mañi yo.

Nuña ndo noo ityi ndoo chi ra naquihvi ra ańima ndo.”

⁴Ta ra Juan ñihnó ra sahma chino chihin ixi camellu. Ta sincho ra, ñiı cuvı. Ta maa maa ri pinchi chachı ra ta tyañuñu huhu chihı ra. ⁵Ñáyivi nuu Jerusalén ta tandihi nu nuu cha nyicú Judea, ta nu ca iyó yatıyn ri ityi yuvi cahnu Jordán cuan, quichi coyo nu, quichiı tyasoho nu tuhun cahán ra. ⁶Ta cha yaha nahma nu cuatyı nu, ra Juan sacondutyı ra chi nu yuvi cahnu Jordán cuan.

⁷Soco ra Juan nyehe ra vatyı cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichiı coyo ra vatyı condutyı ra. Ta catyı ra chi ra:

—¡Nyoho, tari noo tata coo xaan cuví ndo! ¿Yóó cha sacoto chi ndo vatyí chihin cha condutya ri ndo ta ma tachi tuñi ca Nyoo chi ndo? Ña ndicha. ⁸ Coo ndo noo cha quetuví vaha tyi ndicha cha ndu uvi iñi ndo cuatyí ndo. ⁹ Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyivi tata ra Abraham. ¹⁰ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyivi chitun. Ta cahmi ñu chi tun. Tyicuan caa tucu nyoho, cuhun ndo nu cayú ñuhu. ¹¹ Cha ndicha vatyí yuhu sacondutyé chi ñáyivi chihin ndutya, tari noo seña vatyí cha ndu uvi iñi ñu cuatyí ñu. Soco cha yaha sacondutya yuhu chihin ndutya, vachi inga ra cusacondutya chi ñáyivi chihin Tatyí Ii Nyoo ta chihin ñuhú ihñi. Iyó ca tunyee iñi chi maa ra ta ñima ca yuhu. Ta ni cha cuise ndichan ra ta ña ñañe, vatyí cahnu xaan ca ra cuví ra. ¹² Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó iñi yo chi ra cunaquehen vaha ra chi yo. Ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhú cha ma ndahva ca maa —catyí ra Juan.

Nu condutya ra Jesús

(Mr. 1.9-11; Lc. 3.21-22)

¹³ Tyicuan ta quitá ra Jesús Galilea ta chaá ra yuvi cahnu Jordán nu ñohó ra Juan, vatyí cuñí ra cha sacondutya ra Juan chi ra. ¹⁴ Cha xihna ri ña cuñí ra Juan sacondutya ra chi ra, ta quichaha catyí ra chi ra Jesús tyehe caa:

—Yoho cuñún cha sacondutye chuun, soco ña tahán chi cha sacondutya yuhu chuun. Maun tahán chi sacondutyon chii —catyí ra.

¹⁵ Soco ra Jesús catyí ra chi ra:

—Cha vityin, na cuvi chi cuhva catyí yuhu chuun. Vatyí cuñí chi cha sacuvi yo tandihí cha cuñí Nyoo —catyí ra chi ra Juan. Tyicuan ta ndoo ra Juan vaha.

¹⁶ Cha yaha ri condutya ra Jesús ta quitá ra chichi ndutya. Ta nuña ri andivi, ta ra Jesús nyehe ra yoso caa vachi noó Tatyí Ii Nyoo, tari noo paloma, ta chaá chi siquí ra. ¹⁷ Tyicuan ta tyacu noo ndusu ityi andivi, ta catyí chi tyehe caa:

—Ican ra ihya cuví Sehi, ra cuñí xain chi. Ta sii xaan cuñí chihin ra —catyí ndusu cuan.

Nu nducú nyehe cuihna chi ra Jesús

(Mr. 1.12-13; Lc. 4.1-13)

4 Tyicuan ta Tatyí Ii Nyoo chinyaca chi ra Jesús noo chiqui ndii, tacuhva nducu nyehe cuihna chi ra.

² Ña chachí ra uvi xico quivi ta uvi xico ñuu. Ta yaha cuan ta chaá soco chi ra.

³ Tyicuan ta tuhva cuihna chi ra, vatyí cuñí ra nducu nyehe ra chi ra. Ta catyí ra chi ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyivi ta conyito ñu. Conyito tucu añima ñu chihin tuhun cahán Nyoo” —catyí ra Jesús chi cuihna cuan.

⁵ Tyicuan ta chinyaca cuihna cuan chi ra Jesús nya ñuu Jerusalén. Ta sandaa cuan chi ra xiñi vehe ñuhu cahnu cuan.

⁶ Ta catyí cuan chi ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin

chahun chihin yuu” —catyí cuihna cuan chi ra.

⁷Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸Tyicuan ta chinyaca tucu cuihna cuan chi ra noo yucu sacun. Ta sañaha cuan tandihi cha cahnu cuví nu nyacá ñaha rey ta ra cuví tyiño chi ñáyivi iyó siqui ñuhu ñáyivi. ⁹Ta catyí cuihna cuan chi ra tyehe caa:

—Yuhu cuhve tandihi maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta ñin ri chi maa ra quichaha yo.”

¹¹Tyicuan ta cuahan cuihna cuan, ta ndoo ra Jesús, ta chaá coyo ángel ta tyinyee ra chi ra.

Nu quichaha saha tyiño ra Jesús ñuu cha nyicú ityi Galilea

(Mr. 1.14-15; Lc. 4.14-15)

¹²Quivi cha chito ra Jesús vatyí ra Juan ñohó ra vehe caa, cuahan ra nya Galilea. ¹³Soco ña ndoo ra ñuu Nazaret, nu chahnú ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí. ¹⁴Tyehe caa cuví tacuhva chino cava tuhun cha tyaa ra Isaías nu tutu Nyoo ta cha naha. Catyí chi tyehe caa:

¹⁵Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶Chinyicu ñanima ñu nu ñaa ñi vatyí chinyaca ñaha ra ña vaha chi ñu chi-

hin tuhun chihi, soco sandundichín ñuhú Sutu Mañi yo ñanima ñu nu nyicú ñu, catyí ra Isaías.

¹⁷Nyacua nya quivi cuan, ta quichaha cahán ra Jesús tuhun Nyoo chihin ñáyivi, ta catyí ra chi ñu:

—Ndu uvi ñi ndo cuatyí ndo vatyí yatyin ri nyaá Nyoo ra cua cunyaca ñaha ñanima ndo —catyí ra Jesús chi ñáyivi.

Nu cana ra Jesús chi cumi tahan ra catiín tiyaca

(Mr. 1.16-20; Lc. 5.1-11)

¹⁸Ra Jesús chicá noo ra yuhu miñi cha nañi Tyañuhu Galilea cuan. Ta nanyehé ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catiín tiyaca cacuví ra. Ta cacañi ra yuhva ra nu ndutya. ¹⁹Tyicuan ta quichaha catyí ra Jesús chi ninduvi ra tyehe caa:

—Cunyicon ndo chii. Ta yuhu cusacuvi vatyí tari ñihí ndo tiyaca, tyicuan caa cuiñi ndo anima ñáyivi (ta cutava ndo chi ñu nu quiñi caa na quihvi ñu cuenda Nyoo) —catyí ra Jesús chi ra.

²⁰Caa cuhva ri cuan casandoo ra yuhva ra ta cuahan coyo ra chihin ra Jesús.

²¹Chiin ri ca chicá ra Jesús ityi nuu ca ta nanyehé ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chi ra. ²²Ta caa cuhva ri cuan casandoo ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyivi

(Lc. 6.17-19)

²³Cuahan ra Jesús chicá noo ra tandihi ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá

ñaha Nyoo añima yo. Ta sanduvaha ra chi ñu cuhvi chihin tandihi ri nuu cuehe cha iyó chi ñu. ²⁴ Cachitó tandihi ñáyivi ñuu cha nyicú Siria tuhun ra Jesús. Ta quichí nyaca ñu tandihi ñu cuhvi chi ra: tandihi ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihí tañi chi ñu. Ta yihí ñu ña cuví nacanda ñu. Ta ra Jesús sanduvaha ra chi tandihi ñu. ²⁵ Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

**Nu cahán ra Jesús nuu
ñáyivi nu chiqui**

(Lc. 6.20-23)

5 Cuhva cha nyehe ra Jesús tyi cuaha xaan ñáyivi, ndaa ra noo nuu yucu. Ta chicunyaá ra yucuan. Tyicuan ta ñu nyicón chi ra chicunyicu ñu nicachico nu nyaá ra. ² Tyicuan ta quichaha sañaha ra Jesús chi ñu tyehe caa:

³—Tandihí ri ñu cha chitó vatyí chiñuhú Nyoo chi ñu, sií xaan cucuvi chi ñu, vatyí tahán chi vatyí cunyaca ñaha Nyoo añima ñu.

⁴ Ta tandihí ri ñu nducuihya iñi vityin cha catyí cuatyí ñu, sií xaan cucuvi chi ñu. Vatyí cusanaa Nyoo cha cuihya iñi ñu.

⁵ Tandihí ri ñu cha ña cahnu sahá chi, sií xaan cucuvi chi ñu, vatyí cuquehen cuenda ñu ñuhu ñáyivi cha catyí Nyoo tyí cuhva ra chi ñu.

⁶ Ta tandihí ri ñu cuñí xaan sacuvi cuhva catyí Nyoo, sií xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

⁷ Ta tandihí ri ñu cha iyó tucahnu iñi chi, sií xaan cucuvi chi ñu, vatyí Nyoo, cucoo ticahnu iñi chi ra chihin ñu.

⁸ Ta tandihí maa ñu ndundií añima saha Nyoo, sií xaan cucuvi chi ñu, vatyí ñu cuan, cunyehe ñu chi Nyoo.

⁹ Ta ñu nducú cuhva cha coo taxi ri ñáyivi chihin Nyoo sií xaan cucuvi chi ñu, vatyí Nyoo, cucatyí ra tyi sehe ra cuví chi ñu.

¹⁰ Ta tandihí ñu cha tasi cuñí nyehe ñáyivi chi ñu cha catyí cha sacuvi ñu tari cuhva catyí Nyoo, sií xaan cuví chi ñu, vatyí nyacá ñaha Nyoo añima ñu.

¹¹ Na cusí cuñí ndo tatu cahán ña vaha ñáyivi siqui ndo. Ta sanyehé ñu tindoho chi ndo. Ta tavá ñu cuaha cuendu siqui ndo cha catyí yuhu. ¹² Na cusí cuñí ndo vatyí tatu tyehe caa sacuvi ñu chihin ndo, sií xaan cucuvi chi ndo, vatyí cahnu xaan ta tyaquí xaan cha cutahan chi chi ndo, nachaa ndo andivi. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

**Tatu sandihí yo cha chinó iñi yo
chi Nyoo cuví yo tari ñii
cha ndihí cha uhva**

(Mr. 9.50; Lc. 14.34-35)

¹³ Nyoho cha chinó iñi ndo chii, tari ñii vaha cuví ndo. Soco tatu ñii, ta ndihí cha uhva, ma sacu uhva ca chi cha cachi yo. Ña vaha ca ñii cuan. Tyicuan ta sacuita yo. Ta cuañi ñáyivi siqui chi.

**Tatu vaha quichahá yo tuhun
cahán Nyoo, cuví yo tari
ñuhú cha sandundichín nu
cuahan ñáyivi nu ñaa iñi**

¹⁴ Nyoho cuví ndo tari ñuhú cha sandundichín nu cuahan ñáyivi. Noo ñuu cha nyaá xiñi noo yucu, ma cuví quihí xehe. Tyicuan caa tahán chi cuví ndo.

¹⁵ Ta yori yo cha tyaa yo noo ñuhú tima, ta tixehe yo chichi noo caja. Soco tyiso yo noo nu sucun vatyí sandichin chi chichi vehe tatu cua quihvi ñáyivi, soco ndichin. ¹⁶ Ta tyicuan caa tahán chi san-

dundichin tucu nyoho chihin ñuhu Nyoo cha iyó añima ndo nu cuahan ñáyivi. Tyicuan ta nanyehe ñu cha vaha cha nyacuví ndo, ta sacahnu ñu chi Sutu yo Nyoo ra nyaá andívi.

Sañahá ra Jesús vatyí niñi xaan sacuvi yo ta sañaha yo tandíhi tuhun cha tachí Nyoo chi yo

¹⁷Ma cuñi ndo vatyí yuhu vachi sanai ley cha tachí Nyoo chi ra Moisés vatyí tyaa ra. Ta ni ri ña vachi sanai tuhun cha tyaa ra cacuvi profeta cuenda Nyoo ta cha naha. Yuhu ña vachi vatyí sanai yucuan. Soco vachi quichahi tandíhi cha catyí tuhun cuan, ta sañahá ñáa cha cuñi chi catyí. ¹⁸Cha ndicha catyí chi ndo vatyí cha ni ri ca cha iyó ca andívi chihin ñuhu ñayivi ma naa ni chiin cha tyaa ra Moisés ta ra cacuvi profeta Nyoo ta cha naha, nyacua nya yaha cuvi tandíhi tari cuhva nyaá cha catyaa ra. ¹⁹Yucuan chaha, tatu ña quichahá ñáyivi tuhun cha tachí Nyoo chi ñu, vasi noo tuhun luhlu ri cuví, ta tatu chasi ñu nu quichaha inga ñáyivi, luhlu xaan cucuvi ñu nu nyacá ñaha Nyoo. Soco ñu cha quichahá tandíhi, ta sañahá tucu ñu chi inga ñáyivi. Ican ñu cuan cahnu xaan cucuvi ñu nu nyacá ñaha Nyoo. ²⁰Vatyí cuñi chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuvi quihvi ndo nu nyacá ñaha Nyoo.

Nu sañahá ra Jesús chi yo vatyí ma cuxaan yo chi ñáyivi

²¹Nyoho cha cuaha chaha chiñi ndo tuhun cha catyí Nyoo chi ñu chiyo ta cha naha. Catyí ra: “Ma cahñi ndo chi ñáyivi, vatyí tatu cahñi ndo ñáyivi, tahán chi cutuñi chi ndo.” ²²Soco yuhu, catyí chi ndo, vatyí vasi cha cuxaan ri ndo chi noo ñáyivi, o vasi cha cahán uhvi ri ndo chi ñáyivi, o vasi cha cahán nyaa ri ndo chi ñáyivi, tahán chi cutuñi chi ndo. Ta siin

ri saha cuenda ndo chi ndo coto cuhun ndo anyaya chihin cuatyí cuan.

²³Ta yucuan chaha quivi cuahun vehe ñuhu, ta nyisón cha cucuhvon chi Nyoo, ta tatu cha nanyaun cha cua cuhvon ta nicohon iñun vatyí ña vaha iyó noo yañun chuhun. ²⁴Sandoo cha cua cuhvon chi Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya

(Lc. 12.57-59)

²⁵Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chi ra ityi cuahun, coto cuhva cuenda ra chuun chi ra cuví tyiño. Ta ra cuví tyiño cua cuhva cuenda ra chuun chi policía. Ta policía cuan cutyihí ra chuun vehe caa. ²⁶Soco catyí chuun vatyí ma cuvi quiton vehe caa cuan nyacua nya tyiyahvun tandíhi cha tahán chi tyiyahvun.

Sañahá ra Jesús vatyí ni cha ndichi xiñi yo cha coo nonga ñusihí, o nonga rayii chi yo, ta ña vaha

²⁷Nyoho chiñi ndo tuhun vatyí catyí Nyoo ta cha naha vatyí nyoho cha iyó ñasihí ndo, ma coo inga ñusihí chi ndo. ²⁸Soco yuhu catyí chi ndo, vatyí nya nyoho cha nyehé ndo chi noo ñusihí ta quihvi iñi ndo chi ñu, catyí chi ndo vatyí chihin yucuan ri ta cha chicoo cuatyí ndo.

²⁹⁻³⁰Vatyí tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhu chichi anyaya. O tatu ndahun sanacavá chuun nu cuatyí, vaha taxin ca cah-

nya ta saꝓuiton cañi. Vatyí vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cahun nu cayu ñuhu chichi anyaya.

**Nu sañahá ra Jesús
siqui ra sandoo ñasihi**

(Mt. 19.9; Mr. 10.11-12; Lc. 16.18)

³¹ Ta suri catyí tucu Nyoo chi ñáyivi chiyo ta cha naha vatyí yóo ra sandoo ñasihi, cuñí chi cuhva ra noo tutu cuenda cha sandoo ra chi ña. ³² Soco catyí yuhu chi ndo, ñahri ityí iyó chi noo ra cha sandoo ra chi ñasihi ra tatu ña natuvi ña chihin inga rayii. Vatyí tatu sandoo ra chi ña, ta ñima cha catyí cuatyí cuan, chicoo cuatyí ra nuu Nyoo. Ta siin ri saccoo ra cuatyí ña vatyí tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

**Ma catyí yo “chito vaha maa Nyoo”
tacuhva chino iñi ñáyivi
vatyí ndicha cha cahán yo**

³³ Ta chiñi tucu ndo, vatyí catyí tucu Nyoo chi ñu chiyo ta cha naha tyehe caa: “Tatu tyanaha ndo Nyoo tyí cusacuvi ndo noo cha cusacuvi ndo, tahan chi cha sacuvi ndo.” ³⁴ Soco yuhu catyí chi ndo vatyí ma tyanaha ndo Nyoo tacuhva chino iñi ñáyivi vatyí ndicha cha cahán ndo. Ta ma tyanaha ndo ni tuhun andivi, vatyí yucuan nu nyaá maa Nyoo cuví. ³⁵ Ta ni ri tuhun ñuhu ñayivi ihya ma tyanaha ndo, vatyí yucuan cuví nu chañí Nyoo. Ta ni ri tuhun ñuu Jerusalén, ta ma tyanaha ndo, vatyí yucuan cuví ñuu Nyoo ra cuví Rey cha cahnu ca. ³⁶ Ta ni ri tuhun xiñi ndo, ta ma tyanaha ndo, vatyí ma cuví sanducuichin ndo ni noo ixi xiñi ndo. Ta ni ma cuví sandutoon tucu ndo. ³⁷ “Ican” catyí ndo, tatu ican. Soco tatu ñima, “ñima”, catyí ndo. Ta ma tyanaha ndo Nyoo vatyí ra ña vaha tyiyuhú chi ndo cuví cuan.

**Nu sañahá ra Jesús vatyí tatu sacuvi
ñáyivi cha ña vaha chihin yo, na
sacuvi yo cha vaha chihin ñu**

(Lc. 6.29-30)

³⁸ Ta chiñi tucu ndo cha catyí tuhun cha tyaa ra Moisés ta cha naha: “Vatyí tatu noo ñáyivi cañi ñu nuu ndo, ta tahvi noo noho ndo, o tiví noo chiti nuu ndo, o nya chi ndo sañicuehe ñu, tahán chi vatyí sañicuehe tucu ñáyivi chi maa ñu, tari cuhva cha sañicuehe ñu chi ndo.” ³⁹ Soco yuhu catyí chi ndo, vatyí ma nasacuvi ndo cha ña vaha cha nyacuvi ñu tasi iñi chi ndo. Vatyí tatu yóo cha cañi iin chiyo xitin ndo, ma nduxaan ndo chi ñu. Soco cuhva tucu ndo inga chiyo xitin ndo na cañi ñu. ⁴⁰ O tatu chicán ñu cuatyí chaha ndo, ta cuñí ñu tinyaa ñu noo camisa ndo, ma cuxaan ndo chi ñu. Soco cuhva ndihí ndo chaqueta ndo chi ñu. ⁴¹ O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro. ⁴² Tatu yóo ñu chicán tumañi iñi chi ndo, cuhva ndo chi ñu. Ma catyí ndo cha ma saha ndo tumañi iñi cuan.

Na cuñi yo chi ñu xaan iñi chi yo

(Lc. 6.27-28, 32-36)

⁴³ Ta chiñi tucu ndo tuhun cha catyí ñu chiyo ta cha naha vatyí cuñi ndo chi ra tahan ndo. Ta chi ra xaan iñi chi ndo quiñi tisihi iñi ndo chi ra. ⁴⁴ Soco yuhu catyí chi ndo, cuñi ndo chi ñáyivi xaan iñi chi ndo. Ta saꝓuvi ndo cha vaha chihin ñáyivi cahan chi ndo, ta chi ñu ña cuñí nyehe chi ndo. Ta caꝓan tahvi ndo chaha ñu quiñi nyacuvi chihin ndo ta sanyehé tindoho chi ndo. ⁴⁵ Ta tyicuan caa saꝓuvi ndo tacuhva coto ñáyivi vatyí cuví ndo sehe Sutu yo ra nyaá andivi. Vatyí maa ra sacañá ra ñanyii, ta saccoon ra savi siqui tyiño sahá ñáyivi vaha ta ñáyivi ña vaha ñandihí. ⁴⁶ Tatu nyoho ta cuñí ndo chi ñáyivi cha vaha iyó chi-

hin ndo ta ña cuñi nyehe ndo chi ñáyivi xaan iñi chi ndo, ñahri cha vaha cuñihi ndo. Vatyí suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñi maa ndo. ⁴⁷O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyí suri tyicuan caa sacuví tucu ñáyivi ña ñohó nuu Nyoo. ⁴⁸Tari Sutu yo cha nyaá andívi maa maa ri cha vaha sacuví ra, tyicuan caa nyoho maa maa ri cha vaha sacuví ndo.

**Nu sañahá ra Jesús yoso
caa sacuvi yo tumañi iñi**

6 ¹Saha ndo cuenda ta ma cuyaa ndo ñáá tumañi iñi sacuvi ndo chi ñáyivi. Vatyí tatu cuyaa ndo nuu ñáyivi, ñahri cuñihi ndo nuu Sutu yo ra nyaá andívi. ²Cuhva cha sahá ndo tumañi iñi, ma sacoto ndo chi inga ñáyivi vatyí sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chichi vehe ñuhu. Sahá ra tumañi iñi tacuhva na catyi ñáyivi vatyí vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo. ³Soco nya quívi sahá ndo tumañi iñi chi ñu ndahvi, ma sacoto ndo ni chi ra tahan cahnu ndo. ⁴Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

**Nu sañahá ra Jesús yoso caa
cahan yo chihin Sutu yo Nyoo**

(Lc. 11.2-4)

⁵Ta cuhva cha chicán tahvi ndo chi Nyoo, ma cacan tahvi ndo tari cuhva sacuví ñu savahá chii. Vatyí ñu cuan tahán iñi ñu cacan tahvi ñu chi Nyoo nu tuvi ñáyivi, tacuhva catyi ñáyivi vatyí vaha xaan ñáyivi cuví ñu, vaha xaan chinó iñi ñu chi Nyoo. Soco catyí chi ndo cha ndicha vatyí ñahri ca cuñihi ñu nuu

Nyoo. Vatyí ñima cha ndicha sacuví ñu. ⁶Soco nyoho ñáá quívi cacan tahvi ndo chi Nyoo, ma cacan tahvi ndo tacuhva nyehe ri ñáyivi chi ndo. Soco quíhvi ndo chichi vehe ndo ta ñacasí ndo yuvehe ta cacan tahvi ndo chihin tandíhi añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyí nuu maa ra chichán tahvi ndo, ta ñima nuu ñáyivi. Ta cuaha ca cha vaha cucuhva ra chi ndo.

⁷Cuhva cha cahán ndo chihin Nyoo ñima susuri tuhun cha ñima ri tuhun cahan ndo. Vatyí tyicuan caa sacuví ñu cha ñahri tuhun Nyoo caá añima. Cuñi maa ñu vatyí tyicuan caa ta cuñi Nyoo cha cahán ñu. Vatyí cuaha xaan chaha cahán ñu susuri maa tuhun cuan. ⁸Ma sacuvi ndo tyicuan caa. Vatyí Nyoo cha chitó ra ñáá cha chiñuhú chi ndo, cha ni ri ca cha cumañi ca cacan ndo chi ra. ⁹Yucuan chaha nyoho, tatu cua cacan tahvi ndo chi Nyoo, tyehe caa catyi ndo: Sutu Mañi yuhu, yoho cha nyaún andívi. Sacahnú xaan ndi chuun.

¹⁰Na quichi quívi cha nyaca ñahun ihya siquí ñuhu ñáyivi, tari nyacá ñahun andívi.

Na sacuvi ñáyivi ihya siquí ñuhu ñáyivi tandíhi cuhva cuñi maun, tari cuhva cuví gloria.

¹¹Cuhva cha cachi ndi tacuhva cha yaha ndi noo noo quívi.

¹²Saha tucahnu iñi chi ndi ñáá ndíhi cha ña vaha nyacuví ndi, tari maa ndi sahá ndi ticahnu iñi chi ñu satasí iñi chi ndi.

¹³Ma cuhvon cha nducu nyehe ra ña vaha chi ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandíhi. Ta maun cuaha xaan ca tunyee iñi iyó chuun. Ta tahán chi vatyí sacahnú tandíhi ñáyivi chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacán tahvi ndo chi Nyoo.

¹⁴Vatyi tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutu yo ra nyaá andívi, cusaha ra ticahnu iñi chi maa ndo. ¹⁵Vatyi tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutu yo, ma saha ra ticahnu iñi cuatyi maa ndo —catyí ra Jesús.

Ñáá quivi ña chachí yo ta nanducú yo chi Nyoo, ma sacoto yo chi inga ñáyivi

¹⁶Ta catyí tucu ra Jesús chi ñu chicá noo chihin ra:

—Quivi cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyi cuñí ñu cha coto ñáyivi vatyi ña chachí ñu ta nanducú ñu chi Nyoo. Soco catyí chi ndo vatyi yucuan ri ñihi ñu. Ñahri ca cuñihi ñu nuu Nyoo. ¹⁷Soco tatu nya quivi ña chachí ndo ta nanducú ndo chi Nyoo, ñacatya ndo nuu ndo. Ta ñacuaca ndo cuca xiñi ndo, ¹⁸tacuhva vatyi ma tuvi iñi ñáyivi vatyi ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chi ndo chihin nuu ñáyivi.

Nu sañahá ra Jesús vatyi ma sacaya yo cha iyó siqui ñuhu ñayivi

(Lc. 12.33-34)

¹⁹Ma sacaya ndo cha tyayii ihya ñáyivi. Vatyi coto tiví cha tyayii cuan. O cuví tucu quihvi ra suhu, ta suhu ra tandihi cha tyayii ndo. ²⁰Vaha taxin ca sacaya ndo cha vaha chi ndo nu nyaá Nyoo gloria. Vatyi nuu Nyoo ña ndihi cha vaha cuan. Vatyi ni ri ra suhu, ni quití, yori cha sativi iyó yucuan. ²¹Ta catyí chi ndo vatyi nu nyaá cha tyayii

ndo, yucuan cuví nu nyaá xiñi ndo. Ta yucuan cunyaa añima ndo.

Tari sandichín chiti nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo

(Lc. 11.34-36)

²²Chiti nuu ndo noo cha sandundichin ityi cuahan ndo cuví. Ta tyicuan caa tucu añima ndo, tatu iyó cha ndichin Nyoo, vaha ñáyivi cuví ndo. ²³Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichin Nyoo nyaá añima ndo, tari noo ra cuaa cuví ndo. Ña cuví nyehe ndo ityi vaha cha cuahan nu nyaá Nyoo.

Sañahá ra Jesús vatyi ma cuvi quichaha yo chi Nyoo tatu cuñi xaan ca yo cha tyayii

(Lc. 16.13)

²⁴Noo musu ma cuvi coo uvi chitoho ra. Vatyi musu cuan cuñi ca ra chi noo ra ta ñima ca chi inga ra. Ta quichahá ra chi noo ra, ta chi inga ra ma quichaha ra. Ta tyicuan caa tucu nyoho, ma cuví cuñi ndo chi Nyoo, ta suri cuhva cuan cuñi ndo cha tyayii.

Sañahá ra Jesús vatyi ma caca xaan iñi yo ñáá ndihi cha chiñuhú chi yo

(Lc. 12.22-31)

²⁵Yucuan chaha catyí chi ndo vatyi ma caca xaan iñi ndo yoso caa ñihi ndo cha cachi ndo ta cha coho ndo. Ni ma caca iñi ndo ñáá cha cuihno ndo. Vatyi yahvi ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyi maa ra chahá ra ñáyivi coo ndo. Ta ña yii cuhva ra inga cha chiñuhú chi ndo ñandihí. ²⁶Saha ndo cuenda chi saa. Ña savahá ti itu. Ta ña sahá tyiño ti. Ni ri ña naquehén vaha

tí tyiño sahá tí chichi yaca. Soco Sutu yo Nyoo chahá ra cha cachi tí. ¿Atu ña yahvi ca nyaá nyoho nuu Nyoo ta ñima ca saa cuan? ²⁷ Ni ri maa chicá xaan xiñi ndo ma cuvi sandusucun ndo ni chiin ca chi ndo.

²⁸ Ta tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun sahama ndo? Saha ndo cuenda yoso caa iyó tu ita nu chiqui. Vatyí ña taví tun. Ta ni ña conó tun isa. ²⁹ Soco catyí chi ndo vatyí ni rey Salomón cha tyayí xaan cuví ra, soco ña cuví cuihno ra cha tyaquí, tari cha sacuihno Nyoo chi tu ita cuan. ³⁰ Ta tu ita cuan tyaquí xaan ñihno tun suhva ri quivi ta yaha cuan ta cuna ityí tun ta cucayu tun chichi horno. Ta nyoho, vaha ca cusacuihno Nyoo chi ndo. Soco chiin xaan chinó iñi ndo chi ra. ³¹ Yucuan chaha ma caca xaan xiñi ndo ta catyí ndo: “¿Ñáá cha cachi ndi, o ñáá cha coho ndi, o ñáá cha cuihno ndi?” ³² Vatyí ñáyivi cha ñahri tuhun Nyoo caá aña, chicá xaan xiñi ñu tuhun ihya. Soco nyoho ma caca iñi ndo tuhun cuan vatyí iyó noo Sutu ndo, ra nyaá andivi. Ta chitó ra ñáá ndihi cha chiñuhu chi ndo. ³³ Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca ñaha ra aña ndo. Ta sacuvi ndo tari cuhva cuñí maa ra. Ta tyicuan caa ñihi ndo tandihi cuii maa cha chiñuhú chi ndo. ³⁴ Tandihi quivi ta iyó tindoho chi ndo. Ma caca xiñi ndo tuhun tindoho cha vachi. Vatyí Nyoo nyaá ra chihin ndo.

Ma cahan yo cha caá inga ñáyivi

(Lc. 6.37-38, 41-42)

7 Ma cahan ndo cha caá inga ñáyivi. Tyicuan caa ta ma tiin Nyoo cuenda cha caá ndo. ² Vatyí tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo. ³ ¿Yoso caa cha cuví nyehun cuatyí luhlu ra yañun

ta ña cuví nyehún cuatyí cahnu cha iyó chi maun? ⁴ Tatu chiti nuu maun yihí noo vitu cahnu, ¿yoso caa cuví catyun chi ra yañun: “Nyaca, na tave mihin lee cha yihí chiti nuun?” ⁵ Yoho cha savahún chuun, tava xihna vitu cahnu cha yihí chiti nuu maun, tyicuan ta cuvi nyehe vahun mihin lee cha cutavon chiti nuu ra yañun.

⁶ Ma sañihi ndo cahan ndo tuhun Nyoo chihin ñu ña cuñí coto, vatyí coto cañi ñu chi ndo. Tari ina cha tiin vavaha chi ndo, tyicuan caa cuví ñu. Ta tari quini cha chaca chaha tí cha yahvi nyaá, tyicuan caa cahán ña vaha ñu siqui tuhun Nyoo.

Ma cundihni yo cacan yo chi Nyoo, tyicuan ta cuhva ra chi yo

(Lc. 11.9-13; 6.31)

⁷ Cacan ndo cha chiñuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña. ⁸ Vatyí tandihi ndo cha chicán ndo, ñihi ndo. Tatu nanducú ndo, nañihi ndo. Ta tatu sacachán ndo yuvehe, cunuña yuvehe.

⁹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyin pan chi ndo. ¹⁰ Ta ña tuhvá ndo chaha ndo noo coo chi sehe ndo tatu chicán ndotyin noo tiyaca chi ndo. ¹¹ Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutu yo, ra nyaá andivi. Cuaha ca cha vaha cuhva ra chi ndo tatu cacan ndo chi ra.

¹² Tari cuñí maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachí Nyoo, cha tyaq ra Moisés ta ra cacuvi profeta Nyoo ta cha naha.

**Tihin yuvehe ta cuiñi ityi
cha cuahan nu nyaá Nyoo**

(Lc. 13.24)

¹³ Nducu ndo cuhva quihvi ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan. ¹⁴ Soco tihin yuvehe ta cuiñi ityi cha cuahan ñáyivi cha ma naa ca maa nu cuoco ñáyivi vaha. Soco suhva ri ñáyivi nañihí ityi cuan.

**Chihin cha sacuví ri ñáyivi, ta
nicohón nuu yo chi ñu tatu ñu
vaha o ñu ña vaha cuví ñu**

(Lc. 6.43-44)

¹⁵ Saha ndo cuenda chi ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachi coyo ra tari noo mbee nu nyicú ndo. Sahá ra tyi ra vaha cacuví ra. Soco tari noo ñaña xaan cacuví ra. ¹⁶ Nyoho cuví nicohón nuu ndo chi ra chihin cha nyacuví ra. Tari noo yutun ña vaha, tyicuan caa cacuví ra. Vatyí noo tuñiyaca ma cuhva tun mango, ta ni ri noo iñu nduhva ma cuví cuhva chi tichaha ndivi. ¹⁷ Ta tyicuan caa tucu tandihi yutun vaha. Chahá tun chiti vaha. Ta tandihi yutun ña vaha, chahá tun chiti ña vaha. ¹⁸ Ta yutun vaha, ma cuví cuhva tun chiti ña vaha. Ta ni ri yutun ña vaha ma cuví cuhva tun chiti vaha. ¹⁹ Ta tandihi yutun cha ña chahá chiti vaha, cahnya yo chi tun. Ta cahmi yo chi tun. ²⁰ Ta tyicuan caa, chihin cha nyacuví ñáyivi cuví nicohon nuu ndo chi ñu tatu ñu vaha cuví ñu, o ñu ña vaha cuví ñu.

**Nu catyí ra Jesús vatyí ña tandihi
ñáyivi quihvi ñu nu nyacá ñaha Nyoo**

(Lc. 13.25-27)

²¹ Ma tandihi ñu cha catyí chii: “Sutu Mañi yuhu, Sutu Mañi yuhu”, cuquihvi ñu nu nyacá ñaha Nyoo gloria. Ñu sacuví

tandihí cha catyí maa Nyoo Suti, ican ñu cuan cuquihvi nu nyacá ñaha ra. ²² Quiví cha cucutuñi chi ñáyivi, cuaha xaan ñu cucatyí ñu chii tyehe caa: “Sutu Mañi yuhu. Yuhu cahin tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaha xaan milagru savahí chihin sivun”, cucatyí ñu chii.

²³ Tyicuan ta yuhu cucatyí chi ñu: “Ña ñohó nui chi nyoho. Canyaha ndo nu nyaí. Vatyí nyoho sacuví ndo maa maa ri cha ña vaha.”

**Nu sañahá ra Jesús yoso caa cucuvi
chi ñu quichahá ta ñu ña
quichahá tuhun cahán ra**

(Lc. 6.47-49; Mr. 1.22)

²⁴ Ithya catyí chi ndo, yóo cha chiñi tuhun cahín ta sacuví tari cuhva catyí; cuví ra tari noo ra chiñi tuñi cha savahá ra vehe ra siqui cava. ²⁵ Ta quichahá coon savi. Ta cama xaan yuvi ndutya yaha. Ta ñihí xaan caa tatyí. Soco ña cuví sanduva chi vehe cuan. Vatyí ñihí nanyaá siqui cava cuan. ²⁶ Soco yóo cha chiñi tuhun cahín, ta ña sacuví ra tari cuhva catyí; cuví ra tari noo ra tondo, cha savahá ra vehe ra nu ñiti. ²⁷ Ta chaa savi. Ta cama xaan yuvi ndutya yaha. Ta ñihí xaan caa tatyí. Ta vehe cuan tañi tyehe ri nduva —catyí ra Jesús chi ñu.

²⁸ Cuhva cha ndihí cahan ra Jesús chihin ñáyivi, iyo xaan cuiñi ñu tuhun cha sañahá ra. ²⁹ Vatyí sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

**Nu sanduvahá ra Jesús chi noo
ra cuhvi cha tyahyú coño**

(Mr. 1.40-45; Lc. 5.12-16)

8 Cuhva cha noo ra Jesús yucu cuan, cuaha ñáyivi nyicón chi ra. ² Ta chaa noo ra cha tyahyú coño, ta chicuñi chiti ra nuu ra, ta catyí ra chi ra:

—Sutu Mañi yuhu, tatu yoho ta cuñún, cuví sanduvahun chii —catyí ra chi ra.

³Tyicuan ta sanacaḡa ra Jesús ndaha ra ta tiñ ra chi ra, ta catyí ra:

—Cuñí sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvahḡa nu tyahyú cuan. ⁴Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuḡhan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

Nu sanduvahá ra Jesús chi musu noo ra capitán

(Lc. 7.1-10)

⁵Cuhva cha chaḡa ra Jesús Capernaum, noo capitán, ra ñuu Roma, chaḡa ra nu nyaá ra Jesús ta chacu ndahvi ra nuu ra, ⁶ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñihi xaan tahán ra.

⁷Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸Nacahan capitán cuan ta catyí ra:

—Sutu Mañi yuhu, ña nañé cha cahun vehi; soco tacuhva catyí run, ta musi nduvaha ra. ⁹Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cahun ra. Ta tatu cane chi inga ra, quichi ra. Ta tatu cha tave tyiño chi musi, sacuvi ra.

¹⁰Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicú nicahnu Israel, ta nañihi que ni noo ñáyivi cha chinó xaan iñi ñu tari chinó iñi ra ihya. ¹¹Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee

ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andivi. ¹²Ta ñu Israel cha tahán chi cahun andivi, yihí ñu, ma cahun ñu, vatyí cahun ñu nu ñaa iñi ityi chata. Ta yucuan cucuacu chaa ñu ta cucahñi noho ñu —catyí ra Jesús chi ñu.

¹³Tyicuan ta quichaha catyí ra chi capitán cuan tyehe caa:

—Cuḡhan, ta na cuvi chi tari cuhva catyūn vatyí chinó xaan iñun chii —catyí ra.

Ta suri cuhva cuan nduvahḡa musu ra.

Nu sanduvahḡa ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴Ta cha yahḡa cuan, chaḡa ra Jesús vehe ra Pedro. Ta nanyehé ra chi maha tyiso ra Pedro, catuví ña nu chito chihin cahñi. ¹⁵Ta tiñ ra ndaha ña, ta quitḡa cahñi cuan chi ña. Ta ndicuitḡa ña, ta quichahḡa tyiñuhu ña chi ra.

Nu sanduvahḡa ra Jesús cuaha ñu cuhví

(Mr. 1.32-34; Lc. 4.40-41)

¹⁶Ta cuhva cha cuaa cuan, quichi nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun caḡan ra, tavḡa ñehe ra chi tatyí ña vaha cuan, ta sanduvahḡa ra chi tandihí ñu cuhví. ¹⁷Tyicuan caa cuví tacuhva vatyí na chino cava tari cuhva catyí ra profeta Isaías, quivi catyí ra tyehe caa: “Maa ra queḡen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñí yo cunyicon yo chi ra Jesús?

(Lc. 9.57-62)

¹⁸Tyicuan ta nyehe ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi. ¹⁹Tyicuan ta chaḡa noo ra sacuahā ley vehe ñuhu ta catyí ra chi ra:

—Maestro, cuñí cunyiquen chuun tandíhi ri ityi nu cuhun —catyí ra.

²⁰ Ta ra Jesús catyí ra chi ra:

—Ñaña, iyó vehe ti, ta saa cha chico ra tatyí, iyó taca ti. Soco yuhu Rayíi cha quichí nya gloria, ñahri vehi ta ni ri nu cava xiñi ta ñahri —catyí ra.

²¹ Inga tucu ra chicá noo chihin ra catyí ra chi ra:

—Tata, cūhva na cuhun xihne cutyihí chi suti chichi ñuhú, tyicuan ta quichi ta cunyiquen chuun —catyí ra.

²² Ta catyí ra Jesús chi ra:

—Ñaha yoho vatyí cunyiquen chii. Saña chi ñu ña ñohó nuu chi Nyoo, na tyihí maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

²³ Tyicuan ta quihví ra chichi canoa, ta ra cachicá noo chihin ra, cuahan coyo ra chihin ra. ²⁴ Ta chaq noo tatyí ñihí xaan nu miñi cuan, ta nyacua chasí ndutya cuan canoa ra soco maa ra Jesús quixí ra.

²⁵ Ta ra cachicá noo chihin ra sandoyó ra chi ra, ta cacatyí ra:

—¡Sutu Mañi yuhu, saçacu chi yo, vatyí cuñí cunaa yo!

²⁶ Ta catyí ra Jesús chi ra:

—¿Ñáá tuhun cha yuhví xaan ndo? ¡Nyoho chiin xaan chinó iñi ndo chii!

Tyicuan ta nacandá ra ta sacutaxín ra tatyí nu miñi cuan, ta tandíhi cutaxín.

²⁷ Ta iyo xaan cacuñí ra cuan ta cacatyí ra:

—¿Yóó ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

Nu nduvahá uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

²⁸ Tyicuan ta chaq coyo ra inga chiyo miñi cha nyaá ñuhú cha nañí Gadara. Ta chaq coyo uvi tahan ra yihí tatyí ña vaha

chii. Ta nu ñaña caquita coyo ra cuan. Xaan vavaha ra, ta yori maa cuví yaha ityi cuan. ²⁹ Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tindoho chi ndi cha ni cumañi ca chaa quivi? —cacatyí ra cuan.

³⁰ Ta yatyin ri cuan nyicú cuaha quini cachachí ti. ³¹ Ta catyí tatyí ña vaha cuan chi ra Jesús:

—Tatu cuatava ñehun chi ndi, cūhva cha quihví ndi chichi quini cuan —cacatyí tatyí ña vaha cuan.

³² —Vaha. Quihví ndo —catyí ra Jesús.

Ta caquita coyo tatyí ña vaha cuan, ta quihví coyo chichi tandíhi quini canyicú cuan. Ta tandíhi quini cuan cachino ti ta canacoyo ti noo xahva yuhu miñi cuan, ta chihí ti chihin ndutya cuan.

³³ Tyicuan ta ra casaha cumi chi ti cuan, cachinó vavaha ra cuahan coyo ra chichi ñuu, ta canacatyí ra tandíhi cha cuví chi ra cayihí tatyí ña vaha cuan chi. ³⁴ Ta tandíhi ñáyivi ñuu, chahan ñu chinyehé ñu chi ra Jesús, ta chacu ndahví ñu nuu ra na quita ra yucuan.

Nu sanduvahá ra Jesús chi noo ra cuhví cha ña cuví nacanda

(Mr. 2.1-12; Lc. 5.17-26)

9 Tyicuan ta quihví ra Jesús chichi canoa ta yahá sava ra inga chiyo miñi, ta nachaq ra nya ñuu nu iyó ra. ² Nu nyaá ra yucuan chinyacá ñáyivi chi noo ra cuhví cha ña cuví nacanda catuví ra nu chito. Ta cha nyehe ra Jesús vatyí chinó xaan iñi ñu chi ra, quichaha catyí ra chi ra cuhví cuan:

—Saníi iñun, suti vatyí cha chicoq ticahnu iñi cuatyun —catyí ra chi ra.

³ Tyicuan ta quichahá chica xiñi suhva ra sacuahá ley vehe ñuhu cha nyicú yucuan tyehé caa: “Ra ihya chicoq cuatyí ra

nu Nyoo chihin tuhun cahán ra”, cachicá xiñi ra.

⁴Soco ra Jesús chitó ri ra ñáá cha cachicá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo? ⁵Vatyí ¿nya cha yíi ca catyí yo: atu yíi ca catyí yo “Cuatyun cha yaha ndachi”, o yíi ca catyí yo: “Ndícuita ta caçon”? ⁶Vaha. Cuasañahi chi ndo vatyí yuhu Rayíi cha quichi nya gloria, iyó ityi chii síqui ñuhu ñayiví ihya vatyí sahi ticahnu íni cuatyí —catyí ra Jesús.

Tyicuan ta catyí ra chi ra cuhví cuan:

—Ndícuita, ñaquehen chiton ta cuanuhu nya vehun —catyí ra.

⁷Tyicuan ta ndicuita ra cuhví cuan ta cuanuhu ra nya vehe ra. ⁸Cuhva cha nyehe ñáyiví tuhun ihya, canayuhví ñu. Ta casacahnú ñu chi Nyoo vatyí chaha ra tunyee íni cuan chi ñáyiví.

Nu caná ra Jesús chi ra Mateo

(Mr. 2.13-17; Lc. 5.27-32)

⁹Quitá ra Jesús yucuan, ta nanyehe ra chi noo ra cha nañi Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyí ra chi ra:

—Çoho chihin.

Tyicuan ta ndicuita ra Mateo ta tyinyicon ra chi ra.

¹⁰Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaç coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú tucu ra yucuan nu mesa íin ri chihin ra Jesús ta ra cachicá noo chihin ra. ¹¹Soco cha canyehe ra fariseo cha tyicuan caa, candaç tuhun ra chi ra cachicá noo chihin ra Jesús, ta cacatyí ra:

—¿Ñáá tuhun cha vatyí ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹²Chiñi ra Jesús cha cahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhví, soco chi ñu cuhví chiñuhú ra. ¹³Cuahan ndo ta çutuhva ndo cha cuñí chi catyí nu tutu Nyoo, nu catyí ra tyehé caa: “Yuhu cuñí vatyí cundahví cuñí ndo chi ñáyiví, ta ñima ca cha cahñi ndo quití ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyí cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar

(Mr. 2.18-20; Lc. 5.33-35)

¹⁴Tyicuan ta ra canyicón chi ra Juan, ra sacondutya chi ñáyiví, catuhva ra chi ra Jesús ta candaç tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

¹⁵Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quiví vatyí cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyí ña chachí tahan tuhun chahnu cha iyó ñu chihin tuhun chaa cha sañahá ra chi ñu

(Mr. 2.21-22; Lc. 5.36-39)

¹⁶Yori naquicú noo vestido chahnu chihin noo sahma chaa vatyí coto cundiýi nu naquicú ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca. ¹⁷Ta ni ña tyihí yo vinu chaa chichi ñii chahnu vatyí tatu sacuvi yo tyicuan caa, tahnya ñii cuan, ta tari cunaa vinu, ta cunaa

ñiñ cuan. Yucuan chaha cuñí chi tyihi yo vinu chaa chichi ñiñ chaa, ta tyicuan ta ninduvi ta cusaha cuenda chi chi tahan chi.

Sehe ra Jairo, ta ñaha cha tiñ sahma ra Jesús

(Mr. 5.21-43; Lc. 8.40-56)

¹⁸ Cha ni ri ca cha catyí ra Jesús tuhun ihya, chaq noo ra cuví nuu chi ñu Judea ta chicuiniñ chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chi ra Jesús.

¹⁹ Ndicuita ra Jesús ta cuahan ra iin ri chihin ra ta ra cachicá noo chihin ra ñandihi.

²⁰ Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tiñ ña yuhu sahma ra, ²¹ vatyi tyehe caa chicá xiñi ña: “Ma chihin cha tiñ ri sahma ra ta nduvahi”, chicá xiñi ña.

²² Soco ra Jesús nanyocava ra nanyehe ra chi ña, ta catyi ra chi ña:

—Nduniñ iñun sihi, cha nduvahun vatyi chinó iñun —catyí ra.

Ta caa cuhva ri cuan ta nduvaha ña.

²³ Yaha cuan ta chaq ra Jesús vehe ra cuví nuu cuan, ta nyehe ra vatyi ra música canyatú tuhva ra cha cuhun coyo ra nu quihvi cue chichi ñuhú. Ta ñáyivi cha nyicú cuan chacú chaa ñu. ²⁴ Ta catyí ra chi ñu:

—Quita ndo ihya. Ñaha tyivaa ihya, ña chihí ña, soco quixí ña —catyí ra.

Ta chacú cuehe ri ñáyivi nyehe ñu chi ra. ²⁵ Soco ra Jesús tava ra chi ñu ityi chata vehe, tyicuan ta quihvi ra ta tiñ ra ndaha ñaha tyivaa cuan, ta maa ña ndicuita ña. ²⁶ Ta tandihi ityi cuan chitya tuhun cha cuví yucuan.

Nu sanduvaha ra Jesús chi uvi ra cuaa

²⁷ Cuhva cha quita ra Jesús yucuan, uvi tahan ra cuaa canyicón chi ra suri caná chaa ra ta cacatyí ra:

—¿Cundahvi cuñi chi ndi, yoho ra vachi tata ra David! —cacatyí ra.

²⁸ Ta cuhva cha quihvi ra Jesús chichi vehe, ra cuaa cuan, catuhva ra chi ra, ta maa ra Jesús quichaha ndaca tuhun ra chi ra:

—¿Atu chinó iñi nyoho vatyi cuví sanduvahi chi ndo? —catyí ra.

Ta canacahan ra ta catyí ra:

—Ay, chinó iñi ndi chun, Sutu Mañi yuhu —cacatyí ra.

²⁹ Tyicuan ta tiñ ra Jesús chiti nuu ra ta catyí ra chi ra:

—Na cuvi maa yoso cuhva chinó iñi ndo —catyí ra.

³⁰ Ta canduvaha chiti nuu ra. Ta catyí vaha ra Jesús chi ra tyehe caa:

—Nducu ndo cuhva cha yori coto.

³¹ Soco quita coyo cuiri ra ta quichaha canacatyí ra cha sacuvi ra Jesús chihin ra chi ñáyivi tandihi ityi yucuan.

Nu sanduvaha ra Jesús chi noo ra ñihí

³² Cha ni ri ca cha caquita coyo ra cu-cuaa cuan, suhva ñáyivi quichi nyaca ñu chi noo ra ñihí cha yihí noo tatyí ña vaha chi nu nyaá ra Jesús. ³³ Ta caa cuhva ri cha tava ñehe ra Jesús tatyí ña vaha cuan, quichaha cuvi cahan ra cuan. Ta iyo xaan cuñi ñáyivi, ta catyí ñu:

—Ni noo chaha ta cuvi ca cha tyehe caa Israel Ihya —catyí ñu.

³⁴ Soco ra cacuvi fariseo, cacatyí ra:

—Ra ihya tava ñehe ra tatyí ña vaha chihin tunyee iñi chi cuihna ra cuví nuu —catyí ra.

Nu catyí ra Jesús vatyi ña cuaha maa ñu sahá tyiño cuenda Nyoo iyó

³⁵ Ra Jesús chahan ra tandihi ñuu sañahá ra chi ñáyivi chichi vehe ñuhu

tahan tahan ñuu. Cahán ra tuhun Nyoo yoso caa nyacá ñaha Nyoo añima ñáyivi. Ta sanduvahá ra tandíhi nuu cuehe cha yihí ñu. ³⁶Ta cha nanyehé ra chi ñáyivi, cundahvi cuñí ra nyehé ra chi ñu, vatyi nyehé ñu tindoho ta cuihya cuñí ñu, tari mbee quiti cha yori sahá cumi chi. ³⁷Ty-icuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra. ³⁸Yucuan chaha, çacan ndo chi chitoho tyiño yucuan, na tachi ra chi ra saha tyiño na sataca ra tyiño cuan.

Nu cachí ra Jesús chi ndi uchi uvi ra caca tyiño ra

(Mr. 3.13-19; Lc. 6.12-16)

10 Tyicuan ta cana ra Jesús chi ndi uchi uvi ra chicá noo chihin ra ta chaha ra ityi chi ra vatyi tava ñehe ra chi tatyí ña vaha cha yihí añima ñáyivi, ta sanduvaha ra ndíhi nuu cuehe ta cha uhvi ñandíhi.

²Ican ihya cuví sivi ndi uchi uvi ra chicá tyiño ra: xihna ca, ra Simón, cha nañí tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra; ³ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañí tucu Tadeo, ⁴ta ra Simón cha yihí cuenda ityi ra cacuñí cahun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachí ra Jesús chi ra cachicá noo chihin ra, na cucahan ra tuhun Nyoo

(Mr. 6.7-13; Lc. 9.1-6)

⁵Ta tyehe caa tachí ra Jesús chi uchi uvi tahan ra cuan, ta catyí ra:

—Ma cahun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria. ⁶Cuahan ndo, soco

nu nyicú mbee cha cuanaa cha cuví ñu ñuu Israel. ⁷Cuahan ndo cucahan ndo tuhun vatyi cha chaa cha cunyaca ñaha Nyoo añima ñáyivi. ⁸Sanduvaha ndo chi ñu cuví ñu tyahyú coño, ta ñu yihí inga cuehe chii. Sanandoto ndo ndiyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee ñi ihya chihin cha ñahri yahvi, ta cotyiño ndo soco ma quehen ndo yahvi.

⁹Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha. ¹⁰Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cahun chihin ndo. Ta ma cuiso ndo inga ityi ndichan, ni yutun ma tuvi ndo, vatyi ra sahá tyiño, iyó ityi chi ra cha coo yahvi ra.

¹¹Cuhva cha chaa ndo noo ñuu, nducu ndo noo ñáyivi cachi iyó, ta ndo ndo vehe ñu nyacua nya quita ndo ñuu cuan. ¹²Cuhva cha cua quihvi ndo noo vehe, cuhva ndo nocumi chi ñáyivi iyó vehe cuan. Ta catyi ndo chi ñu: Na coo cha taxi Nyoo añima ndo, catyi ndo chi ñu. ¹³Ta tatu ñu ñuu cuan ta nacotó ñu tyi chiñuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyi chiñuhú cuan chi ñu, ma ndoo cuan chihin ñu. ¹⁴Ta tatu ña cuñí ñu quehen cuenda ñu chi ndo, ta ni ña cuñí ñu cuñí ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo. ¹⁵Cha ndicha catyí chi ndo vatyi quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáá ndíhi tindoho cunyehé ñu chicá tyiño Nyoo

¹⁶¡Nyehe ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma. ¹⁷Saha ndo cuenda chi ndo vatyi ñáyivi cucuhva cuenda

ñu chi ndo chi ra cuví tyiño, ta chichi vehe ñuhu cucañi ñu chi ndo. ¹⁸Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhin nuu ra ta nuu ñu cha ñima ñu Israel cuví. ¹⁹Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyí tatu chaa cuhva cha cahan ndo, Nyoo cucuhva ra tuhun cha cucahan ndo. ²⁰Vatyí ñima maa ndo cucahan, soco maa Tatyí Ii Sutu yo Nyoo cusacahan chi ndo.

²¹'Rayii cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihi ñáyivi cunanuhu ñu siqui sutu ñu ta sihi ñu, ta cusacuví ñu, na cúvi ñu.

²²Tandihí ñáyivi, cucutasi cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu ñima ndo. ²³Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyi chi ndo ni cha ta ndihí ca cahan ndo tuhun Nyoo tandihí ñuu nu nyicu ñáyivi Israel ta yuhu Rayii cha quichi nya gloria cuquichi inga chaha.

²⁴'Ni noo ra cutuhvá, ña cahnu ca ra cuví ra ican saha ra sacuaha chi ra. Ta ni noo musu, ña cahnu ca cuví ra ican saha chitoho ra. ²⁵Ra cutuhva, cuñi chi ndoo ra vaha cha chaa ra cuví ra tari ra sacuaha chi ra, ta musu tari chitoho ra. Tatu yuhu ra cuví chitoho vehe, catyí ñu chii vatyí Beelzebú, cuihna ra cuví nuu, cuví, suri tyicuan caa cucatyí tucu ñu chi ñáyivi cuende.

Yóo chi tahán chi cuyuhvi yo

(Lc. 12.2-7)

²⁶'Yucuan chaha ma yuhvi ndo chi ñáyivi, vatyí ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñún tyi ma coto tandihí ñáyivi. ²⁷Tandihí cha catyí chi ndo nu ñaa iñi,

catyi nyoho nu ndichin. Ta tandihí cha catyi chi ndo nu xehe, çana chaa ndo nya xiñi vehe, na coto tandihí ñáyivi. ²⁸Ma yuhvi ndo chi ñu chahñi coño ñuhu yo, vatyí ma cuví cahñi ñu ñima yo. Soco yuhvi ndo chi ra cuví sanaa coño ñuhu yo ta ñima yo chichi anyaya ñandihí.

²⁹'¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo. ³⁰Vatyí nyacua nya ixi xiñi nyoho ta chitó Nyoo yoso tahan nyaá. ³¹Ma yuhvi ndo. Nyoho, yahvi ca nyaá ndo ta ñima ca ticuítí saa.

Ma yuhvi yo cahan yo tuhun ra Jesucristo nuu ñáyivi

(Lc. 12.8-9)

³²'Tandihí ñu cha cahán vaha tuhin nuu ñáyivi, yuhu tucu cucahan vahi cuenda ñu nuu Suti ra nyaá andivi. ³³Soco ñu cahán nuu cahan tuhin, yuhu tucu ma cahin tuhun ñu nuu Suti ra nyaá andivi.

Cha cuenda ra Jesús cusiiñ ñáyivi

(Lc. 12.51-53; 14.26-27)

³⁴'Ma cuñi ndo vatyí yuhu vachi cuhve cha taxi ri coo ndo siqui ñuhu ñáyivi ihya. Ña vachi cuhve cha taxi ri, soco cha cañi tahan ñáyivi. ³⁵Vatyí sasiñ chi ndo. Vatyí noo ra cuhun ra siqui sutu ra. Ta noo ña cuhun ña siqui sihi ña. Ta ñu cuví chono cucañi tahan ñu chihin tyiso ñu. ³⁶Ta tyicuan caa suri ñáyivi chi ndo cucuvi ñu ñu xaan iñi chi ndo.

³⁷'Ñu cha cuñi ca chi sutu o chi sihi ican saha chi yuhu, ña tahán chi cuví ñu ñu cuende. Ta ñu cuñi ca chi sehe, ican saha chi yuhu, ña tahán chi cuví ñu ñu cuende. ³⁸Ta ñu cha ña cuñi nyehe tindoho ta cunyicon ñu chii, ña tahán chi cuví ñu ñu cuende. ³⁹Vatyí ñu ña cuñi nyehe tindoho cha cuenda yuhu, cun-

yehe ñu tindocho anyaya, soco ñu nyehé tindocho ta chahá ñáyivi cha catyi yuhu, cucacu aña ñu.

Yahvi cha tahán chi chi yo

(Mr. 9.41)

⁴⁰Ñu quehén cuenda chi ndo, chi yuhu quehén cuenda ñu, ta ñu quehén cuenda chi yuhu, quehén cuenda ñu chi ra cha tachí chii. ⁴¹Ñu quehén cuenda noo ra profeta Nyoo cha cuenda vatyi cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chi noo ra vaha cha cuenda tyi ra vaha cuví ra, suri tahán yahvi cha cuñihi ra vaha cuan cuñihi ñu. ⁴²Ta savahri ñu cha cuhva vasi noo vasu ndutya vichin coho ñu nyihi ihya cha cuenda cha nyicón ñu chii, cuñihi ñu cha cucuhva Nyoo chi ñu —catyi ra Jesús.

Ra cha tachí ra Juan nu nyaá ra Jesús

(Lc. 7.18-35)

11 Ndihi chaha ra Jesús tuhun chi uchi uvi ra chicá noo chihin ra, tyicuan ta quitá ra yucuan, vatyi cucahan ra tuhun Nyoo chihin ñáyivi cha iyó ñuu cha nyicú ityi cuan.

²Ta ra Juan nu ñohó ra vehe caa, ñihí ra tuhun cha sacuví ra Cristo. Tyicuan ta tachí ra chi uvi ra nyicón chi ra, cundaca tuhun ra noo tuhun chi ra Jesús. Ta cachaá coyo ra nu nyaá ra ³ta cacatyí ra chi ra:

—¿Atu yoho cuvún ra Cristo cha tahán chi quichi sacacu chi ndi, o cuñi chi cha cuatu ndi chi inga ra? —cacatyí ra chi ra.

⁴Nacahan ra Jesús ta catyi ra:

—Cuhvan ndo ta catyi ndo chi ra Juan cha nyehé ndo, ta cha chiñí ndo. ⁵Nacatyí ndo chi ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñi ñu soho, ta ñu ndiyi nandoto ñu, ta chihin ñu ndahvi cahán

ndi tuhun Nyoo yoso caa sacacu ra aña ñu.

⁶Sii xaan cuñi ñu ña chicá uvi iñi nyicón chii.

⁷Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyi ra:

—¿Ñáá cha chahan nyoho chinyehe ndo chiqui ndii cuan? ¿Atu chinyehe ndo noo ndoo cha naquisi tatyí? ¿Ñáá cha nyehé ndo? ⁸¿Atu nyehé ndo noo ra vaha ñihnó? Ñima. Nyoho chitó ndo vatyi ra ñihnó vaha, nyaá ra vehe rey. ⁹Tu tyicuan caa, ¿ñáá cha chahan ndo chi nyehé ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo. ¹⁰Vatyi ican ra Juan ihya, cuví cha cahán tuhun nu tutu Nyoo tyehe caa:

Yuhu cuví Nyoo ta tachí chi noo ra cahan tuhun ityi nuu nu cuhun.

Vatyi cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quivi quichun.

¹¹Cha ndicha catyi chi ndo, vatyi chichi cha tandihi ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo aña, vasi cuví ra noo ra luhlu ca, soco cahnu ca ra ta ñima ca ra Juan. ¹²Nyacia nya quivi cha cha ra Juan ta nya vityin, cuaha ñu ndachan sahá chii nducú sativi ñu tuhun Nyoo, ña cuñi ñu cha cunyacá ñaha Nyoo aña ñáyivi. ¹³Ra Moisés cahan ra tuhun yoso caa nyacá ñaha Nyoo aña ñáyivi, ta tyicuan caa tucu tandihi ra profeta nyacia nya quivi quichi ra Juan. ¹⁴Ta tatu cuñi nyoho chino iñi ndo tuhun cahín, catyi chi ndo vatyi profeta Elías cha tahan chi quichi, ra Juan cuví ra. ¹⁵Yóó ñu cha cutuñi iñi, na tyasoho ñu tuhun cahín.

¹⁶¿Yóó chihin sandu inuu ri chi ñáyivi cha iyó tyembu ihya? Tari ra cuatya cuví ñu, vatyi chicunyaa ndotyin nuyahvi nyasiqui ndotyin, ta canachaa

ndotyin chi ra tahan ndotyin, ta catyí ndotyin tyehe caa: ¹⁷“Tiví ndi flauta, soco ña chita chaha ndo. Chita ndi yaa cuihya soco ña chacu ndo.” Tyicuan caa tucu nyoho, ni noo cuhva ña tahan iñi ndo. ¹⁸Vatyí quichi ra Juan, cha ña chachi ra ta ña chihí ra, ta nyoho catyí ndo vatyí noo tatyí ña vaha yihí chi ra. ¹⁹Yaha cuan ta quichi tucu yuhu Rayii cha quichi nya gloria. Ta yuhu chachi ta chihí tandihi, ta catyí ndo tyi ra cuahyi ra tuhvá chihí cuví. Ta ña tahan iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi ñu naquehén tuhun cahin ta tuhun cahán ra Juan, ta maa ñu cusañaha chi ndo vatyí vaha cha chiñi tuñi Nyoo —catyí ra Jesús.

**Uvi ñuu nu ña tyasohó
ñáyivi tuhun Nyoo**

(Lc. 10.13-15)

²⁰Tyicuan ta quichaha cahan ra Jesús chi ñu ñuu nu sacuvi ra cuaha milagru, vatyí ñáyivi cuan ña canasama maa ñu cuhva iyó ñu, ta catyí ra:

²¹—¡Ndahvi nyoho, ñu ñuu Corazin!
¡Ndahvi nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehe ñu. Soco tyehe ta nyehe ñu nyatu cahnu quivi cuan tari cha nyehé nyoho vityin, tañi tyehe ri ndihvi noo ñu sahna tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ²²Soco catyí chi ndo vatyí quivi cutuñi chi nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón. ²³Ta nyoho ñu ñuu Capernaum, cuñí maa ndo tyi cundaa ndo nya andivi, soco cunoo ndo nya nu nyicú ñu ndiyi.

Vatyí tyehe ta cuví milagru ñuu Sodoma cuan, tahan cha cuví ñuu ndo, ñuu cuan coo ca nyacua nya vityin. ²⁴Soco catyí chi ndo vatyí quivi cutuñi chi nyoho, yaha ca cunyehe ndo tindoho, ta ñima ca ñu ityi ñuu Sodoma cuan.

**Cuhva ndo chi ndo chii, ta cuhve cha
nyitatu ndo, catyí ra Jesucristo**

(Lc. 10.21-22)

²⁵Tyembu cuan catyí ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andivi ta ñuhu ñayivi. Sacahni chuun vatyí sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandihí. ²⁶Ndicha Sutu Mañi yuhu, vatyí tyicuan caa cuñí maun.

²⁷Tyicuan ta catyí tucu ra:

—Suti nacuhva cuenda ra tandihí chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi Suti, soco noo tuhun ri mai, cha cuví Sehe ra chii, ñohó nui chi ra. Ta ñáyivi cha cuñí mai cha cohon nuu chi ra, ican ñu cuan cua cohon nuu chi ra. ²⁸Tandihí nyoho cha chitatu ndo cha sahá tyiño ndo, ta chihin carga cha nyisó ndo, quichi ndo nu nyaí, ta yuhu cuhve cha nyitatu ndo. ²⁹Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu ñima ndo. ³⁰Ña yii cha cuhva ndo chi ndo cha cunyaca ñahi. Ta carga cha chahí chi ndo, ñahma.

**Nu tohón ra cachicá noo chihin ra
Jesús yoco trigu quivi nyitatu ñáyivi**

(Mr. 2.23-28; Lc. 6.1-5)

12 Noo quivi nyitatu ñáyivi, yaha ra Jesús mahñu nu iyó cha tachí ñu. Ta chaa soco chi ra cachicá noo chihin ra. Ta quichaha catohon ra yoco trigu

cuan ta quichaha cachachi ra chiti yoco cuan. ²Cuhva cha cananyehę ra fariseo cha tyicuan caa, cacatyı ra chi ra Jesús:

—Nyehe, ra cachicá noo chuhun sacuvı ra noo cha ña tahán chi sacuvı yo quıvi nyitatú yo —catyı ra chi ra.

³Soco maa ra Jesús catyı ra chi ra:

—¿Atu ta sacuaha ca nyoho cha sacuvı ra David chihin ra tahan ra quıvi cha chisoco ra? ⁴Quihvı ra chichi vehe Nyoo. Ta quehen ra pan ii cha cha yahę catuvı nuu Nyoo. Ta chachi ra ta ña tahán chi cachi ra, ni maa ra ni ra ndihi chihin ra, vatyi maa ri maa tata sutu tahán chi cachi pan cuan. ⁵¿O ta sacuaha ca ndo nu ley cha chaha Nyoo chi ra Moisés nu catyı chi vatyi ra cacuvı sutu, ña canyitatú ra quıvi nyitatú yo, soco sahá tyiño ra chichi vehe ñuhu? Yucuan nyehé yo vatyi ñima cuatyı cuvı cuan. ⁶Ta catyı chi ndo, vatyi ihya nyaá yuhu cha cuvı noo ra cahnu ca ican saha vehe ñuhu. ⁷Nyoho, ta cutuñi ca iñi ndo nu catyı chi tyehe caa nu tuhun Nyoo: “Cha cuñı yuhu, cha cundahvi cuñi ndo nyehe ndo chi tahan ndo, ta ñima ca cha cahñi ndo quitı ta cuhva cuenda ndo chii.” Tyehe ta cutuñi iñi ndo tuhun ihya, ma tyaa ndo cuatyı siqui ñáyivi cha ñahri sacuvı. ⁸Yuhu cuvı Rayii cha quichi nya gloria. Ta iyó ityi chii vatyi catyı chi noo noo ndo ñáá cha sacuvı ndo quıvi nyitatú yo —catyı ra Jesús.

Nu nduvahę ra cha ityi ndaha

(Mr. 3.1-6; Lc. 6.6-11)

⁹Tyicuan ta quita ra Jesús yucuan, ta cuahan ra vehe ñuhu. ¹⁰Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyı siqui ra Jesús. Yucuan chaha candaca tuhun ra chi ra ta catyı ra:

—¿Atu cuvı sanduvaha yo chi noo ñu cuhvı quıvi nyitatú yo? —cacatyı ra chi ra Jesús.

¹¹Ta nacahan ra Jesús ta catyı ra:

—¿Nya noo nyoho, tatu canacava noo mbee sana ndo chichi noo yavi quıvi nyitatú yo, atu ma cuhun ndo ta tava ndo chi ti? ¹²Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyi tahán chi sacuvı yo cha vaha quıvi nyitatú yo —catyı ra.

¹³Tyicuan ta catyı ra chi ra cha ityi ndaha cuan:

—Sanacaa ndahun —catyı ra.

Ta cuhva cha sanacaę ra, nduvahę ri ndaha ra tari inga chiyo cuan. ¹⁴Tyicuan ta caquita coyo ra fariseo cuandatumuh tahan ra yoso caa cacahñi ra chi ra Jesús.

Noo profeta, ra chahá cuenda tuhun cahán Nyoo, cahęn ra tuhun ra Jesús cha ni cumañi ca cacu ra

¹⁵Cha chito ra Jesús tuhun tyi canducú ra chi ra, quita ra yucuan ta cuaha ñáyivi chinyicon chi ra. Ta maa ra sanduvahę ra chi tandihi ñu cuhvı. ¹⁶Ta catyı ra chi ñu tyi ma cahan ñu tuhun vatyi ican ra sanduvahę chi ñu. ¹⁷Tyicuan caa cuvı tacuhva nachino cava tuhun cha tyaa ra Isaías ra cuvı profeta Nyoo ta cha naha. Tyehe caa tyaa ra:

¹⁸Ican ra ihya cuvı ra sacuvı tyiño nui, ra cha nacachi vahi.

Cuñı xain chi ra, ta sii cuñı chihin ra.

Cusacuti chi ra chihin Tatyı Ii cha iyó chii.

Ta cusacoto ra chi ñáyivi cha ñima ñu Israel cuvı yoso caa sacuvahi chi ñu nui.

¹⁹Ta ma xaan cahan ra ta ni ma cana chaa ra, ta ni yori cuiñi ndusu ra ityi cahnu.

²⁰Ta ni noo ndoo yacua, ta ma cahnu ndihi ra.

Ta ni ma ndahva ndihi ra mecha cha caña ñuhma.

Nyacua nya cha sanicoo vaha ra chi ñáyivi chihin ra ta cunyaca ñaha vaha ra añima ñu.

²¹ Ta tandihi ñáyivi, ta chi ra cuquihi iñi ñu.

**Nu catyí ñáyivi vatyí ra Jesús,
tunyeé iñi ra ña vaha iyó chi ra**

(Mr. 3.20-30; Lc. 11.14-23; 12.10)

²² Tyicuan ta nu nyaá ra Jesús chinya-ca ñu chi noo ra yihí tatyí ña vaha chi, cuaa ra ta ñihi ra. Ta ra Jesús sanduvaha ra chi ra. Ta cuví nacahan ra, ta cuví nanyehe ra. ²³ Iyo xaan cuñí tandihi ñáyivi, ta catyí ñu:

—¿Vasi ra vachi tata rey David cuví chi ra ihya? —catyí ñu.

²⁴ Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuihna, tavá ra ihya tatyí ña vaha —catyí ra.

²⁵ Soco ra Jesús chitó ra cha cachicá xiñi ra, yucuan chaha catyí ra chi ra:

—Tatu noo gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha canyacá ñaha ra. O tatu noo ñuu o tandihi ñáyivi noo vehe cacusiin ñu chihin tahan ñu, cutivi nu nyicú ñu. ²⁶ Ta tyicuan caa tucu, tatu cuihna ta tava ra suri ra tahan maa ra, cuñí chi catyí vatyí ña iin ri cacuví ra, ta cundihi fuerza cha iyó chi ra. ²⁷ Ta nyoho catyí ndo vatyí yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóo cha chaha fuerza vatyí tavá ra tatyí ña vaha? Maa ra na sacoto ra chi ndo cha ndicha, vatyí nyoho tondo ri chicá xiñi ndo. ²⁸ Yucuan chaha catyí chi ndo, vatyí yuhu tave tatyí ña vaha chihin fuerza Tatyí Ii Nyoo. Ta cuñí chi catyí vatyí ndicha cuii Nyoo ra nyacá ñaha aña ñáyivi cha chaq ra nu canyicú ndo.

²⁹ Chichi vehe noo ra ñihi xaan, tari cuihna, ma cuví quihvi noo ra ta quehen

ra tandihi cha chii ra, soco tatu cuhñi xi-hna ra chi ra tyicuan caa ta cuví tinyaa ra tandihi cha chii ra.

³⁰ Ñáyivi cha ña nyaá tumañi iñi chii, ñáyivi xaan iñi chii cuví ñu. Ta tatu ña tyinyeé ndo chii cha cahán ndo tuhun nuu ñáyivi, cuñí chi catyí vatyí ña chahá ndo cha coto ñáyivi tuhun cahán.

³¹ Yucuan chaha catyí chi ndo vatyí Nyoo sahá ra ticahnu iñi cuatyí ñáyivi, ta ñáá cha ña vaha cahán ñu ñandihi, soco cha cahan ña vaha ñu siqui Tatyí Ii Nyoo, yucuan ndicha, ma coo ticahnu iñi cha cuenda ñu. ³² Ta yóo ri ñu cha cahán ña vaha siqui yuhu Rayii cha quichi nya gloria, coo ticahnu iñi chi ñu cha cuenda cuan. Soco ñu cahán ña vaha siqui Tatyí Ii Nyoo, ma coo maa ticahnu iñi chi ñu cha cuenda cuatyí cuan, niri ihya ñáyivi, ta niri inga ñáyivi ñandihi.

**Chihin cha sacuvi ri ñáyivi ta
nicohon nuu ri yo chi ñu tatu ñu
vaha o ñu ña vaha cuví ñu**

(Lc. 6.43-45)

³³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nicohón nuu ri yo tatu yutun vaha cuví tun chihin chiti cha chahá tun. ³⁴ ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa aña cuví ndo? Vatyí cha quitá chichi aña yo ican cuan cahán yo. ³⁵ Noo ra vaha cahán ra tuhun vaha vatyí ñohó cha vaha aña ra. Ta ra quiñi iyó, maa maa ri tuhun quiñi caa cahán ra, vatyí cha quiñi caa ñohó aña ra. ³⁶ Ta yuhu catyí chi ndo vatyí quivi cutuñi chi tandihi ñáyivi, cucuhva ñu cuenda tandihi tuhun cha ña sahá ñu cuenda ta cahan ñu. ³⁷ Vatyí yoso cuhva cahán, yucuan cuhva cucutuñi chuun, tatu iyó o ñahri cuatyun.

**Ñu quiñi iyó cuñi ñu
nyehe ñu seña milagru**

(Mr. 8.12; Lc. 11.29-32)

³⁸Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:

—Maestro, cuñi ndi vatyí sacuvun noo seña milagru vatyí nyehe ndi.

³⁹Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñi ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu. ⁴⁰Vatyí tari ñohó ra Jonás chichi tiyaca cahnu cuan uñi quiñi ta uñi ñuu, tyicuan caa cucohon yuhu Rayii cha quichí nya gloria chichi ñuhú uñi quiñi ta uñi ñuu. ⁴¹Ta quiñi cucutuñi chi tandihi ñáyivi, cundicuita ñu chiyo ñuu Ninive ta cha naha ta cucatyí ñu na tachí tuñi Nyoo chi nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quiñi cahan ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás. ⁴²Vatyí tyicuan caa tucu ñaha cha cuví reina ityi Sur, cundicuita ña quiñi cucutuñi chi ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichí ña, quichí tyasoho ña tuhun cha chiñi tuñi ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

**Yoso caa ndichi tucu tatyí ña vaha
inga chaha ańima ñáyivi
tatu naa ińi ñu chi Nyoo**

(Lc. 11.24-26)

⁴³Tatu noo tatyí ña vaha quita chi ańima noo rayii, chicá noo chi noo nu ityi, nanducú chi noo nu nyitatu chí, soco ña nańihi chi nu nyitatu chí. Tyicuan ta ndichi xińi chí: ⁴⁴“Cunuhu tiqui

nya vehi nu quite.” Yucuan ta nachaa chi ańima ra nu quita chí. Ta nanyehe chí vatyí ndii xaan, ta yori nyaá. ⁴⁵Tyicuan ta cuanaquehen chí ucha ca tahan tatyí ña vaha, cha yaha ca cuhva ican saha maa chí. Tyicuan ta quihvi tandihi tatyí ña vaha cuan ańima ra cuan. Yucuan chaha, quiñi ca cunicoo ra ta ñima ca cuhva chiyo maa ra. Ta tyicuan caa cucuvi chí ñáyivi quiñi iyó ihya —catyí ra Jesús.

**Tari yańi ra Jesús ta tari sihi ra cuví
chi ñáyivi sacuví cuhva catyí Nyoo**

(Mr. 3.31-35; Lc. 8.19-21)

⁴⁶Ni cahán ca ra Jesús chihin ñáyivi, ta chaá sihi ra ta yańi ra, ta ndoo ñu chata vehe, ta cuñi ñu cahan ñu chihin ra. ⁴⁷Tyicuan ta sacoto noo ñáyivi nyaá cuan chí ra Jesús, ta catyí ñu:

—Sihun ta yańun nyicú ñu chata vehe. Ta cuñi ñu cahan ñu chuhun.

⁴⁸Tyicuan ta nacahan ra Jesús ta catyí ra chí ñu:

—¿Yóo cha cuví sihi ta yańi? —catyí ra.

⁴⁹Tyicuan ta sańaha ndaha ra chí ra cachicá noo chihin ra, ta catyí ra:

—Ican ra ihya cuví sihi ta yańi. ⁵⁰Vatyí tandihi ñáyivi cha sacuvi cuhva cuñi Suti ra nyaá andivi, ican ñu cuan cuví yańi, ta cuhve, ta sihi —catyí ra Jesús.

**Tari noo ra chicá noo tachí,
tyicuan caa cuví ra cahán
tuhun Nyoo chihin ñáyivi**

(Mr. 4.1-9; Lc. 8.4-8)

13 Quiñi cuan quita ra Jesús vehe ra ta chicunyaá ra yuhu mińi. ²Ta chaha cha cuaha ñáyivi nataca nu nyaá ra, quihvi ra chichi noo canoa ta chicunyaá ra. Ta tandihi ñáyivi ndoo ñu nyicú ñu nu ñiti cuan. ³Tyicuan ta cuaha ri cha quichaha sańahá ra chí ñu chihin noo cuhva ta catyí ra:

—Noo chaha quitā noo ra, tachī ra chitī trigu. ⁴Ta nu cuahan ra quitī ra chitī cuan, canacoyo suhva chitī cuan yuhu ityi. Ta quichī coyo saa ta cachachī ti. ⁵Ta suhva ca canacoyo ticu yuu, nu ña cuaha ñuhú yihí. Ta yucuan cañā chitī cuan cha numi ri vatyī ña cuaha ñuhú yihí chaha. ⁶Soco cuhva cha cañā ñanyii iin na ityi ri tun, vatyī ña cono yihí yoho tun. ⁷Suhva ca chitī canacoyo ticu iñu. Ta chahnū iñu cuan. Ta chasī chi nuu tun. Yucuan chaha ña chiyō chitī tun. ⁸Soco suhva ca canacoyo nu ñuhú vaha. Ta quivi cachahnu tun, vaha xaan cachahā tun chitī, vatyī yihí tun noo cientu chitī chaha tun cha noo ri maa tun. Ta inga tun uñi xico, ta inga tun oco uchi chitī chahā tun. ⁹¡Tatu cutuñi iñi ndo, tyasoho ndo!

Nu sacoto ra Jesús ñáá tuhun cha chihin cuhva ri cahan ra ta ña cahán cachi ra

(Mr. 4.10-12; Lc. 8.9-10)

¹⁰Tyicuan ta tuhva ra cachicá noo chihin ra Jesús, ta candacā tuhun ra chi ra, ta catyí ra:

—¿Ñáá tuhun cha chihin cuhva ri cahún chihin ñáyivi, ta ña cahán cachun chihin ñu? —cacatyí ra.

¹¹Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu. ¹²Vatyī ñáyivi cutuñi iñi tuhun cahín ta sacuví ñu, cuaha ca cucutuñi iñi ñu. Ta ñáyivi cha chiin ri cutuñi iñi, ta ña cuñi ñu sacuvi ñu, cutinyaa ndihi cha cutuñi iñi ñu. ¹³Yucuan chaha vatyī chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan. ¹⁴Ta tyicuan caa ta chinó cava tuhun cha cahan ra Isaías ra profeta Nyoo ta cha naha, ta catyí ra:

Cha ndicha vatyī nyoho cuiñi ndo tuhun, soco ma cutuñi iñi ndo.

Ta cunyehe ndo cha sacuví, ta ma cutuñi iñi ndo.

¹⁵Vatyī cha ndundava añima ñáyivi ihya, ta ña cachi vaha chiñi ñu.

Ta tahán nuu ñu,

Tacuhva cha ma nyehe ñu chihin chitī nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin añima ñu.

Ta ni ma nanducu ñu chii, tacuhva sanduvahi chi ñu.

¹⁶'Soco sii xaan cuví chi nyoho, vatyī nyehé ndo chihin chitī nuu ndo, ta chiñi ndo chihin soho ndo. ¹⁷Cha ndicha catyí chi ndo, vatyī cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi ñu tandihi tuhun cha chiñi nyoho vityin, soco ña chiñi ñu.

Nu catyí ra Jesús ñáá cha cuñi chi catyí cuhva cha cahán ra

(Mr. 4.13-20; Lc. 8.11-15)

¹⁸'Tyasoho ndo ñáá cha cuñi chi catyí noo cuhva cha catyí chi ndo tuhun ra cha tachí chitī trigu cuan: ¹⁹Ñáyivi cha chiñi tuhun yoso caa cuñi Nyoo cunyaca ñaha ra añima ñu, ta ña cutuñi iñi ñu, tari nu canacoyo chitī yuhu ityi, tyicuan caa cuví ñu. Vatyī quichī cuihna ta tava ra tuhun Nyoo cha caa añima ñu. ²⁰Ta tari nu canacoyo chitī ticu yuu cuan, tyicuan caa cuví tucu ñáyivi cha chiñi tuhun Nyoo, ta sii xaan cuví chi ñu naquehen cuenda ñu noo ri cuhva. ²¹Vatyī nu cañā chitī ticu yuu cuan, chiin ri ñuhú yihí chaha. Yucuan chaha cañā soco ña cuví tyihi yoho chí. Ta tyicuan caa ñu cuan. Suhva ri quivi chinó iñi ñu. Soco quivi cha quichaha nyehe ñu tindoho, ta satasi iñi ñáyivi chi ñu cha cuenda tuhun Nyoo ta sandihi ri ñu tuhun cha chinó iñi ñu. ²²Ta tari nu

canacoyo chiti chichi iñu cuan, tyicuan caa cuví tucu inga ñu cha chiñí tuhun Nyoo. Chiñí ñu, soco ña cuñí ñu sacuví ñu tari cuhva chiñí ñu. Vatyí nyaá xaan ca xiñí ñu tuhun tindoho ñáyiví ican saha tuhun Nyoo. Ta nyiyo ca iñí ñu cha tyayii. Ta tandihi tuhun cuan sayanga chi chi ñu, ta ña chahá nanducu vaha ñu chi Nyoo. ²³Soco tari nu canacavá chiti nu ñuhu vaha, tyicuan caa cuví ñu chiñí tuhun Nyoo, ta cutuñí iñí ñu, ta sacuví ñu tandihi tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

²⁴Ta chahá tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo añima ñáyiví cuví chi tari noo ra cha tachí chiti trigu nu noo ñuhú. ²⁵Soco cuhva cha caquixí tandihi ra casahá tyiño cuan, quihví noo ra xaan iñi chi ra, ta tachí ra chiti cuhu ña vaha, ta cuahan ra. ²⁶Ta quívi cañá chiti trigu cuan, ta cañá yoco chi, ta yucuan na tuví tucu cuhu ña vaha cuan. ²⁷Tyicuan ta ra cacuví musu, cachahan ra chicatyí ra chi chitoho ra: “Tata, tatu maa maa ri maa chiti trigu tachun, ¿nya quitá cuhu ña vaha cuan?” cacatyí ra. ²⁸Ta nacahan ra cuan ta catyí ra: “Iyó noo ra xaan iñi chi yo tachí.” Tyicuan ta musu cuan, catyí ra chi chitoho ra: “¿Atu cuñún cha cuhun ndi ta tohon ndi cuhu ña vaha cuan?” ²⁹Soco chitoho ra catyí ra: “Ma tohon ndo, coto cuhva cha tohon ndo cuhu ña vaha cuan, ta coyo ndihi trigu cuan. ³⁰Saña ndo, na cuahnu maa chi iin ri chihin trigu cuan, tyicuan ta quívi cunicoñehi tyiño sahí, cutachi chi ra casaha tyiño cutohon xi-hna ca ra cuhu ña vaha cuan ta cuhni ra cuenda sucun, vatyí cahmi ra. Ta yaha

cuan ta canaquehen vaha ra cha vaha cuan chichi yaque.”

Nu catyí ra Jesús vatyí tari chiti mostaza cuví cha nyacá ñaha Nyoo añima yo

(Mr. 4.30-32; Lc. 13.18-19)

³¹Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo añima ñáyiví cuví chi tari noo chiti yutun cha nañí mostaza cha tachí noo ra nu ñuhú ra. ³²Vatyí ican chiti cuan cuví cha luhlu ca ican saha tandihi ca chiti. Soco quívi chahnu tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyí tari yuchan iya cuví cha nyacá ñaha Nyoo añima ñáyiví

(Lc. 13.20-21)

³³Ta catyí tucu ra Jesús inga cuhva ihya:

—Cha nyacá ñaha Nyoo añima ñáyiví cuví chi tari yuchan iya cha nasacá noo ñaha chihin uñi cuhva yutyi pan. Vatyí tari ndaa tandihi pan cuan chihin yuchan iya cuan, tyicuan caa cuahan nducuaaha ca ñu nyacá ñaha Nyoo añima —catyí ra.

Yoso caa chotyíno ra Jesús noo cuhva cha cahán ra

(Mr. 4.33-34)

³⁴Tandihi tuhun ihya cahan ra Jesús chihin ñáyiví chihin cuhva ri. Ta tandihi tuhun cha catyí ra chi ñu soco maa maa ri chihin noo cuhva ri. ³⁵Tyehe caa sacuví ra tacuhva chino cava tuhun cha cahán ra profeta ta cha naha ta tyaá ra tyehe caa:

Chihin cuhva ri cucahin chihin ñáyiví. Cucatyí chi ñu tuhun cha ñohó xehe nyata savahá Nyoo ñuhu ñáyiví.

**Nu catyí ra Jesús ñáá cha cuñí chi
catyí tuhun cuhu ña vaha cha
cañá mahñu chiti trigu cuan**

³⁶Tyicuan ta sacunuhu ra Jesús chi ñáyivi, ta ndihvi ra chichi vehe. Ta catuhva ra cachicá noo chihin ra chi ra, ta catyí ra chi ra:

—Nacatyí chi ndi ñáá cha cuñí chi catyí tuhun cha cañá cuhu ña vaha cuan nu ñuhu cuan.

³⁷Tyicuan ta quichaha catyí ra Jesús chi ra:

—Ra cha tachí chiti trigu cuan ican cuví yuhu Rayii cha quichí nya gloria.

³⁸Ta ñuhú cuan, ican cuví añima ñáyivi iyó siqui ñuhu ñayivi. Ta chiti trigu cuan ican cuñí chi catyí ñáyivi cha nyicón chi Nyoo, ta chiti cuhu ña vaha cuan cuñí chi catyí ñáyivi cha nyacuví cuhva cuñí ra ña vaha.

³⁹Ra cha tachí cuhu ña vaha cuan, ican cuví cuihna ra xaan iñi chi Nyoo. Ta quivi cunacoñehe ra tyiño saha ra, ican cuví quivi cucunaa ñuhu ñayivi. Ta ra cha cunacoñehe chiti cuan, ican cuví ra cacuví ángel. ⁴⁰Tari nasataca ra cuhu ña vaha cuan vatyi cayu chi, tyicuan caa cucuvi quivi naa ñayivi. ⁴¹Yuhu Rayii cha quichi nya gloria cutachi chi ángel cunasataca ra chi ñu saccoo cuatyí inga ñu, ta ñu cha sacuví cha ña vaha. ⁴²Ta cutyíhi ra chi ñu chichi horno nu cayú ñuhu. Ta cucuacu ñu ta cusacahñi ñu noho ñu. ⁴³Ta ñu cha sacuví cuhva cuñí Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñí iñi ndo, tyasoho ndo tuhun chahín.

Noo xuhun cuaan cha ñohó xehe

⁴⁴Cha nyacá ñaha Nyoo añima ñáyivi cuví chi tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta sii xaan cuñí ra cuanuhu

ra ta xico ra tandihí cha iyó chi ra, ta satá ra ñuhu nu ñohó xehe xuhun cuaan cuan.

**Noo cuhva cha cahan ra Jesús cuenda
noo perla cha yahvi xaan nyaá**

⁴⁵Ta cha nyacá ñaha Nyoo añima ñáyivi, cuví tucu chi tari noo ra satá ta naxicó perla finu. ⁴⁶Ta cuhva cha ñihí ra noo cha yahví vavaha nyaá, ta xico ra ndii maa cha cumí ra, ta satá ra perla vaha cuan.

**Nu sañahá ra Jesús
noo cuhva cuenda tarraya**

⁴⁷Ta suri cuví tucu cha nyacá ñaha Nyoo añima ñáyivi tari tarraya cha cañí ra nu tyañuhu, ta ñihi ra ndihí nuu tiyaca chihin. ⁴⁸Ta cuhva cha chitu tarraya cuan chihin tiyaca, catava ra ityi nu ñiti, ta yucuan canacachi ra chi ti, canaquehen vaha ra chi quití vaha chichi noo tica, ta sacuitá ra chi quití ña vaha cuan. ⁴⁹Ta tyicuan caa cucuvi quivi naa ñayivi, cuquichi coyo ángel, quichi tava siin ra chi ñu vaha ta ñu ña vaha. ⁵⁰Ta cutyihí ra chi ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

**Nu sañahá chi vatyi vaha tuhun
chahnu ta tuhun chaa Nyoo**

⁵¹Tyicuan ta ra Jesús ndaca tuhun ra chi ra cachicá noo chihin ra, ta catyí ra: —¿Atu cutuñí iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñí iñi ndi.

⁵²Tyicuan ta catyí ra Jesús chi ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo añima ñáyivi, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra

tuhun chahnu ta tuhun chaa cha sañahí —catyí ra Jesús.

**Nu ñohó ra Jesús Nazaret
ñuu nu chahnũ ra**

(Mr. 6.1-6; Lc. 4.16-30)

⁵³Ndihí cahan ra Jesús cuhva ihya ta cuahan ra. ⁵⁴Ta nachaa ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñí ñáyivi ta catyí ñu:

—¿Nya maa maa cutuhvã ra ihya cha chihí tuñi xaan ra? ¿Ta yoso caa cuví sacuvi ra milagru? ⁵⁵Vatyí sehe ra satyá vitu cuan cuví chi ra. Ta cu María cuví sihi ra. Ta yañi ra cuví chi ra Jacobo, ta ra José, ta ra Simón ta ra Judas. ⁵⁶Ta cuhva ra ñandihí, iyó ñu ityi nu iyó yo. Tu tyicuan caa, ¿nya maa maa cutuhvã ra tandihí tuhun ihya? —catyí ñu.

⁵⁷Ta yucuan chaha ña cuñí ñu quichaha ñu chi ra. Soco ra Jesús catyí ra chi ñu:

—Tandihí ñáyivi tandihí ri ityi sahá ñu ñáyivi chi ra profeta. Soco ña quichahá ñu chi ra tatu ra ñuu ñu, o ra vehe ñu cuví chi ra —catyí ra.

⁵⁸Ta ña cuaha milagru sacuvi ra yucuan cha cuenda vatyí ña chinó iñi ñu chi ra.

**Nu catyí chi yoso caa chihí ra
Juan ra sacondutyã**

(Mr. 6.14-29; Lc. 9.7-9)

14 Quivi cuan ra Herodes, ra cuví gobiernu nicahnu nu cuví Galilea, ñihí ra tuhun ra Jesús. ²Ta catyí ra chi ra nyicú chihin ra:

—Ican ra cuan cuví ra Juan ra sacondutyã chi ñáyivi, ra cha chihí ta vityin nandotã ra. Yucuan chaha iyó tunyee iñi chi ra cha sacuvi ra milagru.

³⁻⁴Tyicuan caa catyí ra vatyí suri maa ra tyihí tyiño ta catiñ ra chi ra Juan. Ta chahñi ra chi ra chihin cadena, ta tyihí ra chi ra vehe caa. Tyicuan caa sacuvi ra

tyi xaan cuñí ra tyi catyí ra Juan tyi ña vaha cha nyaá ra chihin cu Herodías cha cuví ña ñasihí yañi ra ra Felipe.

⁵Ta yucuan chaha, ra Herodes, cuñi ra cahñi ra chi ra Juan, soco yuhvi ra chi ñáyivi, vatyí tandihí ñu chinó iñi ñu tyi ra Juan cuenda Nyoo cahán ra.

⁶Soco noo quivi cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahã xaan iñi ra Herodes. ⁷Ta tyaa ra cuhva vatyí cuhva ra ñáá ri cha cacã ñaha tyivaa cuan, ta ma nacahnu ra tuhun cahan ra. ⁸Tyicuan ta tyiyuhũ sihi ña chi ña, na catyí ña chi ra Herodes tyehẽ caa:

—Cuhva xiñi ra Juan ra sacondutyã ñáyivi chii nu noo coho —catyí ña.

⁹Cha chihí rey Herodes tuhun cahã ña, nducuihya cuñi ra. Soco cha cuenda cha tyaa ra cuhva vatyí cuhva ra ñáá ri cha cacã ña nuu ñu canyicú vico cuan ta ma cuví nacahnu ra, yucuan chaha tachí ra nacuhva ra xiñi ra Juan chi ña. ¹⁰Ta tachí ra tyiño na cutahnya sucun ra Juan nu ñohó ra vehe caa. ¹¹Tyicuan ta caquichí nyaca ra xiñi ra, yihí noo nu coho. Ta cachahã ra chi ñaha tyivaa cuan. Ta maa ña nacuhvã cuenda ña chi sihi ña.

¹²Tyicuan ta chaã coyo ra canyicõn chi ra Juan ta canaquehẽn ra coño ñuhu ra, ta catyihí ra chichi ñuhu. Ta yahã cuan ta cahãn coyo ra chisacoto ra chi ra Jesús.

**Nu chahá ra Jesús cha
cachi ohon mil rayii**

(Mr. 6.30-44; Lc. 9.10-17; Jn. 6.1-14)

¹³Cha chito ra Jesús tuhun ihya, quehẽn ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyivi, ta quitã coyo ñu ñuu ñu, ta cuahan coyo ñu chata ra ityi nu ñuhú. ¹⁴Cha quitã ra Jesús chichi canoa cuan, nanyehẽ ra cuaha xaan ñáyivi. Ta cundahvi xaan cuñi ra nyehẽ ra chi ñu. Ta sandu-

vahā ra chi ñu cuhvī cha chaā chihin ñu.
¹⁵ Ta vatyī cha cua cuaā, ra cachicá noo chihin ra Jesús chaā coyo ra, ta catyí ra chi ra:

—Cha iñi xaan, ta yori ñáyivi iyó yatyin ri ihya. Yucuan cuenda ñatachi chi ñáyivi ihya na cunuhu coyo ñu nya ñuu cusata ñu cha cachi ñu —cacatyí ra chi ra Jesús.

¹⁶ Ta ra Jesús catyí ra:

—Ña tahán chi cahun ñu. Cuhva maa ndo cha cachi ñu.

¹⁷ Ta nacahan ra ta cacatyí ra:

—Noo tuhun ohon tahan siin pan ta uvi tahan siin tiyaca cumí ndi.

¹⁸ Ta catyí ra Jesús:

—Nyaca ndo chii.

¹⁹ Tyicuan ta tachī ra tyiño na cunyicu ñáyivi nu cuhu cuan. Yahā cuan ta quehen ra ohon tahan pan cuan, ta ni nduvi tiyaca cuan. Ta nanyehē ndaa ra andivi, ta nacuhvā ra tyahvi nyoo chi Nyoo ta tahvī ra pan cuan. Ta chahā ra chi ra cachicá noo chihin ra, na casacha ra chi ñáyivi cuan. ²⁰ Ta tandīhi ñu cachachi ñu ta ndaha iñi ñu. Yahā cuan ta canasatacā ra yiquín cha ndoo. Ta quitā uchi uvi tahan tica. ²¹ Ta cha tandīhi ñu cachachi cuan, quitā ta cha ohon mil cha maa ri maa rayi. Ta ña quihvī cuenda ñusihi ni ra cuatyaa.

Nu chicá ra Jesús nu ndutya

(Mr. 6.45-52; Jn. 6.16-21)

²² Ta cha yaha tuhun cuan ta catyí ra Jesús chi ra cachicá noo chihin ra, na quihvī coyo ra chichi canoa, vatyī cayaha sava ra miñi cuan ta cahun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyivi na cahun coyo ñu. ²³ Cha yahā cha natachi ra chi ñu cuan, ta ndaa ra yucu cuan cua cacān tahvi noo tuhun ri maa ra chi Nyoo. Ta yucuan ñohó ra ta cuaa ndīhi. ²⁴ Ta cha ni ri ca cha chicán tahvi ra cha cuahan vavaha canoa cuan

nya mahñu miñi. Ta ndutya miñi cuan cañi chi chi canoa cuan cha cuenda vatyī ñihi xaan caá tatyī nu cuahan coyo ra. ²⁵ Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya. ²⁶ Ta cuhva cha cananyehē ra chi ra, chicá ra nu ndutya cuan, canayuhvī xaan ra. Ta cacana chaā vavaha ra, ta catyí ra:

—¡Noo cha sayuhvi cuví!

²⁷ Soco nacahan ra Jesús chihin ra, ta catyí ra:

—¡Sanii ndo iñi ndo, yuhu cuví, ma yuhvi ndo! —catyí ra.

²⁸ Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyī na quichi yuhu nu ndutya chiña nyacua nya nu vachun.

²⁹ Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichahā chica ra nu ndutya vatyī cahun ra nu vachi ra Jesús. ³⁰ Soco cuhva cha tuvī iñi ra tyi ñihi xaan fuerza tatyī cuan, nayuhvī ra ta quichaha nducu nyee ra, ta quichaha cana chaā ra ta catyí ra:

—¡Sacacu chii, Sutu Mañi yuhu!

³¹ Ta caa cuhva ri cuan, ta tñn ra Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáá tuhun cha nacaca uvi iñun? —catyí ra Jesús chi ra.

³² Ta cuhva cha ndaa coyo ra nu canoa cuan, cutaxin ri tatyī cuan. ³³ Tyicuan ta ra cañohó chichi canoa cuan cachicuiñi chiti ra nuu ra Jesús, ta cacatyí ra chi ra:

—Ndicha ndicha cuii vatyī Sehe Nyoo cuví chuun —cacatyí ra.

Nu sanduvahā ra Jesús chi ñu cuhvī ñuu cha nyicú nicacahnū Genesaret

(Mr. 6.53-56)

³⁴ Cha cayahā sava ra miñi cuan, cachaa coyo ra nu cuví Genesaret. ³⁵ Ta

cuhva cha canicoḥon nuu ñáyivi iyó yucuan chi ra Jesús, sacoto ñu chi tandíhi ñáyivi ityi cuan. Ta quichí nyaca ñu tandíhi ñu cuhví nu nyaá ra. ³⁶Ta chacú ndahví ñu nuu ra, na cuhva ra tiín ñu vasi chiin sahma ra. Ta tandíhi ñu tiín sahma ra, nduvahá ñu.

**Nu sañahá chi ñáá
cha sativí chi ñáyivi**

(Mr. 7.1-23)

15 Tyicuan ta suhva ra cacuví fariseo ta ra casacuaha ley vehe ñuhu quita coyo ra Jerusalén. Ta chaá coyo ra nu nyaá ra Jesús ta candacá tuhun ra chi ra, ta catyí ra:

²—¿Ñáá tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

³Soco ndacá tuhun ra Jesús chi ra, ta catyí ra:

—¿Ñáá tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo? ⁴Vatyí Nyoo catyí ra: “Saha ndo ñáyivi chi sutu ndo ta chi sihi ndo. Ta tandíhi ñu cha cahán ña vaha chi sutu o chi sihi, na cúvi ñu”, catyí Nyoo. ⁵Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyehe caa: “Ma cuví tyinyei chuun vatyí tandíhi cha iyó chii cha yahá chahá cuende chi Nyoo.”

⁶Ta tatu cha catyí ndo tyicuan caa, ña cuñí ca chi cha tyinyee ca ndo chi sutu ndo o chi sihi ndo, catyí ndo. Ta tyicuan caa sacuachiyó xiin ndo tuhun cha catyí Nyoo tyi sacuvi ndo, vatyí cuñí ndo sacuvi maa ndo cuhva costumbre maa ndo. ⁷¡Nyoho cha sahá ndo tyi vaha ndo! Ndicha vaha tuhun cha tyaa ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸Ñáyivi ihya, chihin yuhu ri ñu catyí ñu tyi cuñí ñu chii.

Soco ñima chihin tandíhi añaima ñu, tyi siin nu nyaá xiñi ñu.

⁹Ta ñahri maa tuhun cha sacahnú ñu chii.

Vatyí cha sañahá ñu maa maa ri cuhva sañahá ñáyivi ri cuví, tyehe caa tyaa ra Isaías tuhun ndo, catyí ra Jesús.

¹⁰Tyicuan ta caná ra chi ñáyivi ta catyí ra chi ñu:

—Tyasoho ndo, ta cutuñi iñi ndo tuhun cahín. ¹¹Vatyí cha quihví yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹²Tyicuan ta catuhva ra cachicá noo chihin ra Jesús ta candacá tuhun ra chi ra, ta catyí ra:

—¿Atu chitón vatyí ra fariseo quiñi xaan cuñí ra cha cachiñi ra tuhun cahún?

¹³Soco maa ra Jesús nacahan ra:

—Tandíhi yutun cha ña tachi Suti, ra nyaá andivi, cucoyo tun nya yoho tun.

¹⁴Saña ndo chi ra vatyí ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cucanacoyo ra chichi noo yavi.

¹⁵Tyicuan ta quichaha catyí ra Pedro chi ra Jesús:

—Nacatyí chi ndi ñáá cha cuñí chi catyí cuhva cha cahun cuan.

¹⁶Tyicuan ta ra Jesús catyí ra chi ra:

—¿Atu ni nyoho ta ña cutuñi iñi ndo? ¹⁷¿Atu ña cutuñi iñi ndo vatyí cha quihvi ityi yuhu yo, chichi yo cuahan? Yahá cuan ta quita tucu. ¹⁸Soco tuhun cha quitá yuhu yo, chichi añaima yo quitá, ta ican cuan cuví cha sativí chi ñáyivi nuu Nyoo. ¹⁹Vatyí nya chichi añaima ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuví iñi ñu coo ñu chihin inga ñu cha ñima ñasihi ñu cuví. Ta tandíhi

ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu. ²⁰Ican cuan cuví cha sativí chi ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu nachino ñni noo ñaha inga ñuu chi ra Jesús

(Mr. 7.24-30)

²¹Quitá ra Jesús ñuu cuan ta cuahan ra ityi ñuu Tiro ta ñuu Sidón. ²²Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyi sehi yihí noo tatyi ña vaha chi ña, ta nyehé xaan ña tindoho —catyí ña.

²³Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Catyi chi ña na cunuhu ña vatyi caná chaa xaan ña vachi ña chata yo.

²⁴Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵Soco ñaha cuan tuhva ña ta chicuñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

²⁶Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

²⁷Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha cana-coyo nu mesa chitoho ti —catyí ña.

²⁸Tyicuan ta catyí ra Jesús chi ña:

—Sihi ¡ñana cha chinó xaan iñun chii! Cua sacuvi tari cuhva cuñún.

Ta caa cuhva ri cuan ta nduvaha sehe ña.

Nu sanduvaha ra Jesús cuaha ñu cuhvi

²⁹Quitá ra Jesús yucuan ta yaha ra yuhu miñi Galilea, ta ndaa ra noo yucu ta chicunyaá ra yucuan. ³⁰Ta cuaha ñáyivi chaá coyo nu nyaá ra ta quichi nyaca ñu cuaha ñu cuhvi: ñu coxo, ñu cuaa, ñu luu, ñu ñihi. Ta cuaha ca ñu cuhvi quichi nyaca ñu nu nyaá ra. Ta chacun ñu chi ñu nuu ra, ta maa ra sanduvaha ra chi ñu. ³¹Ta iyo cuñi ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayi

(Mr. 8.1-10)

³²Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahvi xaan cuñi nyehi chi ñáyivi ihya, vatyi cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyi ta cachi ca ñu, coto coña ñu ityi cunuhu ñu —catyí ra Jesús.

³³Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵Tyicuan ta tachí ra na cunyicu ñáyivi cuan nu ñuhú. ³⁶Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi

Nyoo. Tyicuan ta tahv̄i ra ta chaha ra chi ra cachicá noo chihin ra, ta maa ra cachicá noo chihin ra canasacha ra chi ñáyivi. ³⁷Tandih̄i ñu chachi ñu, ta chitū chichi ñu. Ta yaha cuan casacutū ra ucha tica chihin yiquin cha ndoo cuan. ³⁸Cumi mil rayii cachachi, ta ña quihv̄i cuenda ñusih̄i ni ri ra cuatyaa. ³⁹Yaha cuan ta sacanuhu ra chi ñáyivi, ta quihv̄i ra nu canoa, ta cuahan ra ityi nu cuv̄i Magdala.

Ra fariseo ta ra saduceo cachicán ra chi ra Jesús na sacuvi ra noo milagru

(Mr. 8.11-13; Lc. 12.54-56)

16 Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñi ra nducu nyehe ra chi ra yucuan chaha chicán ra na sacuvi ra noo milagru chihin tunyee ñi Nyoo. ²Soco nacahan ra Jesús ta catyí ra chi ra:

—Cha cha ñi cuhva cha cuaa quee ñanyii, tuhv̄á ndo catyí ndo: “Vaha xaan cucuvi quivi tyaan, vatyí tyaqui xaan cuaha andivi.” ³Ta cha ñaha ri catyí ndo: “Vityin ña tyaqui maa cucuvi quivi vatyí cuaha ta ñi ñaa xaan andivi”, catyí ndo. Nyoho vaha xaan chitó ndo ¿yoso caa nacotó ndo tuhun vico andivi soco ña cuv̄i nacoto ndo yoso caa cuahan tuhun cha sañahá Nyoo chi ndo vityin? ⁴Ñáyivi iyó vityin, quiñi iyó ñu ta ña chinó ñi ñu chi Nyoo. Cuñi ñu nyehe ñu noo cha iyo. Soco ma cuhve nyehe ñu vatyí cha yaha sañahá Nyoo cha iyó cha sacuvi ra chihin ra Jonás —catyí ra Jesús chi ra, ta sandoꝝ ra chi ra, ta cuahan ra.

Tuhun cahán ra fariseo cuv̄i chi tari yuchan iya

(Mr. 8.14-21)

⁵Cuhva cha cayaha ra cachicá noo chihin ra Jesús inga chiyo miñi cuan, canaa ñi ra cacuiso ra pan. ⁶Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷Tyicuan ta quichaha candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

⁸Ta tuv̄i ñi ra Jesús tuhun candatuhún ra, ta catyí ra chi ra:

—Nyoho, chiiñ xaan chinó ñi ndo chii. ¿Ñáá tuhun cha catyí ndo vatyí ñahri pan nyisó ndo? ⁹¿Atu ta cutuñi ca ñi ndo? ¿Atu ña nicohón ñi ndo quivi sacachi chi ndi ohon mil rayii chihin ohon tahan ri pan? Ta ¿yoso tahan tica sacutū ndo chihin yiquin cuan? ¹⁰¿Atu ña nicohón ñi ndo quivi sacachi chi cumi mil ca ra chihin ucha tahan pan? Ta ¿yoso tahan tica sacutū ndo chihin yiquin cuan? ¹¹¿Yoso caa cha ña tuv̄i ñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹²Tyicuan ta cacutuñi ñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuv̄i Cristo ra cha quitā nu nyaá Nyoo

(Mr. 8.27-30; Lc. 9.18-21)

¹³Cuhva cha chaá ra Jesús ityi ñuu Cesarea Filipino, ndaca tuhun ra chi ra cachicá noo chihin ra ta catyí ra:

—¿Ñáá catyí ñáyivi? ¿Yóó ra cuvi Rayii cha quichi nya gloria? —catyí ra.

¹⁴Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyivi cuv̄in. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuv̄i profeta Nyoo ta cha naha.

¹⁵ Tyicuan ta catyí ra chi ra:

—Ta cha cuenda chi nyoho, ¿Yóó ra cuví yuhu?

¹⁶ Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷ Ta nacahan ra Jesús ta catyí ra:

—Sii xaan cuví chi yoho, Simón sehe ra Jonás, vatyí ni noo rayii ña sañaha ra chuun tuhun ihya, soco maa Suti ra nyaá andivi sañaha chuun. ¹⁸ Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuvi chasaha tuhun chihi chi chi. ¹⁹ Yuhu cuhve ndaha ticu andivi nu nyacá ñaha Nyoo chuun. Ta cha cuhñun ihya siqui ñuhu ñayivi, cha nuhñi saha maa Nyoo nya andivi. Ta tandihi cha ndachun ihya siqui ñuhu ñayivi, cha ndachi maa Nyoo nya andivi.

²⁰ Tyicuan ta catyí ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

Nu sacotó ra Jesús tyi cucúvi ra

(Mr. 8.31—9.1; Lc. 9.22-27)

²¹ Nya ndaha quivi cuan quichaha catyí ra Jesús chi ra cachicá noo chihin ra, vatyí cuñí chi cha cuhun ra ñuu Jerusalén. Ta ra cacuví mandoñi, ta ra cacuví nuu chi tata sutu, ta ra sacuaha ley vehe ñuhu, cucasanyehe xaan ra tindoho chi ra. Ta catyí tucu ra vatyí cucahñi ra chi ra soco nu cu uñi quivi ta cunandoto ra. ²² Tyicuan ta quehen ra Pedro chi ra ta quitá siin ra chihin ra ta quichaha catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehé caa, Sutu Mañi yuhu.

²³ Soco nanyocava ra Jesús, ta quichaha catyí ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chii. Vatyí ña chicá xiñun cuhva chicá

xiñi Nyoo. Soco cuhva chicá xiñi ñayivi chicá xiñun —catyí ra.

²⁴ Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyicon ndo chii, cuñí chi sanaa ndo iñi ndo tuhun maa ndo. Ta ma ndu uvi iñi ndo cha nyicón ndo chii, vasi nyehe ndo tindoho cha cuende vatyí yucuan cuví cruzi cha tahán chi cuiso ndo. ²⁵ Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñayivi ndo cha cuende, cucacu añima ndo.

²⁶ Vatyí ñáá ri tuhun cha saha ganaa ndo tandihi cha tyayii cha iyó siqui ñuhu ñayivi tatu cunaa añima ndo. Vatyí ñahri chihin cutiyahvi ndo ta cacu añima ndo. ²⁷ Vatyí yuhu Rayii cha quichí nya gloria, cuquichi tiqui soco chihin cha cahnu cuví Suti, ta cuquichi coyo ángel chihin. Tyicuan ta cutiyahvi chi noo noo ndo yoso cuhva sacuví ndo. ²⁸ Cha ndicha catyí chi ndo, vatyí yihí nyoho cha nyicú ndo ihya cha ma cúvi ñaha ndo nyacua nya nyehe ndo chi yuhu Rayii cha quichí nya gloria, cunyehe ndo yoso caa vachí cunyaca ñahi chi ndo —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra

(Mr. 9.2-13; Lc. 9.28-36)

17 Iñu quivi cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra. ² Ta yucuan nasama cuhva caa ra Jesús nuu ra ndihi chihin ra. Ta xiño vavaha nanduví nuu ra tari ñanyii. Ta sahma ra cuichin xaan nanduví tari maa ñuhú cuichin. ³ Tyicuan ta cananyehe ra chi ra Moisés ta ra Elías, candatuhún ra chihin ra. ⁴ Ta quichaha catyí ra Pedro chi ra Jesús:

—Sutu Mañi yuhu, vaha xaan cha ny-icú ndi ihya. Tatu cuñún na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵Cha ni ri ca cha cahán ra Pedro, quichí ri noo vico cha xiño vavaha siqui ra. Ta sahvi cuan chi ra. Ta chichi vico cuan quitá noo ndusu cha catyí chi tyehe caa:

—Ican ra ihya cuví Sehi, ta cuñí xain chi ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

⁶Cha cachiñi ra cachicá noo chihin ra Jesús tuhun cuan, cachicavá ra nya ñuhu, ta cayuhvi xaan ra. ⁷Tyicuan ta tuhva ra Jesús nu cayucú ra, ta tiin ra chi ra, ta catyí ra:

—Ndícuita ndo. Ma yuhvi ndo.

⁸Ta cuhva cha cananyehe ra, noo tuhun ri ca ra Jesús nanyaá, ta uvi ca ra cuan, yori ca ra.

⁹Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehe ndo ihya. Cahán ndo tuhun soco nya yaha cúvi ta nandoto yuhu Rayii cha quichí nya gloria —catyí ra.

¹⁰Tyicuan ta candacá tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahan chi quichi?

¹¹Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandihi.

¹²Soco yuhu catyí chi ndo vatyí cha yahá quichí ra Elías, soco ña nicohon nuu ñáyivi chi ra, ta casacuví ñu chihin ra tandihi cuhva cuñí maa ñu. Ta tyicuan caa tucu yuhu Rayii cha quichí nya gloria, cusanyehe ñu tindoho chii —catyí ra.

¹³Tyicuan ta cacutuñi iñi ra vatyí tuhun ra Juan ra sacondutya cahán ra Jesús.

Nu sanduvahá ra Jesús chi noo ra tyivaa cha yihí noo tatyí ña vaha chi

(Mr. 9.14-29; Lc. 9.37-43)

¹⁴Cuhva cha cachaa coyo ra nu nyicú ñáyivi, tuhva noo ra ta chicuñi chiti ra nuu ra Jesús, ta catyí ra chi ra:

¹⁵—Tata, cundahvi cuñi nyehun chi sehi, vatyí yihí noo cuehe chihí tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduva ra nu ñuhu ta cayu ra, ta nduva ra nu ndutya ñandihí. ¹⁶Ta quichí nyaque chi ra chi ra cachicá noo chuhun, soco ña cuví sanduvahá ra chi ra —catyí ra.

¹⁷Ta nacahan ra Jesús ta catyí ra:

—¡Nyoho, ñu ña chinó iñi cuví ndo! ¡Ta nícaa ni quiñi iyó ndo! ¿Yoso tahan ca quivi cunyai chihin ndo ta cunyei tisihi ndo nyacua nya cutuhva ndo ta chino iñi ndo chii? Nyaca ndo chi ra tyivaa chiña tyehe —catyí ra.

¹⁸Tyicuan ta tava ñehe ra Jesús chi tatyí ña vaha cuan, ta quitá cuan chi ra tyivaa cuan. Ta caa cuhva ri cuan ta nduvahá ra.

¹⁹Cha yahá cuan ta ndacá tuhun siin ra chicá noo chihin ra Jesús chi ra ta catyí ra:

—¿Ñáá tuhun cha ña cuví tava nyuhu chi tatyí ña vaha cuan?

²⁰Ta ra Jesús nacahan ra ta catyí ra:

—Cha cuenda cha chiin xaan chinó iñi ndo chii. Cha ndicha catyí chi ndo vatyí tyehe ta chinó iñi ndo chii, tari cuhva cha cahnu noo chiti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuví sacuvi ndo tatu ndicha cha chinó iñi ndo chii.

²¹Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

**Inga tucu chaha cahán ra Jesús
tuhun yoso caa cucahñi ñáyivi chi ra**
(Mr. 9.30-32; Lc. 9.43-45)

²² Cha ni ri ca cha iin ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayii cha quichí nya gloria, cucuhva cuenda ñu chii chichi ndaha ra xaan iñi chii. Ta cucahñi ra chii. ²³ Soco nu cu uñi quivi ta cunandote —catyí ra.

Ta canducuihya xaan iñi ra cachicá noo chihin ra cha cachiñi ra tuhun cuan.

**Nu catiyahví ra cuenda
vehe ñuhu cahnu**

²⁴ Cuhva cha chaḡ ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candacaḡ tuhun ra chi ra:

—¿Atu ña tiyahví ra sacuaha chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

²⁵ Ta nacahan ra Pedro ta catyí ra:

—Tiyahví ra.

Cuhva cha quihví ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyi tucu yoho vityin Simón? Ra cuví tyiño siqui ñuhu ñayivi ihya, ¿yóó chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶ Nacahan ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tiyahví ñu. ²⁷ Soco tacuhva vatyi ma kuhva yo tisihi chi ni noo ra, cuḡhan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tiyahvun cha cuende ta cha cuenda maun. Quehun ta cutiyahvun —catyí ra Jesús chi ra Pedro.

**Nu sañahá ra Jesús yóó ra cha cahnu
ca cucuvi nu nyacá ñaha Nyoo**
(Mr. 9.33-37; Lc. 9.46-48)

18 Quivi cuan catuhvaḡ ra cachicá noo chihin ra Jesús chi ra, ta candacaḡ tuhun ra chi ra:

—¿Nya ndi cahnu ca cuví nu nyacá ñaha Nyoo?

² Tyicuan ta ra Jesús canḡ ra chi noo ra cuehe luhlu, ta chinanyaḡ ra chi cue mahñu ra. ³ Ta catyí ra:

—Cha ndicha catyí chi ndo, vatyi tatu nyoho ta ma nasama ndo kuhva iyó ndo, ta tatu ma cuví ndo tari ra cuatyaa, ma cuví quihvi ndo nu nyacá ñaha Nyoo. Vatyi ra cuatyaa chahá ndotyin cunyaca ñaha sutu ndotyin chi ndotyin, ta tyicuan caa cuhva ndo chi ndo cunyaca ñaha Nyoo chi ndo. ⁴ Ta tyicuan caa ra cahnu ca cuví nu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya. ⁵ Ta ñáyivi cha natiñ cuenda chihin siwi chi noo ra ña cahnu sahá chi, tari ra cuehe luhlu ihya, chi yuhu natiñ cuenda ñu.

**Nu sañahá ra Jesús chi yo yoso
caa saha cuenda yo chi yo
coto sacuvi yo cha ña vaha**

(Mt. 5.29-30; Mr. 9.42-48; Lc. 17.1-2)

⁶ Tatu yóó ñu sanacavá nu cuatyí chi noo ra nachinó iñi chii ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu. ⁷ ¡Ñana cha ña vaha cha cuenda ñáyivi iyó siqui ñuhu ñayivi, vatyi iyó tuhun cha sacoo ñu cuatyí tahan ñu! Ta tyicuan ri coo tuhun cuan, soco jndahvi ñu ndahvi cha sanacava nu cuatyí chi inga ñu!

⁸ Yucuan chaha tatu ndahun o tatu chahun sanacava chuun nu cuatyí, vaha taxin ca cañnya ta sacuiton cañi. Vatyi vaha ca quihvun nu coun chihin Nyoo chihin cha luu ndahun o luu chahun, ta

ñima ca cha naniun ta tuchi Nyoo chuun nu cayú ñuhu cha ma ndahva ca maa. ⁹Ta tatu noo chiti nuun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhu chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo

(Lc. 15.3-7)

¹⁰Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andívi. ¹¹Vatyí yuhu Rayíi cha quichí nya gloria, vachi sacaqui chi ñáyivi cha cuanaa chihin cuatyí ñu.

¹²¿Yoso caa catyí nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra. ¹³Ta tatu nañihi ra chi ti, cha ndicha vatyí cusii ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan. ¹⁴Ta tyicuan caa tucu, Sutu ndo ra nyaá andívi ña cuñí ra cha cunaa ni noo ñu cuví tari noo ra luhlu.

Yoso caa tahan chi saha yo ticahnu iñi chi tahan yo

(Lc. 17.3)

¹⁵Tatu ra yañun ta sacuví ra cha ña vaha chuhun, cahan chihin noo tuhun ri maa ra ta catyun chi ra tyi ña vaha cuhva sacuví ra. Ta tatu quichaha ra tuhun cahún, cha saha ganaun chi ra cuví cuan. ¹⁶Soco tatu ña quichahá ra chuun, tyicuan ta canon chi uvi o uñi ra, tacuhva tandíhi cha cahun cucuvi ra testigu. ¹⁷Tatu ña quichaha ra ni chi ra

cha chahan coyo chuhun cuan, tyicuan ta cahan chihin ra chihin nuu ñáyivi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

¹⁸Cha ndicha catyí chi ndo, vatyí tandíhi cha cuhñi ndo ihya siqui ñuhu ñáyivi, ta cha nuhñi saha maa Nyoo nya andívi. Ta tandíhi cha ndachi ndo ihya siqui ñuhu ñáyivi, cha ndachi maa Nyoo nya andívi.

¹⁹Ta suri catyí tiqui chi ndo, vatyí tatu uvi nyoho ihya siqui ñuhu ñáyivi, ndu iin ri ndo ta cacan tahvi ndo cuenda ñáa noo cha cuñí ndo cacan ndo, Suti, ra nyaá andívi cuhva ra chi ndo. ²⁰Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹Tyicuan ta chahan ra Pedro chinda-ca tuhun ra chi ra Jesús ta catyí ra:

—Sutu Mañi yuhu, tatu ra tahan ta sacuvi ra ñáa noo cha ña vaha chihin, ¿yoso tahan chaha tahan chi sahi ticahnu iñi chi ra? ¿Atu ucha tahan chaha?

²²Ta nacahan ra Jesús ta catyí ra:

—Catyí chuun vatyí ñima ucha tahan ri chaha, soco tandíhi ri chaha.

Nu cahán ra Jesús noo cuhva cuenda noo ra cha ña cuñi saha ticahnu iñi

²³Yucuan chaha cha nyacá ñaha Nyoo añima ñáyivi cuví chi tari noo rey cha nacana chi tandíhi musu vatyí cuanyehe ra yoso yosó yica ñu chi ra. ²⁴Ta cuhva cha quichaha natava ra cuenda, ta quichí nyaca ñu chi noo musu cha cuaha millón pesu yosó yica chi ra. ²⁵Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra iin cuenda ri chihin ñasihi ra, ta chihin sehe ra ta tandíhi cha iyó chi ra tacuhva vatyí chihin xuhun cuan cunatyiyahvi ra cha yosó yica ra chii.” ²⁶Tyicuan ta musu

cuan chicuñi chiti ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandihi chuun”, catyí ra. ²⁷Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandihi cha yoso yica ra, ta saña ra chi ra. ²⁸Soco cuhva cha quitá musu cuan, nañihi ra chi noo ra tahan ra cha cuví musu tari maa ra. Ta ra cuan yosó yica ra chiin ri chi ra. Ta tiñ ra chi ra cuan, ta quichaha qitu ra sucun ra, ta catyí ra chi ra: “Tyiyahvi cha yosó yicon chii.” ²⁹Tyicuan ta chicuñi chiti ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandihi chuun”, catyí ra. ³⁰Soco maa ra ña cuñi ra, ta chahan ra ta tyihi ra chi ra vehe caa nyacua nya cha tyiyahvi ra cha yoso yica ra chi ra. ³¹Cha canyehé inga ca musu cha sacuvi ra, uhvi xaan cacuvi chi ra, ta chahan coyo ra chinacatyí ra chi chitoho ra cha sacuvi ra cuan. ³²Tyicuan ta chitoho ra cuan tachi ra tyiño na quichi ra ta catyí ra chi ra: “Musu ña vaha cuvún. Yuhu sahi ticahnu iñi tandihi cha yosó yicon chii, vatyí chacu ndahvun nui. ³³Tyicuan caa tucu cuñi chi cundahvi cuñun chi ra tahan cuan tari cundahvi cuñi nyehi chuun”, catyí ra chi ra. ³⁴Ta cuxaan xaan chitoho ra, ta tachi ra tyiño na tachi tuñi ñu chi ra, nyacua nya cha tyiyahvi ra tandihi cha yosó yica ra.

³⁵Ta nu ndihi cahan ra Jesús, ta catyí ra tyehe caa:

—Tyicuan caa tucu cusacuvi Suti, ra nyaá andivi, chihin ndo tatu ma saha ndo ticahnu iñi chihin cha tandihi añima ndo chi tahan ndo.

Nu sañahá ra Jesús tyi ña vaha sandoo ñáyivi chi ñasihi ñu o yii ñu

(Mr. 10.1-12; Lc. 16.18)

19 Cha yaha cha catyí ra Jesús tuhun ihya, ta quitá ra Galilea

cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii. ²Cuaha ñáyivi chinyicon chi ra, ta yucuan sanduvaha ra chi ñu cuhvi.

³Tyicuan ta suhva ra fariseo catuhva ra chi ra Jesús, vatyí cacuñi ra nducu ra cuhva tyaa ra cuatyí siqui ra. Ta candaca tuhun ra chi ra ta catyí ra:

—¿Atu vaha cha sandoo rayii chi ñasihi ra cha cuenda ñáa ri tisihi luhlu chaha ña chi ra?

⁴Ta nacahan ra ta catyí ra:

—¿Atu ta sacuaha ca nyoho nu tutu Nyoo nu catyí chi vatyí ra cha savaha chi ndo nya quivi xihna ri, savaha ra rayii ta ñaha sihi? ⁵Ta catyí tucu chi tyehe caa: “Tahán chi sandoo rayii chi sutu ra ta chi sihi ra, ta ndu iin ri ra chihin ñasihi ra. Ta chichi cha ninduvi ñu, cucuvi ñu tari cha noo ri ñáyivi.” ⁶Yucuan chaha, ñima ca uvi tahan cuví ñu, soco cha nanduvi ñu noo ri ñáyivi. Yucuan chaha, cha sandu iin ri Nyoo ña tahán chi cha sasii ñáyivi —catyí ra.

⁷Tyicuan ta candaca tuhun ra chi ra Jesús ta cacatyí ra:

—¿Ñáa tuhun cha tyaa ra Moisés vatyí cuví cahnya noo rayii tutu chihin ñasihi ra ta sandoo ra chi ña?

⁸Ta ra Jesús catyí ra chi ra:

—Cha cuenda cha ndavá añima ndo, yucuan chaha, chaha ra Moisés cha sandoo ra ñasihi ra. Soco quivi xihna ri ñima tyicuan caa cuvi. ⁹Yuhu catyí chi ndo tyehe caa: Ra cha sandoo ñasihi, ta ñima cha cuenda cha natuvi ña chihin inga ra, ta tandaha ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yii chi, suri chicoo tucu cuatyí ra cuan —catyí ra.

¹⁰Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayii chihin ñasihi ra, vaha taxin ca ma tandaha yo.

¹¹ Ta ra Jesús catyí ra chi ra:

—Soco ña tandihí ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi. ¹² Cha ña tandaha ñáyivi, cuahari cuenda cuví. Yihí ñu ña quichi cuví iñi ñu tandaha ñu vatyí iin caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñiñi ñu. Ta yihí ñu ña tandaha ñu cha cuenda cha cuñi ñu sacuvi ñu tyiño nuu Nyoo, na nducuaaha añaima cha nyacá ñaha Nyoo. Tandihí ñu cuví sacuvi tyehe caa, na sacuvi ñu —catyí ra Jesús.

Nu nasocó ra Jesús chi ra cuatyaa

(Mr. 10.13-16; Lc. 18.15-17)

¹³ Tyicuan ta quichí nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichaha cacahan ra chi ñu quichí nyaca chi ndotyin. ¹⁴ Soco ra Jesús catyí ra:

—Saña ndo chi ra cuatyaa, na quichi maa ndotyin nu nyaí. Ta ma casi ndo. Vatyí ñu nyacá ñaha Nyoo añaima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra siqui ndotyin. Yaha cuan ta cuahan ra.

Nu cahán noo ra tyivaa tyayii chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahan ra chindaca tuhun ra chi ra Jesús ta catyí ra:

—Maestro vaha xaun. ¿Ñáa cha vaha tahán chi sacuvi ta ñihi ñáyivi cha ma naa ca maa coi?

¹⁷ Ta ra Jesús catyí ra chi ra:

—¿Ñáa tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, naco-ton tyi Nyoo cuvi.] Soco tatu cuñun quihvun ñáyivi cha ma naa ca maa, sacu-

vun tandihí tuhun cha tachí Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñáyivi. Ma coo inga ñusihí chuun. Ma suhun cha chii ñáyivi. Ma cahun cuendu siqui ñu. ¹⁹ Saha ñáyivi chi sutun ta chi sihun. Ta cuñun chi ñáyivi, tari cha cuñun chi maun.

²⁰ Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáa ca cha cumañi chii?

²¹ Ta ra Jesús catyí ra chi ra:

—Tatu cuñun cuvun noo ra cuiti nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyayii chuun nya gloria —catyí ra.

²² Soco cuhva cha chiñi ra tyivaa cuan cha cahan ra Jesús tyehe caa, cuihya xaan cuanuhu ra vatyí tyayii xaan ra.

²³ Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yii xaan cuhva ra tyayii cha cunyaca ñaha Nyoo añaima ra. ²⁴ Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyayii ta cuhva ra chi ra cha cunyaca ñaha Nyoo —catyí ra Jesús.

²⁵ Cha cachihí ra cachicá noo chihin ra tuhun ihya, iyo xaan cacuñi ra, ta quichaha candaca tuhun ra chi ra tahan ra, ta cacatyí ra:

—Tu tyicuan caa, ¿yóo cha cuví cacu vii?

²⁶ Tyicuan ta nanyehé ra Jesús nu nyicú ra ta catyí ra:

—Ñáyivi ma cuvi sacuvi ñu tyehe caa, soco Nyoo cuví sacuvi ra tandihí.

²⁷ Tyicuan ta quichaha catyí ra Pedro chi ra:

—Sutu Mañi yuhu, nyuhu tandihí maa cha iyó chi ndi sandoo ndi ta nyicón ndi

chuun. ¿Ñáá cha cuñihi ndi? —catyí ra chi ra.

²⁸Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandihi, yucuan quivi yuhu Rayii cha quichí nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi uchi uvi tahan ityi ñáyivi Israel. ²⁹Ta tandihi ndo cha sandoy ndo vehe ndo, o yañi ndo, o cuhva ndo, o sutu ndo, o sihi ndo, o ñasihi ndo o sehe ndo, o ñuhú ndo cha catyí yuhu, cunañihi ndo noo cientu ca chaha siqui cuan, ta cunañihi tucu ndo ñayivi cha ma naa ca maa coo ndo. ³⁰Cuaha xaan ñu cuahan ityi nuu vityin, ican ñu cuan, cuhun nya nu ndihi. Ta cuaha xaan ñu cuahan nu ndihi vityin, ican ñu cuhun ñu ityi nuu.

Nu sañahá ra Jesús noo cuhva cuenda ra casahá tyiño

20 ¹Cha nyacá ñaha Nyoo añima ñáyivi, cuví chi tari noo chitoho chacu yoho tichaha ndivi. Ta chitoho chacu cuan ñaha cuiri quitá ra cuanducu ra cuaha ri musu cusaha tyiño nu tyiño saha ra. ²Ta sandaa ra tyiño chihin musu cuan vatyí cutiyahvi ra yahvi cha tahán chi chi ra cha noo quivi, ta tachí ra chi ra cusaha tyiño ra nu iyó tyiño sahá ra. ³Yahá cuan ta quitá tucu ra cuhva cha caa iin cha ñaha ri. Ta nanyehé ra chi suhva ca ra canyicú ri maa nuyahvi cuan. ⁴Ta catyí ra chi ra: “Cuahan tucu nyoho cua saha tyiño ndo nu iyó tyiño sahí, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan. ⁵Tyicuan ta chitoho chacu cuan quitá tucu ra inga chaha cuhva cha ora. Yucuan ta quitá tucu ra cuhva cha caa uñi cha cha iñi. ⁶Ta yahá cuan ta quitá tucu ra cuhva cha caa ohon cha cha iñi ta nanyehé ra canyicú ri maa suhva ca ra

nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?” ⁷Ta canacahan ra cuan ta catyí ra: “Yori maa cahān chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahí. Ta tyiyahvi mai chi ndo yoso cuhva cha tahán chi chi ndo”, catyí ra.

⁸Ta cuhva cha caa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndihi, ta nu ndihi ta tyiyahvun chi ra cha caquihvi cha xihna ri”, catyí ra. ⁹Tyicuan ta chaá coyo ra cha caquihvi cuhva cha caa ohon cha cha iñi cuan. Ta tahan tahan ra quehen ra yahvi nani noo quivi. ¹⁰Yahá cuan, ta cuhva cha tahán chi chi ra cha caquihvi coyo cha xihna ri cuan, cacuñi maa ra vatyí cuaha ca cutiyahvi ra chi ra. Soco suri iin ri yahvi noo quivi caquehen ra. ¹¹Ta cuhva cha caquehen ra, quichaha cacahan ra chi chitoho tyiño cuan. ¹²Ta catyí ra: “Ra cha cachaa coyo nu ndihi ihya, noo tuhun hora casahá tyiño ra. Ta iin ri cuhva tyiyahvun chi ra chihin nyuhu cha sahá tyiño ndi nu cahni ndiyaca”, cacatyí ra. ¹³Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuvi chuhun. ¿Atu ñima yahvi cha noo quivi catyí vatyí tyiyahvi chuun? ¹⁴Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndihi iin ri cuhva cha tyiyahvi chi yoho? ¹⁵¿Atu ñahri ityi iyó chii cha sacuvi cha cuñi mai chihin xuhin? ¿Atu quiñi cuñún tyi vaha ñáyivi cuví chihin inga ra cuan?” catyí ra. ¹⁶Ta tyicuan caa ñu quihvi nu ndihi, cuhun ñu ityi nuu. Ta ñu cuahan ityi nuu, nya nu ndihi cuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

**Inga chaha sacotó ra Jesús yoso
caa cucahñi ñáyivi chi ra**

(Mr. 10.32-34; Lc. 18.31-34)

¹⁷ Cuhva cha cuñí cahun ra Jesús nya Jerusalén, cana siin ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehe maa ndo vatyi cuahan yo Jerusalén vityin. Ta yucuan cucuhva cuenda ñu chi yuhu Rayii cha quichí nya gloria chi ra cacuví nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cúvi.

¹⁹ Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahñi ra chii nu cruzi. Soco nu cu uñi quivi cunandote —catyí ra Jesús chi ra.

**Nu chicán sihi ra Jacobo ta ra Juan
noo tumañi iñi chi ra Jesús**

(Mr. 10.35-45)

²⁰ Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuiñi chiti ña nuu ra vatyi cacan ña noo tumañi iñi chi ra. ²¹ Ta quichaha ndaca tuhun ra Jesús chi ña:

—¿Ñáá cha cuñún?

Ta catyí ña:

—Quivi cha cunyaun nu nyacá ñahun nya andivi, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

²² Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cunyehe yuhu? ¿Atu cuví cahun ndo tuhun chihi tari cuhva cahun yuhu? —catyí ra.

Ta canacahan ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyi cunyehe ndo tindoho, ta cahun ndo tuhun chihi tari cahun yuhu tuhun chihi. Soco tuhun cha

cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴ Ta cha cachiñi uchi ca ra cachicá noo chihin ra Jesús tuhun cuan cacuxaan ra chihin ninduvi ra cuan. ²⁵ Soco cana ra Jesús chi ra ta catyí ra chi ra:

—Cha chitó maa ndo, vatyi ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra. ²⁶ Soco ñima tyicuan caa tahán chi sacuvi nyoho. Vatyi ra cha cuñi cucahnu ca nu Nyoo, cuñi chi cuví ra musu tandihi ca ndo. ²⁷ Ta nya nyoho cha cuñi ndo cuví ndo nuu, cuñi chi cuví ndo musu tandihi ca ñu.

²⁸ Tari yuhu Rayii cha quichi nya gloria, ña vachi vatyi sacuvi ndo tyiño nui, soco vachi sacuvi tyiño nuu ndo, ta cuhve ñáyivi. Vatyi chihin cuan ta cuvi sacaqui cuaha ñáyivi.

Nu sanduvahá ra Jesús chi uvi ra cuaa

(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús. ³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyi cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

³¹ Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³² Tyicuan ta chicuiñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáá cha cuñi ndo cha sacuvi chihin ndo?

³³ Ta canacahan ra ta catyí ra:

—Sutu Mañi yuhu, cuñí ndi nyehe ndi.

³⁴Tyicuan ta cundahvi cuñí ra Jesús nyehe ra chi ra, ta tiin ra chiti nuu ra. Ta caa cuhva ri cuan cananyehę ra, ta cananyicon ra chi ra Jesús.

Nu quihvı ra Jesús Jerusalén

(Mr. 11.1-11; Lc. 19.28-40; Jn. 12.12-19)

21 Cuhva cha cua chaę coyo ra ñuu Jerusalén, ta cachaa ra ñuu Betfagé, yatyin ri nu cuvı yucu yutun Olivo. Tyicuan ta tachı ra Jesús tyiño chi uvi ra chicá noo chihin ra. ²Ta catyı ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñı ti. Ta nyacá ti noo burru luhlu. Ndaçhi ndo chi ti, ta quichi nyaca ndo chi ti chii. ³Ta tatu yóo cha catyı ñáá cha catyı chi ndo, catyı ndo chi ñu: “Vatyı chiñuhú ti chi maa ra nyacá ñaha, soco numi ri quichi nanyaca ndi chi ti”, catyı ndo chi ñu —catyı ra.

⁴Tyehe caa cuvı tacuhva na chino cava tuhun cha catyı ra profeta nu tyaa ra tyehe caa:

⁵Catyı ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quitı cha tuhvá nyisó carga”, catyı ra profeta.

⁶Tyicuan ta cuahan coyo ra cachicá noo chihin ra, ta casacuvı ra tari cuhva catyı ra Jesús chi ra. ⁷Caquichı nyaca ra chi ti chihin sihi ti. Ta catyiso ra sahma ra siqui ti, ta ndaa ra Jesús chi ti. ⁸Ta cuaha xaan ñáyivi candica ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi. ⁹Ta ñáyivi cha cuahan ityi nuu ta ityi chata, quichahę cana chaa ñu ta catyı ñu:

—¡Cahnu xaan cuvı ra vachi tata rey David! ¡Cahnu xaan cuvı ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andıvi! —catyı ñu.

¹⁰Cuhva cha chaę ra Jesús ñuu Jerusalén cuan, tandihi maa ñáyivi ñuu naquiquı, ta cuaha xaan ñu candacá tuhun ñu chi tahan ñu, ta catyı ñu:

—¿Yóo ra cuvı ra ihya?

¹¹Ta ñáyivi catyı ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuvı Galilea cuvı ra —catyı ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹²Yaha cuan ta quihvı ra Jesús chichi vehe ñuhu cahnu Nyoo. Ta tavá ñehe ra chi tandihi ra casatá ta ra caxicó yucuan. Ta sanduvá ra mesa ra canasamá xuhun chi ñáyivi yucuan. Ta sanduvá ra tyayu ra caxicó paloma. ¹³Ta catyı ra:

—Nu tutu Nyoo catyı chi tyehe caa: “Vehi, vehe nu chicán tahvi ñáyivi chii cuvı, ta tyicuan caa cucunañi chi. Soco nyoho cha nasahę ndo vehe nu nyicú ra suhu” —catyı ra.

¹⁴Chichi vehe ñuhu cuan catuhvı suhva ra cuaa ta ra coxo chi ra Jesús. Ta maa ra sanduvahę ra chi ra. ¹⁵Soco canyehę ra cacuvı nuu chi tata sutu ta ra casacuahá ley vehe ñuhu cuan vatyı savahę ra Jesús milagru, ta canachaa ra cuatyaa chichi vehe ñuhu, ta catyı ndotyın:

—¡Cahnu xaan cuvı ra vachi tata rey David! —catyı ndotyın.

Tyicuan ta cacuxaan tata sutu ta inga ra cuan cha canyehę ra ta cha cachiñı ra.

¹⁶Ta cacatyı ra chi ra Jesús tyehe caa:

—¿Atu chiñún cha cahán ndotyın?

Ta nacahan ra Jesús ta catyı ra:

—Chiñı. Soco çatu ta sacuaha ca ndo nu tutu Nyoo nu catyı chi tyehe caa?

Sutu Mañi yuhu, sacuvun vatyı ra cuatyaa nyihi cata ndotyın.

Ta ra cuatyaa lee cha chaxın sacahnú ndotyın chuun, catyı chi, —catyı ra Jesús.

¹⁷ Tyicuan ta sandoꝝ ra chi ra, ta quita ra ñuu cuan ta cuahan ra ñuu Betania. Ta yucuan ndoo ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun

(Mr. 11.12-14, 20-26)

¹⁸ Tuvi inga quivi. Ta cha ñaha ri, cua ndichi ra Jesús nya Jerusalén, ta chaꝝ soco chi ra. ¹⁹ Ta nanyehę ra noo tu higo yatyin ri yuhu ityi cuan. Ta tuhva ra nu nanyaá tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—¡Ni nonga chaha ma cuhva con chiti!

Ta caa cuhva ri cuan ta na ityi tun.

²⁰ Ta cha nyehe ra cachicá noo chihin ra cha sacuvi ra, iyo cacuñí ra, ta ndaca tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

²¹ Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuvi chi tu higo ihya cuví sacuvi ndo, soco cuví catyí ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi. ²² Ta tandihi cha cacan ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

Nu sañahá chi yóó ra chahá tyiño chi ra Jesús

(Mr. 11.27-33; Lc. 20.1-8)

²³ Yahá cuan ta quihvi ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuví nuu chi tata sutu chi ra, ta ra cacuví mandoñi ñu ñuu Israel, ta candaca tuhun ra chi ra:

—¿Yóó cha tyaá tyiño vatyí sacuvun tyehe caa, ta yóó cha chahá tyiño cuan chuun?

²⁴⁻²⁵ Ta nacahan ra Jesús ta catyí ra:

—Yuhu tucu cua ndaca tuhin noo tuhun chi ndo. ¿Yóó cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, cucatyí tucu yuhu chi ndo yóó cha tyaá tyiño ihya chii —catyí ra Jesús chi ra.

Tyicuan ta quichahá cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachí chi ra, cucatyí ra chi yo: “Tu tyicuan caa, ¿ñáá tuhun ña chinó iñi ndo chi ra?” ²⁶ Ta tatu catyí yo tyi ñáyivi, ñáyivi cuví nacanda ñu siqui yo, vatyí tandihi ñu chinó iñi ñu tyi ra Juan, cuenda Nyoo cahan ra —catyí ra chi ra tahan ra.

²⁷ Tyicuan ta quichahá cacatyí ra chi ra Jesús tyehe caa:

—Ña chitó ndi.

Tyicuan ta ra Jesús catyí ra chi ra:

—Ni yuhu, ta ma catyí chi ndo yóó cha tyaá tyiño ihya chii.

Nu cahán ra Jesús noo cuhva cuenda uvi tahan sehe noo ra

²⁸ Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahan cua saha tyiño nu iyó tyiño sahí.” ²⁹ Ta nacahan sehe ra ta catyí ra: “¡Ma cuhin!” Soco yahá cuan ta nasama cuhva chicá xiñi ra ta chahan ra chisaha tyiño ra. ³⁰ Yahá cuan ta sutu ra chahan ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra. ³¹ Chichi cha ninduvi tahan ra, ¿nya ra sacuvi ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahan ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyi xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho. ³² Vatyí ra Juan ra sacondutya quichí ra, quichi sañaha ra chi ndo yoso caa tahán chi coo ndo, soco nyoho ña chino iñi ndo chi ra, soco ra catavá xuhun ta ñu cata iñi cachiño iñi ñu chi ra. Ta nyoho vasi nyehe ndo ihya, soco ña nasamā ndo cuhva iyó ndo, tacuhva chino iñi ndo chi ra.

Nu catyí ra Jesús vatyi ra cacahñi chi ra cuví ra tari ra sahá tyiño ña vaha

(Mr. 12.1-12; Lc. 20.9-19)

³³ Tyasoho ndo inga cuhva ihya: Chiyoo noo chitoho noo ñuhú, ta tachi ra yoho tichaha ndivi, ta tyihí ra noo chacu. Ta savahā ra noo nu cuhñi ra tichaha ndivi cuan ta tava ra ndutya chi. Ta savahā tucu ra noo vehe sucun tacuhva vatyi cuví saha ra cuenda tandihi.

Yahā cuan ta chahā noo ra ñuhú cuan chi suhva ra casahá tyiño, ta cuahan ra inga ñuu. ³⁴ Ta cha chaā quivi cha iyó tichaha ndivi cuan, tachí ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahán chi chi ra. ³⁵ Soco ra casaha tyiño cuan, catiñ ra chi musu cuan, ta cacañi ra chi noo ra. Ta chi inga ra cachahñi ra, ta catuchí ra yuu chi inga ra. ³⁶ Tyicuan ta cha inga chaha, cuaha ca musu tachí chitoho chacu cuan ta ñima ca cha xihna ri. Soco tari casacuví ra chi ra cha xihna ri, sacuví tucu ra chi ra ihya.

³⁷ Nu ndihi tachí ra chi maa maa sehe ra, vatyi cuñí maa ra vatyi cusaha ra ñáyivi chi sehe ra. ³⁸ Soco cuhva cha cananyehē ra casahá tyiño cuan chi sehe ra, catyí ra chi ra tahan ra tyehe caa: “Ican ra ihya cundoo chihin tandihi ihya. Na cahñi yo chi ra tacuhva ndoo maa yo chihin”, cacatyí ra. ³⁹ Tyicuan ta catiñ ra chi ra, ta catavā ra chi ra ityi chata

chacu, ta cachahñi ra chi ra —catyí ra Jesús.

⁴⁰ Tyicuan ta ndacā tuhun ra Jesús chi ñu:

—Quivi quichi chitoho ñuhú cuan, ¿ñáá cha cusacuvi ra chihin ra casahá tyiño quiñi iyó cuan?

⁴¹ Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chí inga ra casahá tyiño. Ta quivi coo tichaha ndivi, cunacuhva cuenda ra chi chitoho chacu cuan cha tahán chi chi ra.

⁴² Tyicuan ta quichaha catyí ra Jesús chi ñu:

—¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha niñi ca.

Ican ihya cuví cha sacuví Sutu yo Nyoo. Ta tyaqui xaan tuhun cuan cha cuenda chí yo, catyí chi.

⁴³ Yucuan chaha catyí chi ndo vatyi ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra ñima. Vatyí maa ñu cunacuhva cuenda ñu cha vaha cha tahán chi chi ra. ⁴⁴ Ta cha cuenda yuu cuan, yóó ñu cha nduva siqui chi, yiquin maa cucuvi ñu. Ta tatu yuu cuan ta canacava siqui yóó ñu, cutaxin nyihi maa ñu —catyí ra Jesús.

⁴⁵ Cuhva cha catuví iñi ra cacuví nuu chí tata sutu cuan ta ra fariseo vatyi cuenda ra cahān ra Jesús cuhva ihya, ⁴⁶ cacuñi ra catiñ ra chi ra, soco cayuhvi ra chí ñáyivi vatyi ñáyivi, chitó ñu vatyi ra Jesús cuenda Nyoo cahān ra.

Nu chahá ra Jesús noo cuhva cuenda vico tandaha

(Lc. 14.15-24)

22 Quichahā cahan tucu ra Jesús chihin ñu inga chaha chihin cuhva, ta catyí ra:

²—Cha nyacá ñaha Nyoo añima ñáyivi cuví chi tari noo rey cha savaha noo vico cha cuenda cha cua tandaha sehe ra. ³Ta tachí ra chi musu ra na cahun ra cucana ra chi ñu cha nacatyí tuhun ra, soco ñu cuan, ña cacuñí ñu quichi coyo ñu. ⁴Tachí ra inga chaha chi inga musu, ta catyí ra chi ra tyehe caa: “Çatyí ndo chi ñu cha nacatyí tuhin, vatyí cha yaha chahñí sindiquí sane, ta inga quiti cha xahan ñandihi, ta cha nyaá vaha nyayu, ta tandihi cha nyatú tuhva. Na quichi ñu vico tandaha”, catyí ra. ⁵Soco ñu nacatyí tuhun ra, ña caquichaha ñu chi ra. Noo ñu chahan coyo ñu nu iyó chaco ñu, inga ñu chahan ñu nu tyiño sahá ñu. ⁶Ta inga ñu tiñ ñu chi musu rey cuan ta cañí vavaha ñu chi ra nyacua chahñí ñu chi ra. ⁷Tyicuan ta rey cuan cuxaḡan vavaha ra, ta tachí ra chi sindaro ra, cucahñí ra chi ra cachahñí cuan, ta cahmi ra ñuu ra. ⁸Tyicuan ta quichaha catyí ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhin cuan, ña tahán chi cha quichi coyo ñu. ⁹Cuḡan ndo tandihí calle ta nacatyí tuhun ndo chi tandihí ri ñu cha nañihí ndo na quichi coyo ñu vico tandaha”, catyí rey cuan. ¹⁰Musu cuan cuahan coyo ra tandihí calle, ta casandu iñ ri ra chi tandihí ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyivi.

¹¹Tyicuan ta quihví rey cuan cua nyehe ra chi ñáyivi cha canacatyí tuhun musu cuan. Ta nanyehé ra chi noo ra ñohó yucuan, soco ñahri sahma vico tandaha ñihnó ra. ¹²Ta catyí rey chi ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na chahan maa ra. ¹³Tyicuan ta catyí rey cuan chi ra catyihí mesa cuan: “Cuhñí ndo chaha ra ta ndaha ra, ta tuchi ndo chi ra nu ñaa iñi ityi chata vehe, ta yucuan cucuacu ra, ta cusacahñí

ra noho ra”, catyí ra. ¹⁴Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

¹⁵Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra síqui ra. ¹⁶Ta tachí ra chi suhva ra cuenda ra, iin ri chihin suhva ra cuenda ra Herodes. Ta cacatyí ra chi ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tiñ cuendon cuhva caá ri ñu. ¹⁷Çatyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chi yo, o ma tyiyahvi yo?

¹⁸Soco tuví iñi ra Jesús vatyí ña vaha cuhva cachicá xiñi ra, ta catyí ra chi ra:

—Nyoho sahá ndo tyi vaha ndo, soco ña ndicha ndo. ¿Ñáa tuhun cha nducu nyehe ndo chii? ¹⁹Sañaha ndo xuhun cha tuhva ndo tyiyahvi ndo chi gobiernu —catyí ra.

Ta caquichí nyaca ra noo xuhun cha nañí denariu chi ra. ²⁰Ta cuhva cha nanyehé ra Jesús, ta quichaha ndaca tuhun ra chi ra:

—¿Yóó chi nuu ta yóó chi sivi nyaá ihya?

²¹Ta nacahan ra ta cacatyí ra:

—Chi ra nyacá ñaha.

Tyicuan ta catyí ra Jesús chi ra:

—Cuhva ndo chi ra nyaca ñaha cha tahán chi chi ra, ta cuhva tucu ndo chi Nyoo cha tahán chi chi Nyoo —catyí ra.

²²Cuhva cha cachiñí ra cha chahan ra Jesús, iyo xaan cacuñí ra. Ta cuahan coyo ra.

**Nu canducū tuhun ra saduceo siqui
tuhun cha nandotó ndiyi**

(Mr. 12.18-27; Lc. 20.27-40)

²³ Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quivi cu naa ñayivi. Yucuan chaha candacā tuhun ra chi ra Jesús, ta catyí ra:

²⁴ —Maestro, ra Moisés catyí ra vatyí tatu noo ra tandaha ta chihí ra ta ña chiyō sehe ra, tahán chi cha tandaha yañi ra chihin ñaha chihí yíi cuan. Tyicuan ta coo sehe ra chihin ña cha cuenda yañi ra cha chihí. ²⁵ Vaha. Vityin tyehe caa cuví chi noo ra chiyo ucha tahan ra chihin yañi ra. Ra cha xihna ri tandaha ra. Yaha cuan ta chihí ra. Soco vatyí ña chiyō sehe ra, ndoo ñasihi ra chi yañi cu uvi ra. ²⁶ Ta suri tyicuan caa cuví chi yañi ra ra cu uvi. Ta yaha cuan, ta ra cu uñi quehen ra chi ña, ta suri chihí tucu ra. Ta tyicuan caa cuví chi ndi ucha ra. ²⁷ Ta cha yaha cuan nu ndihi tuhun chihí ndihi maa ña cuan. ²⁸ Ta cha tyicuan caa, quivi cunandoto ñu, chichi cha ucha ra chihin yañi ra, ¿nya ra cucuvi ñasihi chi ñaha cuan? ¿Vatyí tandihi ra tandaha ra chihin ña? —cacatyí ra.

²⁹ Nacahan ra Jesús ta catyí ra:

—Nyoho, cahán tondo ri maa ndo, cha cuenda vatyí ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo. ³⁰ Vatyí quivi cunandoto ndiyi, ni ma tandaha ñu, ta ni ma cuhva ñu sehe ñu tandaha, vatyí tari ángel Nyoo ra nyaá andivi cucuvi ñu. ³¹ Soco tuhun cha nandotó ñu ndiyi, ¿atu ta sacuahā ca ndo tuhun cha catyí maa Nyoo chi ndo? Catyí ra tyehe caa:

³² “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyí canyito añima ra cuan, vasi cha naha chihí ra vatyí Nyoo

ñima Nyoo cuenda ñu ndiyi cuví ra, soco Nyoo cuenda ñu nyitó cuví ra —catyí ra.

³³ Iyo cuñí ñáyivi cha chiñi ñu tuhun sañahá ra Jesús.

Ley cha niñi ca cha chahā Nyoo

(Mr. 12.28-34)

³⁴ Cha cachito ra fariseo vatyí ra Jesús chasí ra yuhu ra saduceo, candu iñ ri ra. ³⁵ Ta noo ra cha cuví ra sacuahá ley vehe ñuhu, cuñi ra nducu nyehe ra chi ra Jesús. Ta quichaha ndaca tuhun ra chi ra, ta catyí ra:

³⁶ —Maestro, ¿nya mandamiento cha nyaa nu ley cuví cha niñi ca?

³⁷ Ta catyí ra Jesús chi ra:

—“Cuñun chi Sutu Mañi yo Nyoo chihin cha niñi iñun ta chihin cha tandihi añimon, ta chihin cha tandihi cha chiñi tuñi xiñun.” ³⁸ Ican ihya mandamiento cha niñi ca, ta cha xihna ri ñandihí. ³⁹ Ta cha cu uvi cha yatyin ri tyicuan caa, ta catyí chi: “Cuñun chi ñáyivi tahun tari cuñún chi maun.” ⁴⁰ Ican uvi tahan mandamiento ihya cuví cha nyisó chi ley cha chahā Nyoo chi ra Moisés ta tandihi tuhun cha casañahā ra profeta Nyoo ta cha naha.

**Ra Cristo quichí ra tata ra David,
ta suri cuví ra Sehe Nyoo**

(Mr. 12.35-37; Lc. 20.41-44)

⁴¹ Cha ni ri ca cha canyicú iñ ri ca ra fariseo, ⁴² ra Jesús ndacā tuhun ra chi ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóó chi tata vachi ra cuñí maa ndo?

Ta canacahan ra ta catyí ra:

—Tata ra David cuví chi ra.

⁴³ Tyicuan ta ra Jesús catyí ra chi ra:

—¿Ta yoso caa cha vatyí ra David cuan, maa Tatyí li Nyoo chotyíño chi ra? ta catyí ra vatyí ra cuví Cristo, ra nyacá ñaha chi ra cuví ra, vatyí catyí ra tyehe caa:

⁴⁴ Cahān Suti Nyoo chihin Suti ra Cristo, ta catyí ra chi ra:

“Cunyaa chiyo vahi nyacua nya quiví cuhve chi ra xaan iñi chuun vatyi cuaca chahun siqui ra” tyaā ra David.

⁴⁵ ¿Yoso caa cha ra vachi tata ra David cuví chi ra Cristo, tatu suri maa ra David catyí ra vatyi ra Cristo Sutu ra cuví chi ra? —catyí ra Jesús.

⁴⁶ Ta yori maa cuví nacahān ni noo tuhun. Ta nya ndaha quiví cuan, yori ca maa cañā iñi candaca tuhun ñáá ca cha candaca tuhun chi ra.

Nu cahán ra Jesús chi ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

23 Tyicuan ta ra Jesús catyí ra chi ñáyivi, ta chi ra cachicá noo chihin ra tyehe caa:

²—Ra sacuahá ley ta ra fariseo nyicú ra tyiño cha sañahá ra ley cha tyaā ra Moisés. ³Ta cha tyicuan caa, quichaha ndo cha cahán ra ta sacuvi ndo tandihi cha cacatyí ra chi ndo. Soco ma quehen ndo cuhva iyó ra, vatyi maa ra, siin cha sañaha ra, ta siin cha sacuví ra.

⁴Vatyi yori ndoyo carga cha tyaá ra siqui ñáyivi. Ta saniñi ra chi ñu na cuiso ñu, ta maa ra ni chiin nundaha ra ña nañi chata carga cuan. ⁵Tandihí cha casacuví ra, cha cuñi ra na nyehe ñáyivi. Vatyi tahán iñi ra catyaa ra tuhun Nyoo tyaan ra ta soco ra chihin letra nahnu. Ta tahán iñi ra cacuihno ra sahma chihin adorno nañi. ⁶Ta nu vaha ca, cuñí ra cunyicu ra vico, ta cachi ra. Ta nu vaha ca cuñí ra cunyicu ra chichi vehe ñuhu. ⁷Ta nu chicá noo ra cacuñí ra vatyi cuhva ñáyivi nocumi chi ra chihin cha sahá xaan ñu ñáyivi chi ra. Ta cuñí tucu ra cha catyí ñu chi ra vatyi chito xaan ra. ⁸Soco nyoho, ma cuhva ndo ityi cha catyí ñáyivi vatyi chitó xaan ndo. Vatyi tandihí nyoho, yañi ndo cuví. Ta noo ri ra chitó

iyó, ta ican ra cuví Cristo. ⁹Ta ma catyí ndo Sutu ndo chi ninoo ra ñuhu ñáyivi ihya, vatyi iyó noo Sutu ndo, ta nyaá ra andivi. ¹⁰Ta ma catyí ndo vatyi ra cuví nuu cuví ndo, vatyi noo ri maa ra Cristo cuví nuu. ¹¹Ra cha sacuví tyiño nuu tandihí ca ra, ican ra cuan cuví ra cahnu ca nu nyicú ndo. ¹²Vatyi ra cahnu sahá chii, cucucuee ra. Ta ra ña cahnu sahá chii cucucahnu ra.

¹³¿Ndahvi nyoho ra sacuahá ley vehe ñuhu, ta ra fariseo! ¿Ndahvi nyoho cha sahá ndo tyi vaha ndo! Vatyi chasí ndo yuvehe nu nyacá ñaha Nyoo, tacuhva ma cuví quihvi ñáyivi. Ta ni ri maa ndo ña quihví ndo ta ni ña chahá ndo cha quihvi ñáyivi, ñu cuñí quihvi.

¹⁴¿Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyi tinyaa ndo vehe ñu chihí yii, tyi ña cuví tyiyahvi ñu ñáá xuhun tavá ndo siqui ñu. Ta yaha cuan, ta naha chicán tahvi ndo nu tuvi vatyi sahá ndo tyi vaha ndo. Ta cuenda cha sacuví ndo tyehe caa, cahnu ca tindoho cunyehe ndo.

¹⁵¿Ndahvi nyoho ra sacuahá ley vehe ñuhu, ta ra fariseo. ¿Sahá ndo tyi vaha ndo, soco ña ndicha ndo! Vatyi nducú xaan ndo cuhva na cunyicon ñáyivi chi ndo. Ta tatu cha nandihvi ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihí ca sacuhún ndo chi ñu anyaya cha nuu maa ndo.

¹⁶¿Ndahvi nyoho ra ndahvi! Vatyi cuñí ndo saquehen ityi ndo chi ñáyivi, ¿soco cuaa ndo! Vatyi catyí ndo tatu noo ñu catyí ñu cha cusacuvi ñu noo cha cusacuvi ñu, ta tyanaha ñu chihin sivi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñí chi cha sacuvi ñu, catyí ndo. ¹⁷¿Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan

cuan, o vehe ñuhu cha sacu ii chi xuhun cuaan cuan? ¹⁸ Ta suri catyí tucu ndo: “Tatu yíhí ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña ñíni cha sacuvi ñu. Soco tatu tyanaha ñu cuenda ofrenda cha yosó siqui arta cuan, yucuan ndicha ñíni cuñí chi sacuvi ñu, catyí ndo.” ¹⁹ ¡Tondo xaan ndo ta cuaa ndo! ¿Nya cha ñíni ca? ¿Atu ñíni ca ofrenda o arta cuan cha sacu ii chi ofrenda cuan? ²⁰ Vatyí ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihi cha yosó nuu ñandihí. ²¹ Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyí iyó ra yucuan. ²² Ta tyicuan caa tucu ñu tyanahá cuenda andiví, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

²³ ¡Ndahví nyoho ra sacuahá ley vehe ñuhu ta ra fariseo! sahá ndo tyi vaha ndo vatyí chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha ñíni ca cha nyaá nu ley cha tahán chi sacuvi yo. Ta cuñun, cha sacuví yo cha vaha chihin tandihí ñáyiví, cha cundahví cuñí yo chi ñu, cha chinó iñi yo chi Nyoo ta ma sandoo yo chi ra. Ican ihya cuñí chi sacuvi ndo, ta ma sandihí ndo cha cuhva ndo diesmo cuan ñandihí. ²⁴ Nyoho cuñí ndo casaquehen ityi ndo chi ñáyiví, soco cuaa ndo. Vatyí sacuita ndo noo tiyucun luhlu, soco coco ndo noo camellu. Cutatyí luhlu ri nyehe ndo ta ña sahá ndo cuenda cuatyí cahnu cuví cuan.

²⁵ ¡Ndahví nyoho ra sacuahá ley vehe ñuhu ta ra fariseo, ra casaha tyi vaha! Vatyí ityi chata ri vasu ta ityi chata ri coho sanduvíí ndo, soco ityi chichi ña sanduvíí ndo. Vatyí chichi añima ndo tyitu ñohó cha quiñi caa. Chicá xiñi ndo

cha ñíni ndo nu cusuhu ndo, ta ña cuví chasaha ndo cha quiñi caa cha quichi cuví xaan iñi ndo. ²⁶ ¡Ra fariseo cuaa cuví ndo! Sanduvíí xihna ndo ityi chichi vasu ta coho, tyicuan ta cuvii tucu ityi chata.

²⁷ ¡Ndahví nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyi cha nacahyu, vatyí ityi chata chi tyaquí xaan, soco ityi chichi tyitu ñohó yiquí ndiyi, ta tandihí nuu cha quiñi caa. ²⁸ Tyicuan caa cuví nyoho. Vatyí ityi chata tari maa tyi vaha xaan ndo nuu ñáyiví, soco ityi chichi, tyitú ñohó cha cuendu ndo, ta cha quiñi caa.

²⁹ ¡Ndahví nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyiví vaha ñu chiyo ta cha naha. ³⁰ Ta yucuan ta catyí ndo! “Tyehe ta chiyo ndi quiví chiyo ñáyiví chahnu ndi, ma tyinyee ndi chi ra chahñí chi ra profeta Nyoo”, catyí ndo. ³¹ ¡Ma chihin yucuan ri! Suri maa ndo nacotó ndo vatyí vachi ndo tata ñu cachahñí chi profeta Nyoo. ³² ¡Vaha vityin, chaha chi cuhva savaha ndihí ndo cha quiñi caa cha quichaha savaha sutu chahnu ndo!

³³ ¡Nyoho ñu quiñi iyó, ñu vachi tata coo! ¿Yoso caa cucacu nyoho tacuhva ma cuhun ndo anyaya? Ma cuví. ³⁴ Yucuan chaha cutachi chi ra profeta Nyoo nu nyicú ndo, cutachi tiquí chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chí suhva ra nu cruzi. Ta chi inga ra cucañi ndo chi ra chichi vehe ñuhu. Ta cacyicon ndo chi ra tahan tahan ñuu. ³⁵ Yucuan chaha, siqui ndo cucunyaa cutatyí cha cuenda cha cachihí tandihí ra vaha cha cachahñí ñu nyacua nya ra Abel ta nyacua nya ra Zacarías sehe ra Berequíás ra cha chahñí ndo chichi vehe

ñuhu yatyin nu nyaá arta cha yosó cha chahá cuenda yo chi Nyoo.³⁶ Cha ndicha catyí chi ndo, vatyí tandíhi cuatyí ihya cucoso siqui ñáyivi cha iyó vityin —catyí ra Jesús chi ra.

Nu nducuihya ñi ra Jesús nyehe ra chi ñuu Jerusalén ta chacu ra

(Lc. 13.34-35)

³⁷¡Jerusalén, Jerusalén! ¡Ndahvi nyoho ñu iyó ñuu chiña! Vatyí chahñi ndo chi ra profeta Nyoo. Ta tuchi ndo yuu chi tandíhi ra cha saquichi Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta naquehén ndahvi ti chi ti chichi ndichin ti, soco ña cuñi ndo.³⁸ Nyehe ndo vityin, vatyí cha sandog ndahvi chi ndo.³⁹ Vatyí catyí chi ndo, vatyí ma nyehe ca ndo chii nyacua nya chaa chi quivi cucatyí ndo tyehe caa: “Cahnu xaan ra cuví ra vachi chihin tunyee ñi sivi Sutu yo Nyoo”, cucatyí ndo —catyí ra Jesús.

Nu catyí ra Jesús vatyí cutani vehe ñuhu cahnu

(Mr. 13.1-2; Lc. 21.5-6)

24 Quita ra Jesús chichi vehe ñuhu cahnu cuan, ta cha cuñi cahun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra.² Soco nacahan ra Jesús ta catyí ra:

—¿Atu nyehé ndo tandíhi ihya? Cha ndicha catyí chi ndo, vatyí ihya ni noo yuu ta ma ndoo coso nyitahan. Tandíhi ta cutani —catyí ra.

Nu catyí ra Jesús ñáa ndíhi seña cucuvi cha ni cumañi ca naa ñáyivi

(Mr. 13.3-23; Lc. 21.7-24; 17.22-24)

³Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichi coyo ra ta catyí xehe ra chi ra tyehe caa:

—Cuñi ndi cha catyun chi ndi, ama cucuvi tuhun cuan. ¿Ñáa seña cucuvi cha cuquichun inga chaha ta cha cunaa ñáyivi?

⁴Tyicuan ta nacahan ra Jesús:

—Saha ndo cuenda chi ndo coto yóo cha sandahvi ñaha chi ndo.⁵ Vatyí cuaha xaan ra cuquichi, ta cotyño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra.⁶ Nyoho cuñi ndo tuhun tyi iyó cuatyí ta cañi tahan ñáyivi ityi cuan ityi ihya. Soco ma nayuhvi ndo, vatyí tyicuan caa tahan maa chi cuví. Soco ta chaa ca quivi cunaa ñáyivi.⁷ Vatyí ñáyivi noo ñuu cahnu, cucañi tahan ñu chihin ñáyivi inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi.⁸ Tandíhi ihya ta nu cua quichaha ñáyivi nyehe ñu tindoho cuví.

⁹Tyicuan ta cucuhva cuenda ñu chi nyoho vatyí sanyehe ra tindoho chi ndo. Ta cacahñi ra chi ndo. Ta tandíhi ñu iyó siqui ñuhu ñáyivi cutasi cuñi nyehe ñu chi ndo cha cuenda yuhu.¹⁰ Quivi cuan cuaha xaan ñu cusandíhi ñu cha chino ñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu.¹¹ Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñáyivi cucasandavi ñaha ra.¹² Ta cuaha xaan cha quiñi caa cucoo. Yucuan chaha cuaha xaan ñu cusandíhi ñu cha cuñi ñu chi tahan ñu.¹³ Soco ñu cha ña ndu uvi ñi chino ñi chii nyacua nya nu ndíhi, cucacu ñi ñu.¹⁴ Ta cucutya nicahnu ñáyivi tuhun vaha cha nyacá ñaha Nyoo ñi ñu ndo, tacuhva coto tandíhi ñáyivi iyó siqui ñuhu ñáyivi, tyicuan ta cunaa ñáyivi.

¹⁵Tandíhi nyoho cha sacuahá ndo ihya, na cutuñi ñi ndo tuhun ihya: Ra Daniel, ra profeta Nyoo ta cha naha, tyaa

ra tuhun noo cha sacuquiñí caa, noo cha sativí. Ta quivi nyehe ndo vatyi chaa ihya Nu Ii, ¹⁶ tyicuan ta ñu ñohó Judea, cuñí chi cono ñu ityi yucu. ¹⁷ Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan. ¹⁸ Ta ñu ñohó nu chiqui, ni ma cunuhu ca ñu cunaquehen ñu ni sahna ñu. ¹⁹ ¡Ndahvi ñusihí cha cañohó sehe quivi cuan! O tatu iyó sehe ñu cha chaxín, ¡ndahvi ñu cuan! ²⁰ Çacan ndo chi Nyoo tacuhva cha ma tahan chi caca cono ndo quivi vichin, ni quivi nyitatu yo. ²¹ Vatyi cuaha xaan tindoho cucoo quivi cuan, noo tindoho cha ta coo ca maa nyata chinqo ñuhu ñayivi, ta ni ma coo ca cha yaha tuhun cuan. ²² Soco tatu Nyoo, ta ma sanducuiti ra quivi cuan, yori maa cacu. Soco cusanducuiti ra cha cuenda cha cuñí ra chi ñu nacachi maa ra.

²³ Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo. ²⁴ Vatyi cuquichi coyo ra casandavi ñaha ta cucatyí ra vatyi ra Cristo cacuví ra. Ta cucatyí ra vatyi ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachi maa Nyoo ta cusandavi ñaha ra tatu cuví chi ra. ²⁵ Saha ndo cuenda vatyi cha yaha catyí chi nyoho cha ni cumañi ca cuvi. ²⁶ Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndi cuan”, catyí ñu chi ndo, ma cahun ndo. O tatu catyí ñu chi ndo: “Nyehe ndo, ma ra nyaá chichi cuarto ihya”, ma chino iñi ndo. ²⁷ Vatyi tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quivi quichi yuhu Rayii cha quichi nya gloria. ²⁸ Nu caá coño chihí, yucuan cuchaa coyo chii.

Yoso caa cuquichi ra Cristo inga chaha

(Mr. 13.24-37; Lc. 21.25-33;
17.26-30, 34-36)

²⁹ Ta cha yahá ri cha nyehé ñu tindoho, ta cunduñaan ñanyii, ta yoo ma sacundichin ca chi. Ta tiñoo cucanacoyo ti andivi, ta nyacua nya cha iyó andivi cunacanda. ³⁰ Tyicuan ta cuquetuvi noo seña ityi andivi nu vachi yuhu Rayii cha quichi nya gloria. Cuquichi nu vico ityi andivi chihin tunyee iñi cahnu ta chihin cha cahnu cuví Nyoo. Ta tandihí ñáyivi iyó siqui ñuhu ñayivi, cucuacu chaa xaan ñu cha nanyehe ñu chii. ³¹ Ta cutachi ángel cuende tacuhva vatyi chihin cha ñihi tiví ra cutu ra ta cusandu iin ri ra chi ñu nacachi maa Nyoo chi, cuquita ñu nicacahnu nu ñuhu ñayivi, nyacua nya nu ndihi ñuhu ñayivi ta nyacua nya nu ndihi andivi.

³² Cutuñi iñi ndo noo cuhva yutun cha nañí higo: Tatu cha yutya soco tun, ta caña ndaha tun, nyoho cha chitó ndo vatyi cha vachi vico savi. ³³ Ta suri tyicuan caa, tatu cha nyehé ndo tandihí maa cha cucuvi ihya, çoto ndo vatyi cha cuyatyin quichi. Cha nyañaí yuvehe cuví chi cuan. ³⁴ Cha ndicha catyí chi ndo vatyi tandihí tuhun ihya, cucuvi cha ni ri ca cha iyó ñáyivi. ³⁵ Andivi ta ñuhu ñayivi cundihí chi, soco tuhun cahán yuhu, ma ndihi chi. Ta cuchino cava tandihí tuhun cahin chihin ndo ihya.

³⁶ Soco quivi ta cuhva cha cucuvi cuan, yori chitó, ni ángel andivi ta ña chitó ra. Ni yuhu Rayii cha quichi nya gloria ta ña chité. Noo tuhun ri maa Nyoo Suti chitó ra.

³⁷ Tari cuví quivi chiyo ra Noé, tyicuan caa cucuvi quivi quichi tucu yuhu Rayii cha quichi nya gloria. ³⁸ Quivi ta ni cumañi ca coon savi xaan, ñáyivi cuan, chachí ñu, ta chihí ñu, tandahá ñu, ta chahá ñu chi sehe ñu tandaha nyacua

nya quivi quihvi ra Noé chichi barcu cuan. ³⁹Ta sana iñi ñu ta chaḡ savi ta tyañi tandihi ñu. Ta tyicuan caa cucuvi tucu quivi quichi tucu yuhu Rayii cha quichi nya gloria. ⁴⁰Quivi cuan, tu uvi ra ñohó ra nu chiqui. Noo ra cunaquehin, ta noo ra ndoo ra. ⁴¹Tu uvi ñusihi nyicó ñu molinu. Noo ña cunaquehin, ta noo ña ndoo ña. ⁴²Cuatu tuhva vaha ndo vatyi ña chitó ndo ñáá cuhva cuquichi ra nyacá ñaha chi ndo. ⁴³Soco coto ndo tuhun ihya vatyi tatu noo chitoho vehe ta chitó ra ñáá cuhva cuquihvi ra suhu chichi vehe ra, cuatu tuhva vaha ra ta ma cuhva ra cha quihvi ra suhu cuan. ⁴⁴Yucuan chaha nyoho, cuatu tuhva ndo. Vatyi sana ri iñi ndo, ta cuquichi yuhu Rayii cha quichi nya gloria.

Ñu cha nyatú tuhva na ndichi ra Cristo, ican ñu cuví musu vaha ra

(Lc. 12.41-48)

⁴⁵Noo musu cha tyasohó tuhun cahán chitoho, ta tyicuan ri sacuví ra tyiño tyaa ra chi ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva. ⁴⁶Ta sii xaan cuví chi musu cuan tatu cuhva cha sahá tyiño ra ta nachaa chitoho ra. Vatyi quichahá ra tandihi cha tahán chi sacuvi ra. ⁴⁷Ta cha ndicha catyí chi ndo, vatyi chitoho ra cunatyaa ra tandihi cha cumí ra ndaha ra, vatyi vaha quichahá ra chihin tyiño sahá ra. ⁴⁸Soco tatu noo musu quiñi iyó ta chicá xiñi ra vatyi naha cuahan chitoho ra, ⁴⁹ta quichaha nyacuvi ra cha ña vaha chihin inga musu cuan, ta quichaha chachi ra ta chihi ra ndixi chihin ra chiñi, ⁵⁰tyicuan ta sana iñi ra ta ndichi chitoho ra quivi cha ña nyatú ra chi ra. ⁵¹Tyicuan ta chitoho ra ñihi xaan cutachi tuñi ra chi ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

Nu chahá ra Jesús noo cuhva cuenda uchi tahan ñu tyivaa

25 ¹Cha nyacá ñaha Nyoo añima ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chi ra cha cua tandaha. ²Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu. ³Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyi natyihi ñu chichi lampara ñu tatu ndihi. ⁴Soco ñu cachi ñohó iñi cuan, canyisó siin ñu yutyí acetye chihin lámpara ñu. ⁵Ta vatyi cucuee ca chaa ra cha cua tandaha cuan, catiñ ñumahna chi tandihi ñu, ta caquixí ñu. ⁶Tyicuan ta ñáá cuhva ñuu, ta chiñi ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen cuenda ndo chi ra!” catyí ndusu cuan. ⁷Tandihi ñu tyivaa cuan canducuita coyo ñu ta quichaha casanduvaha ñu lámpara ñu. ⁸Tyicuan ta quichaha catyí ohon ñu tondo ñohó iñi cuan chi inga ohon ñu cuan: “Cuhva ndo suhva acetye ndo chi ndi, vatyi cuñí ndahva lámpara ndi”, catyí ñu. ⁹Soco ñu tyivaa cha cachi ñohó iñi cuan nacañan ñu tyehe caa: “Ma cuhva ndi vatyi coto ma ñihi, ni cha cuenda maa ndi ta ni cha cuenda maa ndo. Cuñan taxi ndo nya nu quiyahví chi, ta sata ndo cha cuenda ndo.” ¹⁰Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaḡ ra cha cua tandahá cuan. Ta ñu tyivaa cha nyatú tuhva cuan, quihvi coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe. ¹¹Yahá cuan ta cachaa coyo tucu ñu chisatá acetye cuan, ta catyí ñu: “¡Tata! ¡Tata! ¡Nuña yuvehe naquihvi ndi!” ¹²Soco maa ra nacañan ra, ta catyí ra: “Chandicha vatyi ña ñohó nui chi nyoho.”

¹³Tyicuan ta quichaha catyí ra Jesús:

—Cuatu tuhva ri nyoho, vatyí ña chító ndo nya quivi ta ñáá cuhva cuquichi yuhu Rayii cha quichi Nya gloria.

Noo cuhva cuenda xuhun

(Lc. 19.11-27)

¹⁴'Cha nyacá ñaha Nyoo añima ñáyivi cuví chi tari noo ra cha cha nyaá cha cua quita cuhun inga ñuu. Ta cana ra chi musu ra, ta chaha cuenda ra xuhun chi ra.

¹⁵'Chi noo ra chaha ra ta cha ohon mil xuhun, ta chi inga ra chaha ra ta cha uvi mil, ta chi inga ra tari noo mil. Chaha ra chi noo noo ra yoso cuhva cha cuví saha tyiño ra chihin. Tyicuan ta cuahan ra. ¹⁶Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan. ¹⁷Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan. ¹⁸Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

¹⁹'Cuaha quivi yaha ta nachaa chitoho musu cuan. Ta quichaha natava ra cuenda chihin noo noo ra. ²⁰Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca mil siqui cuan, ta catyí ra: "Tata, ohon mil chahun chii, ma inga ohon mil ihya cha saha ganai." ²¹Ta chitoho ra catyí ra chi ra: "Vaha. Noo musu vaha xaan cuvún. Ta sacuvún tandihi cha catyí. Ta vasi chiin ri xuhun chahí chuun soco vaha xaan chotyínon chi chi. Vityin cuaha ca cucuhva cuende chuun. Quihvi nu vaha ihya, ta cusii cuñun chihin." ²²Yaha cuan ta chaa tucu musu cha quehen cuenda uvi mil xuhun cuan, ta catyí ra: "Tata, uvi mil chahun chii, ma uvi ca mil ihya cha saha ganai siqui." ²³Ta catyí chitoho ra chi ra: "Vaha. Noo

musu vaha xaan cuvún, ta sacuvún cha catyí. Vasi chiin ri xuhun chahí chuun soco vaha xaan chotyínon chi chi. Vityin cuaha ca cucuhva cuende chuun. Quihvi nu vaha ihya, ta cusii cuñun chihin", catyí ra. ²⁴Soco cuhva cha chaa musu cha quehen cuenda noo mil ri xuhun cuan, catyí ra chi chitoho ra: "Tata, yuhu chité vatyí cuvún noo ra xaan ta cuñún naquehún xuhun noo nu ña sahá tyiñon, ta cuñun naquehun cosecha noo nu ña tachun. ²⁵Yucuan chaha nayuhvi ta chahin ta tyihí xehi xuhun chichi ñuhú. Soco ma xuhun ihya cha chahun chii", catyí ra. ²⁶Tyicuan ta nachahan chitoho ra, ta catyí ra chi ra: "Musu quiñi iyó ta musu suchan cuví yoho. Tatu chitón vatyí cuñí naquehín nu ña sahá tyiñe, ta quehín cosecha noo nu ña tachí, ²⁷¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siqui cha saha ganaa chi", catyí ra. ²⁸Tyicuan ta quichaha catyí ra chi ñu nyicú cuan: "Tinya ndo noo mil xuhun cha nyisó ra, ta cuhva ndo chi ra cha nyisó uchi mil. ²⁹Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihi chi ñu. ³⁰Ta musu cha ña chiñuhú ihya, tuchi ndo chi ra nu ñaa iñi ityi chata, ta yucuan cuacu chaa ra, ta cusacahni ra noho ra chihin cha nyehe ra tindoho."

Nu catyí ra Jesús vatyí cucutuñi chi tandihi ñáyivi

³¹'Quivi cuquichi yuhu Rayii cha quichi nya gloria, cuquichi chihin cuaha ángel cuende, ta cucunyai tyayu tyaqui ta cunyaca ñahi. ³²Ñáyivi tandihi ri ñuu cundu in ri ñu nui. Ta cusasiin chi noo noo ñu, tari ra sahá cumi mbee tavá siin ra chi mbee ta tava siin ra ndixihyu. ³³Ta cucuatyai chi mbee cuan chiyo vahi, ta chi ndixihyu cuan, chiyo

satyin. ³⁴Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyi nyoho ñáyivi cha nasocó Suti cuví ndo. Quehen cuenda ndo nu cuacunyaa ndo nu nyacá ñaha Nyoo, vatyi cha cuenda maa ndo chinq ihya nyata quívi savaha Nyoo ñuhu ñáyivi. ³⁵Vatyi quívi chisoque, ta nyoho chaha ndo cha cachi. Quívi cu ityi ndutya ta chaha ndo cohi. Ta quívi chica noi tari ra inga ñuu ta nyoho chaha ndo vehe coi. ³⁶Quívi cumañi sahme, ta nyoho chaha ndo sahme. Quívi cuhví ta nyoho chahan ndo chinyehe ndo chii. Ta quívi ñohí vehe caa, ta quichí nyehe ndo nu ñohí.” ³⁷Ta ñu cha vaha cuan cundaca tuhun ñu chii, ta catyi ñu: “Sutu Mañi yuhu, ¿ama nyehe ndi chisocon, ta chaha ndi cha cachun? ¿Ama nyehe ndi ityun ndutya ta chaha ndi cohun? ³⁸¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun? ³⁹¿Ama nyehe ndi cuhvún, o ñohún vehe caa, ta chahan ndi chinyehe ndi chuun?” cucatyí ñu. ⁴⁰Ta yuhu cha cuví Rey cucatyí chi ñu: “Cha ndicha catyí chi ndo, vatyi tandihi tumañi iñi sacuví ndo chihin ra ndahvi, ra yañi ihya, chi yuhu sacuví ndo tumañi iñi cuan.” Tyicuan caa cucatyí yuhu chi ñu. ⁴¹Tyicuan ta yuhu cha cuví Rey cucatyí tiquí chi ñu nyicú chiyo satyin tyehe caa: “Canyaha ndo nui, nyoho ñu tahán chi cuhún anyaya. Cuahan ndo nu ñuhu cha ma ndahva ca maa. Vatyi yucuan cuví nu chinq cha cuenda cuihna ta cha cuenda tatyí ña vaha cuenda ra. ⁴²Vatyi chisoque, ta nyoho ña chaha ndo cha cachi. Cu ityi ndutya, ta ña chaha ndo ndutya cohi. ⁴³Chica noi tari chicá noo ra inga ñuu, ta ña chaha ndo nu coi. Cumañi sahme ta ña chaha ndo sahma cuihne. Cuhví ta ñohí vehe caa, soco ña chahan ndo chinyehe ndo chii nu ñohí”, cucatyí chi ñu. ⁴⁴Tyicuan ta cucatyí ñu chii

tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvún, o ñohún vehe caa, ta ña tyinye ndi chuun?” cucatyí ñu. ⁴⁵Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyi tandihi maa cha ña sacuví ndo chi ñáyivi ndahvi ihya, suri ña sacuví tucu ndo chi yuhu cuví cuan”, cucatyí yuhu chi ñu. ⁴⁶Tyicuan ta ñu cuan cuhun coyo ñu nu cayú ñuhu cha ma ndahva ca maa. Ta ñáyivi vaha cuan cuhun ñu cucoo ñu noo ñáyivi cha ma naa ca maa.

Nu canducú ra cuhva yoso caa catiin ra chi ra Jesús

(Mr. 14.1-2; Lc. 22.1-2; Jn. 11.45-53)

26 Cuhva cha ndihí catyí ra Jesús tuhun ihya, ta quichaha catyí ra chi ra cachicá noo chihin ra tyehe caa:

²—Nyoho chitó ndo vatyi uvi ca quívi ta sanducahnu yo vico pascua. Ta yuhu Rayií cha quichí nya gloria cucuhva cuenda ñu chii vatyi tyaa ñu chii nu cruzi —catyí ra.

³Quívi cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu ñin ri ra nuquehe vehe tyiño ra Caifás, ra cuví nuu chi tata sutu. ⁴Yucuan casandaq ra tyiño yoso caa ta sandavi ñaha ra chi ra Jesús ta catiin ra chi ra ta cacahñi ra chi ra. ⁵Soco cacatyí ra:

—Ma cahñi yo chi ra cha ni ri ca cha chichi vico, tacuhva cha ma naquiqui xaan ñáyivi —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

⁶Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chí, sívi saca ra cuví cuan. ⁷Ta tuhva noo ñaha nu nyaá ra Jesús, nyisó ña noo yutyí tyitú yihí ndutya vixi cha-

han. Ta yahvi xaan nyaá ndutya cuan. Ta ra Jesús nyaá ra yuhu mesa ta choso ña ndutya cuan xiñi ra. ⁸Cuhva cha cananyehę ra chicá noo chihin ra cacuxaan ra ta quichahą catyi ra:

—¿Ñáá tuhun cha sativi ña ndutya vixi chahan cuan? ⁹Vaha ca tyehe ta xico ña, ta ñihi ña cuaha xuhun chihin ta tyinyee ña chi ñu ndahvi chihin xuhun cuan —catyi ra.

¹⁰Tyicuan ta chiñi ra Jesús, ta catyi ra chi ra:

—¿Ñáá tuhun cha sayangá ndo chi ñaha ihya? Vatyi cha sacuvi ña chihin, noo cha vaha cuvı. ¹¹Vatyi ñu ndahvi tyicuan ri cunyaa ñu chihin ndo, soco yuhu, ñima tyicuan ri cua cunyai chihin ndo. ¹²Choso ña ndutya vixi chahan siqui coño ñuhi, vatyi sanduvahą ña cuenda cha cohin chichi ñuhú. ¹³Cha ndicha catyi chi ndo, vatyi tandihı ri nu cahan ñu tuhun Nyoo nicahnu ñayivi, cunacatyı tucu ñu cha sacuvi ñaha ihya, tacuhva nicohon iñi ñáyivi chi ña —catyi ra Jesús.

Nu naxico tuhun ra Judas Iscariote chi ra Jesús

(Mr. 14.10-11; Lc. 22.3-6)

¹⁴Tyicuan ta noo ra chicá noo chihin ra Jesús, ra cha nañi Judas Iscariote, chahan ra chicahan ra chihin ra cacuvi nuu chi tata sutu. ¹⁵Ta catyi ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuvi nuu cuan cacatyı ra vatyı oco uchi tahan xuhun cuichin. ¹⁶Ta nya cuhva cuan ta quichahą nducu ra Judas ñáá noo cuhva cuvı nacuhva cuenda ra chi ra Jesús chi ra cacuvi nuu chi tata sutu cuan.

Nu cuxiñi ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Quivi xihna ri cha quichahą vico ta chachi ñu pan cha ñahri yuchan iya yihı chihin, ra cachicá noo chihin ra Jesús tuhva ra chi ra ta quichahą candaca tuhun ra chi ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸Ta catyi ra Jesús chi ra:

—Cuahan ndo chichi ñuu ta chaą ndo vehe noo ra cuan. Ta catyi ndo chi ra: “Ra Sacuaha catyi ra vatyı cha cuyatyin cua cúvi ra, ta vehun cusanducahnu ndi vico pascua”, catyi ndo chi ra —catyi ra Jesús.

¹⁹Tyicuan ta casacuvi ra tari cuhva catyi ra Jesús chi ra. Yahą cuan ta casanduvahą ra cha cacuxiñi ra cha vico pascua cuan.

²⁰Cuhva cha cuaa, chicunyaą ra Jesús nu mesa chihin ndi uchi uvi ra chicá noo chihin ra. ²¹Ta cha ni ri ca cha cachachi ra, catyi ra Jesús chi ra:

—Cha ndicha catyi chi ndo vatyı noo nyoho cucuhva cuenda ndo chii chi ra xaan iñi chii.

²²Ta canducuihya xaan iñi ra, ta quichahą candaca tuhun iin iin ra chi ra ta cacatyı ra:

—Sutu Mañi yuhu, ¿atu yuhu cuvı?

²³Ta nacahan ra Jesús ta catyi ra:

—Ra cha chachi iin ri coho chihin, ican ra cuan cua na cuhva cuenda chii. ²⁴Yuhu Rayi cha quichi nya gloria, cuahin ityi cha catyi nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyi ra Jesús.

²⁵Tyicuan ta nacahan ra Judas, ra cha cua cuhva cuenda chi ra, ta catyi ra:

—Maestro, ¿atu yuhu cuvı?

Ta nacahan ra Jesús, ta catyi ra:

—Ican yoho cuvún.

²⁶ Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yaha tahvi sava ra, ta chaha ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷ Yaha cuan ta quehen tucu ra copa, ta nacuhva ra tyahvi nyoo chi Nyoo, ta sayaha ra chi tandihi ra ta catyí ra:

—Coho tandihi ndo ihya. ²⁸ Vatyí ican ihya cuví niñi. Ta chihin niñi natyihí tahan Nyoo tuhun chaa chihin ndo, vatyí cucati niñi cha catyí cha vaha chi cuaha ñu, vatyí chihin niñi coo ticahnu iñi cuatyí ñu. ²⁹ Soco catyí chi ndo, vatyí ma coho que tahan vinu tichaha ndivi ihya, nyacua nya cha cohi vinu chaa chihin ndo nya nu nyacá ñaha Suti andivi —catyí ra.

Nu catyí ra Jesús vatyí cucatyí ra Pedro vatyí ña ñohó nuu ra chi ra

(Mr. 14.26-31; Lc.

22.31-34; Jn. 13.36-38)

³⁰ Cha yaha cha cachita ra yaa chi Nyoo, ta cuahan coyo ra yucu yutun Olivo cuan. ³¹ Tyicuan ta quichaha catyí ra Jesús chi ra:

—Tandihí nyoho ta cucaca uvi iñi ndo cha nyicón ndo chii vityin cha cuaa. Vatyí nu tutu Nyoo catyí chi tyehe caa: “Cucahñi chi ra sahá cumi mbee, ta mbee cuquití cuatyí ti”, catyí chi. ³² Soco cha yaha nandote, xihna que cuhin Galilea, ican saha nyoho.

³³ Tyicuan ta nacahan ra Pedro ta catyí ra:

—Vasi tandihí ra ndu uvi iñi ra cha nyicón ra chuun, soco yuhu ma ndu uvi iñi.

³⁴ Tyicuan ta quichaha catyí ra Jesús chi ra:

—Cha ndicha catyí chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyí ra.

³⁵ Ta ra Pedro catyí ra:

—Vasi cúvi chuhun, soco ma catyí cha ña ñohó nui chuun —catyí ra.

Ta suri tyicuan caa catyí tandihí ra chicá noo chihin ra.

Nu chicán tahvi ra Jesús chi Nyoo nu cuví Getsemaní

(Mr. 14.32-42; Lc. 22.39-46)

³⁶ Tyicuan ta chaa ra Jesús chihin ra cachicá noo chihin ra noo nu nañi Getsemaní, ta catyí ra chi ra:

—Cunyicu ndo ihya, cha niri ca cha cuahin yucuan, cua cacan tahvi.

³⁷ Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichaha nducuihya cuñi ra, ta tyoño xaan cuñi ra. ³⁸ Tyicuan ta catyí ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndo ndo ihya ri ta conyito ndo chihin —catyí ra.

³⁹ Tyicuan ta cuahan ra Jesús chiin ca ityi nuu ca ta chicuñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuví tari cuhva cha cuñí mai, soco tari cuhva cuñí maun na cuví —catyí ra.

⁴⁰ Tyicuan ta nachaa ra nu nyicú ra cachica noo chihin ra, ta nyehé ra vatyí caquixí ra. Ta catyí ra chi ra Pedro tyehe caa:

—¿Atu ni minoo hora ña cuví conyito ndo chihin? ⁴¹ Conyito ndo, ta cacan tahvi ndo tacuhva cha ma cuví chasaha cuhna chi ndo. Cha ndicha vatyí añima ndo, cuñí xaan chi nanducu chi Nyoo, soco coño ñuhu ndo vita cuñí chi —catyí ra Jesús chi ra.

⁴² Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuvi cha ma nyehi tindoho ihya, tu tyicuan caa, na cuvi maa cuhva cuñún —catyí ra.

⁴³ Tyicuan ta nachaa ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñí ra cusu ra. ⁴⁴ Tyicuan ta sandoo ra chi ra, ta cuahan ra cha cu uñi chaha cua cacan tahvi ra. Ta catyí ra suri maa tuhun cha yaha cahān ra cha chicān tahvi ra chi Nyoo.

⁴⁵ Tyicuan ta nachaa ra nu canyicu ra cachicá noo chihin ra, ta catyí ra chi ra:

—Vityin ndicha, cusu ndo ta nyítatu ndo. Vatyí cha chaā cuhva cha cua nacuhva cuenda ra chii chi ra quiñi iyó, ta Rayii cha quichi nya gloria cuví. ⁴⁶ Ndícuita ndo, ta cōho ndo. Vatyí cha vachi ra cha cunacuhva cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni cahān ca ra Jesús tuhun ihya, ta chaā ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachi chi ra. ⁴⁸ Ra Judas, ra cha chahá cuenda chi ra Jesús, cha yaha chahā ra noo seña chi ra cuan, tacuhva coto ra yóó chi tiin ra. Ta tatyí ra:

—Ra cha cutyayuhi chi, ican ra cuan cuví. Tiin ndo chi ra.

⁴⁹ Tyicuan ta tuhva ra chi ra Jesús ta catyí ra:

—Nocumi chuun, Maestro.

Ta tyayuhū ra chi ra.

⁵⁰ Tyicuan ta nacahān ra Jesús ta catyí ra chi ra:

—Amigo, sacuvi ñáá tyiño vachun.

Tyicuan ta catuhva ra ta catiñ ra chi ra Jesús.

⁵¹ Tyicuan ta noo ra ndihi chihin ra Jesús, tava ra mityi ra ta chahnya ra soho noo musu ra cuví nuu chi tata sutu cuan. ⁵² Ta catyí ra Jesús chi ra:

—Natyihi mityun chichi vena. Vatyí tandihi ñu cacañi tahan chihin mityi, suri chihin mityi cúvi ñu. ⁵³ ¿Atu ña chitón vatyí tatu yuhu ta cuñí, cuví caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii? ⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahān maa chi cuvi chi yuhu tyehe caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi tiin ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiquivi chinyaí sañahi nu nyicú ndo chichi vehe ñuhu cahnu, soco ña tiin ndo chii cha cuhin vehe caa. ⁵⁶ Vatyí tandihi cha cuví chii vityin, ta chicunyaā nu tutu Nyoo, cha catyaa ra profeta Nyoo ta cha naha.

Tyicuan ta ndii ra cachicá noo chihin ra, cachino ra. Noo tuhun ca maa ra Jesús casandoo ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha catiñ chi ra Jesús cuan, chinyaca ra chi ra nuu ra Caifás, ra cuví nuu chi tata sutu. Suri yucuan canyicú iin ri ra sacuaha ley vehe ñuhu ta ra cacuví mandoñi. ⁵⁸ Soco ra Pedro cuahan ra chata ra, nya sava ri nya nuquehe vehe ra cuví nuu chi tata sutu cuan. Ta quihvi ra ta ndoo ra nyaá ra chihin policía cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihi ra cuví tyiño, canducu ra noo cuatyí catyaa ra siqui

ra Jesús, vasi ña ndicha, tacuhva vatyí chihin cuatyí cuan ta cuví cahñi ra chi ra. ⁶⁰ Soco ña cañihí maa ra cuatyí ra, vasi cuaha ñáyivi chahan ñu chicatyi ñu cuendu siquí ra. Soco nu ndihi tuhun, chaa coyo uvi ca testigu cuendu. ⁶¹ Ta cacatyí ra:

—Ra ihya, catyi ra vatyí cuví satani ra vehe ñuhu cahnu Nyoo, ta chichi cha uñi quivi cunacananyaa ra inga chaha, na —cacatyí ra.

⁶² Tyicuan ta ra cuví nuu chi tata sutu cuan, ndicuita ra, ta catyi ra chi ra Jesús:

—¿Atu ña nacahun nu cahan ra ihya? ¿Ñáá cha cuvi cha cacatyí ra ihya sicun?

⁶³ Soco ra Jesús taxi ri nanyaá ra. Tyicuan ta quichaha catyi ra cuví nuu chi tata sutu cuan chi ra:

—Chihin sivi Nyoo nyitó, catyi chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyi ra.

⁶⁴ Ta catyi ra Jesús chi ra:

—Ican cuví, tari cuhva catyi maun. Ta suri catyi chi ndo, vatyí cunyehe ndo chi yuhu Rayi cha quichi nya gloria, cunyai chiyo vaha Nyoo ra iyó tandihi tunyee iñi chii, ta cunyehe ndo nu quichi tiqui nu vico ityi andivi —catyi ra.

⁶⁵ Tyicuan ta ra cuví nuu chi tata sutu cuan chahnya ra sahna ra tari noo seña tyi cuñi maa ra tyi ña vaha cha cahan ra Jesús, ta catyi ra:

—Ra ihya chicoo cuatyí ra nuu Nyoo chihin tuhun cahán ra. ¡Nyehe ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cahan ra. ⁶⁶ ¿Ñáá catyi ndo vityin?

Ta canacahan ra ta cacatyí ra:

—Iyó cuatyí ra, ta cuñi chi cha cúvi ra.

⁶⁷ Tyicuan ta catyicusij ra nuu ra ta ca-cañi ra chi ra. Inga ra cacatu ra nuu ra chihin chiqui ra. ⁶⁸ Ta cacatyí ra chi ra:

—Yoho, cha sahún Cristo chuun. ¡Nacoto yóo cha cañi chuun!

Nu catyi ra Pedro vatyí ña ñohó nuu ra chi ra Jesús

(Mr. 14.66-72; Lc. 22.56-62;

Jn. 18.15-18, 25-27)

⁶⁹ Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyi ña chi ra:

—Yoho tucu chica noun chihin ra Jesús, ra Galilea cuan.

⁷⁰ Ta ra Pedro catyi ra vatyí ña ñohó nuu ra chi ra nuu tandihi ñu nyicú cuan, ta catyi ra:

—Ña chité ñáá tuhun cahún.

⁷¹ Tyicuan ta cuahan ra Pedro ityi yuvehe, ta nyehe inga ña chi ra, ta catyi ña chi ra nyicú cuan:

—Suri chica noo tucu ra ihya chihin ra Jesús, ra ñuu Nazaret cuan —catyi ña.

⁷² Ta inga chaha tucu tixehe ra Pedro cha ñohó nuu ra chi ra ta catyi ra:

—Cha ndicha vaha tyi ña ñohó nui chi ra cuan.

⁷³ Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuvi nyacua nya cuhva cahún.

⁷⁴ Tyicuan ta iyo xaan tyanaha ra ta catyi ra:

—Chitó vaha Nyoo tyi ña ñohó nui chi ra cuan, ta nacahñi Nyoo chii tatu ña ndicha cha cahín —catyi ra.

Ta suri cuhva cuan nacuacu chaa noo loho. ⁷⁵ Tyicuan ta nicohon iñi ra Pedro tuhun cha catyi ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quitá ra Pedro yucuan, ta chacu vavaha ra cha cuihya iñi ra cha sacuvi ra tyicuan caa.

**Nu cachahá cuenda ra chi
ra Jesús chi ra Pilato**

(Mr. 15.1; Lc. 23.1-2; Jn. 18.28-32)

27 Cuhva cha cundichin, tandihí ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chi ra Jesús. ²Ta nuhñí ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³Cha nyehe ra Judas, ra cha naxico tuhun chi ra Jesús, vatyí cuacúvi ra, ta ndu uví ñni ra cha sacuví ra, ta nacuhva ra ndi oco uchi xuhun cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan. ⁴Ta catyí ra:

—Chicoo cuatyí yuhu, vatyí chaha cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

⁵Tyicuan ta tuchí ra Judas xuhun cuan chichi vehe ñuhu cahnu, ta chahan ra ta chicuhñi ra yoho sucun ra ta suri maa ra chitacaá ra chi ra. Ta chihí ra.

⁶Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuví tyihí yo xuhun ihya chichi caja ofrenda vatyí yahvi cha chahñi ñu noo ñáyivi cuví.

⁷Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyí coo nu cuchi ra chi ñu inga ñuu tu chihí ñu. ⁸Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Ñáyivi. ⁹Ta tyicuan caa chingo cava cha tyaa ra Jeremías profeta Nyoo ta cha naha.

Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra. ¹⁰Ta chihin cuan, casata ra Ñuhú Ra Savahá Quisi, tari cuhva catyí Sutú Mañi yo chii”, catyí chi.

**Nu nyehe ra Pilato vatyí
ñahri maa cuatyí ra Jesús**

(Mr. 15.2-5; Lc. 23.3-5; Jn. 18.33-38)

¹¹Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹²Ta cuhva cha catyaa ra cacuví nuu chi tata sutu cuan ta mandoñi cuatyí siquí ra, ra Jesús ña nacahan maa ra. ¹³Tyicuan ta quichaha catyí ra Pilato chi ra:

—¿Atu ña chiñún tandihí cha cacahan ra sicun?

¹⁴Soco ra Jesús ña nacahan ra. Ta nyacua iyo cuñi gobiernu cuan vatyí ña nacahan ra. Ta ña chitó ra ñáá cunyacuvi ra.

**Nu cutuñi chi ra Jesús ta
cacatyí ñu vatyí cucúvi ra**

(Mr. 15.6-20; Lc. 23.13-25;
Jn. 18.38—19.16)

¹⁵Soco cha vico pascua cuan, iyó noo tuhun chi ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi. ¹⁶Ta quívi cuan ñohó noo ra cha nañi Barrabás vehe caa. Ta chitó tandihí ñáyivi tuhun ra. ¹⁷Ta cuhva cha canyicú ñu ri ñu, ra Pilato ndaca tuhun ra chi ñu, ta catyí ra:

—¿Yóo chi cuñi nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

¹⁸Vatyí chitó ra vatyí cha cuenda cha tasi cuñi nyehe ñu chi ra Jesús, yucuan cuenda chaha cuenda ñu chi ra.

¹⁹Cha ni ri ca cha nyaá ra Pilato nu tyayu ra, nu cuví ra tyiño, tachí ñasihi ra noo tyiño chi ra ta catyí ña: “Ma tyihun chuun chihin ra vaha chiña. Vatyí cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰Soco ra cacuví nuu chi sutu ta mandoni ñuu cuan, cacuñihi ra catyiyuhu ra chi ñáyivi na cacan ñu cha saña ra Pilato chi ra Barrabás, ta na cúvi ra Jesús.

²¹Ta gobiernu cuan cahan ra chihin ñu inga chaha, ta catyí ra:

—Chichi cha nduvi ra, ¿nya ra cuñi ndo cha sañe?

Ta maa ñu nacahan ñu, ta catyí ñu:

—Chi ra Barrabás.

²²Ta ra Pilato ndaca tuhun ra chi ñu, ta catyí ra:

—¿Ta ñáá cha cusacuvi chihin ra Jesús cha nañi Cristo ihya?

Tandihi ñu nacahan ñu ta catyí ñu:

—¡Na cúvi ra nu cruzi!

²³Tyicuan ta quichaha catyí ra Pilato chi ñu:

—Soco ¿ñáá cha ña vaha sacuvi ra?

Soco maa ñu nacanā chaa tucu ñu inga chaha ta catyí ñu:

—¡Cahñi chi ra nu cruzi!

²⁴Cuhva cha nyehe ra Pilato vatyí ñahri maa cha cuví sacuvi ra, vatyí quiñi xaan cacuví ñu, chican ra ndutya, ta nacatya ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

²⁵Ta tandihi ñáyivi canacahan ñu, ta catyí ñu:

—Na ndoo chi siqui maa ndi ta siqui sehe ndi.

²⁶Tyicuan ta ra Pilato saña ra chi ra Barrabás, ta tachí ra na ndoho ra Jesús, ta nacuhva cuenda ra chi ra na cúvi ra nu cruzi.

²⁷Tyicuan ta sindaro cuenda gobiernu cuan chinyaca ra chi ra Jesús nya vehe

tyiño, ta casandu in ri ra chi tandihi sindaro cuan nicachico. ²⁸Tyicuan ta catava ra sahma ra ta casacuihno ra noo sahma cuaha chi ra. ²⁹Ta catyihí ra noo corona cha chino chihin iñu xiñi ra. Ta chaha ra noo yutun na quindaha ra chihin chiyo vaha ra. Tyicuan ta cachicuiñi chiti ra nuu ra, ta cachacu nyaa ra chi ra ta catyí ra:

—¡Nocumi chuun, yoho Rey cuenda ñu Israel!

³⁰Ta catyicu sii ra chi ra ñandihi. Ta quehen ra yutun cuan ta cañi ra xiñi ra.

³¹Cha yaha cha cachacu nyaa ra chi ra ta catava ra sahma cuaha cuan chi ra ta sandihvi noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi

(Mr. 15.21-32; Lc.

23.26-43; Jn. 19.17-27)

³²Cuhva cha caquita coyo ra yucuan, catahan ra chi noo ra ñuu Cirene, nañi ra Simón. Ta casaniñi ra chi ra na cuiso ra cruzi ra Jesús.

³³Ta cachaa coyo ra noo nu nañi Gólgota, ta cuñi chi catyí Nu Cuví Yiqui Xiñi Ndiyí. ³⁴Ta yucuan cachaha ra vinu nasaca chihin cava uva coho ra Jesús. Soco cha yaha cha chihí ra chiin, ña cuñi ca ra coho. ³⁵Ta cha yaha cha catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chino cava tuhun cha tyaa noo profeta Nyoo ta cha naha nu catyí chi tyehe caa: “Casacha ra sahme chihin cha chahan ra sihva”, catyí chi. ³⁶Tyicuan ta cachicun-yicu ra yucuan vatyí saha cuenda ra chi ra. ³⁷Ta ityi xiñi ra catyaa ra noo letra cha catyí ñáá tuhun cua cahñi ra chi ra. Ta catyí chi tyehe caa: “Ican ra ihya cuví ra Jesús, rey cuenda ñu ñuu Israel.”

³⁸Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra. ³⁹Ta ñu yahá coyo cuan, cacahán ñu chi ra, ta quisi xiñi ñu, ⁴⁰ta catyí ñu chi ra:

—¡Yoho cha catyün tyi cusanduvon vehe ñuhu cahnu, ta chichi cha uñi quivi ta nacananyaa tucun! ¡Şacacu chuun vityin! ¡Tatu Sehe Nyoo cuví chuun, ñoo nu cruzi chiña! —catyí ñu chi ra.

⁴¹Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandíhi. Ta cacatyí ra chi tahan ra tyehē caa:

⁴²—Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chi ra.

⁴³Itá iñi ra chi Nyoo, vityin na sacacu Nyoo chi ra, tatu ndicha cuñí ra chi ra. Vatyí catyí ra chi yo vatyí Sehe Nyoo cuví chi ra.

⁴⁴Ta nyacua nya ra suhu cha tacaá nu cruzi xiin ra ta cacahan ra chi ra ñandíhi.

Nu chihí ra Jesús

(Mr. 15.33-41; Lc.

23.44-49; Jn. 19.28-30)

⁴⁵Tyicuan ta tandíhi síqui ñuhu ñayivi nduñaá iñi, nyacua nya ora ta nyacua nya ca uñi cha cha iñi. ⁴⁶Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehē caa:

—Elí, Elí, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun cha sandoó ñihnon noo tuhun mai?

⁴⁷Suhva ra canyicú cuan, cachihí ra cha cahān ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

⁴⁸Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaa ra noo nu yutun, ta satuhva ra yuhu ra Jesús

tacuhva na coho ra. ⁴⁹Soco inga ra cacatyí ra:

—Saña chi ra. Na nyehe yo tatu quichi sacacu ra Elías chi ra.

⁵⁰Inga tucu chaha cana chaa ñihi ra Jesús, tyicuan ta chihí ra. ⁵¹Ta caa cuhva ri cuan ndatā sava sahma cha tacaá chichi vehe ñuhu cahnu cuan, nyacua nya síqui ta nyacua nya yuvi ndatā. Ta tañ. Ta ndatā yuu. ⁵²Ta nuña yuhu ñaña. Ta nyacua canandotō cuaha ñu chinó iñi chi Nyoo, ñu cachihí. ⁵³Ta cha yahā nandoto ra Jesús caquitā coyo ñu nu ñaña ta quihvi coyo ñu chichi ñuu Jerusalén, ta cuaha ñayivi nyehe chi ñu. ⁵⁴Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha tañ. Ta cha canyehē ra inga ca cha cuví, ta cacatyí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵Cuaha ñusihí cha chinyicōn chi ra Jesús nya Galilea ta tyinyeē ñu chi ra, nyicú ñu canyehé ñu nya sava ri yucuan.

⁵⁶Ta ican suhva ñu ihya cuví cu María ñaha Magdala, ta cu María síhi ra Jacobo ta ra José, ta síhi sehe ra Zebedeo.

Nu cua cuhí ra chi ra Jesús

(Mr. 15.42-47; Lc.

23.50-56; Jn. 19.38-42)

⁵⁷Cuhva cha cua cuaa, quichi noo ra tyayíi cha nañí José. Ra ñuu Arimatea. Ta suri chinó iñi ra chi ra Jesús. ⁵⁸Ta chahan ra chinyehē ra nu nyaá ra Pilato, ta chican ra coño ñuhu ra Jesús. Tyicuan ta tyihí ra Pilato tyiño na cuhva ra coño ñuhu ra chi ra. ⁵⁹Tyicuan ta quehen ra José coño ñuhu ra, tyihí ra chichi noo sinduhu ndíi. ⁶⁰Ta tyihí ra chi ra chichi noo ñaña nicaa chaa cha cuví noo yavi yuu cha tyihí ra tyiño cachatya ra. Ta cha yahā cha nacasi ra yuhu ñaña cuan chihin noo yuu cahnu, ta cuahan ra. ⁶¹Soco cu María ñaha Magdala, ta

inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivi, quivi nyitatu ñu cuví, ta ra cacuví nuu chi tata sutu, ta ra fariseo chahan coyo ra chinyehē ra nu nyaá ra Pilato. ⁶³ Ta catyí ra chi ra:

—Tata, nichón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra. ⁶⁴ Yucuan chaha tyihí tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chi ñáyivi vatyí cha nandoto ra. Ta cha tyicuan caa nu ndihí tuhun ihya, yaha ca cuhva cucuvi —catyí ra.

⁶⁵ Ta ra Pilato catyí ra chi ra:

—Ma suhva sindaro chiña. Cuñan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casaha cumi vaha ra ñaña cuan, ta catyaa ra noo sellu chata yuu cha chasí cuan. Ta casandoq ra chi sindaro sahá cumi yucuan.

Nu nandotoq ra Jesús

(Mr. 16.1-8; Lc. 24.1-12; Jn. 20.1-10)

28 Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña. ² Ta quichi minoo cha taan vatyí quichi ángel Sutu Mañi yo noq ra nya ityi andivi, ta chaq ra nu ñaña cuan. Ta sacanyaha ra yuu cha nyañi yuhu cuan, ta chicun-yaa ra siqui. ³ Ta xiño vavaha ra, tari cha quihvi tacha. Ta sahma ra cuichin vavaha. ⁴ Cuhva cha cananyehē sindaro cuan chi ra, canayuhví vavaha ra nyacua nihí ra, ta nyacua coña ra chihin cha

yuhví ra. ⁵ Tyicuan ta quichaha catyí ángel cuan chi ñusihí cuan:

—Ma yuhvi ndo. Yuhu chité vatyí chi ra Jesús cha chihí nu cruzi nanducú ndo.

⁶ Yori ca ra ñohó ihya, vatyí cha nandoto ra, tari catyí ra. Ñaha ndo ta nyehe ndo nu catuvi ra. ⁷ Ta cuñan ndo numi ri, ta catyí ndo chi ra cachica noo chihin ra vatyí cha nandotoq ra, ta cha cuhan ra Galilea, nyatú ra chi ra yucuan. Ican ihya cuví cha nyaa catyí chi ndo —catyí ángel cuan chi ñu.

⁸ Tyicuan ta numi ri quita coyo ñu nu ñaña cuan. Suhva ri yuhví ñu, ta suhva ri sii vavaha cuñí ñu. Ta chinq vavaha ñu cua catyí ñu chi ra cachica noo chihin ra Jesús. ⁹ Ta cuhva cuan tuví ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuñi chiti ñu nuu ra ta casacahnu ñu chi ra, ta suri numí ñu chaha ra. ¹⁰ Ta catyí ra chi ñu:

—Ma yuhvi ndo. Cuñan ndo cua sacoto ndo chi yañi vatyí na cuhun coyo ra Galilea, ta nyicuan cuñihí tahan ndi —catyí ra chi ñu.

Tuhun cha canacatyí sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuví cuan chi ra cacuví nuu chi sutu. ¹² Tyicuan ta ra cacuví nuu cuan chahan coyo ra chicahan ra chihin ra mandoñi ñuu vatyí catyihí tahan ra tuhun yoso caa casacuvi ra. Tyicuan ta cuaha xuhun cachaha ra chi sindaro cuan. ¹³ Ta cacatyí ra chi ra:

—Nyoho, catyí ndo vatyí cha cha cuaa cha ni ri ca cha quixí ndo, chahan coyo ra cachica noo chihin ra Jesús ta chicasuhú ra coño ñuhu ra. ¹⁴ Ta tatu chitq gobiernu tuhun ihya, cua nyehe maa ndi yoso caa catyí ndi chi ra, ta nyoho ma caca iñi ndo. Ñahri cucuvi chi ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuvi

ra cha cacatyí ra chi ra. Ta nya vityin ta tyicuan caa catyí ñáyivi ñuu Israel.

**Nu tyaa ra Jesús tyiño chi
ra cachicá tyiño ra**

*(Mr. 16.14-18; Lc.
24.36-49; Jn. 20.19-23)*

¹⁶Ta tyicuan caa, ndi uchi iin ra cachicá noo chihin ra, cuahan coyo ra nya Galilea nya yucu nu catyí maa ra Jesús chi ra vatyí cuhun coyo ra. ¹⁷Ta cuhva cha cananyehę ra chi ra Jesús, casacahnũ ra chi ra soco suhva ra chica uvi iñi ra. ¹⁸Tyicuan ta tuhva ra Jesús chi ra ta catyí ra chi ra:

—Nyoo chaha ra cha cunyaca ñaha yuhu tandihi andivi ta siqui ñuhu ñayivi. ¹⁹Yucuan chaha, cuahan ndo tandihi nu nyicú ñáyivi, tandihi ri ñuu, ta catyí ndo chi ñu na nanyicon ñu chii. Ta sacondutya ndo chi ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyí Ii Nyoo. ²⁰Ta sañaha ndo chi ñu na naquichaha ñu tandihi cha catyí yuhu tyi sacuvi ñu. Ta coto ndo vatyí yuhu cunyai chihin ndo tandihi quivi nyacua nya naa ñayivi —catyí ra Jesucristo chi ra cachicá tyiño ra.

Tuhun Nyoo Cha Tyaá San Marcos

**Nu sacondutyá ra Juan chi ñáyivi ta
cahán ra tuhun Nyoo chihin ñu**

(Mt. 3.1-12; Lc. 3.1-9,
15-17; Jn. 1.19-28)

1 Tyehe caa quichaha tuhun vaha ra Jesuscristo Sehe Nyoo. ²Ra Isaías profeta Nyoo tyaá ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cuhun siqui ñuhu ñayivi ta cutachi chi noo ra cusacoto chi ñáyivi vatyi nyaá cuhun nu nyicú ñu, catyí Nyoo chi ra Cristo.

³ Chiñi yo ndusu noo ra cha canachaá nu chiqui ndii,

ta catyí ra: “Tari sanduvahá ndo noo ityi, tyicuan caa sanduvaha ndo ñima ndo vatyi cua quichi Sutu Mañi yo.

Nuña ndo noo ityi ndoo chi ra na quihvi ra ñima ndo.”

Tyicuan caa tyaá ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyivi nu chiqui ndii cuan. Ta catyí ra chi ñu na ndu uvi iñi ñu cutyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu. ⁵ Ta tandihi ñáyivi ityi Judea quichi coyo ñu tyasoho ñu tuhun cahán ra, ta ñu ñuu Jerusalén ñandihí. Ta cha yaha nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahma cha ñihno ra Juan cuan chihin ixi camellu chino chi. Ta ñii cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí. ⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta

ña nañé ni cha ndachi ñii xityin ndichan ra. ⁸ Yuhu sacondutyé chi ndo chihin ndutya. Soco maa ra cusacondutya ra chi ndo chihin Tatyí Ii Nyoo —catyí ra Juan.

Nu condutyá ra Jesús

(Mt. 3.13-17; Lc. 3.21-22)

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutya ra Juan chi ra. ¹⁰ Ta cha yaha condutya ra Jesús, ta cuhva cha cua quita ra chichi ndutya, ta nanyehé ra andivi cuahan nuña. Ta nyehe ra Tatyí Ii Nyoo tari noo paloma, vachi noó siqui ra. ¹¹ Ta tyacú noo ndusu ityi andivi ta catyí ndusu cuan tyehe caa:

—Yoho cuvún Sehi ta cuñi xain chuun. Ta sii xaan cuñi chuhun —catyí ndusu cuan.

**Nu nducú nyehe ra
ña vaha chi ra Jesús**

(Mt. 4.1-11; Lc. 4.1-13)

¹² Yaha cuan ta sacuhun Tatyí Ii Nyoo chi ra Jesús noo nu chiqui ndii. ¹³ Ta yucuan chinyaa ra uvi xico quivi nu chiqui ndii cuan, nu yori ñáyivi iyó, maa ri quití iyó. Ta nducú nyehe cuhna chi ra. Ta yaha cuan ta cha coyo ángel ta catyiñuhu ra chi ra.

**Nu quichaha saha tyiño
ra Jesús ityi Galilea**

(Mt. 4.12-17; Lc. 4.14-15)

¹⁴ Cha yaha catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi. ¹⁵ Ta catyí ra:

—Cha chaá cuhva cha cua cunyaca ñaha Nyoo ñima ndo. Yatyin ri nyaá ra chihin ndo. Ndu uvi iñi ndo cuatyí ndo, ta chino iñi ndo tuhun Nyoo cha sacacu ñima ndo —catyí ra Jesús.

**Nu cana ra Jesús chi cumi
tahan ra catiín tiyaca**

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehē ra chi ra Simón ta chi yañi ra, ra Andrés, cacañi ra yuhva ra nu ndutya, vatyi ra catiín tiyaca cacuví ra. ¹⁷ Ta catyí ra Jesús chi ra:

—Cunyicon ndo chii, ta yuhu cusacuvi vatyi tari ñihí ndo tiyaca, tyicuan caa cuñihí ndo añima ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

¹⁸ Caa cuhva ri cuan casandoꝝ ra yuhva ra, ta cuahan coyo ra chihin ra.

¹⁹ Yahā cuan ta chiin ri ca chica ra Jesús, ta nanyehē ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra. ²⁰ Cana ra Jesús chi ra. Ta ninduvi tahan ra casandoꝝ ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

**Nu nduvaha noo ra
yihí tatyí ña vaha añima**

(Lc. 4.31-37)

²¹ Ta chaꝝ coyo ra ñuu Capernaum. Ta cuví chi noo quiñi nyitatú ñáyivi, ta quihvi ra Jesús chichi vehe ñuhu, ta quichaha sañaha ra tuhun Nyoo chi ñáyivi. ²² Ta iyo cuñi ñu tuhun cahán ra, vatyi sañahá ra tari noo ra iyó vaha ityi chii cha cahán. Ña cahán ra cuhva cahán ra casacuahá cuenda ley vehe ñuhu. ²³ Chichi vehe ñuhu cuan ñohó noo ra yihí tatyí ña vaha añima. Ta cana chaa ra ta catyí ra:

²⁴ —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyi sanaun chi ndi? Yuhu ñohó nui chuun, ta chité vatyi Sehe Ii Nyoo

cuví chuun —catyí ra yihí tatyí ña vaha cuan chi ra Jesús.

²⁵ Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña! —catyí ra.

²⁶ Ta tatyí ña vaha cuan, chihí tañi ra cuhví cuan saha chi, ta iyo canachaꝝ tatyí cuan quitaꝝ chi ra. ²⁷ Tandihí ñáyivi yuhvi xaan ñu cuví, ta candacaꝝ tuhun ñu chi tahan ñu, ta catyí ñu:

—¿Ñáá cha cuví ihya? ¿Ñana vaha tuhun chaa sañahá ra ihya? ¡Vatyi iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

²⁸ Ta numi ri cachitoꝝ ñáyivi tandihí ñuu cha iyó Galilea cuan tuhun ra Jesús.

**Nu sanduvaha ra Jesús chi
maha tyiso ra Simón Pedro**

(Mt. 8.14-15; Lc. 4.38-39)

²⁹ Cuhva cha quitaꝝ coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra. ³⁰ Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña. ³¹ Tyicuan ta tuhva ra Jesús, ta tñn ra ndaha ña. Ta nacoñehē ra chi ña. Ta caa cuhva ri cuan, tinyaꝝ cahñi chi ña. Ta quichaha tyiñuhu ña chi ra.

**Nu sanduvaha ra Jesús
chi cuaha ñu cuhví**

(Mt. 8.16-17; Lc. 4.40-41)

³² Cuhva cha queꝝ ñanyii ta cha cua cuaa, quichi nyaca ñu tandihí ñu cuhví ta ñu yihí tatyí ña vaha nu nyaá ra Jesús.

³³ Ta tandihí ñáyivi ñuu cuan candu iñn ri ñu yuvehe cuan. ³⁴ Ta cuaha ñu cuhví cha siin siin cuehe sanduvaha ra. Ta tava ñehe ra chi cuaha tatyí ña vaha, soco ña chaha ra cha cahan tatyí cuan, vatyi chitó cuan yóo ra cuví ra.

Nu cahán ra Jesús tuhun Nyoo ityi Galilea

(Lc. 4.42-44)

³⁵Ta cha inga quivi cuhva cha ni ñaa ca, ndicuita ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo. ³⁶Ta ra Simón ta ra tahan ra cuahan coyo ra cua nanducu ra chi ra. ³⁷Ta cuhva cha canañihí ra chi ra cacatyí ra chi ra:

—Tandihí ñáyivi nanducú ñu chuun —cacatyí ra chi ra Jesús.

³⁸Soco maa ra catyí ra chi ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chi ra.

³⁹Yucuan chaha chicá noo ra Jesús tandihí ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihí añima ñáyivi.

Nu sanduvahá ra Jesús chi noo ra cha tyahyu coño

(Mt. 8.1-4; Lc. 5.12-16)

⁴⁰Noo chaha tuhva noo ra cuhví cha tyahyu coño nu nyaá ra Jesús. Ta chicuñi chítí ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

⁴¹Ta cundahvi cuñí ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñí sanduvahi chuun. Ta na nduvahun vityin ri —catyí ra chi ra.

⁴²Caa cuhva ri cha catyí ra tyehe caa, tinyaa cuehe cuan chi ra, ta nduvaha ra. ⁴³Tyicuan ta catyí ra Jesús vatyí cha cuvi cuhun ra, soco catyí xaan ra chi ra na sacuvi ra tyehe caa:

⁴⁴—Nyehe. Yori chihin cahun tuhun. Soco cuahan nu nyaá tata sutu. Ta

sañahun chuun chi ra, ta cuhvon cha tahán chi cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyivi tyi cha nduvahun chihin cuehe cuan —catyí ra Jesús chi ra.

⁴⁵Soco ra cuan chahan ra, ta quichaha nacatyí ra chi tandihí ñáyivi. Yucuan chaha ña cuví ca quihvi ndichin ra Jesús chichi ni noo ñuu. Ta ityi chata ri ñuu chicá noo ra nu yori ñáyivi iyó, soco tandihí ri ityi quita coyo ñu, quichi nyehe ñu chi ra.

Nu sanduvahá ra Jesús chi noo ra cuhví cha ña cuví nacanda

(Mt. 9.1-8; Lc. 5.17-26)

2 Suhva quivi yahá ta quihví ra Jesús inga chaha chichi ñuu Capernaum. Ta cachito ñáyivi tyi nyaá ra vehe. ²Ta numi ri candu iñ ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu. ³Tyicuan ta cumi tahan ra canyiso chi noo ra cuhví cha ña cuví nacanda, caquichí nyaca ra chi ra nu nyaá ra Jesús. ⁴Soco ña cuví caquihvi ra nya nu nyaá ra Jesús cha cuenda vatyí tuvi xaan ñáyivi. Tyicuan ta candaa ra ityi xiñi vehe. Ta sacuachiyó ra suhva tyiyo. Ta sanoo ra chi ra cuhví cuan chihin chito. ⁵Nyehe ra Jesús vatyí cachinó xaan iñi ra cuan. Ta catyí ra chi ra cuhví cuan:

—Cha ndachí cuatyun, suti —catyí ra Jesús chi ra.

⁶Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa: ⁷“¿Ñáa tuhun cha cañá iñi ra ihya cahan ra tyehe caa? Chicoo cuatyí ra nuu Nyoo chihin tuhun cahan ra vatyí yori cuví sandachi cuatyí, noo tuhun ri maa Nyoo cuví sandachi ra cuatyí”, cachicá xiñi ra. ⁸Soco ra Jesús chitó ra cha cachicá xiñi ra. Ta catyí ra chi ra:

—¿Ñáá tuhun cha chicá xiñi nyoho ty-
icuan caa? ⁹ ¿Ñáá cha yii ca, cha catyi
yo chi ra cuhví ihya vatyí cuatyí ra cha
yahá ndachi, o cha catyi yo chi ra vatyí
nducuita ra ta naquehen ra chito ra ta
caca ra? ¹⁰ Vaha, vityin chihin cha san-
duvahi chi ra ihya, cusañahi chi ndo
vatyi yuhu ra cuví Rayii cha quichi nya
gloria, iyó ityi chii cha sandachi cuatyí
ñáyivi —catyí ra Jesús chi ra.

Tyicuan ta quichaha catyí ra chi ra
cuhví cuan:

¹¹ —Catyí chi yoho, nducuita, naque-
hen chiton, ta cuanuhu nya vehun
—catyí ra Jesús chi ra.

¹² Ta ra cuhví cuan nducuita ra. Naque-
hen ra chito ra, ta cuanuhu ra. Ta tandihi
ñu nyehe ñu, ta iyo cuñi ñu, ta sacahnú
ñu chi Nyoo, ta catyí ñu:

—Ni noo chaha ta nyehe ca yo cha
tyehe caa —catyí ñu.

Nu cana ra Jesús chi ra Leví

(Mt. 9.9-13; Lc. 5.27-32)

¹³ Yahá cuan ta cuahan tucu ra Jesús
inga chaha yuhu miñi cuan. Ta cuhva
cha nataca ñáyivi nu nyaá ra, quichaha
cahan ra nuu ñu. ¹⁴ Tyicuan ta cuahan ra
ta nu yahá ra nanyehe ra chi ra Leví sehe
ra Alfeo, nyaá ra nu sahá tyiño ra, tavá
ra xuhun cuenda gobiernu ñuu Roma. Ta
catyí ra Jesús chi ra:

—Coho chihin.

Tyicuan ta nducuita ra Leví, ta cuahan
ra chihin ra.

¹⁵ Yahá cuan ta tahan chi nyaá ra
Jesús chihin ra cachicá noo chihin ra
cachachí ra nu mesa vehe ra Leví. Ta ny-
icú tucu cuaha ra catavá xuhun chihin
inga ñáyivi iyó cuatyí. Vatyí cuaha xaan
ñu nyicón chi ra. ¹⁶ Soco ra casacuahá
cuenda ley vehe ñuhu, ta ra cacuví
fariseo, ra cha quichahá xaan ley vehe
ñuhu, cha canyehe ra vatyí chachí ra
Jesús chihin ra catavá xuhun, ta ñu iyó

cuatyí, ta cacatyí ra chi ra cachicá noo
chihin ra Jesús:

—¿Yoso caa cha ra sacuahá chi nyoho
chachí ra ta chihí ra chihin ra catavá
xuhun ta ñu iyó cuatyí?

¹⁷ Chiñi ra Jesús cha cacahan ra ta
catyí ra:

—Ña chiñuhú doctor chi ñu ña cuhví,
soco chiñuhú ra chi ñu cuhví. Vachi
yuhu soco ñima cha cuenda cha vaha chi
ñu vaha, soco cha cuenda cha vaha chi
ñu iyó cuatyí —catyí ra Jesús chi ra.

Nu sañahá ra Jesús vatyí nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno

(Mt. 9.14-15; Lc. 5.33-35)

¹⁸ Noo chaha, ra canyicón chi ra Juan
ta ra canyicón chi ra fariseo, ña chachí ra
ta nanducú ra chi Nyoo. Ta suhva ñáyivi
quichi coyo ñu nu nyaá ra Jesús, ta nda-
ca tuhun ñu chi ra, ta catyí ñu chi ra:

—¿Ñáá tuhun cha ra canyicón chi ra
Juan ta ra canyicón chi ra fariseo tuhvá
ra savaha ra ayuno, ta ra cachicá noo
chuhun ña tuhvá ra? —catyí ñu.

¹⁹ Ta nacahan ra Jesús ta catyí ra:

—Noo vico tandaha, ¿atu cuví cha ma
cachi ra ñohó vico cha ni ri ca cha nyaá
ra cha cua tandaha cuan chihin ra? Tatu
nyaá ca ra cua tandaha cuan chihin ra,
ma cuví cha ma cachi ra. ²⁰ Soco vachi
chi quivi cha cutinyaa ra chi ra tan-
daha cuan nu nyicú ra tahan ra. Yucuan
ndicha quivi coo cuhva cha ma cachi ra
ta nanducu ra chi Nyoo —catyí ra Jesús
chi ñu.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Lc. 5.36-39)

²¹ Catyí ra Jesús:

—Yori naquicu noo sahama chahnu chi-
hin noo sahama chaa, vatyí cha chaa cuan

nandiyi ta cahnya chi sahna chahnu, ta nu tahnya cuan cunducahnu ca. ²²Ta ni ri ña tuhvá yo tyihi yo vinu chaa chichi ñii chahnu, vatyí vinu chaa chahnyá chi ñii, ta chati vinu, ta tivi ñii. Yucuan chaha cuñí chi cha tyihi yo vinu chaa chichi ñii chaa —catyí ra Jesús.

Nu catohon ra cachicá noo chihin ra Jesús yoco trigu quivi nyitatu ñáyivi

(Mt. 12.1-8; Lc. 6.1-5)

²³Noo quivi cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra. ²⁴Tyicuan ta quichaha cacatyí ra fariseo chi ra Jesús:

—¡Nyehé xihna! ¿Ñáá tuhun cha sacuví ra cachicá noo chuhun tyiño cha ña tahán chi sacuví yo quivi nyitatu yo? —cacatyí ra.

²⁵Soco maa ra Jesús catyí ra chi ra:

—¿Atu ni noo chaha ta sacua ca nyoho cha sacuví ra David chihin ra tahan ra noo quivi cha cachisocó vavaha ra? ²⁶Quivi cha cuví ra Abiatar tyiño cha cuví ra nuu chi tata sutu, quihví ra David chichi vehe Nyoo. Ta chachí ra pan ii, cha tahán chi cachi maa ri maa ra cuví sutu. Ta chahá tucu ra cachi ra ndihi chihin ra —catyí ra Jesús.

²⁷Ta catyí tucu ra Jesús chi ra:

—Chicoo quivi nyitatu yo, cuenda cha vaha chi ñáyivi, socio ñáyivi ña chicoo ñu cha cuenda cha vaha chi quivi nyitatu yo. ²⁸Yucuan chaha yuhu Rayii cha quichí nya gloria, iyó ityi chii cha catyí chi noo noo ndo ñáá cha sacuví ndo quivi nyitatu yo —catyí ra Jesús.

Nu nduvahá noo ra na ityi inchiyo ndaha

(Mt. 12.9-14; Lc. 6.6-11)

3 Quihví ra Jesús inga chaha chichi noo vehe ñuhu. Ta yucuan nyaá noo

ra na ityi inchiyo ndaha. ²Ta cañañí ra fariseo chi ra Jesús nyehé ra tatu sanduvaha ra chi ra quivi nyitatu ñu, vatyí tacuhva coo cuatyí tyaa ra siquí ra. ³Tyicuan ta ra Jesús catyí ra chi ra na ityi ndaha cuan:

—Ndícuita ta cuñanyaa mahñu ihya.

⁴Yahá cuan ta ndacá tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuví yo quivi nyitatu yo? ¿Atu sacuví yo cha vaha o cha ña vaha? ¿Atu tahán chi sanduvaha yo ñáyivi o cha cahñi yo? —catyí ra Jesús.

Tyicuan ta taxi taxi maa candoq ñu cuan. ⁵Tyicuan ta xaan nanyehé ra Jesús chi ñu, ta cuihya cuñí ra vatyí ña cuñí ñu cutuñi iñi ñu. Ta catyí ra chi ra cuan:

—Sanacaa ndahun.

Ta sanacá ra, ta nduvahá ndaha ra. ⁶Tyicuan ta quitá coyo ra fariseo, ta quichahá catyihí tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyivi yuhu miñi

⁷Soco ra Jesús cuahan ra chihin ra cachicá noo chihin ra yuhu miñi, ta cuaha ñáyivi ityi Galilea canyicón chi ra.

⁸Ta cha chito ñáyivi tuhun nahnu cha sacuví ra, cuaha xaan ñu quichí coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandihí, vatyí cuñí ñu nyehé ñu chi ra. ⁹Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihin xaan chihin ñáyivi, cuví quihví ra chichi canoa cuan. ¹⁰Vatyí cuaha xaan ñu cha yahá sanduvahá ra, ta yucuan chaha tandihí ñu cuhví cuahan ñu nu nyaá ra vatyí cuñí ñu tiin ñu chi ra tacuhva nduvaha ñu. ¹¹Ta ñu yihí tatyí ña vaha añima, chicuiñi chiti ri ñu nuu

ra, ta canachaa tatyí ña vaha cuan, ta catyí chi tyehe caa:

—¡Yoho cuvún Sehe Nyoo!

¹²Soco ra Jesús chasi ra yuhu tatyí cuan vatyí ma catyí ca chi yóo ra cuví ra.

Nu nacachi ra Jesús chi uchi uvi apóstol vatyí cacaca ra tyiño ra

(Mt. 10.1-4; Lc. 6.12-16)

¹³Yaha cuan ta ndaa ra Jesús noo yucu ta cana ra chi ra cuñí maa ra nacachi ra. Ta quichi coyo ra nu nyaá ra. ¹⁴Ta tyiso ra chi uchi uvi tahan ra vatyí cundihi ra chihin ra, ta vatyí tyatyiño ra chi ra na cucahan ra tuhun Nyoo. ¹⁵Ta chaha ra ityi chi ra vatyí sanduvaha ra chi ñu cuhví, ta tava ñehe ra chi tatyí ña vaha. ¹⁶Ta ican ra ihya cacuví ndi uchi uvi tahan ra: ra Simón cha sacunañi ra Jesús Pedro chi; ¹⁷ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñí chi catyí: ra ñihi cahán tari cahán savi, ¹⁸ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñí cuhun cuatyí siquí gobiernu ñuu Roma cha nyacá ñaha chi ñu, ¹⁹ta ra Judas Iscariote, ra cha naxico tuhun chi ra Jesús.

Nu tyaá ñáyivi cuatyí siquí ra Jesús, ta catyí ñu vatyí tunyee iñi cuihna iyó chi ra

(Mt. 12.22-32; Lc. 11.14-23; 12.10)

Yaha cuan ta quihvi ra Jesús noo vehe chihin ra cachicá noo chihin ra. ²⁰Ta inga chaha nataca cuaha ñáyivi, ta nyacua ni ña cuví ca cachi ra. ²¹Cha chachito ñáyivi chi ra Jesús vatyí nyaá ra yucuan, quichi coyo ñu vatyí cunuhun ra chihin ñu, vatyí catyí ñáyivi chi ñu tyi nduloco ra.

²²Ta suhva ra casacuahá cuenda ley vehe ñuhu Jerusalén cha quichi coyo suri tyicuan caa cacatyí ra:

—Ra ihya, ra Beelzebú ra cuví nuu chi cuihna yihí chi ra. Ta chihin tunyee iñi cuihna tava ñehe ra tatyí ña vaha —cacatyí ra.

²³Tyicuan ta cana ra Jesús chi ra, ta catyí ra chi ra:

—¿Yoso caa, atu tava ñehe cuihna suri chi ra tahan maa ra? Ma sacuvi cuihna tyicuan caa. ²⁴Tatu noo gobiernu cacusiin ra, ta cacañi tahan ra chihin tahan ra, gobiernu cuan ña naha cuacunyaca ñaha ra. ²⁵O tatu ñáyivi noo vehe, ña iin ri cuví ñu chihin tahan ñu ta cañi tahan ñu, cutivi nu nyicú ñu. ²⁶Ta tatu cuihna cacusiin ra ta canducuita ra siquí tahan ra, ¿yoso caa cucuvi chi ra? Cundihi tuhun ra.

²⁷Yori cuví quihvi chichi vehe noo ra ñihi tari cuihna ta tinyaa ra cha chii ra, tatu ma cuhni xihna ra chi ra. Yucuan ndicha ta cuví tinyaa yo cha chii ra.

²⁸Cha ndicha catyí chi ndo vatyí cuví coo ticahnu iñi tandihi nuu cuatyí ñáyivi, ta tandihi cha quiñi caa cha cahán ñu. ²⁹Soco ñu cahán ña vaha siquí Tatyí Ii Nyoo, ma cuví maa coo ticahnu iñi cuenda cuan, soco tyicuan ri maa coo cuatyí ñu —catyí ra Jesús.

³⁰Tyicuan caa catyí ra Jesús chi ra casacuahá cuenda ley vehe ñuhu, vatyí maa ra cacatyí ra vatyí ñohó noo tatyí ña vaha chi ra.

Yóo ñu cuví sihi ra Jesús ta yañi ra

(Mt. 12.46-50; Lc. 8.19-21)

³¹Tyicuan ta chaa coyo sihi ra Jesús ta yañi ra, soco ndoo ñu ityi chata vehe, ta tachi ñu cucana chi ra. ³²Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyí ra chi ra.

³³ Soco maa ra catyí ra:

—¿Yóó ñu cuví sihi ta yañi? —catyí ra.

³⁴ Tyicuan ta nanyehę ra chi ñu nyicú nicachico, ta catyí ra:

—Ican ñu ihya cuví sihi ta yañi.

³⁵ Vatyí savahri ñu sacuví cuhva cuñí Nyoo, ican ñu cuan cuví yañi, ta cuhve, ta sihi —catyí ra Jesús.

Tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Lc. 8.4-8)

4 Inga chaha quichaha sañaha ra Jesús nu yuhu miñi, ta ndu iin ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaá ra, ta tandihi ñáyivi ndoo ñu nu ñiti. ² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyí ra chi ñu:

³ —Tyasoho ndo tuhun ihya. Minoos quitá ra vehe ra, cuahan ra nu iyó tyiño sahá ra. Ta quichaha quití ra chiti trigu nu ñuhú ra. ⁴ Ta ityi cuahan ra quití ra, suhva chiti cuan canacoyo yuhu ityi, ta quichi coyo saa ta cachachi ti. ⁵ Suhva ca chiti canacoyo ticu yuu nu ña cuaha ñuhú yihí. Ta chiti cuan numi ri caña, vatyí ña cono xaan yihí ñuhú cuan. ⁶ Soco cuhva cha caña ñanyii, na ityi chi vatyí ña cono yihí yoho chi. ⁷ Ta suhva ca chiti canacoyo chichi tu iñu. Ta chahnu tu iñu cuan, ta chasi tun nuu trigu cuan. Yucuan chaha ña chiyo chiti tun. ⁸ Soco suhva chiti cha canacoyo nu ñuhú vaha. Ta caña ta chahnu. Ta vaha chaha tun chiti. Suhva tun chaha tun oco uchi chiti cha noo noo tun. Inga tun chaha tun uñi xico chiti. Ta inga tun chaha ciento chiti —catyí ra Jesús chi ñu.

⁹ Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáa cuenda sañahá ra chihin cuhva ri chi ñáyivi

(Mt. 13.10-17; Lc. 8.9-10)

¹⁰ Yahá cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candaca tuhun ñu chi ra ñáa cha cuñi chi catyí tuhun cuan. ¹¹ Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu. ¹² Vatyí tatu nyehé ñu soco cuví chi tari cha ña nyehé ñu, ta tatu chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chi ñu.

Nu chaha ra Jesús cuenda yoso caa cuahan tuhun ra tachí chiti cuan

(Mt. 13.18-23; Lc. 8.11-15)

¹³ Ta catyí tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihi inga tuhun sañahí chi ndo? ¹⁴ Ra cha tachí chiti trigu cuan cuví ra tari noo ra cahán tuhun Nyoo. ¹⁵ Yihí ñáyivi cuví ñu tari nu canacoyo chiti yuhu ityi: chiñi ñu tuhun Nyoo, soco cha yahá chiñi ñu, quichi cuhna ta tinyaa ra tuhun Nyoo cha tachí ra añima ñu. ¹⁶ Inga ñáyivi cuví ñu tari nu canacoyo chiti ticu yuu: chiñi ñu tuhun Nyoo ta sii cuñi ñu natiin cuenda ñu noo ri cuhva. ¹⁷ Vatyí nu caña chiti ticu yuu cuan, chiin ri ñuhú yihí chaha, yucuan chaha caña soco ña cuví tyihi yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandihi ri ñu tuhun cha chinó iñi ñu. ¹⁸ Ta inga ñu cuví ñu tari nu canacoyo chiti chichi tu iñu: chiñi ñu tuhun Nyoo, ¹⁹ soco cutyoño ca iñi ñu cha cuenda

tindoho cha iyó siqui ñuhu ñayivi ihya. Cha tyayii sandavi ñaha chi ñu, ta cuñi ñu tandihi ri nuu cha iyó. Tandihi ihya quihvi xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan. ²⁰ Soco yihí ñu cha chiñi ñu tuhun Nyoo ta naquehén cuenda ñu, ta vaha sacuvi ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chahá tun oco uchi tahan chiti tahan tahan tun. Ta inga ñu cuví ñu tari yutun cha chahá uñi xico. Ta inga ñu tari yutun cha chahá ciento.

Ma tyihi xehe yo ñuhú cha sandundichin Nyoo añima yo coto tinyaa ra

(Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyi cananyaa yo chichi noo cajón o xiu chito? Ñima. Tima cuan cuñi chi tyiso yo noo nu sucun vatyi na sacundichin chi chichi vehe. ²² Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo. ²³ Nyoho cha cutuñi ñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuvi ndo chi ñáyivi, yucuan cuhva sacuvi Nyoo chihin ndo. Ta cuaha ca cucuhva ra chi ndo tatu tyasohó ndo cha cahán ra. ²⁵ Vatyi ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihi ra cha chiin cha cha yaha chahá ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chi tari noo ra tachí noo chiti chichi

ñuhú. ²⁷ Ta cuahan ra cua cusu ra. Yaha cuan ta ndicuita ra. Ta cuaha quivi yaha. Ta caña chiti cuan, ta chahnu yutun. Soco maa ra ña chitó ra yoso caa chahnu tun. ²⁸ Cha cuenda vatyi maa ñuhú cuan sacuvahá chi tun tyicuan ri caa. Xihna ca quita xityin tun, ta yaha cuan yoco tun, yaha cuan ta quita chiti nu yoco cuan. ²⁹ Ta tatu cha chityi chiti cuan, cutohon ra vatyi cha cha quivi cha coyo —catyí ra Jesús.

Nu sañahá ra Jesús vatyi tari chahnu noo chiti mostaza, tyicuan caa nducuhva nu nyacá ñaha Nyoo

(Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáa chihin sanandiqui tahin cha nyacá ñaha Nyoo añima yo? ¿Ñáa chihin sandu inuu ri yo? ³¹ Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihi chiti iyó siqui ñuhu ñayivi. ³² Soco tatu tachí yo, caña ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vatí tun.

Yoso caa sañahá ra Jesús chihin cuhva ri chi ñáyivi

(Mt. 13.34-35)

³³ Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñi ñi ñu. ³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyí ta miñi

(Mt. 8.23-27; Lc. 8.22-25)

³⁵ Suri maa quivi cuan, cuhva cha cuaa, catyí ra chi ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casandoo ra chi ñáyivi. Ta cuahan ra Jesús chihin ra chichi

canoa cha catuvi cuan. Ta cuahan tucuringa canoa chihin ra. ³⁷Ta quichaha caa noo tatyí ñihi xaan, ta quichaha quihvi ndutya chichi canoa cuan, ta quichaha chitu. ³⁸Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoyō ra chi ra, ta cacatyí ra:

—¡Maestro! ¿atu ñahri cuendon cha cuñí nyee yo?

³⁹Tyicuan ta ndicutā ra Jesús ta cahān ra chi tatyí cuan na cutaxin. Ta cacatyí ra chi ndutya miñi cuan tyehe caa:

—¡Taxi ri! ¡Taxi cunyaun! —cacatyí ra.

Ta tatyí cuan cutaxin, ta taxi taxi cuví.

⁴⁰Tyicuan ta cacatyí ra Jesús chi ra cachicá noo chihin ra:

—¿Ñáá tuhun cha yuhví xaan ndo? ¿Atu ta chino ca iñi ndo? —cacatyí ra chi ra.

⁴¹Soco maa ra cayuhví xaan ra cha cuvī cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

Nu nduvahā ra yihí tatyí ña vaha chii ñuu Gadara

(Mt. 8.28-34; Lc. 8.26-39)

5 Chaa coyo ra yuhu miñi, inga chiyo nu nyaá ñuu Gadara. ²Ta quitā ri ra Jesús chichi canoa, ta quitā noo ra nu ñaña cuan ta chaa ra nu nanyaá ra Jesús. Ta yihí noo tatyí ña vaha añima ra. ³Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena. ⁴Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra. ⁵Ñicahñu ta cha cuaa chicá noo ra canachaa ra nya nu yucu ta nya nu ñaña. Ta sañicuehé ra suri chi maa ra chihin yuu. ⁶Soco cañi ca nanyehē ra chi ra Jesús, ta chino vavaha ra chaa ra. Ta chicuiñi chiti ra nuu ra. ⁷Ta canā chaa ra ta cacatyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin siyi Nyoo, ma sanyehun tindoho chii.

⁸Catyí tatyí cuan tyehe caa vatyí ra Jesús cha cacatyí ra chi ra:

—¡Saña chi ra chiña, yoho tatyí ña vaha! —cacatyí ra.

⁹Ta ra Jesús ndaca tuhun ra chi ra, ta cacatyí ra:

—¿Ñáá nañun?

Ta nacahañ tatyí ña vaha cuan:

—Legión nañi, vatyí cuaha xaan ndi —cacatyí chi chi ra Jesús.

¹⁰Ta chacu ndahvi tatyí ña vaha cuan nuu ra Jesús tacuhva cha ma tachi ra chi chi nu cañi. ¹¹Ta yatyin ri yucu cuan nyicú cuaha xaan quini cachachí ti. ¹²Yucuan chaha cacatyí tatyí ña vaha cuan chi ra Jesús tyehe caa:

—Tachi chi ndi na quihvi ndi quini cuan —cacatyí tatyí cuan.

¹³Tyicuan ta chaha ra Jesús, ta tatyí cuan quitā coyo chi ra cuan, ta quihvi chi quini cuan. Ta cha uvi mil quini nyicú cuan, cachino ti, ta canacoyo ti chichi noo xahva yuhu miñi cuan, ta cachihí ti chichi ndutya cuan.

¹⁴Tyicuan ta ra sahá cumi quini cuan, chino xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví. ¹⁵Cuhva cha chaa coyo ñu nu nyaá ra Jesús, nanyehē ñu chi ra cha yihí tatyí ña vaha cuan chi. Ta vityin nyaá ra ñihnó ra sahma, ta cachi vaha iyó xiñi ra. Ta yuhví xaan ñu cuví. ¹⁶Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu. ¹⁷Tyicuan ta quichaha chacu ndahvi ñu nuu ra Jesús, na quita ra ñuu ñu.

¹⁸Ta cuhva cha cua quihvi ra Jesús chichi canoa, ra cha yihí tatyí ña vaha cuan chi chacu ndahvi ra nuu ra Jesús na cuhva ra cuhun ra chihin ra. ¹⁹Soco

ra Jesús ña chaha ra cuhun ra, ta catyí ra chi ra:

—Cuanuhu nya vehun, nu nyaá ñáyivi chuun, ta nacatyun chi ñu tandihi cha sacuvi Sutu yo Nyoo chuhun, ta yoso caa cundahvi cuñi ra nyehe ra chuun. ²⁰ Ta ra cuan cuahan ra ta quichaha nacatyí ra chi ñáyivi tandihi ñuu Decápolis tandihi cha sacuvi ra Jesús chihin ra. Ta tandihi ñu, iyo cuñi ñu.

Nu nduvaha sehe ra Jairo ta ñaha sihi cha tiin sahma ra Jesús

(Mt. 9.18-26; Lc. 8.40-56)

²¹ Ta cuhva cha nacha ra Jesús chihin canoa nya inga chiyo miñi cuan, cha coyo cuaha ñáyivi nu nyaá ra. Ta ndoo ra yuhu miñi cuan. ²² Tyicuan ta cha noo ra cuví nuu vehe ñuhu. Nañi ra Jairo. Ta cuhva cha nanyehé ra chi ra Jesús, chicuñi chiti ra nuu ra. ²³ Ta chacu ndahvi ra nuu ra ta catyí ra:

—Cha cuñi cúvi sehi. Coho chihin ta tyison ndahun siqui ña na nduvaha ña ta ma cúvi ña.

²⁴ Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu. ²⁵ Ta mahñu ñáyivi cuan ñohó noo ñaha cha cuhvi. Cha quita uchi uvi cuiya ndoho ña cuehe cha chatí niñi ña. ²⁶ Ta cuaha tindoho nyehe ña cha cuaha xaan doctor nyehe chí ña. Ta cha sanaa ña tandihi maa cha iyó chí ña, soco ñahri maa tyinyee chí chí ña. Soco ñihi ndihi ca nanduvi. ²⁷ Cuhva cha chitó ña tuhun milagru cha sacuvi ra Jesús, tuhva ña ityi chata ra ta tiin ña sahma ra. ²⁸ Vatyí chicá xiñi ña: “Ma chihin cha tiin ri sahma ra, ta nduvahi”, chicá xiñi ña. ²⁹ Ta caa cuhva ri cha tiin ña sahma ra ta cha chatí niñi ña cutaxin. Ta tuví iñi coño ñuhu ña tyi cha nduvaha ña chihin cuehe cuan. ³⁰ Tyicuan ta tuví iñi ra Jesús vatyí nduvaha noo ñáyivi chihin suhva tunyee iñi cha quita chi ra.

Tyicuan ta nanyehé ra ityi chata ra ta quichaha ndaca tuhun ra:

—¿Yóó cha tiin sahme? —catyí ra.

³¹ Tyicuan ta ra cachicá noo chihin ra quichaha catyí ra chi ra:

—Cha nyehun vatyí ñáyivi tyandahá chuun tyi tihin xaan. ¿Yoso caa cha ndaca tuhun: “Yóó cha tiin chii”? —catyí ra chi ra.

³² Soco ra Jesús nyehe ra ityi cuan ityi ihya, vatyí cuñi ra nyehe ra yóó cha tiin chí ra. ³³ Tyicuan ta ñaha cuan niñi ña chihin cha yuhvi ña vatyí chitó ña ñáa cha cuví chí ña. Ta chahan ña chicuñi chiti ña nuu ra. Ta nacatyí ña tandihi cha ndicha chí ra. ³⁴ Ta catyí ra Jesús chí ña:

—Cha nduvahun, Sihi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha ndohun —catyí ra Jesús chí ña.

³⁵ Ni cahán ca ra Jesús ta cha coyo ñu vehe ra cuví nuu cuan, ta catyí ñu chí ra cha cuví sutu cha luhlu cuan:

—Sehun, cha chihí ña. Ñáa ri ca tuhun cha sayangon chí Ra Sacuaha chiña —catyí ñu.

³⁶ Soco ra Jesús ña quichaha ra cha chahan ñu, ta catyí ra chí ra cuví nuu vehe ñuhu cuan:

—Ma yuhvun. Chino iñun —catyí ra chí ra.

³⁷ Ta ña chaha ra yóó ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo. ³⁸ Ta cuhva cha cachaa coyo ra vehe ra cuví nuu vehe ñuhu, nyehe ra cha chacú chaa ñáyivi ta caná chaa ñu. ³⁹ Quihvi ra ta catyí ra chí ñu:

—¿Ñáa tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chí ñu.

⁴⁰ Soco chacu cuehe ri ñu nyehe ñu chí ra. Tyicuan ta ra Jesús tava ra chí tandihi ñu, ta quehen ra chí sutu cue ta sihi cue ta chí ra cha cha coyo chihin

ra, ta quihv̄i coyo ra nu catuví cue. ⁴¹ Ta t̄in ra ndaha cue, ta catyí ra chi cue:

—Talita cumi —ta cuñí chi catyí cuan: Catyí chuun, yoho cuehe luhlu, nd̄icuita!

⁴² Ta caa cuhva ri cua nd̄icuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáyivi iyó xaan cuñí ñu. ⁴³ Soco ra Jesús ñihi chaha ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

Nu ñoh̄o ra Jesús ñuu Nazaret

(Mt. 13.53-58; Lc. 4.16-30)

6 Tyicuan caa cuv̄i ta quita ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra. ² Ta chaq̄ quivi nyitatu ñáyivi, ta quichaha sañaha ra chichi vehe ñuhu. Ta cuaha ñáyivi chiñi tuhun cahan ra, ta iyo cuñí ñu, ta catyí ñu:

—¿Nya cutuhva ra ihya tand̄ihi tuhun ihya? ¿Yóo cha chaha cha chiñi tuñi ihya chi ra? ¿Yoso caa cha cuví sacuvi ra milagru nahnu xaan ihya? ³ ¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñí ñu nyehe ñu chi ra.

⁴ Soco catyí ra Jesús chi ñu:

—Tand̄ihi ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyí ra Jesús.

⁵ Ta ña cuv̄i sacuvi ra ni noo milagru yucuan, soco tyiso ra ndaha ra siqui suhva ri ñu cuhví, ta sanduvaha ra chi ñu. ⁶ Ta iyo cuñí ra vatyí ñu ñuu ra ña chinó iñi ñu chi ra. Ta chahan ra tand̄ihi ñuu nyihi cha nyicú yatyin ri cuan, ta sañaha ra.

Nu tyatyíño ra Jesús chi ra cachicá noo chihin ra nu cucahan ra tuhun Nyoo

(Mt. 10.5-15; Lc. 9.1-6)

⁷ Yaha cuan ta cana ra chi ndi uchi uvi ra chicá noo chihin ra, ta quichaha tachi ra chi uvi uvi ra. Ta chaha ra ityi chi ra vatyí tava ñehe ra chi tatyí ña vaha yihí añima ñáyivi. ⁸ Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra. ⁹ Ndichan ri quihi chaha ra. Ta noo ri sahma cuihno ra, ñima uvi tahan. ¹⁰ Ta catyí ra chi ra:

—Cuhva cha chaa ndo noo ñuu ta quihvi ndo noo vehe, ndo noo yucuan ri nyacua nya cha quita ndo ñuu cuan. ¹¹ Ta tatu ñáyivi iyó noo ñuu, ña cuñí ñu t̄in cuenda ñu chi ndo, ta ña cuñí ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuví ñu. Cha ndicha catyí chi ndo, vatyí quivi cucutuñi chi ñáyivi iyó siqui ñuhu ñayivi, ñu cha ma cuñi t̄in cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

¹² Tyicuan ta quita coyo ra ta chichahan ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo. ¹³ Ta catava ñehe ra cuaha tatyí ña vaha añima ñáyivi. Ta cahyu ra acetye chi cuaha ñu cuhví ta casanduvaha ra chi ñu.

Nu catyí chi yoso caa chih̄i ra Juan ra sacondutyá chi ñáyivi

(Mt. 14.1-12; Lc. 9.7-9)

¹⁴ Chito rey Herodes tuhun ra Jesús vatyí tand̄ihi ñáyivi cahan ñu tuhun cha sacuví ra, ta chicá xiñi ra tyehhe caa:

—Ra Juan ra sacondutyá chi ñáyivi cuví ra cuan. Nandoto ra cha yaha chi-

h̄i ra, yucuan chaha iyó tunyee iñi chi ra —chicá iñi ra.

¹⁵Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyo ta cha naha.

¹⁶Cuhva cha chiñi ra Herodes tuhun ihya, catyí ra:

—Ican ra cuan cuví ra Juan cha tyih̄i tyiño tahnya sucun, ta vityin nandoto ra —catyí ra Herodes.

¹⁷Tyicuan caa catyí ra Herodes vatyí cha catyí cu Herodías, ta tyih̄i ra chi ra Juan vehe caa ta chah̄ni ra chi ra chihin cadena. Cu Herodías cuan, ñasihi ra Felipe, yañi ra Herodes, cuví chi ña. Soco ra Herodes quehen ra chi ña vatyí cuvi ña ñasihi ra. ¹⁸Ta ra Juan catyí ra chi ra Herodes vatyí ña vaha cha cunyaa ra chihin ñasihi yañi ra.

¹⁹Yucuan chaha cu Herodías tasi xaan cuñí ña nyehe ña chi ra Juan, ta cuñí ña cah̄ni ña chi ra, soco ña cuví. ²⁰Vatyí ra Herodes chitó ra vatyí ra Juan cuví ra noo ra vaha, ra ii, ta yuhví ra chi ra. Yucuan chaha sahá cuenda vaha ra chi ra, ña chah̄a ra cha sacuvi ña cha cuñí maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñí ra chiní ra cha cahán ra. ²¹Soco cu Herodías ñih̄i ña noo cuhva nu ndih̄i ra Herodes cuiya, vatyí sacoo ra noo vico cha cuenda ra cacuví tyiño, ta comandante cuenda sindaro, ta ra nahnu ca ityi Galilea cuan. ²²⁻²³Ta quih̄vi sehe cu Herodías vico cuan, ta quichaha chita chaha ña. Ta tah̄an xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáá cha cacan ña chi ra. Ta catyí ra chi ña:

—Çacan ñáá cha cuñun chii, ta cuhve chuun —catyí ra chi ña.

Ta catyí ra vatyí cuhva ra ñáá ri cha cacan ña, vasi sava ñuhú ñuu nu nyacá

ñaha ra. ²⁴Quitá ña ta catyí ña chi sihi ña:

—¿Ñáá cha caquen chi ra? —catyí ña.

Ta catyí sihi ña:

—Çacan xiñi ra Juan ra sacondutyá —catyí ña chi sehe ña.

²⁵Ta numi ri ndih̄vi ñaha tyivaa cuan nu nyaá rey Herodes, ta catyí ña chi ra:

—Cuñí vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

²⁶Tyicuan ta nducuihya xaan iñi rey cuan. Soco cha tyaa ra cuhva vatyí cuhva ra chi ña, ta siin ri cachin̄i ra canyicú chihin ra, ta ña cuñí ra nacahnu ra cha catyí ra chi ña. ²⁷Numi ri tach̄i rey cuan tyiño chi noo sindaro na quichi nyaca ra xiñi ra Juan. ²⁸Chahan sindaro cuan chichi vehe caa cuan, ta chah̄nyā ra xiñi ra Juan. Ta quich̄i nyaca ra, yih̄f nu noo coho. Tyicuan ta chah̄a ra chi ñaha tyivaa cuan, ta maa ña nacuhvā ña chi sihi ña.

²⁹Cha chito ra canyicón chi ra Juan, chahan coyo ra chinaquehen ra coño ñuhu ra, ta cachityih̄i ra chichi ñuhú.

Nu chah̄a ra Jesús cha cachi ohon mil rayii

(Mt. 14.13-21; Lc. 9.10-17; Jn. 6.1-14)

³⁰Yah̄a cuan ta ndu iñi ri ra cha tyaty-iño ra Jesús chi chihin ra, ta canacatyí ra tandih̄i cha casacuví ra, ta cha casañah̄a ra nu chahan ra chicahan ra tuhun Nyoo.

³¹Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí ra cha cacachi ra. ³²Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, mi-noo nu taxi ri. ³³Soco cuaha ñu nyehe nu quitá ra. Ta canicohon nuu ñu chi

ra. Ta cuahan coyo vavaha ñu chihin chaha ñu, quitā ñu tandihī ñuu ta xihna ca maa ñu chaā coyo. ³⁴ Cuhva cha chaā ra Jesús, quitā ra chichi canoa ta nanyehē ra tyi cuaha xaan ñu nyicú yucuan. Ta cundahvi cuñí ra nyehé ra chi ñu, vatyí nyicú ñu tari mbee cha yori ra sahá cumi chi tí. Ta quichahā sañaha ra cuaa tuhun chi ñu. ³⁵ Cha cua iñi xaan, ta ra cachicá noo chihin ra catuhvā ra ta catyí ra chi ra:

—Cha iñi xaan, ta yucu taxin cuví ihya. ³⁶ Catyí chi ñu, na cahun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —catyí ra chi ra.

³⁷ Soco nacahan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihī ñu ihya.

³⁸ Ta catyí ra Jesús chi ra:

—¿Yoso tahan pan nyisó ndo? Cuahan ndo cua nyehe ndo.

Ta cuhva cha cachito ra yoso tahan, cacatyí ra chi ra:

—Ohon tahan pan ta uvi tiyaca.

³⁹ Tyicuan ta catyí ra na cunyicú noo noo ticuít ñu nu cuhu cuii cuan. ⁴⁰ Ta chicunyicu ñu cuenda ciento ta cuenda uvi xico uchi ñu. ⁴¹ Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehē ndaa ra andivi, ta nacuhvā ra tyahvi nyoo chi Nyoo, ta tahvi ra pan cuan, ta chahā ra chi ra cachicá noo chihin ra na casacha ra. Tyicuan ta casachā ra chi ñáyivi cuan. Yaha cuan ta casachā tucu ra ninduvi tiyaca cuan chi ñu. ⁴² Tandihī ñu cachachi ta ndaha iñi ñu. ⁴³ Ta nyacua ndoo ca ta casacutu ra uchi uvi tica chihin yiquin pan ta tiyaca. ⁴⁴ Ta ohon mil rayi cachachi pan cuan.

Nu chicá ra Jesús nu miñi

(Mt. 14.22-27; Jn. 6.16-21)

⁴⁵ Tyicuan ta catyí ra Jesus chi ra cachicá noo chihin ra na quihvi coyo ra chichi canoa vatyí cahun coyo ra ityi nuu nya inga chiyo miñi cuan ñuu Bet-saida. Vatyí maa ra Jesús cunasacha xihna ra ñáyivi, tyicuan ta cahun ra catyí ra. ⁴⁶ Ta cha yahā cuahan coyo ra, ra Jesús cuahan ra nu yucu, cua cacan tahvi ra. ⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra. ⁴⁸ Ta nyehē ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhvā ra Jesús chicá ra nu ndutya cuan. Ta sahā ri ra cha cua yaha ra nu canoa cuan. ⁴⁹ Soco cananyehē ra chi ra, chicá ra nu ndutya. Ta cacuñi maa ra vatyí noo cha sayuhvi cuví, ta cacana chaa ra. ⁵⁰ Vatyí tandihī ra canyehē ra chi ra ta cayuhvi ra. Soco maa ra cahan ra chihin ra ta catyí ra:

—¡Sanyee ndo iñi ndo! ¡Yuhu cuví! ¡Ma yuhvi ndo! —catyí ra.

⁵¹ Quihvi ra chichi canoa nu canyicú ra, ta cutaxin tatyí cuan. Ta iyo xaan cacuñi ra ⁵² cha cuenda vatyí ta cutuñi ca iñi ra milagru cha sacuvi ra chihin pan, vatyí ni ndava ca añima ra.

Nu sanduvahā ra Jesús chi ñu cuhvi ñuu Genesaret

(Mt. 14.34-36)

⁵³ Cayahā sava ra miñi cuan ta cachahā coyo ra ñuu Genesaret, ta cachahñi ra canoa cuan yuhu ndutya ri cuan. ⁵⁴ Ta cha quitā coyo ri ra chichi canoa cuan, nichon nuu ri ñáyivi chi ra Jesús. ⁵⁵ Ta cachino vavaha ñu nicahnu ityi cuan sacotó ñu vatyí chaā ra. Ta quichi coyo ñu tandihī ri ñuu, quichi nyaca ñu chi ñu cuhvi chihin chito nya nu nyaá ra Jesús. ⁵⁶ Ta tandihī ri ityi nu quihvi ra chichi

ñuu luhlu o chichi ñuu nahnu, o chichi cuhu, chacun ñu chi ñu cuhví yuhu ityi. Ta chacu ndahvi ñu nuu ra na cuhva ra cha tiin ñu vasi chiin yuhu sahna ra. Ta tandihi ri ñu tiin chi ra, nduvaha ñu.

**Nu sañahá ra Jesús
ñáá cha sativí chi ñáyivi**

(Mt. 15.1-20)

7 Yaha cuan ta ra fariseo ta suhva ra sacuahá cuenda ley vehe ñuhu quichí coyo ra nya ñuu Jerusalén, ta catuhva ra chi ra Jesús. ²Ta canyehe ra vatyi yihí ra cachicá noo chihin ra Jesús cachachí ra ta ña nacatya ra ndaha ra tari cuhva cha tahán chi cha costumbre. Yucuan chaha cacahan nyaa ra chi ra. ³Vatyi ra fariseo ta tandihi ñu Israel cuan nyicón ca ñu costumbre sutu chahnu ñu, vatyi ma cachi ra tatu ma ndoo ndaha ra cuaha chaha tari cuhva costumbre iyó chi ñu. ⁴Ta tatu nachaa coyo ñu cha chahan ñu nuyahvi, ma cachi ñu tatu ma sacuvi ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandihi ndaha tyiño caa cha iyó chi ñu ta cama ñu ñandihí. ⁵Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyí ra:

—¿Ñáá tuhun ña sacuví ra nyicón chuun cuhva costumbre sutu chahnu yo? Vatyi ña nacatya ra ndaha ra tari cuhva tahán chi tatu cuacachi ra xita —catyí ra chi ra.

⁶Ta nacahan ra Jesús, ta catyí ra:

—Ndicha cha cahán ra Isaías tuhun ndo vatyi sahá ndo tyi vaha ndo ta ña ndicha ndo. Catyí ra tyehe caa: Ñáyivi ihya, chihin yuhu ri ñu catyí ñu tyi cuñí ñu chii. Soco ñima chihin cha tandihi añima ñu, tyi siin nu nyaá xiñi ñu.

⁷Nahri maa tuhun cha sacahnú ñu chii,

vatyi cha sañahá ñu chi tahan ñu, maa maa ri maa cuhva sañahá ñáyivi ri cuví, tyaa ra Isaías tuhun ndo.

⁸Vatyi nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo. ⁹Nyoho sanducaxiin ndo tuhun cha catyí Nyoo tyi sacuvi ndo, tacuhva vatyi cuví sacuvi ndo costumbre cha iyó ndo. ¹⁰Soco ra Moisés catyí ra nu ley cha tyaa ra: “Saha ndo ñáyivi chi sutu ndo ta chi sihi ndo.” Ta catyí tucu ra: “Tandihí ñu cha cahán ña vaha chi sutu o chi sihi ñu, tahán chi cúvi ñu.” catyí ra Moisés nu ley Nyoo. ¹¹Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyi ma cuví tyinyee ñu chi ñu vatyi tandihi cha iyó chi ñu Corbán cuví. (Cuñí chi catyí: “Cha chahí chi Nyoo cuví.”) ¹²Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo. ¹³Ta tyicuan caa sacuachiyó ndo tuhun cha catyí Nyoo tyi sacuvi ndo, vatyi cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

¹⁴Tyicuan ta cana tucu ra Jesús chi ñáyivi ta catyí ra chi ñu:

¹⁵—Tyasoho vaha tandihi ndo tuhun cahín, ta natyihí tuñi iñi ndo. Cha quihví yuhu ñáyivi ta chachí ñu, ña cuví sativí chi chi ñu. Soco cha quitá añima ñu, ican cuan sativí chi ñu. ¹⁶Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

¹⁷Tyicuan ta sandoo ra Jesús chi ñáyivi cuan, ta quihví ra chichi vehe. Ta ra cachicá noo chihin ra candaca tuhun ra chi ra ñáá cha cuñí chi catyí tuhun cuan. ¹⁸Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyi cha quihví chichi yuhu yo ña sativí chi chi yo? ¹⁹Vatyi ñima añima yo quihví chi,

soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyí tandíhi nyayu ta vaha cachi yo. ²⁰Ta catyí tucu ra:

—Cha quitá ańima ñáyivi, ican cuan sativí chi ñu. ²¹Vatyí ańima ñu quitá cha ña vaha chicá xińi ñu, ta sacuví ñu cha ña vaha. Yihí ñu iyó ñu chihin rayii o chihin ñusihí ta ñima ñasihí ra cuví, ta ñima yii ñu cuví. Yihí ñu casuhú ñu. Yihí ñu cachahńi ñu. ²²Yihí ra iyó ñasihí ra ta chicá noo ra chihin inga ñu. Yihí ñu quichi cuví ińi ñu cha chii inga ñáyivi. Yihí ñu sacuví ñu cha quińi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo ińi ñu. Yihí ñu ñii ñu cuendu. Yihí ñu cahnu sahá ñu chi ñu. Yihí ñu ña chaa cha chińi tuńi xińi ñu. ²³Tandíhi tuhun ña vaha ihya, quitá chi ityi chichi ańima ñáyivi, ta sativí chi chi ñu —catyí ra chi ra.

**Noo ñaha inga ñuu
cha chino ińi chi ra Jesús**

(Mt. 15.21-28)

²⁴Yahá cuan ta quitá ra Jesús yucuan, ta cuahan ra ityi ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra. ²⁵Ta sihi noo ñaha tyi-vaa cha yihí noo tatyí ña vaha ańima, numi ri chito ña tuhun ra Jesús. Ta chaa ña ta chicuińi chiti ña nuu ra. ²⁶Ñaha cuan, ñaha inga ñuu cuví ña, ñaha ñuu Sirofenicia cuví ña. Quichi ña ta chacú ndahvi ña nuu ra Jesús na tava ra tatyí ña vaha cha yihí ańima sehe ña. ²⁷Soco catyí ra Jesús chi ña:

—Sańa, ñacachi xihna ca ñu Israel ñu cuví sehe Nyoo, vatyí ña vaha cha tinyaa yo pan chí sehe yo ta cuhva yo cachi ina —catyí ra Jesús chi ña.

²⁸Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹Tyicuan ta catyí ra Jesús chi ña:

—Vaha nacahun. Ta cha cuenda cuan cuví cahun, vatyí tatyí ña vaha cha yahá quitá chi ańima sehun —catyí ra chi ña.

³⁰Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yahá quitá chi cue.

**Nu sanduvahá ra Jesús chi
noo ra soho ta ñihi**

³¹Ta quitá tucu ra Jesús ñuu Tiro, ta yahá ra ñuu Sidón, ta cuahan ra ityi ñuu cha canańi Decápolis, ta nachaa ra mińi Galilea. ³²Nu nyaá ra Jesús yucuan, quichi nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra. ³³Tava siin ra Jesús chi ra iin chiyo xiin, nu yori ñáyivi, ta tyihí ra nundaha ra chichi soho ra, ta tyaa sih ra nu yaa ra. ³⁴Yucuan ta nanyehé ndaa ra andivi. Ta naxita ra tatyí ra, ta catyí ra:

—¡Efata! —ta cuñí chi catyí: ¡Nuńa! —catyí ra.

³⁵Ta chihin cuan nuńa soho ra soho cuan, ta nduvahá yaa ra, ta nacahan vaha ra. ³⁶Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu. ³⁷Ta iyo cuñí ñu ta catyí ñu:

—Tandíhi ta vaha sacuví ra. Nyacua cuví nacuińi ñáyivi soho sahá ra ta cuví tucu nacahan ñáyivi ñihí ñandíhi.

**Nu chahá ra Jesús cha
cachi cumi mil ñáyivi**

(Mt. 15.32-39)

8 Quivi cuan natacá tucu cuaha xaan ñáyivi. Ta ñahri maa cha cachi ñu iyó. Tyicuan ta caná ra Jesús chi ra cachicá noo chihin ra, ta catyí ra:

²—Cundahvi cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu iyó. ³Tatu natachi chi ñu nya vehe ñu cucachi ñu, coto coña ñu ityi, vatyí yihí ñu cañi quichi coyo ñu —catyí ra Jesús chi ra.

⁴Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵Ta ndacā tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi Nyoo. Yaha cuan ta tahvi sava ra pan cuan, ta chaha ra chi ra cachicá noo chihin ra, na casacha ra chi ñáyivi cuan. ⁷Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chaha ra chi ra na casacha ra. ⁸Tandihi ñu cachachi ñu, ta cachitu chichi ñu. Ta casacutu ra ucha tahan tica chihin yiquin cha ndoo ca. ⁹Ta cha cumi mil tahan ñu cachachi. Yaha cuan ta catyí ra Jesús chi ñu na cunuhu coyo ñu. ¹⁰Ta quihvi ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹Tyicuan ta cachā coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachi chi ra. Tyicuan caa catyí ra vatyí cuñi ra nducu nyehe ra chi ra. ¹²Ta ra Jesús uhvi uhvi naxita ra tatyí ra, ta tatyí ra:

—¿Ñáá tuhun cha chicán ñáyivi iyó vityin milagru? Cha ndicha catyí chi ndo vatyí ma sacuvi ni noo milagru nyehe ndo —catyí ra chi ra.

¹³Tyicuan ta sandoo ra chi ra, ta nandihvi ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús

(Mt. 16.5-12)

¹⁴Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan.

¹⁵Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶Ta ra cachicá noo chihin ra quichaha cacatyí ra chi ra tahan ra:

—Cha cuenda vatyí ñahri pan nyisó yo, yucuan cuenda cahan ra tuhun cuan —catyí ra chi ra tahan ra.

¹⁷Tuvi iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan ñima ndo? ¹⁸Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiñi ndo? ¿Atu ña nicohon iñi ndo ¹⁹quivi cha saché ohon tahan pan cuan chi ndi ohon mil rayii? ¿Yoso tahan tica yiquin naquehen ndo? —catyí ra Jesús, ndacā tuhun ra chi ra cachicá noo chihin ra.

Ta maa ra cacatyí ra:

—Uchi uvi.

²⁰Ta catyí tucu ra Jesús chi ra:

—Ta quivi saché ucha tahan pan chi cumi mil ñu, ¿yoso tahan tica tyitu nacoñehé ndo?

Ta cacatyí ra:

—Ucha tahan.

²¹Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvahá ra Jesús chi noo ra cuaa ñuu Betsaida

²² Yahá cuan ta chaá ra Jesús chihin ra cachicá noo chihin ra nya ñuu Betsaida. Ta quichí nyaca ñu chi noo ra cuaa. Ta cachacu ndahvi ñu nuu ra na tiin ra chi ra. ²³ Tyicuan ta tiin ra ndaha ra cuaa cuan, ta cuahan ra chihin ra ityi chata ñuu. Ta tyaa sii ra chiti nuu ra, ta tyiso ra ndaha ra siqui ra, ta ndaca tuhun ra chi ra tatu cuví nyehe ra chiin. ²⁴ Ra cuaa cuan nanyehe ra ta catyí ra:

—Nyehe in cahnu ri maa chi ñáyivi. Cuhva caa yutun caa ñu cahvi iñi, soco chicá ñu —catyí ra.

²⁵ Tyicuan ta tiin tucu ra Jesús chiti nuu ra inga chaha, ta maa ra nanyehe vaha ra ta nduvahá ra. Nanyehe cachi vaha ra tandihi. ²⁶ Tyicuan ta natachi ra Jesús chi ra ta catyí ra chi ra:

—Ma quihvun chichi ñuu ta ni yori chihin cahun tuhun.

Nu catyí ra Pedro vatyi ra Jesús cuví Cristo

(Mt. 16.13-20; Lc. 9.18-21)

²⁷ Yahá cuan ta chahan ra Jesús chihin ra cachicá noo chihin ra ñuu cha ca iyó Cesarea Filipino. Ta ityi cuahan ra, ta ndaca tuhun ra chi ra cachicá noo chihin ra, ta catyí ra:

—¿Ñáá catyí ñáyivi? ¿Yóó ra cuví yuhu? —catyí ra chi ra.

²⁸ Ta canacahan ra ta catyí ra:

—Yihí ñu catyí ñu tyi ra Juan ra sacondutyá chi ñáyivi cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —cacatyí ra chi ra.

²⁹ Tyicuan ta ndaca tuhun ra chi ra, ta catyí ra:

—¿Ta nyoho, yóó ra cuví yuhu, cuñi tucu nyoho?

Ra Pedro catyí ra chi ra:

—Yoho cuví Cristo.

³⁰ Soco catyí ra Jesús chi tandihi ra tyi yori chihin cacahan ra tuhun cuan.

Nu cahan ra Jesus tuhun tyi cucúvi ra

(Mt. 16.21-28; Lc. 9.22-27)

³¹ Tyicuan ta quichahá sañaha ra vatyi Rayii cha quichí nya gloria cunyehe ra cuaha xaan tindoho. Ta ra mandoñi ta ra cacuví nuu chi tata sutu ta ra casacuahá cuenda ley vehe ñuhu ma cuñi ra natiin cuenda ra chi ra. Catyí ra Jesús chi ra vatyi cucahñi ñu chi ra soco chichi cha cu uñi quivi cunandoto ra. ³² Catyí cachi ra chi ra tuhun ihya. Tyicuan ta tava siin ra Pedro chi ra ta quichaha catyí ra tyi ña vaha cha cahan ra cha tyicuan caa. ³³ Soco ra Jesús nanyocava ra, ta nanyehe ra chi inga ra cachicá noo chihin ra. Ta quichaha cahan ra chi ra Pedro ta catyí ra:

—¡Cuachiyo chuun nui, cuihna! Vatyi yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyí ra Jesús chi ra Pedro.

³⁴ Tyicuan ta caná ra Jesús chi ñáyivi ta chi ra cachicá noo chihin ra ta catyí ra chi ñu:

—Tatu nya ndo cuñi ndo cunyicon ndo chii, cuñi chi cahnya ndo iñi ndo tuhun maa ndo. Ta ma ndu uvi iñi ndo cha yihí ndo cuende vasi nyehe ndo tindoho cha cuende. Vatyi yucuan cuví cruzi cha tahán chi cuiso ndo. ³⁵ Vatyi nya ndo ña cuñi ndo cúvi ndo cha cuende, suri cha cúvi maa ndo cuvi, ta cuhun ndihi ndo anyaya. Soco nya ndo cuhva ndo ñáyivi ndo cha cuende ta cha cuenda tuhun Nyoo, cucacu aña ndo. ³⁶ Tatu sacunaa ndo aña ndo anyaya, ¿ñáá ri tuhun cha saha ganaa ndo tandihi cha tyayii cha iyó siqui ñuhu ñáyivi? ³⁷ Vatyi tatu sacunaa ndo aña ndo, ñahri maa cha iyó cha cuví cuhva ndo ta sacacu ndo aña ndo. ³⁸ Tatu nya noo ndo cu-

cahan nuu ndo nyehe ndo chii, ta cucahan nuu ndo tuhun cahín nuu ñáyivi cha iyó cuatyí ta ña quichahá tuhun Nyoo, yuhu Rayii cha quichi nya gloria cucahan tucu nuu mai nyehi chi ndo quivi quichi tiqui chihin ángel cuenda Nyoo. Vatyí cuquichi chihin cha tyaquí maa Suti.

9 'Cha ndicha catyí chi ndo, vatyí yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chihin tunyee iñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra

(Mt. 17.1-13; Lc. 9.28-36)

² Iñu quivi yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasamā cuhva caa nuu ra Jesús. ³ Nduxiño xaan sahma ra ta cuichin xaan nanduví. Yori maa siquí ñuhu ñayivi ihya cuví nacatya ta ndu-cuichin tyicuan caa. ⁴ Ta cananyehe ra tyi nanyaá ra Elías ta ra Moisés, candatuhún ra chihin ra Jesús. ⁵ Tyicuan ta ra Pedro catyí ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro, ⁶ vatyí ña chitó ra ñáá tuhun cahán ra. Vatyí maa ra ta inga ra cayuhví ra.

⁷ Tyicuan ta noo xica noo vico siquí ra ta sahví chi ra. Ta chichi vico cuan tyacu noo ndusu cha catyí:

—Ican ihya cuví Sehi, ta cuñí xain chi ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehe ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehe ra yucuan,

soco nya yaha cha nandoto Rayii cha quichi nya gloria, tyicuan ta cuvi cahan ra tuhun. ¹⁰ Yucuan chaha ña cacahan maa ra tuhun, vasi cacatyí ra chi tahan ra ñana vaha tuhun cuví cha cunandoto ra. ¹¹ Tyicuan ta quichahá candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihi. ¿Ta yoso caa catyí tuhun Nyoo cuenda Rayii cha quichi nya gloria? Catyí chi tyi cunyehe ra tindoho, ta ma cuñi nyehe ñáyivi chi ra. ¹³ Soco yuhu catyí chi ndo tyi cha yahá quichi ra Elías. Ta sacuví maa ñáyivi cha cuñi ñu chihin ra, tari cuhva catyí nu tutu Nyoo cha cucuví chi ra —catyí ra Jesús chi ra.

Nu sanduvaha ra Jesús chi noo ra tyivaa cha yihí noo tatyí ña vaha chi

(Mt. 17.14-21; Lc. 9.37-43)

¹⁴ Yahá cuan ta nachaa coyo ra nu nyicú inga ra cachicá noo chihin ra Jesús. Ta canyehe ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuví yuhu ra chihin ra. ¹⁵ Tyicuan ta cha nanyehe ñu chi ra Jesús, tandihi ñu iyo cuñi ñu, ta cachino ñu chicuhva ñu nocumi chi ra. ¹⁶ Tyicuan ta ndaçā tuhun ra Jesús chi ra cacuvi yuhu cuan ta catyí ra:

—¿Ñáá cuenda cuví yuhu xaan ndo? —catyí ra chi ra.

¹⁷ Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuñihi chi cue. ¹⁸ Vatyí tandihi ri nu tiñ tatyí cuan chi cue, sanduva chi cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra

tatyí ña vaha cuan, soco ña cacuví chi ra —catyí ra cuan chi ra Jesús.

¹⁹ Nacahan ra Jesús ta catyí ra:

—¡Nyoho ñu ña chinó iñi cuví ndo!
¿Yoso tahan ca quívi cunyai chihin ndo ta cunyei tisihi ndo nyacua nya cha cu-tuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

²⁰ Quichí nyaca ra chi ra luhlu cuan. Ta cuhva cha nanyehé tatyí cuan chi ra Jesús, quehen tatyí cuan chi cue. Ta ndu-va cue nu ñuhú, sacañuhú cue chi cue, ta quitá tiñi yuhu cue. ²¹ Tyicuan ta ndaca tuhun ra Jesús chi sutu cue:

—¿Ama quichaha cuví chi ra tyehe caa? —catyí ra chi ra.

Ta nacahan sutu cue, ta catyí ra:

—Nyata luhlu ra. ²² Ta cuaha chaha tyihí tatyí ña vaha ihya chi cue nu cayú ñuhú, o nu ndutya. Cuñí chi cahñi chi chi cue. Soco tatu cuví chuun, cundahvi cuñi nyehun chi ndí, ta tyinyeun chi ndí —catyí sutu cue chi ra Jesús.

²³ Ta catyí ra Jesús chi ra:

—Tatu chinó iñun, tandihí ta cuví cha cuenda ñu chino iñi —catyí ra Jesús.

²⁴ Tyicuan ta sutu cue canachaa ra ta catyí ra:

—¡Chinó iñi! ¡Tyinyee chii na chino ca iñi! —catyí ra chi ra Jesús.

²⁵ Cuhva cha nyehé ra Jesús tyi cuaha ñáyivi candu iñ ri, ta tava ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

²⁶ Ta tatyí cuan quiñi xaan canachaa ta na quisi chi chi cue inga chaha ta quitá. Ta sandoq tatyí cuan chi cue tari noo ndiyi. Ta cuaha ñu catyí vatyí cha chihí cue. ²⁷ Soco tiñ ra Jesús ndaha cue,

ta nacoñehé ra chi cue, ta nicuinanyaa cue.

²⁸ Tyicuan ta quihví ra Jesús noo vehe, ta ra cachicá noo chihin ra candaca tuhun ra chi ra ta catyí ra:

—¿Ñáá tuhun ña cuví tava ndi chi tatyí ña vaha cuan?

²⁹ Ta catyí ra Jesús:

—Cha cuenda vatyí tahan tatyí ña vaha ihya, quitá, soco chihin cha ma cachi yo ta cacan tahvi yo chi Nyoo —catyí ra chi ra.

Nu cahán ra Jesús tuhun inga chaha vatyí cucúvi ra

(Mt. 17.22-23; Lc. 9.43-45)

³⁰ Quívi cha quitá coyo ra yucuan, yahá coyo ra ityi Galilea. Ta ña cuñí ra Jesús cha coto ñáyivi. ³¹ Vatyí sañahá ra chi ra cachicá noo chihin ra. Ta catyí ra chi ra vatyí Rayíi cha quichi nya gloria cunacuhva cuenda ñu chi ra ndaha ñáyivi. Ta cucahñi ñu chi ra, soco cha cu uñi quívi cunandoto ra. ³² Soco ña cacutuñí iñi ra tuhun cahán ra chihin ra. Ta cayuhví ra candaca tuhun ra chi ra.

¿Yóo ra cahnu ca?

(Mt. 18.1-5; Lc. 9.46-48)

³³ Tyicuan ta cachaa coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chi ra ta catyí ra:

—¿Ñáá tuhun cuví xaan yuhu nyoho ityi vachi yo? —catyí ra ndaca tuhun ra.

³⁴ Taxi taxi cacuví ra, vatyí ityi vachi coyo ra, ta cacuví yuhu ra nya ra cuví ra ra cahnu ca. ³⁵ Tyicuan ta chicunya ra Jesús ta cana ra chi ndi uchi uvi ra chicá noo chihin ra, ta catyí ra chi ra:

—¿Nya ndo cuñí ndo cuví ndo nuu, cuñí chi cha cuví ndo ra nu ndihí cha nuu tandihí ra, ta sacuvi ndo tyiño nuu tandihí ra? —catyí ra Jesús chi ra.

³⁶ Tyicuan ta quehen ra chi noo ra cuehe luhlu ta chinanya ra chi cue

mahñu ra. Ta tyihí sucun ndaha ra chi cue, ta catyí ra:

³⁷—Ñáyivi cha natiín cuenda chi noo ra cuehe luhlu chihin sivi, chi yuhu natiín cuenda ñu. Ta ñu natiín cuenda chii, ñima chi yuhu ri natiín cuenda ñu, soco chi ra cha tachí chii ñandihí.

**Tatu ña cuahan ñáyivi siqui yo,
tumañi iñi chi yo cuahan ñu**

(Mt. 10.42; Lc. 9.49-50)

³⁸Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyí ña vaha. Soco vatyí ñima chihin yo chicá noo ra, catyí ndi chi ra tyi ma sacuvi ca ra —catyí ra Juan chi ra Jesús.

³⁹Soco catyí ra Jesús chi ra:

—Ma casi ndo. Vatyí ni noo ra cha casacuvi milagru chihin sivi ta yaha cuan ta caña iñi ra cahan ña vaha ra siqui. ⁴⁰Vatyí ñu cha ña cuahan siqui yo, tumañi iñi chi yo cuahan ñu. ⁴¹Tatu cuhva noo ñu, vasi noo vasu ndutya coho ndo chihin sivi, cha cuenda vatyí ñu cuenda yuhu ra Cristo cuví ndo, cha ndicha vatyí cuñihí ñu cha cuacuhva Nyoo chi ñu.

**Yica xaan cha sanacava yo
chi noo yañi yo nu cuatyí**

(Mt. 18.6-9; Lc. 17.1-2)

⁴²Tatu yóo ñu sanacava nu cuatyí chi noo ñu chinó iñi chii, vaha taxin ca cuhñi ñáyivi noo yuu sucun ñu ta tuchi ñu chi ñu cuan nu tyañuhu. ⁴³Tatu ndahun sanacavá chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa. ⁴⁴Ta yucuan ña chihí tindacu chachí chi ñu, ta ñuhú ña ndahva maa ni noo chaha. ⁴⁵Ta tatu chahun ta sanacavá chuun nu cu-

atyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan ma ndahva ca maa ñuhú. ⁴⁶Ta ña chihí tindacu chachí chi ñu, ta ñuhú ni noo chaha ña ndahva. ⁴⁷Ta tatu noo chiti nuu sanacavá chuun nu cuatyí, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya. ⁴⁸Vatyí yucuan ña chihí tindacu chachí chi ñu, ta ni noo chaha ña ndahva ñuhú.

⁴⁹Soco tandihí ñu nyicon chii, tari cha cayú ñu chihin ñuhú tatu nyehe ñu tindoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñii. ⁵⁰Ñii vaha xaan. Soco tatu ndihí cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandihí ndo cha coo tuhun Nyoo añima ndo cha cuví tari ñii vaha. Tyicuan caa ta coo taxi ri ndo chihin tahan ndo.

**Nu sañahá ra Jesús tyi ña vaha
sandoo rayii chi ñasihi ra**

(Mt. 19.1-12; Lc. 16.18)

10 Quita ra Jesús Capernaum ta cuahan ra ityi Judea nya inga chiyo yutya Jordán. Yucuan candu iin ri ñáyivi inga chaha nu nyaá ra, ta quichaha sañaha tucu ra chi ñu tari tuhvá maa ra. ²Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta canda-ca tuhun ra chi ra tatu vaha cha sandoo noo rayii chi ñasihi ra. ³Tyicuan ta nacahan ra Jesús ta catyí ra:

—¿Ñáa cha catyí ra Moisés tyi sacuvi ndo?

⁴Ta canacahan ra ta cacatyí ra:

—Ra Moisés chaha ra cha cuví cahnya noo ra tutu cha tandaha ra tyicuan ta

cuví sandoo ra chi ñasihi ra —catyí ra chi ra.

⁵Tyicuan ta catyí ra Jesús chi ra:

—Cati ra Moisés cha sacuvi ndo tyicuan caa soco cha cuenda cha ndava añima ndo. ⁶Soco quivi xihna ri, quivi savaha Nyoo tandihi maa, savaha ra rayii ta ñaha sihi. ⁷“Yucuan cuenda sandoo rayii chi sutu ra ta chi sihi ra vatyí ndu iin ri ra chihin ñasihi ra. ⁸Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvi ñu noo ri ñáyivi. ⁹Yucuan chaha, ña tahan chi cha sasiin ñáyivi cha sandu iin ri Nyoo —catyí ra Jesús chi ra.

¹⁰Yaha cuan ta nacha coyo ra nya vehe, ta quichaha ndaca tuhun ra cachicá noo chihin ra inga chaha siqui tuhun cuan. ¹¹Ta catyí ra Jesús chi ra:

—Ra cha sandoó ñasihi ta tandaha ra chihin inga ñu, chicoó cuatyí ra vatyí ña vaha sacuvi ra chihin ñasihi ra, ñaha cha xihna ri cuan. ¹²Ta tyicuan caa tucu ñusihi. Tatu sandoó ñu chi yii ñu ta tandaha ñu chihin inga ra suri chicoo tucu cuatyí ñu —catyí ra Jesús.

Nu nasoco ra Jesús chi ra cuatyaa

(Mt. 19.13-15; Lc. 18.15-17)

¹³Tyicuan ta quichi nyaca ñu suhva ra cuatyaa chi ra Jesús tacuhva natyiso ra ndaha ra siqui ndotyin. Soco ra cachicá noo chihin ra ña chahá ca ra cha quichi nyaca ñu chi ndotyin. ¹⁴Soco cuhva cha nanyehé ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chi Nyoo tari chinó iñi ra cuatyaa ihya. ¹⁵Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyin, ma cuví quihvi ndo nu nyacá ñaha Nyoo —catyí ra Jesús chi ra.

¹⁶Ta quehen ra chi noo noo ndotyin ta tyihí sucun ndaha ra. Ta tyiso ra ndaha ra siqui ndotyin, ta chican tahvi ra chaha ndotyin.

Nu ndatuhún minoo ra tyivaa tyayii chihin ra Jesús

(Mt. 19.16-30; Lc. 18.18-30)

¹⁷Yaha cuan ta cuahan ra Jesús. Ta chingo vavaha noo ra cuan chata ra ta chicuñi chiti ra nuu ra, ta ndaca tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayivi cha ma naa ca maa coi? —catyí ra chi ra Jesús.

¹⁸Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.) ¹⁹Yoho cha chitón cha catyí Nyoo cha sacuvi yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñáyivi chi sutun ta chi sihun” —catyí ra Jesús chi ra.

²⁰Ta nacahan ra cuan ta catyí ra:

—Maestro, tandihi ihya cha sacuvi nyata luhli —catyí ra.

²¹Tyicuan ta cusii cuñi ra Jesús nanyehé ra chi ra. Ta catyí ra chi ra:

—Cumañi noo ri ca cha cumañi chuun. Cuahan ta xicon tandihi cha iyó chuun ta cuhvon chi ñu ndahvi. Tyicuan ta coo cha tyayiu nya andivi. Yaha cuan ta quichun cunyicon chii vasi nyehún tindoho —catyí ra Jesús chi ra.

²²Soco cha chiñi ra tuhun cahan ra Jesús tyehe caa, nducuihya iñi ra, ta cuihya xaan cuanuhu ra vatyí tyayii xaan ra.

²³Tyicuan ta nanyehé ra Jesús nicachico chata ra, ta catyí ra chi ra cachicá noo chihin ra:

—ĩÑana cha yĩi ta cuvi nacuhva cuenda ñu tyayĩi chi ñu na cunyaca ñaha Nyoo chi ñu! —catyí ra chi ra.

²⁴Iyo cacuñí ra cachicá noo chihin ra tuhun cahán ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyayĩi, jyii xaan quihvi ñu nu nyacá ñaha Nyoo! ²⁵Tañi tyehe yaha noo camellu xiu noo yiqui ticu, ta ñima ca cha cuhva noo ñu tyayĩi cunyacá ñaha Nyoo chi ñu —catyí ra Jesús.

²⁶Cha cachiñi ra tuhun ihya, iyo xaan cacuñí ra, ta candaca tuhun ra chi ra tahan ra, ta catyí ra:

—Tu tyicuan caa, ¿yóo cha cuví cacu añima? —catyí ra.

²⁷Nanyehe ra Jesús chi ra ta catyí ra chi ra:

—Ñáyivi ña cuví sacuvi ñu ihya. Soco Nyoo cuví chi ra. Vatyí cha cuenda Nyoo ñahri cha yii sacuvi ra.

²⁸Tyicuan ta catyí ra Pedro chi ra:

—Sutu Mañi yuhu, nyuhu sandoo ndi tandihi cha iyó chi ndi, ta vityin nyicón ndi chuun.

²⁹Nacahan ra Jesús ta catyí ra:

—Cha ndicha catyí chi ndo vatyí tandihi ñu sandoo vehe, o yañi, o cuhva, o sutu, o sihi, o ñasihi, o sehe, o ñuhú, cha cuenda yuhu ta cha cuenda cha sacoto ñu chi ñáyivi tyi cuñí Nyoo sacacu ra chi ñu, ³⁰cuañihi ñu ciento chaha siqui cha sandoo ñu ihya ñuhu ñayivi. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyivi tindoho chi ñu. Soco inga ñáyivi cha vachi, cuñihi ñu ñayivi cha ma naa ca maa. ³¹Soco cuaha xaan ñu cha cuví nuu vityin, ñu nu ndihi cucuvi ñu. Ta cuaha xaan ñu cuví ñu nu ndihi vityin, ican ñu cucuvi nuu —catyí ra Jesús.

Nu cahán ra Jesús inga chaha tyi cucúvi ra

(Mt. 20.17-19; Lc. 18.31-34)

³²Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñí ñu ta chihin cha yuhvi ñu cuahan coyo ñu chata ra. Tyicuan ta cana siin ra chi ndi uchi uvi ra cachicá noo chihin ra. Ta quichaha catyí ra cha cucuvi chi ra. ³³Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Rayii cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chi ra inga ñuu. ³⁴Ta cucuacu nyaa ra chii, cucañi ra chii, cutyicu sii ra chii. Ta cucahni ra chii. Soco cha cu uñi quivi cunandote cha yaha cúvi —catyí ra Jesús.

Nu cachican ra Jacobo ta ra Juan noo tumañi iñi chi ra Jesús

(Mt. 20.20-28)

³⁵Tyicuan ta ra Jacobo ta ra Juan, ra cacuví sehe ra Zebedeo, catuhva ra nu nyaá ra Jesús, ta catyí ra chi ra:

—Maestro, cuñí ndi cha sahun noo tumañi iñi chi ndi —catyí ra.

³⁶Ta ndaca tuhun ra Jesús chi ra:

—¿Ñáa cha cuñí ndo cha sacuvi cha cuenda ndo?

³⁷Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cuanyehe yuhu? ¿Atu cuví cuhun ndo tuhun chihí tari cuhun yuhu? —catyí ra chi ra.

³⁹Ta canacahañ ra:

—Cuví chi ndi.

Ta ra Jesús catyí ra:

—Cha ndicha vatyí cunyehe ndo tindoho ta cahun ndo tuhun chihi tari cahun yuhu. ⁴⁰Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Nyoo cucatyí yóó cha cuñihi nyatu cuan —catyí ra Jesús chi ra.

⁴¹Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan. ⁴²Soco cana ra Jesús chi ra ta catyí ra chi ra:

—Chitó nyoho vatyí ra canyacá ñaha chi ñáyivi siqui ñuhu ñáyivi, ñihi xaan yosó ra siqui ñu. ⁴³Soco ñima tyicuan caa tahán chi sacuvi nyoho. Vatyí ra cuñí cucahnu ca, cuñí chi cuvi ra musu tandihi ca ndo. ⁴⁴Ta nya nyoho cha cuñí ndo cuví ndo nuu, cuñí chi cuvi ndo musu tandihi ca ñu. ⁴⁵Vatyí ni ri yuhu Rayi cha quichi nya gloria ta ña vachi vatyí sacuvi ñáyivi tyiño nui. Soco vachi vatyí sacuvi tyiño nuu ndo. Ta vachi vatyí cuhve ñáyivi tari noo cha cutiyahvi ta cusacaqui cuaha ñáyivi —catyí ra Jesús.

Nu sanduvaha ra Jesús chi ra Bartimeo ra cha cuaa

(Mt. 20.29-34; Lc. 18.35-43)

⁴⁶Tyicuan ta cachaa coyo ra ñuu Jericó. Ta cua yaha ri ra ñuu cuan. Ta cuhva cha quita ra Jesús ñuu cuan cuaha xaan ñáyivi cuahan chata ra, ñin ri chihin ra cacticá noo chihin ra. Ta yucuan nyaá noo ra cuaa cha nañí Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán ra caridaa. ⁴⁷Ta cha chiñi ra cuaa cuan tyi cua yaha ra Jesús ra ñuu Nazaret, quichaha cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaa ra.

⁴⁸Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—¡Yoho ra vachi tata ra David, cundahvi cuñi chii! —catyí ra.

⁴⁹Tyicuan ta chicuñi ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Sanñi ñun. Nducuita, vatyí caná ra chuun —cacatyí ra chi ra.

⁵⁰Tyicuan ta tuchi ñihno ra sahma ndichi ra. Ta ndava ra noo ta tuhva ra nuu nyaá ra Jesús. ⁵¹Tyicuan ta quichaha ndaca tuhun ra Jesús chi ra:

—¿Ñáa cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñi cha sanduvahun chiti nui —catyí ra.

⁵²Ta catyí ra Jesús chi ra:

—Cuahan. Cha nduvahun vatyí chinó ñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11 Cachaa coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra chicá noo chihin ra:

²—Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñi ti, quiti ta quih ca tyayu cuví ti. Ndachi ndo chi ti, ta quichi nyaca ndo chi ti. ³Ta tatu yóó cha ndaca tuhun ñáa tuhun sacuvi ndo tyicuan caa, catyí ndo chi ñu vatyí chiñuhú ti chi ra nyacá ñaha, ta numi ri

cunanyaca ndo chi ti, catyi ndo chi ñu —catyí ra Jesús chi ra.

⁴Tyicuan ta cuahan coyo ra, ta canañihí ra burru cuan nuhñí ti ityi cahnu yatyin ri noo yuvehe, ta candachí ra chi ti. ⁵Ta suhva ra canyicú cuan catyí ra chi ra:

—¿Ñáá cha nyacuvi ndo? ¿Ñáá tuhun cha ndachí ndo burru chiña? —catyí ra chi ra.

⁶Tyicuan ta canacahan ra tari cuhva cha catyí ra Jesús chi ra. Ta cachaha ra cuhun coyo ra. ⁷Tyicuan ta caquehen ra burru cuan ta chinyaca ra chi ra Jesús. Ta catyiso ra sahma ra siqui ti, ta ndaa ra Jesús chi ti. ⁸Ta cuaha ñu ndica ñu sahma ñu ityi cuahan ra, ta inga ñu chahnu ñu soco numa ta cachacun ñu.

⁹Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo! ¹⁰¡Sacahnu yo chi ra vachi nyacá ñaha tari chinyaca ñaha sutu chahnu yo ra David! ¡Cahnu xaan ca cuví ra nyaá andívi! —catyí ñu.

¹¹Tyicuan ta quihví ra Jesús chichi ñuu Jerusalén, ta cuahan ra vehe ñuhu cahnu. Ta cha yahá nanyehé ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyí cha ñi.

Nu soco ra Jesús chi yutun higo cha ñahri chiti ñi nuu tun

(Mt. 21.18-19)

¹²Cha inga quivi quita coyo ra ñuu Betania cuan, ta cha ni ri ca cha cuahan ra chicá ityi ra cha noo soco chi ra Jesús. ¹³Ta nyasava ri nanyehé ra noo tu higo cha nyaá numa. Ta chahan ra chinyehé ra tatu ñi chiti nuu tun, soco maa maa ri numa ri ñi, vatyí ta chaa ca quivi quita chiti tun. ¹⁴Tyicuan ta cahan ra Jesús chihin tun, ta catyí ra chi tun tyehe caa:

—Ma coo ca chiti cachi ñáyivi nuun —catyí ra chi tun.

Ta ra cachicá noo chihin ra cachiñí ra cha cahán ra.

Nu tava ñehe ra Jesús chi ra caxicó chichi vehe ñuhu cahnu

(Mt. 21.12-17; Lc. 19.45-48; Jn. 2.13-22)

¹⁵Yaha cuan ta nachaa coyo ra Jerusalén. Ta quihví tucu ra Jesús chichi vehe ñuhu cahnu. Ta quichaha tava ñehe ra chi ra caxicó ta ra casatá yucuan. Sanduva ra mesa ñu canasamá xuhun chi ñáyivi. Ta suri tyicuan caa sacuvi ra chihin tyayu ra caxicó paloma. ¹⁶Ta ña chaha ca ra ca cuiso ñu ñáá cha cuiso ñu ityi chichi vehe ñuhu cuan. ¹⁷Ta quichaha sañaha ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandíhi ñáyivi iyó siqui ñuhu ñáyivi cuví”, catyí Nyoo. ¡Soco nyoho nasahá ndo vehe nu nyicú ra suhu! —catyí ra Jesús.

¹⁸Ta ra cacuví nuu chi tata sutu ta ra casacuahá cuenda ley vehe ñuhu cachiñi ra cha cahán ra, ta quichaha canducu ra cuhva cha cacahni ra chi ra vatyí cayuhví ra chi ra tyi cha tandíhi ñáyivi iyo cuñí ñu cha sañaha ra. ¹⁹Soco cuhva cha cua cuaa ra Jesús quita ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús

(Mt. 21.20-22)

²⁰Cha ñaha ri cha inga quivi cuan, nayaha coyo ra nu nanyaá tu higo cuan. Ta cananyehé ra vatyí na ityi nyacua nya yoho tun. ²¹Tyicuan ta nichon ñi ra Pedro vatyí soco ra Jesús chi tun ta catyí ra chi ra Jesús:

—Maestro, nyehé tu higo cha socon, cha na ityi tun —catyí ra.

²²Nacahan ra Jesús, ta catyí ra:

—Chino ñi ndo chi Nyoo. ²³Vatyí cha ndicha catyí chi ndo vatyí nya nyoho catyí ndo chi yucu ihya, “Na canyaha

ta cuhun nu tyañuhu”, ta tatu ña chicá uvi ñi ndo, ta chinó ñi ndo, tuhun cahan ndo cua cuvi. ²⁴Yucuan chaha catyí chi ndo vatyí tandíhi cha chicán tahvi ndo, ta tatu chinó ñi ndo tyi cha naquehen ndo, tyicuan caa cucuvi. ²⁵Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu ñi chi ñu, tacuhva vatyí Sutu ndo, ra nyaá andiví, saha tucu maa ra ticahnu ñi cuatyí ndo. ²⁶Soco tatu ña sahá ndo ticahnu ñi chi ñu, ni ri Sutu ndo, ra nyaá andiví, ma saha ra ticahnu ñi cuatyí maa ndo.

Yóó cha chahā ityi chi ra Jesús vatyí sacuvi ra cha sacuví ra

(Mt. 21.23-27; Lc. 20.1-8)

²⁷Tyicuan ta nachaā coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhvā ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra. ²⁸Ta candaca tuhun ra chi ra.

—¿Yóó cha tyaā tyiño chuun vatyí sacuvun tyehe caa? ¿Yóó cha chahā ityi chuun vatyí sacuvun? —cacatyí ra.

²⁹⁻³⁰Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóó cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, tyicuan ta cua catyí tucu yuhu chi ndo yóó cha tyatyíño ihya chii —catyí ra Jesús chi ra.

³¹Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chinó ñi ndo chi ra?” ³²¿Ta yoso caa catyí yo tyi ñáyivi tachí chi ra? Ma cuvi —cacatyí ra, vatyí cayuhví ra chi ñáyivi, vatyí tandíhi ñu cacinó ñi ñu vatyí cha ndicha cuenda Nyoo cahan ra Juan.

³³Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyí chi ndo yóó cha tyaā tyiño chii tyi sacuvi cha sacuví —catyí ra Jesús chi ra.

Nu chahā ra Jesús noo cuhva yoso caa cucahñi ñu chi ra

(Mt. 21.33-46; Lc. 20.9-19)

12 Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyō noo ra cha tachí ra yoho tichaha ndiví. Ta chasi ra chaha. Ta savahā ra noo nu cuhñi ra tichaha ndiví. Ta savahā ra noo vehe sucun tacuhva vatyí cuví saha ra cuenda tandíhi.

Yahā cuan ta chahā noo ra ñuhú cuan chi suhva ra casahá tyiño. Ta cuahan ra inga ñuu. ²Ta cha chaā quivi iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vatyí cacan ra suhva chiti cha tahán chi chi ra. ³Soco catiñ ra chi ra. Ta cacañi ra chi ra. Ta canatachí ra chi ra chihin nu ndaha nu ndi ra. ⁴Tyicuan ta chitoho ñuhú cuan tachí ra chi inga musu, soco chi ra ihya catuchí ra yuu chi ra, catahví ra xiñi ra, ta cacahan uhvi ra chi ra. ⁵Ta inga tucu musu tachí chitoho ñuhú cuan. Ta chi ra cuan cachahñi ra. Yahā cuan ta tachí ra cuaha ca ra. Soco cacañi ra chi suhva ra. Ta chi suhva ca ra cachahñi ra. ⁶Ta ndoo noo ri ca ra cha cuví tachí chitoho ñuhú cuan. Ican cuví sehe ra cha cuñí xaan ra. Ta nu ndihi tachí ra chi sehe ra vatyí cuñí maa ra chicá xiñi ra: “Cucasaha ra ñáyivi chi sehi”, cuñí ra chicá xiñi ra. ⁷Soco nu chaā sehe ra, ra casahá tyiño cuan catyí ra chi tahan ra: “Ican ra ihya cundoo chihin tandíhi ihya. Na cahñi yo chi ra, ta ndoo maa yo chihin”, catyí ra. ⁸Ta tyicuan caa catiñ ra chi ra ta cachahñi ra chi ra. Tyicuan

ta cachituchi ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

⁹Tyicuan ta ndaca_u tuhun ra Jesús chi ra ta catyí ra:

—¿Ñáá cha cusacuvi ra cuví chitoho ñuhú cuan? Cuquichi ra ta cucahñi ra chi ra casahá tyiño cuan. Ta cuhva ra ñuhú cuan chi inga ra. ¹⁰¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cacuñi_u ra casavaha vehe cotyiño ra,

ican cuan cuví yuu cha ñiñi ca.

¹¹Ican ihya cuví cha sacuvi_u Sutu yo Nyoo.

Ta tyaqui xaan tuhun cha cuenda chi yo, catyí chi nu tutu Nyoo —catyí ra Jesús chi ra cacuví nuu chi tata sutu cuan.

¹²Tyicuan ta canducu ra cuhva cha tyihi ra chi ra Jesús vehe caa vatyi cachitó ra vatyi cahan ra cuhva ihya soco cha cuenda maa ra. Soco vatyi cayuhví ra chi ñáyivi, casando_o ra chi ra, ta cuahan coyo ra.

Nu ndaca_u tuhun ra chi ra Jesús cha cuenda xuhun cha tavá gobiernu ñuu Roma

(Mt. 22.15-22; Lc. 20.20-26)

¹³Tyicuan ta catachi_u ra suhva ra cuenda ra Herodes ta suhva ra fariseo nu nyaá ra Jesús vatyi casacahan ra chi ra ta coo cuatyí catyaa ra siqui ra. ¹⁴Chaa coyo ra ihya ta quichaha catyí ra chi ra Jesús:

—Maestro, chitó ndi vatyi cahún cha ndicha, ta ña quichahún cha cahán ñáyivi, ta ña natíñ cuendon cuhva caa ri ñu. Ta ndicha sañahún ityi Nyoo. Yucuan chaha cuñi ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —catyí ra chi ra Jesús.

¹⁵Soco ra Jesús chitó ra vatyi ñima cha vaha chicá xiñi ra, ta catyí ra chi ra:

—¿Ñáá tuhun cha cuñi ndo sandavi ñaha ndo chii? Nyaca ndo noo xuhun chii, na nyehi —catyí ra.

¹⁶Caquichi_u nyaca ra chi ra. Ta cuhva cha nanyehé ra ta ndaca_u tuhun ra chi ra, ta catyí ra:

—¿Yóó chi nuu ihya, ta yóó chi sivi nyaá ihya? —catyí ra chi ra.

Ta canacahan ra ta cacatyí ra:

—Chi gobiernu.

¹⁷Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyí ra Jesús chi ra.

Ta iyo cacuñi_u ra tuhun cha nacahan ra.

Nu canducu tuhun ra saduceo siqui tuhun cha nandotó ndiyi

(Mt. 22.23-33; Lc. 20.27-40)

¹⁸Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyi ña nandotó ndiyi. Yucuan chaha cacahan ra tyehe caa ta catyí ra chi ra Jesús:

¹⁹—Maestro, tyaa ra Moisés tuhun yoso caa tahán chi sacuvi yo tatu noo rayi_i ta chih_i ra ta ndoo ñasihi ra soco ña chico_o sehe ra chihin ña. Catyí ra vatyi tahán chi tandaha yañi ra chihin ñaha cha chih_i y_i cuan, tacuhva vatyi coo sehe ña cha cuenda ndi yañi ra. ²⁰Noo chaha chiy_o ucha tahan ra chihin yañi ra. Ra cha xihna ri tandaha_u ra chihin noo ña, ta yori sehe ra chico_o. ²¹Ta ra cu uvi tandaha ra chihin ñaha cha ndoo cuan. Ta suri chih_i ra. Ta suri yori sehe ra chico_o. Ta tyicuan caa tucu cuv_i chihin ra cu uñi cuan. ²²Ta tyicuan caa ndi ucha tahan ra tandaha_u chihin ña. Ta ni noo ra ña cachiy_o sehe ra chihin ña. Ta nu ndihi tuhun, chih_i ndihi maa ña. ²³Ta vityin, quivi cunandoto ñáyivi, ¿nya ra cucuvi y_i ña? Vatyi ndi ucha tahan ra

cuan chiyo chihin ña —cacatyí ra chi ra Jesús.

²⁴Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo. ²⁵Vatyí quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andivi tyicuan caa cucuvi ñu. ²⁶Ta tuhun cha nandotó ndiyi cuan, ¿atu ta sacuahá ca ndo nu libro ra Moisés yoso caa cahán Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés. ²⁷Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó ánima ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra. Yucuan chaha catyí vatyí nyoho cahán tondo ri ndo —catyí ra Jesús chi ra.

Ley cha niñi ca cha chahá Nyoo

(Mt. 22.34-40)

²⁸Chahá tucu noo ra sacuahá cuenda ley vehe ñuhu cuan, ta chiñi ra cacuví yuhu ra. Ta vatyí chitó ra vatyí ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha niñi ca sacuví yo? —catyí ra.

²⁹Ta nacahan ra Jesús ta catyí ra:

—Cha xihna ca sacuví yo cha nuu tandihí, ican cuví ihya: “Cuñi ndo ñu Israel. Sutu yo Nyoo, noo ri maa ra iyó. ³⁰Cuñun chi Sutu yo Nyoo chihin cha niñi iñun ta chihin cha tandihí ánimon, ta chihin cha tandihí cha chiñi tuñi xiñun, ta chihin cha tandihí tunyee iñun.” Ican ihya cuví cha xihna ca cha tahán chi sacuví yo. ³¹Ta cha cu uvi catyí chi: “Cuñun chi tahun tari cuñun chi maun.”

Ñahri ca tuhun cha niñi ca ican saha nduvi tahan ihya —catyí ra Jesús.

³²Tyicuan ta ra sacuahá cuenda ley cuan catyí ra chi ra:

—Vaha xaan nacahan, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra. ³³Ta cha cuñí yo chi Nyoo chihin cha niñi iñi yo ta chihin cha tandihí cha chiñi tuñi xiñi yo, ta chihin cha tandihí ánima yo, ta chihin cha tandihí fuerza yo, ta cuñi yo chi tahan yo tari cha cuñí yo chi maa yo, vale ca cuan ta ñima ca tandihí quití cha chahá yo chi Nyoo cha chahñi yo ta chahmi yo —catyí ra sacuahá cuenda ley cuan chi ra Jesús.

³⁴Nyehé ra Jesús vatyí vaha nacahan ra chihin cha cachi xiñi ra. Ta catyí ra chi ra:

—Chiin ri ca cuñí chi ta ñihún cuhva yoso caa nacuhvon ánimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

¿Yóó chi tata vachi ra Cristo?

(Mt. 22.41-46; Lc. 20.41-44)

³⁵Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David? ³⁶Vatyí suri maa ra David chotyño Tatyí li chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan sii xaan cacuñí ñu chiñí ñu tuhun cahán ra.

Nu catyí ra Jesús vatyí iyó cuatyí ra casacuahá cuenda ley vehe ñuhu

(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chi ndo chihin ra casacuahá cuenda ley vehe ñuhu, vatyí tahán iñi ra cacuihno ra sahna nañi ta chicá noo ra nuyahvi tacuhva saha ndo ñáyivi chi ra, ta cuhva ndo nocumi chi ra. ³⁹ Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñí ra cachi ra nyayu nu iyó vico. ⁴⁰ Ta ican ra catinyaá vehe ñu chihí yíi, vatyí ña cuví tyiyahvi ñu ñáá xuhun tava ra siqui ñu. Ta cuñí ra sacuvaha ra chi ra nuu ñáyivi. Yucuan chaha naha chicán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yíi

(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chahá ñáyivi chi Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayíi chahá ñu cuaha xaan xuhun. ⁴² Tyicuan ta chaq tucu noo ñaha ndahvi chihí yíi, ta tyihí ña uvi tahan xuhun cuatyí cha caha xaan nyaá. ⁴³ Tyicuan ta caná ra Jesús chi ra cacticá noo chihin ra, ta catyí ra chi ra:

—Cha ndicha catyí chi ndo vatyí ñaha ndahvi chihí yíi ihya, cuaha ca chahá ña ta ñima ca inga ñu catyihí xuhun chiña.

⁴⁴ Vatyí tandihí ñu cachahá ñu cha ndoo ri ca chi ñu. Soco maa ña chihin cha ndahvi ña chahá ña tandihí cha cumí ña —catyí ra Jesús.

Nu catyí ra Jesús vatyí cutani vehe ñuhu cahnu

(Mt. 24.1-2; Lc. 21.5-6)

13 Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chi ra:

—¡Maestro, nyehe ñana cha tyaqui yuu yihí vehe ihya! ¡Ñana cha nahnu vehe ihya! —catyí ra chi ra Jesús.

² Soco nacahan ra Jesús, ta catyí ra chi ra:

—¿Atu nyehún vehe nahnu ihya? Soco catyí chuun vatyí ma ndoo ni noo yuu coso siqui tahan, vatyí tandihí cutani —catyí ra Jesús.

Seña cha cucuvi cha ni cumañi ca naa ñayiví

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

⁴ —Cuní ndi cha çayun chi ndi ama cucuvi tandihí tuhun cha cahun tuhun. ¿Ñáá seña cucuvi tatu cha cua cuví? —cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo. ⁶ Vatyí cuaha xaan ra cuquichi coyo ra, ta cucotyíño ra sivi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyivi.

⁷ Soco tatu chiñí ndo tuhun tyi iyó cuatyí ta cañí tahan ñáyivi, ma nayuhvi ndo. Vatyí tyicuan caa tahán chi cucuvi, soco ta chaa ca quívi cunaa ñáyivi.

⁸ Vatyí noo ñuu cuchañi tahan chi chihin inga ñuu, ta ñáyivi cuenda noo gobiernu cuchañi tahan ñu chihin ñáyivi cuenda inga gobiernu. Ta cucoo cha

taan nahnu cuaha ri ityi. Ta cucoo tama. Ta cunaquiqui ñáyivi. Ta tyehe caa cua quichaha cha nyehe ñáyivi tindoho. ⁹Soco saha ndo cuenda chi ndo. Vatyí cucuhva cuenda ñu chi ndo chi ra cacuví tyiño. Ta cuchañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhín nuu ra. ¹⁰Vatyí cha ni cumañi ca naa ñáyivi, cuñí chi cucutya tuhun Nyoo yoso caa sacacú ra añima ñáyivi tandihi ñuu. ¹¹Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhun cucahan ndo, ni ma ndichi xiñi ndo. Cahan ndo cha catyí Nyoo chi ndo cha cahan ndo cuhva cuan. Vatyí ñima nyoho cucahan, soco maa Tatyí li Nyoo. ¹²Yihí ra cunacuhva cuenda ra nyacua nya chi yañi maa maa ra. Ta sacuvi ra na cacahñi ñu chi ra. Ta yihí ñáyivi cunacuhva cuenda ñu chi sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chi ñu na cahñi ra chi ñu. ¹³Tandihí ñáyivi cutasi cuñi nyehe ñu chi ndo cha cuenda yuhu. Soco tatu cunyehe iñi ndo nyacua nya nu ndihí, cucacu ndo.

¹⁴Ra Daniel, ra profeta Nyoo ta cha naha, tyaa ra yoso caa cuahan tuhun noo cha cusacaquini nu ii xaan. Ta cusativí chi tandihí. Tatu nyehé ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñí chi cha cono tandihí ñu iyó Judea nya ityi yucu. ¹⁵Ta ñu ñohó xiñi vehe quívi cuan, noo ñu, soco ma quihvi ñu chichi vehe ñu tava ñu ñáá cha tava ñu. ¹⁶Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu. ¹⁷¡Ndahvi ñusihí cha cañohó sehe quívi cuan! ¡Ndahvi tucu cuví ñusihí cha chaxín sehe quívi cuan! ¹⁸Çacan ndo chi Nyoo tacuhva cha ma tahan chi caca cono ndo quívi vichin. ¹⁹Vatyí quívi tindoho cucuvi. Ta ni noo chaha ta cuví

ca tyicuan caa nyata quívi chino ñuhu ñáyivi nyacua nya vityin. Ta ni ma coo ca tindoho tahán ihya nu cuahan ca chi. ²⁰Tyehe ta ma sanducuiti Sutu Mañi yo tyembu cuan, yori maa cucacu. Soco sanducuiti ra cha cuenda cha cuñi ra chi ñu cuenda ra, ñu cha nacachi maa ra.

²¹’Tatu yóó cha catyí chi ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo. ²²Vatyí cuquichi ra casandaví ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Taucasavaha ra seña, milagru, vatyí canducú ra cuhva sandaví ñaha ra nyacua nya chi ñu cha nacachi maa Nyoo tatu cuví chi ra. ²³Soco saha vaha ndo cuenda vatyí yuhu cha sacote chi ndo cha ni cumañi ca cuví tyicuan caa —catyí ra Jesús.

Nu sacoto ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴Ta catyí tucu ra Jesús tyehe caa:

—Soco quívi cha yaha tindoho, cunduñaa ñanyii. Ma cundichin ca yoo. ²⁵Tiño cuacoyo andiví. Ta nyacua nya tandihí cha iyó andiví ta cunacanda. ²⁶Tyicuan ta cunyehe ndo chi yuhu Rayii cha quichí nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra. ²⁷Tyicuan ta cutachi chi ángel ta cusandu iin ri chi ñu nacachi nicahnu siqui ñuhu ñáyivi, nyacua nya nu ndihí ñuhu ñáyivi ta nyacua nya nu ndihí andiví.

²⁸’Cutuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñi chaa quívi coo chiti, cha vachi vico savi. ²⁹Ta suri tyicuan caa tatu cha nyehe ndo tuhun ihya, coto ndo tyi cha nyañaa yatyin quívi quichi tiqui. Cha nyañai yuvehe cuví cuan. ³⁰Cha ndicha catyí chi ndo vatyí tandihí ihya cucuvi cha ni ri

ca cha iyó ñáyivi. ³¹Tyicuan ta cunaa andívi ta ñuhu ñayivi cha iyó cha vityin. Soco tuhun चाहं tyicuan ri cucuvi tari cuhva catyí.

³²Soco yori chitó ñáá quivi ta ñáá cuhva cucuvi tandíhi ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³Yucuan chaha conyito vaha ndo, ta saha ndo cuenda ta çacan tahvi ndo, vatyi ña chitó ndo ñáá quivi cuchaa cuhva. ³⁴Tari noo ra cha cua cuhun nu cañi. Ta cha ni cumañi ca cuhun ra, chahā cuenda ra vehe ra chi musu ra. Ta chahā ra tyiño chi noo noo ra. Ta tachí ra chi ra sahá cumi yuvehe cuan na saha ra cuenda. ³⁵Yucuan chaha nyoho conyito ndo vatyi ña chitó ndo ñáá cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri. ³⁶Conyito ndo coto sana iñi ndo ta quichi ra, ta nañihi ra chi ndo quixí ndo. ³⁷Cha catyí chi nyoho, catyí tiqui chi tandíhi ñáyivi ñandíhi. Na conyito ñu.

Nu canducú ra cuhva catiín ra chi ra Jesús

(Mt. 26.1-5; Lc. 22.1-2; Jn. 11.45-53)

14 Uvi ca quivi cumañi ta cua tahan chi vico cha nañi pascua ta vico cha tuhva ñu chachí ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva catiín xehe ra chi ra Jesús ta cacahñi ra chi ra. ²Soco cacatyí ra chi ra tahan ra:

—Ma tiín yo chi ra cha chichi vico vityin coto naquiqui ñáyivi —cacatyí ra.

Nu choso noo ñaha sihi ndutya vixi chahán chi ra Jesús

(Mt. 26.6-13; Jn. 12.1-8)

³Nohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra

mesa, chaā noo ñaha sihi ndaha ña noo yutyi cha chino chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyi cuan ta choso ña ndutya vixi chahán cuan xiñi ra Jesús. ⁴Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativi ña ndutya vixi chahán cuan? ⁵Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta chahā ra chi ña.

⁶Soco ra Jesús catyí ra:

—¡Saña ndo chi ña! ¿Ñáá tuhun cha sayangá ndo chi ña? Cha choso ña chii tyehe caa, cha vaha cuví. ⁷Vatyi ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáá ri quivi cuñi ndo. Soco yuhu ñima tyicuan ri cua cunyai chihin ndo. ⁸Ñaha sihi ihya sacuvi ña yoso cuhva cha cuví chi ña. Choso ña ndutya vixi chahán coño ñuhi, cha ni cumañi ca cucuvi ta quihvi chichi ñuhu. ⁹Cha ndicha catyí chi ndo, vatyi tandíhi ri nicahnu ñuhu ñayivi nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nicohon iñi ñáyivi tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chi ra

(Mt. 26.14-16; Lc. 22.3-6)

¹⁰Yahā cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahā ra chindatuhun ra chihin ra cacuví nuu chi tata sutu, vatyi casandaa ra noo tyiño ta nacuhva cuenda ra chi ra Jesús chichi ndaha ra. ¹¹Cuhva cha cachiñi ra ihya, cusii xaan cacuñi ra, ta catyí ra vatyi cuhva ra xuhun chi ra. Tyicuan ta quichahā nducu ra Judas cuhva nacuhva cuenda ra chi ra Jesús.

**Nu cuxiñi ra Jesús chihin
ra cachicá noo chihin ra**

(Mt. 26.17-29; Lc. 22.7-23;
Jn. 13.21-30; 1 Co. 11.23-26)

¹² Cuví chi quívi quichaha vico cha chachí ñu pan cha ñahri yuchan iya yihí. Yucuan quívi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candacá tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

¹³ Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quiyi ndutya. Cuahan ndo chata ra.

¹⁴ Ta nu quihvi ra, catyi ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarto nu cusanducahnu ra vico chihin ra cachicá noo chihin ra”, catyi ndo chi ra. ¹⁵ Ta maa ra cusañaha ra noo cuarto cahnu nu piso sucun chi ndo. Cha yaha nduvii, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta chaá coyo ra chichi ñuu. Canañihí ra tari cuhva catyí ra Jesús chi ra, ta casanduvaha ra cha cuxiñi ra cha vico pascua cuan. ¹⁷ Ta cha cuaa cuan chaá ra Jesús chihin ndi uchi uvi ra chicá noo chihin ra. ¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyí noo nyoho cha chachí ndo chihin cunaxico tuhun ndo chii.

¹⁹ Tyicuan ta canducuihya ñi ra ta quichaha candacá tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyí pan ñin ri nu coho chihin, ican ra cuan cuví. ²¹ Vatyí yuhu Rayíi cha

quichí nya gloria cucuvi chii tari cuhva catyí nu tutu tuhun Nyoo. Soco ñndahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacu ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahví ra ta chaha ra chi tandihí ca ra, ta catyí ra:

—Quehen ndo. Ican ihya cuví coñe —catyí ra chi ra.

²³ Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chaha ra chi ra. Ta tandihí ra cachihi ra cha ñohó chichi vaso cuan.

²⁴ Ta catyí ra chi ra:

—Vinu cha yihí chichi vasu ihya tari ñiñi cuví. Ta chihin ñiñi tyihí tahan Nyoo tuhun chaa chihin ndo vatyí cucati cha cuenda cha vaha chi cuaha ñáyivi.

²⁵ Cha ndicha catyí chi ndo vatyí ma coho que vinu nyacua nya quívi nachai nu nyacá ñaha Nyoo ta cohi vinu chaa —catyí ra Jesús chi ra.

**Nu catyí ra Jesús tyi cucatyí ra Pedro
tyi ña ñohó nuu ra chi ra**

(Mt. 26.30-35; Lc.

22.31-34; Jn. 13.36-38)

²⁶ Cha yaha cha cachitá ra yaa, ta caquitá ra cuahan coyo ra nya yucu yutun Olivo. ²⁷ Tyicuan ta catyí ra chi tandihí ra:

—Tandihí nyoho cusandoo notuhun maa ndo chii vityin cha cuaa. Vatyí catyí chi nu tutu tuhun Nyoo tyehe caa: “Cucahñi chi ra sahá cumi mbee, ta mbee cacacono ti ityi cuan ityi ihya”, catyí chi. ²⁸ Soco cha yaha cha nandote, xihna que cuhun ityi Galilea ican saha nyoho —catyí ra Jesús chi ra.

²⁹ Tyicuan ta quichaha catyí ra Pedro chi ra:

—Vasi tandihí ra sandoo ra chuun, soco yuhu ma sandoi chuun —catyí ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandihi ra cacatyí ra tyicuan caa.

Nu chican tahvi ra Jesús nu cuví Getsemaní

(Mt. 26.36-46; Lc. 22.39-46)

³² Tyicuan ta cachaa coyo ra noo nu nañi Getsemaní. Ta ra Jesús catyí ra chi ra cachicá noo chihin ra:

—Cunyicu ndo ihya ni ri kuhin cuacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra. ³⁴ Ta catyí ra chi ra:

—Tuví iñi añime noo tucuihya iñi, ta cuñi cahñi chi chii. Ndo nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chican ra chi Nyoo tatu cuvi cha ma nyehe ra tindoho cha cua cuvi chi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuvi chuun. Tu yoho ta cuñún na canyaha tindoho ihya chii. Soco ma cuvi tari cuhva cha cuñi mai, soco cuhva cha cuñi maun na cuvi —catyí ra Jesús chicán tahvi ra.

³⁷ Yahá cuan ta nachaa ra nu nyicú ra. Ta nyehe ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuví conyiton ni noo hora? ³⁸ Conyito ndo ta cacan tahvi ndo tacuhva cha ma sanacava ra ña vaha chi ndo nu cuatyí. Cha ndicha, cuñi añima ndo sacuvi ndo

cha vaha, soco coño ñuhu ndo vita xaan cuñi chi —catyí ra Jesús chi ra.

³⁹ Tyicuan ta cuahan ra inga chaha. Ta chican tahvi ra suri maa cha chican ra cha xihna ri. ⁴⁰ Tyicuan ta nachaa tucu ra inga chaha, nyehe ra tyi caquixí ra. Vatyí nicunyasi maa chiti nuu ra chihin cha cacuñi xaan ra cusu ra. Ta ña chitó ra ñáa cha nacahan ra chihin ra Jesús. ⁴¹ Ta chahan ra cha cu uñi chaha, ta nachaa ra, ta catyí ra:

—Vityin ndicha cusu ndo, nyitatu ndo.

Cha iyó vaha ri vityin, cha cha cuhva cha cucuhva cuenda ra chi yuhu Rayii cha quichi nya gloria ndaha ra ca iyó cuatyí. ⁴² Ndicuita ndo, cogo ndo. Cha vachi ra naxicó tuhun chii —catyí ra Jesús chi ra.

Nu catiín ra chi ra Jesús

(Mt. 26.47-56; Lc. 22.47-53; Jn. 18.2-11)

⁴³ Ni cahán ca ra Jesús ta cha ri ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuvi nuu chi tata sutu, ta ra casacuaha cuenda ley vehe ñuhu, ta cuenda ra mandoñi. ⁴⁴ Cha ni cumañi ca cachaa coyo ra, ra Judas, ra cha naxicó tuhun chi ra, chaha ra noo seña chi ra ta catyí ra:

—Ra cha tyayuhi, ican ra cuan cuví. Tiiñ vaha ndo chi ra na cuhun ra chihin ndo.

⁴⁵ Ta cuhva cha cha ra tuhva ra nu nyaá ra Jesús ta catyí ra chi ra:

—Maestro.

Ta tyayuhu ra xitín ra. ⁴⁶ Tyicuan ta catiín ra chi ra Jesús ta cuahan ra vehe caa.

⁴⁷ Soco noo ra cha nyaá yucuan tava ra mityi ra ta chahnya ra soho musu ra cuví nuu chi tata sutu. ⁴⁸ Tyicuan ta ra Jesús catyí ra chi ra cachaa coyo cuan:

—¿Atu vachi tiín ndo chii chihin mityi ta chihin yutun, tari cha vatyí cuví yuhu

noo ra suhu? ⁴⁹ Ndi quivi chinyai chihin ndo sañahi chichi vehe ñuhu cahnu cuan. Ta ni noo chaha ña tiñi ndo chii. Soco cuví chi tyehe caa vityin, tacuhva chino cava tari cuhva catyí nu tutu tuhun Nyoo —catyí ra Jesús chi ra.

⁵⁰ Tyicuan ta tandihi ra cachicá noo chihin ra, cachingo ra ta casandoo noo tuhun maa ra chi ra Jesús. ⁵¹ Soco noo ri ca ra tyivaa nyicón ra chi ra, ndichí ra noo sinduhu ta catiñi tucu ra chi ra. ⁵² Soco sandoo ra sinduhu cuan ta cuahan vavaha ra vityiaa vityi cañi ra.

**Nu cutuñi chi ra Jesús
nuu ra cuví tyiño**

(Mt. 26.57-68; Lc. 22.54-55,
63-71; Jn. 18.12-14, 19-24)

⁵³ Tyicuan ta cachinyaca ra chi ra Jesús nuu ra cuví nuu chi tata sutu, ta candu iñi ri tandihi ra chihin ra cacuví mandoñi, ta ra casacuahá cuenda ley vehe ñuhu. ⁵⁴ Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policia sanasaá ra chi ra yatyi yunuhu.

⁵⁵ Ra cacuví nuu chi tata sutu, ta tandihi ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra. ⁵⁶ Vasi cuaha ñáyivi cañan ñu cuendu siqui ra, soco ña nacachí tahan tuhun cañan ñu. ⁵⁷ Yihí ñu candicuita ñu ta catyaa ri maa ñu cuendu siqui ra, ta cacatyí ñu:

⁵⁸ —Nyuhu chiñi ndi cha cañan ra vatyi cusatani ra vehe ñuhu cahnu cha savaha ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

⁵⁹ Soco ni tyicuan caa ña nacachí tahan cha catyi ñu. ⁶⁰ Tyicuan ta ra cuví nuu chi tata sutu ndicuita ra mahñu nu nyicú tandihi ra yucuan, ta quichaha ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyí ra chi ra.

⁶¹ Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶² Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayi cha quichi nya gloria, cucunyai chiyo vaha Nyoo ra cha iyó tandihi tunyee iñi chi. Ta cunyehe ndo chii quivi quichi nu vico andivi —catyí ra chi ra.

⁶³ Tyicuan ta ra cuví nuu chi tata sutu cuan, chahnya ra sahna ra tari noo seña vatyi ña tahán iñi ra, ta catyí ra:

—¿Ñáá ca cha ndaa cuñi yo? ⁶⁴ Nyoho cha chiñi ndo vatyi chicoo cuatyí ra nuu Nyoo chihin tuhun cañan ra. ¿Yoso caa cuñi nyoho? —catyí ra.

Ta tandihi ra cacatyí ra vatyi tahán chi cúvi ra.

⁶⁵ Tyicuan ta suhva ra quichaha tyicu sii ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policia cacatu ra nuu ra.

**Nu catyí ra Pedro vatyi ña
ñoñó nuu ra chi ra Jesús**

(Mt. 26.69-75; Lc. 22.56-62;
Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta chaá noo ñaha sahá tyiño chihin ra cuví nuu chi tata sutu cuan. ⁶⁷ Ta cuhva cha nanyehé ña chi ra Pedro vatyi sanasaá ra chi ra yunuhu cuan, ndoo ña nyehé vavaha ña chi ra, ta catyí ña chi ra:

—Yoho ñandíhi, chica noun chihin ra Jesús ra ñuu Nazaret cuan —catyí ña chi ra.

⁶⁸ Soco ra Pedro tixehe ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ña.

Tyicuan ta quita ra ityi yuvehe. Tyicuan ta chacu noo loho. ⁶⁹ Tyicuan ta ñaha cha nyaá tyiño yoo cuan, nanyehe tucu ña chi ra inga chaha ta quichaha catyí ña chi ra canyicú yucuan:

—Noo ra tahan ra cuan cuví ra ihya —catyí ña.

⁷⁰ Soco tixehe ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyi noo ra yucuan cuví yoho, vatyi ra Galilea cuvún, vatyi tari cahán ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahñi Nyoo chii tatu ña ndicha cha cahín! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta nicohon iñi ra Pedro tuhun cha cahan ra Jesús chihin ra: “Cha ni cumañi ca cuacu loho uvi chaha, yoho cucatyun vatyi ña ñohó nuun chi yuhu uñi tahan chaha.” Nicohon iñi ra Pedro ta quichaha chacu chaa ra.

Nu nanyaá ra Jesús nuu ra Pilato

(Mt. 27.1-2, 11-14; Lc. 23.1-5; Jn. 18.28-38)

15 Cuhva cha cundichin candu iñin ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandíhi ra cuví tyiño ñu Israel. Ta ra Jesús nuhñi ra, chinacuhva cuenda ra chi ra chi ra Pilato. ² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuví. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siquí ra. ⁴ Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehe yoso cha cuaha cha tyaá ra sicun.

⁵ Soco ra Jesús ña nacahan maa ra. Yucuan chaha ña chitó ra Pilato ñáá cha caca xiñi ra.

Nu cutuñi chi ra Jesús vatyi cucuvi ra

(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi. ⁷ Ta ñohó noo ra nañi Barrabás vehe caa cuan, iin ri chihin inga ra cha cachahñi chi ñáyivi noo nu naquiqui ñáyivi siquí gobiernu. ⁸ Ta quichi coyo ñáyivi quichaha chican ñu chi ra Pilato na saña ra chi noo ra tari tuhvá maa ra. ⁹ Ta nacahan ra Pilato, ta catyí ra:

—¿Atu cuñi nyoho cha sañe chi Rey cuenda ñu Israel?

¹⁰ Tyicuan caa catyí ra vatyi tuví iñi ra vatyi ra cacuví nuu chi tata sutu cuan tasi cuñi ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chí ra. ¹¹ Soco ra cacuví nuu chi tata sutu cuan catyiyuhu ra chi ñáyivi na catyí ñu na saña ra chi ra Barrabás. ¹² Tyicuan ta ndaca tuhun ra Pilato chi ñu, ta catyí ra:

—¿Ta ñáá cha cuñi ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

¹³ Tyicuan ta nacanachaá ñu, ta catyí ñu:

—¡Na cúvi ra nu cruzi! —catyí ñu, canachaá ñu.

¹⁴ Ta catyí ra Pilato chi ñu:

—Soco ¿ñáá cha ña vaha sacuví ra? —catyí ra.

Soco canachaꝥ ca ñu ta catyí ñu:

—¡Na cúvi ra nu cruzi! —catyí ñu.

¹⁵ Tyicuan ta vatyí cuñí ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chahaꝥ cuenda ra chi ra vatyí cúvi ra nu cruzi.

¹⁶ Tyicuan ta chinyacꝥ sindaro chi ra nuquehe vehe tyiño cuan. Ta casandu iin ri ra tandihí sindaro. ¹⁷ Ta casacuihño ra noo sahma tyacu nyaa chi ra. Ta caquicu ra noo corona chihin iñu. Ta catyihí ra xiñi ra. ¹⁸ Yahꝥ cuan ta quichaha cacanaꝥ chaa ra siqui ra chacú nyaa ra chi ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹ Ta cacañi ra xiñi ra chihin noo yutun, ta tyicú sii ra chi ra. Ta cachicuiñi chiti ra casaha ra tyi sacahnu ra chi ra. ²⁰ Cha yahꝥ cha chacú nyaa ra chi ra tyicuan caa, tinyaꝥ ra sahma nyaa cuan chi ra, ta sandihvi noo ra sahma maa ra chi ra. Yahꝥ cuan ta cuahan ra chihin ra vatyí cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc.

23.26-43; Jn. 19.17-27)

²¹ Yahá noo ra ñuu Cirene, nañí ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiquí. Ta cuhva cha cua yaha ra ityi cuan, casaniñi sindaro chi ra na cuiso ra cruzi ra Jesús.

²² Ta cachinyacꝥ ra chi ra Jesús noo nu nañí Gólgota. Ta cuñí chi catyi: Nu Cuví Yiquí Xiñi Ndiyi. ²³ Ta cachahaꝥ ra vinu nasacꝥ chihin noo tatan cha nañí mirra coho ra. Soco ra Jesús ña chihí ra. ²⁴ Cha yahꝥ catyaaꝥ sindaro chi ra nu cruzi, cachahan ra sihva chihin sahma ra ta nya ra sahꝥ ganaa caquehen ra sahma ra.

²⁵ Caa iin cha ñaha ri catyaaꝥ ra chi ra nu cruzi. ²⁶ Ta letra cha catyaaꝥ ra xiñi cruzi cuan, catyí chi ñáá cuatyí ra. Ta catyí chi tyehhe caa: “Ícan ra ihya cuví Rey cuenda ñu ñuu Israel.” ²⁷ Ta chinyaaꝥ ra uvi ca cruzi nu chitacaꝥ ra uvi tahan ra suhu, noo ra chiyo vaha ra, ta inga ra chiyo satyin ra. ²⁸ Ta tyicuan caa quitaꝥ chi tari cuhva catyí nu tutu tuhun Nyoo tyehhe caa: “Sahá ñu tuhun tyi cuví ra noo ra quiñi iyó.” ²⁹ Ta ñu yahá coyo chacú nyaa ñu chi ra. Ta quisí xiñi ñu, ta catyí ñu chi ra:

—¡Jaan! ¡Yoho cha catyün tyi cusatanun vehe ñuhu cahnu, ta chichi cha uñi quivi cunacoñehun inga chaha! ³⁰ ¡Sacacu maun chuun ta ñoo nu cruzi chiña! —catyí ñu.

³¹ Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyí ra chi tahan ra:

—¡Chi inga ñu sacacu ra, soco ña cuví sacacu ra chi maa ra! ³² Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahan ra chi ra.

Nu chihí ra Jesús

(Mt. 27.45-56; Lc.

23.44-49; Jn. 19.28-30)

³³ Cuhva cha cua cu hora, tandihí ñuhu ñayivi nduñaa, nyacua nya caa uñi cha cha iñi. ³⁴ Ta suri cuhva cuan canachaꝥ ra Jesús chihin tandihí fuerza ra, ta catyí ra:

—Eloi, Eloi, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun sandoꝥ noo tuhun maun chii? —catyí ra.

³⁵ Suhva ra tayucu yucuan cachiñí ra ta catyí ra:

—¡Xihna! Caná chaa ra chi ra profeta Elías —catyí ra.

³⁶Tyicuan ta chinqo noo ra yucuan chiquehen ra noo tari caa xixan ta satyí ra chihin vinu iya. Ta tyaa ra noo nu yutun ta satuhva ra yuhu ra na coho ra, ta catyí ra:

—Cuatu ndo. Na nyehe yo tatu quichi ra Elías sanoo ra chi ra —catyí ra cuan.

³⁷Tyicuan ta ñihi xaana canachaa ra Jesús, ta chihí ra. ³⁸Ta sahma cha tacaá chichi vehe ñuhu cahnu ndata sava maa chi, nya siqui ta nyacua nya ityi yuvi. ³⁹Ta noo capitán cuenda sindaro Roma nanyaá ra vatyin nuu ra Jesús cuan. Cha nyehe ra yoso caa cana chaa ra, ta yoso caa chihí ra, ta catyí ra:

—Cha ndicha ndicha cuii vatyí Sehe Nyoo cuví chi ra ihya —catyí ra.

⁴⁰Ta nya sava ri tayucú tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé. ⁴¹Ican ñusihí ihya cachinyicon chi ra Jesús, ta tyinyeé ñu chi ra quivi chica noo ra ityi Galilea. Ta siin ri nyicú cuaha ca ñu cha chaq coyo chihin ra Jerusalén cuan.

Nu chicuchí ñu chi ra Jesús

(Mt. 27.57-61; Lc.

23.50-56; Jn. 19.38-42)

⁴²Cuví chi quivi cha sanduvaha ñu cha cachi ñu vatyí inga quivi tuhvá ñu nyitatu. ⁴³Ta cha cuaa cuan chaq ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihvi ra nu nyaá ra Pilato, ta chican ra coño ñuhu ra Jesús chi ra. ⁴⁴Iyo cuñí ra Pilato cha naco-to ra vatyí cha chihí ra Jesús. Ta cana ra chi capitán vatyí ndaca tuhun ra tatu cha yahá chihí ra. ⁴⁵Ta cha catyí capitán vatyí cha yahá chihí ra, ra Pilato chaha ra coño ñuhu ra chi ra José. ⁴⁶Tyicuan ta sata ra José noo sinduhu cha

chinqo chihin sahma finu cha nañi lino, ta sanoo ra coño ñuhu ra. Ta siqui noo ra chihin sinduhu cuan. Yahá cuan ta chityihí ra chi ra noo chichi ñaña cha cachatya ra chichi noo yuu. Ta chasi ra yuhu ñaña cuan chihin noo yuu cahnu. ⁴⁷Ta cu María ñaha Magdala cuan ta cu María sihi ra José, chaq coyo ñu nyehe ñu nu tyihí ra chi ra.

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

16 Yahá quivi nyitatu ñu. Tyicuan ta cu María ñaha Magdala ta cu María sihi ra Jacobo, ta cu Salomé sata ñu ndutya vixi chahán ta cuahan coyo ñu cua tyihí ñu coño ñuhu ra Jesús. ²Ta timingu cuví, quivi quichaha vitya, ñaha cuii ri cuhva cha vachi cundichin cuhva cha ni cua caña ñanyii, chaq coyo ñu nu ñaña. ³Ta catyí ñu chi tahan ñu:

—¿Yóo cha cusacanyaha yuu yuhu ñaña cuan? —catyí ñu chi tahan ñu.

⁴Soco cuhva cha nanyehe ñu, yuu cahnu cha nyasi yuhu ñaña cuan cha cuachiyó chi nya sava. ⁵Quihvi coyo ñu chichi ñaña yucuan. Ta nanyehe ñu chi noo ángel tari caa noo ra tyivaa, nyaá ra chiyo vaha. Ta ñihnó ra sahma cañi ta cuichin. Ta canayuhví ñu. ⁶Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihí nu cruzi. Soco cha nandoto ra. Ña ñohó ca ra ihya. Nyehe ndo nu chacun ra chi ra. ⁷Cuahan ndo cua sacoto ndo chi ra Pedro ta chi inga ra cachica noo chihin ra. Catyí ndo chi ra vatyí na cahun coyo ra ityi Galilea vatyí yucuan nyatú ra Jesús chi ra, tari cuhva catyí ra chi ra. Vatyí ra Jesús cha cuahan ra ityi nuu —tyicuan caa catyí ángel cuan chi ñu.

⁸Tyicuan ta cuahan coyo vavaha ñu, vatyí suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

**Nu tuvı̄ ra Jesús nuu cu
María ñaha Magdala**

(Jn. 20.11-18)

⁹Cuvı̄ chi timingu quı̄vi quichaha vı̄tya cha nandoto ra Jesús. Yahá cuan ta xihna ca nuu cu María ñaha Magdala tuvı̄ ra. Maa ña nı̄ cuvı̄ ñaha cha tava ñehe ra ucha tahan tatyı̄ ña vaha. ¹⁰Ta chahan ña chisacoto ña chi ra cachı̄ca noo chihin ra, vatı̄yı̄ canı̄cú cuihya ra ta cachacú chaa ra. ¹¹Soco cuhva cha cachı̄ñı̄ ra vatı̄yı̄ iyó ra Jesús ta vatı̄yı̄ nyehe ña chi ra, ña cachı̄no iñi ra.

**Nu tuvı̄ ra Jesús nuu uvi
tahan ra chı̄ca noo chihin ra**

(Lc. 24.13-35)

¹²Cha yahá cuan, ra Jesús tuvı̄ ra nuu uvi tahan ra cha cuahan coyo chı̄ca itı̄yı̄ itı̄yı̄ nu chı̄quı̄. Soco sı̄in caa cuhva caá ra cananyehe ra chi ra. ¹³Ta cuanuhu coyo ra ta sacoto ra chi tandı̄hi ca ra. Soco surı̄ ña cachı̄no iñi ra cha cacahan ra cuan.

**Tuhun cha chahá ra Jesús
chi ra cha tyatyı̄ño ra chi**

(Mt. 28.16-20; Lc.
24.36-49; Jn. 20.19-23)

¹⁴Ta cuee ca ta tuvı̄ ra Jesús nuu ndı̄ uchi iin ra cha cachı̄ca noo chihin ra, cha ni ri ca cha canı̄cú ra nu mesa. Ta chahan

ra chi ra cha cuenda cha ña cachı̄no iñi ra, ta cha cuenda cha candava añı̄ma ra vatı̄yı̄ ña cachı̄no iñi ra tuhun cahan ñu nyehe tyı̄ nandoto ra. ¹⁵Ta catı̄yı̄ ra chi ra:

—Cuahan ndo nicacahnu ñuhu ñayı̄vı̄, ta cahan ndo chihin tandı̄hi ñayı̄vı̄, ta catı̄yı̄ ndo chi ñu yoso caa sacacú Nyoo añı̄ma ñu. ¹⁶Ta ñu cha chinó iñi ta condı̄tya ñu, cucacu añı̄ma ñu. Soco ñu cha ña chinó iñi cundoo cuatyı̄ ñu sı̄quı̄ ñu ta cunaa ñu. ¹⁷Ta tandı̄hi seña ihya cusacuvı̄ ñu cha chinó iñi chı̄i: Chihin sı̄vi cutava ñehe ñu tatyı̄ ña vaha. Cucahan ñu inga sahan cha ña chıtó ñu. ¹⁸Cutiin ñu coo, ta tatu coho ñu cha yı̄hı̄ venenu, ma saha cuehe chi ñu. Ta sı̄in ri cutı̄yiso ñu ndaha ñu sı̄quı̄ ñu cuhvı̄, ta cunduvaha ñu.

Nu nandaá xı̄ca ra Jesús andı̄vı̄

(Lc. 24.50-53)

¹⁹Nu ndı̄hi cahan Sutu Mañı̄ yo Jesús chihin ra, ta nandaá xı̄ca ra andı̄vı̄, ta chicunı̄yaa ra chiyo vaha Nyoo. ²⁰Tyıcuan ta ra cachı̄ca noo chihin ra quıtá ra ta chahan coyo ra chicahan ra tuhun Nyoo yoso caa sacacú ra añı̄ma yo tandı̄hi ri itı̄yı̄. Surı̄ maa Sutu Mañı̄ yo tyı̄nyee chi ra vatı̄yı̄ chahá ra cha sacuvı̄ ra cuaha milagru. Ta tyıcuan caa nyehe ñayı̄vı̄ tyı̄ ndı̄cha tuhun cacahan ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

1¹⁻³ Cha chitón yoho Tata Teófilo, vatyí cha cuaha ñáyivi nducu ñu cuhva ta tyaa ñu nuu tutu tuhun cha cuví nu nyicú ndi. Tyaa ñu tari maa cuhva nacatyí ñáyivi chí yo, ñáyivi cha nyehe ta cahán tuhun ra Jesús nya quívi xihna ri. Ta vityin tahán tucu chí chí yuhu tyí sacote tuhun ra chuun. Vatyí cha yahá sacuahí ta nyehe vahi tandíhi nya nu quichahá. Ta vityin ñañi ñañi ri cuatyai tuhun ra. ⁴Vatyí coto vahun tyí ndicha cha sacoto ñáyivi chuun.

Nu sacoto noo ángel chí ra Zacarías ama cucacu ra Juan ra sacondutyá chí ñáyivi

⁵Quívi cha cuví ra Herodes rey nicahnu Judea, chiyo noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihi ra chinañi ña Elisabet. Ta vachi ñu tata ra Aarón, ra chiyo ta cha naha. ⁶Ta ñahri maa cuatyí ñu iyó nuu Nyoo. Vatyí vaha xaan quichahá ñu tuhun cahán Nyoo. Ta yori maa cuví tyaa cuatyí siqui ñu. ⁷Soco yori maa sehe ñu chicoo. Vatyí cu Elisabet, ña cuví coo sehe ña. Ta siin ri ninduví tahan ñu chahnu xaan ñu.

⁸Ta noo quívi tahan chí ityi cuenda ra Zacarías cha sacuvi ra tyiño nuu Nyoo. ⁹Tari cuhva costumbre maa tata sutu, nyehe ra nya ra tahan chí nyatu chí. Ta tahan chí nyatu chí ra Zacarías cha quíhvi ra chichi vehe ñuhu, vatyí cahmi ra cutu. ¹⁰Cha ñi ri ca cha ñohó ra chahmí ra cutu cuan, cuaha xaan ñáyivi chicán tahvi ñu ityi chata vehe. ¹¹Yucuan ta tuví noo ángel cuenda Nyoo nuu ra Zacarías. Ta chicuinanyaa ra chiyo vaha arta nu chahmí ra cutu. ¹²Ta cha

nanyehe ra Zacarías chí ángel cuan, iyo xaan cuñí ra. Ta yuhví xaan ra. ¹³Soco ángel cuan catyí ra chí ra:

—Zacarías, ma yuhvun. Vatyí Nyoo chíñí ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chí cue. ¹⁴Sií xaan cucuvi chuun. Ta cuaha xaan ñu, cusí cuñi quívi cacu cue. ¹⁵Vatyí sehun, cahnu xaan ra cucuví ra nuu Nyoo. Ma coho ra vinu ta ni ndixi. Ta ñilhi xaan cuquíhi Tatyí Ii Nyoo chí ra nyata cumañi cacu ra ta tandíhi tyembu cha coo ra. ¹⁶Ta cuaha xaan ñáyivi Israel cunyicon chí Sutú yo Nyoo cha cuenda ra. ¹⁷Ta cucoo tunyee iñi Nyoo chí ra. Ta cuquíhi xaan Tatyí Ii Nyoo chí ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chí ñáyivi chihin sehe ñu. Ta cusañaha ra chí ñáyivi quiñi iyó na quichaha ñu tuhun cahán Nyoo. Tyicuan caa cusanduvaha ra chí ñáyivi ta cuatu tuhva ñu chí Nyoo —catyí ángel chí ra Zacarías.

¹⁸Ta ndaca tuhun ra Zacarías chí ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihi cha chahnu xaan ña ñandíhi —catyí ra.

¹⁹Ta ángel cuan quichahá catyí ra:

—Yuhu Gabriel nañí. Ta chiqué tyiño Nyoo. Maa ra tachí chí vatyí cahin nuun ta sacote tuhun vaha ihya chuun. ²⁰Ta vityin nduñihun. Vatyí ña chinó iñun tuhun cahín. Ta ma cuví cahin nyacua nya chino cava tuhun cahin chuhun —catyí ángel cuan chí ra.

²¹Ta ñáyivi cha nyatú chí ra Zacarías ityi chata vehe, iyo xaan cuñí ñu ñáá tuhun cha cucuee xaan ra chichi vehe ñuhu. ²²Soco cuhva cha quitá ra Zacarías, ña cuví maa cahan ra chihin ñu. Tyicuan ta tuví iñi ñu vatyí iyó cha nyehe ra chichi vehe ñuhu cuan. Ta

quichahā cahan ra chihin ñu chihin seña ri. Vatyí ña cuví cahan ra.

²³Ta quiví cha ndihí tyiño saha ra Zacarías vehe ñuhu cuan, ta cuanuhu ra nya vehe ra. ²⁴Ta cha yahā tuhun cuan chichohon sehe ñasihí ra, cu Elisabet. Ta ña quita maa ña chata vehe cha ní ri ca cha ohon yoo. Ta chicá xiñi ña: ²⁵“Tyehe caa sacuví Sutu Mañi yuhu chihin, tacuhva ma cahan cuehe ca ñáyivi chii”, chicá xiñi ña.

Nu sacoto noo ángel chi cu María vatyí cucacu ra Jesús

²⁶Nu cu iñu yoo cha ñohó sehe cu Elisabet, tachí Nyoo chi ángel Gabriel ñuu Nazaret ityí Galilea. ²⁷Vatyí cucahan ra chihin noo ñaha tyivaa cha nañí María. Ta cha nyaña cha tandaha ña chihin noo ra nañí José. Ta ra José cuan vachi ra tata rey David. ²⁸Ta tuví ángel cuan nu nyaá ña. Ta quichahā catyí ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chí yoho nasocó xaan ca Nyoo nuu tandihí ca ñusihí —catyí ángel cuan chi ña.

²⁹Ta cuhva cha chiñi ña cha cahān ra, iyo xaan cuñi ña tuhun cahān ra. Ta ndichí xiñi ña: “¿Ñáá tuhun cha chahā ra ihya nocumi chí yo tyicuan caa?” ndichí xiñi ña.

³⁰Ta catyí ángel cuan:

—Ma yuhvun, María, vatyí ñihún tumañi iñi nuu Nyoo. ³¹Vatyí cuacohon noo sehun. Ta sacunañun Jesús chi ra. ³²Cahnu xaan ra cuacuví ra. Ta cunañi ra Sehe Nyoo ra cuví nuu. Ta Nyoo Sutu Mañi yo cusacuví ra rey chí ra. Tari cuví ra David, ra vachi ra tata. ³³Vatyí cunyaca ñaha ra chí ñáyivi Israel tandihí maa tyembu. Ta ma ndihí maa cha cunyaca ñaha ra —catyí ángel cuan chí ña.

³⁴Yucuan ta ndacā tuhun cu María chí ángel, ta catyí ña:

—¿Yoso caa cuahan tuhun ihya? Vatyí yuhu, ta coo ca yíi.

³⁵Ta nacahan ángel ta catyí ra:

—Maa Tatyí Ii Nyoo cuquichi sicun. Ta tunyee iñi Nyoo cahnu cuquichi tari noo vico ta casi chí sicun. Yucuan chaha ra ii cha cucacu cunañi ra Sehe Nyoo. ³⁶Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyí ñáyivi vatyí ña cuví maa coo sehe. Soco vityin cha ñohó sehe ña. Cha iñu yoo ñohó. ³⁷Vatyí Nyoo ñahri cha ma cuví sacuví ra —catyí ángel chí ña.

³⁸Ta quichaha catyí cu María:

—Yuhu cuví musu Sutu yo Nyoo. Na sacuví maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehe ña chí cu Elisabet

³⁹Cuví noo quiví cuan, numi xaan cuahan cu María noo ñuu ityí Judea nu maa ri maa yucu cuví. ⁴⁰Ta quihví ña chichi vehe ra Zacarías. Ta chahā ña nocumi chí cu Elisabet. ⁴¹Cuhva cha chiñi cu Elisabet tuhun cahān cu María, natyoño cha lee cha ñohó chichi ña. Ta chitu ña chihin Tatyí Ii Nyoo. ⁴²Ta chaa nacahan ña, ta catyí ña:

—Nyoo sahá ra tumañi iñi chuun cha nuu tandihí ñusihí. Ta nasocó ra chí sehun. ⁴³¿Ta yóó ñaha cuví yuhu? Vatyí quichi síhi Sutu Mañi yo quichí nyehe ña nu nyai. ⁴⁴Cuhva cha chiñi tuhun cahān, ta natyoño sehi cha ñohó chichi. Vatyí síi xaan cuví chí ra. ⁴⁵Ta síi xaan cuñi añimon vatyí chinó iñun cha cuacuví tuhun cahān Nyoo chuhun —catyí cu Elisabet.

⁴⁶Ta quichahā catyí cu María:

—Sacahní chí Nyoo chihin tandihí añime.

⁴⁷Ta síi xaan cuví chí vatyí sacacú Nyoo añime.

⁴⁸ Vatyí cuví yuhu noo ñaha ndahvi ta Nyoo tiin cuenda ra chii. Ta vityin tandíhi quívi cucatyí ñáyivi chii vatyí cahnu xaan tumañi ñi ñihí.

⁴⁹ Vatyí Nyoo, cahnu xaan cuví ra. Ta cahnu cha sacuví ra chihin. Ta ii xaan sivi ra.

⁵⁰ Ta tyicuan ri ndahvi cuñí ra chi tandíhi ñáyivi cha sahá ñáyivi chi ra.

⁵¹ Cahnu xaan cha sacuví ra chihin tunyee ñi iyó chi ra.

Sanaá ra kuhva chicá xiñi ñu cahnu sahá chi.

⁵² Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.

⁵³ Chahá Nyoo cha vaha chi ñu cuñí coto cha vaha,

ñu chitó vatyí chiñuhú Nyoo chi. Soco ñu tyayíi cha cuñí maa tyi ñahri chiñuhu chi, chihin mundaha nu ndíi ñu, sacuhún ra chi ñu.

⁵⁴ Tyinyeé ra chi ñáyivi Israel cha cuví musu ra.

Ta ña naá ñi ra chi ñu. Nyehe ndahvi ra chi ñu.

⁵⁵ Tari kuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

⁵⁶ Ta cu María ndoq ña chihin cu Elisabet uñi yoo. Ta cha yahá uñi yoo cuan ta cuanuhú ña nya vehe ña.

Quívi cacú ra Juan, ra cha sacondutyá

⁵⁷ Ta chaq quívi cha cuacacu cha lee sehe cu Elisabet. Cacú cue ta rayíi cuví cue. ⁵⁸ Ta cha chíñi ñáyivi cha nyicú yatyin yuvehe ña ta ñáyivi chi ña cha tyicuan caa, sii xaan cuví chi ñu. Ta sii xaan cuñí tucu maa ña. Vatyí vaha xaan cha sacuví Nyoo chihin ña. ⁵⁹ Ta nu cu uña quívi cha cacú cue, chahan ñu chihin cue vehe ñuhu. Vatyí kuhva cuenda

ñu chi cue chi Nyoo. Ta sahá ñu circuncidar chi cue tari kuhva iyó maa ñu. Chahnyá ñu chiin ñi cue nu cuví cue rayíi. Ta cuñí ñu sacunañi ñu Zacarías chi cue tari sutu cue. ⁶⁰ Soco sihi cue catyí ña:

—Ma cuvi. Juan, cunañi cue.

⁶¹ Ta quichaha catyí ñu:

—¿Ñáá tuhun sacunañun Juan chi cue? Yori ñáyivi chi ndo cha nañi tyicuan caa —catyí ñu.

⁶² Ta quichaha ndaca tuhun ñu chihin seña ri chi sutu cue. Vatyí coto ñu ñáá sivi cuñí ra cha cunañi cue. ⁶³ Ta chican sutu cue noo vitu, ta nuu vitu cuan tyaa ra tyehe caa: “Juan cuví sivi cue”, tyaa ra.

Ta tandíhi maa ñu cuan iyo xaan cuñí ñu tuhun cuan. ⁶⁴ Ta nacahan ra Zacarías caa kuhva ri cuan. Ta quichaha sacahnú ra chi Nyoo. ⁶⁵ Tandíhi maa ñu iyó yatyin ri yuvehe ñu, yuhví xaan ñu tuhun ihya. Ta tandíhi maa ñáyivi cha iyó yucu ityi Judea cuan nacatyí ñu chi tahan ñu tuhun ihya. ⁶⁶ Ta tandíhi maa ñáyivi cha chitó tuhun cuan, ndichí xiñi ñu, ta ndaca tuhun ñu chi tahan ñu:

—¿Yóó ra cuví cha lee cuan? —catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

⁶⁷ Sutú cue, ra Zacarías, tyitú ra chihin Tatyí Ii Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

⁶⁸ —Cahnú xaan ra cuví Sutú Mañi yo Nyoo cuenda yo ñu Israel.

Vatyí quichí ra nu nyicú yo, cha cuví yo ñáyivi chi ra.

Ta sacacú ra chi yo.

⁶⁹ Ta chahá ra noo ra cahnu chi yo, cha cusacacu chi yo.

Tata ra David ra cha sacuví tyiño nuu Nyoo vachi ra.

⁷⁰Tyicuan caa caḥan Nyoo chihin yuhu ra cacuví profeta cuenda ra ta cha naha.

⁷¹Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñí nyehé chi yo.

⁷²Tyicuan caa cundahvi cuñí nyehé ra chi ñáyivi chi yo ta cha naha.

Ta ma sanaa ra iñi ra tuhun caḥan ra.

⁷³Ican ihya tuhun caḥan Nyoo chihin ra Abraham sutu yo.

⁷⁴Catýí ra vatyí cusacacu ra chi yo ndaha ra xaan iñi chi yo.

Vatyí ma yuhvi ca yo sacahnu yo chi ra.

⁷⁵Ta maa ra sanducachi ra iyó yo nuu ra.

Ta vaha coo yo nuu ra tandihi quívi cha cuacoo yo ñáyivi —catýí ra Zacarías.

⁷⁶Ta catýí ra Zacarías chi cha lee cuan tyehé caa:

—Ta yoho sehi, profeta Nyoo cahnu cucatýí ñáyivi chuun.

Vatyí cuhun ityi nuu Sutu Mañi yo. ta cucahun tuhun ra chihin ñáyivi vatyí cha cuñí quichi ra.

⁷⁷Ta cusacoton chi ñáyivi vatyí cunasaha Nyoo tucahnu iñi cuatyí ñu.

Ta tyicuan caa ta cacu añima ñu.

⁷⁸Vatyí Sutu yo Nyoo cuñí ra chi yo. Ta cundahvi cuñí ra chi yo.

Ta saquichí ra noo ra tyinyeé chi yo. Tari noo ñuhú ñanyii cucuvi ra.

⁷⁹Vatyí chihin cha sañahá ra chi yo sacundichín ra nu nyicú yo nu ñaa iñi cha catýí cuatyí yo.

Ta cusañaha ra chi yo yoso caa quihvi yo ityi vaha —catýí ra Zacarías.

⁸⁰Ta cha luhlu cuan cuahan chahnu ra. Nyee cuñí ra chihin Tatyí Ii Nyoo. Ta chicoḡ ra noo chiqui ndii nyacua nya quívi cha chicoḡon nuu ñáyivi Israel chi ra.

Quívi cacú ra Jesús

(Mt. 1.18-25)

2 Ta quívi cuan iyó noo ra nyacá ñaha, nañí ra Augusto. Tachí ra tyiño natyaa ra sivi tandihi ñáyivi nicahnu ñuhu ñáyivi. ² Ta quívi cuan ra Cirenio cuví ra ra nyacá ñaha tandihi ñuu ityi Siria. ³ Ta tahán chi cuhun tandihi ñáyivi nya ñuu ñu. Vatyí cuhva ñu sivi ñu yucuan. ⁴ Yucuan chaha quitá ra José ñuu Nazaret ityi Galilea. Ta chahān ra ityi Judea ñuu Belén nu cacú ra David. Yucuan chahān ra vatyí tata ra David vachi ra. ⁵ Ta chahān ra chi cuhva ra sivi ra chihin cu María. Ta cha cuñí tandaha ña chihin ra. Ta ñohó sehe ña. ⁶ Ta chiquitahan chaa quívi cha cacu sehe ña cha ni ri ca cha ñohó ñu Belén cuan. ⁷ Ta yucuan cacú sehe nuu ña. Ta natyihí ña chi cue chichi sahma. Ta nandacūn ña chi cue chichi noo nu chachí quití. Vatyí cuaha xaan ñáyivi chaḡ coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

⁸ Yatyin ñuu Belén cuan nyicú suhva ra casahá cumi mbee sana ra cha cha cuaa cuan. ⁹ Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra. ¹⁰ Ta quichaha cahán ángel cuan, ta catýí ra tyehé caa:

—Ma yuhvi ndo. Vatyí cuacatyí mai noo tuhun chi ndo. Noo tuhun cha sii xaan cuacuvi chi tandihi ñáyivi. ¹¹ Vatyí vityin cacú ra sacacú añima ndo ñuu ra David. Noo ra cuví Cristo, ra cuví Sutu Mañi yo. ¹² Ta ihya cuví seña chahi chi ndo, cunyehe ndo chi cha lee cuan, siquí noo cue sahma. Catuví cue chichi noo nu chachí quití —catýí ángel chi ra casahá cumi mbee cuan.

¹³Ta caa cuhva ri cuan chaꝯ coyo cuaha xaan ca ángel casacahnú ra chi Nyoo, ta cacatyí ra:

¹⁴Sacahnu yo chi Nyoo nu nyaá ra gloria.

Ta ñáyivi iyó siqui ñuhu ñayivi cha ñihi tumañi iñi ra, na coo taxi añima ñu, catyí angel cuan.

¹⁵Yucuan ta cuanuhu coyo ángel cuan gloria. Tyicuan ta ra casahá cumi mbee quichahꝯ catyí ra chi ra tahan ra:

—Coho ndo Belén. Cunyehe yo ñáá cha cuví. Vatyí maa Sutu yo Nyoo sacoto chi yo.

¹⁶Tyicuan ta numi xaan cuahan coyo ra Belén. Ta nañihꝯ ra chi cue chihin cu María ta ra José. Ta catuví cue noo nu chachí quiti. ¹⁷Ta yahꝯ cha canyehe ra chi cue, ta canacatyí ra chi ñu ñáá ndihi tuhun cahꝯ ángel chihin ra cuenda cha lee cuan. ¹⁸Ta tandihꝯ ñu chihꝯ tuhun cahán ra, iyo xaan cuñí ñu. ¹⁹Soco cu María ta cuhva chicá ri xiñi ña tuhun cuan. ²⁰Ta ra sahá cumi chi mbee cuan cuanuhu coyo ra. Ta casacahnú ra chi Nyoo cha cuenda cha cachiñꝯ ra ta canyehe ra. Vatyí chino cava tandihꝯ cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹Ta nu cu uña quivi, sahꝯ ñu circuncidar chi cue, tari cuhva tuhva maa ñu. Ta sacunañꝯ ñu chi cue, Jesús. Suri maa sivi cha catyí ángel chi cu María quivi cha cumañi ca cohon sehe ña.

²²Ta cha yahꝯ quivi cha tahan chi vatyí ndundii ñu nuu Nyoo, tari cuhva catyí maa ley Nyoo cha tyag ra Moisés, tyicuan ta cuahan ñu Jerusalén. Vatyí cuacuhva cuenda ñu chi cue chi Nyoo.

²³Sacuví ñu tyicuan caa vatyí iin caa maa catyí ley tyehe caa: “Tandihꝯ rayii cha cuví sehe nuu ñu, cucuhva cuenda ñu chi Nyoo”, catyí ley cuan. ²⁴Ta chahꝯ ñu chichuhva cuenda ñu uvi tahan

quiti tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵Ta quivi cuan iyó noo ra ñuu Jerusalén cha nañí Simeón. Ta cuví ra noo ra vaha, ra sacahnú chi Nyoo. Ta nyatú tuhva ra nya quivi cusacacu Nyoo chi ñáyivi Israel. Ta yihí ra Tatyí Ii Nyoo.

²⁶Ta sacoto Tatyí Ii Nyoo chi ra vatyí ma cúvi ra cha ni ri ca cha ta nyehe ca ra chi ra sacacú chi ñu Israel, ra cuví Cristo, ra cha cusaquichi Sutu yo Nyoo. ²⁷Ta ra

cuan chahꝯ ra vehe ñuhu cuhva catyí maa Tatyí Ii Nyoo chi ra. Cuhva cuan chahꝯ tucu sutu ta sihi cha lee cuan chinyacꝯ ñu chi cue vehe ñuhu cahnu, vatyí sacuvi ñu tari cuhva catyí maa ley.

²⁸Ta quehen ra Simeón chi ra Jesús. Ta tyihꝯ sucun ndaha ra chi ra. Ta quichahꝯ sacahnu ra chi Nyoo. Ta catyí ra:

²⁹—Sutu Mañi yuhu. Na cúvi mai vityin chihin cha vaha.

Vatyí cha sacuvun cha catyun chi yuhu cha cuví sehun.

³⁰Vatyí cha nyehꝯ chihin nui chi ra cusacacu chi ndi.

³¹Vatyí sañahun chi ra nuu tandihꝯ ñáyivi.

³²Cha catyí ra ta cucahnu ñáyivi Israel nuu inga ñáyivi.

Ta ican ra cuví ra cha sacundichín añima tandihꝯ inga ñáyivi cha ñima ñu Israel cuví. Vatyí cusacuvi ra na cutuñi iñi ñu tuhun Nyoo —catyí ra Simeón.

³³Ta ra José chihin sihi ra Jesús, iyo xaan cuñí ñu cha cahꝯ ra Simeón tuhun cha lee cuan. ³⁴Yucuan ta chican tahvi ra Simeón chi Nyoo chaha ñu. Ta catyí ra chi cu María sihi ra Jesús:

—Nyehe chi cha lee ihya. Vatyí cuaha xaan ñáyivi cuchino iñi ñu chi ra quivi coto ñu tuhun ra, ta cucacu añima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra. ³⁵Ta

cha tyicuan caa cusanatuvi ra cha caa añima noo noo ñáyivi. Soco cha cuenda yoho, María. tari cha uhvi cha yahá sava noo tyicaa añima ñáyivi, tyicuan caa cha uhvi cunyhún cha catyi cha lee ihya —catyi ra Simeón.

³⁶ Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañi ña Ana. Ta sehe ra Fanuel noo ra vachi tata ra Aser cuví chi ña. Luhlu xaan ña ta tandaha ña, ta ucha ri cuiya chiyo ña chihin yii ña ta chihí ri ra. ³⁷ Ta cha cumi xico cumi cuiya chihí yii ña. Ta vehe ñuhu cahnu ña quitá ña, vaty ndiyaca ta ñiyaca chicán tahvi ña chi Nyoo. Ta iyó cuhva cha ña chachí ña cha ni ri ca cha chicán tahvi ña. ³⁸ Ta cuhva cha ñohó ra José ta cu María chihin cha lee, chaá ña nu canyicú ñu. Ta nacuhva ña tyahvi nyoo chi Nyoo. Ta quichaha cahan ña tuhun ra Jesús chihin tandihí ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yahá cha sacuvi ñu tandihí maa yoso caa catyi ley Sutu yo Nyoo, ta cuanuhu ñu nya Galilea nya ñuu ñu nu nañí Nazaret. ⁴⁰ Ta ra Jesús cuahan chahnu ca ra. Ta cuahan ndunye ca ra ta cuahan chicoo ca cha chiñi tuñi Nyoo. Vaty nasoco Nyoo chi ra.

Nu ñohó ra Jesús chichi vehe ñuhu

⁴¹ Ra José chihin sihi ra Jesús ndihí cuiya ri tuhva ñu chahán nya Jerusalén cha vico pascua. ⁴² Ta quivi ndihí ra Jesús uchi uvi cuiya, chahan tandihí ñu Jerusalén tari tuhva maa ñu chahán cha vico. ⁴³ Ta quivi ndihí vico ta cuandichi ñu, ta ra Jesús ndoo ra Jerusalén. Ta ña saha ñu cuenda. ⁴⁴ Cuñi maa ñu vaty cuandichi ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan ta nanducu ñu chi ra chichi nu tuvi ñáyivi cuan,

⁴⁵ ta ña nañihí ñu chi ra. Tyicuan ta cuanuhu chata ñu cuananducu ñu chi ra nya Jerusalén.

⁴⁶ Cha yahá cha uñi quivi ta nañihí ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chi ra. ⁴⁷ Ta tandihí ñu chiñí tuhun cahán ra, iyo xaan cuñi ñu chihin cha chiñi tuñi ra, ta chihin tuhun cha nacahán ra. ⁴⁸ Cuhva cha nanyehé sutu ra ta sihi ra chi ra, iyo xaan cuñi ñu. Ta sihi ra catyi ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta yuhu chica xaan iñi ndi ta nanducu xaan ndi chuun —catyi ña.

⁴⁹ Tyicuan ta catyi ra Jesús:

—¿Ñáá tuhun cha nanducu ndo chii? ¿Atu ña chito ndo vaty niñi cuñi chi cha cahin tuhun Suti chihin ñáyivi? —catyi ra.

⁵⁰ Soco ña cutuñi iñi ñu tuhun cahan ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandihí tuhun ihya chichi añima ña. ⁵² Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta sihi xaan cuví chi Nyoo chihin ra ta ñáyivi ñandihí.

Ra Juan, ra sacondutya, cahan ra tuhun Nyoo nuu ñáyivi

(Mt. 3.1-12; Mr. 1.1-8; Jn. 1.19-28)

3 Nu ndihí chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisnias nyacá ñaha ra Abilinia quivi cuan. ² Ta ra Anás chihin ra Caifás, ican ra cuví ra ra cacuví nuu chi tandihí tata sutu. Ta quivi cuan cahan Nyoo chihin ra Juan sehe

ra Zacarías noo nu chiqui ndii. ³Ta ra Juan chicá noo ra tandihi ñuu cha nyaá yatyin ri nu nyaá noo yuvi cahnu cha nañi Jordán cahán ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra. ⁴Tyehe caa cuvi tari cuhva catyí nu libra cha tyaa ra Isaías profeta Nyoo ta cha naha. Ta catyí ra:

Chinií yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo añima ndo vatyí cuaquichi Sutu Mañi yo.

Nuña ndo noo ityi ndoo chi ra na quihvi ra añima ndo.

⁵Tari cha sanandutú ndo noo ticoho, ta tari sandundaá ndo noo yucu cahnu, ta tari sandundoó ndo cha yacua, ta tari sanduvií ndo nu quiñi caa, tyicuan caa ñasama ndo cuhva iyó ndo.

⁶Tyicuan caa ta tandihi ñáyivi ta nyehe ñu vatyí Nyoo chaha ra cha cacú añima ñu.”

⁷Ta tyicuan caa cahán ra Juan chihin ñáyivi. Yucuan ta cuhva cha chinií ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—¡Nyoho tari noo tata coo xaan cuví ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo? ⁸Ñasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham. ⁹Tari yutun cha ña chahá chiti, tyicuan caa cuvi ndo. Vatyí ña sacuví ndo tari cuhva cuñi Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñi cuiri kuhun ndo nu cayu ñuhu —catyí ra Juan.

¹⁰Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñi yoho? —catyí ñu.

¹¹Ta nacahan ra Juan, ta catyí ra:

—Yóo ra cha iyó uvi tahan camisa, tahán chi cuhva ra noo chi ra cha ñahri chi. Ta yóo ñu cha iyó cha cachi, tahán chi cuhva ñu cha cachi ñu ñahri chi —catyí ra.

¹²Ta chaq coyo tucu suhva ra catavá xuhun cuando gobiernu Roma, ta cuñi ra condutya ra. Ta candaca tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

¹³Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

¹⁴Yucuan ta quichaha candaca tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí siqui ñu tatu ñahri cuatyí ñu. Ta ndo ndo vaha yoso cuhva yahvi ndo —catyí ra Juan.

¹⁵Iyo cuñi ñáyivi tuhun cahán ra Juan. Ta cuñi ñu tyi ican ra cuví Cristo, ra cha sacacú chi yo. ¹⁶Soco ra Juan catyí ra chi tandihi ñu:

—Cha ndicha vatyí sacondutyé chi ndo chihin ndutya. Soco cha yaha yuhu cuhin cuquichi inga ra cusacondutya chi ndo chihin Tatyí Ii Nyoo ta chihin ñuhu. Iyó ca tunyee iñi chi maa ra, ta ñima ca yuhu. Vatyí ña nañé cha cuví musu ra ta niri cha ndachi ñiñi xityin ndichan ra. ¹⁷Tari noo ra cha cunaquehen vaha niñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó

iñi yo chi ra cutyihí ra chi yo anyaya nu cayu ñuhú cha ma ndahva ca maa —catyí ra Juan.

¹⁸Ta tyehe caa cahan ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo. ¹⁹Ta cahan ra Juan chi ra Herodes cha cuenda tandihí cuii cha ña vaha nyacuví ra. Vatyí naquehen ra chi cu Herodías, ñasihi ra Felipe yañi ra. Ta cuaha ca cha ña vaha nyacuví ra. ²⁰Soco ra Herodes tahnán chi cha tyasohó ra tuhun ihya soco ña cuñí ra. Nu ndihí tuhun tyihí ndihí ra chi ra Juan vehe caa.

Quiví cua condutya ra Jesucristo

(Mt. 3.13-17; Mr. 1.9-11)

²¹Cumañi ca cha cohon ra Juan vehe caa sacondutya ra chi tandihí ñáyivi. Ta sacondutya tucu ra chi ra Jesús. Ta cha ni ri ca cha chicán tahvi ra Jesús chi Nyoo ta nuña andívi. ²²Ta nyehé ra Tatyí li Nyoo quichi síqui ra tari noo paloma. Ta tyacu noo ndusu andívi cha catyí tyehe caa:

—Yoho cuvún Sehi cha cuñí. Ta sii xaan cuñí chuhun —catyí ndusu cuan.

Ñáyivi vachi ra Jesucristo tata

(Mt. 1.1-17)

²³Oco uchi cuiya ra Jesús ta quichahá saha tyiño ra tyiño Nyoo. Ta tandihí ñáyivi cuñí maa ñu vatyí sehe ra José cuví chi ra. Ta ra José, sehe ra Elí cuví chi ra. ²⁴Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra. ²⁵Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra. ²⁶Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra.

Ta ra Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra. ²⁷Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra. ²⁸Ta ra Neri, sehe ra Melqui cuví chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra. ²⁹Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra. ³⁰Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra. ³¹Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra. ³²Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra. ³³Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra. ³⁴Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra. ³⁵Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta

ra Peleg, sehe ra Heber cuví chi ra. Ta ra Heber, sehe ra Sala cuví chi ra. ³⁶Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra. ³⁷Ta ra Lamec, sehe ra Matalalén cuví chi ra. Ta ra Matalalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra. ³⁸Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

Nu nducú nyehe cuihna chi ra Jesús

(Mt. 4.1-11; Mr. 1.12-13)

4 Ta chitú ra Jesús chihin Tatyí Ii Nyoo cha yahá condutya ra. Yucuan ta quitá ra nu cuví yuvi cahnu Jordán ta cuanuhu ra. Ta Tatyí Ii Nyoo chinyaca chi ra noo nu chiqui ndii. ²Yucuan chinyaa ra uvi xico quívi. Ta nducú nyehe cuihna chi ra. Ña chachi maa ra quívi cuan. Yahá cuan ta quichaha chisoco ra. ³Yucuan ta quichaha catyí cuihna chi ra:

—Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴Ta ra Jesús nacahan ra, ta catyí ra:

—Catyí tuhun Nyoo tyí ñayivi ta conyito ñu. Soco conyitó tucu aña ñu chihin tandihi tuhun cahán Nyoo —catyí ra Jesús chi cuihna.

⁵Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañahá ra tandihi nu nyacá ñaha ñayivi siqui ñuhu ñayivi.

⁶Ta cuihna catyí ra chi ra Jesús:

—Ndaha yuhu nyaá tandihi ñayivi ihya. Vatyí chahá Nyoo cha cunyaca ñahi tandihi ihya siqui ñuhu ñayivi. Ta

cuví cuhve yóó chi cuñí mai cuhve. ⁷Cuhve tandihi ñayivi cuan chuun tatu yoho ta cuñí chitun nui, ta sacahnun chii —catyí cuihna cuan chi ra Jesús.

⁸Soco ra Jesús catyí ra chi cuihna:

—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnun yo. Ta iin ri chi maa ra quichaha yo.”

⁹Yahá cuan ta quehen tucu cuihna cuan chi ra Jesús. Ta chinyaca ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú.

¹⁰Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹²Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³Ta cuihna ña cuví sandahvi ñaha ra chi ra Jesús. Ta cuahan ra suhva quívi.

Nu quichahá ra Jesús cahan ra tuhun Nyoo chihin ñayivi

(Mt. 4.12-17; Mr. 1.14-15)

¹⁴Cha yahá tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí Ii Nyoo. Ta cahán ñayivi tuhun ra tandihi ri ityi. ¹⁵Ta sañahá ra chi ñayivi nu cuví vehe ñuhu tandihi ri ñuu. Ta tandihi ñu sacahnú ñu chi ra.

Nu nyaá ra Jesús Nazaret ñuu nu chahnú ra

(Mt. 13.53-58; Mr. 6.1-6)

¹⁶Tyicuan ta nachaa ra Jesús nya Nazaret, ñuu nu chahnú ra. Ta noo quívi

nyitatu náyivi, ta quihvi ra chichi vehe ñuhu, tari tuhva maa ra. Ta chicunanyaa ra vatyí cua sacuahā ra tuhun Nyoo. ¹⁷Ta chahā ñu noo libru Nyoo chi ra cha tyaa ra Isaías ra profeta Nyoo ta cha naha. Ta cuhva cha nuñā ra, nañihī ra noo nu catyí tyehe caa. Ta quichaha sacuahā ra:

¹⁸Nyaá Tatyí Ii Nyoo chihin vatyí maa ra tachī chii.

Vatyí nacachī ra chii vatyí sañahi tuhun vaha ra chí tandīhi náyivi ndahvi.

Tachī ra chii vatyí sanduvahi chí ñu uhvi añima.

Tachī ra chii vatyí sacote tuhun ra chí ñu nyaá ndaha ra ña vaha, vatyí cusacacu Nyoo chí ñu.

Tachī ra chii vatyí sanyehi chí náyivi cuaa.

Ta sacote chí ñu nyehe tindoho vatyí cucacu ñu.

¹⁹Ta sacote chí ñu vatyí cha chaā quivi cha chahā Nyoo tumañi iñi chí ñu.

²⁰Ndihī sacuahā ra ta nacasī ra nu libru cuan. Ta nacuhvā ra chí noo ra cha nyaá vehe ñuhu cuan. Ta chicunyyā ra. Yucuan ta tandīhi náyivi cha nyicú cuan ndoo ñu nyehe ñu chí ra. ²¹Yucuan ta quichaha catyí ra chí ñu:

—Vityin quivi ihya chinō cava tuhun cha nyaá nu libru cha sacuahī nuu ndo —catyí ra Jesús chí ñu.

²²Tandīhi ñu, vaha cahán ñu tuhun ra Jesús. Ta iyo cuñí ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chí tahan ñu:

—¿Atu ñima ra ihya cuví sehe ra José?

²³Ta quichaha catyí ra Jesús chí ñu:

—Chité cha nacacá iñi ndo. Vatyí tyehe caa cua catyí ndo chii: “Tatu ra sanduvahā cuvún, sanduvaha xihna ca chí maun. Tandīhi cha chíñi ndi cha sacuvun ñuu Capernaum. Sacuvi tucu ñuu maun vityin.”

²⁴Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha náyivi ñuu ra chí ra. ²⁵Ta cha ndicha catyí chí ndo vatyí cuaha xaan ñu chihī yī chiyo Israel ihya cuiya cha chicā noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyo. ²⁶Soco ña tachī Nyoo chí ra Elías vatyí tyinyee ra chí ni noo ñu chihī yī Israel cuan. Soco tachī Nyoo chí ra nu nyaá noo ñaha chihī yī ñuu Sarepta cha nyaá yatyin ñuu Sidón.

²⁷Ta tyicuan caa tucu cuaha ra yihí cuehe cha tyahyu coño chí chiyo Israel quivi chicā noo ra Eliseo, profeta Nyoo. Soco ña nduvahā ni noo ra Israel cuiya cuan. Minoo ri ra Naamán ra ñuu Siria nduvahā —catyí ra Jesús.

²⁸Ta cha chíñi náyivi nyicú vehe ñuhu cuan tuhun cuan, cuxaan xaan tandīhi cuii ñu. ²⁹Ta nducuita ñu. Ta tññ ñu chí ra Jesús. Tavā ñu chí ra xiñi noo yucu nya yuhu ñuu, vatyí tuchi ñu chí ra yucuan. ³⁰Soco ra Jesús yahā ri ra mahñu ñu ta cuahan ra.

Noo ra cha yihí tatyí ña vaha chí

(Mr. 1.21-28)

³¹Ta cuahan ra Jesús Capernaum cha nyaa Galilea quivi nyitatu náyivi. Ta quichaha sañaha ra chí náyivi. ³²Ta iyo cuñí ñu tuhun cahán ra. Vatyí ñihi cahán ra tari noo ra iyó vaha ityi chí cha cahán.

³³Ta chichi vehe ñuhu cuan nyaá noo ra cha yihí tatyí ña vaha chí. Ta quichaha canachaa ra, ta catyí ra:

³⁴—Saña chí ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chí ndi? Yuhu, ñohó nui chuun. Ta chité vatyí Sehe Nyoo cuví chuun —catyí tatyí ña vaha cuan sacahan chí chí ra cuan.

³⁵Ta cahan ra Jesús chihin tatyí ña vaha cuan, ta catyí ra:

—Taxi ri. Saña chí ra ndahvi chiña —catyí ra.

Tyicuan ta tatyí ña vaha cuan sanduvahā chi ra cuan nu ñuhú. Ta quitā tatyí cuan chi ra ta cuahan. Ta ñahri ca sacuvi chi chi ra ndahvi cuan. ³⁶Tandihi ñáyivi nayuhvi ñu. Ta quichaha catyí ñu chi tahan ñu:

—¿Ñáá túhun cuví ihya? Ra Jesús ihya chihin cha iyó ityí chi ra ta chihin tunyee ñni ta tachi ra chi tatyí ña vaha cuan na quita. Ta quichaha chi nu cahán ra —catyí ñu.

³⁷Ta tandihi ri ityí cahán ñáyivi tuhun ra Jesús.

Nu sanduvahā ra Jesús chi maha tyiso ra Simón Pedro

(Mt. 8.14-15; Mr. 1.29-31)

³⁸Ta quitā ra Jesús chichi vehe ñuhu cuan. Ta chaq̄ ra vehe ra Simón. Ta tyiso ra Simón cuhvi ña chihin cahñi. Ta quichaha cahán ñu chihin ra Jesús cha cuenda ña. ³⁹Ta nanyehe noo ra nu catuví ña. Ta quichaha catyí ra chi cahñi cuan vatyi na quita. Ta caa cuhva ri cuan ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

Cuaha xaan ñu cuhvi sanduvahā ra Jesús

(Mt. 8.16-17; Mr. 1.32-34)

⁴⁰Ta cuhva cha quee ñanyii, tandihi maa ñu cha cumí chi ñu cuhvi tandihi nuu cuehe, chinyaca ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvahā ra chi ñu. ⁴¹Ta chichi cha tandihi ñu yihí ñu cha yihí tatyí ña vaha chi, ta quitā chi. Ta suri cana chaa chi cuahan coyo chi, ta catyí chi:

—Yoho Sehe Nyoo cuví chuun —catyí chi.

Soco ña chahā ca ra Jesús cha cahan chi. Vatyi chitó chi vatyi ra Cristo, ra cha saquichí Nyoo cuví ra.

Nu cahán ra Jesús tuhun Nyoo nuu tandihi cuii ñáyivi ñuu cha iyó Galilea

(Mr. 1.35-39)

⁴²Cundichin cuan ta quitā ra Jesús ñuu cuan. Ta cuahan ra noo nu taxi ri iyó. Soco ñáyivi nanducu ñu chi ra. Ta chaq̄ ñu nya nu ñohó ra. Ta ña cuñí ñu cha cuhan ra. ⁴³Soco catyí ra Jesús chi ñu:

—Cumañi sacote chi ñáyivi inga ñuu tuhun vaha yoso caa nyacá ñaha Nyoo aña ñu. Vatyi yucuan chaha vachi siqui ñuhu ñáyivi.

⁴⁴Ta tyicuan caa chicá noo ra Jesús cahán ra tuhun Nyoo vehe ñuhu ityí Galilea.

Nu chahā ra Jesús noo nyatu cha ñihi ra cuaha xaan tiyaca

(Mt. 4.18-22; Mr. 1.16-20)

5 Noo quivi nyaá ra Jesús yuhu miñi nu cuví Genesaret. Ta chaq̄ coyo cuaha xaan ñáyivi, vatyi cuñí ñu cuiñi ñu tuhun Nyoo. Ta tihin xaan ñohó ra Jesús mahñu ñu. ²Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyi cha quitā coyo ra catiñ tiyaca cuan. Ta cha quichaha canacatyā ra yuhva ra. ³Yucuan ta quihvi ra Jesús chichi noo canoa cuan. Ta canoa cuan chi ra Simón cuví. Ta catyí ra chi ra vatyi na tyandaha ra suhva ca cuhan nya mahñu ca cuan. Tyicuan ta chicunyaq̄ ra Jesús chichi canoa cuan. Ta quichaha sañaha ra chi ñáyivi. ⁴Cuhva cha ndihi cahan ra, catyí ra chi ra Simón:

—Sacuhun canoa nya nu cama ca ndutya cuan. Ta tuchi ndo yuhva vatyi tiñ ndo tiyaca —catyí ra Jesús chi ra.

⁵Ta nacahan ra Simón ta catyí ra:

—Maestro, cha saha tyiño xaan ndi ñiyaca maa ta ni noo tiyaca ña ñihí ndi. Soco tatu maun catyí, cuatuchi tucu ndi yuhva —catyí ra Simón.

⁶Cuhva cha cacañi ra yuhva cuan, cuaha xaan tiyaca ñihí ra. Ta nyacua tah-nyā yuhva ra chihin cha vee ti. ⁷Tyicuan ta cachahā ra seña chi ra tahan ra, ra cha canyicú chichi inga canoa cuan, na quichi coyo ra ta tyinyee ra chi ra. Yucuan ta chaā coyo ra cuan. Ta casacutu ra ninduvi canoa cuan chihin tiyaca. Ta nyacua cuñi nyee canoa cuan cha tyitu yihí tiyaca. ⁸Cha nanyehē ra Simón Pedro cha tyicuan caa, ta chicuñi chiti ra nuu ra Jesús. Ta catyí ra chi ra:

—Cuachiyo chuun nui, Sutu Mañi yuhu, vatyí yuhu ra iyó cuatyí cuví —catyí ra.

⁹Vatyí ra Simón iyo xaan cuñi ra chihin tandihi ra canyicu chihin ra. Vatyí cuaha xaan tiyaca catiñ ra. ¹⁰Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tiñ con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹Yucuan ta casacunuhu ra canoa nya ñuhu ityi. Ta casandoq ra tandihi cha iyó chi ra nyacua nya tiyaca cha tiñ ra. Ta cuahan ra chihin ra Jesús.

Nu sanduvahā ra Jesús chi noo ra tyahyu coño

(Mt. 8.1-4; Mr. 1.40-45)

¹²Noo quivi ñohó ra Jesús noo ñuu nu iyo noo ra cuhvi. Ta tyahyu xaan coño ra. Ta cha nanyehē ra chi ra Jesús, ta chicuñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñun, cuví sanduvahun chii —catyí ra.

¹³Tyicuan ta tyisoq ra Jesús ndaha ra siqui ra. Ta catyí ra:

—Cuñi sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvahā ra cuan. ¹⁴Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

¹⁵Vasi ña cuñi ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu iin ri ñu, vatyí cuñi ñu cuiñi ñu tuhun cahán ra. Ta cuñi xaan ñu nduvaha ñu. ¹⁶Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chicān tahvi ra chi Nyoo.

Nu sanduvahā ra Jesús chi noo ra cuhvi cha ña cuví nacanda

(Mt. 9.1-8; Mr. 2.1-12)

¹⁷Noo quivi sañahá ra Jesús chi ñáyivi. Ta chicunyicú suhva ra fariseo, ra quichahá xaan ley vehe ñuhu cha tyaaq ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihi ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhvi. ¹⁸Yucuan ta chaā coyo ra canyisó chihin noo chito chi noo ra ña cuví nacanda. Ta cuñi ra quihvi ra chichi vehe ta cacun ra chi ra nuu ra Jesús. ¹⁹Soco ña cuví quihvi ra vatyí tuvi xaan ñáyivi. Tyicuan ta candaā ra ityi xiñi vehe. Ta sacuachiyoq ra suhva tyiyo. Tyicuan ta sanoq ra chi ra cuhvi cuan maa maa nuu ra Jesús mahñu nu tuvi ñáyivi cuan. ²⁰Yucuan cuví nu nyehe ra Jesús vatyí cachinó xaan iñi ra chi ra. Ta quichaha catyí ra chi ra cuan:

—Xaa, cha chicoq ticahnu iñi tandihi cuatyun —catyí ra Jesús.

²¹ Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóó ra cuví ra ihya? Vatyí cuñí maa ra vatyí cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

²² Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa? ²³⁻²⁴ ¿Ñáá cha yíi ca catyí yo? ¿Atu yíi ca catyí yo: “Cuatyun cha yaha ndachi”, o yíi ca catyí yo chi noo ñáyivi: “Ndícuita ta caçon”? Soco vityin cua sañahi chi ndo vatyí iyó ityi chii cha sahi ticahnu iñi cuatyí. Vatyí yuhu Rayíi cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndícuita. Naquehen chiton ta cuanuhu nya vehun.

²⁵ Ta caa cuhva ri cuan nducuita ra cha cuhvi cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo. ²⁶ Tandíhi ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu caná ra Jesús chi ra Leví

(Mt. 9.9-13; Mr. 2.13-17)

²⁷ Yahá cuan ta quitá ra Jesús vehe cuan. Ta nanyehé ra chi noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

²⁸ Tyicuan ta nducuita ra Leví. Ta sandoq ra tandíhi cha iyó chi ra. Ta cuahan ra chata ra Jesús.

²⁹ Tyicuan ta savahá ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gob-

iernu ñuu Roma canyicú ra mesa. Ta canyicú tucu inga ñáyivi. ³⁰ Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

³¹ Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhvi, yucuan ra chiñuhú doctor chi. ³² Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí cha yaha canyaha ra chi ñu nyicón chi ra, cusavaha ñu ayuno

(Mt. 9.14-15; Mr. 2.18-20)

³³ Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quívi maa chachi ra ta chihí ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyí siñ cuñí ñu, ta cuñí ñu cachi ñu. ³⁵ Soco cuchaa quívi cuachiyo ra tandaha cuan nu nyicú ñu. Yucuan ndicha quívi, ta cusaha ñu ayunar.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Mr. 2.21-22)

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiyo

sahma chaa cuan. Ta siin ri ma cuhva chi chihin sahma chahnu cuan. ³⁷Ta tyicuan caa tucu ma cuvi tyihi ñáyivi vinu chaa chichi ñii chahnu. Vatyí cutahnya ñii cuan chihin vinu chaa cuan. Ta tivi vinu cuan ta tivi ñii chahnu cuan ñandihi. ³⁸Yucuan chaha tahán chi tyihi yo vinu chaa chichi ñii chaa. Vatyí tyicuan ta ninduvi ta saha cuenda chi tahan. ³⁹Ta yori ñu chihi vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

Tohon ra cachicá noo chihin ra Jesús yoco trigu quívi nyitatu ñáyivi

(Mt. 12.1-8; Mr. 2.23-28)

6 Noo quívi cha nyitatu ñáyivi, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan. ²Tyicuan ta catyí suhva ra fariseo chi ra:

—¿Ñáá tuhun cha sacuví ndo noo tyiño cha ña tahán chi sacuvi yo quívi nyitatu yo?

³Ta nacahan ra Jesús, ta catyí ra:

—¿Atu ta sacuaha ca ndo cha sacuvi ra David chihin ra tahan ra quívi cha chisoco ra? ⁴Quihví ra chichi vehe Nyoo. Ta quehen ra pan cha chacun ñáyivi nuu Nyoo. Ta chachí ra. Ta chaha ra chi ra candihi chihin ra. Ta maa ri maa tata sutu tahán chi cachi pan cuan —catyí ra Jesús.

⁵Yucuan ta catyí tucu ra Jesús:

—Yuhu cuví Rayíi cha quichí nya gloria. Ta iyó ityi chíi vatyí catyí chi noo noo ndo ñáá cha sacuvi ndo quívi nyitatu yo —catyí ra.

Nu sanduvahá ra Jesús chi noo ra cha ityi ndaha

(Mt. 12.9-14; Mr. 3.1-6)

⁶Inga quívi cha nyitatu ñáyivi, quíhvi ra Jesús chichi vehe ñuhu. Ta quichaha sañaha ra chi ñáyivi. Ta yucuan nanyehé ra chi noo ra cha na ityi chiyo ndaha vaha. ⁷Ta ra casacuaha cuenda ley chihin ra fariseo, canducú nyehe ra chi ra Jesús, tatu sanduvaha ra chi ra cuhví cuan quívi nyitatu ñu. Tyicuan caa ta cuvi tyaa ra cuatyí siquí ra. ⁸Soco ra Jesús chitó ra tuhun chicá xiñi ra. Ta catyí ra chi ra cha ityi ndaha cuan:

—Nducuíta. Ta cuinanyaun mahñu ihya.

Tyicuan ta ra cha ityi ndaha cuan nducuíta ra. Ta chicunanyaá ra mahñu. ⁹Tyicuan ta catyí ra Jesús chi ra canyicú cuan:

—Cua nducu tuhun noo tuhun chi ndo. ¿Yoso caa cuhva tahán chi cha sacuvi yo quívi nyitatu yo? ¿Atu tahán chi vatyí sacuvi yo cha vaha, o cha ña vaha? ¿Atu tahán chi vatyí sacacu yo chi ñáyivi, o cha cahñi ndihi yo chi ñu?

¹⁰Tyicuan ta ra Jesús nanyehé ra chi noo noo ra canyicú cuan. Ta quichaha catyí ra chi ra cuhví cuan:

—Sanacaa ndahun.

Tyicuan ta ra cuhví cuan sanacaa ra ndaha ra. Ta nduvahá ndaha ra. ¹¹Soco suhva ra canyicú cuan, cuxaán xaan ra. Ta quichahá candaca tuhun ra chi ra tahan ra:

—¿Yoso caa sacuví yo tacuhva cha ma cuvi ca cahan ra Jesús nuu ñáyivi? —ca-catyí ra.

Nacachí ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹²Quívi cuan ndaa ra Jesús noo yucu. Ta ñiyaca maa chicán tahvi ra chi Nyoo. ¹³Cuhva cha cundichin, caná ra chi

tandihi ri ñu nyicón chi ra. Ta nacachí ra uchi uvi tahan ri ra. Ta sacunañi ra chi ra, apóstol ra, ta cuñí chi catyí, ra caca tyiño nuu ra. ¹⁴Ta ihya nyaá sivi ndi uchi uvi tahan ra: Ra Simón ra cha sacunañi ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé, ¹⁵ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñí cuhun cuatyí siqui gobiernu ñuu Roma cha nyacá ñaha chi ñu. ¹⁶Ta ra Judas, yañi ra Jacobo, ta ra Judas Iscariote, ra cha naxico tuhun chi ra Jesús.

**Nu sañahá ra Jesús
chi cuaha xaan ñáyivi**

(Mt. 4.23-25)

¹⁷Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandihi ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta cha ñáyivi cuan vatyí cuiñi ñu tuhun cahán ra Jesús. Ta tandihi ñu cuhví cuñí ñu vatyí sanduvaha ra chi ñu. ¹⁸Ta tandihi ñu cha yihí tatyí ña vaha chi, nduvaha ñu saha ra. ¹⁹Ta tandihi ñu cuñí ñu tiin ñu chi ra. Vatyí nduvaha ñu chihin tun-yeé iñi Nyoo, vasi tacuhva tiin ri ñu chi ra.

**Ñu ñihí tumañi iñi, ta
ñu ña ñihí tumañi iñi**

(Mt. 5.1-12)

²⁰Tyicuan ta nanyehé ra Jesús chi ra cacticá noo chihin ra. Ta quichaha catyí ra chi ra:

—Tandihi nyoho cha ndahvi ndo, sii xaan cuví chi ndo, vatyí tahán chi cha cunyaca ñaha Nyoo ñima ndo.

²¹Tandihi nyoho cha chisocó ndo vityin, sii xaan cuví chi ndo. Vatyí coo quivi cha ma nyehe ca ndo soco. Tandihí

nyoho cha chacú chaa ndo cha cuihya iñi ndo, sii xaan cuví chi ndo vatyí coo quivi ta ñahri ca tucuihya iñi coo chi ndo. Ta cuacu ndo chihin cha sii cuñi ndo.

²²Sii xaan cucuvi chi ndo, quivi cha tasi cuñí ñáyivi nyehé ñu chi ndo, quivi tavá ñehe ñu chi ndo nu nyaá ñu, quivi cahán ñu chi ndo, quivi catyí ñu vatyí ñáyivi ña vaha cuví ndo vatyí chinó iñi ndo chi yuhu Rayii cha quichí nya gloria.

²³Sii xaan cucuvi chi ndo quivi nyehe ndo tindoho cuan vatyí tyicuan caa tucu sacuvi ñáyivi ta cha naha. Cahán vavaha ñu chi ra cacuvi profeta Nyoo. Caña ndava ndo chihin cha sii cuñí ndo. Vatyí cahnu xaan cha cucuhva Nyoo chi ndo gloria.

²⁴Soco ndahvi nyoho, ñu tyayii. Vatyí vityin sii xaan cuñí ndo chihin tandihí cha tyayii ndo. Soco coo quivi maa maa ri tundoho cunyehe ndo. Vatyí ñahri cuiñi ndo nuu Nyoo.

²⁵Ta ndahvi nyoho cha cuñí maa ndo vatyí ñahri cumañí chi ndo cha vityin, vatyí coo quivi cunyehe ndo soco. Nyoho cha sii cuñí ndo cha vityin, ndahvi nyoho vatyí coo quivi cunyehe ndo tucuihya iñi. Ta cuacu chaa ndo. ²⁶Ta ndahvi nyoho vatyí vaha cahán ñáyivi siqui ndo. Vatyí tyicuan caa tucu ñáyivi ta cha naha, vaha xaan cahán ñu siqui ra cha cahán cha ña ndicha.

Cuñi ndo chi ñu xaan iñi chi ndo

(Mt. 5.38-48; 7.12)

²⁷Tandihi nyoho cha chiñí ndo tuhun cahán, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo. ²⁸Cahan ndo cha vaha chihin ñu cha cahán ña vaha siqui ndo. Cacan tahvi ndo chaha ñu cahán chi ndo. ²⁹Tatu yóó cha cañi inchiyo nuu ndo, cuhva tucu ndo inga chiyo nacañi maa ñu. Tatu yóó cha tinyaa chaqueta ñihno ndo, cuhva ndihí ndo camiseta ndo.

³⁰ Cuhva ndo ñáá ndihi cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu. ³¹ Tari cuhva cuñí ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³² Tatu cuñí ndo chi maa ri maa ñu cha cuñí chi ndo, ñahri cha vaha xaan sacuvi ndo. Vatyí tyicuan caa nyacuví tucu ñu quiñi iyó, cuñí ñu chi ñáyivi ñohó nuu ri ñu. ³³ O tatu sacuví ndo cha vaha chihin ñu cha sacuví cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó. ³⁴ O tatu sacuví ndo tumañi ñi chi noo ñáyivi, ta yihí ñi ndo vatyí cusacuvi tucu ñu cuan tumañi ñi chi ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáá noo tumañi ñi sacuví ñu chi tahan ñu, nyatú ñu cha nacuhva tucu ñu cuan tumañi ñi chi ñu. ³⁵ Soco nyoho, cuñi ndo chi ñu xaan ñi chi ndo. Ta sacuvi ndo cha vaha chi ñu. Ta cuhva noo ndo chi ñu. Soco ma cuatu ndo ñáá tumañi ñi cunacuhva ñu chi ndo. Tyicuan ta cahnu xaan cha cuñihi ndo nuu Nyoo ta cucuvi ndo sehe vaha Nyoo cahnu. Vatyí Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó. ³⁶ Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

Ma cahan yo cha caa inga tahan yo

(Mt. 7.1-5)

³⁷ Ma cahan ndo cha caá tahan ndo, tyicuan ta Nyoo ma tiin cuenda ra cha caá maa ndo. Ma soco ndo chi ñáyivi cha cuhun ñu anyaya, tyicuan ta ma sacuhun Nyoo chi ndo anyaya. Saha ndo tucahnu ñi chi ñáyivi. Ta Nyoo cusaha ra tucahnu ñi chi maa ndo. ³⁸ Cuhva ndo cha chiñuhú chi ñáyivi. Ta tyicuan caa cuhva tucu maa Nyoo cha chiñuhú chi maa

ndo. Noo ñáyivi vaha, tatu xicó ñu ñáá cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyí tari cuhva cuhva ndo chi ñáyivi, tyicuan caa cuhva cuhva Nyoo chi ndo —catyí ra Jesús.

³⁹ Ta chahá ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyí ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñí ra, soco ma cuví sañaha ra ityi Nyoo chi nonga ra. ⁴⁰ Ni noo ra cuatyaa sicuela ma cuví coto ra cha chitó ra cha sañaha chi ra. Vatyí nicaa ni quichaha sacuahra ra. Coto ra soco nya ndihi sacuahra ra.

⁴¹ '¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahun, ta ña sahun cuenda cuatyí cahnu cha iyó chuun cha cuví tari vitu cahnu cha yihí nuu maun? ⁴² Tatu chiti nuu maun yihí noo vitu cahnu, yoso caa cuví catyun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehe vahun mihin lee cha cuvatun chiti nuu yañun.

Chihin cha sacuví ñáyivi ta nicohon nuu ri yo chi ñu tatu ñu vaha, o ñu ña vaha cuví ñu

(Mt. 7.17-20; 12.34-35)

⁴³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. ⁴⁴ Tandihí yutun nicohon nuu yo chi tun chihin chiti ri tun. Vatyí tuñiyaca, ma cuhva tun mangu. Ta ñi ri noo ñu nduhva ma cuhva tun tichaha ndivi. ⁴⁵ Ta tyicuan caa tandihí ñáyivi vaha, tuhun vaha cahán ñu. Vatyí yihí cha vaha añima ñu. Soco ñáyivi ña vaha, maa maa ri maa tuhun ña vaha cahán ñu. Vatyí yihí cha

caquiñi ñima ñu. Chihin yuhu ñu cahán ñu tandihí cha quiñi caa cha quitá ñima ñu.

Cacu ñima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu

(Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuvi ndo tari cuhva cha catyí chi ndo? ⁴⁷ Ihya cua catyí chi ndo yóó chi ndacu nyoho cha vachi ndo nu nyaí, ta tyasohó ndo cha cahín, ta sacuvi ndo cha catyí. ⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quiwi coon xaan savi, ta cama xaan ndutya yahá, ta ña nduva vehe cuan vatyí siqui yuu nanyaá chi. ⁴⁹ Soco ñu cha chiñí tuhun cahín ta ña sacuvi ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quiñi chaha vehe ra. Ta ñima nu yuu savahá ra vehe ra. Ta chaa quiwi cha coon savi. Cama xaan ndutya yaha. Ta chatya chi chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuvi ñu tari cuhva catyí, tyicuan ta cacu ñu. Soco tatu ma sacuvi ñu, ma cacu ñu) —catyí ra Jesús.

Nu sanduvahá ra Jesús noo musu capitán sindaro

(Mt. 8.5-13)

7 Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum. ² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cuví ra. ³ Quiwi cha chitó capitán cuan tuhun ra Jesús, tachí ra chi suhva ra

cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra. ⁴⁻⁵ Tyicuan ta chaa coyo ra mandoñi cuan nu nyaá ra Jesús. Ta quichaha catyí ra chi ra:

—Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví yo ñáyivi Israel. Nyacua savahá ra noo vehe ñuhu yo. Ta tahán chi vatyí tyinyeun chi ra. Vatyí cuhví xaan noo musu ra. Ta cuñí ra vatyí sanduvahun chi ra.

⁶ Tyicuan ta cuahan ra Jesús chihin ra. Soco cuhva cha cumañi ca chaa ra nya vehe capitán cuan, capitán cuan tachí ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayan-gon chuun cha cuhun nya vehe ra na. Vatyí ña naña ra cha cuhun, na. ⁷ Yucuan chaha ña caña iñi ra quichi ra nu nyaún. ¿Atu ma sahun noo tumañi iñi chi ra vatyí noo tuhun cahan run ihya ri, ta nduvaha ri musu ra, na? ⁸ Vatyí maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatyí ca cha nuu ra. Tatu tava ra tyiño chi noo ra cuatyí cuan, na cuhun ra. Cuhun ra. O tatu catyí ra chi nonga ra na quichi ra, quichi ra. O tatu tachí ra chi inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chi ra Jesús.

⁹ Cha chiñi ra Jesús cha catyí ra cuan ta iyo xaan cuñí ra. Ta nanyehe ra chi ñáyivi cha nyicú chihin ra, ta catyí ra:

—Ndicha ndicha cuwi vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaa coyo ra nya vehe, ta nanyehe ra vatyí cha nduvahá musu cuan.

**Nu sanandoto ra Jesús chi sehe
noo ñaha ndahvi chihí yíi**

¹¹ Cha yahá tuhun cuan ta cuahan ra Jesús noo ñuu cha nañí Naín. Ta cuahan tucu ra cachicá noo chihin ra, ta cuaha xaan ñáyivi ñandihí. ¹² Tyicuan ta cuhva cha cua chaa ra yatyin ñuu cuan, nanyehé ra cuaha ñáyivi quitá coyo ñuu cuan. Ta canyísó ñu noo ndiyí, cuacuchi ñu sehe noo ñaha ndahvi cha chihí yíi. Ta noo tuhun ri maa ra iyó chi ña, ta chihí ra. ¹³ Ta cha nanyehé ra Jesús chi ña, ta cundahvi cuñí nyehe ra chi ña. Ta quichaha catyi ra chi ña:

—Ma cuacun.

¹⁴ Tyicuan ta tuhva ra ta tñin ra chatun cha yihí ndiyí cuan. Tyicuan ta ra canyísó chi ndiyí cuan chicuitayucu ra. Ta catyi ra Jesús chi ndiyí cuan:

—Ndícuita, ra cuehe —catyí ra.

¹⁵ Tyicuan ta ndicuita ndiyí cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chi ra chi sihi ra. ¹⁶ Cha nanyehé ñu cha tyicuan caa ta yuhvi xaan ñu cuví. Ta quichaha sacahnu ñu chi Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chi yo —catyí ñu.

¹⁷ Ta tandihí maa ñáyivi nicahnu ityi Judea, chitó ñu cha sacuví ra Jesús.

**Nu tachí ra Juan uvi tahan ra chicá
noo chihin ra nu nyaá ra Jesús**

(Mt. 11.2-19)

¹⁸ Ta ra cachicá noo chihin ra Juan nacatyí ra tuhun cha sacuví ra Jesús. Tyicuan ta cana ra Juan chi uvi tahan ra. ¹⁹ Ta tachí ra chi ra nu nyaá ra Jesús, vatyí cundaca tuhun ra chi ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra.

²⁰ Tyicuan ta ra cha tachí ra Juan, cuahan coyo ra. Ta chaa ra nu nyaá ra Jesús. Ta quichaha catyí ra:

—Ra Juan, ra sacondutyá, tachí ra chi ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chi inga ra —catyí ra.

²¹ Ta cuhva cha canyicú ra tachí ra Juan cuan, ra Jesús sanduvaha ra cuaha xaan ñu cuhví, ta cuaha xaan ñu yihí tatyí ña vaha chi. Ta sananyehé ra chi ñu cuaa. ²² Tyicuan ta catyí ra Jesús chi ra tachí ra Juan:

—Cuahan ndo. Ta nacatyí ndo chi ra Juan tandihí cha nyehe ndo, ta tandihí cha chíñi ndo. Ta catyí ndo chi ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuíñi ra soho, yoso caa nandotó ndiyí, yoso caa cahín tuhun Nyoo chihin ñu ndahvi yoso caa sacacú ra aña ñu. Ta catyí tucu ndo chi ra vatyí ²³ sii xaan cuví chi ñu ña chicá uvi iñi nyicón chii —catyí ra Jesús chi ra.

²⁴ Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyí ra:

—¿Ñáá cha chahan ndo chinyehe ndo quiví chahan ndo chiqui ndii cuan? ¿Atu chahan ndo chinyehe ndo noo ndoo cha naquisí tatyí? ²⁵ ¿O noo ra cha ñihno sahma vaha chinyehé ndo vaha? Ñima. Vatyí chitó ndo vatyí ra ñihno sahma vaha iyó vaha ra ñayiví ta iyó ra vehe rey. ²⁶ ¿Atu ña chinyehe ndo chi noo profeta Nyoo? Ican. Ta cahnu ca ra cuví ra ican saha noo profeta. ²⁷ Ican tuhun ra Juan nyaá nuu tutu cha tyaa ra Isaías ta cha naha. Ta catyí Nyoo tuhun ra tyehe caa:

Yuhu tachí chi noo ra cahan tuhin ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quiví quichun.

²⁸ Ta catyí chi ndo vatyi chichi cha tandihí ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyí ra Jesús.

²⁹ Cha chiñi ñu tuhun ihya, tandihí ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyi cuhva sacuví Nyoo vaha xaan. ³⁰ Soco tandihí ra fariseo chihin ra sacuahá cuenda ley vehe ñuhu, maa ra cuví ra ña cuñí cha sacondutyá ra Juan chi ra, vatyi ña cuñí ra quehen ra cha chahá Nyoo. ³¹ Ta catyí ra Jesús:

—¿Ñáá chihin sandu inuu ri chi nyoho, ñu iyó quivi ihya? ¿Yóó cha tari caa caá ndo? ³² Tari ra cuatyaa cuví nyoho. Vatyi ra cuatyaa nyasiquí ndotyin nuyahvi. Ta caná chaa ndotyin chi tahan ndotyin, ta catyí ndotyin: “Tiví ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahan iñi ndo. ³³ Vatyi ra Juan ra sacondutyá, quichi ra ta ña chachí vaha ra. Ta ña chihí ra vinu. Ta nyoho catyí ndo vatyi tatyí ña vaha yihí chi ra. ³⁴ Ta quichi tucu yuhu Rayii cha quichi nya gloria. Ta chachí ta chihí. Ta nyoho catyí ndo vatyi ra cuahyi cuví ta cuví noo ra tuhvá chihí. Ta ña tahan iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo, ³⁵ soco catyí chi ndo vatyi cha chiñi tuñi Nyoo, chaha ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyi vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañí Simón nacatyí tuhun ra chi ra Jesús noo vico vehe ra. Ta chaá ra Jesús vehe ra, ta chicunyaa ra mesa. ³⁷ Tyicuan ta noo

ñaha cata iñi ñuu cuan chitó ña vatyi nyaá ra Jesús yucuan. Ta chaá ña chihin noo yutyí alabastro tyitu yihí ndutyá vixi chahán. ³⁸ Ta chicunyaa ña yatyin ri chaha ra. Ta quichaha chacu chaa ña vatyi ndu uvi iñi ña cuatyí ña. Ta quitá ndutyá nuu ña. Ta chihin ndutyá nuu ña nacatyá ña chaha ra. Yaha cuan ta sana ityi ña chaha ra chihin xixi ña. Ta tyayuhu ña chaha ra. Tyicuan ta choso ña ndutyá vixi chahán cuan siqui chaha ra. ³⁹ Cuhva cha nyehe ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóó ñaha tiñ chaha ra, vatyi ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyí chuun —catyí ra chi ra.

Tyicuan ta nacahan ra Simón:

—Vaha, catyí chii, Maestro —catyí ra.

⁴¹ Ta quichaha catyí ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu). ⁴² Ta ninduvi tahan ra ña cuví tyiyahvi ra. Ta ra tuhvá chahá noo cuan, saha ra ticahnu iñi chi ninduvi tahan ra. Ta vityin catyí chii, yoho Simón ¿nya ra cua cuñi ca chi ra cha chahá noo cuan? —catyí ra Jesús.

⁴³ Tyicuan ta nacahan ra Simón, ta catyí ra:

—Ra cha cuaha ca saha ra tucahnu iñi chi —catyí ra.

Tyicuan ta catyí ra Jesús:

—Ndicha cha cahún.

⁴⁴ Tyicuan ta nanyehe ra Jesús chi ñaha sihi cuan, ta catyí ra chi ra Simón:

—¿Nye хүн chi ñaha ihya? Yuhu quihvi chichi vehun. Ta ña chahun ndutyá cha ndoo chahi tari cuhva cos-

tumbre cha iyó chi yo. Ta ñaha ihya nacatyā ña chahi chihin ndutyā nuu ña. Ta yahā cuan, ta sana ityi ña chihin ixi xiñi ña. ⁴⁵Yoho ña tyayuhun ndahi, tari costumbre cha iyó chi yo, soco maa ña nyacua nya cuhva cha quihvi ihya ta ña sandihi ña cha tyayuhú ña chahi. ⁴⁶Ta yoho ña tyihun aceitye xiñi, soco ñaha ihya tyihí ña ndutyā vixi chahán chahi. ⁴⁷Ta catyí chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñí xaan ña chii. Ta ñu sahí tucahnu iñi chiin ri cuatyí, chiin ri cuñí ñu chii —catyí ra Jesús.

⁴⁸Tyicuan ta quichaha catyí ra Jesús chi ña:

—Cuatyun cha yahā sandachi. Vatyí cha sahá Nyoo ticahnu iñi chuun —catyí ra chi ña.

⁴⁹Tyicuan ta ra nyicú chihin ra quichaha ndichí xiñi ra: “¿Yóó ra cuví ra ihya? Vatyí sahá ra tucahnu iñi cuatyí ñáyivi.”

⁵⁰Tyicuan ta quichaha catyí ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha —catyí ra chi ña.

Ñusihí cha tyinyeé chi ra Jesús

8 Cha yahā tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñí Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra. ²Ta cuahan coyo tucu suhva ñusihí cha sanduvahā ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvahā ña. ³Ta cuahan tucu cu Juana ñasihí ra Chuza ra cuví tyiño cuenda ra Herodes, ta cu Susana chihin cuaha xaan

ca ñu cha tyinyeé chi ra chihin ñáá cha iyó chi ñu.

Nu sañahá ra Jesús vatyí tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyí ra chi ñu chihin noo cuhva:

⁵—Quitá noo ra vehe ra. Ta cuahan ra nu iyó tyiño sahá ra, vatyí cua quitá ra chiti trigu nu ñuhú ra. Ta cuhva cha quitá ra canacoyo suhva chiti cuan yuhu ityi. Ta chañi ñáyivi siqui. Ta quichi saa ta chachi ti. ⁶Ta suhva ca chiti cuan canacoyo ticu yuu. Cañā chiti cuan. Soco na ityi ri vatyí chiin xaan ñuhu yihí chaha. Ta siin ri ña cachin. ⁷Ta suhva ca chiti canacoyo chichi chiti iñu, soco quivi cañā tun iin ri, tu iñu cuan chahñi chi tun. ⁸Soco suhva ca chiti canacoyo nu ñuhú vaha ta quivi chahnu tun, vaha xaan chahā tun chiti. Vatyí noo ri chiti cuan, cientu chiti quitā chihin —catyí ra Jesús.

Ta cha yahā catyí ra tuhun cuan. Ta quichaha cana chaa ra vatyí na cuiñi ñáyivi, ta catyí ra:

—Tatu cutuñí iñi ndo, tyasoho ndo tuhun cahín —catyí ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

⁹Yahā cuan ta ra cachicá noo chihin ra, ndacā tuhun ra chi ra ñáá cha cuñí chi catyí tuhun cha nacatyí ra chi ñáyivi. ¹⁰Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihí ca ñu cuan, cuhva ri chahí chi ñu. Tacuhva nyehe ñu ta cuví chi tari cha ña

ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuiñi chi catyí tuhun ra tachí cuan

(Mt. 13.18-23; Mr. 4.13-20)

¹¹ Cuhva cha catyí chi ndo, cuiñi chi catyí tyehe caa: chiti cuan tari tuhun Nyoo cuví. ¹² Ta tari nu canacoyo chiti trigu cuan yuhu ityi, tyicuan caa cuví noo ñu chihni tuhun Nyoo. Soco quichi cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu. ¹³ Ta tari nu canacoyo chiti cuan ticu yuu, tyicuan caa tucu inga ñáyivi cha chihni tuhun Nyoo. Ta sii xaan cuví chi ñu suhva ri quivi. Soco vatyi ña yihí vaha yoho ñu, suhva ri quivi chingo iñi ñu, soco quivi cha quichaha nyehe ñu tindoho, ta sandihi ri ñu tuhun cha chinó iñi ñu. ¹⁴ Tari nu canacoyo chiti chichi iñu, tyicuan caa cuví tucu inga ñu chihni tuhun Nyoo. Chihni ñu tuhun Nyoo soco ña cuiñi ñu sacuvi ñu tari cuhva chihni ñu. Vatyi yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayhi. Ta nonga tucu ñu sii ca cuiñi ñu chica noo yanga ri ñu. Ta tari cha ña chicoo chiti nuu ñu cuví cuan. ¹⁵ Soco tari nu canacava chiti nu ñuhú vaha, tyicuan caa cuví noo ñu cha chihni tuhun Nyoo. Ta vaha añima ñu vatyi chinó iñi ñu chihin tandihi añima ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihi tuhun cahán ra.

Ma tyihi xehe yo ñuhú cha sandundichin Nyoo añima yo coto tinyaa ra

(Mr. 4.21-25)

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin. ¹⁷ Vatyi ñahri

noo cha ñohó xehe, ta cuiñu, tyi ma natuvi. Ta ni noo tuhun xehe, ta cuiñu, tyi ma quita nu ndichin ta coto yo. ¹⁸ Yucuan chaha tyasoho ndo tuhun cahín. Vatyi tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihi maa chi ndo nyacua nya cha chiin ri cha cuiñi maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹ Tyicuan ta chaq sihi ra Jesús chihin yañi ra nu nyaá ra. Soco ña cuví chaa ñu vatyi tuví xaan ñáyivi. ²⁰ Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuiñi ñu cahan ñu chuhun.

²¹ Tyicuan ta nacahan ra Jesús, ta catyí ra:

—Tandihí maa ñáyivi cha chihni ta sacuvi tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi

(Mt. 8.23-27; Mr. 4.35-41)

²² Cuví chi noo quivi cuan quihvi ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan. ²³ Ta cha ni ri ca cha cuahan ra mahñu miñi cuan, tijn ñumahna chi ra Jesús. Tyicuan ta sana iñi ra ta chaq noo tatyí ñihi vavaha. Ta quichaha tyihi chi ndutya chichi canoa cuan. Ta quichaha cuiñi nyee canoa cuan vatyi cama xaan ndutya quihvi. ²⁴ Tyicuan ta casandoyo ra chi ra Jesús. Ta quichaha catyí ra:

—¡Maestro! ¡Maestro! Cha cuñí nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyí cuan ta chi ndutya cuan, na cutaxín chi. Ta cutaxín ri. ²⁵ Tyicuan ta quichaha catyí ra chi ra cachica noo chihin ra:

—¿Ñáá tuhun yuhví ndo? ¿Atu ña chinó ñi ndo vatyi yuhu sahá cuende chi ndo? —catyí ra.

Soco ra cuan, yuhvi xaan ra. Ta iyo xaan cuñí ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyi nyacua nya tatyí ta ndutya ta quichahá tuhun cahán ra.

Nu nduvaha noo ra yihí tatyí ña vaha ñuu Gadara

(Mt. 8.28-34; Mr. 5.1-20)

²⁶ Tyicuan ta chaq coyo ra ityi Gadara cha nyaá inga chiyo miñi ityi nuu Galilea. ²⁷ Ta quitá ra chichi canoa cuan. Ta yucuan chaq noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihno maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan. ²⁸⁻²⁹ Ta tuhvá tatyí ña vaha cuan naquiquí chi ra. Ta yucuan chaha chahñí ñu ndaha ra ta chaha ra chihin cadena. Soco tatyí ña vaha cuan chahá fuerza chi ra cha cahnya ra. Ta sacono chi chi ra. Ta chinyaca chi chi ra noo nu yori maa ñáyivi iyó. Ta cuhva cha nyehe ra chi ra Jesús, chicuñi chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyi ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehé caa vatyi ra Jesús tachí ra chi tatyí ña vaha cuan, na quita chi ra ndahvi cuan. ³⁰ Ta quichaha ndaca

tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañí ndi, Legión.

Tyicuan caa catyí ra vatyi cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra. ³¹ Tyicuan ta tatyí ña vaha cuan catyí chi ra Jesús vatyi ma tuchi ra chi chi nu tindoho nu ma cuvi maa quita chi. ³² Ta chicán tatyí ña vaha cuan chi ra Jesús nacuhva ra caquihvi chi chichi quini cha canyicú yuhu miñi cuan. Tyicuan ta chaha ra Jesús permiso cha caquihvi chi chichi quini cuan. ³³ Ta quitá tatyí ña vaha cuan chi ra ndahvi cuan. Ta caquihvi chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihí ti chihin ndutya cuan.

³⁴ Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihí ri ñáyivi cha nyehe ra, ta nacatyí ra tuhun cuan. ³⁵ Tyicuan ta chaq coyo ñáyivi cua nyehe ñu ñáá cha cuví cuan. Tyicuan ta chaq ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihno ra sahma ra. Ta vaha cuñí ra. Ta yuhví xaan ñu cuví. ³⁶ Tyicuan ta tandihí ñu cha nyehe cha cuví cuan, nacatyí ñu chi tandihí ca ñáyivi yoso caa quitá tatyí ña vaha chi ra ndahvi cuan, ta nduvaha ra. ³⁷⁻³⁹ Yucuan ta tandihí ñáyivi ityi Gadara cuan quichaha catyí ñu chi ra Jesús na cunuhu ra ityi nu quichi ra. Vatyi yuhví xaan ñu chihin cha sacuví ra chihin tatyí ña vaha cuan. Tyicuan ta ra cha quitá tatyí ña vaha cuan chi, catyí ra chi ra Jesús, na cuhva ra cha cuhan ra chihin ra. Soco catyí ra Jesús chi ra:

—Cuñuhu nya vehun. Ta ñacuhva cuendon chi ñáyivi chuun ñáá cha sacuvi Nyoo chuhun —catyí ra.

Yucuan ta ra Jesús nandihvi ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihi ñáyivi ñuu cuan yoso caa sanduvaha ra Jesús chi ra.

Nu nduvaha sehe ra Jairo ta ñaha sihi cha tiñ sahma ra Jesús

(Mt. 9.18-26; Mr. 5.21-43)

⁴⁰ Quivi cha nachaꞗ ra Jesús cha chahan ra inga chiyo miñi cuan, cuaha xaan ñáyivi nyatú ñu chi ra. Ta sii xaan cuñí ñu vatyí nachaꞗ ra. ⁴¹ Tyicuan ta chaꞗ noo ra cha nañí Jairo, ra cuví nuu vehe ñuhu, ta chicuñí chiti ra nuu ra. Ta quichaha chacu ndahvi ra nuu ra, na cuhun ra vehe ra. ⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñí cúvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu. ⁴³ Ta chihin ñáyivi cuan cuahan noo ñaha cuhví. Cha iyó uchi uvi cuiya ndoho ña noo cuehe niñi. Ta cha ndihi maa xuhun ña sanaꞗ ña, ta ña nduvahá ña. ⁴⁴ Soco chaꞗ ña nu nyaá ra Jesús ityi chata ra. Ta tiñ ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús:

—¿Yóó cha tiñ sahme?

Ta tandihi ñu cuahan chihin ñu catyí ra:

—Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha tiñ sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tiñ sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhví ña. Ta chicuñí chiti ña nuu ra. Ta quichaha nacatyí ña chi ra ñáá tuhun cha tiñ ña sahma ra, ta yoso caa nduvahá ña caa cuhva ri cuan. Ta chiñí tandihi ñáyivi cuan cha nacatyí ña.

⁴⁸ Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

⁴⁹ Ni cahán ca ra Jesús tuhun ihya, ta chaꞗ noo ra quitá vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yaha chihi ña. Ma sayanga con chi Ra Sacuaha chiña —catyí ra.

⁵⁰ Soco cha chiñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaꞗ ra Jesús vehe ra Jairo, ña chaha ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihí ra, quihvi ñu chichi vehe cuan nu catuvi cuehe luhlu cha chihí cuan. ⁵² Ta tandihi ñu chacú chaa ñu cha cuenda vatyí chihí cue. Soco ra Jesús catyí ra chi ñu:

—Ma cuacu ca ndo. Vatyí ña chihí cue. Quixí cue —catyí ra.

⁵³ Soco chacú nyaa ñu tuhun cahán ra. Ta ña chinó iñi ñu. Vatyí chitó ñu tyi cha chihí cue. ⁵⁴ Tyicuan ta tiñ ra Jesús ndaha cue. Ta ñihi cahan ra ta catyí ra chi cue:

—Nducuita, cuehe luhlu —catyí ra.

⁵⁵ Tyicuan ta nandoto cue. Ta caa cuhva ri cuan nducuita cue. Ta quichaha catyí ra Jesús:

—Cuhva ndo cha cachi cue.

⁵⁶Ta sutu cue ta sihi cue, iyo xaan cuñí ñu. Soco catyí ra Jesús chi ñu vatyí yori maa chihin cahán ñu tuhun cha cuví cuan.

Nu tachí ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo

(Mt. 10.5-15; Mr. 6.7-13)

9 Sandu iin ri ra Jesús ndi uchi uvi tahan ra cachicá noo chihin ra. Ta chaha ra tunyee iñi chi ra vatyí cuví tava ra tatyí ña vaha, ta cuví sanduvaha ra chi ñu cuhví.

²Ta tachí ra tyiño chi ra vatyí na sanduvaha ra chi ñu cuhví, ta cahan ra tuhun Nyoo yoso caa nyacá ñaha ra añima ñáyivi. ³Ta catyí ra chi tandihi ra cuan:

—Ñahri cha cuisón ndo ityi cuhun ndo, ni yutun ma tuvi ndo. Ni yitín, ta ni ri cha cachi ndo ta ma cuisón ndo. Ta ni ri xuhun ta ma cuisón ndo. Tacuhva ñihnó ri ndo cuhun ndo. ⁴Ta savaha ri vehe cha chaa ndo, cunyaa ndo yucuan nyacua nya cha chaa quivi cha cuhun ndo inga ñuu. ⁵Ta nu ña cuñí ñu cuiñí ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehe caa sacuvi ndo na cuví chi tari minoo seña chi ñu, vatyí ña cuñí ñu tyasoho ñu tuhun Nyoo —catyí ra Jesús chi tandihi ra cuan.

⁶Tyicuan ta cuahan coyo ra tandihi cuii maa ñuu. Ta cahán ra tuhun vaha Nyoo ta yoso caa cuñí chi ta cacu ñu. Ta sanduvaha ra chi ñu cuhví.

Nu cuñí ra Herodes coto ra yóo ra chicá noo cahán tuhun Nyoo ta sanduvahá chi ñáyivi

(Mt. 14.1-12; Mr. 6.14-29)

⁷Ra Herodes ra cuví ra nyacá ñaha nicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyí yihí ñu catyí ñu

vatyí ra Juan, ican ra nandoto. ⁸Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto. ⁹Soco catyí ra Herodes:

—Maa mai tyihí tyiño chicahnya sucun ra Juan. ¿Tu tyicuan caa, yóo ra chiñí xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chi ra cha chicá noo cuan.

Nu chaha ra Jesús cha cachi ohon mil rayii

(Mt. 14.13-21; Mr. 6.30-44; Jn. 6.1-14)

¹⁰Ta cuhva cha nachaa coyo ra chicá tyiño nuu ra Jesús, canacatyí ra chi ra Jesús tandihi cuii maa cha cuví nu chahan coyo ra. Tyicuan ta tava siin ra Jesús chi ra ta cuahan coyo ra yatyin ri noo ñuu cha nañí Betsaida. ¹¹Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvaha ra chi ñu cuhví.

¹²Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chi ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihí cha cachi tandihi ñáyivi ihya. Ni ri cusata ndi soco ma ñihí —catyí ra.

¹⁴Vatyí ohon mil rayii nyicú yucuan. (Ta siin ri nyicú ñusihí chihin sehe ñu.)

Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihi ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehē ndaa ra andiví, ta nacuhva ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chaha ra chi ra cachicá noo chihin ra na casacha ra chi ñáyivi. ¹⁷ Tyicuan ta tandihi ñu chachi ñu. Ta chitu chichi ñu. Yahā cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chi yo

(Mt. 16.13-19; Mr. 8.27-29)

¹⁸ Noo quivi quita siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihi chicán tahvi ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutyā chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chi tandihi ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quita nu nyaá Nyoo.

Nu sacoto ra Jesús yoso caa cucahñi ñáyivi chi ra

(Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra

tuhun cuan. ²² Tyicuan ta catyí tucu ra chi ra:

—Yuhu Rayii cha quichi nya gloria cuví. Ta tahán chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chi tandihi ra:

—Tatu nya nyoho cuñi ndo cunyicon ndo chii, cahnya iñi ndo cha cuñi maa ndo sacuvi ndo, tacuhva cuví sacuvi ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahán chi cuiso ndo. ²⁴ Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyivi ndo cha catyí yuhu, cucacu añima ndo. ²⁵ ¿Ñáá cuenda quita chi ndo cha saha ganaa ndo tandihi cha iyó ñáyivi, tatu cahun añima ndo anyaya? ²⁶ Vatyí tatu cahan nuu ndo cha cahán ñáyivi chi ndo cha catyí yuhu, ta cha catyí tuhun cahín, cucahan tucu nuu mai nyehi chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutú yo Nyoo ta ángel cuenda ra. Vatyí yuhu cuví Rayii cha quichi nya gloria. ²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸ Uña quivi yahā cha catyí ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra. ²⁹ Ta cha ni ri ca cha chicán tahvi

ra Jesús, nasama cuhva caá sahma ra ta nuu ra. Tyaquí xaan cuichin nanduvi sahma ra. Ta xiño xaan. ³⁰Tyicuan ta tuvi uvi tahan ra candatuhún chihin ra, ra Moisés ta ra Elías. ³¹Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra. ³²Ta vasi cuñí xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra. ³³Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra. ³⁴Ta cha ni ri ca cha cahán ra ta quichí noo vico siquí ra. Ta yuhví xaan ra cacuví cha caquihvi ra chichi vico cuan. ³⁵Tyicuan ta chichi vico cuan chiñí ra noo ndusu cha catyí:

—Ican ra ihya cuví Sehi, ta cuñí xain chi ra. Tyásoho ndo tuhun cahán ra —catyí ndusu cuan.

³⁶Ta cha yahá cahan ndusu cuan, nanyehe ra Pedro ta ra ndihí chihin ra vatyi noo ri ca maa ra Jesús nanyaá yucuan. Ta yori maa chihin cacahan ra tuhun cha nyehé ra.

Nu sanduvahá ra Jesús chi noo ra cuehe luhlu cha yihí tatyí ña vaha chii

(Mt. 17.14-21; Mr. 9.14-29)

³⁷Ta cha inga quivi cha noo ra Jesús yucu cuan, cuaha xaan ñáyivi chisatahan chi ra. ³⁸Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi ñi chii. Nyehe ndahvi chi sehi. Vatyí noo tuhun maa ra iyó chii. ³⁹Ta yihí ndihí tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá

tiñi yuhu ra. Ta quiñi xaan nyacuví chi chihin ra. Ta ña cuñí maa tatyí ña vaha cuan saña chi ra. ⁴⁰Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹Tyicuan ta nacahan ra Jesús ta catyí ra:

—Nyoho, ñu ña chinó ñi cuví ndo. Ta ni caa ni quiñi iyó ndo. ¿Yoso ca tahan quivi cunyai chihin ndo ta cunyehe ñi tisihi ndo nyacua nya cha cutuhva ndo ta chino ñi ndo chii?

Ta catyí ra chi ra cuan:

—Nyaca chi sehun.

⁴²Ta cuhva cha cua tuhva ra cuehe cuan nu nyaá ra Jesús, ta tuchi tatyí ña vaha cuan chi cue nya sava. Soco ra Jesús tavá ra chi tatyí ña vaha cuan. Ta sanduvahá ra chi cue. Tyicuan ta nacuhvá cuenda ra chi cue chi sutu cue. ⁴³Ta tandihí ñáyivi, iyo xaan cuñí ñu cha cahnu cha sacuví Nyoo chihin ñu.

Inga chaha tucu cahan ra Jesús tuhun yoso caa cucahñi ñáyivi chi ra

(Mt. 17.22-23; Mr. 9.30-32)

Cha ni ri ca cha iyo cuñí ñáyivi cha sacuví ra Jesús, ta quichaha catyí ra chi ra cachicá noo chihin ra:

⁴⁴—Tyásoho vaha ndo tuhun cahín. Ta ma naa ñi ndo. Vatyí yuhu Rayii cha quichí nya gloria, cucuhva cuenda ñu chii ndaha ra xaan ñi chii —catyí ra Jesús.

⁴⁵Soco ra cachicá noo chihin ra ña cutuñí ñi ra ñáá tuhun cahán ra. Vatyí Nyoo ña chahá ra cha cacutuñi ñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóo ra cha cahnu ca cucuvi nu nyacá ñaha Nyoo

(Mt. 18.1-5; Mr. 9.33-37)

⁴⁶Yucuan ta ra cachicá noo chihin ra quichaha cacuvi yuhu ra tuhun nya ra

cahnu ca cuví chichi cha uchi uvi tahan ra. ⁴⁷Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu. ⁴⁸Ta quichaha catyí ra chi tandihi ra cuan:

—Tatu chihin sivi natiín cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natiín cuenda ndo. Ta tatu natiín cuenda ndo chii, chi maa Nyoo cha saquichí chii, natiín cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo

(Mr. 9.38-40)

⁴⁹Yucuan ta ra Juan catyí ra chi ra Jesús:

—Maestro, nyehe ndi chi noo ra cuan. Cahán ra sivun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰Tyicuan ta catyí ra Jesús chi ra:

—Ma casi ndo nu cahan ra. Vatyí yóo ra ña cahán chi yo, tumañi iñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹Tuvi iñi ra Jesús vatyí cha nyaña yatyin cha tahán chí cunuhu ra gloria, ta sanduní ra iñi ra. Ta quehen ra ityi ta cuahan ra Jerusalén nu cucuví ra.

⁵²Ta tachí ra tyiño na cuhun coyo ra cachicá noo chihin ra ityi nuu ca noo ñuu ityi Samaria. Vatyí canducu ra nu nyitatu ra. ⁵³Soco ñu Samaria cuan, ña cuñí ñu cha ndoo ra yucuan, vatyí tuví iñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén. ⁵⁴Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuví ra Elías? cacan yo chi Nyoo na saquichi ra ñuhu andívi siqui ñáyivi Samaria cuan, vatyí cayu ñu vatyí ña cuñí ñu cha ndoo yo ñuu ñu —catyí ra.

⁵⁵Tyicuan ta nanyehe ra Jesús chi ra. Ta cahan ra chi ra ta catyí ra:

—Taxí ri ndo. Vatyí ña cutuñi iñi ndo ñáá tyiño vachi yuhu. ⁵⁶Vatyí yuhu Rayii cha quichí nya gloria, ña vachi vatyí sanai añima ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñí quihvi cuenda ra Jesús

(Mt. 8.19-22)

⁵⁷Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñí cunyiquen chuun. Ta cuhin chuhun tandihi ri ityi cuahun —catyí ra.

⁵⁸Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii. Ñaña iyó vehe tí. Ta saa iyó taca tí. Soco yuhu Rayii cha quichí nya gloria ñahri maa nu cava xiñi iyó —catyí ra chi ra cuan.

⁵⁹Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chí suti —catyí ra.

⁶⁰Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihi maa ñu chi tahan ndiyí ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chí ñu chi Nyoo na cunyaca ñaha ra chí ñu —catyí ra.

⁶¹Tyicuan ta quichaha catyí inga ra chí ra Jesús:

—Tata, cuñí cunyiquen chuun. Soco cuhva xihna na cuhin cuahin chihin ñu vehi —catyí ra.

⁶²Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandog ra, ña yihí vaha iñi ra cha cuví cunyaca ñaha Nyoo chi ra —catyí ra Jesús chi ra.

**Nu tachí ra Jesús chi uñi
xico uchi tahan ra cucahan
tuhun Nyoo chihin ñáyivi**

10 Cha yahá tuhun cuan ta nacachí Sutú Mañi yo Jesús chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihi ñuu ta tandihi ityi nu tahán chi cahun ra Jesús. ²Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha çacan ndo chí Nyoo na saquichi ca ra musu. Vatyí tyinyee ra chí ndo cahan ndo tuhun ra chihin ñáyivi. ³Ta cuahan ndo ta nyehe ndo vatyí cua sacuhin chí ndo tari mbee mahñu lobo. Vatyí lobo tuhvá ti chachí ti chí mbee. Ta tyicuan caa cucuñi ñáyivi satasi iñi ñu chí ndo. ⁴Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun. ⁵Cuhva cha quihví ndo chichi vehe noo ñáyivi, çahan vaha ndo chihin ñu. Ta çatyí ndo, na coo cha vaha añima ñu. ⁶Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu. ⁷Ta ndog ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, çoho ndo yucuan. Vatyí ra sahá tyiño, iyó ityi chí ra cha cachi ra cha sahá ganaa ra. Hin ri maa vehe cuan cunyaa ndo nyacua nya cha chaa chí quívi cha cahun ndo inga ñuu. ⁸Ta nu chaa ndo noo ñuu ta

vaha cahan ñu chihin ndo, çachi ndo ta çoho ndo tandihi cha cuhva ñu chí ndo. ⁹Ta sanduvaha ndo chí ñu cuhví ñuu cuan. Ta çatyí ndo chí ñu: “Cha nyaña yatyin Nyoo ra cunyaca ñaha añima ndo.” ¹⁰Soco tatu chaa ndo noo ñuu ta ña cuñí ñu tyasoho ñu tuhun cahan ndo, quíta ndo ityi cahnu. Ta çatyí ndo chí ñu: ¹¹“Nyacua nya ñiyaca ñuu ndo cha iñi chaha ndi, ta cunaquisi ndi. Vatyí tari noo seña vatyí ndoo cuatyí ndo siquí ndo. Vatyí Nyoo nyaña yatyin ra chí ndo ta ña tyasohog ndo tuhun cahan ra yoso caa cuñí ra cunyaca ñaha ra añima ndo.” Tyicuan caa çatyí ndo chí ñu —catyí ra Jesús chí ra nyicón chí ra.

¹²Ta quichaha catyí tucu ra chí ra:

—Quívi tachi tuñi Nyoo chí ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyo ta chana ñuu Sodoma, ñu chihí cha catyí cuatyí ñu —catyí ra Jesús.

**Ñáyivi ña tyasohó tuhun cahan ra
Jesús cunyehe ñu tundoho**

(Mt. 11.20-24)

¹³Ta catyí ra:

—¡Ndahvi nyoho, ñáyivi ñuu Corazín! Ta ¡ndahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaq Nyoo ta cha naha cha cuenda cuatyí ñu, ñahri nyatu cahnu nyehé ñu. Soco tyehe ta nyehé ñu quívi cuan cha nyehé nyoho vityin, tañi tyehe ri ndihví noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ¹⁴Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chí ndo ican saha ñáyivi Tiro ta ñáyivi Sidón cuan. ¹⁵Ta nyoho ñu ñuu Capernaum, cuñí maa ndo vatyí cundaa ndo nyacua nya andívi. Soco cunoo ndo

nyacua nya anyaya, vatyí ña quichahá ndo tuhun Nyoo —catyí ra Jesús.

¹⁶Ta catyí ra chí ndí uñi xico uchi tahan ra cuan:

—Ñáyivi cha tyasohó tuhun cahán nyoho, tuhun cahán yuhu tyasohó ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichí chii, ña quichahá ñu cuví cuan —catyí ra Jesús chí tandíhi ra.

Nu nachaa coyo ndí uñi xico uchi tahan ra cha chichahan tuhun Nyoo

¹⁷Yucuan cuví nu nachaa coyo ndí uñi xico uchi ra cha chichahan tuhun Nyoo chihin ñáyivi. Ta sii xaan cacuví chi ra. Ta cacatyí ra chí ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyí ra.

¹⁸Tyicuan ta catyí ra Jesús chí ra:

—Ay, yuhu nyehi andívi nu cana cava cuihna, ra nañi Satanás. Tari noo tacha, tyicuan caa cana cava ra. ¹⁹Ta yuhu, chahi fuerza chí ndo vatyí cuví chasaha ndo chí ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuví chi ndo. ²⁰Soco ma sii xaan cuví chí ndo vatyí cuví tava ñehe ndo tatyí ña vaha cuan. Sii ca cuví chí ndo vatyí nyaá sivi ndo nu libru Nyoo —catyí ra Jesús.

Nu sacahnú ra Jesús chí Nyoo vatyí sii cuñí ra vatyí sañahá Nyoo tuhun vaha chí ñu ndahvi

(Mt. 11.25-27; 13.16-17)

²¹Cuhva cuan sii xaan cuñí ra Jesús sahá Tatyí Ii Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andívi ta ñuhu ñáyivi. Vatyí maun sañahún tuhun maun chí ñu ndahvi ihya. Ta ña sañahún chí ra chitó ta ra cha chiñi tuñi. Tyicuan caa

Sutu Mañi yuhu vatyí tyicuan caa cuhva cuñún —catyí ra Jesús.

²²Ta catyí ra Jesús chí tandíhi ra sacuví tyiño nuu ra:

—Tandíhi maa tuhun cuan chaha Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chí Suti, noo tuhun ri mai ñohó nui chí ra. Ta chí ñáyivi cuñí mai sacote tuhun ra, chí ñu cuan cusacote —catyí ra.

²³Tyicuan ta nanyehé ra chí ra cachicá noo chihin ra. Ta catyí ra chí ra:

—Sii xaan cuñí nyoho ta ñáyivi cha iyó vityin vatyí nyehé ndo cha sacuví.

²⁴Vatyí cuaha xaan rey ta ra profeta Nyoo ta cha naha cuñi ra nyehe ra cha nyehé nyoho vityin. Soco ña nyehe ra. Ta cuñí ra cuñi ra tuhun cha chiñi nyoho vityin. Soco ña chiñi ra —catyí ra Jesús.

Nu sañaha ra Jesús chí yo vatyí tahan chí tyinyee yo chí ñáyivi savaha ri

²⁵Tyicuan ta cha noo ra sacuahá cuenda ley vehe ñuhu. Ta quichaha ndaca tuhun ra chí ra Jesús, Vatyí nducu nyehe ra chí ra. Ta catyí ra:

—Maestro, ¿yoso caa cunyacuví ta cuhin nu coi noo ñáyivi cha ma naa ca maa?

²⁶Tyicuan ta nacahan ra Jesús, ta catyí ra:

—¿Ñáa catyí nu ley? ¿Yoso caa tuhun cha sacuahún?

²⁷Tyicuan ta nacahan ra sacuahá cuenda ley cuan ta catyí ra:

—Catyí ley, cuñi yo chí Nyoo chihin tandíhi aña yo ta chihin cha ñi iñi yo, ta chihin tandíhi fuerza yo, ta chihin cha tandíhi cha chiñi tuñi xiñi yo. Ta cuñi yo chí ñáyivi tahan yo tari cha cuñi yo chí maa yo. Tyicuan caa catyí chí —catyí ra cuan.

²⁸Tyicuan ta catyí ra Jesús chí ra:

—Ndicha cha cahún. Tyicuan caa sacuvun ta cacu añimon ta coun ñayivi cha ma naa ca maa —catyí ra Jesús.

²⁹Soco ra sacuahā cuenda ley cuan cuñi ra savaha ra chi ra, ta quichaha catyi tucu ra chi ra Jesús:

—¿Yóo cha cuví ñáyivi tahin? —catyí ra.

³⁰Tyicuan ta nacahan ra Jesús, ta catyí ra:

—Noo ra quitā ra Jerusalén ta cuahan ra nya ñuu Jericó. Ta tahañ ra chi ra suhu. Ta suhu ra tandihi cuui maa cha nyiso ra, nyacua nya sahma ra. Ta cañi ra chi ra nyacua chacun taxin ra chi ra. Ta sandoo maa ra chi ra yucuan. ³¹Tyicuan ta yaha noo tata sutu ityi cuan. Soco cuhva cha nanyehē ra chi ra catuví cuan nya sava ri yaha ra. ³²Tyicuan ta yaha tucu nonga ra cha yihí cuenda vehe ñuhu, cha nañi levita. Soco cha nanyehē ra chi ra catuví cuan suri nya sava ri yaha ra. ³³Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehē ra chi ra catuví yucuan, ta quichi nundahvi cuñi ra nyehe ra chi ra. ³⁴Ta tuhva ra nu catuví ra, ta quichaha saha ra tatan chi ra. Ta tyihí ra aceitye ta vinu nu cahvi chi ra. Ta sahvi ra noo sahma chata ra. Yaha cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra. ³⁵Ta cha inga quivi cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhvon cha cachi ra. Ta saton tatan chi ra na nduvaha ri ra. Tatu cuñi ca chi xuhun, tyiyahvi mai chuun nandichi”, catyí ra. Yucuan ta cuahan ra —catyí ra Jesús.

³⁶Nu ndihí nacatyí ra Jesús tuhun ihya, quichaha ndaca tuhun ra chi ra sacuahā cuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷Tyicuan ta quichaha catyi ra sacuahā cuan:

—Ra cha cundahvi cuñi chi ra —catyí ra.

Tyicuan ta quichaha catyi ra Jesús:

—Cuahan ta sacuvi tucu yoho tyicuan caa chihin ñáyivi cha iyó tundoho chii —catyí ra.

Nu chinyaa ra Jesús vehe cu Marta chihin cu María

³⁸Ta quehen ra Jesús ityi cuahan ra. Ta chaā ra noo ñuu. Ta yucuan iyó noo ñaha cha nañi Marta. Ta chaā ra vehe ña.

³⁹Ta cu Marta iyó noo cuhu ña cha nañi María. Ta cu María chicunyaā ña yatyin ri chaha ra Jesús, vatyi cuiñi ña tuhun cahán ra. ⁴⁰Soco cu Marta cuaha xaan tyiño nyaá sacuvi ña. Ta chaā ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyi cuhi sandoó maa ña chii chihin tyiño? Catyi chi ña na tyinyee ña chii —catyí ña chi ra.

⁴¹Soco ra Jesús catyí ra chi ña:

—Marta, Marta, chicá xaan xiñun ta cutyiño xaan cuñún chihin tyiño chiña.

⁴²Soco iyó noo tuhun cha tahán chi caca xiñi yo. Ta cu María ihya nacachi ña tyiño vaha ca sacuvi ña cha tyasohó ña tuhun cahín. Ta yuhu ma cuví tinyai chi ña —catyí ra Jesús chi cu Marta.

Nu sañahā ra Jesús chi ra cachicá noo chihin ra yoso caa cacān tahvi ra chi Nyoo

(Mt. 6.9-15; 7.7-11)

11 Cuví noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacan tahvi ndi chi Nyoo. Tari sañaha ra Juan chi ra chica noo chihin ra —catyí ra.

²Tyicuan ta catyí ra Jesús chi ra:

—Cua cuhve cuhva chi ndo yoso caa.

Tyehe caa cacan tahvi ndo:

Sutu Mañi yuhu, yoho cha nyaun andivi.

Sacahnu xaan ndi chuun.

Na quichi quivi cha nyaca ñahun ihya siqui ñuhu ñayivi.

Na sacuvi ñayivi ihya siqui ñuhu ñayivi tandihi cuhva cuñi maun, tari cuhva cuví gloria.

³Cuhva cha cachi ndi tacuhva yoso cuhva yaha ndi noo noo quivi.

⁴Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacan tahvi ndo —catyí ra Jesús.

⁵Ta catyí tucu ra ñandihí:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi iñi chii, cuhva noo uñi tahan pan chii.

⁶Vatyí noo ra tahin nichaa ra vehi. Ta cañi xaan quichi ra. Ta ñahri maa cha iyó chii cuhve chi ra.” ⁷Ta yoho cunacahun ta catyun chi ra: “Ma sayangon chii, ndee. Vatyí nyasí yuvehi. Ta niquixi chihin sehi. Ta ña cuvi nducuite ta cuhve cha cuhve chuun cha vityin.” Tyicuan caa cucatyun chi ra.

⁸Ta catyí yuhu chuun. Vasi ra tahun cuví chi ra, ma nducuiton ta cuhvon chi ra cha numi ri. Soco tatu ndoo ra yucuan, ta ma cundihñi ra cacan ra chuun, sacachan ra yuvehun ta cana chaa ra chuun tacuhva cha ma cuvi cusun, ta cundihñun cha sacachan ra yuvehun, tyicuan ta nducuiton ta cuhvon chi ra, tacuhva cha ma sayanga ca ra chuun. ⁹Ta tyicuan caa tucu nyoho, cacan ndo chi Nyoo. Ta cuhva ra chi ndo.

Nanducu ndo ta ñihi ndo. Sacachan ndo yuvehe ta nuña. ¹⁰Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuvehe, nuña yuvehe.

¹¹Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyin pan. Ta ña tuhvá ndo chaha ndo noo coo chi sehe ndo, tatu chicán ndotyin tiyaca. ¹²Ta ña tuhvá ndo chaha ndo noo tishuma chi sehe ndo tatu chicán ndotyin ndivi cachi ndotyin. ¹³Nyoho cha quini iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andivi, cuaha ca cha vaha cuhva ra chi ndo tatu cacan ndo chi ra. Ta cuhva ra Tatyí Ii ra cunyaa añima ndo.

**Ra xaan iñi chi ra Jesús catyí ra
vatyí chihin fuerza
cuihna sacuvi ra milagru**

(Mt. 12.22-30; Mr. 3.20-27)

¹⁴Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quita tatyí ña vaha cuan chi ra ñihi cuan, nacahan ra. Tyicuan ta ñayivi, iyo xaan cuñi ñu. ¹⁵Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

¹⁶Ta yihí ñu cuñi ñu nducu nyehe ñu chi ra, ta chican ñu chi ra Jesús na savaha ra noo seña chi ñu chihin tunyee iñi Nyoo. ¹⁷Soco ra Jesús chitó ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihí tuhun cha cunyaca ñaha ra. Tatu noo vehe ta cacusiin ñu chihin tahan ñu, cutivi nu nyicú ñu. ¹⁸Ta tyicuan caa tucu cuihna. Tatu tandihí ra cacusiin ra chihin tahan ra cundihí fuerza cha iyó chi ra. Ta ihya catyí chi

ndo tyehe caa vatyi nyoho catyí ndo vatyi chihin fuerza ra Beelzebú tavé tatyí ña vaha. ¹⁹Soco tyehe ta tavé tatyí ña vaha tari cuhva catyí ndo, ndaça tuhun ndo chi ra nyicú chihin ndo yóo chi fuerza tavá maa ra tatyí ña vaha. Maa ra sacoto ra chi ndo cha ndicha vatyi nyoho tondo ri chicá xiñi ndo. ²⁰Soco catyí chi ndo vatyi yuhu tave tatyí ña vaha chihin fuerza Nyoo. Ta cuñi chi catyí cuan vatyi ndicha cuii Nyoo ra nyacá ñaha añima ñáyivi cha chaḡ ra nu nyicú ndo.

Nu sañahá ra Jesús vatyi ñihi ca fuerza Nyoo ta ñima ca fuerza cuihna

²¹Tatu noo ra iyó vavaha fuerza chi ra ta nyisó ra mityi ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu. ²²Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuvi chasaha ra chi ra, tyicuan ta tinyaa ra ndaha tyiño ra, ta sacha ra chi ra tahan ra. ²³Ñáyivi ña sahá tyiño chihin, sativí ñu tyiño sahí. Ta ñu ña tyinyeé chii cha cahán ñu tuhun Nyoo chihin ñáyivi, cuñi chi catyí vatyi ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo

(Mt. 12.43-45)

²⁴Tatu noo tatyí ña vaha quitḡ chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichi xiñi chi: “Cunuhu tiqui nya vehi nu quite.” ²⁵Yucuan ta nachaa chi añima nu quitḡ chi. Ta nanyehe chi vatyi ndii xaan ta vii xaan. ²⁶Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta iin ri quihvi tandihi chi añima ñu cuan. Yucuan chaha yaha

ca cuhva nanduvi ñu ican saha cha cuvi maa ñu —catyí ra Jesús.

Ñu cha ndicha iyó vaha ñayivi

²⁷Cha ni ri ca cha cahán ra Jesús tuhun cuan, ta canḡ chaa noo ñaha cha ñohó mahñu ñáyivi cuan. Ta quichaha catyí ña:

—Ñana cha sii cuví chi ñaha cha sacacu chuun ñaha cha chahḡ caxun —catyí ña.

²⁸Soco ra Jesús catyí ra:

—Sii ca cuñi ñu cha chiñi tuhun cahán Nyoo ta quichahá ñu —catyí ra.

Ñáyivi ña vaha, maa ri maa nyatu cahnu cuñi ñu nyehe ñu

(Mt. 12.38-42; Mr. 8.12)

²⁹Tyicuan ta chaḡ coyo ñáyivi nu nyaá ra Jesús. Ta quichaha catyí ra chi ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñi ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas.

³⁰Tari ra Jonás cuví ra seña chi ñáyivi ñuu Nínive ta cha naha, tyicuan caa tucu yuhu Rayii cha quichi nya gloria, cuví tari noo seña chi ñáyivi cha iyó vityin.

³¹Quivi tachi tuñi Nyoo chi ñáyivi cunandoto ñaha cuví reina ityi sur ta cha naha, ta cucatyí ña vatyi cahun ndo anyaya, vatyi maa ña vasi cañi ñuu ña, soco quichí ña, quichí tyasoho ña tuhun cha chiñi tuñi cahḡ ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón. ³²Ta quivi cutuñi chi tandihi ñáyivi, cunducuita ñu chiyo ñuu Nínive ta cha naha, ta cucatyí ñu vatyi nyoho ñu cha iyó vityin cahun ndo anyaya, vatyi maa ñu ñu Nínive, canasama ñu cuhva iyó ñu quivi cahḡ ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

**Nu sañaha ra Jesús vatyí na saha yo
cuenda añima yo coto vaha
ñahri cha ndichin Nyoo nyaá**

(Mt. 5.15; 6.22-23)

³³Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyí ñuhu cuan tahán chi coso minoo nu sucun. Tacuhva quihvi ñáyivi vehe ndo, soco ndichin. ³⁴Chiti nuu ndo noo cha sandichin chi ndo cuví. Ta tyicuan caa tucu añima ndo, tatu iyó cha ndichin Nyoo añima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá Nyoo. ³⁵Yucuan chaha saha ndo cuenda añima ndo. Tatu nyaá cha ndichin Nyoo chihin ndo, o nyaá cha ñaa iñi. ³⁶Tatu tyitu añima ndo chihin cha ndichin Nyoo ñahri ca maa noo nu ñaa iñi iyó chi ndo, vatyí sandichin chi tandihi ndo. Tari cha nyaá noo lámpara sacatá chi ñuhu chi ndo cuví cuan —catyí ra Jesús.

**Cahán ra Jesús chi ra casacuaha
cuenda ley vehe ñuhu ta chi ra
fariseo, ra caquichaha xaan ley cuan**

(Mt. 23.1-36; Mr.
12.38-40; Lc. 20.45-47)

³⁷Cuhva cha ndihí cahan ra Jesús nuu ñáyivi, noo ra fariseo, ra quichaha xaan ley vehe ñuhu, catyí ra chi ra Jesús, vatyí na cuhun ra cucachi ra nya vehe ra. Ta chaa ra Jesús vehe ra. Ta quihvi ra chicun yaa ra mesa.

³⁸Tyicuan ta ra fariseo cuan iyo cuñí ra vatyí ña nacatyá ra Jesús ndaha ra, tari cuhva costumbre maa ñu cha cumañi cachi ñu. ³⁹Soco ra Jesús catyí ra chi ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyí ña nacatyá ndo. Tyicuan caa nyoho. Vatyí cuñí ñáyivi vatyí vaha ñáyivi cuví ndo.

Soco xehe ri suhu ndo ta ña sacuví ndo cha vaha. ⁴⁰Ndava xaan iñi ndo. ¿Atu ña chitó ndo vatyí ra cha savahá ityi chata vaso, suri maa ra savahá ityi chichi? Vatyí tari vaso cuví ndo. ⁴¹Tahán chi sahá ndo tumañi iñi chi ñáyivi, ta tyinyee ndo chi ñu. Sacuví ndo cha vaha chihin ñu, tyicuan ta nduvii tucu ityi chichi ndo.

⁴²¡Ndahvi nyoho ra fariseo! Vatyí nyoho vasi vaha chaha ndo diesmo chi Nyoo cuenda yucu cha nañi menta ta ruda ta ñáá ndihi ca yucu cha tachí ndo, soco ña quichahá ndo cuhva cha vaha cha cuñí Nyoo sacuví yo, ta cha cuñí yo chi ra. Ta ican ihya cuví cha tahán chi sacuví ndo, soco ma sandihi ndo cha cuhva ndo diesmo ñandihí. ⁴³¡Ndahvi nyoho cha cuví ndo fariseo! vatyí cuñí ndo cunyaa ndo nu tyayu vaha ca chichi vehe ñuhu. Ta cuñí ndo cha saha ñáyivi ñáyivi chi ndo nuyahvi. ⁴⁴¡Ndahvi nyoho ra sacuaha cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndiyi cha ña quetuví. Vatyí yahá ñáyivi siqui soco ña chitó ñu ñáá cha ñohó chichi ñaña cuan. Vatyí ñahri seña catuví nu yihí ndiyi cuan. Cuñí maa ñu vatyí vaha ndo, soco ña chitó ñu vatyí ña vaha añima ndo —catyí ra Jesús.

⁴⁵Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chi nyuhu —catyí ra.

⁴⁶Tyicuan ta quichaha catyí ra Jesús chi ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducuaha ca ndo ley cha tachí Nyoo ta chana. Ta ña tahán chi. Ta yori ndoyó carga cuan, ta saniñi ndo na sacuví ñu ta ni maa ndo ni chiin ña tyinyee ndo chi ñáyivi. ⁴⁷¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu

ndo ta cha naha. ⁴⁸ Chihin cuan cuñí chi catyi vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña ra. ⁴⁹ Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra. ⁵⁰ Ta ndicha tyicuan caa sacuvi ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chinõ ñuhu ñayivi ta nyacua nya vityin. ⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu yatyin nu nyaa arta. Yucuan chaha catyí Nyoo vatyí cutachi tuñi ra chi ñáyivi cha iyó vityin cha catyi cutatyí ñu chiyo ta cha naha. ⁵² Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi ñáyivi ityi Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñáyivi cha cuñí quihvi —catyí ra Jesús.

⁵³⁻⁵⁴ Ndihi cahan ra Jesús tuhun cuan, ta quitá ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

**Nu sañahá ra Jesús vatyí
ma cuvi tixehe yo cuatyí yo**

12 Cuenda mil ñáyivi ndu iin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi

vaha ra. Soco ma cuvi tixehe ra cuatyí ra. ² Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyivi. ³ Yucuan chaha ñáá ndihí tuhun cha cahan ndo nu xehe, cuquita chi nu ndichin. Ta ñáá ndihí tuhun cha cahan ndo chichi vehe ndo, cucuiñi tandihí ñáyivi noo quivi.

**¿Yóo chi tahán chi cuyuhvi
yo, chi ñáyivi o chi Nyoo?**

(Mt. 10.28-31)

⁴ Ta catyí chi ndo cha cuví ndo ra tahin, vatyí ma yuhvi ndo chi ra chahñi coño ñuhu ri. Vatyí yahá tuhun cuan ta ñahri ca cha cuví sacuvi ra. ⁵ Soco cua catyi chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñayivi ndo. Ta yaha cuan ta cuví tyihi ra añima ndo anyaya.

⁶ Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihí ri ti, Nyoo ña naa iñi ra chi ni noo ti. ⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

**Ma yuhvi yo cahan yo tuhun ra
Jesucristo nuu ñáyivi**

(Mt. 10.32-33; 12.32; 10.19-20)

⁸ Catyí chi ndo vatyí nya ndo cahan ndo tuhin chihin ñáyivi, tyicuan caa tucu cucahin tuhun ndo nuu ángel Nyoo gloria. Vatyí yuhu Rayii cha quichi nya gloria cuví. ⁹ Soco nya nyoho cha cahan nuu ndo cahan ndo tuhin chihin ñáyivi, tyicuan caa tucu yuhu, ma cahun tuhun ndo nuu ángel cuenda Nyoo. ¹⁰ Ta vasi cahan ñáyivi chi yuhu Rayii cha quichi nya gloria, Nyoo cusaha ra tucahnu iñi chi ñu. Soco yóo cha cahan ña vaha siqui Tatyí Ii Nyoo ma ñihi ñu tucahnu iñi cuenda cuan.

¹¹ Cuhva cha cunyaca ñáyivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo. ¹² Vatyí cuhva cha cua nacahan ndo, yucuan cuhva cuhva maa Tatyí li Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayii

¹³ Noo ra cha ndihi chihin ñáyivi cuaha cuan, catyí ra chi ra Jesús:

—Maestro, catyí chi yañi vatyí natahvi sava ra cha tyayii cha sandoo sutu ndi chi ndi —catyí ra.

¹⁴ Tyicuan ta catyí ra Jesús chi ra:

—¿Yóó cha tyiso chi yuhu cha cuví juez ta catyí ndo vatyí tahvi sava yuhu cha chii ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyí ña chiñuhú ri cha coo cuaha ndaha tyiño yo tacuhva coo vaha yo ñáyivi —catyí ra.

¹⁶ Tyicuan ta chaha ra Jesús noo cuhva ihya chi ñu:

—Chiyó noo ra tyayii. Ta cuaha xaan tyiño sahá ra iyó. ¹⁷ Tyicuan ta ndichi xiñi ra: “¿Yoso caa cusacuvi? Ñahri nu naquehen vahi tandihi tyiño sahi. ¹⁸ Soco cha chité yoso caa cunyacuvi. Cusatani yaca nyihi nu yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihi maa niñi cha cuquita nu iyó tyiño sahí. ¹⁹ Tyicuan ta cuaha cuiya ma saha tyiño que. Cunyatati ta cusii cuñi. Ta cachi vahi. Ta cuchoho vahi”, ndichi xiñi ra. ²⁰ Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóó chi cua ndoo?” ²¹ Tyicuan caa cuví chi ñáyivi cha sacayá tandihi cha tyayii soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihi cha chiñuhú chi yo

(Mt. 6.25-34)

²² Tyicuan ta quichaha catyí ra Jesús chi ra cachicá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahna cuihno ndo. ²³ Vatyí yahvi ca nyaá ñáyivi yo ican saha cha cachi yo. Ta yahvi ca nyaá coño ñuhu yo ican saha cha cuihno yo. ²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa. ²⁵ Ta vasi chicá xaan xiñi ndo soco ma cuví sandusucun ca ndo ni chii ca chi ndo. ²⁶ Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihi ca cha chiñuhu chi ndo?

²⁷ Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihi cha tyayii ra ta ña tyaqui cha ñihno ra tari cha sacuihno Nyoo chi tu ita cuan. ²⁸ Tatu tyicuan caa sacuihno Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra. ²⁹ Ma caca xaan xiñi ndo tuhun cha cachi ndo ta cha coho ndo. ³⁰ Vatyí ñáyivi cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chitó ra ñáá cha chiñuhú chi ndo. ³¹ Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra ñima ndo. Ta tyicuan caa ta ñihi ndo tandihi cha chiñuhú chi ndo.

Cha vaha cha iyó gloria

(Mt. 6.19-21)

³²Ma yuhvi nyoho, mbee sane. Vasi ña cuaha ndo soco Sutu yo Nyoo cuñí ra chi ndo. Yucuan chaha cucuhva ra quihvi ndo nu nyacá ñaha ra. ³³Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quití, yori cha sativi iyó yucuan. ³⁴Vatyí nuu cun-
yaa cha tyayii ndo, yucuan cuví nu nyaá xiñi ndo. Ta yucuan cucunyaa añima ndo —catyí ra.

Nu sañahá ra Jesús chi yo yoso caa cuatu tuhva yo chi ra quíví quichi ra inga chaha

³⁵Cuatu tuhva vaha ndo quíví quichi inga chaha. ³⁶Ta cuví ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra. ³⁷⁻³⁸Ta caa cuhva ri cuan sii xaan cuñí ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sii xaan cucuñi musu cuan. Vatyí tyicuan caa nyacuví chitoho ra chihin ra. ³⁹Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyí coto quehen ra tandihí cha iyó chi ra. ⁴⁰Ta tyicuan caa cuví tucu nyoho, cuatu tuhva ri ndo. Vatyí yuhu Rayii cha quichi nya gloria, sana ri iñi ndo ta cuquichi —catyí ra Jesús.

Musu vaha ta musu ña vaha

(Mt. 24.45-51)

⁴¹Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyivi?

⁴²Tyicuan ta nacahan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan. ⁴³Ta sii xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra. ⁴⁴Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra. ⁴⁵Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra. ⁴⁶Tyicuan ta sana iñi ra ta ndichi chitoho ra quíví cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra. ⁴⁸Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chiin ri, vatyí ña chitó ra, ta chinyacuví ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

**Nu catyí ra Jesús vatyí cha catyí ra
cucañi tahan ñáyivi chihin tahan ñu**
(Mt. 10.34-36)

⁴⁹ Tari cha sanatahín ñuhu siquí ñuhu ñáyivi, tyicuan caa cuví tyiño vachi. ¡Ñana cha cuñí cha nacayu catyín ri ñuhu ihya! ⁵⁰ Vatyí nyaá yahi noo tundoho cahnu, ta ñana cha nyehí tundoho nyacua nya ndihí tyiño sahí. ⁵¹ Cuñí maa ndo vatyí cha vachi cuhve cha taxi ri coo ndo siquí ñuhu ñáyivi ihya. Soco yuhu vachi vatyí sasiin chi ndo. ⁵² Vatyí cha vityin ta ityi nuu ca, ohon ñáyivi noo vehe cucusiin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu. ⁵³ Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

**Nu catyí ra Jesús chi ñáyivi vatyí ña
nacotó ñu vatyí cha chaq
quivi cha quichi Sehe Nyoo**
(Mt. 16.1-4; Mr. 8.11-13)

⁵⁴ Catyí tucu ra Jesús chi ñáyivi cuaha cha nyicú yucuan:

—Tatu cha nyehe ndo vatyí cha ndihvi vico, catyí ndo vatyí cua coon savi. Ta tyicuan caa cuví. ⁵⁵ Tatu cha nyehe ndo vatyí cha caá tatyí ityi tyañuhu, catyí ndo vatyí cha chaa quivi ihñi. Ta tyicuan caa cuví. ⁵⁶ Nyoho sahá ndo tyí chitó ndo, ta nacotó ndo tandihí tuhun andivi, ta tandihí tuhun ñuhu ñáyivi. Soco ¿ñáá tuhun cha ña nacotó ndo ñáá tyembu nyaá ndo vityin?

**Nducu yo cuhva yoso caa coo vaha
yo chihin ra chicán cuatyí chaha
yo coto cuhun yo vehe caa**
(Mt. 5.25-26)

⁵⁷ ¿Ñáá tuhun ña sahá ndo cuenda nya cha vaha ta nya cha ña vaha? ⁵⁸ Tatu noo ra chicán cuatyí chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policía. Ta policía cuan cutyihí ra chuun chichi vehe caa. ⁵⁹ Tatu tyicuan caa cuví, catyí chuun vatyí ma quiton nyacua nya tyiyahvun tandihí cha tahán chi tyiyahvun —catyí ra Jesús.

**Cuñí chi cha nasama yo cuhva iyó
yo o cunyehe yo tundoho**

13 Tyicuan ta suri quivi cuan canaticu suhva ra. Ta quichaha canacatyí ra chi ra Jesús yoso caa cha nyacuví ra Pilato chihin suhva ra Galilea. Vatyí tyihí ra tyiño na cucahñi sindaro chi ra Galilea cha cachahá ofrenda chi Nyoo vehe ñuhu. Ta nasaca ra niñi ra cuan chihin niñi quiti cha cua cuví ofrenda cuan. ² Ta nacahan ra Jesús ta catyí ra chi ra:

—¿Atu chicá xiñi nyoho vatyí cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra? ³ Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho. ⁴ Ta ndi chahun uñi ra cachihí cha canacava torre Siloé cuan siquí ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñí maa ndo? ⁵ Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

**Nu catyí ra Jesús noo cuhva
yoso caa nyatú Nyoo cha
nasama yo cuhva iyó yo**

⁶Tyicuan ta chaha ra Jesús noo cuhva. Ta catyí ra:

—Noo ra iyó yutun cha nañí higo chi ra. Ta nanyaá tun nu ñuhú ra. Ta chahān ra chinyehe ra tatu iñi chiti tun. Ta nanyehe ra vatyí ñahri. ⁷Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra. ⁸Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihí ñuhú tyahyu. ⁹Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

**Quivi nyitatu ñáyivi sanduvaha ra
Jesús chi noo ñaha tihí chata**

¹⁰Noo quivi cha nyitatu ñáyivi sañahá ra Jesús chi ñu chichi vehe ñuhu. ¹¹Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhví ña cha ndutihí chata ña. Ta ña cuví ndundoo ña. ¹²Tyicuan ta nanyehe ra Jesús chi ña. Ta canā ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún —catyí ra chi ña.

¹³Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chi Nyoo. ¹⁴Soco ra cuví nuu vehe ñuhu, cuxaan xaan ra. Vatyí quivi nyitatu ñáyivi sanduvaha ra Jesús chi ña. Ta quichaha catyí ra chi ñáyivi canyicú cuan:

—Iyó iñu tahan quivi tahán chi saha tyiño yo. Yucuan quivi quichi ndo quichi

cuvi tatan chi ndo. Ta ma quichi ndo quivi nyitatu yo —catyí ra.

¹⁵Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quiti sana ndo vatyí sacoho ndo ndutya chi ti quivi nyitatu yo? ¹⁶Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuñí ña chihin cuehe ihya sahá ra ña vaha. Ta yori ndachi chi ña. ¿Atu ña tahán chi ndachi yo chi ña vasi quivi nyitatu yo? —catyí ra Jesús.

¹⁷Tyicuan ta cuhva cha catyí ra Jesús tuhun cuan, tandihí maa ra xaan iñi chi ra chahān cuvi nuu ra. Soco tandihí maa ñáyivi cusii cuñi ñu chihin cha cahnu cha sacuví ra Jesús.

**Nu catyí ra Jesús vatyí tari
noo chiti mostaza cuví cha
nyacá ñaha Nyoo ñanima yo**

(Mt. 13.31-32; Mr. 4.30-32)

¹⁸Tyicuan ta quichaha catyí ra Jesús:

—¿Ñáá chihin sandiqui tahin cha nyacá ñaha Nyoo ñanima yo? ¿Ñáá chihin sandu inuu ri yo? ¹⁹Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnu tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

**Nu catyí ra Jesús vatyí tari
yuchan iya tyicuan caa cuví cha
nyacá ñaha Nyoo ñanima yo**

(Mt. 13.33)

²⁰Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo ñanima yo? ²¹Cuví chi tari noo yuchan iya cha nasaca noo ñaha sihi chihin uñi cuhva yutyi pan. Vatyí tari ndaa pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo ñanima —catyí ra.

**Yuvehe tihin ta ityi cuiñi
cha cuahan nu nyaá Nyoo**

(Mt. 7.13-14, 21-23)

²² Ityi cuahan ra Jesús Jerusalén cahan ra tuhun Nyoo chihin ñáyivi tandihi ñuu nu yahá ra. ²³ Ta quichaha ndaca tuhun noo ra chi ra:

—¿Atu ña cuaha maa ñáyivi cucacu añima? —catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihvi ndo yuvehe tihin. Vatyí yíi xaan quihvi ndo nu nyacá ñaha Nyoo. Vatyí cuaha xaan ndo cha cucuñi ndo quihvi ndo yucuan. Ta ma cuvi. ²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacachan ndo yuvehe, ta cucatyí ndo: “Nuña yuvehe.” Ta ra cuan cucatyí ra chi ndo: “Ña chité nya ityi quichi nyoho.” ²⁶ Tyicuan ta nyoho cucatyí ndo: “Nyuhu chachi ndi ta chihí ndi chuhun. Maun sañahun tuhun Nyoo chi ndi ityi nu nyaá vehe ndi”, cucatyí ndo chi ra cuan. ²⁷ Soco ra cuan cunacahan ra chihin ndo ta cucatyí ra: “Cha catyí chi ndo vatyí ña chité nya ityi quichi nyoho. Canyaha ndo nu nyai, tandihi nyoho ñu nyacuví cha ña vaha”, cucatyí ra chi ndo. ²⁸ Yucuan ta cuacu ndo ta sacahñi noho ndo cha nyehe ndo chi ra Abraham ta chi ra Isaac ta chi ra Jacob, ta chi tandihi ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata. ²⁹ Ta cuquichi ñáyivi ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra. ³⁰ Ta yóo ñu cha cuñí cahun ityi nuu, ican ñu cahun nu ndihi. Ta ñu cuahan nu ndihi, ican ñu cahun ityi nuu —catyí ra.

**Nu nducuihya iñi ra Jesús nyehé ra
chi ñáyivi ñuu Jerusalén**

(Mt. 23.37-39)

³¹ Suri maa quivi cuan chaá coyo suhva ra fariseo. Ta catyí ra chi ra Jesús:

—Quita ihya vatyí ra Herodes cuñí ra cahñi ra chuun —catyí ra.

³² Soco ra Jesús quichaha catyí ra chi ra:

—Cuahan ndo ta catyí ndo chi ra ñu-cuii quiñi iyó cuan, vatyí nyacua nya nu chaa maa chi quivi cha ndihi tyiño sahí cha tave tatyí ña vaha ta cha sanduvahi chi ñu cuhví, tyicuan ta cundihí tyiño sahí. ³³ Soco nya tahán chi cha ndihi maa tyiño sahí, tyicuan ta cahun mai cucúvi nya Jerusalén. Vatyí ma cuvi cha cúvi noo ra profeta Nyoo ityi chata Jerusalén.

³⁴ ¡Ndahvi nyoho ñáyivi Jerusalén! vatyí chahñí ndo chi ra profeta ra cachahá cuenda tuhun cahan Nyoo chi ndo. Ta tuchi ndo yuu chi tandihi ra cha saquichi Nyoo nu nyicú ndo. Ta yuhu cuaha xaan chaha cuñí saha cuende chi ndo tari noo ndivi cha sahá cuenda ti chi sehe ti, ta naquehen vaha ti chi ti chichi ndichin ti. Soco maa ndo ña cuñí ndo. ³⁵ Nyehé ndo vityin vatyí cha sandoj chi ndo. Ta catyí chi ndo vatyí ma nyehe ca ndo chii nyacua nya chaa chi quivi cucatyí ndo vatyí cahnú xaan ra vachi chihin sivi Nyoo —catyí ra Jesús.

**Nu sanduvaha ra Jesús chi noo
ra cuhví cha yihí cuiño chi**

14 Cuví chi noo quivi nyitatú ñáyivi. Ta ra Jesús cuahan ra cua cachi ra vehe noo ra cuví nuu chi ra fariseo. Ta suhva ca fariseo cuan cañañi ra chi ra Jesús tatu ñáá cha ña vaha cunyacuví ra. ² Yucuan ta nuu ra Jesús nyaá noo ra cuhví cha yihí cuiño chii. ³ Tyicuan ta quichaha catyí ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhví quívi nyitatú yo? —catyí ra.

⁴Tyicuan ta tandíhi ra cuan, taxi taxi cacuvi ra. Yucuan cuví nu tyiso ra Jesús ndaha ra síqui ra cuhví cuan. Ta sanduvaha ra chi ra. Ta natachí ra chi ra na cunuhu ra. ⁵Tyicuan ta quichaha catyí ra Jesús chi ra fariseo:

—Tatu canacava noo burru sana ndo, o nonga quítí sana ndo chichi noo xahva, ¿atu ma cutava ndo chi ti tañi tyehe ri, vasi quívi nyitatú yo cuví? —catyí ra.

⁶Tyicuan ta inga chaha tucu taxi cuii ri nicunyicu ra fariseo. Vatyí ña ñihi ca ra tuhun nacahan ra.

Nu sañaha ra Jesús chi yo vatyí ma cahnu saha yo chi yo

⁷Cha nyehe ra Jesús vatyí tandíhi ra canyicú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chi ra:

⁸—Nya quívi cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuvi ican saha ndo, ⁹ta coto quichi ra cha nacatyí tuhun ta catyí ra chuun: “Cuhva tyayu chiña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndíhi. ¹⁰Soco catyí chi ndo, vatyí nya quívi nacatyí tuhun ra chi ndo, cunyaa ndo noo nu ñima ri tuhun. Vatyí quichi maa ra cha nacatyí tuhun chi ndo ta catyí ra chi ndo: “Ra tahir, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyivi nyicú yuhu mesa chuhun. ¹¹Vatyí yóo ra cha cahnu sahá chii, cuquehen ra tica-han nuu. Ta yóo ra cha ndahvi sahá chii, cahnu cucuvi ra —catyí ra Jesús.

¹²Tyicuan ta quichaha catyí tucu ra chi ra nacatyí tuhun chi ra:

—Nya quívi coo vico vehun, ma nacatyí tuhun chi ra tahun, ni chi yañun, ni ri chi ñáyivi chuun, niri chi ñu nyicú

yuehun ñu tyayíi. Vatyí ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacah-nya ñu cuenda cha chahan ñu vico vehun. ¹³Soco cua catyí chuun vatyí nya quívi coo vico vehun, nacatyí tuhun chi ñu ndahvi, chi ñu cuhví, chi ñu coxo, ta chi ñu cuaa. ¹⁴Tyicuan ta síi cuví chuun, vatyí ñu cuan ma cuvi natiyahvi ñu chuun. Soco cuñihun yahvun quívi cunandoton chihin ñáyivi vaha.

Nu chaha ra Jesús noo cuhva yoso caa nacatyí tuhun ra chi yo vatyí quíhvi yo nu nyacá ñaha Nyoo

(Mt. 22.1-10)

¹⁵Ta chíñi noo ra cha nyaá yuhu mesa cuan tuhun cahán ra Jesús. Ta quichaha catyí ra chi ra:

—Síi xaan cuvi chi ñu cachi nu nyacá ñaha Nyoo —catyí ra.

¹⁶Tyicuan ta catyí ra Jesús:

—Noo ra cuan savaha ra noo vico cahnu vavaha vehe ra. Ta nacatyí tuhun ra chi cuaha xaan ñáyivi. ¹⁷Tyicuan ta chaá cuhva cha cuxiñi ñu, ta tachí ra chi musu ra nacana ra chí ñu. Vatyí cha chaá cuhva cha cuxiñi ñu. ¹⁸Soco tandíhi ñu cuan quichaha catyí ñu vatyí ma cuhun ñu. Ta noo ra cuan catyí ra: “Ni sate noo ñuhú. Ta cuñí chi cuhin cunyehi. Ican tuhun chiquén na saha ra tucahnu iñi chii vatyí ma cuhin.” ¹⁹Tyicuan ta inga tucu ra cuan catyí ra: “Ni sata cuii ohon tahan yunta quítí. Ta cuhin cunyehi tatu vaha ti. Ican tuhun chiquén tumañi iñi chi ra na saha ra tucahnu iñi chii, vatyí ma cuvi cuhin.” ²⁰Tyicuan ta inga tucu ra cuan catyí ra: “Ni ndíhi tandahi, ta ma cuvi cuhin”, catyí ra. ²¹Tyicuan ta musu ra cuan cuanuhu ra. Ta nacatyí ra tandíhi tuhun cuan chi ra cha tachí chi ra. Cha chíñi ra savaha vico cuan cha tyicuan caa, ta cuxaan xaan ra. Ta catyí ra chí musu ra: “Cuahan tandíhi maa ityi. Ta quichi nyacon chi

ñu ndahví, chi ñu cuhví, ta chi ñu coxó, ta chi ñu cuaa”, catyí ra. ²²Ta cha yahā nachaa musu cuan ta catyí ra chi ra cha tachi chi ra: “Cha sacuví tandihi maa cha catyún. Ta nuhá ca chichi vehe”, catyí ra. ²³Tyicuan ta chitoho ra catyí ra chi ra: “Cuahan cua nducu ca chi ñu tandihi maa ityi. Ta sñiñun chi ñu na quichi coyo ñu, vatyí na cutu chichi vehi. ²⁴Vatyí catyí chuun vatyí ni minoo ñu cha nacatyí tuhín cha xihna ri, ma cachi ñu chihin” —catyí ra Jesús.

**Cuaha xaan tundoho nyehe yo
tatu cuenda ra Jesús yihí yo**

(Mt. 10.37-38)

²⁵Cuaha xaan ñáyivi nyicón chi ra Jesús. Tyicuan ta nanyehe ra chi ñu, ta quichaha catyí ra:

²⁶—Tandihí nyoho cha nyicón ndo chii, tatu cuñí ca ndo chi ñáyivi chi ndo ican saha chi yuhu, ñima cuende yihí ndo. Ta tatu cuñí ca ndo chi maa ndo ican saha chi yuhu, ñima cuende yihí ndo. ²⁷Vatyí nya nyoho cha ña cuñí ndo nyehe ndo tundoho cha cunyicon ndo chii, ña tahán chi cuví ndo ñu cuende, vatyí cha nyehe ndo tindoho yucuan cuví cruzi cha tahán chi cuiso ndo. ²⁸Vatyí tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan. ²⁹Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nyaa ñáyivi chi ndo. ³⁰Ta cuacatyí ñu: “Ra cuan quichaha savaha ra vehe ra, ta ni ña cuví sandihí ra”, cucatyí ñu. ³¹O tatu noo rey cha cuñí cañi tahan chihin inga rey çatu ña chicunyaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan? ³²Tatu chitó ra vatyí ma cuvi chasaha ra chi inga rey cuan, tyicuan ta

cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihí tuhun yucuan ri. ³³Ta tyicuan caa cuví chi nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuvi cunyicon ndo chii.

**Nu sañahá ra Jesús vatyí tari ñii
cha ndihí cha uhva, tyicuan
caa cuví yo tatu ndu uvi iñi
yo cha chino iñi yo chi ra**

(Mt. 5.13; Mr. 9.50)

³⁴Vaha ñii vatyí sacu uhva chi cha cachi yo. Soco tatu ndihí cha uhva chi, ña vaha ca chi. ³⁵Ñahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñí iñi ndo, tyasoho ndo tuhun cahín —catyí ra Jesús.

**Nu sañahá ra Jesús vatyí tari mbee
cha cuanaa tyicuan caa cuví yo**

(Mt. 18.10-14)

15 Tandihí ra tavá xuhun cuenda gobiernu ñuu Roma, ta ra iyó cucatyí, tuhva ra nu nyaá ra Jesús, tacuhva cuiñi ra tuhun cahán ra. ²Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cucatyí. Ta chachí ra chihin ra —cacatyí ra.

³Tyicuan ta ra Jesús cahán ra noo cuhva ihya, ta catyí ra:

⁴—Ta nya nyoho cha iyó noo cientu mbee sana ndo, tatu cuanaa noo ti, çatu ma sandoo ndo chi tandihí ca ti cuan nu chiqui. Ta cunanducu ndo chi quiti cha cuanaa cuan, nyacua nya cha nañihi ndo chi ti? ⁵Ta cuhva cha nañihi ndo chi ti, ta natyiso soco ndo chi ti. Ta sii vavaha cuví chi ndo. ⁶Ta cuhva cha nachaa ndo vehe ndo, ta ndu iin ri ndo chihin ra tahan ndo ta chihin ñu nyicú yatyin yuvehe ndo, yucuan ta catyí ndo chi ñu vatyí na cusii cuñi ñu chihin ndo vatyí nañihi ndo chi mbee sana ndo cha chinaa. ⁷Ta ihya catyí chi ndo, vatyí sii

xaan ca cuvi chi ángel Nyoo andiví cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahun cumi tahan ñáyivi cha ñahri cuatyí.

**Ñaha sihi cha cuanaa
xuhun ta nañihí ña**

⁸Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihvi ña tandihí cuii maa chichi vehe ña. Ta nanducu ña tandihí cuii nyacua nya cha nañihí ña xuhun cuan. ⁹Ta cuhva cha yaha nañihí ña, cuahan ña cua nanducu ña chi ñaha tahan ña, ta ñáyivi cha nyicú yuvehe ña, ta catyí ña chi ñu: “Cusií cuñi ndo chihin vatyí cha nañihí xuhin cha chinaa”, catyí ña. ¹⁰Ta catyí chi ndo vatyí tyicuan caa sii cuví chi ángel Nyoo cha catyí noo ra iyó cuatyí ta ndu uvi iñi ra cuatyí ra —catyí ra Jesús.

**Nu sañahá ra Jesús yoso caa cuñí
Nyoo chi noo ra ndu uvi iñi cuatyí**

¹¹Tyicuan ta quichaha catyí tucu ra Jesús cuhva ihya:

—Noo ra, chiyó uvi tahan sehe ra.

¹²Ta noo chaha, ra luhlu ca cuan catyí ra chi sutu ra vatyí nacuhva ra cha tahán chi chi ra. Tyicuan ta sutu ra chaha ra chi ninduvi sehe ra. ¹³Ta ña cuaha ri quivi cuan ta ra luhlu ca cuan xico ra tandihí cuii maa cha chaha sutu ra chi ra. Ta sandu iin ri ra xuhun ra, ta quehen ra ityi ta cuahan ra noo ñuu cañi. Ta yucuan chiyó ra, sanaa ra tandihí maa xuhun ra chihin tusii iñi. Ta quiñi xaan chicá noo ra. ¹⁴Tyicuan ta chaa noo tama ityi nu iyó ra. Ta quichaha chisoco ra vatyí ndihí xuhun ra sanaa ra. ¹⁵Tyicuan ta chahan ra chicacan ra tyiño chi noo ra ñuu cuan. Ta ra cuan tachí ra chi ra noo nu iyó quini sana ra, vatyí cusaha cuenda ra chi ti. ¹⁶Ta cuví noo chaha cuan chisoco xaan ra. Ta ñahri maa cha

cachi ra iyó, nyacua quichi cuvi iñi ra cachi ra cha cachachí quini cuan soco yori maa chaha cha cachi ra. ¹⁷Tyicuan ta nicohon iñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuñí cúvi soco ihya. ¹⁸Vityin cunuhin nu nyaá suti. Ta catyí chi ra tyi chicoo cuatyí nuu Nyoo ta nuu maa ra. ¹⁹Ta ña naña que cha cuvi sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehé sutu ra chi ra, ta cundahvi cuñi ra nyehe ra chi ra. Ta chinq ra chisatahan ra chi sehe ra. Ta nanumi ra chi ra. ²¹Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehung chii”, catyí ra chi sutu ra. ²²Soco sutu ra tyihí ra tyiño, ta catyí ra chi musu ra: “Tava ndo sahma vaha ca ta sacuihno ndo chi ra. Ta tyihí ndo noo xehe nundaha ra. Ta nyaca ndo zapato quihí chaha ra ñandihí. ²³Ta siin ri cahñi ndo noo becerru cha xahan ca, vatyí cachi yo chi ti. Vatyí vityin cucoo yo noo vico. ²⁴Vatyí ra sehi ihya cha chihí ra saha mai tuhun. Cuñí mai vatyí ma nyehe que chi ra, soco natuvi ra”, catyí sutu ra. Tyicuan ta quichaha chicoo ñu vico. Ta sii xaan cacuñí ñu vatyí natuvi ra cuan.

²⁵Tyicuan ta inga sehe ra, ra cha chahnu ca, ñohó ra nu chiqui. Ta cuhva cha cuanachaa ra nya vehe ra, ta quichaha chiñí ra yaa. Ta chiñí ra vatyí sii xaan cachitá chaha ñu. ²⁶Tyicuan ta cuhva cha cuyatyin ra nya vehe ra ta cana ra chi noo musu ra. Ta ndaca tuhun ra ñáá cha cuví cuan. ²⁷Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyí na cahñi ra chi noo becerru xa-

han ca. Vatyí vaha ri nachaa yañun, ta ñahri cha cuví chi ra”, catyí ra. ²⁸ Tyicuan ta cuxaan xaan cuñí ra. Ta ña cuñí ra ndihvi ra chichi vehe. Soco sutu ra chahan ra chicahan ndahvi ra chihin ra, vatyí na ndihvi ra chichi vehe. ²⁹ Tyicuan ta nacahan ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nacahun que nu cahún. Soco ni noo ndixihyu lee ta cuhva con chii vatyí coi vico chihin ra tahin. ³⁰ Soco vityin cha nachaa sehun ihya, ra cha sanaa xuhun chihin ñu cata iñi. Ta vityin chahun noo becerro quití xahan ca chi ra”, catyí ra chi sutu ra. ³¹ Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihi cha cumi, chuun cuví. ³² Soco vityin tahan chi sacuvi yo vico ihya. Ta cusii cuñí yo. Vatyí nachaa yañun, ra cha saha mai tuhun vatyí chihí. Tari quívi nandoto ra cuví ihya. Ta chinaa ra, ta nañihí tucu yo chi ra inga chaha”, catyí ra chi sehe ra —catyí ra Jesús.

Nu sañahá ra Jesús chi yo yoso caa saha yo tumañi iñi chihin cha iyó chi yo

16 Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihi tyiño sahá ra. Ta chahan coyo musu ra canacatyí ra chi ra tyayii cuan, vatyí ra yihí ndaha tyiño cuan, sanaa ra tandihi cha iyó chi ra. ² Tyicuan ta cana ra tyayii cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihi tyiño cha sacuvun chii. Vatyí ma saha tyiño con chihin”, catyí ra chi ra. ³ Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñí ca ra cha sahá tyiñe chi-

hin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu. ⁴ Soco cha chité yoso caa cunyacuvi vityin, ta vaha coo ñáyivi chihin quívi cha ma coo ca tyiño sahi, ta vaha chai vehe ñu”, ndichi xiñi ra. ⁵ Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra. ⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra. ⁷ Tyicuan ta cha inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigo”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra. ⁸ Tyicuan ta chitó chitoho ra cha ña vaha cha chinyacuvi ra. Ta iyo xaan cuñí ra vatyí vatyí xaan saha ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñáyivi ña vaha añima yatyí xaan ca sahá ñu chi ñu ican saha ñáyivi vaha añima.

⁹ Ta catyí chi ndo, vatyí cotyíno ndo cha tyayii cha iyó síqui ñuhu ñayivi ihya, ta saha ganaa ndo amigo. Ta quívi cha ndihi cha tyayii cuan, cuñihi ndo nu cunicu ndo nya nu nyaá Nyoo tyicuan ri maa.

¹⁰ Tatu chitó ndo cotyíno ndo chiin cha iyó chi ndo cha cuenda cha vaha, tyicuan caa coto tucu ndo cotyíno ndo tatu cuaha iyó chi ndo. Soco tatu ña chitó ndo cotyíno ndo chiin cha iyó chi ndo, tyicuan caa ma coto tucu ndo cotyíno ndo tatu cuaha coo chi ndo. ¹¹ Ta catyí chi

ndo, tatu ña sahá ndo tumañi ñi chihin cha iyó chi ndo siqui ñuhu ñayivi ihya, Nyoo ma cuhva ra noo cha tyayii cha ndicha chi ndo. ¹²Tandihí cha iyó chi ndo maa Nyoo chahá noo chi ndo. Soco tatu ña sahá ndo tumañi ñi chihin cuan, ma cuhva ra cha tahán chi chi ndo.

¹³Noo musu ma cuvi coo uvi tahan chitoho ra. Vatyí musu cuan cuñí ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñi ndo chi Nyoo ta suri cuhva cuan cuñi tucu ndo cha tyayii —catyí ra Jesús.

¹⁴Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñí xaan ra chi xuhun. ¹⁵Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyivi. Soco chitó Nyoo vatyí aña ndo ña vaha. Ta tandihí cha catyí ñáyivi vatyí cahnu xaan ihya siqui ñuhu ñayivi, Nyoo ña cuñí nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo aña yo chi yo

¹⁶Ley cha tachi Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuvi cha saquehen ityi chi ñáyivi nyacua nya quivi chaá ra Juan. Ta maa ra Juan quichaha cahan ra tuhun vaha vatyí cha cuñí quichi Nyoo vatyí cunyaca ñaha ra. Ta tandihí ñáyivi cha nducú cuhva yoso caa cunyaca ñaha Nyoo aña ñu, ican ñu quihvi ndaha ra.

¹⁷Soco catyí chi ndo, vasi cunaa andiví ta ñuhu ñayivi, soco cha cuví ley Nyoo cha tyaa ra Moisés, ma naa nyacua nya cha yahá cuvi tandihí.

Sañahá ra Jesús vatyí ña vaha cha sandoo rayii chi ñasihi ra

(Mt. 19.1-12; Mr. 10.1-12)

¹⁸Tatu noo rayii iyó ñasihi ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayii chihin noo ñaha cha sandoo yí chii, coo tucu cuatyí ra nuu Nyoo.

Nu sañahá ra Jesús tuhun noo ra tyayii chihin ra Lázaro

¹⁹Chiyó noo ra tyayii. Ta vaha ñihno ra. Ta tandihí quivi iyó ra vico ta chachí vaha ra. ²⁰Ta chiyó tucu noo ra ndahvi cha nañi Lázaro. Ta cuaha xaan ndihyi ñi ra. Ta nyaá ra yuvehe ra tyayii cuan. ²¹Ta ra ndahvi cuan, cuñí ra cachi ra, vasi cha canacoyo nu mesa ra tyayii cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra. ²²Ta noo quivi cuan chihí ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayii cuan. Ta chicuchi ñu chi ra. ²³Tyicuan ta ra tyayii cuan nyehé xaan ra tundoho nu ñohó ra anyaya. Ta nanyehé ra nu cañi. Ta nanyehé ra chi ra Abraham chihin ra Lázaro, nyaá ra chihin ra yucuan. ²⁴Tyicuan ta canachaá ra ta catyí ra: “Tata Abraham, cundahvi cuñi chii. Tachi chi ra Lázaro na satyí ra chiin nundaha ra. Ta na satoo ra ñi titi ndutya nu yai. Vatyí nyehé xain tundoho nu cayú ñuhu ihya”, catyí ra. ²⁵Soco ra Abraham catyí ra chi ra: “Ñicohon ñnu vatyí vaha chiyon ñuhu ñayivi. Ta ra Lázaro, ña vaha chiyó ra. Vityin vaha iyó ra ihya, ta yoho nyehún tundoho. ²⁶Ta siñ ri, mahñu ihya cono xaan. Ta ma cuvi yaha ra iyó tyehe cahun ra chiña. Ta ma cuvi yaha ra iyó chiña, quichi ra tyehe”, catyí ra Abraham chi ra. ²⁷Tyicuan ta quichaha catyí ra tyayii cuan:

“Tata Abraham, s̄ahun tumañi ñi chii. Ta tachun chi ra Lázaro nya vehe suti. ²⁸Vatyí iyó ohon tahan yañi. Ta cuñí vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra. ²⁹Tyicuan ta quichaha catyí ra Abraham: “Iyó ley cha tyaa ra Moisés. Ta iyó tuhun cha tyaa ra profeta Nyoo ta cha naha. Na quichaha ra tu cuñí ra”, catyí ra Abraham. ³⁰Tyicuan ta quichaha catyí ra tyayii cuan: “Tata Abraham. Ma quichaha ra. Soco tatu yóo cha nandoto, ta cuhun cucahan chihin ra, yucuan ta tyasoho ra ta nasama ra cuhva iyó ra”, catyí ra cuan. ³¹Soco ra Abraham catyí ra: “Tatu ña cuñí ra quichaha ra tuhun tyaa ra Moisés ta tuhun cha tyaa ra profeta Nyoo ta cha naha, ma chino ñi ra tuhun cahan noo ndiyi tatu nandoto ra ta cahan ra chihin ra.”

**Nu sañahá ra Jesús chi yo yoso
caa saha cuenda yo chi yo
coto sacuvi yo cha ña vaha**

(Mt. 18.6-7, 21-22; Mr. 9.42)

17 Tyehé caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyivi. Soco ndahvi ra ndahvi ra sativí chi ñáyivi. ²Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyí ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu ñi chi ra.

⁴Ta ni ri maa sacuvi ra cha ña vaha chihin ndo ucha tahan chaha cha noo quiñi. Tatu ndi ucha tahan chaha ta catyí ra chi ndo vatyí ndu uvi ñi ra cha sacuví ra chi ndo, ndi ucha tahan chaha saha ndo tucahnu ñi chi ra.

**Nu sañahá ra Jesús chi yo vatyí
tatu chinó ñi yo chi ra, cuví
sacuvi yo cuaha cha vaha**

⁵Tyicuan ta quichaha catyí ra cachicá tyiño nuu ra Jesús chi ra:

—Cuhva cha chinó ca ñi ndi chuun —catyí ra.

⁶Tyicuan ta catyí ra Jesús chi ra:

—Tatu chinó ñi ndo chi yuhu vasi chiin ri tari cuhva noo chiti mostaza luhlu, cuví catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyí ra Jesús.

**Yoso caa tahán chi
quichaha yo chi Nyoo**

⁷Ta catyí ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyiño ra, o chi saha cumi ra quiñi sana ndo, ¿atu catyí ndo chi ra: “Cunyaa ta cachun”? Ña catyí ndo chi ra tyicuan caa. ⁸Soco tyehé caa catyí ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chi ra.

⁹Ni ña tuhvá ndo nacuhva ndo tyahvi nyoo chi ra vatyí sacuvi ra ñáa noo tyiño tavá ndo chi ra. ¹⁰Tyicuan caa tucu nyoho chihin Nyoo. Quiñi ndihi sacuvi ndo cha catyí Nyoo chi ndo, tahán chi catyí ndo: “Nyuhu chiin ri cha tachun chi ndi, yucuan ri sacuvi ndi. Ta ña yaha ca.”

**Nu sanduvahá ra Jesús chi
uchi tahan ra tyahyu coño**

¹¹Ityi cuahan ra Jesús ityi ñuu Jerusalén yahá ra nu cuví xahñi Samaria chihin Galilea. ¹²Nu chaá ra noo ñuu, quitá coyo uchi tahan ra cuhví chihin cha tyahyu coño ra. Ta chicuitayucu ra nyasava ri. ¹³Ta quichaha cacanachaa ra chi ra Jesús, ta catyí ra:

—Yoho, Maestro Jesús, cundahvi cuñi chi ndi —catyí ra.

¹⁴Tyicuan ta nanyehe ra Jesús chi ra ta catyí ra chi ra:

—Cuahan ndo. Ta cua sañaha ndo chi ndo chi tata sutu vatyí cha nduvaha ndo.

Tyicuan ta cuahan coyo ra ta cananyehe ra ityi cuahan coyo ra ta cananyehe ra vatyí nduvaha ra. ¹⁵Tyicuan ta cuha cha nanyehe noo ra cuan vatyí nduvaha ra, cuanuhu chata ra nu nyaá ra Jesús. Ta cana chaa ra, ta sacahnu ra chi Nyoo. ¹⁶Ta chicuñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chi ra. Ta ra cuan, ra Samaria cuví ra.

¹⁷Tyicuan ta catyí ra Jesús chi ra:

—¿Atu ñima uchi tahan ndo nduvaha? ¿Nya nyaá inga ñin tahan ca ra?

¹⁸¿Ñáá tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

¹⁹Tyicuan ta quichaha catyí ra chi ra cuan:

—Nducuíta ta cuahan. Nduvahun vatyí chinó ñnun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰Candaca tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví.

²¹Ma cuví catyí ñáyivi: “Ma ra nyaá ihya, o ma ra nyaá ityi cuan.” Vatyí Nyoo cha chaá ra mahnu ndo, ta nyacá ñaha ra añima ñáyivi cuenda ra —catyí ra chi ra.

²²Yaha cuan ta catyí ra chi ra cachicá noo chihin ra:

—Cuchaa chi quivi vatyí cucuñi ndo nyehé ndo chi yuhu Rayii cha quichi nya gloria. Soco ma nyehé ndo chii.

²³Cuchaa tucu chi quivi ta cucatyí

ñáyivi chi ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyicon ndo chi ra cuan vatyí ñime cuví. ²⁴Vatyí tandihi ñáyivi cunyehe chi yuhu Rayii cha quichi nya gloria quivi quichi inga chaha. Tari nyehé tandihi ñáyivi nu quihvi tacha nicahnu andivi, tyicuan caa cucuvi. ²⁵Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehé ñu chii. ²⁶Tari cuví quivi ra Noé, tyicuan caa cucuvi quivi quichi yuhu Rayii cha quichi nya gloria inga chaha. ²⁷Quivi ra Noé, chachi ñu. Chihí ñu. Tandahá ñu. Ta chahá ñu sehe ñu tandaha. Nya quivi quihvi ra Noé chichi barcu ra, ta coon savi xaan. Ta tandihi ñu cachihí ñu. ²⁸Tyicuan caa tucu cuví quivi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu. ²⁹Soco quivi cha quita ra Lot ñuu Sodoma cuan, coon ñuhu chihin azufre andivi. Ta chihí tandihi ñáyivi Sodoma. ³⁰Ta tyicuan caa cucuvi quivi cha quichi tucu yuhu Rayii cha quichi nya gloria inga chaha.

³¹Ta quivi cuan tatu nyicú ndo nuquehe ndo, ma ndihvi ndo chichi vehe ndo vatyí tava ndo ndaha tyiño ndo. O tatu chicá noo ndo nu chiqui, ma cunuhu ndo nya vehe ndo. ³²Ñicohon ñni ndo ñasihí ra Lot, ñáá cha cuví chi ña. ³³Tandihí ndo cha cuñi ca ndo cha iyó siqui ñuhu ñayivi ihya, cucunaa ndo. Ta tandihí ndo cha ña quichaha ndo cha iyó ñáyivi ihya, cucacu ndo.

³⁴Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra. ³⁵Ta uvi tahan ñusihí ñin ri cu nyicó ñu quivi cuan. Noo ri ña, cunaquehin. Ta nonga ña cundoo ña. ³⁶Ta catyí chi ndo vatyí uvi tahan ra cohon nu chiqui. Noo ra cunaquehin, ta nonga ra cundoo ra —catyí ra Jesús.

³⁷Cuhva cha chiñi ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chihi, yucuan cundu iin ri chii.

Nu sañahá ra Jesús vatyi tari chicán noo ñaha chihí yí chi juez, tyicuan caa tahán chi cacan yo chi Nyoo

18 Tyicuan ta chaha ra Jesús noo cuhva ihya. Vatyi na cacan tahvi ñu tyicuan ri maa, ta ma cundihñi ñu.

²Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chi Nyoo. Ta ni ri ña quichaha maa ra chi ñáyivi. ³Ta suri ñuu cuan iyó tucu noo ñaha ndahvi cha chihí yí. Ta chahan ña chicahan ña chihin ra, vatyi chicá ña cuatyí chaha noo ra xaan iñi chi ña.

⁴Ta juez cuan ña quichaha maa ra chi ña. Ña sandaḡ maa ra tyiño chicá ña. Ta cha naha xaan chicán ña. Tyicuan ta quichaha ndichi xiñi juez cuan: “Vasi ña yuhví chi Nyoo, ta ñahri cuende chi ñáyivi, ⁵soco ñaha ihya sayangá xaan ña chii. Ta yucuan chaha cua sacaqui chi ña. Vatyi coto quichi ca ña, ta sanaquiqui ña tisihi”, ndichi xiñi ra.

⁶Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quiñi iyó ra ta tyinyee ra chi ñaha ndahvi cuan, ⁷ta nyaca cuví Nyoo, ¿atu ma tyinyee ra chi ñáyivi cha chicán ndiyaca ta ndiquivi chi ra? ¿Atu cuatu xaan ra cha tyinyee ra chi ñu? ⁸Catyí chi ndo, vatyi numi ri cutyinyee ra chi ñu. Soco quívi quichi yuhu, Rayii cha quichí nya gloria, inga chaha, chító Nyoo tatu nañihi que chi ñu cha ndicha chinó iñi chii —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹Tyicuan ta chaha ra Jesús nonga cuhva cuenda ra savahá chii, ta ña cuñí nyehe ra chi inga ra. Ta quichaha catyí ra:

¹⁰—Iyó uvi tahan ra chahan chichi vehe ñuhu chicacḡ tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra. ¹¹Ta ra fariseo cuan chicuinanyaa ra, ta quichaha cahan ra chihin Nyoo. Ta cahnu saha ra chi ra. Ta catyí ra: “Sutu Mañi yuhu, nacuhve tyahvi nyoo chuun vatyi yuhu ñima tari inga ñáyivi cuví. Vatyi suhu ñu. Quiñi iyó ñu. Iyó ñasihi ra ta iyó inga ñusihi chi ra. Ta ni ri ñima tari ra tavá xuhun cuan cuví. ¹²Vaha ca quichahí tuhun maun ta ñima ca inga ñáyivi. Vatyi uvi chaha cha noo vitya ña chachí. Ta chahí uchi siquí noo noo cientu cha sahá ganai chuun”, catyí ra. ¹³Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añaima ra vatyi ndu uvi iñi ra cuatyí ra. Ta catyí ra: “Sutu Mañi yuhu. Nyehe ndahvi chii vatyi iyó xaan cuatyí”, catyí ra —catyí ra Jesús.

¹⁴Ta catyí tucu ra Jesús tyehe caa:

—Catyí chi ndo vatyi Nyoo sahá ra tucahnu iñi chi ra tavá xuhun cuan. Sanaḡ Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyi yóo ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanduc ahnu ra chi ñu —catyí ra Jesús.

Nu nasocó ra Jesús chi ra cuatyaa

(Mt. 19.13-15; Mr. 10.13-16)

¹⁵Tyicuan ta quichi nyaca ñáyivi chi ra cuatyaa chi ra Jesús vatyi na tyiso ra

ndaha ra xiñi ndotyin. Soco cuhva cha nanyehę ra cachicá noo chihin ra vaty tyicuan caa, ña chaha ca ra. ¹⁶Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyin nu nyai. Ta ma casi ndo, vatyí ñu nyacá ñaha Nyoo ańima, cuví ñu tari ra cuatyaa ihya. ¹⁷Ta catyí chi ndo vatyí tatu ña ita iñi ndo chi Nyoo, tari noo ra cuatyaa ita iñi ndotyin chi sutu ndotyin, ma cuví quihvi ndo nu nyacá ñaha Nyoo.

**Nu chahá ra Jesús tuhun vatyí yii
xaan nacuhva cuenda noo
ra tyayii chi ra chi Nyoo**

(Mt. 19.16-30; Mr. 10.17-31)

¹⁸Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñayivi cha ma naa ca maa coi? —catyí ra.

¹⁹Tyicuan ta catyí ra Jesús chi ra:

—¿Ñáa tuhun catyún vatyí ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.) ²⁰Yoho chitón tandihi tuhun cha tachí Nyoo tyi sacuvi yo: “Cha ma coo inga ñusihí chuun. Ma cahñun chi ñáyivi. Ma suhun. Ma cahun cuendu siqui ñáyivi. Ta sahun ñáyivi chi sutun ta chi sihun” —catyí ra Jesús.

²¹Tyicuan ta ra cuan catyí ra:

—Tandihí ihya ta quichahí nyata luhli ta nyacua nya vityin —catyí ra.

²²Nu chiñi ra Jesús cha catyí ra cuan, tyicuan ta catyí ra chi ra:

—Soco cumańi sacuvun nonga cha sacuvun. Xico tandihí cha iyó chuun. Ta cuhva chi ñu ndahvi. Ta quichun chate. Tyicuan ta coo cha tyayii chuun nya gloria —catyí ra.

²³Soco ra cuan nu chiñi ra tuhun cuan, nducuihya xaan iñi ra, vatyí tyayii xaan

ra. ²⁴Cha nanyehę ra Jesús vatyí nducuihya iñi ra, ta quichaha catyí ra:

—Yii xaan ta cuvi nacuhva cuenda ñu tyayii chi ñu na cunyaca ñaha Nyoo ańima ñu. ²⁵Tańi tyehe yaha noo camello xiu noo yiqui ticu, ta ñima ca cha quihvi noo ñu tyayii nu nyacá ñaha Nyoo —catyí ra.

²⁶Ta ñu cha cachiñi tuhun ihya catyí ñu:

—Tatu tyicuan caa, ¿yóo cha cuví cacu vii? —catyí ñu.

²⁷Tyicuan ta ra Jesús catyí ra:

—Tandihí cha ña cuví sacuvi rayii, Nyoo cuví sacuvi ra —catyí ra.

²⁸Tyicuan ta ra Pedro catyí ra:

—Sutu Mańi yuhu, nyuhu tandihí maa cha iyó chi ndi sandoo ndi, ta nyicón ndi chuun —catyí ra.

²⁹Tyicuan ta catyí ra Jesús chi ra:

—Cha ndicha catyí chi ndo. Vatyí tandihí ndo cha sandoo ndo vehe ndo, o ñasihí ndo, o yańi ndo, o sutu ndo, o sehe ndo cha catyí cha chaha ndo cha cunyaca ñaha Nyoo ańima ndo, ³⁰cuaha xaan cha vaha cunańihí ndo ihya ñayivi ta cunańihí ndo inga ñayivi cha ma naa ca maa —catyí ra Jesús.

**Inga chaha sacotó ra Jesús yoso
caa cucahñi ñáyivi chi ra**

(Mt. 20.17-19; Mr. 10.32-34)

³¹Ta cana siin ra Jesús chi ndi uchi uvi ra cachicá noo chihin ra, ta catyí ra chi ra:

—Vityin cahun yo nya Jerusalén. Vatyí yucuan cuchino cava tandihí tuhun cha tyaq ra profeta Nyoo ta cha naha. Vatyí yuhu Rayii cha quichí nya gloria cuví. ³²Vatyí cucuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucuhan ra chii. Ta cutycusi ra nui. ³³Ta cucañi ra chii, ta cucahñi ra chii, soco nu cu uńi quivi ta cunandote —catyí ra Jesús.

³⁴Ta ra cachicá noo chihin ra ña cutuñi ñni ra tuhun cuan ni ña cachitó ra ñáá tuhun cahán ra Jesús chihin ra. Vatyí ña chahá Nyoo vatyí cacutuñi ñni ra.

**Nu sananyehé ra Jesús chi noo
ra cuaa ñuu Jericó**

(Mt. 20.29-34; Mr. 10.46-52)

³⁵Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan. ³⁶Tyicuan ta chiñi ra vatyí cuaha xaan ñáyivi cua yaha. Ta ndaca tuhun ra ñáá cha cuví cuan. ³⁷Ta ñáyivi nacatyí ñu chi ra vatyí ra Jesús, ra ñuu Nazaret, ican cua yaha cuan. ³⁸Tyicuan ta quichaha cana chaa ra:

—¡Yoho Jesús, ra vachi tata rey David!
¡Cundahvi cuñi nyehun chii! —catyí ra.

³⁹Ta ra cha cuahan coyo ityi nuu cuan, quichaha cacatyí ra chi ra, nacasi ra yuhu ra. Soco chaa ca caná chaa ra, ta catyí ra:

—¡Yoho, ra vachi tata ra David!
¡Cundahvi cuñi nyehun chii! —catyí ra.

⁴⁰Tyicuan ta chicuiñi ra Jesús yucuan. Ta tachí ra tyiño na cuquehen chi ra cuaa cuan. Ta cuhva cha chaá ra cuaa cuan nu nanyaá ra Jesús, ta ra Jesús quichaha ndaca tuhun ra chi ra, ta catyí ra:

⁴¹—¿Ñáá cha cuñún vatyí sacuvi chuun?

Tyicuan ta ra cuaa cuan nacahan ra, ta catyí ra:

—Sutu Mañi yuhu, cuñi nanyehi
—catyí ra.

⁴²Tyicuan ta catyí ra Jesús chi ra:

—Nanyehé. Cha nduvahá chiti nuun,
vatyí chinó ñnun chii —catyí ra.

⁴³Ta caa cuhva ri cuan, ra cuaa cuan nanyehé ra. Ta cuahan ra chata ra Jesús. Ta sacahnú ra chi Nyoo. Ta tandiñi ñáyivi cha nyehe ñu tyicuan caa, sacahnú ñu chi Nyoo.

Nu cuahan ra Jesús vehe ra Zaqueo

19 Yucuan ta quihvi ra Jesús ñuu Jericó cuan. Ta cua yaha ra chichi ñuu cuan. ²Ta yucuan iyó noo ra tyayii vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra. ³Ta cuñi xaan ra cohon nuu ra chi ra Jesús. Ta ña cuví nyehe ra chi ra vatyí cuaha xaan ñáyivi. Ta maa ra tyaha xaan ra. ⁴Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuví nyehe ra chi ra. ⁵Ta cuhva cha yahá ra Jesús nanyehé ndaa ra ityi siqui ta nanyehé ra chi ra Zaqueo. Ta quichaha catyí ra chi ra:

—Zaqueo, sanumi ta noun nu yutun chiña. Vatyí vityin cuhin vehun —catyí ra chi ra.

⁶Tyicuan ta numi ri noo ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra. ⁷Ta cha nyehe ñáyivi cha tyicuan caa, ta tandiñi ñu quichaha cahán nyaa ñu chi ra Jesús. Ta catyí ñu vatyí ndoo ra vehe noo ra iyó cuatyí. ⁸Nu canyicú ra chichi vehe cuan, ra Zaqueo nicuinanyaá ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chi ñáyivi chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyí ra chi ra.

⁹Tyicuan ta catyí ra Jesús:

—Vityin cacu añimon, ta ñáyivi chi ra Abraham cuvún. Vatyí nacuhva cuendon chuun chi Nyoo tari nacuhva cuenda ra Abraham chi ra chi Nyoo. ¹⁰Vatyí yuhu Rayii cha quichi nya gloria vachi nan-duqui ta vachi sacaqui chi ñáyivi cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chi yo

(Mt. 25.14-30)

¹¹ Ta cha ni ri ca cha chiñí ñáyivi tuhun cahán ra Jesús, quichaha cahan tucu ra inga cuhva ihya. Vatyí cha cuyatyin chaa ra Jerusalén. Ta ñáyivi cuñí maa ñu vatyí cha cua quichaha ra cunyaca ñaha ra yucuan. ¹² Tyicuan ta catyí ra:

—Chiyo noo ra vaha ta cuñí cuhun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha cuví ra rey. ¹³ Ta cuhva cha cumañi cuhun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra. ¹⁴ Soco suhva ñáyivi ñuu ra, tasi cuñí ñu nyehe ñu chi ra ta ña cuñí ñu cha cuví ra rey chi ñu. Ta tachí ñu chi suhva ra cuhun chata ra, vatyí catyí ra vatyí ña cuñí ñu cha cuví ra rey chi ñu. ¹⁵ Soco ra cuan nduvi ra rey. Tyicuan ta nachaa ra nya ñuu ra. Ta quívi cha nachaa ra, cana ra chi musu ra, ra cha sandoo ra xuhun chii. Vatyí coto ra yoso saha ganaa xuhun ra cha ni ri ca cha chahan ra. ¹⁶ Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra. ¹⁷ Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiñon chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chi ra. ¹⁸ Tyicuan ta chaa tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra. ¹⁹ Tyicuan ta catyí rey chi ra: “Yoho cunyaca ñahun ohon tahan ñuu”, catyí ra. ²⁰ Tyicuan ta chaa tucu inga ra cuan. Ta quichaha catyí ra: “Ma xuhun

ihya cha chahun chii. Yuhu chicumi vahi chichi noo pañitu. ²¹ Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyivi”, catyí ra cuan. ²² Tyicuan ta rey cuan catyí ra chi ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehin cha ña saha tyiño, ²³ ¿ñáá tuhun ña chahun ta chityihun xuhin banco vatyí nachai soco cha nducuaha ca xuhin?” catyí rey cuan. ²⁴ Ta quichaha catyí ra chi ra canyicú cuan: “Tinya ndo xuhun cha chahí chi ra, ta cuhva ndo chi ra cha saha ganaa uchi ca tahan cuan”, catyí ra. ²⁵ Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chi ra”, catyí ra. ²⁶ Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca saha tyiño chihin cha chahí chi, cucuhva que chi ra. Ta ra cha chahí chiin ri, ta ña cuñí ra saha tyiño ra chihin cuan, cutinyaa ndihi chi ra. ²⁷ Ta tandihi ñu xaan iñi chii, ñu ña cuñí vatyí cunyaca ñahi chi ñu, nyaca ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

Nu cua chaa ra Jesús Jerusalén

(Mt. 21.1-11; Mr. 11.1-11; Jn. 12.12-19)

²⁸ Cha yaha cahan ra Jesús cuhva cuan, ta sañihi ra cuahan ra ityi Jerusalén. ²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra. ³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuñí ti. Ndachi ndo chi ti. Ta nyaca ndo chi ti tyehe. ³¹ Tatu yóo cha catyí chi ndo:

“¿Ñáá tuhun cha ndachi ndo chi ti?” catyi ndo chi ñu: “Vatyi chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihí ra chi ti tari cuhva catyi maa ra Jesús. ³³ Ta cuhva cha candachi ra chi ti, chaꝥ coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña? —catyi ra.

³⁴ Tyicuan ta canacahan ra cuan ta cacati ra:

—Ndachí ndi chi ti vatyi chiñuhú ti chi maa ra nyacá ñaha —catyi ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaa ra chi ra Jesús siqui ti. ³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan. ³⁷ Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha cana chaa tandihi ñu chinó iñi chi ra chihin cha sii cuví chi ñu. Ta sacahnú ñu chi Nyoo vatyi cuaha xaan cha vaha nyehe ñu cha sacuvi ra. ³⁸ Yucuan chaha catyi ñu:

—¡Na sacahnu yo chi Rey ihya vatyi vachi ra chihin sivi Nyoo! ¡Na coo cha taxi ri andivi! ¡Ta na sacahnu yo chi Nyoo! —catyi ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacati ra:

—Maestro, sacutaxin chi ñu nyicón chuun —cacati ra.

⁴⁰ Nacahan ra Jesús ta catyi ra:

—Tatu ñáyivi ihya ta cu taxin ñu, nyacua nya yuu ta nacana chaa chi, ta sacahnu chi chii —catyi ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyi cuihya iñi ra. ⁴² Ta catyi ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chiñi tuñi cuan, ta ña nañihí maa ndo. ⁴³ Soco cucaa quivi ña vaha vatyi ra xaan iñi chi ndo cutyihí chacu ra chi ndo. Vatyi tandihi ri ityi cuquichi coyo ra siqui ndo. Ta cucañi tahan ra chihin ndo. ⁴⁴ Ta cucacun ñuhú ra chi ndo ta cucañi ra chi ndo. Ta ni noo yuu yoso nyitahan ta ma sandoo ra. Tyicuan caa cucuvi vatyi ña cuñi ndo nacoto ndo cha quichi Nyoo quichi sacacu ra chi ndo.

Nu tavá ñehe ra Jesús chi ra caxico chichi vehe ñuhu cahnu

(Mt. 21.12-17; Mr.

11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihi ra caxico ta casatá yucuan. ⁴⁶ Ta catyi ra chi ra:

—Nu tutu Nyoo catyi chi vatyi vehe Nyoo, nu chicán tahvi yo chi ra cuví. Soco nyoho sananduvi ndo vehe nu nyicú ra suhu —catyi ra.

⁴⁷ Ta tandihi quivi chahán ra Jesús chisañaha ra chi ñáyivi chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra cuhva yoso caa ta cahñi ra chi ra. ⁴⁸ Soco ña ñihí maa ra cuhva yoso caa sacuvi ra. Vatyi tandihi ñáyivi ta vaha tyasohó ñu tuhun cahán ra Jesús.

Nu ndaca tuhun ra fariseo chi ra Jesús yóo cha tachí chi ra vatyi cahán ra nuu ñáyivi

(Mt. 21.23-27; Mr. 11.27-33)

20 Noo quivi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta chaꝥ coyo ra cuví nuu chi tata sutu chihin ra casacuahá cuenda ley vehe ñuhu, iin ri

chihin ra cacuví mandoñi. ²Ta cacatyí ra chi ra:

—Catyí chi ndi ¿yóó cha tyaḡ tyiño chuun vatyí sacuvun tyehe caa? —catyí ra.

³Tyicuan ta ra Jesús quichaha catyí ra chi ra:

—Yuhu tucu cua ndaca tuhin noo tuhun chi ndo. ⁴¿Yóó cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi?

⁵Tyicuan ta cacatyí ra cuan chi ra tahan ra:

—Tatu catyí yo vatyí Nyoo tachí chi ra Juan cuan, cucatyí ra chi yo “Ñáá tuhun ña chinó iñi ndo tuhun cahḡn ra.” ⁶Ta tatu catyí yo vatyí ñáyivi tachí chi ra, ñáyivi cahñi ñu chi yo chihin yuu. Vatyí tandihí ñu, ta cuñí ñu vatyí Nyoo tachí chi ra —cacatyí ra.

⁷Tyicuan ta cacatyí ra chi ra Jesús vatyí ña cachitó ra yóó cha tachí chi ra Juan vatyí na sacondutya ra chi ñáyivi.

⁸Tyicuan ta ra Jesús catyí ra chi ra:

—Ni ri yuhu, ta ma catyí chi ndo yóó cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cucahñi chi ra

(Mt. 21.33-44; Mr. 12.1-11)

⁹Tyicuan ta quichaha catyí ra Jesús noo cuhva ihya chi ñáyivi:

—Noo ra tachí ra cuaha yoho tichaha ndivi nu ñuhú ra. Yahaḡ cuan ta chahaḡ noo ra ñuhú cuan chi suhva ra casaha tyiño. Tyicuan ta naha cuahan ra inga ñuu. ¹⁰Ta chaḡ quivi cha iñí chiti cuan. Tyicuan ta tachí ra chi noo musu vatyí cuquehen ra suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndii ra. ¹¹Tyicuan ta chitoho yoho tichaha ndivi cuan tachí tucu ra chi inga musu. Suri cacañi xaan ra chi ra. Ta cacahan uhvi ra chi

ra. Ta natachí ra chi ra. Soco suri ñahri cachaha ra cuiso ra cunuhu. ¹²Tyicuan ta chitoho cuan tachí tucu ra chi inga ra. Soco suri tyicuan caa chinyacuvi tucu ra chihin ra. Ta sañicueheḡ ra chi ra. Ta tavaḡ ñehe ra chi ra yucuan.

¹³Yahaḡ cuan ta quichaha catyí chitoho ñuhu cuan: “¿Yoso caa cunyacuvi vityin? Cua tachi chi sehi, ra cha cuñí vavahi. Ta cha nanyehe ra chi ra, vasi casaha ra ñáyivi chi ra, vatyí sehi cuví chi ra.” ¹⁴Soco cuhva cha cananyeheḡ ra casahá tyiño cuan chi ra, catyí ra chi ra tahan ra: “Ican ra ihya cundoo chihin ñuhú ihya tatu chihi sutu ra. Soco nacañi yo chi ra. Vatyí ndoo maa yo chihin ñuhú ihya”, catyí ra. ¹⁵Tyicuan ta tavaḡ ñehe ra chi sehe chitoho ñuhú cuan ityi chata chacu. Ta cachahñi ra chi ra —catyí ra Jesús.

Tyicuan ta catyí ra Jesús chi ñáyivi nyicú cuan:

—¿Ñáá cha cusacuvi chitoho ñuhú cuan chi ra cachahñi chi sehe ra cha cuhva cha cuñí nyoho? ¹⁶Catyí chi ndo vatyí quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyí ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyí ñu:

—iÑa cuñi Nyoo ta cuvi tyicuan caal —catyí ñu.

¹⁷Soco ra Jesús nanyehe ra chi ñu ta catyí ra:

—Tyicuan caa cucuvi. Vatyí nyaá nu tutu Nyoo ta catyí chi tuhin tyehe caa: Yuu cha ña cuñí ra casavahá vehe coty-iño ra,

Ican cuan cuví yuu cha niñi ca.

¹⁸Tari tahnu noo ra cha canacava siqui yuu, tyicuan caa tivi ñu ña cuñí quichaha tuhun cahín. Ta siñ ri, tari taxin nyihí noo ra cha canacava yuu siqui, tyicuan caa cunaa ñu ña cuñí quichaha tuhun cahín —catyí ra Jesús.

¹⁹Ta ra cacuví nuu chi tata sutu ta ra cacacuahá cuenda ley vehe ñuhu catuví iñi ra vatyí tuhun cha catyí ra Jesús, chi maa ra ñañi cuan. Ta cuñí ra catiín ra chi ra Jesús vatyí cacahñi ra chi ra. Soco ña cachitó maa ra yoso caa. Vatyí yuhví ra chi ñáyivi.

Tuhun cha tyiyahví ñu xuhun chi gobiernu ñuu Roma

(Mt. 22.15-22; Mr. 12.13-17)

²⁰Tyicuan ta catachí ra chi suhva ra vatyí cunducu nyehe ra chi ra Jesús. Ta casaha ra tyi ra vaha cacuví ra. Vatyí coto ra ñáá noo tuhun ña vaha cahán ra Jesús tacuhva cuví catiín ra chi ra. Ta cuhva cuenda ra chi ra chi gobernador. ²¹Yucuan chaha candaca tuhun ra casavaha chii cuan chi ra Jesús:

—Maestro, chitó ndi vatyí vaha tuhun cahún. Ta sañahún cha vaha chi ñáyivi. Ta ñima cuhva iyó ri ñu nyehun soco añima ñu ñandihi. Ta maa ri maa ityi Nyoo sañahún. ²²Catyí chi ndi ¿atu vaha cha tyiyahvi yo cha chicán gobiernu ñuu Roma chi yo, o ña vaha? —catyí ra.

²³Soco ra Jesús tuví iñi ra vatyí cuñí ra nducu nyehe ra chi ra. Ta catyí ra chi ra:

—¿Ñáá tuhun cuñí ndo nducu nyehe ndo chii? ²⁴Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya? —catyí ra.

Tyicuan ta nacahan ra cuan, ta catyí ra:

—Nuu gobiernu, ta sivi ra ñandihi —cacatyí ra.

²⁵Tyicuan ta catyí ra Jesús:

—Tu tyicuan caa, cuhva ndo xuhun chiña chi ra cuví gobiernu cuan vatyí chi maa ra tahán chi. Ta cuhva tucu ndo chi Nyoo cha tahán chi chi ra —catyí ra Jesús chi ra.

²⁶Ta ña cuví maa sandahvi ñaha ra chi ra Jesús chihin tuhun cahán ra nuu

ñáyivi. Ta iyo xaan cacuñí ra tuhun cha nacahan ra. Ta taxi ri cuví ra.

Nu cacuñí ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷Cha yaha cuan ta chaç coyo suhva ra saduceo nu nyaá ra Jesús. Maa ra cuví ra casañahá vatyí ña nandotó ndiyi.

²⁸Tyicuan ta catyí ra chi ra Jesús:

—Maestro, sandoo ra Moisés tuhun ihya vatyí tatu noo ra chihí ra ta ndoo ñasihi ra, tatu yori sehe ra chiyo chihin ña, tahán chi cha tandaha yañi ra chihin ña tacuhva cha ma cunaa tata yañi ra. ²⁹Soco cuñí ndi coto ndi vatyí chiyo ucha tahan ra chihin yañi ra. Ta ra cha ñihi ca chicoo ñasihi ra, soco yori sehe ñu chiyo, ta chihí ra. ³⁰Tyicuan ta naquehen ra cha cu uvi suri maa ña cuan. Ta yori tucu sehe ñu chiyo. Ta chihí tucu ra cuan. ³¹Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyo chihin ña. ³²Ta nu ndihi tuhun chihí ndihi maa ña. ³³Ta cuñí ndi coto ndi yóó ra cuví ñasihi chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴Tyicuan ta nacahan ra Jesús, ta catyí ra:

—Ihya ñayivi, rayi ta ñusihi tandaha ñu. ³⁵Soco ñu cha tahán chi nandoto inga ñayivi nu nyacá ñaha Nyoo, ña tandaha ca ñu ta ní ma cuhva ca ñu sehe ñu tandaha. ³⁶Ta ñahri tuhun chihi iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto ñu. ³⁷Cha ndicha cuví vatyí ra Moisés nu sacoto ra tuhun cha cayu taca iñu cuan, yucuan sacotó ra chi yo vatyí ñu chihi nandotó ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra.

³⁸ Vatyí Nyoo ñíma Nyoo cuenda ñáyiví chihí cuví ra. Nyoo cuenda ñu nyitó cuví ra. Vatyí cha cuenda Nyoo tandíhi yo ta nyitó añima yo vasi chihí coño ñuhu yo —catyí ra Jesús.

³⁹ Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

⁴⁰ Yucuan ta ña caña ca maa iñi ra candaca tuhun ra ñáá ca tuhun chí ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tyicuan ta ndaca tuhun ra Jesús chí ñu:

—¿Ñáá tuhun cha catyí ndo vatyí ra Cristo tata ra David vachi ra? ⁴²⁻⁴³ Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chí ra:

“Cunyaa chiyo vahi nyacua nya cuhve chí ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuví chí ra Cristo, ta suri maa ra David catyí vatyí Sutu ra cuví chí ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr.

12.38-40; Lc. 11.37-54)

⁴⁵ Tandíhi ñáyiví cachiñí ñu tuhun cahán ra Jesús chihin ra cachicá noo chihin ra nu catyí ra tyehe caa:

⁴⁶ —Saha ndo cuenda chí ndo chihin ra casacuahá ley vehe ñuhu. Tahán xaan iñi ra cuihno ra sahma cañi. Ta cuñí ra vatyí saha ndo ñáyiví chí ra nuyahví ta cuhva ndo nocumi chí ra. Ta nanducú ra tyayu vaha cunyaa ra chichi vehe ñuhu

ta nu cuahan ra vico. ⁴⁷ Ta naha chicán tahví ra chí Nyoo nu tuví, cha cuñí ra cha catyí ñáyiví tyi vaha ñáyiví cuví ra. Soco suri maa ra tinyaá ra vehe ñu ndahví cha chihí yíi vatyí ña cuví tyiyahví ñu xuhun cha tavá ra siqui ñu. Yucuan chaha ñihi ca cutachi tuñi Nyoo chí ra —catyí ra Jesús.

Noo ofrenda cha chaha noo ñaha sihi cha chihí yíi

(Mr. 12.41-44)

21 Ta nyehe ra Jesús vatyí cuaha xaan ñu tyayíi catyihí ra xuhun chichi caja cha nanyaá chichi vehe ñuhu cahnu. ² Ta nyehe tucu ra noo ñaha ndahví cha chihí yíi. Ta tyihí ña uvi tahan ri xuhun cuatyí. ³ Ta catyí ra Jesús:

—Cha ndicha catyí chí ndo vatyí nuu Nyoo cuaha ca tyihí ñaha ndahví ihya ta ñima ca tandíhi ñu tyayíi cuan. ⁴ Vatyí cha ndoó ri siqui chí ñu catyihí ñu. Soco ñaha ihya tyihí ña tandíhi cha iyó chí ña —catyí ra.

Nu catyí ra Jesús vatyí cucani ñáyiví vehe ñuhu cahnu

(Mt. 24.1-2; Mr. 13.1-2)

⁵ Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaquí xaan yuu. Tyaquí xaan tacaá cha chaha ñáyiví. Tyicuan ta quichaha catyí ra Jesús:

⁶ —Coo quiví ta tandíhi cha nyehé ndo ihya cutaní. Ni noo yuu ta ma coso ca siqui tahan. Vatyí cusanacoyo ra xaan iñi chí ndo.

Ñáá ndíhi seña cha cucuvi cha ni cumañi ca naa ñayiví

(Mt. 24.3-28; Mr. 13.3-23)

⁷ Tyicuan ta quichaha candaca tuhun ra chí ra Jesús, ta catyí ra:

—Maestro, ¿ama cucuvi tandíhi tuhun cahun ihya? ¿Yoso caa ta coto ndi tatu

cha cuyatyin cha naa ñáyiví? —cacatyí ra.

⁸Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sívi, ta cucatyí ra: “Yuhu cuví Cristo ra cha saquichi Nyoo chi. Cha cuñí cunaa ñáyiví”, cucatyí ra. Soco ma cunyicon ndo chí ra. Ta ma chino iñi ndo chí ra. ⁹Ta quívi ñihi ndo tuhun tyi iyó cuatyí ta cañí tahan ñáyiví, ma nayuhvi ndo. Vatyí tandihi cuan cutahan chi cuvi xihna ca. Soco cumañi ca chaa quívi cha naa ñáyiví.

¹⁰Ta catyí tucu ra:

—Ñáyiví iyó noo ñuu cucañi tahan ñu chihin ñáyiví inga ñuu. Ta cucoo cuatyí.

¹¹Ta cutaan nahnu. Ta cucoo tama. Ta cucoo cuehe tandihi ri ityi. Ta cunyehe ñáyiví cuaha xaan cha yuhví andívi. Cuaha xaan seña nahnu cha ña tuhvá ñu nyehe cunyehe ñu. ¹²Soco cha cumañi ca cuvi ihya, cutasi iñi ñáyiví chi ndo. Ta cucacan ñu cuatyí chaha ndo. Vatyí cucutuñi chi ndo ta cucuhva cuenda ñu chi ndo chí tata sutu. Ta cutyihí ñu chi ndo chichi vehe caa. Ta cunyaca ñu chi ndo nuu rey ta nuu ra cacuví tyiño cha catyí yuhu. ¹³Tyicuan ta cuvi cahan ndo tuhun chihin ñu. ¹⁴Soco saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan. ¹⁵Vatyí yuhu cucuhve tuhun cunacahan ndo. Ta cucuhve cha chiñi tuñi xiñi ndo. Vatyí ni noo ra xaan iñi chi ndo ta ma cuvi chasaha ra chi ndo chihin tuhun cahán ra. ¹⁶Soco ñáyiví cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta síhi ndo, yañi ndo, tahan ndo, ta ra tahan ndo cunacuhva cuenda ra chi ndo chí ñu xaan iñi chí ndo. Ta yihí nyoho cucañi ñu chí ndo. ¹⁷Tandihí ñáyiví ta cutasi cuñí ñu nyehe ñu chí ndo cha catyí yuhu. ¹⁸Soco ni noo ixi xiñi ndo ta ma cunaa. ¹⁹Tatu ma ndu uvi iñi ndo chii, cucacu añima ndo.

²⁰Quívi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quívi cha sanaa ra ñuu ihya. ²¹Ta ñáyiví cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiqui, ma ndichi ñu ñuu ihya. ²²Vatyí yucuan quívi cutachi tuñi Nyoo chí ñáyiví ñuu ihya. Vatyí cuchino cava tandihí cuhva catyí maa nu tutu Nyoo. ²³Ta ndahvi ñusihí cha ñohó sehe quívi cuan. Ta ndahvi ñu cha iyó cha lee sehe cha ni chaxín ca. Vatyí cuaha xaan tindoho cunyehe ñu ta tandihí ñáyiví. Vatyí cuxaan xaan Nyoo chihin ñáyiví ñuu Jerusalén ihya. ²⁴Sindaro cucañi ra chí suhva ñáyiví chihin mityi ra. Ta suhva ñu cutiin ra ta cunyaca ra chí ñu vehe caa inga ñuu. Ta ñáyiví cha ñima ñu Israel cuví, cucuaca chaha ñu Jerusalén nyacua nya quívi cha catyí maa Nyoo.

Yoso caa cuquichi Rayii cha quichi nya gloria inga chaha

(Mt. 24.29-35, 42-44; Mr. 13.24-37)

²⁵Tyicuan ta cuaha cha iyo cunyehe ñáyiví nu ñanyii, ta nu yoo, ta nu tiño. Ta ihya siquí ñuhu ñáyiví cunayuhvi ñáyiví chihin cha iyo cunacatyin tyañuhu. ²⁶Ta cucoña ñu chihin cha yuhví ñu cha chicá xiñi ñu ñáá ndihí cha cua cuvi ihya siquí ñuhu ñáyiví. Vatyí nyacua nya cha iyó andívi cunacanda. ²⁷Tyicuan ta cunyehe ñu chí yuhu Rayii cha quichí nya gloria vachi chichi noo vico tyaquí chihin tunyee iñi Nyoo, ta chihin cha cahnu cuví ra. ²⁸Ta cuhva cha quichaha tuhun ihya, sandunii ndo iñi ndo ta cusii cuñi ndo vatyí numi xaan ta cucacu ndo —catyí ra.

²⁹Tyicuan ta chahá ra Jesús noo cuhva ihya, ta catyí ra:

—Saha ndo cuenda noo yutun cha nañí higuera, o ñáá nonga yutun. ³⁰Tatu cha cua cuyatyin cha coon savi cha

nduyutya numa tun. ³¹Ta tyicuan caa tucu nyoho, tatu cha nyehe ndo vatyí cha quichaha tandíhi tuhun cha catyí chi ndo, coto ndo vatyí cha cuyatyin quívi cha cunyaca ñaha Nyoo síqui ñuhu ñáyivi ihya.

³²Soco catyí chi ndo vatyí tuhun ihya cucuvi cha ní ri ca cha iyó ñáyivi. ³³Ta coo quívi cucunaa andívi ta ñuhu ñáyivi, soco tuhun cahán yuhu, tyicuan ri cucuvi tari cuhva catyí.

³⁴Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan ñi ndo tuhun tundoho ñáyivi ihya. Ta coto sana ñi ndo ta chaa quívi quichi yuhu ta quichi tundoho síqui ndo. ³⁵Vatyí tyicuan caa cucuvi chi tandíhi ñáyivi iyó síqui ñuhu ñáyivi. Sana ñi ñu ta tari noo cha cua nacasi Nyoo nu ñohó ñu ta ma cuvi quita ñu. ³⁶Soco nyoho cuatu tuhva ri ndo. Çacan tahvi ndo chi Nyoo tandíhi quívi, tacuhva tyinyee ra chi ndo. Ta ma cunaa ndo quívi cuan, tacuhva cuvi chaa vaha ndo nuu yuhu Rayíi cha quichi nya gloria —catyí ra Jesús.

³⁷Ta cha ñucahñu sañahá ra Jesús chi tandíhi ñáyivi chichi vehe ñuhu cahnu. Ta cha cha cuaa chahán ra yucu Olivo.

³⁸Ta tandíhi ñáyivi chaa coyo ñu chichi vehe ñuhu cahnu ndíhi ñaha ri. Vatyí cuiñi ñu tuhun cahán ra.

Nu cua xico ra Judas Iscariote chi ra Jesús

(Mt. 26.1-5, 14-16; Mr. 14.1-2,
10-11; Jn. 11.45-53)

22 Ta cha nyaña yatyin quívi cha coo vico pascua vico nu tuhva ñu chachi pan cha ñahri yuchan iya yihí chihin. ²Ta ra cacuví nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyivi.

³Tyicuan ta quihví cuihna chi ra Judas cha catyí ñáyivi Iscariote chi. Ta maa ra cuvi noo ra cha uchi uvi tahan ra cha nacachí ra Jesús. ⁴Ta ra cuan, chahan ra chi cahan ra chihin ra cuví nuu chi tata sutu, ta chihin ra cuví nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús. ⁵Ta ra cuan síi xaan cacuví chi ra. Ta tyaa ra cuhva vatyí cuhva ra xuhun chi ra Judas. ⁶Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra

(Mt. 26.17-29; Mr. 14.12-25;
Jn. 13.21-30; 1 Co. 11.23-26)

⁷Ta chaa quívi cha cuví vico nu chachi ñu pan cha ñahri yuchan iya yihí. Ta suri quívi cuan tuhvá ñu chahñi ñu noo mbee luhlu cha vico pascua cuan. Vatyí cachi ñu chi ti. ⁸Ta ra Jesús tachí ra chi ra Pedro chihin ra Juan, ta catyí ra chi ra:

—Cuahan ndo cua sanduvaha ndo mbee cha cuxiñi yo —catyí ra.

⁹Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —cacatyí ra.

¹⁰Tyicuan ta catyí ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quívi ndutya. Ta cuahan ndo chata ra nyacua nya nu quihví ra chichi vehe. ¹¹Ta çatyí ndo chi chitoho vehe cuan: “Ra Sacuahá, cuñi ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin ra, vatyí casanducahnu ra vico pascua.” Tyicuan caa çatyí ndo chi ra. ¹²Tyicuan ta maa ra cuan cusañaaha ra cuarto cahnu ityi síqui nu cu uvi piso chi ndo. Ta cha yaha nduvii. Ta yucuan

sanduvaha ndo cha cuxiñi yo —catyí ra chi ra.

¹³ Tyicuan ta cuahan coyo ra. Ta nañihí ra tandihí tari cuhva catyí ra Jesús. Tyicuan ta casanduvaha ra cha cuxiñi ra cha vico pascua cuan.

¹⁴ Yucuan ta cha chaq cuhva cha cuxiñi ra Jesús ta tandihí apóstol ra, cachi-cunyicu ra yuhu mesa. ¹⁵ Tyicuan ta ra Jesús quichaha catyí ra:

—Cuñí xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyeñi tundoho ta cúvi. ¹⁶ Vatyí nya ri ca ihya cua cachi ta cucúvi. Yucuan ta cachi tiquí soco nya nu nyacá ñaha Nyoo —catyí ra.

¹⁷ Tyicuan ta quehen ra noo vasu vinu. Ta nacuhva ra tyiyahvi nyoo chi Nyoo, ta sayaha ra chi tandihí ra nyicú chihin ra. Ta quichaha catyí ra:

—Quehen ndo ihya. Ta coho ndo suhva suhva. ¹⁸ Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya —catyí ra.

¹⁹ Ta yaha cuan ta quehen ra pan. Ta nacuhva ra tyahvi nyoo chi Nyoo. Ta tahvi sava ra. Ta chaha ra chi ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri ñochon iñi ndo chii ta cuxiñi ndo tyehe caa —catyí ra.

²⁰ Ta cha yaha cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari niñi cuví. Ta cha catyí nyoho ta cucati niñi. Vatyí cucúvi cha catyí ndo.

²¹ Soco vityin, ra cha cua nacuhva cuenda chii chi ra xaan iñi chii, ñin ri yoso ndaha ra chihin ndahi nu mesa ihya. ²² Vatyí yuhu Rayi cha quichi nya gloria cua cuví chii tari cuhva cha

nyaá maa tyi cuví chii. Soco ñndahvi ra ndahvi, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cahnu ca cuví

²⁴ Yaha cuan ta quichaha candatuhun ra cachicá noo chihin ra Jesús nya ra cahnu ca cuví. ²⁵ Soco ra Jesús catyí ra:

—Chitó nyoho vatyí ra nyacá ñaha chi ñayivi iyó siquí ñuhu ñayivi, ñihi xaan yosó ra siquí ñu. Ta cacuñí ra vatyí catyí ñayivi tyi tyinyee ra chi ñu. ²⁶ Soco nyoho ña tahan chi sacuvi ndo tari sacuvi ra cuan. Vatyí tatu cuñí ndo cuví ndo ra cuví nuu, tahan chi sacuvi ndo tyiño nuu ñayivi. Vatyí tatu sacuvi ndo tyiño nuu ñayivi, ican ndo cuví ra cuví nuu. ²⁷ Vatyí ihya siquí ñuhu ñayivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuvi ra tyiño nuu ra. Soco yuhu ra cuví nuu cuví, ta sacuvi tyiño nuu ndo.

²⁸ Soco nyoho tyicuan ri ndihi ndo chihin, tandihí chaha cha nyehí tundoho. ²⁹ Yucuan chaha, yuhu चाहí noo nu cunyaca ñaha ndo tari cha chaha Suti chii cha cunyaca ñahi. ³⁰ Vatyí cucachi ndo cucoho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaquí. Ta cunyaca ñaha ndo chi ndi uchi uvi tahan ityi ñayivi vachi tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chi ra

(Mt. 26.31-35; Mr.

14.27-31; Jn. 13.36-38)

³¹ Tyicuan ta catyí ra Jesús chi ra Pedro:

—Nyehe vahun, yoho Simón. Vatyí cuihna, ra nañí Satanás, cha chican ra

chi Nyoo na cuhva ra ityi chi ra vatyí quisi ñihno ra chi ndo tari naquisi ñihno yo trigu, tacuhva ndu uvi iñi ndo chi Nyoo. ³²Soco chicán xain chi Nyoo cha catyun, vatyí ma ndihí cha chinó iñun chi ra. Ta quívi ndu uvi iñun cuatyun ta na chino vaha iñun chii cutyinyeun chi ra tahan cha ma sandihí ra cha cachino iñi ra chii —catyí ra Jesús chi ra Simón.

³³Ta ra Simón catyí ra chi ra:

—Sutu Mañi yuhu, cha iyó vahi vatyí cuhin chuhun vasí vehe caa, vasí tuhun chihi —catyí ra.

³⁴Tyicuan ta catyí ra Jesús chi ra:

—Pedro, catyí chuun vatyí vityin cha ni ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñi chaa cuhva cha cunacuhva cuenda ra Judas chi ra Jesús

³⁵Tyicuan ta ndaca tuhun ra Jesús chi ra cachicá noo chihin ra, ta catyí ra:

—Ñicohon iñi ndo quívi cha tachí chi ndo vatyí cucahan noo ndo nuu ñáyivi ta ñahri nyiso ndo, ni ri cha cachi ndo, ni ri xuhun, ni ri sahma ndo. ¿Atu chiyo cha cumañi chi ndo quívi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityí ndo, xico ndo noo sahma ndo ta sata ndo. ³⁷Vatyí catyí chi ndo, vatyí tandihí tuhun cha nyaá nu tutu Nyoo cuchino cava vatyí tyehe caa catyí chi: “Sahá ñu tuhun tyi cuví ra noo ra quíni iyó.” Tyicuan caa catyí tuhun nu tutu Nyoo. Ta tandihí cuan cuchino cava —catyí ra.

³⁸Tyicuan ta quichaha catyí ra cachicá noo chihin ra:

—Ihya nyaá uvi tahan mityí —catyí ra. Tyicuan ta catyí ra Jesús:

—Cha iyó vaha ri —catyí ra.

Nu chicán tahvi ra Jesús chi Nyoo Getsemaní

(Mt. 26.36-46; Mr. 14.32-42)

³⁹Tyicuan ta quitá ra Jesús vehe cuan. Ta cuahan ra nya yucu Olivo. Tari cuhva tuhvá maa ra chahan. Ta ra cachicá noo chihin ra cuahan coyo ra chata ra. ⁴⁰Ta cuhva cha chaa ra yucuan, quichaha catyí ra chi ra cachicá noo chihin ra:

—Cacan tahvi ndo chi Nyoo tacuhva ma cuvi chasaha cuihna chi ndo.

⁴¹Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo, ⁴²ta catyí ra:

—Sutu Mañi yuhu, tu yoho ta cuñun, cuhva cha ma nyehi tundoho ihya. Soco ma cuvi tari cuhva cha cuñi mai. Soco ma cuvi tari cuhva cha cuñi maun —catyí ra.

⁴³Tyicuan ta tuví noo ángel, vatyí cuhva ca ra tunyee iñi chi ra. ⁴⁴Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihí ca chicán tahvi ra chi Nyoo. Ta cuaha xaan tyeen ra quitá ta canacoyó nu ñuhú, ta tari caa ñihí caa.

⁴⁵Yucuan ta nducuita ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehé ra vatyí caquixí ra, cha cuenda vatyí cacuihya xaan iñi ra, ña cacunyee ra ñumahna ta caquixí ra.

⁴⁶Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta cacan tahvi ndo chi Nyoo, tacuhva cha ma cuvi chasaha cuihna chi ndo.

**Nu chaha cuenda ra Judas chi ra
Jesús chi ra xaan iñi chi ra**

(Mt. 26.47-56; Mr.
14.43-50; Jn. 18.2-11)

⁴⁷ Ni cahán ca ra Jesús tuhun ihya, ta cuaha xaan ra cachaa coyo. Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitín ra. ⁴⁸ Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayii cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰ Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha. ⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiín ra chi ra Jesús. Ta quichaha catyí ra Jesús chi ra:

—¿Atu vachí coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo? ⁵³ Ndiqivi chinyaí chichi vehe ñuhu cahnu, ¿ñáá tuhun ña cuví tiín ndo chii? Soco vityin cha cuhva cha ñaa iñi vatyí ra ña vaha nyacá ñaha. Yucuan chaha vachi tiín ndo chii.

**Nu catyí ra Pedro vatyí ña
ñojó nuu ra chi ra Jesús**

(Mt. 26.57-58, 69-75; Mr. 14.53-54,
66-72; Jn. 18.12-18, 25-27)

⁵⁴ Tyicuan ta catiín ra chi ra Jesús. Ta cua nyaca ra chi ra nya vehe ra cuví

nuu chi tata sutu. Ta ra Pedro nyasava ri cuahan ra chata ra. ⁵⁵ Ta cha cha coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunycú cutya ra nicachico ri nu cayú ñuhu cuan. Ta chicunyaá tucu ra Pedro mahñu ñáyivi cuan. ⁵⁶ Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehe ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nuí chi ra cuan.

⁵⁸ Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yahá noo ora, ta nanyehe tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro tuhun cuan, ta chacu chaa ri noo loho.

⁶¹ Tyicuan ta ra Jesús nanyehe ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶² Tyicuan ta quitá ra Pedro ityi chata vehe. Ta chacu vavaha ra cha cuihya iñi ra.

**Nu cachacú nyaa ra chi ra
Jesús ta cacañi ra chi ra**

(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta

cacañi ra chi ra. ⁶⁴Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóo cha cañi chuun —cacatyí ra chi ra.

⁶⁵Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chí ra

(Mt. 26.59-66; Mr.
14.55-64; Jn. 18.19-24)

⁶⁶Ta cha cundichin inga quivi cuan. Ta candu ñin ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷—Catyí chi ndi ¿atu ra Cristo ra cha saquichi Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyí chi ndo vatyí ican, ma chino ñni ndo. ⁶⁸O tatu ndaca tuhun ñáa cha ndaca tuhun chi ndo, ma nacahan ndo ni ma saña ndo chii. ⁶⁹Soco vityin ta ityí nuu ca yuhu Rayii cha quichi nya gloria cucunyai chiyo vaha Nyoo ra cha iyó tandihi tunyee ñni chi —catyí ra.

⁷⁰Tyicuan ta tandihi ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quitá. Ña ñni ca cha tava yo cha ndaa. Vatyí suri maa yo chiñi —cacatyí ra.

Nu nyehe ra Pilato vatyí ñahri cuatyí ra Jesús

(Mt. 27.1-2, 11-14; Mr.
15.1-5; Jn. 18.28-38)

23 Tyicuan ta tandihi ra nducuita ra. Ta cua nyaca ra chi ra nya nu nyaá ra Pilato, ra cuví gobernador. ²Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyí ña vaha tyiyahvi ndi xuhun chi gobiernu ñuu Roma. Ta siin ri catyí ra vatyí ra Cristo ra cha saquichi Nyoo vatyí cuví ra rey cuví ra —cacatyí ra.

³Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyí cahán ra nuu ñáyivi. Cha xihna ri quichaha cahan noo ra nuu ñáyivi ityi Galilea. Ta nicañi maa ityi vachi ra cahán ra chihin ñáyivi nyacua nya chaá ra Judea ihya —catyí ñu.

Nu tachí ra Pilato chi ra Jesús nuu ra Herodes

⁶Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús. ⁷Ta catyí ñáyivi chi ra vatyí ican. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nicahnu Galilea. Soco quivi cuan ñohó ra ñuu Jerusalén. ⁸Ta cuhva cha nanyehe ra Herodes chi ra Jesús, sii xaan cuví chi ra.

Vatyi cha naha xaan cuñí ra nyehe ra chi ra. Vatyi ñihí ra tuhun vatyi cuaha xaan milagru sacuví ra. Ta cuñí xaan ra nyehe ra noo milagru cha sacuví ra Jesús. ⁹Ta cuaha xaan tuhun ndacá tuhun ra chi ra. Soco ra Jesús ña nacahan maa ra. ¹⁰Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyi siqui ra. ¹¹Tyicuan ta ra Herodes chihin sindaro cuenda ra chacu nyaa ra chi ra. Ta sandihví noo ra noo sahama yahvi ta tyaquí chi ra, tari cha tuhvá rey ñihnó. Tyicuan ta natachí ra Herodes chi ra inga chaha nuu ra Pilato. ¹²Ta quivi cuan ra Pilato chihin ra Herodes nduvaha iyó ra chihin tahan ra. Vatyi nu quichi chi, ña cuví canyehe ra chi tahan ra.

Nu cutuñí chi ra Jesús vatyi cucúvi ra

(Mt. 27.15-26; Mr. 15.6:15;
Jn. 18.39—19.16)

¹³Tyicuan ta ra Pilato sandu ñin ri ra chi ra cuví nuu chi tata sutu, ta chi ra cuví tyiño, ta chi ñáyivi ñandíhi. ¹⁴Ta catyí ra chi ñu:

—Nyoho quichí nyaca ndo chi ra ihya chii. Ta catyí ndo vatyi sativí ra chi ñáyivi. Soco yuhu cha sacutuñí chi ra nuu ndo. Ta ñahri cuatyi ra nañihí tari cuhva catyí ndo. ¹⁵Ta ni ri ra Herodes ña nañihí ra ni noo cuatyi ra. Yucuan chaha sandichí ra chi ra inga chaha nu nyai. Nyehe ndo vatyi ñahri cha sacuví ra, ñahri cuatyi ra. Ta ña tahán chi cha cuví ra. ¹⁶Yucuan chaha cua tachi tuñi ri chi ra. Yahá cuan ta sañe chi ra —catyí ra Pilato.

¹⁷Tyicuan caa catyí ra Pilato vatyi cha ni ri ca cha iyó vico cuan, tahán chi cha saña ra noo ra ñohó vehe caa, tari cuhva cha tuhva maa ra. ¹⁸Soco tandíhi ñu ñin ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹Ta ra Barrabás cuan ñohó ra vehe caa cha cuenda cha cuñí ra nacanda ra siqui ra cuví tyiño. Ta siin ri chahñi ra chi ñáyivi. ²⁰Ta ra Pilato cuñí ra saña ra chi ra Jesús. Ta quichaha catyí ra chi ñáyivi cuan inga chaha vatyi cusaña ra chi ra. ²¹Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²²Tyicuan ta cha cu uñi chaha catyí ra Pilato chi ñu:

—Soco çñáá cha ña vaha sacuví ra ihya? Nyehe tyi ña tahán chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

²³Soco ñáyivi caná chaa ca ñu, ta catyí ñu vatyi tyaa ra chi ra nu cruzi. Ta cuví chasaha ñu. Vatyi maa ñu ta ra cacuví nuu chi tata sutu caná chaa ñu. ²⁴Tyicuan ta sacuví ra Pilato tari cuhva catyí ñu. ²⁵Ta tari cuhva catyí ñáyivi, saña ra chi ra Barrabás cha ñohó vehe caa cha cuenda cha cuñí ra nacanda ra siqui ra cuví tyiño ta cha cuenda cha chahñi ra. Ta sacuví ra chi ra Jesús tari cuhva catyí ñu.

Nu cua cunyaa ra Jesús nu cruzi

(Mt. 27.32-44; Mr.
15.21-32; Jn. 19.17-27)

²⁶Yucuan ta quehen sindaro chi ra Jesús. Ta cuahan ra chihin ra. Ta catiñ tucu ra chi noo ra Cirene cha nañi Simón. Ra cuan ni cua ndíchi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷Ta cuaha xaan ñáyivi cuahan chata ra. Ta cuaha xaan ñusihi chacú chaa ñu cha cuihya iñi ñu cha catyí ra. ²⁸Soco ra Jesús nanyehe ra chi ñu. Ta quichaha catyí ra chi ñu:

—Tandíhi nyoho ñusihi ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo. ²⁹Vatyi

cuquichi quivi nu cunyehe xaan ndo tundoho. Ta cucahan ñáyivi chihin tandihi ndo cha cuví ndo ñusihi cha yori sehe ndo iyó. Ta cucatyí ñu chi ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chi ndo. ³⁰ Vatyí quivi cuan cucuñí ñu vatyí na canacoyo yucu siqui ñu tacuhva sahvi chi chi ñu. ³¹ Vatyí tatu tyehe caa sacuvi ñu chihin yuhu cha ñahri cuatyí. Yaha ca cuhva cunyacuvi tucu ñu chihin maa ndo cha iyó cuatyí ndo —catyí ra Jesús.

³² Ta quehen tucu sindaro cuan chi uvi tahan ra quíni iyó, vatyí cahñi ra chi ra iin ri chihin ra Jesús. ³³ Tyicuan ta cachaá ra noo nu nañi Nu Cuví Yiqui Xiñi Ndiyí. Ta yucuan chicatacaá ra chi ra Jesús nu cruzi. Ta tyicuan caa tucu chinyacuví ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra. ³⁴ Ta cuhva cha tacaá ra Jesús nu cruzi cuan, quichaha catyí ra:

—Sutu Mañi yuhu, saha tucahnu iñi chi ra. Vatyí ña chitó ra ñáá cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan. ³⁵ Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶ Ta suri cahán cuehe tucu sindaro chi ra. Ta catuhvā ra chi ra. Ta chahā ra vinu iya coho ra. ³⁷ Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸ Ta siqui cruzi ityi xiñi ra nyaá noo nu tyaá ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹ Ta noo ra quíni iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyí ra.

⁴⁰ Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin. ⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quivi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr.

15.33-41; Jn. 19.28-30)

⁴⁴ Tyicuan ta ñáá cuhva ora quichaha nduñaa ñayivi, nyacua nya caa uñi cha cha iñi. ⁴⁵ Vatyí nduñaa ñanyii. Ta sahma cha tacaá chichi vehe ñuhu cahnú cuan, tahnya sava.

⁴⁶ Tyicuan ta quichaha cana chaa ra Jesús:

—Sutu Mañi yuhu, natyaí añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehé ra tandihi cha cuví cuan. Ta sacahnú ra chi Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸Ta tandihi ñáyivi cha canyicú yucuan canyehe ñu cha cuví cuan. Ta cuahan coyo ñu ta suri cacañi ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chihin ra Jesús. ⁴⁹Ta tandihi ñu cha ñohó nuu chi ra Jesús, ta ñusihi cha chinyicoñ chi ra nya Galilea, canyicú ñu nya sava ri. Ta nyehe ñu tandihi cha cuví yucuan.

Nu cua cuchi ra chi ra Jesús

(Mt. 27.57-61; Mr. 15.42-47; Jn. 19.38-42)

⁵⁰Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel. ⁵¹Ta ra José cuan nyatú ra quívi cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan. ⁵²Tyicuan ta chahan ra chicacan ra coño ñuhu ra Jesús chi ra Pilato. ⁵³Ta yahá cha sanoo ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chi ra chichi noo ñaña chaa cha cuví yavi yuu cha savahá ñu. ⁵⁴Ta viarni cuví, quívi cha sanduvahá ñáyivi cha cachi ñu cha sabaru inga quívi, quívi nyitatu ñu. Ta cha cuñi cuví sabaru.

⁵⁵Ta tandihi ñusihi cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra. ⁵⁶Ta cuanuhu coyo ñu nya vehe ñu. Ta sanduvahá ñu ndutya vixi chahán vatyí cutyihí ñu coño ñuhu ra Jesús coto coo xico. Vatyí tyicuan caa cuví costumbre cuiya cuan. Tyicuan ta nyitatu ñu inga quívi cuan tari cuhva catyí maa tuhun cha tachí Nyoo chi yo.

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

24 Cundichin timingu quívi nu quichaha vitya. Ta ñaha cuiiri

cuahan coyo ñusihi cuan nya nu ñaña ra Jesús. Ta nyisó ñu ndutya vixi chahán cha sanduvahá ñu. ²Ta cuhva cha chaa coyo ñu, nanyehe ñu vatyí ña nyasí ca yavi yuu cuan tari cuhva chinyasí maa. ³Ta quihví ñu chichi, soco ña nañihí ñu coño ñuhu Sutu Mañi yo Jesús. ⁴Ta yucuan tayucú ñu chihin cha yuhví ñu. Ta ña chitó ñu ñáá cunyacuví ñu. Ta tuví uvi tahan rayí nuu ñu. Ta xiño vavaha sahma cañihno ra. ⁵Ta chihin cha yuhví ñu, ta chicuiñi chiti ñu chihin nuu ñu nya nu ñuhú. Tyicuan ta quichaha cacatyí ra cuan chi ñu:

—¿Ñáá tuhun nanducú ndo chi ra Jesús ihya nu ñohó ndiyi? ⁶Yori ra ñohó ihya, vatyí cha nandoto ra. Níçohon iñi ndo tuhun cha cahan ra chihin ndo quívi chicá noo ra Galilea. ⁷Catyí ra vatyí tahán chi cucuhva cuenda ñu chi ra ndaha ra iyó cuatyí. Vatyí cuví ra Rayí cha quichí nya gloria. Ta tahán chi cucahñi ra chi ra nu cruzi. Soco nu cu uñi quívi cunandoto ra. Tyicuan caa catyí ra chi ndo —catyí ángel cuan chi ñu.

⁸Tyicuan ta nicohon iñi ñu tuhun cahan ra Jesús quívi cuan. ⁹Ta cuanuhu coyo ñu. Ta nacatyí ñu chi ndi uchi iin tahan ra apóstol ra Jesús chihin tandihi ca ñáyivi. ¹⁰Ta ñu sacoto tuhun cuan chi ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihi. ¹¹Soco ra cachica noo chihin ra Jesús cuñi maa ra vatyí cahán ri maa ñu. Ta ña chinó iñi ra tuhun cahán ñu.

¹²Soco ra Pedro nducuita ra ta chino vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú inchiyo xiin. Tyicuan ta cuanuhu ra nya vehe. Ta iyo cuñi ra vatyí ñahri ca coño ñuhu ra Jesús catuví chichi ñaña cuan.

Noo cha cuvĭ ityi Emaús

(Mr. 16.12-13)

¹³Suri maa quivi cuan, uvi tahan ra chicá noo chihin ra Jesús cuahan coyo ra nya ñuu cha nañi Emaús, tari noo cha uchi ñin kilómetro cha quita yo Jerusalén. ¹⁴Ta cuahan coyo ra ta ndatuhún ra tuhun ñáá ndihi cha cuvĭ. ¹⁵Ta cha ni ri ca cha candatuhún ra, ta ra Jesús natahan ra chi ra nu cuahan coyo ra. ¹⁶Soco ni ri maa nyehé ra chi ra Jesús, ña canicohon nuu ra chi ra. Vatyĭ tari cha iyó noo cha chasi nuu ra tacuhva cha ma canicohon nuu ra chi ra Jesús. ¹⁷Tyicuan ta quichaha ndaca tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan ñni ndo? —catyĭ ra chi ra.

¹⁸Ta ra cha nañi Cleofas, nacahan ra. Ta catyĭ ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuvĭ ñuu cuan? —catyĭ ra.

¹⁹Tyicuan ta catyĭ ra Jesús chi ra:

—¿Ñáá cha cuvĭ?

Ta quichaha canacatyĭ ra chi ra:

—Tuhun ra Jesús ra ñuu Nazaret. Vatyĭ cuvĭ ra noo ra profeta Nyoo. Ta chihin tunyee ñni cahnu Nyoo sacuvĭ ra cha vaha nuu Nyoo ta nuu ñáyivi. ²⁰Soco ra cacuvĭ nuu chi tata sutu ta ra cacuvĭ nuu cuenda vehe ñuhu, nacuhva cuenda ra chi ra chi sindaro ñuu Roma. Ta cachahñi ra chi ra. Ta chihĭ ra nu cruzi. ²¹Ta cha vityin cha iyó uñi quivi cuvĭ tuhun cuan. Ta nyuhu cuñi maa ndi vatyĭ ican ra cuvĭ ra cusacacu chi ñáyivi Israel. ²²Soco vityin iyo xaan cuñi ndi cha nacatyĭ suhva ñusihi chi ndi. Vatyĭ maa ñu, ñaha cuii ri chahan coyo ñu nu ñaña ra. ²³Ta nacatyĭ ñu chi ndi vatyĭ ñahri ca coño ñuhu ra catuvĭ. Ta nacatyĭ ñu vatyĭ nyehe ñu uvi tahan ángel. Ta catyĭ ángel cuan chi ñu vatyĭ ra Jesús ny-

itó ra. ²⁴Yaha cuan ta chahan coyo tucu suhva ra tahan ndi nu ñaña. Ta nyehe ra vatyĭ cha ndicha cuvĭ tari cuhva catyĭ ñusihi cuan. Vatyĭ ñahri ca coño ñuhu ra Jesús catuvĭ —catyĭ ra chi ra.

²⁵Tyicuan ta ra Jesús catyĭ ra chi ra:

—Chiin xaan cutuñi ñni ndo. Ta cuee xaan chinó ñni ndo tuhun tyaa ra profeta Nyoo ta cha naha. ²⁶¿Atu ña chitó ndo vatyĭ tahan chi cha cunyehe xihna ra Cristo tundoho? Yaha cuan ta tahan chi cuñihi ra tyiño cha cunyaca ñaha ra —catyĭ ra Jesús chi ra.

²⁷Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaa ra Moisés ta cha naha. Ta yaha cuan ta cahan ra tuhun tandihi libru cha tyaa ra profeta Nyoo.

²⁸Ta cuhva cha chaa ra nya ñuu Emaús cuan nu cuahan coyo ra, ta saha ra Jesús vatyĭ cañi ca cuahan ra. ²⁹Tyicuan ta cacatyĭ ra chi ra na ndoo ra chihin ra. Ta catyĭ ra:

—Ndoq chihin ndi vatyĭ cha cua quee ñanyii —cacatyĭ ra.

Tyicuan ta cuahan ra Jesús nya vehe ninduvi ra cuan. ³⁰Ta cuhva cha chicunya ra yuhu mesa chihin ra, quehen ra pan. Ta chaha ra tyahvi nyoo chi Nyoo. Ta chahnu sava ra, ta chaha ra chi ra. ³¹Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra. ³²Tyicuan ta quichaha catyĭ ra chi ra tahan ra:

—Yucuan chaha vaha xaan cuñi ñni yoy cuhva cha vachi ra chihin yo, ta nacatyĭ vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyĭ ra.

³³Ñahri ca cha canyatu ra, ta cuanuhu coyo ra nya Jerusalén. Ta yucuan nañihĭ ra chi ndi uchi ñin ra chicá noo chihin ra Jesús, canyicú ra. ³⁴Tyicuan ta quichaha canacatyĭ ndi uchi ñin tahan ra chi ra cha nichaa coyo cuan:

—Ndicha vatyi Sutu Mañi yo, nandoto ra. Vatyi ra Simón nyehe ra chi ra —catyí ra.

³⁵Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityi cuahan ra ñuu Emaús, ta yoso caa canicohon nuu ra chi ra nu chahnú ra pan.

**Nu tuvi ra Jesús nu canyicu
ra cachicá noo chihin ra**

(Mt. 28.16-20; Mr.
16.14-18; Jn. 20.19-23)

³⁶Ni cahán ca ra tuhun cuan ta tuví ra Jesús nu canyicú ra. Ta chahá ra nocumi, ta catyí ra:

—Na coo cha taxi ri añima ndo.

³⁷Tyicuan ta canayuhví xaan ra. Ta cacuñí maa ra vatyi noo tatyí ri cuví.

³⁸Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi iñi ndo? ³⁹Nyehe ndo ndahi. Ta nyehe ndo chahi. Vatyi suri mai cuví. Tñin ndo chii ta coto ndo. Vatyi tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰Ta cuhva cha catyí ra tuhun ihya, sañahá ra ndaha ra ta chaha ra. ⁴¹Soco maa ra chaha cha iyo cacuñí ra ta sii cacuñí ra nyacua ña chinó vaha iñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴²Tyicuan ta chahá ra chiin yuhu tiyaca tyihyo chihin tyañuñu chi ra. ⁴³Ta quehen ra. Ta quichaha chachi ra. ⁴⁴Ta catyí ra chi ra:

—Tandíhi cha cuví chii, ican ihya cuví cha catyí chi ndo quivi cuan. Ta catyí chi

ndo vatyi tyicuan caa cucuvi, tari cuhva nyaá tuhun cha tyaá ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵Tyicuan ta chahá ra Jesús vatyi na cutuñi iñi tandíhi ra cuan yoso caa catyí nu tutu Nyoo. ⁴⁶Tyicuan ta catyí ra Jesús chi ra vatyi tyicuan caa nyaá nu tutu Nyoo vatyi tahán chi cha cúvi ra Cristo. Ta nu cu uñi quivi nandoto ra. ⁴⁷Ta tahán chi coto ñáyivi tuhun sivi ra Cristo ñuu Jerusalén, ta yaha cuan ta tandíhi ñuu nicahnu ñuhu ñayivi. Tacuhva cuvi ndu uvi iñi ñu ta ndachi cuatyí ñu.

⁴⁸—Ta nyoho cuví ndo cha ndaa tandíhi tuhun ihya. ⁴⁹Ta cusaquichi mai Tatyí Ii Nyoo siqui ndo tari catyí Suti tyi cuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee iñi Tatyí Ii Nyoo cuquihí chi ndo —catyí ra Jesús.

Nu nandaá xica ra Jesús andivi

(Mr. 16.19-20)

⁵⁰Tyicuan ta ra Jesús cuahan ra chihin tandíhi ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra. ⁵¹Ta cha ni ri ca cha nasocó ra chi ra, nandaá xica ra andivi. ⁵²Tyicuan ta tandíhi ra sacahnú xaan ra chi ra. Ta sii xaan cacuví chi ra, cuanuhu coyo ra Jerusalén. ⁵³Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.

Tuhun Nyoo Cha Tyaā San Juan

Tuhun Cahán Nyoo nanduví noo rayii, ta ican cuví ra Cristo

1 Nyata quiví xihna ri, nyata ni cumañi ca coo tandihí cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra. ²Ta chicoo ra chihin Nyoo nyata quiví xihna ri. ³Ta chihin ra, savahā Nyoo tandihí cuui maa cha iyó. Ta ñahri savahā Nyoo cha maa ri maa ra. ⁴Ta chihin ra cuví Tuhun Cahán Nyoo nyaá ñayiví cha maa ca maa. Ta ñayiví cuan, ican cuví cha sacundichín añāma ñáyiví. ⁵Ta cha ndichin ihya, sacundichín chi nu ñaā iñi. Ta cha ñaā iñi ñā cuñihí chi ndahva chi cha ndichin cuan.

⁶Chiyó noo ra cha tachí Nyoo chí. Ta nañí ra Juan. ⁷Quichí ra cuví ra noo cha ndaa. Vatyí cahan ra tumañi iñi cuenda ra cuví cha ndichin cuan, tacuhva vatyí chino iñi tandihí ñáyiví chi ra. ⁸Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan. ⁹Vatyí cha ndichin cha ndicha vaha cuan, ni cuachaa chi siquí ñuhu ñayiví, tacuhva vatyí sacundichín chi añāma tandihí ñáyiví cha iyó siquí ñuhu ñayiví ihya.

¹⁰Ra cuví Tuhun Cahán Nyoo quichí ra siquí ñuhu ñayiví. Ta ican ra cuví ra Cristo. Ta surí maa ra savahā ra ñuhu ñayiví. Soco ñáyiví iyó siquí ñuhu ñayiví, ñā nicohon nuu ñu chi ra. ¹¹Quichí ra nu nyicú ñáyiví cha savahā ra, soco ñáyiví cha savahā ra ñā natiñ cuenda ñu chi ra. ¹²Soco tandihí ñu natiñ cuenda chí ra, ta chinó iñi ñu chí ra, ican chí ñu cuan, chahā ra ityi vatyí nanduví ñu sehe Nyoo. ¹³Vatyí nacacú chaa ñu. Soco ñima tari cacú ñu ta lee ñu cuenda coño ñuhu ñu. Ta ni ñima cha cuenda cha quichi cuví iñi noo rayii

coo ra chihin noo ñahā sibi. Ñima cha cuenda cha cuñí ñáyiví coo sehe ñu. Soco maa Nyoo sanacacú chaa chí ñu.

¹⁴Ta ra cuví Tuhun Cahán Nyoo nanduví ra noo rayii. Ta chicoo ra chihin yo. Ta nyehē ndi cha cahnu cuví ra. Ta cahnu cuví ra vatyí Sehe mañi Sutu yo Nyoo cuví chí ra. Tyitu yihí ra chihin cha ndicha ta tumañi iñi cha cua cuhva ra chí yo. ¹⁵Ta ra Juan cuan cahan ra tumañi iñi cuenda ra, ta catyí ra:

—Ican ra ihya cha cahin tuhun quiví cuan, vatyí ra cha vachi ityi chate, cahnu ca ra cuví ra ican sahā yuhu. Vatyí nyata tyembu chahnu ta cha iyó maa ra —catyí ra Juan.

¹⁶Tandihí yo naquehén cuenda yo tumañi iñi cahnu cha chahā ra chí yo, vatyí nasocó xaan ra chí yo. ¹⁷Ra Moisés chahā cuenda ra ley Nyoo chí yo. Soco ra Jesucristo cundahví iñi ra chí yo ta sahā ra ticahnu iñi cuatyí yo. Ta chahā ra cha ndicha coo chí yo. ¹⁸Ta yori ca maa nyehé chí Nyoo. Notuhun ri maa Sehe mañi ra cha iyó iin ri chihin ra. Ican ra cuví ra chahá cha cohon nuu yo chí Sutu ra.

Nu cahán ra Juan, ra sacondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹Ra cacuví nuu chí ñu Israel cha iyó ñuu Jerusalén, catachí ra chí tata sutu ta chí ra cacuví levita nu nyaá ra Juan na ndaca tuhun ra chí ra yóo ra cuví ra. ²⁰Ta maa ra Juan catyí cachi ra:

—Yuhu ñima ra Cristo cuví.

²¹Tyicuan ta candacā tuhun ra inga chaha chí ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chí ra.

Ta ra Juan nacahan ra:

—Ñima ra cuan cuví.

Ta sañihí ca ra candacā tuhun ra chí ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

²² Ta inga tucu chaha candaca tuhun ra chi ra:

—¿Yóó ra cuví yoho? Vatyí cuñí chi cuiiso ndi tyiño chi ra cha tachí chi ndi. ¿Yóó ra cuví yoho? —catyí ra chi ra.

²³ Ta ra Juan nacahan ra:

—Yuhu cuví ra cahán ta canachaá noo nu chiqui ndii, ta catyí: “Nuña ndo noo ityi ndoo chichi añima ndo vatyí cha vachi Sutu Mañi yo.” Tari cuhva cahan ra Isaías profeta Nyoo tuhun ta cha naha —catyí ra Juan chi ra.

²⁴ Ra cha cacahán chihin ra Juan, ra cacuví fariseo tachí chi ra. ²⁵ Ta candaca tuhun tucu ra chi ra:

—Tatu ñima ra Cristo, ni ra Elías, ni ra profeta cuan cuvún, ¿ñáá tuhun cha sacondutyón chi ñáyivi? —cacatyí ra chi ra Juan.

²⁶ Ta ra Juan catyí ra chi ra:

—Yuhu sacondutyé chihin ndutyá. Soco mahñu ndo nanyaá noo ra cha ña ñohó nuu ndo. ²⁷ Ican ra cuví ra vachi chate. Soco cha iyó maa ra ta caqui. Ta ña naña mai ni cha cuví musu ra ta ndachi ñii xityin ndichan ra —catyí ra Juan.

²⁸ Tandihí tuhun ihya cuví noo nu nañí Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quivi nanyehe ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñáyivi ra tacuhva cahnya ra cuatyí ñáyivi iyó siqui ñuhu ñáyivi. ³⁰ Tuhun maa ra cahin quivi cha catyí chi ndo vatyí cha yaha yuhu ta vachi nonga ra cha cahnu ca cuví

ta ñima ca yuhu, vatyí nyata tyembu chahnu ta cha iyó ra. ³¹ Ni yuhu ta ña ñohó nui chi ra quivi cuan. Soco vachi sacondutyé chihin ndutyá tacuhva vatyí ñu ñuu Israel cohon nuu ñu chi ra —catyí ra Juan.

³² Ta catyí tucu ra Juan ñandihí:

—Yuhu nyehí chi Tatyí Ii Nyoo quichi ityi andivi vachi chi tari noo paloma, ta ndoo chi siqui ra. ³³ Yuhu ta coto que yóó ra cuví ra quivi cuan. Soco Nyoo, ra cha tachí chii na sacondutyé chihin ndutyá, catyí ra chii: “Quivi nyehun Tatyí Ii yuhu, vachi noó siqui noo rayi, ican ra cuan cuví ra sacondutyá chihin Tatyí Ii yuhu”, catyí Nyoo chii. ³⁴ Yuhu cha yaha nyehí chi ra. Ta cuví cha ndaa vatyí ican ra cuví Sehe Nyoo —catyí ra Juan.

Ra cha xihna ca nanyicon chi ra Jesús

³⁵ Cha inga quivi, ra Juan nyaá tucu ra yucuan inga chaha, ta nyicú tucu uvi ra nyicón chi ra. ³⁶ Ta cuhva cha nyehe ra, yahá ra Jesús, ta catyí ra:

—Nyehe ndo, ican ra cuan cuví Mbee Luhlu sana Nyoo —catyí ra Juan.

³⁷ Cha chiñí ninduvi ra nyicon chi ra Juan tuhun cahan ra, ta cananyicon ra chi ra Jesús. ³⁸ Tyicuan ta nanyehe ra Jesús ityi chata ra, ta nyehe ra tyi canyicón ra chi ra, ta catyí ra:

—¿Ñáá cha nducú ndo?

Tyicuan ta canacahan ra ta catyí ra:

—Maestro, ¿nya iyón?

³⁹ Ta ra Jesús catyí ra chi ra:

—Coho ndo chihin. ta nyehe ndo —catyí ra chi ra.

Tyicuan ta cuahan coyo ra chihin ra. Ta canyehe ra nu iyó ra. Ta yucuan cuan ndihí ra vatyí tari cha caa cumi cha cha iñi cuhva cha chaá ra yucuan.

⁴⁰ Chichi cha ninduvi ra cha chiñí tuhun cahan ra Juan ta nanyicon ra chi ra Jesús, noo ra cuví ra ra Andrés yañí ra Simón Pedro. ⁴¹ Ta ra Andrés numi ri

chinanducū ra chi yañi ra, ra Simón, ta catyí ra chi ra:

—Nañihí ndi chi ra cha cuví Mesías —catyí ra.

Ta tuhun Mesías cuan cuñi chi catyí, ra Cristo, o ra cha nacachi vaha Nyoo, vatyí cuví ra rey chi yo.

⁴²Tyicuan ta ra Andrés chinyacá ra chi ra Simón yañi ra nu nyaá ra Jesús. Ta cuhva cha nyehé ra Jesús chi ra Simón, ta catyí ra chi ra:

—Yoho Simón, sehe ra Jonás cuví chuun. Soco cunañun Cefas. —catyí ra chi ra.

Ta Cefas cuñi chi catyí Pedro chihin sahan griego, ta ninduvi tahan sivi cuan, cuñi chi catyí “yuu”.

Nu cana ra Jesús chi ra Felipe ta chi ra Natanael

⁴³Cha inga quivi tyaa ra Jesús cuhva cuhun ra ityi Galilea. Tyicuan ta nañihí ra chi ra Felipe. Ta catyí ra chi ra:

—Cunyicon chii —catyí ra.

⁴⁴Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro. ⁴⁵Tyicuan ta chahan ra Felipe chinanducū ra chi ra Natanael. Ta catyí ra chi ra:

—Nyehé ndi chi ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

⁴⁶Ta catyí ra Natanael:

—¿Atu cuvi quita cha vaha ñuu Nazaret cuan? —catyí ra chi ra Felipe.

Ta nacahan ra Felipe ta catyí ra:

—Ñaha ta nyehun —catyí ra.

⁴⁷Yaha cuan ta cuachaa ra Natanael nu nyaá ra Jesús. Ta cuhva cha nanyehé ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸Tyicuan ta ra Natanael ndaca tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyí ra:

—Yuhu nyehí chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chi ra.

⁴⁹Tyicuan ta quichaha catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰Ta ra Jesús catyí ra chi ra Natanael:

—¿Atu chinó iñun chii cha cuenda vatyí catyí tyi nyehí chuun chaha tun higo? Soco nahnu ca cha cunyahun ican saha cuan —catyí ra chi ra.

⁵¹Ta catyí tucu ra Jesús:

—Cha ndicha catyí chi ndo vatyí nyoho cunyehe ndo andivi cuitanuña ta cuaha ángel Nyoo cundaa ra, ta cunoo ra siqui yuhu ra cuví Rayi cha quichi nya gloria —catyí ra Jesús chi ra.

Noo vico tandaha iyó ñuu Caná ityi Galilea

2Yaha uñi quivi ta chicoo noo vico tandaha ñuu Caná ityi Galilea. Ta sihi ra Jesús ñohó ña yucuan. ²Ta suri canacatyí tuhun ñu chi ra Jesús ta chi ra cachicá noo chihin ra cha cuhun coyo ra vico tandaha cuan. ³Tyicuan ta cuahan coyo ra. Ta nyicú ñu vico, ta ndihí vinu. Tyicuan ta catyí sihi ra Jesús chi ra:

—Ñahri ca vinu ñu —catyí ña.

⁴Ta catyí ra Jesús chi ña:

—¿Ñáa cha cuñun cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵Soco sihi ra catyí ña chi ra cha catyinyeé vico cuan:

—Sacuvi ndo tandihí cha catyí ra chi ndo —catyí ña chi ra.

⁶Ta tayucú iñu tahan quisi yuu nahnu cha quihí ndutya cha catuhvá ra Israel

chotyĩnó nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi o uñi xico uchi litru ndutya. ⁷Tyicuan ta catyí ra Jesús chi ra cha catyinyeé vico cuan:

—Sacutu ndo quisi ihya chihin ndutya —catyí ra chi ra.

Tyicuan ta sacuví ra tari cuhva catyí ra. ⁸Tyicuan ta catyí ra Jesús chi ra:

—Vityin tava ndo suhva ta cunyaca ndo chi ra cuví nuu cuenda vico ihya —catyí ra Jesús chi ra.

Ta tyicuan caa casacuví ra. ⁹Ra cuví nuu cuenda vico cuan chihí ra ndutya cha nanduví vinu cuan. Soco ña chitó ra nya quichi. Maa ri maa ra catyinyee vico cuan cachitó ra, vatyí maa ra catava ndutya cuan. Tyicuan ta ra cuví nuu cuenda vico cuan cana ra chi ra cha tandaha cuan. ¹⁰Ta catyí ra chi ra:

—Tandíhi ñáyivi, xihna ca vinu vaha tuhvá ñu tava. Yaha cuan ta tatu cha cachihí xaan ñu, tyicuan ta tava ñu vinu pehe ca. Soco yoho chicumí vahun vinu vaha. Ta nya vityin tavon —catyí ra chi ra.

¹¹Cha sacuví ra Jesús ñuu Caná ityi Galilea, ican cuan cuví milagru cha xihna ri savaha ra vatyí sañaha ra cha cahnu cuví ra. Ta ra cachicá noo chihin ra cachinõ ñi ra chi ra vatyí ican ra cuví ra cha tachí Nyoo.

¹²Cha yaha cuan ta cuahan ra ñuu Capernaum. Ta cuahan sihi ra, yañi ra ta ra cachicá noo chihin ra. Ta yucuan chinyicu ñu suhva quivi.

Nu tava ra Jesús chi ñu caxicó chichi vehe ñuhu cahnu

(Mt. 21.12-13; Mr.

11.15-18; Lc. 19.45-46)

¹³Cha cuñí chaa quivi vico cha nañi pascua cha sanducahnú ñu Israel. Yucuan chaha cuahan ra Jesús ñuu

Jerusalén. ¹⁴Ta chaa ra ñuu cuan, ta quihví ra nuquehe vehe ñuhu cahnu cuan, ta nanyehe ra chi ra caxicó sindiquí, mbee, ta paloma. Ta na nyehe tucu ra chi ñu nyicú nasama xuhun chi ñáyivi. ¹⁵Ta cha nyehe ra Jesús cha tyicuan caa, savaha ra noo yoho. Ta chihin yoho cuan tava ñehe ra chi tandíhi ñu nuquehe vehe ñuhu ñi ri chihin mbee ta chihin sindiquí sana ñu. Ta ñu nasamá xuhun cuan, sacuita ra xuhun ñu nu ñuhu ta sanduva ra mesa ñu. ¹⁶Ta catyí ra chi ñu xicó paloma cuan:

—¡Tava ndo paloma chiña ihya! ¡Ma nasaha ndo vehe Suti tari noo nuyahvi! —catyí ra chi ñu.

¹⁷Tyicuan ta ra cachicá noo chihin ra, canicohon ñi ra cha catyí nu tutu Nyoo tyehe caa: “Cuiño xain chihin vehun”, catyí chi, nicohon ñi ra.

¹⁸Tyicuan ta quichaha candaca tuhun ra cacuví nuu chi ñu Israel chi ra:

—¿Ñáá seña cuhvon chi ndi ta sañahun vatyí chaha Nyoo ityi chuun cha sacuvun tyehe caa? —catyí ra chi ra.

¹⁹Ta nacahan ra Jesús ta catyí ra:

—Satani ndo vehe ñuhu ihya, ta chichi cha uñi quivi, yuhu cusanandai inga chaha —catyí ra chi ra.

²⁰Tyicuan ta quichaha cacatyí ra cuan chi ra:

—Uvi xico ñu cuiya cañohõ ra casavaha ra vehe ñuhu ihya. Ta yoho catyún tyi chichi cha uñi quivi cusanandaun inga chaha —catyí ra chi ra.

²¹Soco vehe ñuhu cha cahã ra Jesús tuhun, ican cuví coño ñuhu ra. ²²Yucuan chaha ra cachicá noo chihin ra canicohon ñi ra tuhun ihya quivi nandoto ra Jesús. Ta cutuñi ñi ra vatyí tuhun cha nyaá nuu tutu Nyoo cahã chi cuenda ra Jesús. Ta canachinõ ñi ra tuhun cahã ra Jesús ta tuhun cha nyaá nu tutu Nyoo.

Ra Jesús chitó ra cha caá ñáiyivi

²³ Quivi cha ñohó ra Jesús Jerusalén, quivi vico pascua cuan, cuaha xaan ñu nachino iñi ñu chi ra cha cuenda cha cuaha xaan milagru sacuvi ra. ²⁴ Soco ra Jesús ña cunii iñi ra nyehé ra chi ñu vatyi chitó ra cha caá ñáima tandihi ñu. ²⁵ Ña chiñuhú ri cha nacatyí yo chi ra yoso caa ñáyivi, vatyi maa ra chitó ra ñáá cha caá chichi ñáima ñu.

Nu ndatuhún ra Nicodemo chihin ra Jesús

3 Chiyó noo ra fariseo cha ñañi Nicodemo. Ta cuví ra noo ra cuví nuu chi ra ñuu Israel. ² Ra Nicodemo ihya, chahān ra nu nyaá ra Jesús noo cha cuaa. Ta catyí ra chi ra:

—Maestro, chitó ndi vatyi Nyoo tachí chuun quichi sañahun chi ndi. Vatyi yori ñáyivi cuvi sacuvi milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra:

—Cha ndicha catyí chuun vatyi tatu ma nacacu chaa ñáyivi inga chaha, ma cuvi nyehe ñu nu nyacá ñaha Nyoo —catyí ra.

⁴ Tyicuan ta ndacañ tuhun ra Nicodemo ta catyí ra:

—¿Yoso caa cuví cacu noo rayii inga chaha tatu cha chahnu ra? ¿Atu cuví ndihvi ra chichi sihi ra ta nacacu chaa ra inga chaha? —catyí ra.

⁵ Nacahān ra Jesús ta catyí ra:

—Cha ndicha catyí chuun vatyi ñáima chihin cha cacu ri ñáyivi chihin coño ñuhu ñu ta cuví quihvi ñu nu nyacá ñaha Nyoo. Soco ñáni tucu cuñi chi cha nacacu ñu chihin Tatyí Ii Nyoo. ⁶ Vatyi ñáyivi cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí Ii Nyoo, iyó Tatyí Ii Nyoo ñáima ñu. ⁷ Ma iyo cuñun cha catyí chuun

tuhun ihya vatyi tandihi ñu, cuñi chi nacacu chaa ñu. ⁸ Tari caá tatyí tandihi ri ityi nu cuñi chi ta chiñún cayú chi, soco ña chitón nya ityi quichi chi, ni nya ityi cuahan chi; ta tyicuan caa tandihi ñu nacacu chihin Tatyí Ii Nyoo —catyí ra Jesús chi ra.

⁹ Tyicuan ta ndacañ tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahān ra Jesús ta catyí ra:

—Yoho cha cuvún noo ra sacuaha cuenda ñu Israel, tahán chi coton tuhun ihya. ¹¹ Cha ndicha catyí chuun vatyi cahín cha chité ta cuví cha ndaa cha nyehi. Soco nyoho ña chinó iñi ndo cha catyí chi ndo. ¹² Tatu ña chinó iñi ndo chii nu cahín tuhun ñáyivi ihya chihin ndo, ¿yoso caa chino iñi ndo tu cahin tuhun andivi chihin ndo?

¹³ Yori chahān andivi chinyehé yoso caa iyó. Noo ri yuhu Rayii cha quichi nya gloria nyehí, vatyi yucuan iyé. ¹⁴ Tari nacatacañ ra Moisés noo coo cha chino chihin caa nu noo chiqui ndii, tyicuan caa cunacatacañ tucu ñu chi yuhu Rayii cha quichi nya gloria, ¹⁵ tacuhva vatyi tandihi ñu cha chinó iñi chii, ma cunaa ñu. Soco coo ñu ñáyivi cha ma naa ca maa.

Nyoo cuñi xaan ra chi ñáyivi

¹⁶ Vatyi Nyoo cuñi xaan ra chi tandihi ñáyivi iyó siqui ñuhu ñáyivi. Yucuan cuenda chahān ra vatyi cúvi Sehe mañi ra nu cruzi cha cuenda ñu. Tacuhva vatyi tandihi ñu cha chinó iñi chi Sehe ra, ma cunaa ñu, soco coo ñu noo ñáyivi cha ma naa ca maa. ¹⁷ Nyoo ña tachí ra chi Sehe ra siqui ñuhu ñáyivi vatyi sacunaa ra chi ñáyivi, soco tachí ra chi ra na sacacu ra ñáima ñu tacuhva ma cuhun ñu anyaya cha catyí cuatyí ñu.

¹⁸ Vatyi ñu chinó iñi chi Sehe Nyoo ma cunaa ñu, soco ñu ña chinó iñi chi

ra, cha cuanaa ñu cha cuenda cha ña chinó iñi ñu chi noo ri Sehe mañi Nyoo. ¹⁹Ñu ña chinó iñi, cha cuanaa ñu. Vatyí quivi quichi ra cuví ñuhu ndichin cha sa-cundichín siqui ñuhu ñáyivi, ña natiin cuenda ñu chi ra tyi tahan ca iñi ñu nu ñaa iñi vatyí nyacuví ñu cha ña vaha. ²⁰Tandihí ñu cha nyacuví cha ña vaha, ña tahan iñi ñu ñuhu ndichin, vatyí coto quetuví cha ña vaha cha nyacuví ñu. ²¹Soco ñu nyacuví cha ndicha, nanyitá ñu nu ndichin tacuhva na cundichin nyehe ñáyivi vatyí sacuví ñu cuhva cuñí Nyoo vatyí nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

²²Cha yaha tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoo ra suhva quivi yucuan, vatyí casacondutyá ra chi ñáyivi. ²³Tyicuan caa tucu ra Juan cuan ñohó ra sacondutyá ra chi ñáyivi nu cuví Enón yatyin ri nu cuví Salim, vatyí yucuan ñohó cama ndutyá. Ta ñáyivi chaá coyo ñu ta condutyá ñu. ²⁴Tuhun ihya cuví ta ni cumañi ca catyihí ra chi ra Juan vehe caa.

²⁵Tyicuan ta suhva ra nyicón chi ra Juan quichaha cuví yuhu ra chihin noo ra ñuu Israel siqui yoso caa sandundii ñáyivi chi ñu nuu Nyoo. ²⁶Tyicuan ta cuahan coyo ra nu nyaá ra Juan. Ta catyí ra chi ra:

—Maestro, ra cha ñohó chuhun inga chiyo yuvi cahnu Jordán, ra cha cahun tuhun chihin ndí, vityin sacondutyá ra ta tandihí ñu nanyicón ñu chi ra —catyí ra chi ra.

²⁷Tyicuan ta ra Juan catyí ra chi ra:

—Ni noo yo ta ñahri cha cuví sacuvi yo, tyehe ta ña chahá Nyoo tunyee iñi ra chi yo. ²⁸Suri maa ndo chiñi vaha ndo cha cahin vatyí yuhu ñima ra Cristo cuví. Noo ra cha tachí ri Nyoo ityi nuu

ra cuví yuhu. ²⁹Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusii cuñí ra chiñí ra tuhun cahán ra cha cuatandaha. Ta tyicuan caa tucu yuhu, sii cuñí vatyí naquehen ñáyivi tuhun cahán ra Jesús ta nyicón ñu chi ra. ³⁰Maa ra cahnu ca ra cuacuvi ra. Ta yuhu cunocuee que vatyí tyicuan caa tahan maa chi.

Ra quitá nya gloria ta quichi siqui ñuhu ñáyivi

³¹'Ra cha quichi nya gloria, cahnu ca ra cuví ra cha nuu tandihí ñáyivi. Vatyí ra iyó siqui ñuhu ñáyivi, cuenda ñuhu ñáyivi cuví ra. Ta cahán ra tuhun ñuhu ñáyivi. Soco ra quichi nya gloria, cahnu ca ra cuví ra. ³²Ta cahán ra cha nyehé ra ta cha chiñí ra, soco yori chinó iñi tuhun cahán ra. ³³Soco tatu nya noo yo chinó iñi yo chi ra, cuví yo noo cha ndaa vatyí Nyoo ndicha cha cahán ra. ³⁴Vatyí ra cha tachí Nyoo chii, tuhun Nyoo cahán ra vatyí Nyoo ña tyicuhvá ra Tatyí Ii ra chaha ra chi ra. Chaha ra nanií Tatyí Ii ra chi ra. ³⁵Nyoo Sutu yo cuñí ra chi Sehe ra. Ta natyaa ra tandihí ndaha ra. ³⁶Ñu cha chinó iñi chi Sehe Nyoo, iyó ñu noo ñáyivi chaa cha ma naa ca maa. Soco ñu ña cuñí chino iñi chi ra, ma coo ñu ñáyivi cuan. Ta cutachi tuñi Nyoo chi ñu.

Nu ndatuhun ra Jesús chihin noo ñaha Samaria

4 Cachitó ra cuví fariseo vatyí cuaha ca ñáyivi nyicón chi ra Jesús ican saha ra Juan. Ta cuaha ca ñu sacondutyá ra ñandihí. ²Vasi ñima maa ra Jesús sacondutyá, soco ra cachicá noo chihin ra, ican casacondutyá. ³Ta quivi chito ra Jesús vatyí cachito ra tuhun ihya, ta quitá ra Judea cuan ta cuanuhu ra nya Galilea. ⁴Ta ityi cuanuhu ra, tahan chi yaha ra nu cuví Samaria. ⁵Yucuan ta chaá ra noo ñuu cha nyaá ityi Samaria

cha nañí Sicar yatyin nu nyaá ñuhú ra Jacob nu chahá ra chi ra José sehe ra.

⁶Ta yucuan nyaá noo yavi ndutya cha catyí ñu tyi chi ra Jacob cuví. Ta vatyí chitatú xaan ra Jesús cha chica ityi ra, ta chicunyaá ra yuhu yavi cuan, ñáá cuhva hora cuví. ⁷⁻⁸Ta ra cachicá noo chihin ra, yori ra canyicú vatyí cuahan coyo ra chichi ñuu, cuasata ra cha cacachi ra. Tyicuan ta chaá noo ñaha Samaria cuatava ña ndutya chichi yavi cuan. Ta quichaha catyí ra Jesús chi ña:

—Cuhva chiin ndutya cohi —catyí ra chi ña.

⁹Tyicuan ta ñaha Samaria cuan catyí ña chi ra Jesús:

—Yoho cha cuvún noo ra ñuu Israel, ¿yoso caa cha chicón ndutya cohun chi yuhu cha cuví ñaha Samaria? —catyí ña vatyí ñu Israel ña vaha iyó ñu chihin ñu Samaria.

¹⁰Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóo cha chicán ndutya chuun, maun cucacon ndutya chii. Ta yuhu cuhve ndutya nyitó chuun —catyí ra chi ña.

¹¹Tyicuan ta catyí ña chi ra:

—Tata, ni ñahri vihi chihin tavon ndutya ihya. Vatyí yavi ihya cono xaan. ¿Nya cuquehun ndutya nyitó cuhvon cohi? ¹²Vatyí sutu chahnu yo, ra Jacob sandoo ra yavi ihya chi yo. Ta suri ihya chihí tucu maa ra ndutya. Ta suri ihya chihí tucu sehe ra ta quíti sana ra. ¿Atu cahnu ca ra cuví yoho ican saha ra cuan? —catyí ña chi ra.

¹³Tyicuan ta nacahan ra Jesús ta catyí ra chi ña:

—Tandihí ñu chihí ndutya ihya, cu ityi ca ñu ndutya. ¹⁴Soco ñu chihí ndutya cha chahá yuhu, ma cu ityi ca ñu. Vatyí ndutya cha chahí chi ñu cucaña chi tari noo ndohyo chichi aña ñu tacuhva

coo ñu ñayivi cha ma naa ca maa —catyí ra chi ña.

¹⁵Tyicuan ta quichaha catyí ña chi ra:

—Tata, cuhva ndutya cuan cohí, tacuhva cha ma cu ityi que ndutya, ta ni ma quichi que quichi tave ndutya chichi yavi ihya —catyí ña chi ra.

¹⁶Tyicuan ta ra Jesús catyí ra chi ña:

—Cuahan cuacana chi yiun ta quichun —catyí ra chi ña.

¹⁷Ta nacahan ña ta catyí ña:

—Yori yí iyó —catyí ña.

Tyicuan ta catyí ra Jesús chi ña:

—Ndicha cha cahun, vatyí yori yiun iyó. ¹⁸Vatyí cha ohon tahan yiun chiyo, ta ra nyaá chuhun vityin ñima yiun cuví chi ra. Ndicha tuhun cha cahún —catyí ra chi ña.

¹⁹Cha chiñi ña tuhun cahán ra, quichaha catyí ña chi ra:

—Tata, tuví iñi vatyí noo profeta cuenda Nyoo cuvún. ²⁰Sutu chahnu ndi, ra Samaria, sacahnu ra chi Nyoo yucu ihya. Soco nyoho ñu Israel catyí ndo vatyí Jerusalén yucuan tahán chi sacahnu yo chi Nyoo —catyí ña chi ra.

²¹Tyicuan ta ra Jesús nacahan ra ta catyí ra chi ña:

—Chino iñun tuhun cahín chuhun.

Vatyí vachi cuhva vatyí cusacahnu ndo chi Sutu yo Nyoo. Soco ña chiñuhú ri cha quichi ndo yucu ihya o cuhun ndo nya Jerusalén. ²²Nyoho ñu Samaria, ña chitó ndo yóo chi sacahnú ndo. Soco nyuhu chitó ndi yóo chi sacahnú ndi. Vatyí chitó ndi vatyí cuenda noo ra Israel cuasacacu Nyoo chi ñayivi. ²³Soco chaa chi cuhva ta cuhva cuan nyaa yo vityin vatyí ñayivi cha ndicha sacahnú chi Sutu yo Nyoo, cusacahnu ñu chi ra chihin aña ñu ta cha ndicha. Tari cuhva saquehen ityi Tatyí li Nyoo chi ñu. Vatyí Sutu yo Nyoo tyicuan caa cuñí ra cha sacuvi ñu cha sacahnú chi ra. ²⁴Vatyí Nyoo Tatyí li cuví ra. Ta ñu sacahnú chi ra cuñí chi sacahnú ñu chi ra chihin cha

ndicha tari cuhva saquehen ityi Tatyí li chi ñu —catyí ra chi ña.

²⁵ Ta nacahan ña ta catyí ña chi ra:

—Yuhu chité vatyí cuquichi ra cuví Mesías, ra Cristo, ra cuvi rey chi yo. Ta quivi quichi ra, maa ra cunacatyí tandihi chi yo —catyí ña chi ra.

²⁶ Tyicuan ta nacahan ra Jesús ta catyí ra chi ña:

—Ra cha cahún tuhun cuan, ican ra cahán chuhun —catyí ra chi ña.

²⁷ Tyicuan ta canachaa coyo ra cachicá noo chihin ra ta iyo cacuñí ra cha ndatuhún ra Jesús chihin noo ñaha sihi. Soco ni noo ra ña cañá iñi ra ndaca tuhun ra ñáá cha cuñí ra o ñáá cuenda ndatuhún ra chihin ñaha cuan. ²⁸ Tyicuan ta sandoꝝ ña quiyí ña ta cuanuhu ña chichi ñuu. Ta catyí ña chi ñáyivi ñuu ña:

²⁹ —Ñaha ndo cunyehe ndo chi noo ra cha catyí tandihi cha cai. ¿Atu ñima ra Cristo cuví ra? —catyí ña chi ñu.

³⁰ Tyicuan ta quitá coyo ñu ñuu cuan ta cuahan coyo ñu nu nyaá ra Jesús. ³¹ Ta cha niri ca cha cumañi chaa ñu nu nyaá ra, ra cachicá noo chihin ra, saniñí ra chi ra na cachi ra chiin. Ta cacatyí ra chi ra:

—Maestro, çachi chiin —catyí ra.

³² Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

³³ Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichi nyaca cha cachi ra, vaha? —cacatyí ra.

³⁴ Soco ra Jesús catyí ra chi ra:

—Cha chachí yuhu ican cuví cha sacuví cuhva cuñí ra cha tachí chii ta sacuví tyiño chaha ra chii. ³⁵ Nyoho catyí ndo: “Soco cumañi ca cumi yoo ta naquehen yo cha tachí yo.” Soco yuhu catyí chi ndo vatyí nyehe ndo ta sãha ndo cuenda cha cuaha ñáyivi cuñí ñu quichi ñu chihin, cuví ñu tari noo itu

cha cuan ta cuñí chi cha cahnu yo niñi.

³⁶ Ra cha naquehén niñi cuan ñihi ra yahvi ra. Ta niñi cha naquehen vaha ra cuví ñu cha ñihi noo ñáyivi cha ma naa ca maa. Ta tyicuan caa cuví tacuhva vatyí ra cha tachí, ta ra cha naquehén niñi cuan iin ri cacusiñi cuñi ra. ³⁷ Ta iyó noo tuhun ñáyivi cha catyí vatyí siin ñu tachí ta siin ñu naquehén niñi. Ta ndicha tuhun cuan. ³⁸ Yuhu sacuhin chi ndo vatyí cucahnu ndo niñi cha iyó nu ña saha tyiño ndo. Vatyí inga ra saha tyiño. Ta nyoho nyari cucahnu ndo ta naquehen vaha ndo niñi cuan —catyí ra Jesús chi ra.

³⁹ Ta cuaha xaan ñu ñuu Samaria cuan canachino iñi ñu chi ra Jesús cha cuenda cha catyí ñaha cuan, vatyí catyí ña: “Catyí ra tandihi cha cai chii”, catyí ña.

⁴⁰ Ta cuhva cha cachaa coyo ñu Samaria nu nyaá ra Jesús, cha cundahvi ñu nuu ra nandoo ra chihin ñu. Ta ra Jesús ndoꝝ ra yucuan uvi quivi chihin ñu. ⁴¹ Ta cuaha ca ñu cachino iñi ñu cha chiñi ñu tuhun cahán maa ra. ⁴² Tyicuan ta quichaha catyí ñu chi ñaha sihi cuan:

—Vityin chinó iñi ndi, ñima cha cuenda vatyí catyun chi ndi, soco vatyí chiñi maa ndi chihin soho ndi tuhun cahán ra, ta chitó vaha ndi vatyí ican ra cuví Cristo ra sacacú chi ñáyivi iyó siqui ñuhu ñáyivi ihya —catyí ñu.

Nu sanduvaha ra Jesús chi she noo ra cuví tyiño

⁴³ Cha yaha uvi quivi ta quitá ra Jesús ñuu Samaria cuan ta cuahan ra ityi nu cuví Galilea. ⁴⁴ Vatyí suri maa ra Jesús catyí ra vatyí ñáyivi ñuu noo ra cuví profeta, ra chahá cuenda tuhun cahán Nyoo, ña sahá ñu ñáyivi chi ra. ⁴⁵ Tyicuan ta cuhva cha chaꝝ ra Galilea, ñu iyó yucuan vaha tyiñuhu ñu chi ra, vatyí chahan coyo tucu maa ñu Jerusalén vico cuan, ta nyehe ñu cha vaha cha sacuvi ra.

⁴⁶Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhví ñuu Capernaum. ⁴⁷Quivi cha chito ra cuan vatyí nachaa ra Jesús Galilea cha chahan ra Judea, chahan ra chinyehē ra chi ra, ta chican ra tumañi iñi chi ra na cuhun ra vehe ra ta sanduvaha ra chi sehe ra, vatyí cha cuñí cuii ri cuví sehe ra. ⁴⁸Tyicuan ta ra Jesús catyí ra chi ra:

—Nyoho ma chino iñi ndo tatu ma nyehe xihna ndo noo milagru —catyí ra chi ra.

⁴⁹Soco ra cha vaha cuan catyí ra chi ra Jesús:

—Tata, cōho chihin cha numi ri vityin cha ta cuví ca sehi —catyí ra chi ra.

⁵⁰Tyicuan ta ra Jesús catyí ra chi ra:

—Cuanuhu nya vehun. Sehun cha nduvaha ra —catyí ra chi ra.

Tyicuan ta ra cha vaha cuan chinó iñi ra tuhun cahan ra Jesús ta cuanuhu ra.

⁵¹Ta cuhva cha cuanachaa ra nya vehe ra, quita coyo musu ra ta cacatyí ra chi ra:

—¡Cha nduvaha sehung!

⁵²Tyicuan ta quichaha ndaca tuhun ra chi ra ñáá cuhva nduvaha ra. Ta cacatyí ra chi ra:

—Icu cuhva ca iin cha yaha hora tinyaa cahni chi ra —cacatyí ra.

⁵³Tyicuan ta tuví iñi ra cha vaha cuan, vatyí cuhva cuan catyí ra Jesús chi ra, “Cuanuhu vatyí sehung cha nduvaha ra.” Ta maa ra ta tandihi ñáyivi chi ra nachino iñi ñu chi ra Jesús.

⁵⁴Ican ihya cuví cha cu uvi milagru cha sacuví ra Jesús cha nachaa ra Galilea cha chahan ra Judea.

Nu sanduvaha ra Jesús chi noo ra ña cuví caca

5 Cha yaha tuhun cuan ta ra Jesús cuahan ra Jerusalén inga chaha vatyí ñu

ñuu Israel sanducahnu ñu noo vico. ²Ta ñuu cuan iyó noo yuvehe cha nañí Yuvehe Cuenda Mbee. Ta yatyin ri nya noo vehe cahnu. Ta chichi vehe cuan ñohó ndutya. Ta cha chihin sahan hebreo nañí chi Betesda. Ta iyó ohon tahan corredor. ³Ta yucuan cayucu cuaha ñu cuhví: ñu cuaa, ñu coxo, ta ñu ña cuví nacanda. Canyatú ñu ñáá cuhva nacanda ndutya cuan. ⁴Vatyí ña naha ña naha ri ta noó noo ángel sanacanda ra ndutya cuan. Ta yóo cha quihvi xihna ca cha yaha nacanda ndutya cuan, nduvaha ñu niri maa ñáá ca cuehe ndoho ñu. ⁵Ta yucuan catuví noo ra cuhví cha iyó oco chahun uñi cuiya cuhví ra. ⁶Cuhva cha nanyehē ra Jesús chi ra catuví ra yucuan, tuví iñi ra vatyí cha cañi xaan cuiya caá ra tyicuan caa. Ta ndaca tuhun ra chi ra, ta catyí ra:

—¿Atu cuñún nduvahun?

⁷Ta ra cuhví cuan nacahan ra ta catyí ra:

—Tata, yori maa tyihi chii chichi tanque tatu cha nacandá ndutya. Vatyí tahan ri cha cuñí quihvi, inga ñu quihvi xihna ca —catyí ra cuhví cuan chi ra Jesús.

⁸Tyicuan ta catyí ra Jesús chi ra:

—Ndícuita ta naquehen yuvun ta cacon —catyí ra chi ra.

⁹Ta caa cuhva ri cuan nduvaha ra, naquehen ra yuvi ra, ta nacaca ra. Soco vatyí quivi nyitatu ñu cuví, ¹⁰ra cacuví nuu chi ñu Israel catyí ra chi ra cha nduvaha cuan:

—Quivi nyitatu yo cuví vityin, ña tahan chi cuison yuvun —catyí ra chi ra.

¹¹Ta ra cha nduvaha cuan nacahan ra ta catyí ra:

—Ra cha sanduvaha chii, ican ra catyí chii: “Naquehen yuvun ta cacon”, catyí ra chii.

¹²Tyicuan ta quichaha candaca tuhun ra chi ra, ta catyí ra:

—¿Yóó ra cha catyí chuun vatyi naquehun yuvun ta cacon?

¹³Soco ra cha nduvahá cuan ña chitó ra yóó cha sanduvahá chi ra. Vatyi cuaha xaan ñáyivi yucuan, ta ra Jesús yori ca ra vatyi cha cuahan ra. ¹⁴Yahá cuan ta nañihí ra Jesús chi ra chichi vehe ñuhu cahnu, ta catyí ra chi ra:

—Nyehe, vityin cha nduvahun, ma sacuví con cuatyí, coto ñáá ca cha cahnu ca cuví chuun —catyí ra chi ra.

¹⁵Tyicuan ta chahan ra chicatyí ra chi ra Israel cuan vatyi ra Jesús cuví ra cha sanduvahá chi ra. ¹⁶Ta cha cuenda cha sacuví ra Jesús tyehe caa quívi nyitatu ñu, yucuan chaha cuxaan xaan ra cacuví nuu chi ñu Israel chi ra Jesús. Ta cuñí ra cahñi ra chi ra. ¹⁷Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiñe —catyí ra.

¹⁸Ta cha cuenda cha chahan ra tuhun ihya, xaan ca cuñí ra Israel cuan. Ta ñihi ca cuñí ra cahñi ra chi ra vatyi cuñí maa ra vatyi ña sahá ra ñáyivi quívi nyitatu ñu, ta siin rí tyi sahá ra tuhun tyi iin ri cuví ra chihin Nyoo vatyi catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

¹⁹Tyicuan ta ra Jesús catyí ra chi ra:

—Cha ndicha catyí chi ndo vatyi yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuvi tucu maí. ²⁰Vatyi cuñí xaan Suti chii, vatyi Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñi ndo. ²¹Tari sanandotó Nyoo Suti chi ndiyi, ta chahá ra ñáyivi coo ñu, tyicuan caa tucu yuhu cha cuví Sehe ra, चाहí ñáyivi chi ñu cuñí mai cuhve. ²²Ta Suti Nyoo ña sandaa ra cuatyí ni noo ñu, soco chi yuhu cha cuví

Sehe ra chahá ra ityi na sandai cuatyí ñáyivi. ²³Tyicuan caa sacuví Suti Nyoo vatyi cuñí ra tyi sacahnu ñáyivi chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, niri chi Suti ta ña sacahnú ñu. Tyi maa ra tachí ra chi yuhu cha cuví Sehe ra.

²⁴Ta cha ndicha catyí vatyi ñu tyasohó tuhun cahín ta chinó iñi ñu chi ra cha tachí chii, iyó ñu noo ñáyivi chaa cha ma naa ca maa. Ta ma cuhun ca ñu anyaya cha catyí cuatyí ñu vatyi cha sacacu Nyoo añima ñu ndaha tuhun chihi, ta nacuhva ra ñáyivi chaa coo ñu. ²⁵Ñáyivi tari cha ndiyi cuví ñu soco cha ndicha catyí chi ndo vatyi vachi chi quívi vatyi cuiñi ñu ndusu Sehe Nyoo. Ta ñu cha quichahá cha cahán ra, cucoo ñu ñáyivi cha ma naa ca maa. Ta vityin cuví quívi cha cahín tuhun. ²⁶Vatyi Nyoo Suti iyó ra ñáyivi cha ma naa ca maa. Ta chahá tucu ra ityi chi yuhu cha cuví Sehe ra vatyi cuhve ñáyivi coo ñáyivi. ²⁷Ta Nyoo chahá ra vatyi sandai cuatyí ñáyivi, vatyi Rayi cha quichi nya gloria cuví yuhu. ²⁸Ma iyo cuñi ndo tuhun ihya, vatyi cuhaa chi quívi vatyi ñu ndiyi chichi ñaña cucuñi ñu ndusu Sehe Nyoo. ²⁹Ta cuquita coyo ñu chichi ñaña. Ta ñu cha sacuví cha vaha cunandoto ñu vatyi coo ñu noo ñáyivi chaa. Soco ñu ña sacuví cha vaha cunandoto ñu vatyi cuhun ñu anyaya nu cutachi tuñi Nyoo chi ñu.

Nu sañahá chi vatyi ra Jesús iyó ityi chi ra cha cuhva ra ñáyivi chaa coo ñáyivi

³⁰Yuhu ñima noo tuhun ri mai sacuví ñáá noo cha sacuví. Nyehí cha caá añima ñáyivi yoso cuhva catyí Suti. Ta vaha cuhva nyehí vatyi ña sacuví cuhva cuñí mai, soco cuhva cuñí Suti, ra cha tachí chii. ³¹Ta tatu suri mai cuví cha ndaa chi mai, ñahri yahvi nyaá cha ndaa cuan. ³²Soco iyó inga ra cuví cha ndaa cuenda

yuhu. Ta yuhu chité vatyi cha cahán ra cuende yucuan cuví noo cha ndaa ta cha ndicha. ³³Nyoho chindacā tuhun ndo chi ra Juan. Ta tuhun cha cahán ra, ndicha vaha. ³⁴Soco yuhu ña chiñuhú cha cuví rayii cha ndaa cuende. Soco catyí tuhun ihya chi ndo cha cuenda cha vaha chi ndo, tacuhva vatyi chino iñi ndo chii ta cacu añima ndo. ³⁵Ra Juan cuví ra tari noo lámpara cha cayú ta sacundichín. Ta nyoho tahañ iñi ndo cusii iñi ndo nu ndichin ñuhu ra suhva ri quivi. ³⁶Soco yuhu iyó noo cha ndaa vaha ca cha nuu cha catyí ra Juan. Vatyi tandihi cha sacuví yuhu, maa Suti catyí chii na sacuvi. Ta ican cuví cha ndaa cha nyehé ndo vatyi ndicha vatyi maa Suti tachí chii. ³⁷Ta tyicuan caa tucu Suti, ra cha tachí chii, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chi ra. ³⁸Ta tuhun ra cha cahín nuu ndo, ña ndoó chi añima ndo vatyi ña chinó iñi ndo vatyi Nyoo tachí ra chii. ³⁹Nyoho chihin cuenda xaan sacuha ndo nu tutu Nyoo, vatyi cuñí maa ndo vatyi nuu cuan cuanañihi ndo ñayivi chā cha ma naa ca maa. Soco nu tutu Nyoo cuan, tuhun yuhu cahán chi. ⁴⁰Ta nyoho ña cuñí ndo quichi ndo nu nyaí tacuhva vatyi cuhve ñayivi chā cuan coo ndo.

⁴¹Yuhu ña nduqui nu cuvahi nuu ñayivi. ⁴²Vatyi yuhu ñohó nui chi nyoho ta chité vatyi ña cuñí ndo chi Nyoo. ⁴³Yuhu vachi cuenda Suti ta nyoho ña naquehén ndo tuhun cahín. Soco tatu inga ra vachi ra cuenda maa ra, chi ra cuan nachino iñi ndo. ⁴⁴Nyoho ña cuví chino iñi ndo chii vatyi cuñí ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó. ⁴⁵Ma cuñi ndo vatyi cutyaa yuhu cuatyí chaha ndo nuu Suti. Ra Moisés cuví ra tyaá cuatyí chaha ndo vatyi ña sacuví ndo ley cha tyaá ra. Ta ley ra cuñí maa ndo vatyi cunyaca chi

chi ndo andivi. ⁴⁶Vatyi tyehe ta chinó iñi ndo tuhun cahán ra Moisés, chinó tucu iñi ndo tuhun cahán yuhu. Vatyi tuhun yuhu ican tyaá ra. ⁴⁷Soco tatu ña chinó iñi ndo tuhun cha tyaá ra, ¿yoso caa cuchino iñi ndo tuhun cahán yuhu? —catyí ra Jesús chi ra cacuví nuu chi ñu Israel.

Nu chahā ra Jesús cha cachi ohon mil rayii

(Mt. 14.13-21; Mr. 6.30-44; Lc. 9.10-17)

6 Cha yahā cuan, ra Jesús cuahan ra inga chiyo miñi cahnu cha nañi Tyañuhu Galilea. Ta suri miñi cuan nañi chi Miñi Tiberias. ²Cuaha xaan ñayivi cuahan nyicon chi ra cha cuenda vatyi nyehé ñu milagru cha sacuví ra vatyi sanduvahá ra chi ñu cuhví. ³Tyicuan ta ra Jesús ndaā ra noo yucu ta chicunyā ra yucuan chihin ra cachicá noo chihin ra. ⁴Ta cha nyañaa quivi vico cha nañi pascua cha sanducahnú ñu Israel. ⁵Cha nanyehe ra Jesús vatyi cuaha ñayivi nyicón chi ra, ta quichahā catyí ra chi ra Felipe:

—¿Yoso caa cusata yo cha cachi tandihi ñayivi cuaha ihya? —catyí ra chi ra.

⁶Soco catyí ri maa ra chi ra Felipe cha nducú nyehe ra chi ra ñáá catyí ra, vatyi ra Jesús chitó vaha ra ñáá cha cuasacuvi ra. ⁷Tyicuan ta nacahañ ra Felipe ta catyí ra:

—Yahvi cha quehen yo cha sahā tyiño yo ucha tahan yoo ta ma ñihi sata yo cha cachi ñu chihi chiiñ —catyí ra Felipe.

⁸Ta ra Andrés nonga ra nyicón chi ra Jesús, ta yañi ra Simón Pedro cuví chi ra, catyí ra chi ra Jesús:

⁹—Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñayivi ihya? —catyí ra Andrés.

¹⁰Tyicuan ta ra Jesús catyí ra chi ra:

—Catyí ndo chi tandíhi ñu na cunyicu ñu —catyí ra.

Iyó vavaha cuhu yucuan ta chicunyicu ñu ta cha ohon mil rayíi, ta siin ri ñusihi chihin ra cuatya. ¹¹Tyicuan ta quehen ra Jesús pan cuan ta cha yahá nacuhva ra tyahvi nyoo chi Nyoo, chahá ra chi ra cachicá noo chihin ra. Ta ra cachicá noo chihin ra casachá ra chi tandíhi ñu canyicú cuan. Suri tyicuan caa sacuví tucu ra chihin tiyaca cuan, chahá ra cachi ñu nyacua nya cha chitu chi ñu. ¹²Ta cuhva cha ndaha iñi ñu, ra Jesús catyí ra chi ra cachicá noo chihin ra:

—Nacõnehe ndo yiquin cha ndoo tacuhva vatyí ñahri cha tiví —catyí ra chi ra.

¹³Canacõnehe ra, ta casacutu ra uchi uvi tahan tica chihin yiquin cha ndoo cuan cha cuenda ohon tahan pan cuan. ¹⁴Tyicuan ta cha yahá nyehe ñáyivi cuan milagru cha savahá ra Jesús, ta catyí ñu:

—Ican ndicha cuii ra ihya cuví profeta, ra chahá cuenda tuhun cahan Nyoo cha nyaá cha quichi síqui ñuhu ñáyivi ihya —catyí ñu.

¹⁵Soco tuví iñi ra Jesús vatyí cuñí ñu quehen ñu chi ra chihin fuerza vatyí sacuví ñu rey chi ra. Ta cuahan ri ra nu sucun yucu cuan inga chaha vatyí cun-ya notuhun maa ra.

Nu chicá ra Jesús nu ndutya

(Mt. 14.22-27; Mr. 6.45-52)

¹⁶Ta cha cuaa, ta noo coyo ra cachicá noo chihin ra Jesús yuhu miñi cuan. ¹⁷Ta quihví coyo ra chichi canoa ta cuayaha sava ra mahñu miñi cuan vatyí cuchaa ra Capernaum. Cha cuñaa ta ra Jesús suri cha ta ndichi ca ra. ¹⁸Tyicuan ta chaá noo tatyí ñihi. Ta iyo ndicuitá ndutya miñi cuan. ¹⁹Tyicuan ta cha cayahá ra chihin canoa cuan tari noo cha ohon o iñu kilómetro, ta cananyehe

ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhví ra. ²⁰Soco ra Jesús catyí ra chi ra:

—¡Yuhu cuví, ma yuhvi ndo!

²¹Tyicuan ta chihin cha casií cuñi ra caquehen cuenda ra chi ra Jesús chichi canoa. Tyicuan ta tañi ri ta cachaa ra yuhu miñi nu cuahan coyo ra.

Nu nanducú ñáyivi chi ra Jesús

²²Tuvi inga quivi cuan cha ñaha cuiiri chitó ñáyivi cha ndoo inga chiyo miñi cuan vatyí ra cachicá noo chihin ra Jesús cuahan coyo ra chihin noo canoa cha iyó cuan. Vatyí noo ri maa iyó. Ta chitó ñu tyi ña cuahan ra Jesús chihin ra. ²³Soco chaá coyo ca canoa cha quitá coyo ñuu Tiberias. Chaá chi yatyin ri ityi nu cachachi ñu pan, yahá cha nacuhva Sutu Mañi yo tyahvi nyoo chi Nyoo. ²⁴Tyicuan ta cha nanyehe ñu tyi yori ra Jesús yucuan ta ni ra cachicá noo chihin ra, quihví coyo ñu chichi inga canoa cuan ta cuahan ñu nya Capernaum cuanducú ñu chi ra.

Ra Jesús cuví pan cha chahá ñáyivi chaa coo yo

²⁵Cha chaá coyo ñu inga chiyo miñi cuan, nañihí ñu chi ra Jesús. Ta ndaca tuhun ñu chi ra:

—Maestro, ¿ama chaun ihya? —catyí ñu chi ra.

²⁶Soco ra Jesús catyí ra chi ñu:

—Cha ndicha catyí chi ndo vatyí nyoho nanducú ndo chii soco cha cuenda vatyí chachi ndo nyacua nya cha chitu chi ndo. Soco ñima vatyí nyehe ndo milagru cha sacuví. ²⁷Ma saha tyiño ndo cuenda nyayu cha ndíhi, soco saha tyiño ndo cuenda nyayu cha ña ndihí ta chahá chi noo ñáyivi chaa cha ma naa ca maa coo ndo. Ican ihya cuví nyayu cha cucuhve chi ndo vatyí Nyoo Suti tyaa ty-

iño cuan chii vatyí yuhu cuví Rayii cha quichi nya gloria —catyí ra Jesús.

²⁸ Tyicuan ta quichaha ndaca tuhun ñu chi ra ta catyí ñu:

—¿Ñáá cha cuví sacuvi ndi tacuhva sacuvi ndi cuhva cuñí Nyoo? —catyí ñu.

²⁹ Tyicuan ta ra Jesús catyí ra chi ñu:

—Cha cuñí Nyoo cha sacuvi ndo ican cuví ihya: Cha chino iñi ndo chi yuhu, ra cha tachí ra chí —catyí ra Jesús chi ñu.

³⁰ Ta candaca tuhun tucu ñu chi ra, ta catyí ñu:

—¿Ñáá seña cuhvon chi ndi tacuhva vatyí nyehe ndi ta chino iñi ndi chuun? ¿Ñáá cha cuasacuvun? ³¹ Sutu chahnu ndi chachí ñu maná chiqui ndii nu yori ñáyivi iyó quívi cuan, tari catyí tuhun Nyoo: “Nyoo chaha ra pan cha quichí ityi andívi cachi ñu” —catyí ñu chi ra Jesús.

³² Ta ra Jesús nacahan ra ta catyí ra:

—Cha ndicha catyí chi ndo. Ñima ra Moisés chaha pan cha quichí ityi andívi cachi ñu, soco Nyoo Suti cuví ra chahá pan cha ndicha vaha cha quichí ityi andívi. ³³ Vatyí pan cha chahá Nyoo, ican cuví ra cha noo ityi andívi. Ta ican cuví ra cha chahá noo ñáyivi chaa coo ñu iyó síqui ñuhu ñáyivi —catyí ra Jesús.

³⁴ Tyicuan ta quichaha cacatyí ñu chi ra:

—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:

—Yuhu cuví pan cha chahá cha conyito aña ndo. Ñu vachi nu nyaí ma cusoco ca aña ñu, ta ñu chino iñi chii ma cu ityi ca maa aña ñu. ³⁶ Soco cha yaha catyí chi ndo vatyí nyoho ña chinó iñi ndo vasi cha nyehé ndo chii. ³⁷ Tandíhi ñáyivi cha chaha Nyoo Suti chii, vachi ñu nu nyaí, ta ñu vachi nu nyaí, naquehén cuende chi ñu. ³⁸ Vatyí yuhu quichí ityi andívi soco ñima cha cuenda cha sacuvi cuhva cuñí mai, soco

sacuvi cuhva cuñí ra cha tachí chii. ³⁹ Ta cuhva cuñí ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyí sanandote chi ñu nu cuandíhi quívi. ⁴⁰ Suti, ra cha tachí chii, cuñí ra vatyí tandíhi ñáyivi cha nyehe chi yuhu ra cha cuví Sehe Nyoo, ta chino iñi ñu chii, coo ñu noo ñáyivi cha ma naa ca maa. Ta suri yuhu cusandote chi ñu nu cuandíhi quívi —catyí ra Jesús chi ñu.

⁴¹ Cha cuenda cha cahan ra Jesús tyehe caa, ñu Israel quichaha cacahan nyaa ñu chi ra vatyí catyí ra: “Yuhu cuví pan cha quichí ityi andívi”, catyí ra. ⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chí sutu ra ta chí síhi ra. ¿Yoso caa cha catyí ra vatyí ityi andívi quichí ra? —catyí ñu.

⁴³ Tyicuan ta ra Jesús catyí ra chi ñu:

—Sandíhi ndo tuhun cha cahan nyaa ndo. ⁴⁴ Yori maa ñu quichi nu nyaí tatu ñima Suti, ra cha tachí chii, cana chi ñu. Ta cusandote chi ñu nu cuandíhi quívi. ⁴⁵ Nu libru cha catyaa ra profeta Nyoo ta cha naha catyí chí tyehe caa: “Nyoo cusañaha ra chí tandíhi ñáyivi.” Yucuan chaha vatyí ñu cha tyasohó tuhun cahan Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶ Ñima cha cuenda vatyí nyehé ñu chí Nyoo Suti, vatyí yori nyehé chí ra. Soco noo ri mai nyehé chí ra. Ta iquen cuví ra cha quita nu nyaá ra. ⁴⁷ Cha ndicha catyí chí ndo vatyí ñu chinó iñi chii coo ñu noo ñáyivi chaa cha ma naa ca maa. ⁴⁸ Yuhu cuví pan cha chahá cha conyito aña ndo. ⁴⁹ Sutu chahnu ndo chachí ñu maná chiqui ndii cuan, soco suri cachíhi ñu. ⁵⁰ Soco yuhu, tuhun pan cha quichí ityi andívi cahín chihin ndo, vatyí nya ñu cachi pan cuan, ma cúvi aña ñu. ⁵¹ Suri mai cuví pan nyitó cha quichí ityi andívi. Yóó cha cachi pan ihya coo ñu tyicuan ri maa. Pan

cha cuhva yuhu, ican cuví coño ñuhi. Ta cuhve ñayiví cha cuenda tandihí ñáyiví iyó síqui ñuhu ñayiví —catyí ra Jesús chi ñu.

⁵² Tyicuan ta ra Israel cuan quichaha candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chi ndo, yuhu cuví Rayíi cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuví coo ndo ñayiví chaa. ⁵⁴ Ñu chachí coño ñuhi ta chihí ñu niñi, iyó ñu noo ñayiví chaa cha ma naa ca maa. Ta yuhu cusanan-dote chi ñu nu cuandihí quivi. ⁵⁵ Vatyí coño ñuhi ican cuví pan cha ndicha vaha cha tahán chi cachi ndo, ta niñi cuví vinu cha ndicha vaha cha tahán chi coho ndo. ⁵⁶ Ñu chachí coño ñuhi ta chihí niñi, ñin ri cuví ñu chihin. Ta mai ñin ri cuví chihin ñu. ⁵⁷ Suti ra tachí chii, Nyoo nyitó cuví ra. Ta yuhu iyé chihin tun-yeé ñni ra. Ta suri tyicuan caa tucu ñu chachí coño ñuhi, coo ñu chihin tunyeé ñni iyó chii. ⁵⁸ Tuhun pan cha quichí ityi andiví cahín. Pan ihya ñima tari maná cha chachí sutu chahnu ndo, vatyí suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu ñin ri ñu chichi vehe ñuhu Capernaum.

⁶⁰ Cuaha xaan ñáyiví nyicón chi ra Jesús. Ta cuhva cha chíñi ñu tuhun ihya catyí ñu:

—Tuhun cha cahán ra ihya, yíi xaan cha natiin cuenda yo. Yori cuví quichaha tuhun cahán ra —catyí ñu.

⁶¹ Tyicuan ta tuví ñni ra Jesús vatyí ña cuñí ñu naquehen ñu tuhun cuan. Ta ndaca tuhun ra chí ñu:

—¿Atu quiñi cuñí ndo cha cahín tuhun ihya? ⁶² Ta ¿yoso caa sacuví ndo tatu nyehe ndo chi yuhu Rayíi cha quichi nya gloria nandaa xica tiqui inga chaha ityi nu quite quivi xihna ri? ⁶³ Tatyí li Nyoo ican cuví cha chahá ñayiví chaa. Coño ñuhu, ña tyinyeé chi coo yo ñayiví cuan. Ta tuhun cha cahín chihin ndo, Tatyí li Nyoo cuví ta chahá chi cha conyito añima ndo. ⁶⁴ Soco yihí suhva ndo cha ña chinó ñni ndo chii —tyicuan caa catyí ra Jesús.

Vatyí nya quivi xihna ri ta chitó ra yóo cha ña chinó ñni chi ra ta yóo cha cunaxico tuhun chi ra. ⁶⁵ Ta catyí ra:

—Yucuan chaha catyí chi ndo vatyí yori ñu cuví quichi nu nyaí tatu ñima Nyoo Suti cana chi ñu —catyí ra Jesús.

⁶⁶ Nya ndaha quivi cuan cuaha xaan ñu nyicon chi ra Jesús sando ñu chi ra. Ta ña chicá noo ca ñu chihin ra. ⁶⁷ Tyicuan ta ra Jesús ndaca tuhun ra chi ndihí uchi uvi tahan ra chicá noo chihin ra, ta catyí ra:

—¿Atu cuñí tucu nyoho cuhun ndo? —catyí ra chi ra.

⁶⁸ Soco nacahan ra Simón Pedro ta catyí ra:

—Sutu Mañi yuhu, ¿yóo chi cunyicon ndi? Ta noo tuhun yoho cahún tuhun ñayiví cha ma naa ca maa coo ndi. ⁶⁹ Nyuhu chinó ñni ndi, ta ñoho nuu ndi chuun vatyí yoho cuvún ra cuví Cristo Sehe Nyoo nyitó.

⁷⁰ Ta nacahan ra Jesús ta catyí ra:

—¿Atu ñima yuhu nacachí chi ndi uchi uvi nyoho? Ta noo nyoho cuví cuihna —catyí ra.

⁷¹ Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyí ra Judas cuví ra cucuhva cuenda chi ra Jesús chi ra xaan ñni chi ra, vasi noo ra cha uchi uvi cuan cuví ra.

Nu ña cachinó iñi yañi ra Jesús chi ra

7 Cha yaha tuhun ihya, ta ra Jesús chicá noo ra ityi Galilea. Ña cuñi ra cuhun ra Judea vatyí ra cacuví nuu chi ñu Israel cuan cacuñi ra cacahñi ra chi ra. ²Ta cha nyaña qúivi vico cha sandu-cahnu ñu Israel ndi cuiya ri. Ta nañi chi vico Tabernáculo. ³Yucuan chaha yañi ra Jesús cacatyí ra chi ra:

—Ma ndoun ihya. Cuahan Judea tacuhva vatyí ñu naquehén tuhun cahún cha nyicú yucuan nyehe ñu tyiño cha sacuvún. ⁴Vatyí tatu cuñi yo cha cohon nuu ñáyivi chi yo, ma xehe ri sacuví yo cha sacuví yo. Ta yoho tatu ndicha cha sacuvún tuhun ihya, sacuvi nuu tandihi ñáyivi —cacatyí yañi ra chi ra.

⁵Tyicuan caa cacatyí ra vatyí ni yañi ra ta ña chinó iñi ra chi ra. ⁶Tyicuan ta ra Jesús catyí ra chi ra:

—Ta chaa ca cuhva cha cuhun yuhu. Soco nyoho savahri quívi cuví cuhun ndo. ⁷Vatyí ñáyivi ña cutasi cuñi ñu nyehé ñu chi ndo, soco chi yuhu tasi cuñi ñu nyehé ñu cha cuenda vatyí cachi ri catyí chi ñu vatyí ña vaha cha nyacuví ñu. ⁸Cuahan nyoho vico cuan. Yuhu ma cuhin vatyí ta chaa ca cuhva cha tahán chi cuhin —catyí ra.

⁹Yaha cuan ta ndoo ra nya Galilea.

Nu ñohó ra Jesús vico Tabernáculo

¹⁰Cha yaha cuahan coyo yañi ra Jesús, cuahan tucu maa ra vico cuan, soco xehe ri. ¹¹Ta ra cacuví nuu chi ñu Israel cananducú ra chi ra vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

¹²Ta ñáyivi ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandaví ñaha ra chi ñáyivi”, catyí ñu.

¹³Soco yori cahán ndichin tuhun ra cha cuenda cha yuhví ñu chi ra cacuví nuu cuan.

¹⁴Cha cusava iyó vico ta quihví ra Jesús chichi vehe ñuhu cahnu quichaha cahan ra nuu ñáyivi. ¹⁵Ta ra cacuví nuu cuan iyó cacuñi ra ta cacatyí ra chi ra tahan ra:

—¿Yoso caa chitó ra ihya ta ña sacua-ha ra? —catyí ra.

¹⁶Ta nacahan ra Jesús ta catyí ra:

—Tuhun cha sañahi, ñima cha cuenda mai cuví, soco cuenda ra cha tachí chii cuví. ¹⁷Tatu yihí nyoho cha cuñi ndo sacuvi ndo cuhva cuñi Nyoo, cua coto ndo vatyí cuenda Nyoo sacote ta ñima cha cuenda mai. ¹⁸Ra cha cahán cuenda maa, cahán ra na sacahnu ñáyivi chi ra. Soco ra nanducú cha sacahnu ñu chi Nyoo, ra cha tachí chi ra, ican ra cuan cahán cha ndicha. Ta ñahri cha sandaví ñaha ra.

¹⁹¿Atu ña ndicha vatyí ra Moisés chaha ley chi ndo? Soco ni noo nyoho ña quichahá ndo ley cuan. ¿Ñáá tuhun cuñi ndo cahñi ndo chii? —catyí ra.

²⁰Ta nacahan ñáyivi ta catyí ñu chi ra:

—Noo tatyí ña vaha yihí chi yoho. Yori cuñi cahñi chuun —catyí ñu chi ra.

²¹Ta catyí ra Jesús:

—Cha catyí noo milagru cha sacuví quívi nyitatu yo, iyo xaan cuñi nyoho. ²²Soco ra Moisés catyí ra chi ndo vatyí sacuvi ndo costumbre circuncisión. Vasi ñima ra quichaha chihin tuhun cuan, soco ñáyivi chi ra ityi chata, casacuvi tyicuan caa. Yucuan chaha nyoho sacuví ndo costumbre cuan vasi tahán chi quívi nyitatu yo. ²³Ta vityin, vaha tatu cha cuenda cha ña cuñi ndo nacahnu ndo ley ra Moisés sacuvi ndo tyicuan caa vasi quívi nyitatu yo tahán chi. Soco tatu tyicuan caa sacuvi ndo, ¿ñáá tuhun cha cuxaan ndo chii cha cuenda vatyí sandu-vahí nani coño ñuhu noo ra cuan quívi nyitatu yo? ²⁴Ma tyaa ndo cuatyí siquí

ñáyivi tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

²⁵ Tyicuan ta suhva ñu iyó Jerusalén, quichaha ndaca tuhun ñu:

—¿Atu ñima chi ra ihya canducu ra cha cahñi ra? ²⁶ Ta maa ra nanyaá cuan cahán ra nuu ñáyivi. Ta yori maa catyi ñáá cha catyi chi ra. ¿O vasi ca chinó tucu iñi ra cacuví nuu vatyi ra ihya ra Cristo ra cuvi rey cha saquichi Nyoo cuví ra? ²⁷ Soco yoó chitó yo nya quitā ra ihya. Soco quivi quichi ra Cristo yori coto nya ityi quichi ra cuan —catyi ñu.

²⁸ Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyi ra:

—¿An ñohó nuu ndo chii ta chitó ndo nya ityi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachí chii, ra cha cuví cha ndicha. Ta nyoho ña ñohó nuu ndo chi ra. ²⁹ Yuhu ñohó nui chi ra vatyi cuenda ra vachí, ta maa ra tachí chii —catyi ra Jesús.

³⁰ Tyicuan ta cuñi ñu tyihi ñu chi ra chichi vehe caa. Soco ni noo ñu ña tiñ ñu chi ra cha cuenda vatyi ta chaa ca quivi cha tahán chi tiñ ra chi ra. ³¹ Soco cuaha xaan ñu chinó iñi chi ra. Ta catyi ñu:

—Ican ra ihya cuví Cristo. ¿Atu cuaha ca milagru sacuvi inga ra tatu quichi ra? —catyi ñu.

Nu tachi ra cuví fariseo policía cuquehen chi ra Jesús cohon ra vehe caa

³² Cha chiñi ra fariseo cha cahán ñáyivi tuhun ra Jesús, maa ra ta ra cacuví nuu chi tata sutu catachí ra chi policía cuenda vehe ñuhu cuan cuque-

hen ra chi ra tyi cohon ra vehe caa. ³³ Tyicuan ta ra Jesús catyi ra:

—Cunyai chihin ndo suhva ri ca quivi. Yahā cuan ta cunuhi nu nyaá ra cha tachí chii. ³⁴ Nyoho cunanducu ndo chii. Soco ma ñañihi ndo chii. Vatyi ma cuvi cahun ndo nu cuacunyai —catyi ra Jesús.

³⁵ Tyicuan ta quichaha candaca tuhun ra cacuví nuu chi ñu Israel chi ra tahan ra:

—¿Nya cahun ra ihya cha ma ñañihi yo chi ra? ¿O cahun ra nu nyaa ra Israel cha ca iyó ñuu Grecia vatyi sañaha ra chi ñu iyó yucuan, vaha? ³⁶ ¿Ñáá cha cuñi chi catyi tuhun cahan ra chihin yo? Vatyi catyi ra: “Cuananducu ndo chii soco ma ñañihi ndo chii. Vatyi ma cuvi cahun ndo nu cucunyai” —tyicuan caa cacuví yuhu ra tuhun ra.

Ñu chinó iñi chi Nyoo cucohon Tatyí Ii ra añima ñu

³⁷ Quivi nu ndihi chiyo vico, yucuan quivi cha ñiñi ca. Ta quivi cuan ndicuitā ra Jesús ta ñihi cahán ra ta catyi ra:

—Tatu nya noo ndo ityi añima ndo tuhun Nyoo, ñaha ndo ta nachino iñi ndo chii. ³⁸ Ñu cha chinó iñi chii, chichi añima ñu cucono tari noo yuvi ndutya cha nyitó, tari cuhva catyi nu tutu Nyoo —catyi ra Jesús.

³⁹ Soco chihin cuan cuñi ra catyi ra vatyi ñu chinó iñi chi ra cunaquehen ñu Tatyí Ii Nyoo, vatyi quivi cuan ta quichi ca Tatyí Ii Nyoo vatyi ra Jesús, ta cunuhi ca ra nya gloria nu cusacahnu Sutu ra chi ra.

Nu cusiiñ ñáyivi cha ña tahán iñi tuhun cahan ra

⁴⁰ Suhva ñáyivi cha chiñi ñu tuhun ihya, catyi ñu:

—Ndicha vatyi ra ihya profeta Nyoo cha nyaá quichi cuví ra —catyi ñu.

⁴¹ Ta inga ñu catyi ñu:

—Ican ra cuví Cristo —catyi ñu.

Soco inga ñu catyí ñu:

—¿Yoso caa cha ra Galilea cuví ra Cristo? ⁴²Vatyí nu tutu Nyoo catyí chi vatyí ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyí ñu.

⁴³Tyicuan ta ñáyivi cuan canatahvi sava ñu cha cuenda ra Jesús. ⁴⁴Yihí ñu cuñí ñu quehen ñu chi ra cutyihí ñu chi ra chichi vehe caa. Soco yori tiin chi ra.

Ra cacuví nuu vehe ñuhu ña cachinó iñi ra chi ra Jesús

⁴⁵Tyicuan ta policia vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chi tata sutu. Ta candacá tuhun ra chi policia cuan ta cacatyí ra:

—¿Ñáá tuhun ña quehen ndo chi ra?

⁴⁶Ta policia cuan cacatyí ra:

—¡Ni noo chaha ta ni yori tuhva cahan tari cahán ra cuan! —cacatyí ra.

⁴⁷Tyicuan ta ra fariseo catyí ra chi policia cuan:

—¿Atu sandaví ñaha ndihi ra chi nyoho ñandihí? ⁴⁸¿Nyehe ndo vatyí ni noo ra cuví nuu chi ndi cha cuví ndi fariseo ta ña chinó iñi chi ra cuan? ⁴⁹Soco maa ri ñáyivi cha ña chitó nyicón chi ra. Soco ña vaha ñu nuu Nyoo —catyí ra.

⁵⁰Tyicuan ta ra Nicodemo, ra cha chahan nu nyaá ra Jesús cha cha cuaa, cuví ra noo ra fariseo, ta catyí ra chi ra:

⁵¹—Catyí ley vatyí ma cuví tachi tuñi yo chi noo ra tatu ma cuiñi xihna yo tuhun cahan ra, tacuhva coto yo ñáá cha sacuví ra —catyí ra chi ra.

⁵²Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyí ni noo ra chahá cuenda tuhun cahán Nyoo ta ña nyaá chi cha quichi ra ityi Galilea —cacatyí ra.

Ñaha sihi cha natuvi chihin rayii ta iyó yii ña

⁵³Tyicuan ta tahan tahan ra cuanuhu coyo ra vehe ra.

8 Soco ra Jesús cuahan ra yucu cha nañi Olivo. ²Ta cha inga quivi cuhva cha vachi cundichin, cuahan tucu ra inga chaha vehe ñuhu cahnu. Ta tandihi ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu. ³Tyicuan ta ra sacuahá cuenda ley ta ra cuví fariseo chaá coyo ra chihin noo ñaha iyó yii vatyí natiin ra chi ña nu cuatyí ña chihin inga rayii. Ta cuatyaa ra chi ña mahño ñáyivi nyicú cuan. ⁴Ta quichaha cacatyí ra chi ra Jesús:

—Maestro, ñaha sihi ihya natiin ndi chi ña nu cuatyí ña chihin inga rayii.

⁵Ta ley cha tyaa ra Moisés catyí chi vatyí nacahni yo chihin yuu chi ñusihi cha sacuví tyehe caa. ¿Ta yoho, yoso caa catyun vityin? —catyí ra chi ra.

⁶Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí siqui ra. Tyicuan ta ra Jesús chicunyaá tyayii ra nu ñuhú ta quichaha tyaa ra letra nu ñuhú chihin nundaha ra. ⁷Soco vatyí candacá tuhun ca ra chi ra, tyicuan ta nicuinanyaá ra ta catyí ra chi ra:

—Xihna ca nyoho cha ñahri cuatyí ndo quehen ndo yuu ta cañi ndo chi ña —catyí ra chi ra.

⁸Ta nicunyaá tucu ra ta quichaha sañihi ra tyaa ra letra nu ñuhú. ⁹Soco maa ra cha cachiñi ra tuhun ihya, tují iñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihi ra quita coyo ta ndoo noo tuhun ca maa ra Jesús chihin ñaha sihi cuan mahño nu nyicu ñáyivi. ¹⁰Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo

tuhun ri ca ñaha. Tyicuan ta catyí ra chi ña:

—¿Nya nyaá ra tyaa cuatyí sicun vityin? ¿Yori ni minoo ca ra cuñí cahñi chuun? —catyí ra chi ña.

¹¹ Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chi ña:

—Ni yuhu ta ma cahñi chuun. Cuahan vityin. Ta ma sacuvi con cuatyí —catyí ra chi ña.

Ra Jesús cuví cha ndichin cha sandichin añima ñáyivi

¹² Tyicuan ta cahan tucu ra Jesús nuu ñáyivi inga chaha, ta catyí ra chi ñu:

—Yuhu cuví ra cha sandichin añima ñáyivi iyó siqui ñuhu ñayivi. Yóo cha nyicón chii, coo ñu noo ñayivi chaa nu ndichin. Ta ma caca noo maa ñu nu ñaa iñi —catyí ra Jesús chi ñu.

¹³ Tyicuan ta ra cacuví fariseo cacatyí ra chi ra:

—Yoho, cahún tumañi iñi cuenda maun. Ta yucuan ña ndicha —catyí ra chi ra.

¹⁴ Nacahan ra Jesús ta catyí ra:

—Vasi suri mai cahín tumañi iñi cuende, soco ndicha cha cahin vatyí yuhu chité nya ityi quichí ta nya ityi cuahín. Soco nyoho ña chitó ndo nya ityi quichí ni nya ityi cuahín. ¹⁵ Nyoho yatyin xaan cahan ndo cha caa ñáyivi. Soco yuhu, yori chi cahin cha caa. ¹⁶ Soco tatu catyí cha caa ñáyivi, catyí cha ndicha. Vatyí ñima noo ri mai nyehí, soco Suti ra cha tachi chii, ican ra nyehé chihin. ¹⁷ Nu ley nyoho nyaá vatyí tatu uvi ra chaha cha ndaa, cuñí chi chinó iñi yo cha ndaa cuan. ¹⁸ Ta vityin vaha, suri mai cuví cha ndaa cuenda mai. Ta Suti, ra cha tachi chii, cuví inga cha ndaa —catyí ra Jesús chi ra.

¹⁹ Tyicuan ta candacá tuhun ra chi ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chi yuhu. Ta ni chi Suti ña ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

²⁰ Tuhun ihya cahan ra Jesús cha ni ri ca cha sañahá ra chichi vehe ñuhu cahnú, nu nyaá caja nu tyihí ñáyivi xuhun. Soco yori tyihí chi ra vehe caa, vatyí ta chaa ca quivi cha tahán chi cohon ra.

“Nu cuhun yuhu ma cuví cuhun ndo”, catyí ra Cristo

²¹ Ra Jesús catyí ra chi ra cacuvi fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo siqui ndo. Nu cuahan yuhu, nyoho ma cuví cuhun ndo —catyí ra Jesús chi ñu.

²² Tyicuan ta ra cacuví nuu chi ñu Israel cacatyí ra:

—¿Atu cucahñi maa ra chi ra? vatyí catyí ra vatyí ma cuví cuhun yo nu cuahan ra —cacatyí ra.

²³ Tyicuan ta ra Jesús catyí ra:

—Nyoho ra cuenda ityi yuvi ihya cuví ndo. Soco yuhu ra cuenda ityi siqui cuví. Nyoho ñu ñuhu ñayivi ihya cuví ndo. Soco yuhu ñima ra ñuhu ñayivi ihya cuví. ²⁴ Yucuan chaha catyí chi ndo vatyí cucúvi ndo ta cundoo cuatyí ndo siqui ndo. Vatyí tatu ña chinó iñi ndo cha yuhu cuví ra tinyaá cuatyí ndo, cundoo cuatyí ndo siqui ndo quivi cúvi ndo —catyí ra Jesús chi ra.

²⁵ Tyicuan ta quichaha candacá tuhun ra chi ra, ta catyí ra:

—¿Yóo ra cuví yoho?

Ta ra Jesús nacahan ra ta catyí ra:

—Cha yaha catyí chi ndo nyata quivi xihna ri. ²⁶ Cuaha xaan ca cha nyaá cha catyí chi ndo, ta cuaha xaan ca nyaá cha catyí cha caá ndo. Soco tuhun cha catyí yuhu chi ñáyivi iyó siqui ñuhu ñayivi, tuhun cha chiñi cha cahán ra cha tachi

chii cuví. Ta maa ra cahán ra cha ndicha —catyí ra.

²⁷ Soco maa ra cacuví nuu chi ñu Israel ña cutuñi iñi ra vatyí tuhun Nyoo Sutu yo cahán ra chihin ra. ²⁸ Yucuan chaha catyí ra chi ra:

—Cutyaa ndo chi ra cuví Rayii cha quichi nya gloria nu cruzi. Tyicuan ta cucacoto ndo vatyí yuhu cuví, ta cucoto ndo vatyí tyiño sahí ñima cha cuenda mai sacuví, soco cahín cha sañahá Suti chii. ²⁹ Vatyí Suti, ra cha tachí chii, nyaá ra chihin. Ta ña sandoó ra chii cha maa ri mai. Vatyí yuhu tyicuan ri sacuví cuhva cuñí ra —catyí ra Jesús.

³⁰ Cha cahán ra Jesús tuhun ihya, cuaha ra quichaha chino iñi ra chi ra.

Ñu cha cuví Sehe Nyoo ta ñu cha sacuví cha quiñi caa

³¹ Tyicuan ta catyí ra Jesús chi ra cacuvi nuu chi ñu Israel cha chinó iñi chi ra:

—Tatu nyoho ta sañihi ca ndo sacuvi ndo cuhva sañahí chi ndo, cuchaa ndo cuví ndo noo ñu yihí cuende. ³² Ta cucoto ndo cha ndicha. Ta chihin cha ndicha cuan cundoo ndo libre —catyí ra.

³³ Ta canacahán ra ta catyí ra:

—Nyuhu ñáyivi vachi tata ra Abraham cuví ndi. Ta ni noo chaha ta cuví ca ndi musu chi ni noo ñáyivi. ¿Yoso caa cha catyí yoho tyi ndoo ndi libre? —catyí ra chi ra.

³⁴ Ta ra Jesús catyí ra:

—Cha ndicha catyí chi ndo vatyí tandihí ñu sacuví cha quiñi caa, musu cuenda cha quiñi caa cuví ñu. ³⁵ Noo musu ña nyaá ra vehe chitoho ra tyicuan ri. Soco noo sehe ra cuví chitoho cuan, nyaá ra tyicuan ri chihin sutu ra. ³⁶ Yucuan chaha tatu yuhu cha cuví Sehe Nyoo ta tave chi ndo ndaha ra ña vaha, ndicha cuii cucoo ndo libre. ³⁷ Cha chité vatyí ñáyivi chi ra Abraham cuví chi ndo. Soco yihí ndo cuñí ndo cahñi

ndo chii, vatyí ña tíñ cuenda ndo tuhun cahin. ³⁸ Yuhu cahín cha sañahá Suti chii. Ta nyoho sacuví ndo cha catyí sutu ndo chi ndo —catyí ra chi ra.

³⁹ Ta canacahan ra ta catyí ra:

—Sutu ndi cuví chi ra Abraham —catyí ra.

Soco ra Jesús catyí ra chi ra:

—Tyehe ta ndicha cha sehe ra Abraham cuví chi ndo, sacuví ndo cha sacuví ra. ⁴⁰ Soco nyoho, vasi catyí chi ndo cha ndicha cha sañahá Nyoo chii, nyoho cuñí ndo cahñi ndo chii. ¿Ra Abraham ña sacuví ra cha tyicuan caa! ⁴¹ Nyoho tari sacuví sutu ndo, sacuví ndo —catyí ra chi ra.

Tyicuan ta nacahan ra ta catyí ra:

—Nyuhu ñima sehe ndahvi ñu cuví chi ndi. Iyó noo ri sutu ndi ta ican ra cuví Nyoo —catyí ñu.

⁴² Tyicuan ta ra Jesús catyí ra:

—Tyehe ta ndicha cha Nyoo cuví sutu ndo, nyoho cuñí ndo chii. Vatyí yuhu quite nu nyaá ra ta chají nyehe. Ña vachí cuenda mai, soco Nyoo tachí chii.

⁴³ ¿Ñáá tuhun cha ña cutuñi iñi ndo tuhun cha catyí chi ndo? Cha cuenda tyi ña cuñí ndo tyasohó ndo tuhun cahín.

⁴⁴ Cuihna ican ra cuví sutu ndo. Ta sehe ra cuví chi ndo. Ta cuñí ndo sacuvi ndo cuhva cuñí ra. Ra chahñi ñáyivi cuví cuihna nyata quívi xihna ri. Ni noo chaha ña sacuví ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyí cuendu ra. Ta sutu ñu cuendu cuví chi ra. ⁴⁵ Ta yuhu vatyí cahín cha ndicha, ña chinó iñi ndo chii. ⁴⁶ ¿Nya noo nyoho cuví catyí ndo vatyí yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáá tuhun cha ña chinó iñi ndo chii? ⁴⁷ Ñu cuenda Nyoo tyasohó ñu tuhun cahán Nyoo. Soco vatyí nyoho ñima ñu cuenda Nyoo cuví ndo, yucuan chaha ña cuñí ndo tyasohó ndo tuhun cahín —catyí ra Jesús.

**Ra Cristo, nyata nicumañi coo
ra Abraham, ta cha iyó ra**

⁴⁸ Tyicuan ta ra cacuvi nuu chi ñu Israel cacatyí ra chi ra:

—¿Atu ña ndicha vatyí yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

⁴⁹ Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui. ⁵⁰ Yuhu ña nanduquí nu sacahnu ñáyivi chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii. ⁵¹ Cha ndicha catyí vatyí ñu quichahá tuhun cahín ma chaa tuhun chihi añima ñu —catyí ra Jesús chi ra.

⁵² Tyicuan ta ra Israel cuan canacahan ra ta catyí ra:

—Vityin chitó vaha ndi vatyí yihí noo tatyí ña vaha chuun. Vatyí ra Abraham ta tandihi ra cuví profeta Nyoo cachihí ra. Ta yoho catyún vatyí ñu quichahá tuhun cahún ma cúvi maa ñu. ⁵³ ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóó ra cuví yoho cuñí maun? —catyí ra chi ra.

⁵⁴ Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyí nyoho tyí Nyoo cuenda ndo cuví chi ra. ⁵⁵ Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyí ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra. ⁵⁶ Ra Abraham sutu chahnu ndo cusii xaan cuñí ra vatyí cunyehe ra quivi quichi yuhu siqui ñuhu ñáyivi. Ta nyehe ra ta cusii xaan cuñí ra —catyí ra Jesús chi ñu.

⁵⁷ Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyí nyehun chi ra Abraham.

⁵⁸ Ta ra Jesús nacahan ra ta catyí ra:

—Cha ndicha catyí chi ndo vatyí nyata ni cumañi coo ra Abraham ta cha iyó yuhu —catyí ra Jesús chi ra.

⁵⁹ Tyicuan ta quehen ra yuu vatyí cañi ra chi ra Jesús. Soco maa ra quihví xehe ra, ta quita ra chichi vehe ñuhu cuan. Ta yahá ra mahñu ra ta cuahan ra.

**Nu sanduvahá ra Jesús chi
noo ra cha cuaa nyata cacu**

9 Cuhva cha yahá ra Jesús noo nu yahá ra, nyehe ra chi noo ra cha cuaa nyata cacu. ² Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³ Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyí cuví sañaha Nyoo tunyee iñi ra chihin ra. ⁴ Cha ni ri ca cha ñicahñu, cuñí chi cha sacuvi tyiño ra cha tachí chii. Vatyí vachi cha cuaa cha ma cuví ca saha tyiño yo. ⁵ Cha ni ri ca cha nyaf siqui ñuhu ñáyivi ihya, ñuhu ndichin cuenda ñáyivi iyó siqui ñuhu ñáyivi cuví.

⁶ Cha yahá cha catyí ra Jesús tuhun ihya, ta tyicu sii ra nu ñuhú. Ta savahá ra chihin nyahyu chihin sii ra ta tyaa ra chiti nuu ra cuaa cuan. ⁷ Tyicuan ta catyí ra chi ra:

—Cuahan cuanacatya nuun nya tanque Siloé cuan. —Sivi cuan cuñí chi catyí: “Tachí Chuun.”

Tyicuan caa ta ra cuaa cuan chahan ra chinacatya ra nuu ra. Ta cuhva cha nachaa ra, cha nyehe ra. ⁸ Tyicuan ta ñu nyicú yatyin yuvehe ra, ta ñu cha nyehe chi ra cha cucuaa ra ta caya ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹Ta catyí ra:

—Ra cha nañí Jesús cuan, ican savahā nyahyu ta tyaa ra chiti nui ta catyí ra chii: “Cuahan nya tanque Siloé ta nacatyon nuun.” Tyicuan ta chahin. Ta cha yahā nacatye nui ta nanyehi —catyí ra chi ñu.

¹²Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanahmā ra cuví fariseo chi ra cha cucuaā ta nanyehé

¹³Tyicuan ta chinyacaā ñu chi ra cha cucuaā cuan nuu ra cuví fariseo. ¹⁴Vatyí quivi cha savahā ra Jesús nyahyu ta sanduvahā ra chi ra cha cucuaā cuan, quivi nyitatú yo cuví. ¹⁵Yucuan chaha ra fariseo candaca tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyaa ra nyahyu chiti nui, ta nacatye ta vityin ndichin nyehí —catyí ra chi ra.

¹⁶Tyicuan ta suhva ra fariseo cacatyí ra:

—Ra cha sacuvi tyehe caa ñima ra cuenda Nyoo cuví ra, vatyí ña sahá ra ñáyivi quivi nyitatú yo —cacatyí ra.

Soco inga ra cacatyí ra:

—¿Yoso caa cha cuví sacuvi ra milagru ihya tatu ra iyó cuatyí cuví ra? —catyí ra.

Ta siin siin cha cacahan ra. Ta cacusiin ra. ¹⁷Ta candaca tuhun tucu ra inga chaha chi ra cha cucuaā cuan, ta catyí ra chi ra:

—¿Ta yoho, ñáá catyún cuenda ra cha sanduvahā chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸Soco ra cacuví nuu chi ñu Israel ña cuñí ra chino iñi ra cha cucuaā ra cuan ta vityin nyehé ra. Ta nyacua nya cha cacana ra chi sihi ra ta chi sutu ra cha nduvahā cuan. ¹⁹Ta candaca tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacu ra? ¿Yoso caa cha cuví nyehe ra vityin? —catyí ra.

²⁰Ta nacahan sutu ra ta sihi ra ta catyí ñu:

—Chitó ndi vatyí ican ra ihya cuví sehe ndi. Ta cuaá ra nyata cacu ra.

²¹Soco ña chitó ndi ñáá tuhun cha cuví nyehe ra vityin. Ta ni ña chitó ndi yóo cha sanduvahā chiti nuu ra. Ndaca tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²²Sutu ra sihi ra catyí ñu tyehe caa cha cuenda cha yuhví ñu chi ra cacuví nuu chi ñu Israel, vatyí cha catyihí tahan ra tuhun vatyí cutava ñehe ra chi ñu vehe ñuhu, yóo ri ñu cha catyí vatyí ra Jesús cuví Cristo. ²³Yucuan chaha catyí ñu: “Cha ñihi ra. Ndaca tuhun ndo chi maa ra.”

²⁴Tyicuan ta canacana tuucu ra chi ra cha cucuaā cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi tyi rayi cuan, ra iyó cuatyí cuví ra —cacatyí ra.

²⁵Tyicuan ta nacahan ra cha cucuaā cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí

yuhu cucuai, ta vityin ndichin nyehí —catyí ra.

²⁶ Ta candaca tuhun tucu ra chi ra inga chaha ta catyí ra:

—¿Ñáá cha sacuví ra chuun? ¿Yoso caa sacuví ra ta nanyehún? —cacatyí ra chi ra.

²⁷ Ta catyí ra:

—Cha catyí chi ndo, ta ña quichahá ndo chii. ¿Ñáá tuhun cha cuñí ndo cha catyí inga chaha? ¿Atu cuñí tucu nyoho cunyicon ndo chi ra?

²⁸ Tyicuan ta cacahan ra chi ra, ta catyí ra:

—Yoho yihún cuenda ra, soco nyuhu cuenda ra Moisés yihí ndi. ²⁹ Nyuhu chitó ndi tyi Nyoo cahan chihin ra Moisés. Soco ra cuan, ña chitó ndi nya quitá ra —cacatyí ra.

³⁰ Tyicuan ta nacahan ra cucuaa cuan ta catyí ra:

—¡Nana vaha cha cuví ihya! Nyoho ña chitó ndo nya quitá ra, ta chi yuhu sananyehe ra. ³¹ Chitó vaha yo vatyí Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuví cuhva cuñí ra, tyasohó Nyoo nu chicán ra cuan. ³² Ni noo chaha ta cuiñi ca yo vatyí iyó noo ra sananyehe chi noo ra cuaá nyata cacu. ³³ Tyehe ta ra ihya ta ñima cuenda Nyoo vachí ra, ñahri cha cuví sacuví ra —catyí ra chi ra.

³⁴ Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñún sañahun chi nyuhu? —cacatyí ra.

Ta catava ñehe ra chi ra vehe ñuhu.

Ñu cha ñahri tuhun Nyoo caa ñima tari cha cuaa ñu

³⁵ Ra Jesús chitó ra vatyí catava ñehe ra chi ra cucuaa cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó iñi yoho chi Rayii cha quichi nya gloria? —catyí ra chi ra.

³⁶ Ta nacahan ra ta catyí ra:

—Tata, catyí chii, yóo ra cuví ra vatyí chino iñi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutu Mañi yuhu —catyí ra chi ra Jesús.

³⁹ Ta ra Jesús catyí ra:

—Yuhu vachí vatyí catyí cha caá ñima ñáyivi iyó siquí ñuhu ñayivi ihya. Vatyí ñu cuaa, ñu ña chitó tuhun Nyoo cunanyehe ñu vatyí cucava tuhun Nyoo ñima ñu. Ta ñu cuñí maa tyi ndichin nyehe tyi catyí ñu tyi chitó ñu tuhun Nyoo, coto ñu tyi cuaa ñu tyi ña chinó iñi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chiñi ra cha cahan ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón nuu ndo tyi chiñuhú tuhun Nyoo chi ndo, ta ma coo cuatyí ndo. Soco vatyí catyí ndo tyi nyehé ndo ta chitó ndo, yucuan chaha ndoó cuatyí siquí ndo —catyí ra chi ra.

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachí Nyoo vatyí sahá cumi ra chi ñu

10 Cahan ca ra Jesús ta catyí ra: —Cha ndicha catyí chi ndo, tatu noo ra cuaquihvi chichi noo chacu mbee, ta cha nuu cha quihví ra yuhu chacu, quihví ra inga ityi, ra suhu cuví ra. ² Soco ra quihví ityi yuhu chacu, ra sahá cumi mbee cuan cuví ra. ³ Ra nyaá yuhu chacu cuan nuña ra na quihví ra sahá cumi mbee cuan. Ta mbee cuan nicohón soho ti ndusu ra. Noo noo ti ta iyó sivi ti sahá ra, ta cana ra chi ti ta tavá

ra chi ti ityi chata chacu. ⁴Ta cha yaha tava ra chi ti, ta cuahan ra ityi nuu ti ta nyicón ti chi ra, vatyí nicohón soho ti ndusu ra. ⁵Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶Tyehe caa tuhun cahan ra Jesús chihin ñu. Soco maa ñu ña cutuñí ñiñi ñu ñáá tuhun cuñí ra cahán ra cha tyicuan caa.

Ra Jesús cuví ra sahá cumi vaha mbee

⁷Tyicuan ta catyí ra Jesús inga chaha chi ñu:

—Cha ndicha catyí chi ndo vatyí yuhu cuví tari noo yuhu chacu nu quihví coyo ñáyivi cuende cha cuví ñu tari mbee sane. ⁸Tandihí ra cha yaha caquichí coyo, ra suhu cacuví ra. Soco mbee ña quichaha ti cha cacahan ra. ⁹Yuhu cuví yuvehe gloria. Ñu quihví cuende, cacu ñu cha ma cuhun ñu anyaya. Ta cuví ñu tari noo mbee cha quihví ta quitá chichi chacu cuan. Ta ñihí ti cuhu cachi ti.

¹⁰Noo ra suhu vachí ra, soco vachí suhu ra, vachí cahñi ra, vachí sativi ra. Soco yuhu vachí vatyí coo ndo noo ñáyivi chaa cha ma naa ca maa. ¹¹Yuhu cuví noo ra vaha sahá cumi mbee. Vatyí ra sahá cumi mbee chahá ra ñáyivi ra cuenda sana ra. ¹²Soco ra cuví musu, tatu nyehé ra vachí lobo cha cuví noo quiti xaan, sandoo maa ra chi mbee sana chitoho ra. Ta chinó ra. Vatyí ñima sana maa ra cuví ti. Tyicuan ta tiñ quiti xaan chi mbee cuan. Ta saquicono ti chi ti ityi cuan ityi ihya. ¹³Musu cuan chino ra cha cuenda vatyí cha cuenda xuhun ri sahá tyiño ra. Ta ñahri cuenda ra chi mbee, tyi ñima sana ra cuví.

¹⁴Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó nuu ti chii, ¹⁵tari ñohó nuu Suti chii, ta yuhu ñohó nui chi ra. Yuhu chahí ñáyivi cuenda mbee sane. ¹⁶Iyó tucu inga mbee sane cha ñima chichi chacu ihya iyó ti. Cuñí chi cha cuhin cunaquehin chi ti. Ta

cuquichaha ti chii. Ta coo noo ri nu quihí tandihí ti. Ta noo ri ra sahá cumi chi ti cucoo.

¹⁷Suti cuñí ra chii vatyí chahí ñáyivi cha catyí ñáyivi cuende. Soco yaha cuan, nacuhva tucu ra ñáyivi inga chaha. ¹⁸Yori tinyaá ñáyivi, soco cha iyó vaha ñiñi mai ta chahí. Iyó ityi chii cha cuhve ñáyivi ta cúvi, ta iyó tucu ityi chii cha naquehen tiqui inga chaha vatyí cunan-dote. Ican ihya cuví tyiño cha tyaa Suti chii —catyí ra Jesús.

¹⁹Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñi tucu ra chihin tahan ra inga chaha. ²⁰Ta cuaha xaan ra catyí ra:

—¿Ñáá tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

²¹Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñí ra cacuví nuu chi ñu Israel chi ra Jesús

²²Nya ñuu Jerusalén yoo vichin cuví. Ta sanducahnú ñu noo vico quivi nanduchin cuiya cha suhñi ñu vehe ñuhu cahnu cuan. ²³Ta ra Jesús chicá noo ra vehe ñuhu cuan ityi corredor ra Salomón. ²⁴Ta ra cacuví nuu chi ñu Israel cachicuitayucu cutya ra nuu ra. Ta quichaha ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

²⁵Ta ra Jesús catyí ra:

—Cha yaha catyí chi ndo, ta ña chinó ñiñi ndo chii. Tyiño sacuví nuu Suti ican cuví cha ndaa cuende. ²⁶Soco nyoho ña chinó ñiñi ndo chii vatyí ñima mbee sane cuví chi ndo. Tari cuhva catyí chi ndo ndaa ri. ²⁷Mbee sane nicohón soho ti ndusi, ta yuhu ñohó nui chi ti. Ta maa ti nyicón ti chii. ²⁸Yuhu chahí ñáyivi cha ma naa ca maa coo ti. Ta ma cunaa ti.

Ta ni yori maa cuví tinyaa chi ti chichi ndahi. ²⁹Maa Suti chahá chi ti chii. Ta cahnu ca cuví maa ra ican saha tandíhi ca. Ta yori cuví tinyaa chi ti chichi ndaha ra. ³⁰Yuhu ta Suti Nyoo, noo ri cuví ndi —catyí ra Jesús.

³¹Tyicuan ta ra cacuví nuu chi ñu Israel cuan caquehen tucu ra yuu vatyí tuchi ra chi ra. ³²Ta ra Jesús catyí ra chi ra:

—Cuaha xaan cha vaha sacuví yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

³³Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyí yahun nuu Nyoo chihin tuhun cahún. Noo rayii ri cuvún, soco sahún tari Nyoo chuun —cacatyí ra chi ra.

³⁴Tyicuan ta catyí ra Jesús chi ra:

—Nu tutu tuhun Nyoo nyaá vatyí Nyoo catyí ra: “Nyoho cuví ndo nyoo”, catyí Nyoo. ³⁵Chitó yo vatyí cha cahán tuhun Nyoo, ma cuví catyí yo tyi ña ndicha. Ta Nyoo sacunañi ra nyoo chi ñu naquehen tuhun cahán ra. ³⁶Ta tatu maa Nyoo nacachi chi yuhu ta tachi ra chii siquí ñuhu ñayivi ihya ¿yoso caa catyí nyoho vatyí yahá yuhu nuu Nyoo nu catyí tyi Sehe Nyoo cuví chii? ³⁷Tatu ña sacuví cha sacuví Suti, ma chino iñi ndo chii. ³⁸Soco tatu sacuví, vasi ma chino iñi ndo chii, soco chino iñi ndo tyiño sacuví. Tyicuan ta cucoto cachi ndo vatyí Nyoo Suti iin ri cuví ra chihin. Ta yuhu iin ri cuví chihin Nyoo Suti —catyí ra Jesús.

³⁹Inga tucu chaha cacuñi ra catyihi ra chi ra vehe caa, soco ra Jesús cuahan ri ra. ⁴⁰Tyicuan ta cuanuhu ra ityi nu caña ñanyii inga chiyo yuvi cahnu Jordán cuan nu sacondutya ra Juan ta xi-

hna ri. ⁴¹Cuaha ñayivi chahan chinyehe chi ra, ta catyí ñu:

—Ndicha, vasi ni noo milagru ña sacuví ra Juan, soco tandíhi tuhun cha chahan ra cuenda ra ihya ta ndicha —catyí ñu.

⁴²Ta cuaha xaan ñu cachino iñi ñu chi ra Jesús ityi cuan.

Nu chihí ra Lázaro

11 Iyó noo ra cuhví cha nañi Lázaro ñuu Betania nu cuví ñuu cu María ta cu Marta cuhu ña. ²Ta cu María, cuhva ra Lázaro cuan ican ña cuví ñaha cha choso ndutya vixi chahán chaha Sutu Mañi yo, ta chihin ixi xiñi ña nacuhva ña. ³Ta tyicuan caa ninduvi tahan ñu, cu María chihin cuhu ña, tachi ñu tyiño na cucatyí ra chi ra Jesús tyehe caa;

—Sutu Mañi ndi, amigon cuhví ra —catyí ñu, tachi ñu tyiño.

⁴Ta cha chiñi ra Jesús tuhun ihya ta catyí ra:

—Cuehe cuan ma cahñi chi chi ra. Cuhví ra tyehe caa tacuhva vatyí quivi nduvaha ra cunyehe ñayivi tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵Cuñi vavaha ra Jesús chi cu Marta ta chi cuhu ña, ta chi cuhva ña, ra Lázaro.

⁶Soco cuhva cha catyí ñu chi ra tyi cuhví ra Lázaro, ndoo ra nu ñohó ra uvi ca quivi. ⁷Tyicuan ta catyí ra chi ra cachicá noo chihin ra:

—Coho ndo inga chaha nya Judea —catyí ra.

⁸Tyicuan ta ra cachicá noo chihin ra cacatyí ra chi ra:

—Maestro, ta cunaha ca cha cuñi ra cacuví nuu chi ñu Israel cahñi ra chuun chihin yuu. Ta vityin, ¿inga chaha cuñin cahun yucuan? ¿Ñáa tuhun?

⁹Ta catyí ra Jesús:

—¿Atu ñima uchi uvi hora iyó noo quivi? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuví ra tyiño nuu Nyoo. ¹⁰Soco

tatu cha cha cuaa chicá noo ra, nduva ra vatyí ñahri ñuhũ.

¹¹ Tyicuan ta quichaha catyí tucu ra Jesús:

—Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñí chi catyí vatyí cuanduvaha ra —cacatyí ra.

¹³ Soco ra Jesús cuñí ra catyí ra vatyí cha chihí ra Lázaro. Ta ra cachicá noo chihin ra, cuñí maa ra vatyí cha ndicha quixí ra cuan. ¹⁴ Tyicuan ta catyí cachi ra Jesús chi ra:

—Ra Lázaro cha chihí ra. ¹⁵ Ta cusii cuñí vatyí yori chinyaa yucuan. Vatyí tyicuan caa vaha ca cha cuenda nyoho, tacuhva chino iñi ndo chii. Cõho ndo cunyehe ndo chi ra —catyí ra chi ra.

¹⁶ Tyicuan ta ra Tomás, cha catyí ñu: “ra tinihi cuan”, catyí ra chi inga ra cachicá noo chihin ra Jesús:

—Cõho tucu yo vatyí cúvi yo ñin ri chihin ra —catyí ra.

Ra Jesús cuví ra sanandotó chi yo ta chahá ra ñayiví coo yo

¹⁷ Cha chaq ra Jesús Betania, ñihí ra tuhun vatyí ra Lázaro cha cumi quiví ñohó ra chichi ñuhú. ¹⁸ Ñuu Betania cuan nyaá chi yatyin ri nu nyaá ñuu Jerusalén, tari noo uvi kilómetro sisava. ¹⁹ Ta cuaha ra cacuví nuu chi ñu Israel cuahan ra cuanyehe ra nu nyaá cu Marta ta cu María vatyí chihí cuhva ñu. ²⁰ Ta ñihí cu Marta tuhun vatyí cha cuachaa ra Jesús. Ta cuahan ña cuasatahan ña chi ra. Soco cu María ndoq ña vehe. ²¹ Ta cu Marta catyí ña chi ra Jesús:

—Sutu mañí yuhu, tyehe ta nyaun ihya, ma cúvi cuhve. ²² Soco yuhu chité vatyí Nyoo cusacuvi ra tandihí cha cacon chi ra —catyí ña chi ra.

²³ Ta ra Jesús catyí ra chi ña:

—Cuhvon cunandoto ra.

²⁴ Ta cu Marta catyí ña:

—Ndicha, chité vatyí cunandoto ra quiví nandoto ndiyi nu cuandihí quiví —catyí ña.

²⁵ Tyicuan ta catyí ra Jesús chi ña:

—Yuhu cuví ra sanandotó chi ndiyi. Ta chahí cha conyito ñáyivi. Ñu chinó iñi chii, vasi cha chihí ñu soco coo tucu ñu. ²⁶ Ta tandihí ñu nyitó ca ta chinó iñi ñu chii, ma cúvi maa ñu. ¿Atu chiñó iñun tuhun ihya? —catyí ra chi ña.

²⁷ Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha nyaá cha quichi siqui ñuhu ñayiví ihya —catyí ña.

Nu chacu ra Jesús nu ñaña ra Lázaro

²⁸ Cha yaha cha catyí cu Marta tuhun ihya, ta chahan ña chiquehen ña chi cuhu ña, cu María, ta catyí xehe ña chi ña:

—Cha chaq Ra Sacuaha. Ta tachí ra tyiño nacuhun nu nyaá ra —catyí ña.

²⁹ Ta cha chiñí cu María tuhun ihya, nducuita ri ña, ta cuahan ña nu nyaá ra Jesús, ³⁰ Ta ra Jesús ta quihvi ca ra chichi ñuu cuhva cuan, nyaá ra nu nañihí cu Marta chi ra. ³¹ Ta nya vehe cu María, nyicú ra cacuví nuu chi ñu Israel tyinyeé ra chi ñu. Ta nyehe ra vatyí numi ri quitá ña. Ta cuñí maa ra tyi cuahan ña nu ñaña cuacuacu ña. Ta cuahan coyo ra chata ña.

³² Ta cuhva cha chaq cu María nu nyaá ra Jesús chicuñí chiti ña chaha ra, ta catyí ña:

—Sutu Mañi yuhu, tyehe ta chinyaun ihya, cuhve ma cúvi ra —catyí ña.

³³ Nyehe ra Jesús cha chacú cu María chihin ra Israel cha vachi coyo chihin ña, ta nducuihya xaan cuñí aña ra. ³⁴ Ta ndaca tuhun ra chi ñu:

—¿Nya maa maa tyihí ndo chi ra? —catyí ra.

Ta catyí ñu:

—Tata, cõho ta nyehun —catyí ñu chi ra.

³⁵ Ta ra Jesús chacu ra.

³⁶ Tyicuan ta catyí ra Israel cuan:

—Nyehe ndo yoso cha cuñí ra chi ra —catyí ra.

³⁷ Soco suhva ñu catyí ñu:

—Ican ra ihya cha sananyehe chi ra cuaa cuan. ¿Atu ña cuví sanduvaha tucu ra chi ra Lázaro ihya? —catyí ñu.

Nu sanandoto ra Jesús chi ra Lázaro

³⁸ Nducuihya cuñí ra Jesús inga chaha ta tuhva ra nu ñaña cuan. Noo chichi yuu cuví. Ta nyasí noo yuu yuhu chi. ³⁹ Ta catyí ra Jesús:

—Sacanyaha ndo yuu chiña —catyí ra.

Ta cu Marta, cuhva ndiyi cuan, catyí ña:

—Soco cha caña xico, Sutu Mañi yuhu, vatyí cha cumi quivi cha chihí ra —catyí ña.

⁴⁰ Soco ra Jesús catyí ra chi ña:

—¿Atu ña cha catyí chuun vatyí tatu chinó inun, cunyahun yoso cha cahnu cuví Nyoo? —catyí ra chi ña.

⁴¹ Tyicuan ta sacanyaha ñu yuu cuan. Ta ra Jesús nanyehe ndaa ra ityi andivi, ta catyí ra:

—Sutu Mañi yuhu, tyahvi nyoo chuun tyi chiñun cha cahín. ⁴² Yuhu chité vatyí tyicuan ri chiñún tuhun cahín. Soco tyehe caa cahín cha cuenda cha vaha chi ñáyivi nyicú ihya, tacuhva nachino iñi ñu tyi yoho tachí chii —catyí ra Jesús chi Nyoo.

⁴³ Cha yaha cha catyí ra tuhun ihya, canachaa ra, ta catyí ra:

—¡Lázaro, quita chiña!

⁴⁴ Ta quita ra cha chihí cuan, nuñí ndaha ra ta nuñí chaha ra chihin sahma. Ta nuñí nuu ra chihin noo sahma. Ta ra Jesús catyí ra chi ñáyivi nyicú yucuan:

—Ndachi ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahñi ñu chi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Ta cuaha xaan ra cacuví nuu chi ñu Israel cha chahan coyo chihin cu María nachino iñi ñu cha nyehe ñu cha sacuvi ra Jesús. ⁴⁶ Soco suhva ra chahan ra chisacoto ra chi ra fariseo cha sacuvi ra Jesús. ⁴⁷ Tyicuan ta ra fariseo ta ra cacuví nuu chi tata sutu sacoo ra noo junta ta cacatyí ra:

—¿Ñáa cha sacuvi yo? Vatyí cuaha xaan milagru sacuví ra cuan. ⁴⁸ Tatu cuhva yo cha sacuvi ca ra tyicuan caa, tandihí ñáyivi cuchino iñi ñu chi ra. Ta ra cacuví tyiño nya ñuu Roma cuquichi ra ta cusatani ra vehe ñuhu yo ta ñuu yo —cacatyí ra chi ra tahan ra.

⁴⁹ Soco ra cuví nuu cahnu ca chi tata sutu cuiya cuan, ra nañí Caifás chahan ra ta catyí ra chi ra:

—Nyoho ñahri maa cha chitó ndo.

⁵⁰ Ni ña cutuñí iñi ndo vatyí vaha ca cha cúvi noo ri rayi cha cuenda tandihí ñáyivi ñuu, ta ñima ca cha cúvi tandihí yo —catyí ra Caifás.

⁵¹ Soco ra Caifás cuan ñima cha cuñí maa ra ta cahán ra, soco vatyí ra cuví nuu cahnu ca chi tata sutu cuiya cuan cuví ra, yucuan chaha maa Nyoo sacahan chi ra. Vatyí catyí ra vatyí ra Jesús cucuvi ra cha cuenda tandihí ñáyivi ñuu Israel. ⁵² Ta ñima cha cuenda ri ñu cuan, soco vatyí cusandu iin ri ra chi tandihí ñu cuví sehe Nyoo cha iyó inga ñuu ñandihí. ⁵³ Yucuan ta nyacua nya quivi cuan ta ra cacuví nuu chi ñu Israel cuan, nducu ra cuhva yoso caa cahñi ra chi ra Jesús.

⁵⁴ Yucuan chaha tyi ra Jesús ña chicá noo ndichin ca ra nu nyicú ñu Israel. Ta quita ra ityi Judea cuan. Ta cuahan ra noo ñuu cha nañí Efraín cha nyaá yatin ri ñuhu ityi. Ta yucuan ndoó ra chihin ra cachicá noo chihin ra.

⁵⁵Ña cuaha ri ca quivi ta chaq vico cuenda ñu Israel, vico cha ñañ pascua. Ta cuaha xaan ñáyivi quita ñu ñuu ñu ta cuahan ñu Jerusalén cuasacuvi ñu cha tuhvá maa ñu sacuvi cha sandundí ñu chi ñu nuu Nyoo cha ni cumañi ca cha quivi vico cuan. ⁵⁶Nanducú ñu chi ra Jesús. Ta cuhva cha nyicú ñu chichi vehe ñuhu cahnu cuan ta ndaca tuhun ñu chi tahan ñu, ta catyí ñu:

—¿Yoso caa cuñi nyoho? ¿Atu cuquichi ra vico ihya, o ma quichi ra? —catyí ñu chi tahan ñu.

⁵⁷Ta ra cacuvi fariseo ta ra cacuvi nuu chi tata sutu, catyí ra vatyí tatu nya noo ñu chitó ñu nya nyaá ra Jesús, nacatyí ñu. Vatyí cutiin ra chi ra vatyí cohon ra vehe caa.

Nu chosó cu María ndutya vixi chahán chaha ra Jesús

(Mt. 26.6-13; Mr. 14.3-9)

12 Cumaní iñu ca quivi cha cuatahan chi vico pascua, ta chaq ra Jesús ñuu Betania nu iyó ra Lázaro, ra cha sanandotó ra Jesús chi. ²Yucuan savaha ñu cha cuxiñi ra Jesús. Cu Marta tyihí ña coho nu mesa. Ta chicunyaq ra Jesús nu mesa. Ta nyaá tucu ra Lázaro chihin ra. ³Tyicuan ta cu María quehen ña ta cha sava litro ndutya vixi chahán cha chinqo chihin maa ri nardo, noo cha yahvi xaan nyaá. Ta cuhvi ña chaha ra Jesús chihin ndutya vixi chahán cuan. Yahq cuan ta sana ityi ña chihin ixixiñi ña. Tandíhi chichi vehe cuan chitú chihin xico ndutya vixi chahán cuan. ⁴Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chi ra Jesús nuu ra xaan iñi chi ra. Ta quichaha catyí ra Judas cuan chi ñu cuan:

⁵—¿Náa tuhun ña xico ndo ndutya vixi chahán ihya chi ñáyivi, cuhva ñu

cuenda mil chi ndo chihin, ta tyinyee ndo chi ñu ndahvi? —catyí ra.

⁶Soco ra Judas ña catyí ra tuhun ihya cha cuenda cha ndahvi cuñi ra nyehe ra chi ñu ndahvi, soco vatyí ra suhu cuví ra. Ta vatyí ndaha maa ra nyaá yitin xuhun ta tuhvá ra suhu ra cha tyihí ñu chichi yitin cuan. ⁷Tyicuan ta catyí ra Jesús chi ra:

—Saña chi ña, vatyí ñaha ihya sacuvi ña tyehé caa cha cuenda cha cuquihvi coño ñuhi chichi ñuhu. ⁸Ñu ndahvi tyicuan ri cu cunyicú ñu chihin ndo, soco yuhu ña tyicuan ri —catyí ra Jesús chi ra Judas cuan.

Nu nducu cahñi ra chi ra Lázaro

⁹Cuaha xaan ñu Israel ñihí ñu tuhun tyi ra Jesús ñohó ra Betania, ta chahan coyo ñu nyicuan. Ñima cha cuñi ñu nyehe ñu chi ra Jesús ri, soco cuñi tucu ñu nyehe ñu chi ra Lázaro, ra cha sanandotó ra Jesús chi. ¹⁰Tyicuan ta ra cacuvi nuu chi tata sutu catyihí tahan ra tuhun vatyí cucahñi tucu ra chi ra Lázaro ñandíhi. ¹¹Vatyí cha cuenda ra ta cuaha xaan ñu Israel cacusiñ ñu chihin ra ta nachino iñi ñu chi ra Jesús.

Nu quihvi ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹²Cuaha xaan ñáyivi cuahan ñu Jerusalén cha vico pascua. Ta cha inga quivi cachitó ñu tyi ra Jesús cuachaa ra. ¹³Tyicuan ta chahnya ñu ndaha tunducaha ta cuahan coyo ñu cuasatahan ñu chi ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chi ra vachi ihya chihin tunyee iñi Nyoo! ¡Nasoco xaan Nyoo chi Rey cuenda yo ñu Israel! —cacatyí ñu, canachaa ñu.

¹⁴Ta ra Jesús ñihí ra noo burru ta chicoso ra chi ti tari cuhva catyí maa nu tutu Nyoo tyehé caa:

¹⁵Ma yuhvi ndo ñáyivi ñuu Sión Nyehe ndo, vachi Rey ndo. Yosó ra noo burru —catyí chi nu tutu Nyoo.

¹⁶Quivi cuan ra cachicá noo chihin ra Jesús, ña cacutuñi ñi ra tuhun cuan cha nyaá nu tutu Nyoo. Soco cha yaha cuanuhu ra Jesús gloria, canicohon ñi ra vatyí tandihi tuhun cuan ta nyaá nu tutu Nyoo tyi tyicuan caa cucuvi chi ra. Ta tyicuan caa cuví chi ra.

¹⁷Ta ñáyivi cha nyehe quivi cha cana ra Jesús chi ra Lázaro chichi ñaña, quivi sanandoto ra chi ra, nacatyí ñu cha nyehe ñu. ¹⁸Ta yucuan chaha cuaha xaan ñáyivi chisatahan ñu chi ra Jesús, vatyí chito ñu milagru cha sacuví ra. ¹⁹Tyicuan ta ra cuví fariseo cacatyí ra chi ra tahan ra:

—Cha nyehé maa ndo tyi ñahri maa cuví sacuví yo, vatyí tandihi ñáyivi nyicón chi ra —cacatyí ra.

Nu nducú suhva ra ñuu Grecia chi ra Jesús

²⁰Ñohó tucu suhva ra ñuu Grecia mahñu ñáyivi cha chahan coyo chisacahnu vico ñuu Jerusalén cuan. ²¹Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñi ndi cahan ndi chihin ra Jesús —cacatyí ra.

²²Ta ra Felipe chahan ra chicatyí ra chi ra Andrés. Ta ninduvi ra chinacatyí ra chi ra Jesús vatyí ra Grecia cuan cuñi ra cahan ra chihin ra. ²³Ta nacahan ra Jesús, ta catyí ra:

—Chaq cuhva vityin vatyí yuhu cha cuví Rayi cha quichi nya gloria, cuananuhu tiqui nya gloria, ta cusacahnu Suti chii. ²⁴Cha ndicha catyí chi ndo vatyí tatu noo chiti ta ma quihí chichi ñuhú ta ma tyahyu chi, noo ri chiti cucuvi chi tyicuan ri maa. Soco tatu

tyahyu chi, nduchaa chi inga chaha ta coo cuaha ca chiti chi. ²⁵Ñu cuñi xaan ñáyivi iyó ñu, cucunaa ñu. Soco ñu ña cuñi ñáyivi ñuhu ñáyivi ihya, cunañihi ñu noo ñáyivi cha ma naa ca maa cucoo ñu. ²⁶Tatu yihí ndo cuñi ndo sacuvi ndo tyiño nui, cunyicon ndo chii. Ta nu cuacunyaí, yucuan cucunya tucu ñu sacuví tyiño nui. Tatu nya nyoho sacuví ndo tyiño nui, Suti cusacahnu ra chi ndo.

Nu cahán ra Jesús tuhun yoso caa cucuvi ra

²⁷Vityin chicá xaan xiñi. Ta ¿ñáá cha cucatyí? ¿Atu catyí chi Suti na sacanyaha ra tindoho cha nyaá cunyehe vityin? Ma catyí cha tyicuan caa vatyí cha cuenda cuan vachi siqui ñuhu ñáyivi ihya. ²⁸Vaha ca catyí chi Suti: “Sutu Mañi yuhu, sacahnu sivun” —catyí ra Jesús.

Tyicuan ta cahan noo ndusu ityi andivi ta catyí chi tyehe caa:

—Cha yaha sacahni sivi, ta cusacahni inga chaha —catyí ndusu cuan.

²⁹Ta ñu nyicú yucuan, chiñi ñu ndusu cuan, ta catyí ñu vatyí savi cahan. Ta inga ñu catyí ñu:

—Noo ángel cahan chihin ra.

³⁰Tyicuan ta ra Jesús catyí ra chi ñu:

—Ñima cha cuenda cha vaha chi yuhu cahan ndusu cuan soco cha cuenda cha vaha chi maa ndo cuví. ³¹Vityin cuví cuhva cutachi tuñi Nyoo chi ñáyivi iyó siqui ñuhu ñáyivi. Ta vityin cuhva cutava ñehe Nyoo chi ra nyacá ñaha siqui ñuhu ñáyivi ihya. ³²Ta cuhva cha cuitacai nu cruzi, yucuan cuhva cunaxite chi tandihi ñáyivi —catyí ra Jesús.

³³Cahán ra tyehe caa cha cuñi ra na cutuñi ñi ñu tyi tyicuan caa cuhva cucuvi ra. ³⁴Ta ñáyivi nacahan ñu ta catyí ñu chi ra:

—Tuhvá ndi chiñi ndi sacuahha ra nu libru ley yo vatyí ra cuví Cristo tyicuan ri maa cucoo ra. ¿Yoso caa cha catyí

yoho tyi cusandaa ñu chi Rayii quichi nya gloria nu cruzi? ¿Yóó ra cuví Rayii cha quichi nya gloria cha cahún tuhun? —catyí ñu, ndacá tuhun ñu chi ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quivi. Caca ndo ityi nu ndichin cha ni ri ca cha ndichin. Coto sana ri iñi ndo ta nduñaa iñi, vatyí ñu chicá noo nu ñaa iñi ña chitó ñu nya ityi cuahan ñu. ³⁶ Chino iñi ndo chi yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyivi iyó nu ndichin.

Cha yaha catyí ra Jesús tuhun ihya tixehé nuu ra chi ñu.

Nu catyí chi ñáá tuhun cha ña cachinó iñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuvi ra Jesús nuu ñu soco ña chinó iñi ñu chi ra.

³⁸ Vatyí tahán chi cha cuví tari catyí ra Isaías profeta Nyoo, nu cahān ra tyehe caa:

Sutu Mañi yuhu, yori cuñí chino iñi tuhun cahán ndi.

Yori cutuñí iñi tunyee iñi iyó chuun, Sutú Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyí ña cuví chino iñi ñu vatyí suri tyaā tucu ra Isaías tyehe caa:

⁴⁰ Nyoo sanducuaā ra chi ñu. Ta sandundava ra ñanima ñu,

tacuhva cha ma nyehe ñu chihin chiti nuu ñu,

ta ma cutuñi iñi ñanima ñu,

ta ni ma nacuhva cuenda ñu chi ñu chi ra tacuhva sanduvaha ra chi ñu.

⁴¹ Ra Isaías catyí ra tyehe caa vatyí nyehe ra nu nyacá ñaha Sutú Mañi yo Jesús ta cahān ra tuhun ra.

⁴² Soco cuaha ñu Israel chinó iñi chi ra Jesús, ta nyacua nya suhva ra cacuví

nuu, soco ña saquetuví ra nuu ñáyivi vatyí yuhví ra chi ra cacuví fariseo coto tava ñehe ra chi ra vehe ñuhu. ⁴³ Vatyí cuñí ca ra cuvaha ra nuu ñáyivi ta ñima ca cha cuvaha ra nuu Nyoo.

Tuhun cahān ra Jesús cusacutuñi chi ñáyivi

⁴⁴ Ñihi cahán ra Jesús, ta catyí ra:

—Ñu chinó iñi chii, ñima chi maa ri mai chinó iñi ñu, soco chinó tucu iñi ñu chi ra cha tachí chii. ⁴⁵ Ta ñu nyehé chii, nyehé tucu ñu chi ra cha tachí chii.

⁴⁶ Yuhu cha cuví tari noo cha ndichin vachi ñuhu ñáyivi ihya, vatyí tacuhva vatyí ñu chinó iñi chii ma ndoo ñu nu ñaa iñi. ⁴⁷ Soco tatu yihí ndo chiñí ndo tuhun cahín, ta ña sacuví ndo cha cahín, ñima yuhu tachi tuñi chi ndo. Vatyí ña vachi yuhu ñuhu ñáyivi ihya vatyí tachi tuñi chi ñáyivi. Soco vachi sacaqui ñanima ñu. ⁴⁸ Ñu ña cuñí naquehen tuhun cahín ta ña cuñí ñu sacuvi ñu tari cuhva cuñí, iyó cha cutachi tuñi chi ñu. Tuhun cha cahín, ican cuan cutachi tuñi chi ñu nu cundihi quivi. ⁴⁹ Vatyí ñima cuenda mai cahín. Suti ra cha tachí chii, chahā ra tuhun chii ñáá cha cucahin ta ñáá cha cusañahi. ⁵⁰ Ta chité vatyí tuhun cha chahā ra, chahá chi noo ñáyivi cha ma naa ca maa coo ñáyivi. Yucuan chaha, tuhun cha cahín, cahín soco cuhva catyí maa Suti cha cahín cuví.

Nu nacatyá ra Jesús chaha ra cachicá noo chihin ra

13 Nonga quivi cumañi ta chaa vico pascua chitó ra Jesús vatyí cha chaa cuhva cha cuaquita ra ñuhu ñáyivi ihya ta cunuhu ra nu nyaá Sutú ra. Tyicuan ri cuñí xaan ra chi ñu cuenda ra cha iyó siqui ñuhu ñáyivi ihya. Ta vityin cua sañahá ra chi ñu tyi cuñí xaan ra chi ñu vatyí cuacúvi ra cha cuenda ñu.

² Ta cuxiñí ra Jesús chihin ra cachicá noo chihin ra. Ta cha quihvi cuihna

añima ra Judas Iscariote sehe ra Simón tyiyuhū ra chi ra, naxico tuhun ra chi ra Jesús ta nacuhva cuenda ra chi ra chi ra xaan iñi chi ra. ³Soco ra Jesús chitó ra vatyí chahā cuenda Sutu ra tandihi chi ra vatyí cunyaa ndaha ra. Ta chitó ra vatyí nu nyaá Nyoo quitā ra ta suri yucuan cunanuhu ra. Ta nyaá ra Jesús cuxiñí ra. ⁴Tyicuan ta nicuinanyaa ra ta tava ra sahma chata ra, ta chahñi ra noo toalla chichi ra. ⁵Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cuanacatyon chahi?

⁷Tyicuan ta catyí ra Jesús:

—Vityin ña cutuñí iñun cha sacuví. Soco cucutuñí maa iñun nu cuahan ca chi.

⁸Soco ra Pedro catyí ra chi ra:

—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihí —catyí ra.

¹⁰Soco ra Jesús catyí ra chi ra:

—Ñu cha ni chityi, ña cuñí chi cha ndoo tandihi coño ñuhu ñu. Chaha ri ca ñu cuñí chi, vatyí cha ndii maa naniñ ñu. Nyoho cha ndii ndo, vasi ña tandihi ndo —catyí ra Jesús.

¹¹Ta catyí ra vatyí ña tandihi ra ndii ra vatyí chitó ra yóó cha cunaxico tuhun chi ra chi ra xaan iñi chi ra.

¹²Ta cha yaha cha nacatya ra Jesús chaha ra cachicá noo chihin ra, ndihvi

noo ra sahma ra, ta nicunyaa tucu ra inga chaha nu mesa ta catyí ra chi ra:

—¿Atu cutuñí iñi nyoho cha sacuví chi ndo? ¹³Nyoho catyí ndo chii, Maestro ta Sutu mañi yuhu, ta ndicha vatyí ican cuví. ¹⁴Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñí tucu chi cha nacatya ndo chaha tahan ndo. ¹⁵Yuhu chahí noo cuhva chi ndo vatyí sacuvi ndo tari cuhva sacuví mai. ¹⁶Cha ndicha catyí chi ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chi ra. ¹⁷Tatu cutuñí iñi ndo tuhun ihya, ta sacuví ndo, sii xaan cuvíví chi ndo.

¹⁸Ñima cha cuenda tandihi ndo cahín. Yuhu chité yóó chi nacachí mai. Soco cuñí chi cha cucuvi tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chii chi ra xaan iñi chii”, catyí chi nu tutu Nyoo. ¹⁹Catyí chi ndo tuhun ihya cha ni cumañi ca chino cava tacuhva vatyí quivi nacuvi tyehe caa, chino iñi ndo tyi iquen cuví ra cha tinyaa cuatyí ndo. ²⁰Cha ndicha catyí chi ndo vatyí ñu tiñ cuenda chi ñu tachí yuhu chi, chi yuhu tiñ cuenda ñu cuví cuan. Ta ñu cha tiñ cuenda chi yuhu, tiñ cuenda tucu ñu chi ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chi ra chi ra xaan iñi chi ra

(Mt. 26.20-25; Mr.

14.17-21; Lc. 22.21-23)

²¹Cha yaha cha catyí ra Jesús tyehe caa, quichahā nducuihya xaan cuñi añima ra, ta catyí cachi ra:

—Cha ndicha catyí chi ndo, vatyí noo nyoho cunaxico tuhun ndo chii nuu ra xaan iñi chii —catyí ra Jesús.

²²Tyicuan ta ra cachicá noo chihin ra, quichahā canyehe ra nuu tahan ra, ta ña

cachitó ra yóó chi tuhun cahán ra Jesús.
²³ Noo ra chicá noo chihin ra nyañaá ra chi ra Jesús nu cuxiiní ra. Ta ican ra cuví ra cha cuñí xaan ra Jesús chi. ²⁴ Ta ra Simón Pedro savahá ra seña chi ra, na ndaca tuhun ra yóó chi tuhun cahán ra. ²⁵ Tyicuan ta nyañaá ra chi ra Jesús, ta ndaca tuhun ra chi ra:

—Sutu Mañi yuhu, ¿yóó ra cuví ra cha cahún tuhun?

²⁶ Ta nacahan ra Jesús ta catyí ra:

—Cuasatyí chiin pan, ta ra cha cuhve chi, ican ra cuan cuví ra —catyí ra.

Tyicuan ta quehen ra chiin pan ta satyí ra, ta chahá ra chi ra Judas Iscariote, sehe ra Simón. ²⁷ Ta cha quehen ra Judas pan cuan ta quihví ra ña vaha añima ra. Tyicuan ta ra Jesús catyí ra chi ra:

—Tuhun cha yihí inun sacuvun, sacuvi cha numi ri —catyí ra Jesús chi ra Judas.

²⁸ Soco ni noo ra canyicú nu mesa cuan, ña cacutuñí iní ra ñáá tuhun cha catyí ra chi ra tyicuan caa. ²⁹ Soco cha cuenda vatyí ndaha ra Judas nyaá yitin xuhun, yucuan chaha yihí ra cuñí maa ra vatyí cuñí ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñí maa ra. ³⁰ Cha yahá chachí ra Judas pan, tyicuan ta quitá ra. Ta cha cuaa cuví cuan.

Ley cha chahá ra Jesús cha cuñi yo chi tahan yo

³¹ Cha yaha cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayíi cha quichí nya gloria. Ta cuanyehe ñu yoso cha cahnu Nyoo cha cuende. ³² Ta tatu Rayíi cha quichí nya gloria sacahnú ra chi Nyoo, tyicuan ta Nyoo cusacahnu ra chi ra. Ta cha chaá quívi cuasacahnu ra chi ra. ³³ Sehe luhli, ña naha ca cuacunyai chihin ndo. Nyoho cunanducu ndo chii,

soco tari catyí chi ra cacuví nuu chi ñu Israel cuan, catyí chi ndo vityin, vatyí ma cuví cuhun ndo nu cuahin. ³⁴ Chahí noo tuhun chaa chi ndo. Cuñí ndo chi tahan ndo. Tari cuñí yuhu chi ndo, tyicuan caa cuñí chi cha cuñí ndo chi tahan ndo. ³⁵ Tatu cuñí ndo chi tahan ndo, tandihí ñáyivi ta coto ñu vatyí ñu nyicón chii cuví ndo.

Nu catyí ra Jesús vatyí ra Pedro cucatyí ra vatyí ña ñohó nuu ra chi ra

(Mt. 26.31-35; Mr.

14.27-31; Lc. 22.31-34)

³⁶ Ra Simón Pedro ndaca tuhun ra chi ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuví cunyicon chii. Soco nu cuahan ca chi, ta cunyicon chii —catyí ra Jesús.

³⁷ Tyicuan ta catyí ra Pedro chi ra:

—Sutu Mañi yuhu, ¿ñáá tuhun ma cuví cunyiquen chuun vityin? Nyaf cha cuhve ñáyivi cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñáyivun cha cuende? Cha ndicha catyí chuun, vatyí cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

Ra Jesús cuví ityi cuhun yo ta chaa yo nu nyá Sutu yo Nyoo

14 Ta catyí ra Jesús:
 —Ma caca xaan xiñi ndo. Chino iní ndo chi Nyoo, ta chino iní ndo chii. ² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo. ³ Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cua-

cunyai. ⁴Nyoho chitó ndo nya cuhin, ta chitó ndo ityi.

⁵Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityi? —catyí ra.

⁶Ta ra Jesús catyí ra:

—Yuhu cuví ityi cha cuahan gloria. Ta yuhu cuví cha ndicha. Ta suri yuhu cuví ra chahá ñayiví coo ndo. Noo tuhun ri cha cuenda yuhu, cuví chaa ndo nu nyaá Suti. ⁷Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyí cha nyehé ndo chi ra —catyí ra Jesús.

⁸Tycuan ta catyí ra Felipe chi ra:

—Tata, cuhva cha nyehe ndi chi Sutu yo Nyoo, ta chihin yucuan ri ta ndoo ndi vaha.

⁹Ta nacahan ra Jesús, ta catyí ra:

—Yoho Felipe, cha naha nyaí chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáá tuhun catyún chii: “Cuhva cha nyehe ndi chi Sutu yo Nyoo?” ¹⁰¿Atu ña chinó inun tyi in ri cuví yuhu chihin Suti Nyoo? Ta maa ra in ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin. ¹¹Chino iní ndo chii vatyí in ri ra cuví chihin Nyoo Suti. Ta Nyoo Suti in ri ra cuví ra chihin. O cuví tucu chino iní ndo chii cha cuenda tyiño Nyoo Suti cha sacuví. ¹²Cha ndicha catyí chi ndo vatyí ñu chinó iní chii, cusacuví tucu ñu cha sacuví yuhu. Ta cahnu ca cusacuví ñu, vatyí yuhu cuhin nu nyaá Nyoo Suti. ¹³Ta tandihí cha cacan ndo chihin sivi, yuhu cusacuví tacuhva vatyí sacahnu ñáyiví chi Suti Nyoo cha cuenda cha cuví Sehe ra. ¹⁴Yuhu cusacuví ñáá cha cacan ndo chihin sivi.

Nu catyí ra Jesús vatyí cuhva ra Tatyí Ii ra chí yo

¹⁵Tatu cuñí ndo chii, quichaha ndo tuhun cahín. ¹⁶⁻¹⁷Ta cacan tahvi mai chi Nyoo Suti na saquichi ra noo ra naquehen ndahvi chi ndo. Ta ican ra cuan cuví Tatyí Ii Nyoo, ra cha cahán maa ri cha ndicha. Ta cucunyyaa ra chihin ndo tyicuan ri maa. Soco ñáyiví cha tahán ca iní cha iyó siqui ñuhu ñayiví ihya ma cuví naquehen ñu Tatyí Ii Nyoo vatyí ña cuví nyehe ñu chi ra. Ta ni ña caá ra ñima ñu. Ta ni ña ñohó nuu ñu chi ra. Soco nyoho ñohó nuu ndo chi ra vatyí nyaá ra chihin ndo ta cuandoo ra chihin ndo. ¹⁸Ma sandoo maa ri mai chi ndo. Quichi tiqui nu nyaá ndo. ¹⁹Chiin ri ca, ta ñáyiví cuenda ñuhu ñayiví ma nyehe ca ñu chii. Soco nyoho nyehé ndo chii. Vatyí yuhu iyé, yucuan chaha nyoho coo ndo ñandihí. ²⁰Quiví cuan cucoto ndo tyi yuhu in ri cuví chihin Suti. Ta nyoho in ri cuví ndo chihin. Ta yuhu in ri cuví chihin ndo. ²¹Ñu cha cumí vaha tuhun cahín, ta sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñí ra chí ñu. Ta cuñí tucu yuhu chí ñu ta cusañahi chí ñu yóo ra cuví yuhu —catyí ra Jesús.

²²Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chí nyuhu cusañahun chuun, ta ñima chí ñu cuenda ñuhu ñayiví?

²³Nacahan ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chí ñu. Ta quichi ndi nu nyaá ñu ta coo ndi chihin ñu. ²⁴Ñu ña cuñí chii, ña sacuví ñu cha catyí. Ta tuhun cahín cha chíñi ndo, ñima tuhun mai cuví, tuhun cahán Suti, ra cha tachí chí chí cuví.

²⁵Catyí tandihí tuhun ihya chí ndo cha ni ri ca cha nyaí chihin ndo. ²⁶Soco nu cuahan ca chí cutachi Suti Tatyí Ii ra

tyiño nui. Maa ra cuví ra cutyinyee chi ndo ta cunaquehen ndahvi ra chi ndo ta cusañaha ra tandihí chi ndo. Ta cusani-cohon ra iñi ndo tuhun cha yaha cahin chihin ndo.

²⁷ Sandoí noo cha taxi coo añima ndo, tari cha taxi cuñí añime. Ican चाहí chi ndo. Nima tari cha taxi cha ñihí ndo siqui ñuhu ñayiví ihya. Ma caca xaan iñi ndo ta ma yuhvi ndo. ²⁸ Chiñi ndo tuhun cha cahin nu catyí vatyi cuahin ta quichi tiquí nu nyicú ndo. Tatu cuñí ndo chii, cucusií cuñi ndo tyi catyi vatyi cuahin nu nyaá Suti. Vatyi cahnu ca cuví Suti ican saha yuhu. ²⁹ Ta vityin catyí tiquí chi ndo cha ni cumañi ca cuhin, tacuhva quiví cuhin, cunachino iñi ndo chii.

³⁰ Ma cahan cuaha que chihin ndo. Vatyi vachi ra nyacá ñaha siqui ñuhu ñayiví ihya. Vasi ña nyacá ñaha ra chii.

³¹ Soco cuñí chi nacoto ñáyiví iyó siqui ñuhu ñayiví vatyi yuhu cuñí chi Nyoo Suti, ta sacuví tyiño tyaa ra chii.

’Ndícuíta ndo. Cōho ndo, naquita yo ihya.

Tari noo yoho tichahā ndiví cha ndicha vaha cuví ra Jesucristo

15 Yuhu cuví yoho tichaha ndiví cha ndicha vaha. Ta Suti cuví ra sahá cumí chi yoho cuan. ² Chahnyá ra soco cha ña chahá chiti. Ta soco cha chahá chiti nacahnyá ra nuu chi, ta sanduví ra, tacuhva nacuhva ca chi cuaha ca chiti. ³ Suti cha sandundií ra chi ndo chihin tuhun cha cahín chihin ndo. ⁴ Sañihi ca ndo cu iin ri ndo chihin, tari yuhu iin ri cuví chihin ndo. Tari noo soco yoho cuan ma cuvi cuhva chi chiti cha maa ri maa chi tatu ña nyañaá chi chata yoho cahnu, tyicuan caa nyoho, ma cuvi sacuví ndo cha vaha tatu ña iin ri cuvi ndo chihin.

⁵ Yuhu cuví yoho cahnu cuan. Ta nyoho cuví ndo soco yoho cuan. Ñu cha nyañaá chii, ta yuhu nyañaí chi ñu,

cuaha cha vaha sacuví ñu, vatyi ñahri cha cuví sacuví ndo tatu yori yuhu nyaá chihin ndo. ⁶ Ñu cha ña nyañaá chii, cusacuita Suti chi ñu, tari sacuitá yo soco yoho cha chahnyá yo vatyi ña chahá chiti. Ta na ityi ta nasataca yo, ta cucayu nu ñuhu.

⁷ Tatu nyoho ta tyicuan ri nyañaá ndo chii, ta ña naa iñi ndo tuhun, caçan ndo ñáá cha cuñí ndo, ta yuhu cuhve. ⁸ Tatu cuaha cha vaha sacuví ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii. ⁹ Yuhu cuñí chi ndo, tari cuñí Suti chii. Ma naa iñi ndo cuhva cuñí chi ndo. ¹⁰ Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñí xaan ra chii.

¹¹ Cahín tyehe caa chihin ndo tacuhva na cusii cuñí ndo chihin. Ta cucusií vavaha cuñi ndo. ¹² Tuhun cha catyí chi ndo, ican cuví ihya: na cuñi ndo chi tahan ndo, tari cuñí yuhu chi ndo. ¹³ Tatu yaha xaan cuñí yo chi tahan yo, caña iñi yo cuhva yo nyacua nya ñayiví yo cha cuenda ñu. ¹⁴ Nyoho cuví ndo amigue, tatu sacuví ndo cha catyí chi ndo. ¹⁵ Ña catyí que vatyi musí cuví chi ndo, vatyi noo musu ña chitó ra ñáá cha sacuví chitoho ra. Amigue, catyí chi ndo vatyi sacote chi ndo tandihí maa cha catyí Suti chii. ¹⁶ Nyoho ña cachí ndo chii. Mai nacachí chi ndo. Ta catyí chi ndo na cuhun ndo ta sacuví ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha niñi cucoo, ta ma tiví maa chi. Ta tyicuan caa ta Suti cuhva ra tandihí cha ca-can ndo chihin sivi. ¹⁷ Ican ihya cuví cha catyí chi ndo: Cuñi ndo chi tahan ndo.

Ñáyiví cuenda ñuhu ñayiví tasi cuñí nyehé ñu chi ra Jesús ta chi ñu nyicón chi ra

¹⁸ Tatu ñu cuenda ñuhu ñayiví ña cuñí nyehe ñu chi ndo, coto ndo vatyi xihna

ca chi yuhu ña cuñi nyehe ñu. ¹⁹Tyehe ta cuví ndo ñu cuenda ñuhu ñayivi, cucuñi ñu chi ndo tari cuñi ñu chi tahan ñu. Soco yuhu nacachi chi ndo mahñu ñu. Ta yucuan chaha tasi cuñi nyehe ñu chi ndo, vatyí ñima ca ñu cuenda ñuhu ñayivi cuví ndo. ²⁰Nicohon iñi ndo tuhun cha catyi chi ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chi ñu. Ta tatu satafí iñi ñu chii, cusatafí iñi tucu ñu chi nyoho. ²¹Tandihi ihya cusacuvi ñu chi ndo cha catyi yuhu, vatyí ña ñohó nuu ñu chi ra cha tachi chii.

²²Tyehe ta ña quichi cahin chihin ñu, yucuan ndicha ñahri cuatyí ñu. Soco vityin ñahri siqui tyaa ñu cuenda cuatyí ñu, vatyí cha yahá catyi chi ñu. ²³Ñu cha tasi cuñi nyehé chii, tasi cuñi nyehé ñu chi Suti ñandihi. ²⁴Ñahri cuatyí ñu, tyehe ta ña sacuví milagru cha ni nonga ñayivi ta sacuvi ca. Soco cha nyehé ñu tandihi ihya. Ta vasi cha nyehé ñu soco tasi cuñi nyehé ñu chii, ta chi Suti ñandihi. ²⁵Soco tandihi tuhun ihya cuví chi tyehe caa, vatyí cuñi chi cha chino cava tari cuhva catyí nu tutu ley cha sacuaaha ñu nu catyí chi tyehe caa: “Ñahri vihi tuhun, ta cutasi cuñi ñu nyehe ñu chii”, catyí chi.

²⁶Soco cuquichi Tatyí Ii, ra cha cahán maa ri cha ndicha. Maa ra cuví ra cha naquehen ndahvi chi ndo. Nachai nu nyaá Suti ta cusaquichi ndi chi ra nu nyicú ndo. Ta quivi quichi ra, cucahan ra tumañi iñi cuende. ²⁷Ta nyoho tucu cucahan ndo tumañi iñi cuende, vatyí nyaá ndo chihin nyata quivi quichaha sahatyiñe.

16 ¹Catyí tuhun ihya chi ndo tacuhva cha ma sandihi ndo cha chinó iñi ndo chii. ²Cutava ñehe ñayivi chi ndo vehe ñuhu. Ta cuchaa chi quivi vatyí ñu cahni chi ndo, cucuñi ñu vatyí

tyiño nuu Nyoo sacuví ñu. ³Tyehe caa cusacuvi ñu cha cuenda vatyí ni chihin maa ta cohon nuu ca ñu ni chi Suti ta ni chi mai. ⁴Catyí tuhun ihya chi ndo tacuhva vatyí quivi chaa chi tari cuhva catyí chi ndo, nicohon iñi ndo vatyí cha yahá catyi chi ndo.

Tyiño sahá Tatyí Ii Nyoo

Ña catyi tuhun ihya chi ndo quivi xihna ri cha cuenda tyi nyaá que chihin ndo. ⁵Soco vityin cuhin vatyí cunyai chihin ra cha tachi chii. Ta ni noo nyoho ña ndacá tuhun ndo chii nya cuhin. ⁶Soco nducuihya ndihi iñi ndo cha catyí tuhun ihya chi ndo. ⁷Soco catyí cha ndicha chi ndo: vaha ca cha cuhin cha cuenda cha vaha chi ndo. Vatyí tatu ma cuhin, ma quichi Tatyí Ii cha naquehen ndahvi chi ndo. Soco tatu cuhin, cutachi mai chi ra. ⁸Ta quivi quichi ra cusacoto ra chi ñayivi iyó siqui ñuhu ñayivi vatyí iyó cuatyí ñu. Ta cusañaha ra chi ñu vatyí iyó noo cuhva vaha tahán chi coo ñu. Ta cusacoto ra chi ñu vatyí cutuñi chi ñu nuu Nyoo. ⁹Cusacoto ra chi ñu tyi iyó cuatyí ñu cha cuenda cha ña chinó iñi ñu chii. ¹⁰Cusacoto ra chi ñu tyi iyó noo cuhva vaha cha tahán chi coo ñu, vatyí yuhu cuhin nu nyaá Suti ta ma nyehe ca ndo chii. ¹¹Ta cu coto ñu tyi cusandaa Nyoo cuatyí ñu vatyí cha yahá cunda cuatyí ra cuví cuihna, ra nyacá ñaha siqui ñuhu ñayivi ihya.

¹²Ta cuaha ca tuhun nyaá catyi chi ndo, soco ma cutuñi iñi ndo vityin. ¹³Soco quivi quichi Tatyí Ii cha cahán maa ri cha ndicha, maa ra cusañaha tandihi cha ndicha chi ndo. Vatyí ñima cuenda maa ra cucahan ra, soco cucahan ra tandihi cha chiñi ra. Ta cusacoto ra tuhun ñáá cha cucuvi nu cuahan ca chi. ¹⁴Cusacahnu ra chii, vatyí cunaquehen ra tuhun ta cusañaha ra chi ndo. ¹⁵Tandihi cha iyó chi Suti, chi mai cuví ñandihi. Yucuan chaha vatyí Tatyí

Ii cuquehen cuenda ra cha iyó chii, ta cusañaha ra chi nyoho.

Ra cha cachicá noo chihin ra Jesús cuihyá ñni ra, soco nu cuahan ca chi cucusiñ cuñi ra, catyí ra Jesús

¹⁶Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyí yuhu cuhin nu nyaá Suti —catyí ra Jesús.

¹⁷Tyicuan ta suhva ra cachicá noo chihin ra, candaca tuhun ra chí tahan ra ta catyí ra:

—¿Ñana vaha tuhun cahán ra ihya? Catyí ra chi yo vatyí ña naha ca ta ma nyehe ca yo chi ra, ta yaha cuan ta cunyehe tucu yo chi ra inga chaha vatyí cuhun ra nu nyaá Sutu ra. ¹⁸¿Ñáá cha cuñí chi catyí cha ña naha ca cuan? Ña cutuñí ñni yo ñáá túhun cahan ra —catyí ra.

¹⁹Ra Jesús tuví ñni ra vatyí cacuñí ra candaca tuhun ra chi ra, ta catyí ra:

—Yuhu catyí chi ndo vatyí ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chi tahan ndo? ²⁰Cha ndicha catyí chi ndo vatyí nyoho cucuacu ndo ta cunducuihya ñni ndo, soco ñu cuenda ñuhu ñayiví cusii cuñi ñu. Soco vasi cuihya ñni ndo vityin, tucuihya ñni cha iyó chi ndo cunanduvi chi tusii ñni. ²¹Cuhva cha cuacacu sehe noo ñaha sibi nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca ñni ña cha cuenda cha sii cuñí ña vatyí cacu noo cha lee sehe ña. ²²Tyicuan caa tucu nyoho vityin, nducuihyá ñni ndo. Soco cunanyehe tiqui chi ndo inga chaha. Tyicuan ta cundusii tucu ñni añima ndo. Ta yori cuví tinyaa tusii ñni cuan chi ndo.

²³Quiví cuan ñahri ca cha cundaca tuhun ndo chii. Cha ndicha catyí chi ndo vatyí Nyoo Suti cucuhva tandihi cha ca-

can ndo chi ra chihin sivi. ²⁴Nya vityin ta ta ñaha ca cha cacan ndo chihin sivi yuhu. Cacan ndo ta cuñihi ndo tacuhva na cusii xaan cuñi ndo.

Ra Jesucristo cuví chasaha ra chi cha ña vaha iyó ñayiví

²⁵Maa maa ri chihin cuhva ri sañahí chi ndo. Soco nu cuahan ca chi, ñima ca chihin cuhva cuasañahi chi ndo, soco cuacatyí cachi chi ndo tuhun Suti. ²⁶Quiví cuan chihin sivi cucacan ndo cha cacan ndo chi ra. Ta ña chiñuhú ca cha cucuacu ndahvi nuu Suti cha cuenda ndo. ²⁷Vatyí maa Nyoo Suti suri cuñí ra chi ndo. Cuñí ra chi ndo vatyí nyoho cuñí ndo chii. Ta nachinó ñni ndo vatyí nu nyaá Nyoo quite. ²⁸Nu nyaá Suti quite vatyí quichi siqui ñuhu ñayiví ihya. Soco vityin cusandoi ñuhu ñayiví ihya vatyí cunuhi nu nyaá ra —catyí ra Jesús.

²⁹Tyicuan ta ra cachicá noo chihin ra cacatyí ra:

—Vityin ndicha catyí cachun chi ndi.

³⁰Vityin nyehe ndi vatyí chitón tandihi maa tuhun, ta ña nyatun cha ndaca tuhun ndi chuun, vatyí cha chitón nyacua nya tandihi cha chicá xiñi ndi. Yucuan chaha chinó ñni ndi vatyí nu nyaá Nyoo quiton —cacatyí ra chi ra Jesús.

³¹Ta catyí ra Jesús:

—Ta vityin ¿atu chinó ñni ndo chii?

³²Soco catyí chi ndo vatyí cha vachi chi cuhva ta vityin cuví cuhva vatyí nyoho cuquiti cuatyí ndo siin siin ityi, ta cusandoo ndo notuhun mai. Soco ñima notuhun ri mai nyaá, vatyí nyaá Suti chihin. ³³Catyí tuhun ihya chí ndo tacuhva na coo cha taxi ri añima ndo cha cuenda cha ñin ri cuví ndo chihin. Ñuhu ñayiví ihya cunyehe ndo tindoho, soco sanyee ndo ñni ndo vatyí yuhu cha cuví chasahi chí cha ña vaha cha iyó ñuhu ñayiví ihya.

**Nu chicán tahvi ra Jesús cuenda
ra cachicá noo chihin ra**

17 Cha yaha cha catyi ra Jesús tuhun ihya, nanyehē ndaa ra ityi andivi ta catyí ra:

—Sutu Mañi yuhu, cha chaā cuhva vityin. Sacahnu chi yuhu cha cuví sehun, tacuhva sacahnu tucu yuhu chuun. ²Vatyi tyaun tyiño chii siqui tandihi ñáyivi, vatyi cuhve ñáyivi cha ma naa ca maa chi tandihi ñu chahun chii. ³Ta ihya cuví cuhva coo ñu ñáyivi cha ma naa ca maa: Cha cohon nuu ñu chuun vatyi noo tuhun ri maun cuví Nyoo cha ndicha vaha, ta cohon nuu ñu chi yuhu ra Jesucristo ra cha tachun chi.

⁴Cha sacahnj chuun ihya siqui ñuhu ñáyivi ta cha sandihi tyiño cha chahun chii. ⁵Ta vityin, Sutu Mañi yuhu, cua ndichi nu nyaun, nacuhva cha cahnun cuví maun chii, tari cuhva cha chiyo chii nyata ni cumañi ca chino ñuhu ñáyivi.

⁶Tandihí ra cha chahun chii ra cha natava vahun mahñu ñu iyó siqui ñuhu ñáyivi ihya sacote chi ra yóo ra cuví yoho. Chi maun cuví chi ra ta chahun chi ra chii. Ta quichahá ra tuhun cahún. ⁷Vityin cachitó ra vatyi tandihí cha chahun chii, nu nyaún quita. ⁸Vatyi catyi chi ra tuhun cha catyun chii, ta maa ra canatiin cuenda ra. Ta tuví iñi ra vatyi ndicha cha quite nu nyaún, ta chinó iñi ra tyi maun tachí chii.

⁹Yuhu chiquén cha cuenda ra chuun. Ña chiquén cha cuenda ñáyivi ña ñohó nuu chuun, soco chiquén cha cuenda ra cha chahun chii, vatyi chi maun cuví chi ra. ¹⁰Tandihí cha iyó chii, chi maun cuví. Ta tandihí cha chuun, chi mai cuví. Ta tandihí cuan sacahnú chii.

¹¹Yuhu ma ndoo que ñuhu ñáyivi ihya, soco maa ra cundoo ra ñuhu ñáyivi ihya. Ta yuhu cuhin tyi cunyai chuhun. Sutu Mañi yuhu, saha cumi chihin cha ndicha ñuhu chi ra cha chahun chii,

tacuhva na cu iin ri ra chihin ra tahan ra, tari yoho chihin yuhu, iin ri cuví yo. ¹²Quivi chinyai ñuhu ñáyivi ihya chihin ra, saha cumi chi ra cha chahun chii chihin cha ndicha ñuhun. Ta sahi cuenda chi ra. Ta ni noo ra ña cuanaa soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyi nu tutu maun.

¹³Vityin cha vachi nu nyaún, soco cha ni ri ca cha nyaí siqui ñuhu ñáyivi ihya, catyi tuhun ihya tacuhva na cusii cuñi ra tari mai. ¹⁴Yuhu catyi chi ra tuhun cahún, soco ñáyivi cuenda ñuhu ñáyivi tasi cuñi nyehe ñu chi ra nyicón chi yo, cha cuenda vatyi ñima ra cuenda ñuhu ñáyivi cuví ra, tari yuhu, ñima ra cuenda ñuhu ñáyivi cuví. ¹⁵Ña chiquén chuun cha tavon chi ra nyicón chi yo nu ñuhu ñáyivi ihya, soco saha cumun chi ra coto ñáa cha saha ra ña vaha chi ra. ¹⁶Tari yuhu ñima ra cuenda ñuhu ñáyivi cuví, tyicuan caa tucu ra ihya, ñima ra cuenda ñuhu ñáyivi cuví ra. ¹⁷Cuhva cha ndicha chi ra nasacuvi ra maa maa ri cuhva cuñi maun. Tuhun cahún, ican cuví cha ndicha. ¹⁸Tari tachun chi yuhu nu nyicú ñu iyó siqui ñuhu ñáyivi, tyicuan caa tachí tucu yuhu chi maa ra nyicón chi yo nu nyicú ñu iyó siqui ñuhu ñáyivi. ¹⁹Ta cha cuenda cha vaha chi ra, sacuví yuhu maa maa ri cuhva cuñi maun, tacuhva vatyi chihin cha ndicha, cuví sacuvi tucu maa ra maa maa ri cuhva cuñi maun.

²⁰Soco ñima cha cuenda ri ra ihya chiquén chuun, soco chicán tiqui cha cuenda ñáyivi cha cuchino iñi chii chihin tuhun cahán ra ihya nu cuahan ca chi. ²¹Chiquén chuun na tandihí ñu ta iin ri na cuví ñu chihin tahan ñu. Ta noo ri na cuví ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu iin ri cuví ñu chihin yo, tacuhva vatyi tandihí ñáyivi iyó siqui ñuhu ñáyivi chino iñi ñu tyi maun tachí chii. ²²Yuhu chahí cha ndicha ñuhu chi

ñu nyicón chi yo, suri cha ndicha ñuhu cha chahun chii. Vatyí chihin cuan na ñin ri cuví ñu tari yoho chihin yuhu noo ri cuví yo. ²³ Yuhu nyaí chihin ñu ta yoho nyaún chihin, tacuhva na cuví yo noo ri chihin ñu. Tyicuan caa ta coto tandihi ñáyivi iyó siqui ñuhu ñayivi tyi maun tachí chii, ta cuñí xaun chi ñu nyicón chi yo tari cuñún chi yuhu.

²⁴ Sutu Mañi yuhu, maun chahun chi ñu chii. Ta cuñí cha cunyya ñu chihin nu cuacunyai, tacuhva nanyehé ñu cha ndicha ñuhu cha chahun chii vatyí cuñún chii nyata ni cumañi ca chino ñuhu ñayivi. ²⁵ Sutu Mañi yuhu, ra vaha cuvún, ta ñu cuenda ñuhu ñayivi ña ñohó nuu ñu chuun, soco yuhu ñohó nui chuun. Ta ra nyicón chi yo ihya chitó ra tyi maun tachí chii. ²⁶ Cha catyí chi ra yóo ra cuvún, ta cucatyí tiqui inga chaha, tacuhva vatyí tari cuhva cuñún chii, tyicuan caa cuhva cuacuñi tucu maa ra chi ra tahan ra. Ta yuhu cunyai añima ra.

Nu cuahan ra Jesús vehe caa

(Mt. 26.47-56; Mr. 14.43-50; Lc. 22.47-53)

18 Cha yahá cha catyí ra Jesús tuhun ihya, quitá ra ta cuahan ra chihin ra cachicá noo chihin ra inga chiyo yuhu yuvi Cedrón. Ta yucuan nyaá noo chacu yutun yucu. Ta yucuan quihvi ra Jesús chihin ra cachicá noo chihin ra. ² Ta ra Judas, ra cha naxicó tuhun chi ra, chitó ra nu cuahan ra Jesús. Vatyí tuhvá ra Jesús chahán ra yucuan chihin ra cha cachicá noo chihin ra. ³ Ta yucuan chaa ra Judas chihin cuaha sindaro ta cuaha policia cuenda vehe ñuhu cha tachí ra cuví nuu chi tata sutu ta ra cuví fariseo. Chaa coyo ra yucuan, canyisó ra mityi, ta canyiso ra lámpara ta ñuhü yiti. ⁴ Ta vatyí ra Jesús cha chitó ra tandihi cha cucuvi chi ra, quitá ra ta ndacá tuhun ra chi ra:

—¿Yóo chi nanducú ndo? —catyí ra.

⁵ Ta cacatyí ra chi ra:

—Chi ra Jesús ra ñuu Nazaret.

Ta catyí ra Jesús:

—Yuhu cuví —catyí ra.

Ta ra Judas, ra cha naxicó tuhun chi ra Jesús nuu ra xaan ñni chi ra, nanyaá ra chihin ra yucuan. ⁶ Ta cuhva cha catyí ra Jesús: “Yuhu cuví”, tandihi ra cananda-ca chata ra ta canduvá ra nu ñuhú. ⁷ Tyicuan ta inga tucu chaha ndacá tuhun ra Jesús chi ra, ta catyí ra:

—¿Yóo chi nanducú ndo?

Ta cacatyí ra:

—Chi ra Jesús ra ñuu Nazaret.

⁸ Ta catyí ra Jesús:

—Cha catyí chi ndo tyi yuhu cuví.

Tatu chii nanducú ndo, saña ndo chi ra chica noo chihin na cunuhun coyo ra —catyí ra Jesús chi ra.

⁹ Ican tyehe caa catyí ra Jesús tacuhva na chino cava cha catyí maa ra ta ityi chata ca nu catyí ra: “Ra cha chahá Suti chii, ni noo ra ña cuanaá.” ¹⁰ Tyicuan ta ra Simón Pedro nyisó ra noo mityi. Ta tava ra ta chahnyá ra soho chiyo vaha noo ra cha nañ Malco. Cuví ra cuan musu ra cuví nuu chi tandihi tata sutu.

¹¹ Soco ra Jesús catyí ra chi ra Pedro:

—Natyihí mityun chichi veno. Tatu Nyoo Suti ta cuñí ra cha nyehi tindoho, tahán chi cha nyehi —catyí ra Jesús chi ra.

Nu nanyaá ra Jesús nuu ra cuví nuu chi tata sutu

(Mt. 26.57-58; Mr. 14.53-54; Lc. 22.54)

¹² Tyicuan ta sindaro cuan chihin capitán ra, ta policia cuenda vehe ñuhu, catiñ ra chi ra Jesús, ta chahñi ra chi ra vatyí cuhun ra vehe caa. ¹³ Tyicuan ta chinyaca ra chi ra vehe ra Anás, vatyí ra Anás cuan tyiso ra Caifás cuví chi ra. Ta cuiya cuan cuví ra Caifás ra cuví nuu chi tata sutu. ¹⁴ Ican ra Caifás ihya cuví ra cha catyí chi ra cacuví nuu chi ñu Israel

vatyí vaha ca cha cúvi noo ri rayií cha cuenda tandiíhi ñáyivi ñuu.

**Nu catyí ra Pedro tyi ña ñohó
nuu ra chi ra Jesús**

(Mt. 26.69-70; Mr.
14.66-68; Lc. 22.55-57)

¹⁵Ra Simón Pedro ta nonga ra cha chica noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuví nuu chi tata sutu cuan ñohó nuu ra chi inga ra cuan. Yucuan chaha quihvi ra cuan chihin ra Jesús nuquehe ra cuví nuu cuan. ¹⁶Soco ra Pedro ndoo ra yuvehe chata vehe. Yucuan chaha quitá ra cha ñohó nuu chi ra cuví nuu chi tata sutu cuan, ta cahan ra chihin ñaha cha nyaá yuvehe cuan. Ta tyihí ra chi ra Pedro chichi nuquehe cuan. ¹⁷Tyicuan ta ñaha cha nyaá yuvehe cuan ndaca tuhun ña chi ra Pedro, ta catyí ña:

—¿Atu ñima noo ra chica noo chihin rayií cuan cuvún?

Ta ra Pedro catyí ra:

—Ñime cuví —catyí ra chi ña.

¹⁸Tyicuan ta musu ta policia cha tayucú yucuan, casanatahan ra ñuhu vatyí vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

**Nu sanahma ra cuví nuu
chi tata sutu chi ra Jesús**

(Mt. 26.59-66; Mr.
14.55-64; Lc. 22.66-71)

¹⁹Tyicuan ta ra cuví nuu chi tata sutu quichaha ndaca tuhun ra chi ra Jesús, yóo ra cuví ra cachicá noo chihin ra, ta ñáá cha sañahá ra chi ñáyivi. ²⁰Ta ra Jesús catyí ra chi ra:

—Yuhu chihin nuu tandiíhi ñáyivi cahín. Ta sañahí chichi vehe ñuhu tahan

tahan ñuu ta chichi vehe ñuhu cahnu ñuu ihya nu ndu ín ri tandiíhi ñu Israel. Ta ñahri tuhun xehe cahín. ²¹¿Ñáá tuhun cha ndaca tuhun chii? Vaha taxin ca ndaca tuhun chi ñu cha chiñi tuhun cahin, ta maa ñu nacatyí ñu ñáá tuhun cahin chihin ñu. Maa ñu chitó ñu ñáá tuhun cahin —catyí ra Jesús chi ra.

²²Cuhva cha catyí ra Jesús tuhun ihya, noo policia vehe ñuhu cha nanyaá cuan, cañi ra noo nuu ra Jesús ta catyí ra:

—¿Atu tyiña caa nacahún nu cahán ra cuví nuu chi tata sutu? —catyí ra chi ra Jesús.

²³Ta ra Jesús catyí ra:

—Tatu cahin noo tuhun ña vaha, catyí chii nya maa maa ña vaha cahin. Soco tatu cahin tuhun vaha, ¿ñáá tuhun cha cañun chii? —catyí ra Jesús chi ra cuan.

²⁴Yaha cuan ta nuhñi ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

**Nu catyí ra Pedro inga chaha vatyí
ña ñohó nuu ra chi ra Jesús**

(Mt. 26.71-75; Mr.
14.66-72; Lc. 22.58-62)

²⁵Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶Tyicuan ta noo musu ra cuví nuu chi tata sutu, noo ra cha cuví ñáyivi chi ra cha chahnya ra Pedro soho, quichaha ndaca tuhun ra ta catyí ra:

—Ta caa cuiri tyi nyehi chuun chihin ra chichi chacu cuan —catyí ra chi ra Pedro.

²⁷Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yahá cuan ta quitá coyo ra chihin ra Jesús vehe ra Caifás ta chinyacá ra chi ra vehe tyiño gobernador. Cha vachi cundichin ta ra Israel ña caquihví ra chichi vehe tyiño cuan vatyí ñima vehe ñu Israel cuví. Ta vatyí catyí ñu tyi yica cha quihví ñu vehe savahri vatyí coto ma cuví cucuñi ñu quivi vico pascua cuan. ²⁹ Yucuan chaha quitá ra Pilato vatyí cahān ra chihin ra, ta catyí ra:

—¿Ñáá cuatyí tyaá ndo siqui ra ihya? —catyí ra Pilato chi ra ñuu Israel.

³⁰ Ta canacahān ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —cacatyí ra chi ra Pilato.

³¹ Tyicuan ta ra Pilato catyí ra chi ra:

—Quehen maa ndo chi ra, na cutuñi chi ra nuu maa ndo tari cuhva catyí ley maa ndo.

Ta nacahān ra ñuu Israel cuan ta cacatyí ra:

—Soco nyuhu ñu Israel ñahri ityi iyó chi ndi cha cahñi ndi chi ni noo ñáyivi —catyí ra.

³² Tyicuan caa ching cava cha catyí ra Jesús yoso caa cucúvi ra. ³³ Tyicuan ta nandihví tucu ra Pilato chichi vehe tyiño cuan inga chaha. Ta canā ra chi ra Jesús ta ndacā tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhin chuun? —catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhvā cuenda chuun chii. ¿Ñáá cha sacuvun? —catyí ra chi ra Jesús.

³⁶ Tyicuan ta nacahān ra Jesús ta catyí ra:

—Nu nyacá ñahi ñima cuenda ñuhu ñáyivi ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahān ra Jesús ta catyí ra:

—Rey cuví tari catyun chiña. Yucuan cuenda caqui ta vachi ñuhu ñáyivi ihya, vatyí catyí ñáá cha cuví cha ndicha. Tandihí ñu quichaha cha ndicha, tya-sohó ñu tuhun cahín —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahñi ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yahá cha ndacā tuhun ra tuhun ihya, quitá ra Pilato chicahān ra chihin ra Israel inga chaha ta catyí ra:

—Yuhu ña nañihi mai ni noo cuatyí ra ihya. ³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñi ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandihí ra quichaha canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19 Tyicuan ta quehen ra Pilato chi ra Jesús ta tachí ra na cucañi sindaro chi ra. ² Ta sindaro savahā ra noo corona chihin iñu ta catyihí ra xiñi ra Jesús. Ta sacuihño ra chi ra chihin noo sahma tyacu nyaa tari cha tuhvá rey cañihnó. ³ Tyicuan ta catuhvā ra nu

nanyaá ra ta chacú nyaa ra chi ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatũ ra chi ra.

⁴Tyicuan ta quita tucu ra Pilato inga chaha ta catyí ra chi ra:

—Nyehe ndo cuatave chi ra ityi nuu ndo tacuhva nanyehe ndo vatyi ni noo cuatyí ra ña ñañihĩ —catyí ra Pilato chi ra.

⁵Ta quita ra Jesús yihí corona iñu cuan xiñi ra, ta ñihnó ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶Cuhva cha cananyehe ra cacuví nuu chi tata sutu ta policia chi ra, quichaha cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vatyi yuhu ni noo cuatyí ra ña ñañihĩ.

⁷Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñi chi cha cúvi ra vatyi nasahá ra Sehe Nyoo chi ra —cacatyí ra.

⁸Cha chiñi ra Pilato tuhun ihya, nayuhví ca ra. ⁹Ta ndihví tucu ra inga chaha chichi vehe tyiño, ta ndaca tuhun ra chi ra Jesús:

—¿Nya quita yoho? —catyí ra chi ra.

Soco ra Jesús ñahri cha nacahan ra.

¹⁰Tyicuan ta ra Pilato catyí ra chi ra:

—¿Ñáá tuhun ña nacahún nu cahán yuhu? ¿Atu ña chitón vatyi ra cuví tyiño cuví ta iyó ityi chii cha tyai chuun nu cruzi, ta iyó tucu ityi chii cha sañe chuun? —catyí ra Pilato chi ra Jesús.

¹¹Ta nacahan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityi iyó chuun cha tachi tuñun chii. Yucuan chaha, ra cha cachaha cuenda chii chuun, cahnu ca cuatyí

ra ican saha yoho —catyí ra Jesús chi ra Pilato.

¹²Nya cuhva cuan ta nducu ra Pilato cuhva saña ra chi ra Jesús, soco ra Israel cacana chaa ra siqui ra, ta catyí ra:

—¡Tatu sañon chi ra, ñima amigo rey cahnu cuví chuun! Vatyi tandihĩ ri ra cha catyí tyi rey cuví ra, ra xaan iñi chi rey cahnu cuví ra —cacatyí ra.

¹³Tyicuan ta cha chiñi ra Pilato tuhun ihya, tachi ra na quita ra Jesús ityi chata vehe. Ta chicunyaa ra Pilato nu tyayu ra nu tuhvá ra sandaa cuatyí ñáyivi nu ñañi chi Gabata chihin sahan hebreo, ta cuñi chi catyí: “Nu yihí yuu”. ¹⁴Ta cuví chi noo quivi cha ni cumañi ca vico pascua, ñáá cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵Soco maa ra Israel canachaa ra ta cacatyí ra:

—¡Na cúvi ra! ¡Na cúvi ra! ¡Cahñi chi ra nu cruzi! —cacatyí ra.

Ta ra Pilato catyí ra chi ra:

—¿Atu cahñi nu cruzi chi rey ndo?

Soco ra cacuví nuu chi tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶Tyicuan ta ra Pilato chaha cuenda ra chi ra Jesús chi ra na cunyaa ra nu cruzi. Ta quehen sindaro chi ra, ta cuahan ra chihin ra.

Nu chihĩ ra Jesucristo nu cruzi

(Mt. 27.32-44; Mr.

15.21-32; Lc. 23.26-43)

¹⁷Ta nyisó ra Jesús cruzi ra, cuahan ra noo nu ñañi: “Yiqui Xiñi Ndiyí”. Ta chihin sahan hebreo ñañi chi Gólgota. ¹⁸Ta yucuan catyaa ra chi ra nu cruzi chihin clavu. Ta iin ri chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu. ¹⁹Ta ra Pilato tachi ra tyiño na cunyaa letra xiñi cruzi

cuan. Ta catyí chi tyehe caa: “Ra Jesús ra ñuu Nazaret, Rey cuenda ñu ñuu Israel.” ²⁰ Ta cuaha ñu Israel sacuahā ñu tuhun cuan, vatyí yatyin ri ñuu ñu cuví nu chinanyaā ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín. ²¹ Yucuan chaha ra cacuví nuu chi tata sutu cacatyí ra chi ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yahā tyaí, nandoo maa tyicuan caa —catyí ra chi ra.

²³ Cha yahā cha catyāā sindaro cuan chi ra Jesús nu cruzi, canaquehen ra sahma ra ta cha cumi tahan ra quehen ra noo noo sahma ra. Ta ndoq nonga sahma ra cha ña quicu ñu. Noo ri savahā ñu nyacua nya siqui ta nya yuvi. ²⁴ Ta sindaro cuan cacatyí ra chi ra tahan ra:

—Ma cahnya yo. Cuhun yo noo sihva, nyehe yo yóo chi tahán chi sahma cuan —cacatyí ra.

Tyicuan caa cuví tari cuhva catyí nu tutu Nyoo nu catyí chi tyehe caa: “Casachā ra sahme ta chahan ra noo sihva chihin chi, nyehe ra yóo ra saha canaa.” Ta ican ihya casacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihi ra Cleofas, ta cu María ñaha Magdala. ²⁶ Ta nanyehē ra Jesús chi sihi ra, nanyaá ña yatyin ri. Ta nanyehē tucu ra chi ra cha chicā noo chihin ra, ra cha cuñí xaan ra chi. Ta catyí ra chi sihi ra:

—Ma sehun nanyaá chiña —catyí ra.

²⁷ Tyicuan ta catyí ra chi ra cha cuñí xaan ra chi:

—Ma sihun nanyaá chiña —catyí ra chi ra.

Ta nya quívi cuan ta naquehen cuenda ra chi ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

²⁸ Cha yahā tuhun ihya, cha nyehe ra Jesús vatyí cha ndihí tyiño saha ra. Tyicuan ta catyí ra:

—Itiy ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

²⁹ Ta yucuan nanyaá noo quiyí tyitú chihin vinagre. Tyicuan ta casatyí ra chihin noo xixan ndutya iya cuan. Ta tyaā ra noo nu soco yutun cha nañí hisopo, ta catyañāā ra nya yuhu ra.

³⁰ Chihí ra Jesús ndutya cuan ta catyí ra:

—Cha iyó vaha tandíhi vityin —catyí ra.

Tyicuan ta nacañí noo ra xiñi ra ta chihí ra.

Nu quiñí lanza yiqui naha ra Jesús

³¹ Noo ri ca quívi cumañi ta cuví quívi cahnu ca vico pascua cuan, ta ra cacuví nuu chi ñu Israel ña cuñí ra cha ndoo coño ñuhu cuan nu cruzi quívi nyitátú ñu, vatyí quívi nyitátú ñu quívi ii cuví. Yucuan chaha chicā ra tumañi iñi chi ra Pilato na tachi ra na cucahnu sindaro sihin ra cha catacoyo nu cruzi cuan tacuhva na cacúvi ra cha numi ri, ta cañehe ra coño ñuhu ra. ³² Tyicuan ta cuahan coyo sindaro nu tayucú cruzi cuan. Ta chahnū ra sihin noo ra cha tacaá yucuan. Tyicuan ta chahnū tucu ra sihin inga ra cha tacaá xiin ra Jesús.

³³ Soco cuhva cha cuatuhva ra nu tacaá ra Jesús, cananyehē ra vatyí cha chihí ra. Ta yucuan chaha ña cachahnū ca ra sihin ra.

³⁴ Soco suvita ri noo sindaro cuan quiñí ra lanza yiqui naha ra Jesús. Ta quitā niñi ta ndutya. ³⁵ Ra cha nacatyí tuhun ihya, noo ra cha nyehe cuví ra. Ta cha ndicha cahán ra, vatyí maa ra chitó ra vatyí cha ndicha cahán ra, tacuhva

nachino tucu iñi nyoho. ³⁶ Vatyí tuhun ihya cuvī chi tyehe caa tari cuhva catyí tuhun Nyoo nu catyí chi: “Ni noo yiqui ra ta ma tahnu.” ³⁷ Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihvī ra Jesús chichi ñuhú

(Mt. 27.57-61; Mr. 15.42-47; Lc. 23.50-56)

³⁸ Cha yahā tuhun ihya, ra José ra ñuu Arimatea chican ra chi ra Pilato nachuva ra cha naquehen ra coño ñuhu ra Jesús. Ta ra José cuan cuvī ra noo ra yihí cuenda ra Jesús vasi xehe ri cha cuenda cha yuhví ra chi ra cacuví nuu chi ñu Israel. Tyicuan ta chahā ra Pilato permisu chi ra, ta ra José chahan ra chinaquehen ra coño ñuhu cuan. ³⁹ Chahan tucu ra Nicodemo, ra cha chahan chicahan chihin ra Jesús cha cha cuaa. Chaā ra chihin ndutya vixi chahán. Ta noo ndutya vixi chahán cha nañ mirra nasaca ñu chihin inga cha nañ áloe. Ta quitā chi tari noo oco uchi kilu cha tandihi. ⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahma cuiñi cahyu ra ndutya vixi chahán cuan, tari cuhva noo tuhun cha iyó chi ñu Israel tu cuatyihí ñu noo ndiyi chichi ñuhú. ⁴¹ Yatyin nu cachahñi ra chi ra Jesús nu cruzi nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyi. ⁴² Yucuan tyihí ra coño ñuhu ra Jesús vatyí yatyin ri cuan nyaá ñaña cuan ta vatyí cha cua quichaha quiví nyitatú ñu Israel.

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

20 Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasí yuhu ñaña cuan. ² Tyicuan ta chinó vavaha ña cuahan ña nu nyaá ra Simón

Pedro ta inga ra chica noo chihin ra Jesús, ra cha cuiñi xaan ra Jesús chi. Ta catyí ña chi ra:

—Quehen ñáyivi coño ñuhu Sutu Mañi yo chichi ñaña, ta ña chitó yo nya chinyaca ñu —catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña. ⁴ Ninduvi ra iin ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chaā nu ñaña. ⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan. Soco ña quihvī ra chichi ñaña. ⁶ Yahā cuan ta chaā ra Simón Pedro chata ra, ta quihvī ra chichi ñaña cuan. Suri nyehe tucu ra cuan sahma cuan catuví. ⁷ Ta suri nyehe tucu ra vatyí sahma cha siqui noo xiñi ra Jesús, ña iin ri cayucú chihin inga sahma cuan, soco catuví siin. ⁸ Tyicuan ta quihvī tucu inga ra chica noo chihin ra Jesús cuan, ra cha chaā cha xihna ri nu ñaña cuan. Ta nyehe ra cha cuvī cuan, ta chino iñi ra. ⁹ Vatyí cha cuvī maa ta cutuñi ca iñi ra cha catyí nu tutu Nyoo, vatyí ra Jesús cuiñi chi cha nandoto ra cha yahā chihí ra. ¹⁰ Tyicuan ta ra cachica noo chihin ra Jesús cuanuhu coyo ra nya vehe.

Nu tuvī ra Jesús nuu cu María ñaha ñuu Magdala

(Mr. 16.9-11)

¹¹ Soco cu María ndoo ña chata yatyin ri yuhu ñaña, chacú chaa ña. Cha niri ca cha chacú ña, nyehe ñihñi ña chichi ñaña. ¹² Ta nyehe ña uvi tahan ángel ñihno ra sahma cuichin, nyicú ra nu catuví coño ñuhu ra Jesús. Noo ra nyaá ityi nu catuví xiñi ra, ta nonga ra ityi nu catuví chaha ra. ¹³ Ta ángel cuan ndaca tuhun ra chi ña ta catyí ra:

—Maha, ¿ñáá tuhun chacú chaun?

Ta catyí ña:

—Vatyi quehen ñu chi Sutu Mañi yuhu, ta ña chité nya tyihí ñu chi ra —catyí ña chi ángel cuan.

¹⁴Ni cahán ña tuhun ihya ta nanyocava ña ta nanyehé ña chi ra Jesús yucuan. Soco ña chitó ña cha ra Jesús cuví ra. ¹⁵Tyicuan ta ra Jesús ndaca tuhun ra chi ña:

—¿Ñáa tuhun chacún? ¿Yóó chi nanducún? —catyí ra chi ña.

Cuñí maa ña vatyi ra sahá cumi chacu cuan cuví ra. Ta catyí ña:

—Tata, tatu yoho quehun chi ra Jesús, catyí chii nya sandoun chi ra, vatyi naquehin chi ra —catyí ña chi ra.

¹⁶Tyicuan ta catyí ra Jesús chi ña:

—¡María! —catyí ra chi ña.

Maa ña nanyehé ña ta cahán ña chihin ra chihin sahan hebreo, ta catyí ña:

—¡Raboni! —Ta cuñí chi catyí: “Maestro”.

¹⁷Ta catyí ra Jesús chi ña:

—Ma tiun chii, vatyi ta nandaa que nu nyaá Suti. Soco cuahan ta catyun chi tandihi yañi vatyi cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

¹⁸Tyicuan ta chahan cu María ñaha Magdala cuan chisacoto ña chi ra cachica noo chihin ra Jesús vatyi nyehe ña chi ra Jesús ta catyí ra tuhun cuan chi ña.

Nu tuví ra Jesús nuu ra cachica noo chihin ra

(Mt. 28.16-20; Mr.

16.14-18; Lc. 24.36-49)

¹⁹Suri maa quivi cuan cha quichaha vitya, cha cuacuaa ta candu ñin ri ra cachica noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tuví ra ta chicuinyaa ra mahñu. Ta chaha ra nocumi chi ra, ta catyí ra:

—Na coo cha taxi ri aña ndo —catyí ra.

²⁰Cha yaha cha catyí ra tuhun ihya ta sañaha ra ndaha ra ta yiqui naha ra. Ta maa ra cacusií cuñi ra cha nanyehé ra chi Sutu Mañi yo. ²¹Ta catyí tucu ra Jesús inga chaha chi ra:

—Na coo cha taxi ri aña ndo. Tari tachí Suti tyiño chii, tyicuan caa tachí tyiño chi nyoho —catyí ra chi ra.

²²Tyicuan ta tiví ra siqui ra ta catyí ra chi ra:

—Naquehen ndo Tatyí li Nyoo. ²³Ñu cha sahá ndo tucahnu iñi chi, iyó tucahnu iñi chi ñu. Ta ñu cha ña sahá ndo tucahnu iñi chi, ñahri tucahnu iñi iyó chi ñu —catyí ra Jesús chi ra.

Nu nyehe ra Tomás chi Sutu Mañi yo cha yaha nandoto ra

²⁴Soco ra Tomás, noo ra chica noo chihin ra Jesús, ra cha catyí ñu: “ra tinihi”, yori ra nyaá chihin ra cuhva cha quichí ra Jesús. ²⁵Yaha cuan ta canacatyí ra cachica noo chihin ra Jesús chi ra:

—Nyehe ndi chi Sutu Mañi yo —catyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶Uña quivi yaha ta canyicú tucu ra cachica noo chihin ra Jesús noo vehe. Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chicuinyaa ra mahñu ra. Ta chaha ra nocumi ta catyí ra:

—Na coo cha taxi ri aña ndo.

²⁷Tyicuan ta quichaha catyí ra chi ra Tomás:

—Tyihi nu ndahun nu cahví ndahi. Ta tyihi ndahun yiqui nahi. Ta ma caca uvi iñun, soco chino iñun —catyí ra Jesús chi ra Tomás.

²⁸Tyicuan ta nacahan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹Ta catyí ra Jesús chi ra:

—Yoho Tomás, vityin chinó iñun tyi nyehún chi. Sií ca cuñí ñu cha ña nyehe ta chinó iñi ñu —catyí ra Jesús chi ra Tomás.

Nu sacoto ra Juan ñáa cuenda chingo libru ihya

³⁰Ta cuaha ca milagru sacuví ra Jesús nuu ra cachicā noo chihin ra, ta ñahri chicunyaa nu libru ihya. ³¹Soco chicunyaā tuhun ihya vatyí tacuhva chino iñi ndo vatyí ra Jesús cuví Cristo, ra cuví Sehe Nyoo, ta vatyí coo ndo ñayiví cha ma naa ca maa tatu chinó iñi ndo chi ra.

Nu tuví ra Jesús nuu ucha tahan ra cachicā noo chihin ra

21 Cha yaha cuan ta tuví tucu ra Jesús nuu ra cachicā noo chihin ra inga chaha. Tyehe caa tuví ra yuhu miñi Tiberias. ²Iñ ri nyicú ra Simón Pedro ta ra Tomás cha catyí ñu: “ra tinihi” chi, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachicā noo chihin ra Jesús. ³Ta catyí ra Simón Pedro chi ra:

—Cuahin cuatiin tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuahan coyo ra ta quihví coyo ra chichi noo canoa, soco cha cuaa cuan ni noo tiyaca ña catiin ra. ⁴Cha vachi cundichin cuan tuví ra Jesús nu ñiti yuhu miñi cuan. Soco ra cachicā noo chihin ra, ña canicohón nuu ra chi ra. ⁵Tyicuan ta catyí ra chi ra:

—Yoho ra tahan yo, ¿tatu ta ñihi ca ndo tiyaca?

Ta canacahan ra ta catyí ra:

—Ta ñihi ca ndi.

⁶Tyicuan ta nacahan ra Jesús ta catyí ra:

—Tyihi ndo tarraya chiyo vaha canoa chiña, ta ñihi ndo —catyí ra Jesús chi ra.

Tyicuan caa casacuví ra, ta yaha cuan ta nyacua ña cuví tava ra tarraya cuan nu ndutya chaha cha cuaha tiyaca yihí. ⁷Ta ra cha cuñí xaan ra Jesús chii catyí ra chi ra Pedro:

—¡Sutu Mañi yo cuví! —catyí ra chi ra Pedro.

Cha chiñi ra Simón Pedro vatyí Sutu Mañi yo cuví, ndihví noo ra sahma ra, vatyí tava ra cha cuatiin ra tiyaca, ta quiñi ra cuahan ra chichi ndutya cuan.

⁸Ta inga ra cachicā noo chihin ra Jesús chaā coyo ra nya yuhu miñi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu miñi cuan cañohó ra ta cha noo cientu metru ri.

⁹Cuhva cha canoó ra nu ñuhú, cananyehé ra noo nu caá titi ñuhú. Ta catuví noo tiyaca siqui titi ñuhú cuan, ta pan ñandíhi. ¹⁰Ta ra Jesús catyí ra chi ra:

—Nyaca ndo suhva tiyaca cha ni tñin ndo —catyí ra Jesús chi ra.

¹¹Ta ra Simón Pedro ndaa ra nu canoa ta quichaha xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnya tarraya cuan. ¹²Tyicuan ta catyí ra Jesús chi ra:

—Ñaha ndo ta curumusa ndo —catyí ra Jesús chi ra.

Ta ni noo ra cachicā noo chihin ra ña cacaña iñi ra candaca tuhun ra yóó ra cuví ra vatyí cachitó ra vatyí Sutu Mañi yo cuví ra. ¹³Tyicuan ta tuhva ra Jesús ta quehen ra pan, ta chaha ra chi ra. Ta suri tyicuan caa sacuví ra chihin tiyaca. ¹⁴Ican ihya cuví chaha cu uñi cha tuví ra Jesús nuu ra cachicā noo chihin ra cha yaha cha nandoto ra.

**Nu cahán ra Jesús chihin
ra Simón Pedro**

¹⁵ Cha yaha cha curumusa ra Jesús, ndaca tuhun ra chi ra Simón Pedro:

—Simón, sehe ra Jonás, ¿atu cuñi con chii ican saha ra ihya?

Ta nacahan ra Pedro ta catyí ra:

—Ay, Sutú Mañi yuhu, maun chitón tyi catyí ra chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndaca tuhun ra Jesús chi ra inga chaha:

—Simón sehe ra Jonás, ¿atu cuñun chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñi chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

¹⁷ Ta chaha cu uñi ndaca tuhun ra chi ra:

—Simón Pedro, sehe ra Jonás, ¿atu cuñun chii? —catyí ra Jesús chi ra.

Cuhva cha ndaca tuhun ra chi ra cha cu uñi chaha tatu cuñi ra chi ra, ra Pedro nducuihya iñi ra, ta catyí ra chi ra:

—Sutu Mañi yuhu, maun chitón yoso caa anime ta maun chitón tyi cuñi chuun —catyí ra Pedro.

Ta ra Jesús catyí ra chi ra:

—Saha cuenda mbee sane. ¹⁸ Cha ndicha catyí chuun vatyí ta tyivaun ndihvi noun sahmon ta chahun nu cuñun. Soco na cuchahnun, cusanacaun ndahun ta inga ra cusandihvi noo chuun. Ta cunyaca ra chuun nu ña cuñun cahun —catyí ra Jesús chi ra Pedro.

¹⁹ Cha catyí ra Jesús tuhun ihya cuñi ra catyí ra yoso caa cucuvi ra Pedro ta cusacahnu ra chi Nyoo cha cuenda cuan. Yaha cuan ta catyí ra Jesús chi ra Pedro: —¿Cunyicon chii! —catyí ra chi ra.

Nu cahán ra Juan tuhun maa ra

²⁰ Tyicuan ta nyocava ra Pedro ta nanyehe ra vatyí nyicón inga ra cha chica noo chihin ra Jesús, ra cha cuñi xaan ra Jesús chi. Suri maa ra chinyaña ra chi ra Jesús cha cuxiñi ra quivi cuan. Ta ndaca tuhun ra ta catyí ra: “Sutu Mañi yuhu, ¿yóo ra cunaxico tuhun chuun?” catyí ra, ndaca tuhun ra quivi cha ni cumañi cúvi ra Jesús. ²¹ Cuhva cha nanyehe ra Pedro chi ra, ndaca tuhun ra chi ra Jesús:

—Sutu Mañi yuhu, ta ra ihya, ¿ñáa cha cucuvi chi ra? —catyí ra chi ra.

²² Nacahan ra Jesús ta catyí ra:

—Tatu cuñi mai cha coo ra nyacua nya ndichi inga chaha, ¿ñáa cha cuenda yoho? Yoho cunyicon chii —catyí ra Jesús chi ra Pedro.

²³ Tyicuan ta chitya tuhun ihya nu canyicú yañi yo vatyí ra cuan, ma cúvi ra. Soco ña catyí ra Jesús cha ma cúvi ra. Catyí ra: “Tatu cuñi yuhu cha coo ra nyacua nya quichi inga chaha, ¿ñáa cha cuenda yoho?”

²⁴ Yuhu cuví ra yucuan, ra cha cahán ra Jesús tuhun. Ta nyehi tandihi cuui maa cha cuví ta tyai nu libru ihya. Yuhu chite vatyí tandihi cha tyai, ndicha.

²⁵ Iyó cuaha ca cha sacuvi ra Jesús. Tyehe ta chicunya tahanan tahanan tuhun cuan nu libru, cahvi iñi tyi naniñ ñuhu ñayivi ma cutahan tandihi libru cuan.

Tyño Cha Gasacuví Ra Apóstol: Ra Cha Tyatyño Ra Jesucristo Chi

Nu catyí ra Jesús tyi cuaquichi Tatyí Ii Nyoo

1 Yoho Teófilo, yuhu ra Lucas sacuhín tutu chuun quívi cuan. Ta nu sacuhín tutu cha xihna ri cuan, tyaj tandíhi cha quichaha sacuvi ra Jesús ta tandíhi cha sañaha ra nya quívi xihna ri ²ta nya quívi nandaá xica ra andívi. Ta cha cumañi ca nandaá ra andívi, nacachí ra chi ra apóstol cuenda ra. Ta tyatyño ra chi ra chihin Tatyí Ii Nyoo tyi cacaca ra tyño ra. ³Ta maa ra Jesús nyehe ra tindoho ta chíhi ra. Ta cha yaha cuan, nandoto ra ta tuví ra nu canyicú ra apóstol. Ta chíhi cha uvi xico quívi, cuaha xaan chaha tuví ra nu canyicú ra, vatyí na caco to ra vatyí ndicha cha nyitó ra. Ta cahān ra tuhun yoso caa nyacá ñaha Nyoo chí yo.

⁴Cuhva cha nyaá ca ra chihin ra, ra Jesús catyí ra chí ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chí ndo, tari catyí chí ndo quívi cuan. ⁵Chihin ndutya sacondutya ra Juan chí ñáyivi. Soco nyoho ña cuaha ca quívi ta cucondutya ndo chihin Tatyí Ii —catyí ra Jesús.

Nu nandaá xica ra Jesús andívi

⁶Cuhva cha canyicú ra apóstol iin ri chihin ra Jesús, ta candacā tuhun ra chí ra:

—Sutu Mañi yuhu, ¿atu vityin ri cusacacun chí ñuu yo Israel ihya ndaha ra ñuu Roma? —catyí ra.

⁷Ta nacahān ra Jesús ta catyí ra:

—Ña tahān chí coto nyoho nya quívi. Noo tuhun ri maa Nyoo Sutu yo cua-catyí ra ama. ⁸Soco cuhva cha quichi

Tatyí Ii síqui ndo cunaquehen ndo tun-yeé iñi, ta cuquita ndo vatyí cahan ndo tuhín Jerusalén ihya ta tandíhi ñuu cha nyicú Judea ta Samaria, ta nichahnu ñuhu ñáyivi.

⁹Ta cha yaha cha catyí ra Jesús tuhun ihya, ta cha ní ri ca cha canyehé ra chí ra, nandaá xica ra andívi, ta quíhvi ra chíhi noo vico. Ta ña canyehé ca ra chí ra.

¹⁰Ta cuhva cha canyehé ndaa ra andívi, ta tuví uvi tahan ángel yatín nu canyicú ra. Ñihnó ra sahma cuichin. ¹¹Ta cacatyí ra cuan chí ra:

—Nyoho ra Galilea, ¿ñáá tuhun cha ndoo ndo nyehé ndaa ndo andívi? Suri maa ra Jesús cha nyehe ndo nandaá xica ihya, tyehe caa cuquichi tucu ra inga chaha.

Nu canacachí ra apóstol chí ra Matías vatyí ndíhvi ra tyño nuu ra Judas

¹²Tyicuan ta quita coyo ra apóstol nu chinyicu ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatín ri nyaá ñuu cuan, tari sava hora ri. Ta sava ri hora cuví caca ñáyivi quívi nyitatú ñu, vatyí tyicuan caa catyí ley cha tyaa ra Moisés. ¹³Cuhva cha nachaa coyo ra Jerusalén cuan, candaá ra nu cu uvi piso noo vehe nu ca iyó ra. Ta tandíhi ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuíñ naquiqui síqui gobiernu Roma, ta ra Judas yañi ra Jacobo. ¹⁴Ta nyita ri ndu iñ ri ra ta iin ri cuhva cachicá xíñi ra ta cachicān tahvi ra chí Nyoo. Ta nyicú tucu yañi ra Jesús ta cu María síhi ra, ta inga ñusíhi ñandíhi.

¹⁵Tari noo ciento oco ñáyivi ndu iñ ri ñu quívi cuan. Ta nicuinanyaá ra Pedro. Ta catyí ra chí ñu:

¹⁶—Nyoho yañi, cuñi chí cha cuví tari cuhva catyí nu tutu Nyoo. Vatyí cahān Tatyí Ii chihin yuhu ra David yoso caa

cucuhva cuenda ra Judas chi ra Jesús chi ra xaan iñi chi ra. ¹⁷Ta ra Judas cuvı ra noo ra chindihi chihin yo. Ta iin ri chıca ra tyiño Sutu Mañi yo chihin yo. ¹⁸Soco chahan ra, ta sata ra noo ñuhú chihin xuhun cha ñihı ra cha chahı cuenda ra chi ra Jesús. Yahaı cuan ta canacavaı ra chihin xiñi ra, ta ndataı chichi ra ta quitaı tandihi chiti yihvi ra. ¹⁹Ta quıvi cha cachitoı ñu ca iyó Jerusalén ihya cha chihı ra, casacunañi ñu chi ñuhuı cuan Acéldama. Ta cha chihin sahan maa ñu cuñi chi catyı Nu Catuvi Niñi. ²⁰Vatyı nu libru Salmo catyı chi tuhun ra Judas tyehe caa:

Na ndoo maa ri maa vehe ra.

Ta yori coo chichi.

Ta catyı tucu chi:

Inga ra cunanduvi tyiño nuu ra.

²¹⁻²²Ta vityin nyicú ra cachıcaı noo chihin yo quıvi chinyaı Sutu Mañi yo Jesús chihin yo; nya quıvi sacondutyı ra Juan chi ra, ta nya quıvi nandaı xica ra andıvi. Ta vityin cuñi chi cha ndu iin ri noo ra chihin yo, vatyı cuvı ra cha ndaa cha cuenda cha nandotoı ra Cristo —catyı ra Pedro.

²³Tyıcuan ta cacanaı ra chi uvi tahan ra, chi ra José cha nañi Barsabás, ta suri nañi tucu ra Justo; ta cacanaı tucu ra chi ra Matías. ²⁴Ta cachıcaı tahvi ra tyehe caa:

—Sutu Mañi yuhu, yoho chitón cha caa ańima tandihi ndi. Sańaha chi ndi chichi cha uvi tahan ra ihya, nya ra cha nacachiı maun, ²⁵vatyı sacuvı ra tyiño cha sacunaı ra Judas cha cuenda cuatyı ra, ta cuahan ra nu tahanı chi cuhun ra —cacatyı ra, chicán tahvi ra.

²⁶Tyıcuan ta cachahan ra noo sihva, tacuhva nyehe ra nya ra tahanı chi nyatu cuan chi. Ta tahanı chi ra Matías. Ta yucuan cuvı nu ndu iin ri ra chihin ndi uchi iin apóstol.

Nu chaı Tatyı Ii

2 Ta iin ri nyicú ñayıvi yihı cuenda ra Jesús ta chaı quıvi vico Pentecostés cha sanducahnú ñayıvi Israel. Ta iin ri cuhva chicá xiñi ñu. ²Ta sana iñi ñu ta nacuiñi ñu noo cha cayu vachi ityi andıvi. Tari cha cayu yahaı noo tatyı ñihi. Ta iyo cuvı tandihi chichı vehe nu canyıcú ñu. ³Tyıcuan ta tuvı tari yaa ñuhı quitı cuatyı siquı noo noo ñu. ⁴Ta tandihi ñu chıtu ñu chihin Tatyı Ii. Ta quichahı cahan ñu inga sahan yoso cuhva saquehen ityi maa Tatyı Ii chi ñu.

⁵Ta quıvi cuan cuaha xaan ra Israel ra vaha chicá chihin Nyoo canyıcú ra ñuu Jerusalén cuan. Cuaha xaan ra ca iyó inga ityi nicahnu siquı ñuhú ñayıvi chaı coyo vatyı casanducahnu ra vico Pentecostés. ⁶Ta cha cachıñiı ra cuan cha iyo xaan cuvı nu canyıcú ñu, ta cuahan coyo ra ta natacaı ra yatyin ri nu nyicú ñu. Ta ña cutuñi iñi ra ñáá cha cuvı cuan, vatyı noo noo ra cachıñiı ra cahnı ñu cuhva sahan cha cacahnı maa ra. ⁷Iyo cuñi ra ta catyı ra chi ra tahan ra:

—¿Atu ñima ñu Galilea cuvı tandihi ñu cha cahnı ihya? ⁸¿Ñáá tuhun cha chiñiı yo cahnı ñu cuhva sahan noo noo yo? ⁹Ihya nyicú yo cha cuvı yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia. ¹⁰Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya. Ta suhva ñu cuvı ñu ñu Israel nya quıvi cacuı ñu. Ta inga ñu cuvı ñu ñayıvi nanduviı cuenda ñu Israel ta nyicon ñu ley ra Moisés. ¹¹Iyó tucu ñayıvi ñuhú Creta ta ñu Arabia. Soco tandihi yo ta chiñiı yo cahnı ñu chihin sahan cha cahnı yo. Ta nacatyı ñu cha cahnu cha sacuvı Nyoo —cacatyı ra.

¹²Tandihi ra, iyo xaan cacuñiı ra, ta yihı ra ndacá tuhun ra chi tahan ra:

—¿Ñáá cha cuñí chi catyí chi tandíhi tuhun ihya? —catyí ra.

¹³Soco inga ra cahán nyaa ra ta cacatyí ra vatyí cachiñí ñu.

Nu cahán noo ra Pedro nuu ñáyivi

¹⁴Tyicuan ta nicuinanyaá ra Pedro chihin inga uchi iin tahan apóstol. Ta chihin cha chaa cahan ra ta catyí ra:

—Nyoho yañi, cha cuví ndo ra Israel, ta tandíhi nyoho cha iyó ndo Jerusalén ihya. Coto ndo tuhun ihya. Ta cuiñi vaha ndo tuhun cha cuacatyí chi ndo. ¹⁵Vatyí cuñí maa ndo tyi chiñí ndi. Soco ña chiñí ndi, vatyí ña tuhvá ñáyivi chiñi cha cuhva ihya, vatyí ni ca iin cha ñaha ri cuví. ¹⁶Soco ihya cuví tuhun cha cahan ra Joel, ra cuví profeta Nyoo ta cha naha. Vatyí catyí ra:

¹⁷Nu cuandihi ca quívi, catyí Nyoo, cusaquichi Tatyí Ii siqui tandíhi ñáyivi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chi ñu. Ta ra chahnu cunyehe ra ñumahna.

¹⁸Cusaquichi Tatyí Ii siqui ñu sacuví tyiño nui. Ta cucahan ñu cuende, catyí Nyoo.

¹⁹Ta catyí ra vatyí cusañaha ra cha iyo cucuvi ityi andívi. Ta ityi nu ñuhu ñáyivi cusañaha ra seña, seña niñi, seña ñuhu, ta vico ñuhma.

²⁰Cunduñaa ñanyii. Ta yoo tari caa tyacu niñi cunanduvi. Tyicuan caa cucuvi cha niri ca cha chaá quívi quichi Sutu Mañi yo. Ta cucuvi noo quívi cahnu vatyí cucutuñi chi yo nuu ra.

²¹Ta tandíhi ñu chicán tahvi sivi ra cucacu ñu. Tyicuan caa catyí ra Joel.

²²Cuiñi ndo nyoho ra Israel. Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chi vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacu-

ví Nyoo nu canyicú yo cha cuenda ra Jesús. Ta nyoho chitó vaha ndo tuhun ihya. ²³Soco quívi quehen cuenda ndo chi ra, sacuví ndo tari cuhva tyaa maa Nyoo cuhva nyata quívi xihna ri. Vatyí chaha cuenda ndo chi ra chi ra quiñi iyó. Ta chitacaá ra chi ra nu cruzi. Ta tyicuan caa chahñi ndo chi ra. ²⁴Soco Nyoo sanandoto ra chi ra vatyí sacacu ra chi ra ndaha tuhun chihi. Vatyí tuhun chihi ña cuví cunyaca ñaha chi ra. ²⁵Vatyí ra David cahan ra tuhun ra Cristo ta cha naha, ta catyí ra:

Tyicuan ri nyehí chi Sutu Mañi yo ityi nui.

Maa ra nyaá iin chiyo vahi ta ñahri maa cha cuví sayuhvi chii.

²⁶Yucuan chaha cusii xaan cuñí añime. Ta chité yaa chihin cha sii cuñí.

Ta siin ri coño ñuhi cunyitatu chi vatyí chité tyi cunandote.

²⁷Vatyí yoho Nyoo Suti, ma sandoun añime nu nyicu ñu chihi, ta ni ma cuhvon cha tyahyu coño ñuhi.

Vatyí sehe iun cuví chii.

²⁸Sañahún ityi cha cuahán nu coi ñáyivi chaa cha ma naa ca maa. Ta sacutún chii chihin tusii iñi vatyí nyaún chihin, catyí ra David ta cha naha.

²⁹Nyoho yañi, chitó cachi yo vatyí ra David sutu chahnu yo chihí ra ta quihví ra chichi ñuhu. Ta ñaña ra nyaá ca chi ihya nya vityin. ³⁰Soco ra David cuví ra noo profeta cuenda Nyoo. Ta chitó ra vatyí Nyoo tyaa ra cuhva ta iin ri tuhun cahan ra chihin ra vatyí suri tata maa ra ican cuacacu ra Cristo. Ta ra Cristo, ican ra cunyaca ñaha. ³¹Ta tyicuan caa ra David tari cha vatyí nyehé ra cha cuacuvi nu cuahan ca chi quívi. Ta cahan ra tuhun cha cunandoto ra Cristo. Ta catyí ra vatyí ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra. ³²Ta ra Jesús ihya sanandoto Nyoo chi ra. Ta tuhun ihya tandíhi maa ndi cuví ndi cha ndaa. ³³Nyoo sac-

ahnú ra chi ra Jesús, ta cuatyaꝯ ra chi ra chiyo vaha ra andívi. Ta ra Jesús naquehen cuenda ra Tatyí li cha catyí Sutu yo Nyoo ta cha naha vatyí cuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chiñí ndo.³⁴ Vatyí ñima ra David nandaꝯ ra andívi. Vatyí suri maa ra David cahan ra tuhun ra Jesús, ta catyí ra:

Catyí Suti Nyoo chi Suti ra Cristo:
“Cunyaa chiyo vahi

³⁵ cha niri ca cha caquin chi ra xaan iñi chuun chahun”, catyí Nyoo chi ra Cristo chihin yuhu ra David.

³⁶ Nyoho ta tandíhi ca ñu Israel, coto vaha ndo vatyí tuhun ra Jesús ican cahín ihya. Chitacaꝯ ndo chi ra nu cruzi. Soco Nyoo cuatyaꝯ ra chi ra tyi cuví ra Sutu Mañi yo, ra nyaca ñaha chi yo —catyí ra Pedro.

³⁷ Cuhva cha chiñí ñu tuhun cahan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandíhi ca ra apóstol, ta catyí ñu:

—Nyoho yañi, ¿yoso caa sacuví ndi vityin? —catyí ñu chi ra.

³⁸ Yucuan ta catyí ra Pedro chi ñu:

—Noo noo ndo ndu uvi iñi ndo cuatyí ndo ta nasama ndo cuhva iyó ndo nuu Nyoo. Ta condutya ndo chihin sivi ra Jesucristo. Tacuhva na saha ra ticahnu iñi cuatyí ndo. Tyicuan caa ta cua cuhva Nyoo Tatyí li ra chi ndo.³⁹ Vatyí cha naha catyí Nyoo vatyí cuhva ra Tatyí li ra chi maa ndo, ta chi sehe ndo, ta chi ñu cha cañi nyaá ñandíhi. Vatyí tandíhi ñu cha nacanaꝯ Sutu Mañi yo Nyoo chii cucuhva ra Tatyí li ra chi ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Nducu ndo cuhva na sacacu Nyoo chi ndo, tacuhva cuví sandoo ndo cha caa ñáyivi quiñi iyó ihya —catyí ra chi ñu.

⁴¹ Tyicuan ta tandíhi ñu cha natíin cuenda tuhun cahan ra Pedro condutya ñu. Ta quita tari noo uñi mil ñu, ta ndu iin ri ñu chihin ñu yihí cuenda ra Jesucristo.⁴² Ta tyicuan ri ndu iin ri tandíhi ñu, ta chihin cha ñi iñi ñu tyasoho ñu cha sañahá ra apóstol chi ñu. Ta iin ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyí nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quívi cuan

⁴³ Ta cuaha milagru ta seña sacuvi Nyoo chihin ndaha ra apóstol. Ta tandíhi maa ñáyivi iyo cuñí ñu.⁴⁴ Tandíhi ñu yihí cuenda ra Cristo iin ri cacuví ñu chihin cha iyó chi ñu.⁴⁵ Xicó ñu cha tyayii ñu ta cha iyó chi ñu. Ta sachá ñu xuhun ñu chi tahan ñu yoso cuhva cha chiñuhú chi noo noo ñu.⁴⁶ Ndiqivi ta ndu iin ri ñu nya vehe ñuhu cahnu. Ta ndu iin tucu ri ñu noo noo vehe tahan ñu ta chachí ñu pan ta chihí ñu vinu. Ta iin ri cachachí ñu chihin cha sii cuñi aña ñu. Ta chahá ñu cha cachi tahan ñu chihin cha ñi iñi ñu.⁴⁷ Ta sacahnú ñu chi Nyoo. Ta vaha cahán tandíhi ñáyivi siquí ñu. Ta tahan tahan quívi cuahan sanducuahá ca Sutu Mañi yo chi ñu cha cuahán sacacu ra.

Nu nduvaha noo ra coxo

3 Noo quívi cuahán coyo ra Pedro chihin ra Juan vehe ñuhu cahnu. Cuví chi cuhva caa uñi cha cha iñi, cuhva cha tuhvá ñáyivi Israel cachicán tahvi ñu chi Nyoo.² Ta ndi quívi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyí chinyacá ñu chi ra na cacan ra limuxtan chi ñáyivi quíhvi yuvehe cuan, ta nañi chi: Yuvehe Tyaqui.³ Tyicuan ta nanyehé ra coxo cuan chi ra Pedro ta chi ra Juan cha cuaquihvi ra chichi vehe ñuhu cahnu. Ta chicán ra

noo limuxtan chi ra. ⁴Ta cananyehe ra Pedro ta ra Juan chi ra. Ta ra Pedro catyí ra chi ra:

—Nyehe chi ndi —catyí ra.

⁵Tyicuan ta quichaha nyehe ra coxo cuan chi ra. Cuñí maa ra vatyí iyó cha cuacuhva ra chi ra. ⁶Soco ra Pedro catyí ra chi ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyí chuun, ndicuita ta cacon —catyí ra Pedro chi ra.

⁷Tyicuan ta tijn ra Pedro ndaha chiyo vaha ra ta nacoñehe ra chi ra. Ta caa cuhva ri cuan nicoo fuerza chaha ra ta tatu chaha ra. ⁸Tyicuan ta ra coxo cuan ndava ra noo, ta nicuinanya ra. Ta quichaha chica ra. Ta quihvi ra chihin ra chichi vehe ñuhu. Ta chicá ra. Ta cañá ndava ra. Ta sacahnú ra chi Nyoo. ⁹Tandihí ñáyivi nyehe ñu chicá ra ta sacahnú ra chi Nyoo. ¹⁰Ta iyo xaan cuñí ñu ta yuhví ñu cha cuenda cha nduvaha ra cuan. Vatyí nichón nuu ñu chi ra. Ta chitó ñu vatyí suri maa ra cuví cha tuhva chinya Yuvehe Tyaquí cuan chican ra limuxtan.

**Nu cahán noo ra Pedro tuhun ra
Cristo nuu ñáyivi nu cuví
corredor ra Salomón**

¹¹Ra coxo cha nduvaha cuan, ña sañá maa ra chi ra Pedro ta ra Juan. Ta tandihí ñáyivi iyo cuñí ñu ta chinqo ñu nataca ñu nu nyicú ra, nya nu cuví corredor ra Salomón chichi vehe ñuhu. ¹²Cha nanyehe ra Pedro cha tyicuan caa, catyí ra chi ñáyivi:

—Nyoho ra Israel, ¿ñáá tuhun cha iyo xaan cuñí nyoho? ¿Ñáá tuhun cha nyehé xaan ndo chi nyuhu? Tari cha vatyí chihin tunyee ñni maa ndi, o cha cuenda cha cachi iyó ndi nuu Nyoo, sanduvaha ndi chi rayí ihya, cuñí maa ndo. ¹³Nyuhu

ña cuví sanduvaha ndi chi ñáyivi. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chi Sehe ra, ra Jesús. Ta maa ndo chaha cuenda ndo chi ra chi ra Pilato, ra cuví tyiño. Ta maa ra cuñi ra saña ra chi ra. Soco nyoho ña chaha ndo. ¹⁴Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhvá chahñi ñáyivi. ¹⁵Tyicuan caa chahñi ndo chi ra cha chahá ñáyivi chaa coo yo chihin Nyoo. Soco Nyoo sanandoto ra chi ra. Ta ña ndoo ra chihin ñu chihí. Ta nyuhu cuví ndi cha ndaa. ¹⁶Ta suri maa ra Jesús cuví ra chaha fuerza chaha ra coxo ihya. Vatyí chinó ñni ndi tyi iyó tunyee ñni chi ra Jesús. Yucuan chaha ndunyehe chaha ra ihya, ta ñohó nuu vaha ndo chi ra ihya. Ta nduvaha ra vatyí chinó ñni ndi chi ra Jesús. Ta tandihí nyoho cha nyehe maa ndo vityin.

¹⁷Chité yañi —catyí ra Pedro— vatyí quivi cha chahñi ndo chi ra Jesús, ña chitoto ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachitó ra. ¹⁸Soco tyehe caa chinqo cava tuhun cahan Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho. ¹⁹Yucuan chaha ndu uvi ñni ndo cuatyí ndo. Ta nacuhva ndo añima ndo chi Nyoo, tacuhva na ndachi cuatyí ndo. Tyicuan ta Sutu Mañi yo sandunyehe ra añima ndo vatyí cohon ra añima ndo. ²⁰Tyicuan ta cutachi ra chi ra Jesús ra cuví Cristo na quichi ra inga chaha. Vatyí quivi xihna ri tyaa Nyoo cuhva tyi quichi ra cha cuenda ndo. ²¹Tahán chi cha ndoo ra Jesucristo andivi cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha. ²²Vatyí tyicuan caa catyí ra Moisés chi sutu chahnu yo: “Cusaquichi Sutu yo Nyoo chi noo ra cahan cuenda ra. Ta suri

ñáyivi chi yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandihi cha catyí ra chi ndo. ²³ Vatyí tandihi ñu cha ma tyasoho tuhun cahan ra, cunaa ñu, vatyí ma cu iin ri ñu chihin ñáyivi cachi Nyoo chii”, catyí ra Moisés.

²⁴ Ta tyicuan caa tucu tandihi profeta cuenda Nyoo nya quívi ra Samuel ta nyacua nya vityin, casacoto ra tuhun cha cuví vityin. ²⁵ Tandihi promesa cha chaha Nyoo cha cahan ra profeta tuhun ta cha naha, chi maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chi ra Abraham: “Tandihí ñáyivi cha iyó siquí ñuhu ñáyivi cunasoque chi ñu cha cuenda ñáyivi chuun.” ²⁶ Ta quívi sanandoto Nyoo chi Sehe ra, xihna ca nu nyicú ndo tachí ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quiñi caa —catyí ra Pedro chi ñu.

Nu catiñ ra cacuví nuu vehe ñuhu chahnu chi ra Pedro ta chi ra Juan

4 Ni cahán ca ra Pedro ta ra Juan chihin ñáyivi, ta chaq coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo. ² Cacuxaan xaan ra vatyí ra Pedro ta ra Juan sañahá ra chi ñáyivi ta catyí ra vatyí ndicha cha nandoto ñu chihí, vatyí ra Jesús nandoto ra. ³ Tyicuan ta catiñ ra chi ra. Ta catyihí ra chi ra vehe caa. Ta candoo ra nyacua nya inga quívi vatyí cha iñi xaan cuhva cuan. ⁴ Soco cuaha ñu cha chiñi tuhun cahán ra Pedro nachinó iñi ñu. Ta candu iin ri ñu chihin ñu yihí cuenda ra Jesús. Ta cha tandihí ñu vasi quita ohon mil ñu cha maa ri maa rayii ri.

⁵ Tuvi inga quívi ta candu iin ri ra cacuví tyiño chi ñu Israel, ra chahnu, ta ra casacuaha cuenda ley cha tyaa ra

Moisés, nya Jerusalén cuan. ⁶ Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra Alejandro. Ta nyicú tucu tandihí ñáyivi chi ra cacuví nuu chi tata sutu. ⁷ Tyicuan ta catachí ra tyiño chiquehen chi ra Pedro ta chi ra Juan. Ta chitayucu ra chi ra mahñu. Ta candaca tuhun ra chi ra:

—¿Yóó cha chaha ityi chi ndo vatyí sanduvaha ndo chi ra cuan? ¿Yóó chi cha cuenda nyacuví ndo tyehe caa? —catyí ra chi ra.

⁸ Ta ra Pedro tyitu ra yihí Tatyí Ii Nyoo. Ta catyí ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu. ⁹ Vityin ndaca tuhun ndo chi ndi tuhun vaha cha cuví chi noo ra coxo ihya, vatyí cuñí ndo coto ndo yoso caa nduvaha ra. ¹⁰ Yucuan chaha cunacatyí ndi chi ndo tacuhva nacoto tandihí ñáyivi Israel. Vatyí ra ihya nanyaá ra nuu tandihí ndo. Vatyí nduvaha ra chihin tunyee iñi ra Jesucristo ra ñuu Nazaret, ra cha chaha cuenda ndo vatyí cúvi ra nu cruzi. Soco Nyoo sanandoto ra chi ra. ¹¹ Ta suri ra Jesús ihya cuví yuu cha chiñuhú ca cha ña cuñí ra savahá vehe cotyiño ra, tari cuhva catyí nuu tutu Nyoo. Ta ican ndo cuví tari ra savahá vehe ta ña cuñí ndo yuu cha chiñuhu ca cuan. ¹² Vatyí yori inga ra cuví sacacú chi yo. Vatyí noo tuhun ri maa ra chaha Nyoo vatyí sacacu ra chi yo. —catyí ra Pedro chi ñu.

¹³ Tyicuan ta cachihí ra cacuvi tyiño cuan vatyí ñi xaan iñi ra Pedro ta ra Juan cacahán ra. Ta ñima ra cañoño vaha sicuela cacuví ra. Ta iyo xaan cuñi ra. Tyicuan ta nicohon nuu ra chi ra vatyí ican ra cuví ra cha cachica noo chihin ra Jesús. ¹⁴ Ta siin ri, ra cha nduvaha cuan, nanyaá ra chihin ra yucuan. Yucuan chaha ña cuví cahan ña vaha ra cacuvi tyiño cuan siquí ra Pedro ta ra Juan. ¹⁵ Tyicuan ta catyí ra chi ra naquita coyo ninduñi ra chata vehe. Ta

candoo maa ra cacuví tyiño cuan candatuhun tahan ra. ¹⁶ Ta catyí ra:

—¿Yoso caa cunyacuvi yo chihin ra ihya? Vatyí tandihí maa ñu Jerusalén chitó ñu seña cha casacuví ra ihya. Ta ma cuvi catyí yo vatyí ña ndicha. ¹⁷ Soco tacuhva cha ma cono tuhun ihya nicahnu chichi ñuu ihya, cutyanaha yo chi ra, tacuhva vatyí ma cahan ca ra tuhun ra Jesús chihin ñáyivi —cacatyí ra.

¹⁸ Tyicuan ta cacana ra chi ra Pedro ta ra Juan. Ta catyí ra chi ra vatyí ni chiin ca maa ta ma cahan ca ra tuhun ra Jesús. Ta ma sañaha ca ra chi ñáyivi. ¹⁹ Soco ra Pedro ta ra Juan canacahan ra ta catyí ra:

—Ndíchi xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo. ²⁰ Vatyí nyuhu ma cuvi cha sandihí ndi cha nacatyí ndi tuhun cha nyehe ndi ta chiñi ndi —cacatyí ra.

²¹ Tyicuan ta nacatyanaha tucu ra chi ra. Soco saña ra chi ra vatyí ña ñihí ra cuhva tachi tuñi ra chi ra. Vatyí tandihí ñáyivi sacahnú ñu chi Nyoo cha cuenda cha cuví cuan. ²² Vatyí rayi cha nduvaha cuan, yaha ca uvi xico cuiya ra, ta tyicuan cuiya nyehe ra tindoho ta nduvaha ra saha Nyoo.

Nu chican ñu yihí cuenda ra Cristo tunyee iñi Nyoo

²³ Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandihí cha cacatyí ra chahnu ta ra cacuví nuu chi tata sutu chi ra. ²⁴ Cuhva cha cachiñi ñu tuhun ihya tandihí ñu ta iin ri quichaha chican tahvi ñu chi Nyoo. Ta catyí ñu:

—Sutu Mañi yuhu, yoho savahun andívi ta ñuhu ñayivi. Savahun tyañuhu. Ta tandihí ca cha iyó, maun savaha. ²⁵ Ta yoho chihin Tatyí Iun sacahun chi ra David ta cha naha. Ta catyí ra:

¿Ñáá tuhun cha naquiqui ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha siqui ñuhu ñáyivi ihya candu cuita ra sicun Sutu Mañi yuhu, ta siqui ra Cristo, catyí ra David.

²⁷ Sutu Mañi yuhu, ndicha vatyí ra Herodes, ta ra Poncio Pilato candu iin ri ra ñuu Jerusalén ihya chihin ra ñuu Roma ta chihin ra Israel vatyí cahñi ra chi ra Jesús Sehe iun cha cachí vahun.

²⁸ Ta tyicuan caa ta casacuví ra, tari cuhva cha catyí maun ta cha naha tyi cucuvi. ²⁹ Ta vityin, Sutu Mañi yuhu, nyehe cha tyanaha ra chi ndi. Ta cuhva cha cunñi ca iñi ndi tyi tyiño nuu maun sacuvi ndi, Sutu Mañi yuhu. Ta cuhva cha cahan ndi tuhun chihin cha ña yuhví ndi. ³⁰ Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee iñi ra Jesús Sehe iun —catyí ñu chicán tahvi ñu.

³¹ Ta cuhva cha ndihí savaha ñu oración ta taan nu nyicu ñu. Ta tandihí ñu chitu ñu chihin Tatyí Ii ta cahan ñu tuhun Nyoo chihin cha ñi iñi ñu.

Ñahri cha cumañi chi ñu yihí cuenda Nyoo

³² Tandihí ñu cha chinó iñi, iin ri cuví ñu, ta iin ri cuhva chicá xiñi ñu. Ni noo ñu ta ña catyí ñu vatyí chi maa ñu cuví cha iyó chi ñu, soco chi tandihí ñu cuví, catyí ñu. Vatyí iin ri nyicú ñu. ³³ Ta chihin tunyee iñi cahnu, cacahan ra apóstol tuhun cha nandoto Sutu Mañi yo Jesús. Ta Nyoo nasocó xaan ra chi tandihí ra. ³⁴ Ta ni noo ñu ta ñahri cumañi chi ñu vatyí tandihí ñu cha iyó vehe o ñuhú, xicó ñu. Ta quichi nyacá ñu xuhun, ³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chiñuhú chi ñu. ³⁶ Tyicuan caa sacuvi noo ra cha nañi José. Ra cuan vachi ra tata ra Levi. Ta cacu ra ñuhú Chipre

cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyí sivi cuan: Ra Naquehen Ndahvi. ³⁷Ta ra Bernabé cuan xico ra ñuhú ra. Ta chaha ra xuhun cuan chi ra apóstol.

Cuatyí ra Ananías ta cu Safira

5 Soco noo ra cha nañi Ananías chihin cu Safira ñasihi ra, xico ñu noo ñuhú. ²Soco tixehe ñu suhva xuhun. Tyicuan ta chinyaca ra Ananías suhva xuhun chi ra apóstol. Ta catyí ra vatyí tandihi xuhun cha quiyahvi ñuhú cuví cuan. ³Tyicuan ta catyí ra Pedro chi ra:

—Yoho Ananías, ¿ñáá tuhun cha chahun cha quihvi ra ña vaha añimon, vatyí cuñún sandavi ñahun chi Tatyí Ii, ta catyún vatyí tandihi xuhun cha quiyahvi ñuhu cuví ihya ta ndoún chihin suhva? ⁴Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chi Nyoo ta catyún tyi tandihi xuhun chahun? Ñima chi nyuhu sandavi ñahun, chi Nyoo sandavi ñahun —catyí ra Pedro chi ra Ananías.

⁵Cha chihvi ra Ananías tuhun cha chahan ra Pedro, nduva ra ta chihvi ra. Ta quichi noo cha yuhvi cuñi ñáyivi cha chito ñu tuhun ihya. ⁶Tyicuan ta quichi coyo suhva ra tyivaa ta tyihvi ra coño ñuhu ra chichi noo sahna. Ta chahan ra chityihvi ra chi ra chichi ñuhú. ⁷Yaha noo uñi hora ta chaa ñasihi ra Ananías ta quihvi ña nu nyicú ra apóstol. Soco ña chito ña cha cuví cuan. ⁸Ta quichaha ndaca tuhun ra Pedro chi ña ta catyí ra:

—¿Atu tyehe cuví yahvi cha quiyahvi ñuhú ndo? —catyí ra.

Ta nacahan ña ta catyí ña:

—Ay, tyehe cuví yahvi chi —catyí ña chi ra.

⁹Tyicuan ta catyí ra Pedro chi ña:

—¿Ñáá tuhun cha ñoho naha ndo tuhun ta sandavi ñaha ndo chi Tatyí Ii Sutu Mañi yo Nyoo? Cha cuandichi coyo

ra cha chahan chityihvi chi yiun chichi ñuhú. Ta vityin cuhun tucu ra cutyihvi ra chi yoho —catyí ra Pedro chi ña.

¹⁰Caa cuhva ri cuan ta nduva ña chaha ra Pedro, ta chihvi ña. Ta caquihvi coyo ra tyivaa cuan, ta nyehe ra vatyí chihvi ña. Ta canacoñehē ra chi ña ta chityihvi ra chi ña xiin yñi ña. ¹¹Ta tandihi ñáyivi yihí cuenda ra Cristo, ta tandihi ca ñu chito tuhun cuan, canayuhvi xaan ñu.

Cuaha milagru ta seña sacuvi ra apóstol

¹²Cuaha seña ta milagru sacuvi ra apóstol sahá Nyoo nu nyicú ñáyivi. Ta tandihi ñu yihí cuenda ra Cristo ndu iñ ri ñu nu cuví corredor ra Salomón.

¹³Ta ni nonga ñu cha inga cuenda ta ña cañá iñi ñu cutahan ñu chihin ñu yihí cuenda ra Cristo. Soco vaha cahán ñáyivi siqui ñu. ¹⁴Ta cuaha xaan ñáyivi nachinó iñi chi Sutu Mañi yo Jesús, tari rayi ta ñusihi. ¹⁵Ta nyacua tavá ñu chi ñu cuhvi ityi cahnu, chacún ñu chi ñu nu chito. Vatyí tatu yaha ra Pedro soco vasi xiñahñu ra yaha siqui ñu, ta nduvaha ñu. ¹⁶Tyicuan tucu ñu iyó yatyin ri Jerusalén cuan, quichí nyaca ñu chi ñu cuhvi ta ñu cha yihí tatyí ña vaha chi. Ta nduvaha tandihi ñu.

Nu nyehé ra Pedro ta ra Juan tindoho

¹⁷Tyicuan ta ra cuví nuu chi tata sutu, ta ra cayihí cuenda ra cuví saduceo, quiñi cuñi ra nyehe ra chi ra apóstol cha cuenda cha vaha cha casacuví ra chihin tunyee iñi chahá Nyoo chi ra. ¹⁸Tyicuan ta catiin ra chi ra apóstol. Ta catyihvi ra chi ra vehe caa. ¹⁹Soco cha cuaa cuan quichí noo ángel cha tachi Sutu Mañi yo, ta nuña ra yuvehe caa cuan. Ta tavá ra chi ra. Ta catyí ra chi ra:

²⁰—Cuahan ndo ta cuinanyaa ndo chichi vehe ñuhu cahnu. Ta nacatyí ndo chi ñáyivi yoso caa cuví coo ñu ñáyivi

chaa cha iyó ndo —catyí ángel cuan chi ra.

²¹ Cha cachiñi ra tuhun cahan ángel cuan, ta cuahan coyo ra. Ta ñaha cuii ri quihvi coyo ra chichi vehe ñuhu cahnu. Ta quichaha sañaha ra chi ñáyivi. Ta cha ni ri ca cha sañahá ra apóstol cuan, ndu iin ri ra cuví nuu chi tata sutu ta ra ndihi chihin ra. Ta cana ra chi ra cacuví tyiño cuenda ñáyivi Israel vatyí coo ra junta. Tyicuan ta tachi ra na cuquehen chi ra apóstol nu cañohó ra vehe caa cuan. ²² Soco cuhva cha cha coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chi ra cuví nuu chi tata sutu.

²³ Ta cacatyí ra chi ra:

—Nyasi yuvehe caa cuan ta cha ndi. Ta sindaro, tayucú ra yuvehe casahá cumi ra. Soco cuhva cha nuña ndi, ña nañihí ndi chi ni noo ra chichi vehe caa cuan —catyí ra chi ra.

²⁴ Cuhva cha cachiñi tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñí ra. Ta candatuhun tahan ra yoso caa sacuvi ra ta cundihi tuhun cuan. ²⁵ Tyicuan ta cha noo ra ta catyí ra:

—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyivi —catyí ra.

²⁶ Tyicuan ta ra cuví nuu chi ra casahá cuenda vehe ñuhu, chahan ra chihin policia, ta chiquehen ra chi ra chihin cha vii ri ta ña cañi ra chi ra, vatyí yuhví ra chi ñáyivi coto tuchi ñu yuu chi ra. ²⁷ Chinyaca ra chi ra nuu ra cacuvi tyiño vehe ñuhu cahnu. Ta ra cuví nuu chi tata sutu catyí ra chi ra:

²⁸ —Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndihi maa chichi ñuu Jerusalén sacotó ndo tuhun ra. Ta cuñí ndo natyaa ndo siqui ndi vatyí nyuhu chahñi ndi chi ra

cuan —catyí ra cuví nuu chi tata sutu chi ra apóstol.

²⁹ Tyicuan ta nacahan ra Pedro ta inga ra apóstol, ta catyí ra:

—Nyaá siqui ndi cha quichaha xihna ca ndi chi Nyoo ta ñima ca chi rayi. ³⁰ Nyoo cuenda sutu chahnu yo ican sanandoto chi ra Jesús, ra cha chitaca ndo nu cruzi ta chahñi ndo chi ra. ³¹ Ta ra Jesús ican ra cuví ra cha sacahnú xaan Nyoo chi, ta cuatyaa ra chi ra chiyo vaha ra, vatyí cunyaca ñaha ra tandihi. Ta noo tuhun ri maa ra cuví ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu uvi iñi yo cuatyí yo tacuhva saha ra ticahnu iñi cuatyí yo. ³² Ta nyuhu cuví ndi cha ndaa cuenda ihya. Ta tyicuan caa tucu Tatyí li cha chahá Nyoo cunyaa ñima ñu quichahá chi ra —catyí ra Pedro chi ra.

³³ Ta cha cachiñi ra cha catyí ra Pedro, nduxaan xaan ra. Ta cuñi ra cahñi ra chi ra. ³⁴ Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyivi sahá xaan ñu ñáyivi chi ra. Ta ra Gamaliel cuan, nicuinanyaa ra. Ta tachi ra naquita coyo ra apóstol cuan noo cuhva ri. Tyicuan ta quita coyo ra. ³⁵ Ta quichaha catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña. ³⁶ Nícohon iñi ndo vatyí cha iyó suhva quivi ndicuita noo ra cha nañi Teudas. Ta catyí ra vatyí cuví ra noo ra vaha. Ta tari cha cumi cientu rayi chinyicon chi ra. Soco yahá cuan chahñi ñáyivi chi ra. Ta tandihi ra chinyicon chi ra nacutya cuatyí ra. Ta ndihi tuhun. ³⁷ Yahá cuan ta nu cuahan ca chi, quivi nacahvi ra gobiernu chi ñáyivi, ta ndicuita ra Judas ra ityí Galilea cuan. Ta cuaha ñu chinyicon chi

ra. Soco suri chahñi ñáyivi chi ra. Ta tandihi ñu cha chinyicon chi ra chitya cuatyí ñu. ³⁸Yucuan chaha saña ndo chi ra chiña. Ta ma tyihi ndo chi ndo chihin ra vatyí tatu tuhun ñáyivi ri cuví cha chicá noo ra, cundihi tuhun. ³⁹Soco tatu ndicha tyí tuhun Nyoo cuví, ma cuvi chi nyoho sativi ndo. Saha ndo cuenda chi ndo coto vaha chihin Nyoo cañí tahan ndo —catyí ra Gamaliel chi ra.

⁴⁰Tandihi ra ndoo ra vaha. Tyicuan ta cana ra chi ra apóstol. Cacañi policia chi ra. Ta chasi ra nu cahan ca ra tuhun ra Jesús. Tyicuan ta saña ra chi ra. ⁴¹Ta quita coyo ra apóstol nuu ra cuví tyiño. Ta sii xaan cacuñi ra vatyí chaha Nyoo cuhva vatyí nyehé ra tindoho cha cuenda ra Jesús. ⁴²Ta ña casandihi ra cha cacahán ra. Ta ndiquivi ri sañahá ra tuhun ra Jesucristo vehe ñuhu ta vehe ñáyivi ñandihi.

Nu nacachí ñu yihí cuenda ra Jesús ucha tahan ra vatyí saha cuenda ra ñáa cha chiñuhu chi ñu

6 Ta nu cuahan ca chi quivi cuaha xaan nanduví ñáyivi cha yihí cuenda ra Cristo. Tyicuan ta ñu cha cahán sahan griego quichaha cahan ñu siquí ñu cha cahán sahan hebreo cuan. Vatyí catyí ñu tyí ña tyiñuhú vaha ra cha cahán sahan hebreo chí ñu chihí yí cuenda ñu, cuhva cha sachá ra cha cacachi ñu ndiquivi ri. ²Tyicuan ta ndi uchi uvi tahan apóstol sandu iin ri ra chi tandihi ñu yihí cuenda ra Cristo. Ta cacatyí ra chi ñu:

—Ña vaha cha sandihi ndi cha cahan ndi tuhun Nyoo ta sacha ndi cha cachi ndo. ³Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra. ⁴Ta nyuhu sañihi ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵Tandihi ñu ndoo ñu vaha. Ta nacachi ñu chi ra Esteban. Vatyí chinó xaan iñi ra chi Nyoo. Ta tyitu ra chihin Tatyí Ii. Ta nacachi tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduví ra noo ra Israel. ⁶Tyicuan ta quichi nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷Ta cuahan chitya ca tuhun Nyoo. Ta nducuaħa ca ñu yihí cuenda ra Cristo ñuu Jerusalén. Ta na chino iñi tucu cuaha tata sutu cuenda ñu Israel ñandihi.

Nu catyihí ra chi ra Esteban vehe caa

⁸Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyí tyitu añima ra chihin cha vaha Nyoo. Ta cuaha xaan milagru ta seña sacuví ra nu nyicú ñáyivi. ⁹Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyivi Ndoo Libre, candu iin ri ra chihin ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichaha cuví yuhu ra chihin ra Esteban. ¹⁰Soco ña cacuvi chasaha ra chi ra, vatyí ra Esteban cahán ra chihin cha chiñi tuñi cha chaha Tatyí Ii chi ra. ¹¹Tyicuan ta catyiyahvi ra cuan chi suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahán ña vaha ra siquí ra Moisés, ta siquí Nyoo. ¹²Yucuan chaha tandihi ñáyivi cuan naquiquí ñu. Tyicuan ta ra chahnu ta ra sacuaha cuenda ley ra Moisés, catiñ ra chi ra Esteban. Ta chahan ra chinyaca ra chi ra nu ndu iin ri ra cuví tyiño cuenda vehe ñuhu ñu Israel. ¹³Ta canducu ra chi ra cahan cuendu chaha ra. Ta maa ra catyí ra tyehe caa:

—Ra Esteban ihya, ña sandihí ra cha cahan cuehe ra siquí vehe ñuhu yo ta siquí ley ra Moisés. ¹⁴Ta chiñi ndi cahān ra vatyi ra Jesús ra Nazaret cuan cusatani ra vehe ñuhu cahnu ihya. Ta cunasama ra costumbre cha sandoo ra Moisés chi yo na —catyí ra cuendu cuan siquí ra Esteban.

¹⁵Tyicuan ta ra cacuví tyiño ta ra canycú yucuan canyehē ra chi ra Esteban vatyi tari maa nuu ángel tyicuan caa nuu ra cuhva cuan.

Nu cahán ra Esteban tuhun Nyoo chihin ñáyivi nducú cahñi chi ra

7 Tyicuan ta ra cuví nuu chi tata sutu ndaca tuhun ra chi ra Esteban, ta catyí ra:

—¿Atu ndicha cha catyí ra ihya?

²Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutu yo Nyoo cha cahnu ca tuví ra nuu sutu chahnu yo, ra Abraham quivi nyaá ra ityi Mesopotamia cha niri ca cha cumañi cucoo ra nya ñuu Harán. ³Ta catyí ra chi ra: “Sandoo ñuun, ta chi tandihí ñáyivi chuun. Ta cunuhu inga ñuu cha cusañahi chuun”, catyí Nyoo chi ra Abraham. ⁴Tyicuan ta ra Abraham quitā ra ñuu Caldea ityi Mesopotamia cuan, ta cuanuhū ra nya ñuu Harán. Ta yucuan cuví nu chihí sutu ra. Yaha cuan saquichí Nyoo chi ra ñuhú nu iyó yo vityin. ⁵Soco ñahri ñuhú chahā Nyoo chi ra quivi cuan. Ni noo nu cuinanyaa chaha ra ta ña chahā ra. Soco catyí Nyoo chi ra vatyi cucuhva ra. Ta cutahan chi chi sehe ra chata cha yaha cúvi ra. Tyicuan caa catyí Nyoo chi ra Abraham, vasi ta coo ca sehe ra quivi cuan. ⁶Ta siin ri catyí Nyoo chi ra vatyi ñáyivi chi ra cucoo ñu inga ñuu. Ta cusacuvi ñu tyiño nuu ñáyivi ñuu cuan, ta ma tyiyahvi ñu chi ñu. Ta cunyehe ñu tindoho cumi cientu cuiya.

⁷Soco catyí tucu Nyoo chi ra tyehe caa: “Ñáyivi ñuu cuan cusanyehē ñu tindoho chi ñáyivi chuun. Yucuan cuenda cuatachi tuñi yuhu chi ñu. Ta yaha cuan ta cuquita ñáyivi chuun ñuu cuan ta cuquichi ñu ihya. Ta cusacuvi ñu tyiño nuu mai ihya”, catyí Nyoo chi ra Abraham.

⁸Tyicuan caa natyihí tahan Nyoo tuhun chihin ra. Ta chahā Nyoo noo costumbre cha cuasacuvi ñu coto naa iñi ñu. Chahā ra tyi cutahnya chiin ñii xiñi ndivi cha lee sehe ñu, o cha sahá ñu circuncidar chi sehe ñu cuví cuan. Ta cha yaha uña quivi cha cacū ra Isaac sehe ra Abraham, tyicuan caa chinyacuví ra chihin ra. Ta suri tyicuan caa sacuví tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹Ta ican uchi iñn tahan ra sehe ra Jacobo ihya catasi cuñí ra nyehe ra chi ra José yañi ra cha cuenda vatyi vaha ca ra nuu sutu ra. Yucuan chaha caxico ra chi ra na cuhun ra Egipto. Soco Nyoo ña sandoó ra chi ra José. ¹⁰Ta sacacū ra chi ra nu nyehé ra tindoho. Ta chahā ra cha chiñi tuñi ra chi ra. Ta chahā ra cha vaha coo ra nuu ra Faraón, ra cuví rey Egipto. Ta rey cuan chahā ra cha cuví ra José gobiernu Egipto cuan. Ta chinyaca ñaha tucu ra vehe maa rey ñandihí.

¹¹Tyicuan ta chiyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihí sutu chahnu yo cha chicoo tyembu cuan ña cañihí ra cha cachi ra. ¹²Soco quivi chito ra Jacob vatyi iyó trigu nya Egipto, ta tachí ra chi sehe ra na cuquehen ra. Ta chahan coyo ra noo chaha. ¹³Ta cha cu uvi chaha cha chahan coyo ra, ra José sacoto ra chi ra vatyi yañi ra cuví chi ra. Yucuan quivi chito ra Faraón yóo chi tata vachi ra José. ¹⁴Tyicuan ta tachí ra José tyiño na

quichi sutu ra, ra Jacob, chihin tandihi ñáyivi chi ra, uñi xico chahun tahan ñu. ¹⁵ Ta tyicuan caa cuvi cha cuahan ra Jacob cuaco ra Egipto cuan. Yahá cuan ta chihí ra yucuan. Ta chihí tucu sehe ra, ra cacuví sutu chahnu yo. ¹⁶ Tyicuan ta chaá quivi cha chinanyaca ñu yiqui ra Jacob ta yiqui sehe ra nya Siquem. Ta yucuan quihvi ra chichi ñuhú nu satá ra Abraham noo ñaña chi sehe ra Hamor ta cha naha.

¹⁷ Soco cha ni cumañi ca quita ñu Egipto, ñáyivi chi ra Abraham cha iyó Egipto cuan cuaha xaan nanduvi ñu. Ta cha nyaña yatyin quivi cha cuacuhva Nyoo ñuhú chi ñu tari cuhva catyi cachi ra chi ra Abraham. ¹⁸ Tyicuan ta quichahá nyaca ñaha noo rey cha ña ñohó nuu chi ra José. ¹⁹ Rey cuan sandavj ñaha ra chi ñáyivi chi yo cuan. Ta sanyehé xaan ra tindoho chi ñu, ta saniñi ra chi ñu na sanandoo ñu chi sehe ñu cha ni cacu vaty na cúvi ndotyin. ²⁰ Ta suri quivi cuan cacu ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña. ²¹ Yaha cuan ña cuví ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan ñañihí ña chi ra. Ta naquehen ña chi ra. Ta sacuahnu ña chi ra, tari cha sehe ña cuví chi ra. ²² Yucuan chaha cutuhva ra Moisés tandihi cha chitó ñu Egipto. Ta siin ri nyee xaan cuhva cahan ra, ta cuhva sacuví ra ñandihí.

²³ Ta quivi cha chaá uvi xico cuiya ra Moisés quichi cuvi iñi ra cuhun ra cunyehe ra nu nyicú ñu Israel, ñáyivi chi ra. ²⁴ Tyicuan ta noo quivi nyehe ra nu cañi noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vaty satasi iñi ra chi ra Israel ra ñuu ra. ²⁵ Cuñi maa ra Moisés cuan vaty ñáyivi Israel cuan cutuñi iñi ñu tyi Nyoo tachi chi ra vaty cusacacu ra chi ñu. Soco maa ñu ña tuví

iñi ñu cha tyicuan caa cucuvi. ²⁶ Tyicuan ta cha inga quivi cuan nyehé ra Moisés chi uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyi ra: “Ña vaha cha cacañi tahan nyoho, vaty suri yañi ndo cuvi”, catyi ra chi ra. ²⁷ Tyicuan ta ra cha cañi chi tahan cuan tyan-dahá ra chi ra Moisés, ta catyi ra chi ra: “¿Yóo cha tyatyño chi yoho vaty cunyaca ñahun ta cuvun juez chi ndi? ²⁸ ¿Atu cuñun cahñun chii tari chahñun chi ra Egipto cuan icu?” catyi ra chi ra Moisés. ²⁹ Cuhva cha chiñi ra Moisés cha catyi ra, chino ra. Ta cuahan ra nya ñuu Madián. Yucuan ñihí ra ñasihi ra. Ta yucuan chiyo uvi tahan sehe ra.

³⁰ Yahá uvi xico cuiya. Tyicuan ta noo quivi chicá noo ra Moisés chiqui ndii yatyin noo yucu cha ñañi Sinaí. Ta nyehe ra noo taca iñu cha cayú. Tyicuan ta tuvi noo ángel chichi ñuhú cha cayu cuan. ³¹ Iyo xaan cuñi ra Moisés cha nyehé ra yucuan. Ta cuhva cha tuhva yatyin ca ra vaty tacuhva nyehe vaha ra, chiñi ra noo ndusu Sutu Mañi yo. Ta catyi ra tyehe caa: ³² “Yuhu cuví Nyoo cuenda sutu chahñun, Nyoo cuenda ra Abraham, ta ra Isaac, ta ra Jacob”, catyi Nyoo chi ra. Tyicuan ta ra Moisés quichaha ñihí ra chihin cha yuhvi ra. Ta ña caña iñi ra nanyehe ra. ³³ Ta quichaha catyi tucu Sutu Mañi yo chi ra: “Tava ndichan chahun vaty ñuhú nu chañun, ñuhú ii cuví. ³⁴ Yuhu nyehí tandihi tindoho cha nyehé ñáyivi cuende ñuu Egipto chiña. Ta chiñi ndusu ñu cha chacú cha ñu. Yucuan chaha noó xique vityin vaty sacaqui chi ñu. Ñaha, vaty cutachi chuun nya Egipto”, catyi Nyoo chi ra Moisés.

³⁵ Quivi cuan ña cuñi ñáyivi Israel chi ra Moisés cha cunyaca ñaha ra chi ñu, ta catyi ñu chi ra: “¿Yóo cha tyatyño chi yoho vaty cunyaca ñahun ta cuvun juez chi ndi?”, catyi ñu chi ra. Ta

vasi ña cuñi ñu cha cunyaca ñaha ra chi ñu, soco Nyoo tachí chi ra vatyí cuví ra nuu, ta sacacu ra chi ñu. Vatyí tyicuan caa catyí ángel cha tuví nuu ra nu taca iñu cha cayu cuan. ³⁶Ta ican ra Moisés cuan tava chi ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuví tucu ra nu yaha ñu Tyañuhu Cuaha. Ta nu chica noo ñu ñuhú ityi chichi cha uvi xico cuiya sacuví tucu ra ñandíhi. ³⁷Ta suri maa ra Moisés cuan cuví ra cha catyí chi ñu Israel ta cha naha tyehe caa: “Nyoo cutachi ra noo profeta ra tari tachí ra chi mai. Ta cucuví ra noo ra Israel tari maa ndo. Quichaha ndo chi ra”, catyí ra. ³⁸Ta suri maa ra Moisés cuan ndíhi ra chihin ñáyivi chahnu yo nu chica noo ñu ñuhú ityi cuan. Ta ican ra cuví ra cha cahán ángel cuan chihin nya yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chi yo.

³⁹Soco ñáyivi chahnu yo ña quichaha ñu chi ra. Tava xiin ñu chi ra. Ta cacuñi ñu cunuhu coyo ñu nya Egipto. ⁴⁰Yucuan chaha cuhva cha nyaá ca ra Moisés yucu Sinaí ta cahán ñáyivi chihin ra Aarón ta catyí ñu: “Savahun suhva nyoo cha cuhun coyo ityi nuu ndi. Vatyí ña chitó ndi ñáá cha cuví chi ra Moisés, ra cha tava chi ndi Egipto”, catyí ñu. ⁴¹Tyicuan ta casavaha ñu noo becerru xuhun cuaan. Tyicuan ta cachahñi ñu quití vatyí cuhva cuenda ñu chi xitohyo cuan. Ta sii xaan cuñi ñu cachiyó ñu vico cuenda xitohyo cha casavaha ñu chihin ndaha ñu. ⁴²Tyicuan ta Nyoo cuachiyó ra chi ñu. Ta saña ndaha ra chi ñu vatyí cusacahnu ñu chi ñanyii, chi yoo, ta ñáá ndíhi tiño cha iyó ityi andívi. Vatyí tyehe caa catyaa ra profeta cuenda Nyoo nu libru ta cha naha:

Nyoho ñáyivi Israel, ¿atu chahñi ndo quití vatyí cuhva cuenda ndo chi yuhu chichi cha uvi xico cuiya cha chica noo ndo ñuhu ityi? Ñima.

⁴³Soco sacahnü ndo chi nyoo cha nañí Moloc, ta sacahnü tucu ndo chi nyoo cha nañí Renfán cha caá tari caá tiño andívi.

Suri maa ndo savaha xitohyo cuan, vatyí sacahnü ndo.

Yucuan chaha yuhu cuatave chi ndo ñuu ndo, ta cuasacuhin chi ndo noo nu cañi ityi nuu ca Babilonia, catyí Nyoo chi ñu.

⁴⁴Nu chicá noo sutu chahnu yo ñuhú ityi cuan, chicumi ra noo vehe ñuhu cha chinó chihin ñii quití. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha ñu vehe ñuhu cuan ta ityi chata ca tari cuhva sañaha maa Nyoo chi ra.

⁴⁵Yucuan ta ra Josué nanduví ra nuu chi ñu. Ta quehen ñu vehe ñuhu ta chicoo ñu chihin nu nyaá yo ihya vityin. Vatyí Nyoo tava ñehe ra chi ñáyivi chiyó ñuhu ihya ta nacuhva cuenda ra chi ñu Israel ñáyivi chi yo. Ta chotyíño ñu vehe ñuhu cuan nyacua nya quívi chiyó rey David.

⁴⁶Ta rey David ñihí ra tumañi iñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnü ra Jacob ta cha naha. ⁴⁷Soco ra Salomón savaha vehe Nyoo. ⁴⁸Vasi ña iyó Nyoo chichi vehe ñuhu cha savaha ñáyivi. Tari catyí ra chihin yuhu ra profeta ta cha naha tyehe caa:

⁴⁹Andívi cuví tyayu nu nyaí ta nyacá ñahi tandíhi. Ta ñuhu ñayiví, yucuan cuví nu chañí chahi.

¿Atu cuví savaha ndo vehi ta coi chichi, cuñí maa ndo?

¿Ta nya maa maa cuví nyitati, cuñí maa ndo?

⁵⁰¿Atu ña chitó ndo vatyí mai savahi andívi ta ñuhu ñayiví? catyí Nyoo.

⁵¹Soco nyoho —catyí ra Esteban— tyicuan ri tuhva ndo sandava ndo iñi ndo. Ta ña cuñí ndo naquehen ndo tuhun cahán Nyoo. Tyicuan ri ña quichahá ndo chi Tatyí li. Inuu ri caa ndo chihin sutu

chahnu ndo. ⁵² Sutu chahnu ndo satasi iñi ra ta cachahñi ra chi tandihi ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichi ra vityin, nyoho ña cuiñi nyehe ndo chi ra, ta cachahñi ndo chi ra. ⁵³ Nyoho naquehen cuenda ndo ley Nyoo cha chaha ángel chi ndo, soco ña cuiñi ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴ Cuhva cha chiñi ra cacuvi tyiño vehe ñuhu cahnu tuhun ihya, xaan xaan cuiñi ra, nyacua casacahñi noho ra nyehé ra chi ra Esteban. ⁵⁵ Soco ra Esteban tyitú cuii maa ra chihin Tatyí Ii ta nanyehé ra ityi andivi. Ta nyehé ra cha cahnu cuví Nyoo. Ta suri nyehe ra chi ra Jesús nanyaá ra chiyo vaha Nyoo. ⁵⁶ Tyicuan ta catyí ra Esteban:

—¡Nyehe ndo! Nyehe tanuña andivi. Ta nyehí chi ra Jesús, Rayii cha quichi nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuiñi ra tuhun cahán ra Esteban. Tyicuan ta vaa ri cananduvi ra. Ta tandihi ra cuahan coyo ra siqui ra Esteban. ⁵⁸ Tyicuan ta catava ra chi ra yuhu ñuu. Ta ca chahñi ra chi ra chihin yuu. Ta ra cha casacuví cha ña vaha cuan, casando ra sahma cha nyaa chata ra vatyí sahacumi noo ra tyivaa cha nañi Saulo. ⁵⁹ Cha niri ca cha cacañi ra yuu chi ra Esteban, quichaha chican tahvi ra Esteban chi Nyoo, vatyí tuvi iñi ra cuacuí ra. Ta catyí ra tyehe caa:

—Sutu Mañi yuhu Jesús, naquehen añime —catyí ra.

⁶⁰ Yaha cuan, tyicuan ta chicuñi chiti ra, ta chaa canacha ra ta catyí ra:

—Sutu Mañi yuhu, ma tiin cuendon cuatyí cha sacuvi ñu —catyí ra.

Ta cha yaha catyí ra tyehe caa, ta chihí ri ra.

Nu chicá nyicon ra Saulo chi ñáyivi yihí cuenda ra Cristo

8 Ta ra Saulo ña chinó iñi ra chi ra Jesús, ta ndoó ra vaha cha chahñi ra chi ra Esteban.

Ta suri quivi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyí cucahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandihi ca ñu cachino ñu, cuahan coyo ñu cuacoo ñu ityi Samaria, ta ityi Judea. ² Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra. ³ Cha niri ca cha tyicuan caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoño ñaa ra chi ñu, ta chaha cuenda ra chi ñu vatyí cohon ñu vehe caa, rayii ta ñusihi.

Nu cacahán ñu tuhun ra Cristo ityi Samaria

⁴ Soco tandihi ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihi ri maa ityi nu cha coyo ñu. ⁵ Minoo ra cha nañi Felipe cha ra noo ñuu ityi Samaria. Ta quichaha cahan ra tuhun ra Cristo chihin ñu. ⁶ Ta tandihi ri ñáyivi ta tyasohó ñu tuhun cha cahán ra. Ta nyehé ñu milagru ta seña cha savahá ra. ⁷ Vatyí cuaha vavaha ñáyivi cha yihí tatyí ña vaha chii nduvaha ñu. Vatyí tatyí ña vaha cha yihí chi ñu, quita chi ta suri canacha chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu. ⁸ Yucuan chaha ñáyivi ñuu cuan, sii xaan cacuvi chi ñu.

⁹ Soco ñuu Samaria cuan iyó noo ra tasi cha nañi Simón. Ta sandaví ñaha ra chi ñáyivi cuan. Catyí ra vatyí cuví ra noo ra cahnu. ¹⁰ Ndií cuii maa ñáyivi

tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuii, vatyí tunyee iñi Nyoo nyaá chihin ra ihya —catyí ñu.

¹¹ Quichahá xaan ñu tuhun cahán ra vatyí cha naha xaan sandaví ñaha ra chí ñu chihin tuhun tasi. ¹² Tyicuan ta quichi ra Felipe. Ta sacoto ra chí ñu yoso caa nyacá ñaha Nyoo añima ñáyivi. Ta yoso cuhva cha cahnú cuví ra Jesucristo. Ta yucuan ta chino iñi ñu chí ra Cristo, rayii ta ñusihí. Ta condutyá ñu. ¹³ Nyacua nya ra Simón cuan, ta nachino iñi ra chí ra Cristo, ta condutyá ra. Ta quichahá chicanoo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴ Tyicuan ta ra apóstol cha canyicú ñuu Jerusalén cuan ñihí ra tuhun cha canachinó iñi ñáyivi ityi Samaria cuan tuhun Nyoo. Ta catachí ra chí ra Pedro ta chí ra Juan. ¹⁵ Cuhva cha chaq coyo ra yucuan, ta chican tahvi ra chaha ñu quihví cuenda ra Cristo vatyí tacuhva tyi naquehen ñu Tatyí Ii. ¹⁶ Vatyí ñu cuan, ta naquehen ca ñu Tatyí Ii. Tacuhva condutyá ri ñu chihin sivi Sutu Mañi yo Jesús. ¹⁷ Tyicuan ta ra Pedro ta ra Juan catyiso ra ndaha ra siquí ñu, ta naquehen ñu Tatyí Ii. ¹⁸ Ta ra Simón cuan nyehe ra cuhva cha catyiso ra apóstol ndaha ra siquí ñu cuan, ta naquehen ñu Tatyí Ii. ¹⁹ Ta quichahá catyí ra tyehe caa:

—Yoso xuhun cuñi ndo ta cuhva ndo tunyee iñi chiña chii, vatyí tacuhva cuví tyise ndahi siquí ñáyivi, ta naquehen tucu ñu cuan Tatyí Ii —catyí ra Simón cuan chí ra apóstol.

²⁰ Tyicuan ta nacahan ra Pedro ta catyí ra:

—Na cunaun iin ri chihin xuhun chiña. Vatyí chicá iñun tyi cuví sata yo chihin xuhun nyatu cha chahá maa Nyoo chí yo. ²¹ Yoho, ña tahán chí tyihun chuun chihin tuhun ihya. Vatyí añimon ña vaha nuu Nyoo. ²² Ndu uvi iñun cuhva chicá

xiñun chiña, vatyí cahnú cha quiñi caa cuví cuan nuu Nyoo. Ta cacan tahvi chí ra na nyehe yo tatu saha ra ticahnú iñi chuun cha cuenda cha caa chichi añimon. ²³ Vatyí nyehí tyi chichi añimon tyitú maa yihí cha quiñi caa cha cuví tari cha uva. Ta cha quiñi caa cuan, ña chahá coton cha vaha. —catyí ra Pedro chí ra Simón cuan.

²⁴ Tyicuan ta nacahan ra Simón ta catyí ra:

—Cacan tahvi maa ndo cha cuende nuu Nyoo, ta cuhva cha ma quichi tandihí tuhun cha catyún chiña siquí —catyí ra Simón chí ra Pedro.

²⁵ Cha yahá cuan ta ra apóstol nacatyí ra tandihí cha nyehe ra cha sacuví ra Cristo. Ta cahan ra tuhun Nyoo. Tyicuan ta cuanuhú coyo ra nya Jerusalén. Ta suri sacoto ra tuhun yoso caa sacuví yo ta cacu añima yo tandihí ñuu ityi Samaria nu yahá ra.

Nu cahán ra Felipe tuhun Nyoo chihin noo ra Etiopía

²⁶ Cha yahá tuhun cuan tyicuan ta cahan noo ángel Nyoo chihin ra Felipe, ta catyí ra:

—Ndicuita ta cahun ityi sur, ityi quita nya Jerusalén ta cuahan nya Gaza —catyí ángel cuan chí ra.

Yucuan cuví ityi cha yahá noo ñuhú ityi. ²⁷ Tyicuan ta ra Felipe ndicuita ra ta cuahan ra. Ta ityi cuahan ra ta ñihí tahan ra chihin noo ra ñuu Etiopía. Ta cuví ra eunuco. Cuví ra noo ra cuví tyiño cahnú ñuu Etiopía, vatyí sahá cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnú ra chí Nyoo nya Jerusalén. ²⁸ Ta ityi cuanuhú ra nya ñuu ra nyaá ra siquí carru ra. Ta sacuahá ra libru cha tyaq ra Isaías ra profeta cuenda Nyoo ta cha naha. ²⁹ Tyicuan ta Tatyí Ii catyí chí ra Felipe:

—Satuhva ca nu cuahan carru cuan.

³⁰Ta cuhva cha tuhva ra Felipe, chiñi ra vatyí sacuahá ra cuan nu libru cha tyaa ra Isaías. Ta ndaca tuhun ra chi ra: —¿Atu cutuñi iñun cha sacuahún? —catyí ra.

³¹Tyicuan ta nacahan ra cuan ta catyí ra: —¿Yoso caa cutuñi iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³²Ta nu cuahan sacuahá ra, catyí chi tyehe caa: Chahñi ra chi ra tari chahñi ra noo mbee. Vatyí tari ña chacú mbee tatu cuasatya ra ixí ti, ta tari ña chacú ti tatu chahñi ra chi ti, tyicuan caa cuví ra cuan tyi nyehe ra tindoho ta ñahri maa catyí ra.

³³Sanocuee ñu chi ra ta yori cuñi sacacu chi ra.

¿Yóo ra cuvi nacatyí tuhun sehe ra cha cuacoo? Yori, vatyí chihí ra.

Catyí chi nu tutu cha sacuahá ra cuan.

³⁴Tyicuan ta ra cuan quichahá ndaca tuhun ra chi ra Felipe, ta catyí ra:

—Saha tumañi iñi chii, ta catyun chiin chii yóo chi tuhun cahán ra profeta ihya. ¿Atu tuhun maa ra, o yóo chi tuhun cahán ra? —catyí ra chi ra Felipe.

³⁵Tyicuan ta ra Felipe quichahá cahan ra siqui tuhun cha cha yahá sacuahá ra cuan, ta nacatyí ra chi ra vatyí tuhun ra Jesús cahán ra cuan. Ta nacatyí ra vatyí ra Jesús cuví ra cha sacacú chi yo. ³⁶Tyicuan ta cha cuayaha ra noo nu ñohó ndutya. Ta ra cuan quichahá catyí ra chi ra Felipe:

—Ihya ñohó ndutya. ¿Atu ma cuvi condutye vityin? —catyí ra.

³⁷Tyicuan ta nacahan ra Felipe, ta catyí ra:

—Tatu chinó iñun chihin cha tandihi añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸Tyicuan ta ra cuan catyí ra chi musu ra na sacucuiñi ra carru cuan. Tyicuan ta canoo nduvi tahan ra. Ta caquihvi ra chi ndutya. Tyicuan ta sacondutya ra Felipe chi ra. ³⁹Ta cuhva cha caquita coyo ra chichi ndutya cuan, Tatyí Ii Sutu Mañi yo naquehen chi chi ra Felipe. Ta ra cuan ña nyehe ca ra chi ra. Soco sii xaan cuví chi ra, cuanuhu ra. ⁴⁰Ta ra Felipe chaa ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha chaa ra ñuu Cesarea.

Nu nachinó iñi ra Saulo chi ra Cristo

(Hch. 22.6-16; 26.12-18)

9 Cha ni ri ca cha chicá noo ra Felipe cahán ra tuhun ra Cristo chihin ñáyivi, ra Saulo ña sandihí ra tuhun cha nducú cahñi ra chi ñu yihí cuenda Sutu Mañi yo. Ta chahan ra nu nyaá ra cuví nuu chi tata sutu, ²chicacan ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tiin ra chi ñu cuahan ityí ra Cristo, ta quichi nyaca ra chi ñu vehe caa Jerusalén, rayii o ñusihi. ³Ñihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuii ri iñi ra, ta quichí noo nduva ñuhu ityí andivi, sacundichin nichico maa nu cuahan ra. ⁴Tyicuan ta ra Saulo nduva ra nu ñuhú. Ta chiñi ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chi yuhu? —catyí ndusu cuan chi ra.

⁵Tyicuan ta nacahan ra Saulo ta ndaca tuhun ra chi ra ta catyí ra:

—¿Yóo yoho Tata? —catyí ra.

Tyicuan ta nacahan ndusu cuan chihin ra, ta catyí:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quití tahví ñuhu chi ti cha chañí nyaa ti nu noo cha xaan cha saquehen ityi ra chi ti —catyí ra Jesús chi ra.

⁶Tyicuan ta ra Saulo suri nihi ra chihin cha yuhví ra. Ta catyí ra:

—Sutu Mañi yuhu, ¿ñáá cha cuñún tyi sacuvi? —catyí ra.

Tyicuan ta Sutu Mañi yo catyí ra chi ra tyehe caa:

—Ndícuita ta quíhvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chi ra Saulo.

⁷Ra cha candíhi chihin ra Saulo, yuhví xaan ra cacuvi. Ta ña cañihí ra tuhun cahan ra vatyí cachiñí ra ndusu cuan soco yori chi nyehe ra. ⁸Tyicuan ta ra Saulo ndícuita ra. Soco cuhva cha nuñá ra chiti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindahá ra ndaha ra ta chinyaca ra chi ra ñuu Damasco cuan. ⁹Yucuan chinyaa ra uñi tahan quívi. Ta ña cuví nyehe ra. Ta niri ña chachi ra, ta ña chihí ra ndutya.

¹⁰Ñuu Damasco cuan iyó noo ra chinó iñi chi Nyoo. Ta nañí ra Ananías. Ta nyehe ra noo visión nu catyí Sutu Mañi yo chi ra tyehe caa:

—¡Ananías! —catyí ra chi ra.

Tyicuan ta nacahan ra Ananías, ta catyí ra:

—Ma yuhu ihya, Sutu Mañi yuhu —catyí ra chi ra.

¹¹Tyicuan ta Sutu Mañi yo catyí ra:

—Ndícuita, ta cūhun noo ityi cahnu cha nañi Ndo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo. ¹²Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví

nanyehe ra inga chaha —catyí Sutu Mañi yo chi ra Ananías.

¹³Tyicuan ta nacahan ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuví ra Saulo cuan chihin ñu yihi cuendon nya ñuu Jerusalén. ¹⁴Ta vityin vachi tucu ra ihya vatyí chaha ra cacuvi nuu chi tata sutu ityi chi ra cha tyihi ra chi ñáyivi chicán tahvi chihin sivun vehe caa —catyí ra Ananías chi Sutu Mañi yo.

¹⁵Soco Sutu Mañi yo catyí ra chi ra:

—Cuahan vatyí yuhu cha nacachi vahi chi ra Saulo cuan, vatyí cahan ra tuhun chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñandíhi. ¹⁶Yuhu cusañahi chi ra yoso caa cha cuaha tindoho cunyehe ra cha cuende —catyí Sutu Mañi yo chi ra Ananías.

¹⁷Tyicuan ta cuahan ra Ananías vehe nu nyaá ra Saulo. Chaa ra vehe cuan ta quíhví ra chichi vehe. Ta tyiso ra ndaha ra siqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuví nuun ityi vachun, ican ra tachi chii vatyí tacuhva cuví nanyehun inga chaha. Ta cusacutu ra chuun chihin Tatyí Ii ra —catyí ra Ananías chi ra Saulo.

¹⁸Caa cuhva ri cuan ta cana coyo noo cha tari caa soo tiyaca cha yihí chiti nuu ra Saulo. Tyicuan ta cuví nanyehe ra inga chaha. Yahá cuan ta condutya ra. ¹⁹Yahá cuan ta chachi ra. Ta ndunye coño ñuhu ra inga chaha. Ta ndoo ra suhva quívi chihin ñu yihí cuenda ra Cristo ñuu Damasco cuan.

Nu quichaha cahan ra Saulo tuhun ra Cristo chihin ñáyivi ñuu Damasco

²⁰Tyicuan ta numi ri quichaha cahan ra Saulo tuhun ra Cristo chihin ñáyivi

tandihí vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chi ra. ²¹ Ndií cuii maa ñáyivi cha chiñi tuhun cahán ra, iyo vavaha cuñí ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi tiin chi ñu ityi tyehe vatyí cucuhva cuenda ra chi ñu chi ra cacuví nuu chi tata sutu? —catyí ñu.

²² Soco ra Saulo ñihi ca cahán ra tuhun ra Cristo chihin cha ñii ca iñi ra. Ta sañahá ra vatyí ra Jesús cuví ra Cristo, Sehe Nyoo. Nyacua ña cutuñí iñi ra Israel nyicú Damasco cuan nya ityi chino iñi ra.

Nu chinqo xehe ra Saulo chi ra Israel

²³ Cha yaha suhva quivi, ta ra Israel cha ña chinó iñi chi ra Cristo catyihí tahan ra tuhun cha cahñi ra chi ra Saulo.

²⁴ Ta ndiyaca ta ñiyaca canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan. ²⁵ Tyicuan ta ñáyivi cha chinó iñi chi ra Cristo ñuu cuan catyihí ñu chi ra chichi noo tica cahnu. Ta noo cha cuaa casanoo ñu chi ra ityi ventana noo vehe cha cacú chihin barda cha nyaá nicachico yuhu ñuu cuan. Ta tyicuan caa chinqo ra cuahan ra.

Nu ñohó ra Saulo Jerusalén

²⁶ Quivi cha chaq ra Saulo Jerusalén, cuñi ra ndu iin ri ra chihin ñu yihí cuenda ra Cristo. Soco tandihí maa ñu cuan ta yuhvi ñu chi ra. Vatyí ña chinó iñi ñu cha yihí ra cuenda ra Jesús. ²⁷ Soco noo ra cha nañí Bernabé, naquehen ra chi ra. Ta chahq cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cahán Sutu Mañi yo chihin ra. Ta yoso caa cahán ra tuhun ra

Cristo chihin cha ña yuhvi ra nya ñuu Damasco cuan. ²⁸ Tyicuan ta ndoo ra Saulo Jerusalén chihin ñu yihí cuenda ra Cristo. ²⁹ Ta cahan ra tuhun Sutu Mañi yo chihin cha ña yuhvi ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducú ra cuhva yoso caa ta cacahñi ra chi ra. ³⁰ Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachi ra chi ra nya Tarso ñuu ra.

³¹ Tyicuan ta ñu yihí cuenda ra Cristo cha nyicú tandihí ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeé ca iñi ñu chihin fuerza Nyoo vatyí quichahq vaha ñu cuhva catyí Nyoo, vatyí yuhví ñu coto ma sacuvi ñu cuhva cuñi ra. Iyó ñu chihin cha tyinyeé Tatyí li chi ñu. Ta cuaha xaan ñu cuahan nanduvi.

Nu nduvahq ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañí Lida. ³³ Yucuan nañihí ra chi noo ra cuhvi. Nañi ra Eneas. Ta cha uña cuiya catuví ra ña cuví nacanda ra vatyí ndundava coño ñuhu ra. ³⁴ Soco ra Pedro catyí ra chi ra:

—Yoho Eneas, ra Jesucristo sanduvahq ra chuun. Ndícuita ta natuvi yuvun —catyí ra chi ra.

Tyicuan ta caa cuhva ri cuan ndícuita ra Eneas. ³⁵ Ta nyehe tandihí ñáyivi ñuu Lida cuan tyi nduvahq ra. Ta ñáyivi ñuu Sarón ñandihí. Tyicuan ta ñu cuan nachinqo iñi ñu chi Sutu Mañi yo. Ta sandoo ñu tuhun chahnu cha chinqo iñi ñu ta cumañi ca coto ñu tuhun ra Cristo.

Nu nandoto cu Dorcas

³⁶ Quivi cuan chiyo noo ñaha chinó iñi chi ra Cristo ñuu Jope. Ta nañi ña Tabita, soco chihin sahan griego, Dorcas nañi ña. Ta tyicuan ri sacuvi ña cha vaha chihin ñáyivi. Tyinyeé ña chi ñu ndahvi. ³⁷ Ta quivi cuan cu Dorcas quehen noo cuehe chi ña ta chihí ña. Ta cha yahá sacutyi ñu chi ña, chicacun ñu chi ña chichi noo cuarto nu cu uvi piso. ³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sanumi ta ma cucueun —catyí ra chi ra.

³⁹ Tyicuan ta ra Pedro ndicuita ra ta cuahan ra chihin ra. Ta cuhva cha chaa ra, chinyaca ra chi ra nya cuarto nu caa ndíyi cuan. Ta tandíhi maa ñu chihí yíi catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña. ⁴⁰ Tyicuan ta ra Pedro tava ra chi tandíhi ñáyivi cuarto cuan. Tyicuan ta chicuñi chiti ra ta quichaha chican tahvi ra chi Nyoo. Tyicuan ta nanyehé ra chi ñaha chihí cuan catuvi ña. Ta quichaha catyí ra chi ña:

—Hermana Tabita, ndicuita —catyí ra chi ña.

Tyicuan ta nandica ña chiti nuu ña. Ta cuhva cha nanyehé ña chi ra Pedro, niconyaa ña. ⁴¹ Tyicuan ta ra Pedro tijn ra ndaha ña ta sandicuita ra chi ña. Tyicuan ta cana ra chi ra hermano, ta chi ñu chihí yíi. Ta nacuhva cuenda ra chi ña chi ñu vatyí nandoto ña. ⁴² Yahá cuan ta ndii cuii maa ñu Jope chitó ñu cha nandoto ña cuan. Ta cuaha vavaha ñu nachino iñi chi Sutu Mañi yo. ⁴³ Ta ra Pedro ndoo ra

cuaha ri quivi ñuu cuan. Nyaá ra vehe noo ra satyahyu ñii. Nañi ra Simón.

Ra Pedro ta ra Cornelio

10 Ñuu Cesarea iyó noo ra cha nañi Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañi. ² Ta ra Cornelio cuan yuhvi ra chi Nyoo ta vaha sacahnú ra chi ra, maa ra ta ñáyivi chi ra ñandíhi. Ta siin ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo. ³ Ta cuví noo quivi cuan cuhva cha caa uñi cha cha iñi, nyehe ra noo visión. Ta yucuan cuví nu cachi xaan nyehe ra vatyí noo ángel cha tachí Nyoo quihvi nu nyaá ra, ta catyí ra chi ra:

—¡Yoho Cornelio! —catyí ángel cuan chi ra.

⁴ Tyicuan ta nanyehé ra Cornelio chi ángel cuan. Ta yuhvi xaan ra cuví. Ta quichaha ndaca tuhun ra ta catyí ra:

—¿Ñáa cha cuví ihya, Tata? —catyí ra chi ángel cuan.

Tyicuan ta ángel cuan quichaha catyí ra chi ra:

—Nyoo chiñi ra ndii cuii maa cha chicón chi ra. Ta tahán iñi ra vatyí tyinyeé xaan chi ñu ndahvi. ⁵ Ta vityin cuñi chi cha tachun tyiño nya ñuu Jope na cuquehen chi noo ra cha nañi Simón Pedro. ⁶ Ta maa ra cuan cucatyí ra chuun ñáa cha tahán chi sacuvun. Ta iyó ra vehe noo ra cha nañi tucu Simón, cuví ra noo ra satyahyú ñii. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷ Ta cha yahá cuahan ángel cuan, ra Cornelio cana ra chi uvi tahan musu ra, ta chi noo sindaro cha chinó xaan iñi chi Nyoo. Ta cuví tucu ra noo ra sahá cuenda chi ra Cornelio ñandíhi. ⁸ Ndií cuii tuhun cahan ángel cuan chihin ra Cornelio ta nacatyí ra chi nduñi tahan ra cuan. Ta tachí ra chi ra ñuu Jope.

⁹Tuv̄i inga quiv̄i ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyí cuacacan tahvi ra chi Nyoo, ta cha cuñí hora cuv̄i cuhva cuan. ¹⁰Ta chaa noo soco chi ra ta chisocó vavaha ra. Soco cha niri ca cha sanduvahá ñu cha cachi ra, quichahā nyehe ra noo visión. ¹¹Ta nyehe ra vatyí nicuitacoho andiv̄i. Ta nyehe ra cua noo noo sahma cahnu vavaha ityi andiv̄i. Ta tari quiv̄i nuññi noo noo tutun sahma cuan ta cuahan noo ityi nu ñuhu. ¹²Ta chichi sahma cuan ñohó tandih̄i maa nuu quit̄i cha cumi tahan chaha. Ta tandih̄i nuu coo, ta tandih̄i nuu saa. ¹³Tyicuan ta chiñi ra noo ndusu cha catyí chi ra:

—Pedro, nd̄icuita ta cah̄ñi quit̄i ihya, ta cachun —catyí ndusu cuan chi ra.

¹⁴Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quit̄i cha catyí ley tyi yica cha cachi ndi —catyí ra Pedro.

¹⁵Tyicuan ta quichaha catyi tucu ndusu cuan chi ra inga chaha:

—Ma catyun vatyí yica cha cachun noo cha cha yahā sanduvij̄i yuhu —catyí ndusu cuan chi ra Pedro.

¹⁶Uñi tahan chaha sañahā Nyoo visión ihya chi ra. Tyicuan ta sahma cahnu cuan nandaq̄ cuanuhu tucu ityi andiv̄i.

¹⁷Cha niri ca cha chicá xiñi ra Pedro ñáá cha cuñí chi catyi visión cuan, chaa coyo musu cha tach̄i ra Cornelio. Ta candaca tuhun ra nya nyaá vehe ra Simón.

¹⁸Ta cha chaa coyo ra ityi yuvehe candaca tuhun ra tatu yucuan iyó noo ra cha nañí Simón Pedro. ¹⁹Ta ra Pedro suri cha chicá xiñi ra ñáá cha cuñí chi catyi visión cha nyehe ra. Tyicuan ta Tatyí Ii quichahā catyi chi ra:

—Nyehe Pedro, uñi tahan ra nanducú chuun. ²⁰Nd̄icuita ta cūhun chihin ra, ta ma quih̄i uvi iñun vatyí mai tach̄i chi ra ihya —catyí Tatyí Ii chi ra.

²¹Tyicuan ta ra Pedro noo ra nu canyicu ra cha tach̄i ra Cornelio, ta catyí ra chi ra:

—Yuhu cuv̄i ra nanducú ndo. ¿Ñáá tyiño vachi ndo?

²²Tyicuan ta canacahan musu ra Cornelio ta catyí ra:

—Ra Cornelio, ra cuv̄i capitán chi ndi ican tach̄i chi ndi. Noo ra vaha xaan ñáyiv̄i cuv̄i. Ta vaha xaan quichahá ra nu cahán Nyoo. Ta tandih̄i maa ra Israel ityi Judea ihya cacuñí ra chi ra chaha cha cuenda cha vaha ñáyiv̄i cuv̄i ra. Ta noo ángel Nyoo catyí chi ra vatyí na cana ra chuun, vatyí cūhun vehe ra vatyí tacuhva cuiñi ra tuhun cha cuacahun —cacatyí musu ra Cornelio chi ra Pedro.

²³Tyicuan ta chahā ra Pedro quihvi coyo ra chichi vehe. Ta candoo ra chihin ra cha cuaa cuan. Ta cha inga quiv̄i cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandih̄i.

²⁴Cha inga quiv̄i chaa coyo ra nya Cesarea nu nyatú ra Cornelio chi ra chihin ñáyiv̄i chi ra, ta chihin tandih̄i ra tahan ra. ²⁵Cuhva cha chaa ra Pedro vehe ra, ra Cornelio quit̄a ra ta cahan ra chihin ra. Ta chicuiñi chit̄i ra nuu ra ta quichaha sacahnu ra chi ra. ²⁶Soco ra Pedro nacoñeh̄e ra chi ra, ta catyí ra chi ra:

—Nd̄icuita vatyí noo rayīi ri cuv̄i yuhu tari yoho, ta ñima Nyoo cuv̄i —catyí ra chi ra.

²⁷Ta cha niri ca cha cahán ra chihin ra, quihv̄i ra ta nanyehe ra cuaha ñáyiv̄i candu iin ri. ²⁸Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuv̄i ndi ñu Israel, ña chahá chi cha cu iin ri ndi chihin ñáyiv̄i inga ñuu. Ta ni ri chichi vehe ñu ta ma cuv̄i quihvi ndi. Soco Nyoo sañahā ra chii, ta catyí ra: “Yoho, ma catyun chi ni noo ñáyiv̄i tyi ña vaha ñu”, catyí Nyoo chii. ²⁹Yucuan

chaha quiví cha caná ndo chii, numi ri vachi. Ta vityin cuñí cote ñáá cuenda caná ndo chii —catyí ra Pedro chi ra Cornelio.

³⁰Tyicuan ta nacahan ra Cornelio, ta catyí ra:

—Cha iyó cumi quiví vityin, suri maa kuhva ihya cha nyaí vehi ta ña chachí ta chicán tahvi chi Nyoo cha cha iñi. Ta tuví noo ra nui. Ñihno ra noo sahma xiño vavaha. ³¹Ta catyí ra chii: “Yoho Cornelio, Nyoo chiñí ra cha chicán tahvun. Ta nicohón iñi ra cha sacuvún vatyí tyinyeún chi ñu ndahvi. ³²Tachí tyiño nya ñuu Jope na quichi ra Simón Pedro. Nyaá ra vehe inga tucu ra cha nañí Simón, noo ra cha satyahyu ñii. Ta vehe ra nyaá vatyin ri yuhu tyañuhu. Ta na quichi ra Simón Pedro ta cahan ra chuhun”, catyí ángel cuan chii. ³³Tyicuan ta numi ri tachí tyiño vatyí cuquehen chuun. Ta vaha vatyí vachun. Ta vityin tandíhi yo nyicú yo nuu Nyoo. Ta cuñí ndi cuiñi ndi tandíhi cuii maa cha tachí Sutu Mañi yo chuun vatyí nacatyun chi ndi.

Nu cahán ra Pedro tuhun ra Cristo vehe ra Cornelio

³⁴Tyicuan ta quichaha cahan ra Pedro ta catyí ra:

—Vityin cutuñi iñi vatyí Nyoo cuñí ra chi tandíhi ñáyivi. Cuví ri yo ñu Israel, o cuví ri yo ñu inga ñuu. ³⁵Soco naquehen ra chí yo tatu quichaha yo chi ra, ta sacuví yo cha vaha. ³⁶Cahan ra chihin nyuhu ñu vachi tata ra Israel, ta sacoto ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandíhi maa yo. ³⁷Nyoho chitó vaha ndo tandíhi cha cuví ñuu Israel ñui, yoso caa quichahá chi nu cuví Galilea cha yahá cha cahan noo ra Juan nuu ñáyivi, ta sacondutyá ra chi ñu. ³⁸Chitó ndo yoso caa chahá Nyoo tunyee iñi Tatyí Ii ra chí ra Jesús, ra Nazaret. Ta chicá noo

ra sacuví ra cha vaha, sanduvahá ra chí tandíhi ñu cha nyehé tindoho sahá ra ña vaha. Tyehe caa sacuví ra Jesús vatyí Nyoo nyaá ra chihin ra. ³⁹Nyuhu cuví ndi cha ndaa tandíhi cha sacuví ra Jesús nicahnu Judea ta ñuu Jerusalén. Yahá cuan ta chahñí ñu chí ra nu cruzi. ⁴⁰Soco sanandoto Nyoo chí ra nu cu uñi quiví. Ta tuví ra nuu ndi. ⁴¹Ña tuví ra nuu tandíhi ñáyivi. Soco tuví ra nuu nyuhu vatyí nacachí ra chí ndi nyata ityí chata ca vatyí cuví ndi cha ndaa cuenda ra. Nyuhu chachí ndi ta chihí ndi chihin ra cha yahá cha nandoto ra. ⁴²Ta tachí ra chí ndi vatyí cahan ndi tuhun ra chihin ñáyivi. Ta cuví ndi cha ndaa vatyí Nyoo cuatyaá ra chí ra Jesús tyi cuví ra juez chí ñu cha nyitó ta ñu cha chihí. ⁴³Ta tyicuan caa tucu nyata ityí chata ca, cacahan tandíhi ra profeta Nyoo tuhun ra Jesús. Ta cacatyí ra vatyí tandíhi ñu cha chinó iñi chí ra Jesús, cusandachi Nyoo cuatyí ñu cha cuenda maa ra.

Nu naquehén ñu Tatyí Ii ta ñima ñu Israel cuví ñu

⁴⁴Ni cahán ca ra Pedro ta noo xica ri Tatyí Ii siquí tandíhi ñu tyasohó tuhun cahán ra. ⁴⁵Ta ra Israel cha cayihí cuenda ra Jesús cha chaá coyo chihin ra Pedro iyo xaan cuñí ra vatyí chahá tucu Nyoo Tatyí Ii ra chí ñu cha ñima ñu Israel cuví. ⁴⁶Chitó ra tyí tyicuan caa cuví vatyí chiñí ra cahán ñu inga sahan, ta sacahnú ñu chí Nyoo. ⁴⁷Tyicuan ta quichahá catyí ra Pedro chí ra cha chaá coyo chihin ra:

—Ma cuví casi yo nu condutya ñáyivi ihya. Vatyí cha naquehen tucu maa ñu Tatyí Ii tari maa yo —catyí ra chí ra.

⁴⁸Tyicuan ta tachí ra Pedro chí ñu ni ñihí Tatyí Ii na condutya ñu chihin sívi ra Jesucristo. Tyicuan ta chacu ndahvi ñu nuu ra Pedro vatyí cuñí ñu cha ndoo ra suhva quiví chihin ñu.

**Nu nacatyí ra Pedro chi ñu yihí
cuenda ra Cristo Jesús nya
Jerusalén yoso caa cuahan
chitya tuhun ra inga ñuu**

11 Ra apóstol ta inga ra hermano cha nyicú Judea, ñihí ra tuhun vatyí nyacua nya ñu cha ñima ñu Israel cuví ta naquehén ñu tuhun Nyoo. ²Tyicuan ta nachaa ra Pedro Jerusalén. Ta ra cha catyí vatyí cuñí chi cha sacuví yo costumbre circuncisión ta cuhva cuvi cacu yo, xaan xaan cuñí ra nyehe ra chi ra Pedro. ³Ta cacatyí ra chi ra tyehe caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴Tyicuan ta ra Pedro nacatyí ra nya nu quichaha tandihi cha cuví chi ra ta catyí ra:

⁵—Yuhu nyaí ñuu Jope. Ta cuhva cha chicán tahvi chi Nyoo ta nyehí noo visión. Ta nyehí tari noo sahma cahnu cha noó ityi andívi. Tari cha nuhñí noo noo tutun ta cuahan noo ityi nu ñuhú nu nyaí. ⁶Ta nanyehe vahi ñáá cha ñohó chichi. Ta nyehí quití cha cumi chaha, quití cuhu, ta coo, ta saa. ⁷Ta chiñí noo ndusu cha catyí chii: “Ndícuita Pedro. Cahñí quití ihya ta chahun”, catyí ndusu cuan chii. ⁸Ta nacahin ta catyí tyehe caa: “Sutu Mañi yuhu, ma cuvi, vatyí ni noo chaha ta ta cachi que coño quití quiñi caa.” ⁹Tyicuan ta ndusu andívi nacahan chi chihin inga chaha, ta catyí chi: “Ma catyí yoho vatyí ma chahun noo cha yahá sanduví”, catyí ndusu cuan chi. ¹⁰Uñi chaha cuví tyehe caa. Yaha cuan ta nandaq tandihi chihin sahma cuan ityi andívi. ¹¹Ta caa cuhva ri cuan chaq coyo uñi tahan ra vehe nu nyaí, quitá ra ñuu Cesarea ta nanducu ra chii. ¹²Ta Tatyí Ii tachí chii na cuhin chihin ra. Ta catyí ra chii tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin.

Ta cha chaq ndi nya Cesarea quihví ndi chichi vehe noo ra. ¹³Ta nacatyí ra cuan chi ndi yoso caa nyehe ra chi noo ángel chichi vehe ra. Nanyaá ángel cuan ta catyí ra chi ra vatyí na tachi ra musu ra ñuu Jope na cana ra chi noo ra cha nañi Simón Pedro. ¹⁴Vatyí ican ra cucatyí ra chi ra yoso caa cacu añima ra ta añima tandihi ñáyivi chi ra, catyí ángel cuan chi ra cuan na. ¹⁵Ta sacuví ra cuan tari cuhva catyí ángel cuan chi ra. Ta cuhva cha chaq vehe ra quichaha cahín chihin ñu. Ta quichí ri Tatyí Ii siquí ñu tari quichí siquí yo cha xihna ri. ¹⁶Tyicuan ta nicohon iñi cha catyí Sutu Mañi yo quívi cuan. Ta catyí ra tyehe caa: “Ndicha vatyí ra Juan sacondutya ra chi ñáyivi chihin ndutya. Soco nyoho cucondutya ndo chihin Tatyí Ii”, catyí ra. ¹⁷Nyoo chaha tucu ra Tatyí Ii ra chi ñu cuan tari chaha ra chi maa yo quívi chino iñi yo chi Sutu Mañi yo Jesucristo. Ta cha tyicuan caa ¿yóó ra cuvi yuhu vatyí casi cha sacuví Nyoo? —catyí ra Pedro chi ra.

¹⁸Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnú ra chi Nyoo. Ta cacatyí ra:

—Tu tyicuan caa cuví, cuñí chi catyí vatyí Nyoo chahá tucu ra chi ñu cha ñima ñu Israel cuví vatyí ndu uvi iñi tucu maa ñu cuatyí ñu, ta coo ñu ñáyivi cha ma naa ca maa —cacatyí ra.

**Ñu yihí cuenda ra
Cristo ñuu Antioquía**

¹⁹Quívi cha cachahñi ra chi ra Esteban, quichaha chica nyicon ra chi inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañi Chipre. Ta yihí ñu chaq coyo ñu ñuu Antioquía. Ta suri cahan ñu tuhun ra Cristo soco iñi ri maa chihin ñu Israel. ²⁰Ta chihin ñu cha

cuahan coyo cuan, ndihí suhva ñáyivi ñuhú Chipre. Ta yíhi tucu suhva ñu ñuu Cirene. Ta cha chaá coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añima yo. ²¹Ta tunyee iñi Sutu Mañi yo nyaa chihin ñu. Ta yucuan chaha cuaha ñáyivi casandoo ñu tuhun chahnu cha chingo iñi ñu. Ta nachino iñi ñu chi Sutu Mañi yo. ²²Tyicuan ta chaá tuhun cuan nya Jerusalén. Ta ñu yihí cuenda Cristo tachí ñu chi ra Bernabé na cahun ra nya Antioquía. ²³Ta cha chaá ra Bernabé Antioquía cuan, nyehe ra yoso caa nasocó Nyoo chi ñu. Ta ndusií xaan cuñi ra. Ta cahán ra nuu ñu na cunyicon ñu chi Sutu Mañi yo chihin cha ñi iñi ñu. ²⁴Tyicuan caa sacuví ra Bernabé vatyí cuví ra noo ra vaha. Tyitú ra chihin Tatyí Ii. Ta chinó xaan iñi ra chi Nyoo. Ta tyicuan caa ta cuaha ñáyivi quihví ñu cuenda Sutu Mañi yo. ²⁵Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihí ra chi ra, chinyaca ra chi ra nya ñuu Antioquía. ²⁶Ta cachinyicu ra chihin ñu yihí cuenda Nyoo ñuu cuan noo cuiya nanií ta sañaha ra tuhun Nyoo chi cuaha ñáyivi. Ta suri ñuu Antioquía cuan cuví nu quichaha catyí ñáyivi: Cristiano chi ñu, o ñu yihí cuenda ra Cristo cuví cuan.

²⁷Ta quívi cuan chaá coyo ra cachahá cuenda tuhun cahán Nyoo, ra cacuví profeta. Quita ra ñuu Jerusalén ta chaá coyo ra Antioquía. ²⁸Ta noo ra cuan nañí ra Agabo chicuinyaa ra nu nyicú ra yihí cuenda ra Cristo ta cahan ra tuhun cha chahá Tatyí Ii chi ra. Ta catyí ra vatyí cuquichi noo tama nicacahnu ñáyivi. Ta tyicuan caa cuví quívi chinyaa ra Claudio cuví ra rey cahnu. ²⁹Tyicuan ta ñu yihí cuenda Cristo nya Antioquía tyihí tahan ñu tuhun vatyí cucuhva ñu yoso cuhva cundaa iñi maa noo

noo ñu, vatyí cutyinyee ñu chi ñu yihí cuenda Cristo cha iyó ityí Judea. ³⁰Tyicuan caa sacuví ñu ta sacuhun ñu xuhun chi ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

Nu chihí ra Jacobo ta nu quihví ra Pedro vehe caa

12 Ta quívi cuan quichaha chica nyicon rey Herodes chi suhva ñu yihí cuenda ra Cristo. ²Ta tachí ra tyiño vatyí na cahñi ra chi ra Jacobo yañi ra Juan chihin mityí. ³Ta nyehe ra Herodes vatyí tahan xaan iñi ñu Israel cha sacuví ra tyicuan caa, ta tyihí ra tyiño vatyí tiin ndihí ra chi ra Pedro. Ta cuví chi noo quívi vico pascua nu tuhva ñu chachi ñu pan cha ñahri yuchan iya yihí chihin. ⁴Cha yaha cha tiin ra chi ra Pedro, tyihí ra chi ra vehe caa. Ta cumi ityí sindaro sahá cumi chi ra. Ta cumi sindaro cha noo ityí ra ta sahá cuenda ra suhva suhva cuhva chi ra. Ta tyaa ra Herodes cuhva vatyí nayahá vico cuan ta cucuhva cuenda ra chi ra chi ñáyivi. ⁵Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ní ri ca cha ñohó ra yucuan, ñu yihí cuenda ra Cristo chicán tahví xaan ñu nyita cuií ri maa cha cuenda ra.

Nu sacacu Nyoo chi ra Pedro vehe caa

⁶Ta tyaá ra Herodes cuhva vatyí cha ñaha ri inga quívi cuan cutava ra chi ra Pedro nuu ñáyivi. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñí ra chihin uvi cadena. Ta uvi ca sindaro canyicú ra yuvehe casahá cumi ra. ⁷Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tiin ra xiin ra Pedro. Ta sandoyo ra chi ra. Ta catyí ra chi ra:

—Sanumi. Ndícuita —catyí ángel cuan chi ra.

Tyicuan ta ndachí cadena cha nuñhi ndaha ra Pedro. ⁸Ta ángel cuan catyí ra chi ra:

—Nacuhñi vaha chichun ta natyihí ndichan chahun —catyí ángel cuan.

Tyicuan caa sacuví ra Pedro. Ta catyí ángel chi ra:

—Quehen sahmon ta tyauñ chaton ta quichun chate —catyí ángel cuan chi ra Pedro.

⁹Ta ra Pedro quitá ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyí visión nyehé ra. ¹⁰Soco cuahan ra chata ángel cuan ta cayahá ra noo nu sahá cumi sindaro. Tyicuan ta cayahá ra inga tucu nu casahá cumi sindaro cuan. Yahá cuan ta chaá coyo ra yuvehe caa cahnu nu quita ñáyivi ta quihvi ñu chichi ñuu. Ta yuvehe cuan nuña ri maa. Ta quitá coyo ra. Ta cha yahá yaha ra noo ityí cahnu, ta sandoq ángel cuan chi ra. ¹¹Tyicuan ta nacoto ra Pedro vatyí ndicha ta quichaha catyí ra:

—Ndicha, ñima visión cuvi. Soco maa Sutu Mañi yo tachí ra noo ángel vatyí sacacú ra chii ndaha ra Herodes ta ndaha ra Israel —catyí ra Pedro.

¹²Chicá xiñi ra tuhun ihya ityí cuahan ra. Ta chaá ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chí Nyoo. ¹³Ta cuhva cha sacachan ra Pedro yuvehe nuquehe, quitá noo ñaha tyivaa cha nañi Rode chinyehe ña yóo cha sacachan cuan. ¹⁴Soco cuhva cha nichohon soho ña ndusu ra Pedro, ña nuña ña yuvehe. Vatyí sii xaan cuñi ña, ta chino ña cua nacatyí ña. Ta catyí ña vatyí ra Pedro nanyaá ra yuvehe. ¹⁵Tyicuan ta quichaha catyí ñu chi ña:

—Loco yoho —catyí ñu chi ña.

Soco ña cuan catyí ña vatyí ndicha cha cahán ña. Soco ñu cuan catyí ñu tyí ñima ra Pedro cuví ra, soco ángel cuenda ra cuví, catyí ñu.

¹⁶Ta ra Pedro sañihí ca ra sacachan ra yuvehe. Ta cuhva cha nuña ñu ta nanyehe ñu chi ra, iyo xaan cuñi ñu ta yuhvi ñu cuvi. ¹⁷Soco savaha ra seña chihin ndaha ra nacutaxin ñu. Ta nacatyí ra chi ñu yoso caa tava Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chi inga yañi yo —catyí ra.

Ta quitá ra ta cuahan ra inga ityí. ¹⁸Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro. ¹⁹Tyicuan ta tachí ra Herodes cunanducu chi ra. Ta vatyí ña nañihí ra chi ra, tyicuan ta tachí ra na cacahñi ra chi ra sahá cumi vehe caa cuan. Yahá cuan ta quitá ra Herodes ityí Judea cuan ta cuahan ra ñuu Cesarea cuacoo ra.

Nu chihí ra Herodes

²⁰Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyí ñuu cha nyacá ñaha ra yucuan quitá cha cachi ñu. Tyicuan ta ndu jin ri ñu ta cuahan coyo ñu cuacutahan ñu chihin noo ra cha nañi Blasto. Ican ra sahá cuenda chi ra Herodes. Ta chicán ñu cha nduvaha coo ra Herodes chihin ñu. ²¹Tyicuan ta catyí ra Herodes vatyí cuhun ñu nu nyaá ra noo quivi. Ta chaá quivi cuan ta ndihvi noo ra sahma tyiño ra. Ta chicunyaa ra nu tyayu cahnu ra. Ta cahán noo ra nuu ñu. ²²Tyicuan ta quichaha canachaá ñáyivi, ta catyí ñu:

—Ra cha cahán ihya ñima noo rayii ri cuví ra. Nyoo cuví ra —catyí ñu.

²³Ta caa cuhva ri cuan noo ángel Sutu Mañi yo chahá ra noo cuehe chi ra Herodes vatyí chahá ra cha catyí ñáyivi tyi Nyoo cuví ra. Ta quihvi tindacu chi ra, ta chihí ra.

²⁴Soco tuhun Nyoo cuahan chitya ca. Ta cahán ñu tuhun Nyoo tandihí ri ityí.

²⁵Quivi cha ndihí tyiño saha ra Bern-

abé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

Nu quichaha cachicá ra Saulo ta ra Bernabé tyiño Nyoo

13 Vehe ñuhu Antioquia cuan iyó ra cacuví profeta Nyoo. Ta iyó tucu ra cha sañahá tuhun Nyoo chi ñáyivi. Ta sivi ra cuan ican cuvi ihya: Ra Bernabé, ra Simón Toon, ra Lucio ra ñuu Cirene, ra Manaén cha chahñu iin ri chihin ra Herodes cha cuví rey ityi Galilea, ta ra Saulo. ²Ta noo quivi nyicú tandihi ra ta casacahnú ra chi Sutu Mañi yo. Ta casahá ra ayunar: ña cachachi ra ta cananducu ra chi Nyoo cuví cuan. Tyicuan ta catyí Tatyí Ii chi ra:

—Tava siin ndo chi ra Bernabé ta ra Saulo cha cuenda tyiño cha cané chi ra —catyí Tatyí Ii chi ra.

³Tyicuan ta cha ndihi saha ra ayunar, ta catyiso ra ndaha ra siqui ra, ta cachican tahvi ra chi Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴Yaha cuan tachí Tatyí Ii chi ra Bernabé ta chi ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihvi ra chichi noo barcu ta cuahan ra nya ñuhú Chipre cha nyaa mahñu tyañuhu. ⁵Yucuan ta cachaa coyo ra noo ñuu yuhu tyañuhu cha nañí Salamina. Ta quichaha cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chi ra. ⁶Tyicuan ta cuahan coyo ra cahán ra tuhun Nyoo noo noo ñuu cha nyaa Chipre cuan nyacua nya chaa coyo ra ñuu cha nañí Pafos. Ta yucuan nañihi ra chi noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra. ⁷Ta ra tasi

cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta cana ra chi ra Bernabé ta chi ra Saulo, vatyí cuñí ra cuiñi ra tuhun Nyoo. ⁸Ta ra tasi cuan nañi tucu ra Elimas, ta chasí ra nu chino iñi gobernador cuan chi ra Cristo. ⁹Tyicuan ta ra Saulo cha nañi tucu Pablo, tyitú ra chihin Tatyí Ii. Ta nyehe vavaha ra chi ra Elimas cuan. ¹⁰Ta catyí ra chi ra:

—Yoho ra sandaví ñaha, cuendu xaun. Sehe cuihna cuví chuun. Ta cuiñún sativun tandihi cha vaha. Ta tyicuan ri chasún ityi vaha Sutu Mañi yo. ¹¹Ta vityin Sutu Mañi yo cutachi tuñi ra chuun, vatyí cunducuaun. Ta ma cuvi nyehun ñuhu ñanyii suhva quivi —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducu ra noo ra tiin ndaha ra vatyí ña ndichin ca nyehé ra. ¹²Cuhva cha nyehe gobernador cuan cha cuví chi ra Elimas, chingo iñi ra chi ra Jesucristo. Vatyí iyo cuñi ra nyehe ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquia ityi Pisidia

¹³Ra Pablo ta ra tahan ra quihvi ra chichi noo barcu ñuu Pafos. Ta cuahan coyo ra nya ñuu Perge ityi Panfilia. Soco ra Juan Marcos sandoo ra chi ra ta cuanuhu ra nya Jerusalén. ¹⁴Yaha cuan ta caquita ra Perge cuan, ta cuahan coyo ra ñuu Antioquia cha nyaá ityi Pisidia. Yucuan quihvi coyo ra chichi vehe ñuhu ñu Israel ta cuví chi noo quivi nyitatu ñu. Ta chicunyicu ra. ¹⁵Tyicuan ta quichaha sacuaha ñáyivi nu libru ley cha tyaa ra Moisés. Ta sacuaha tucu ñu libru cha tyaa ra cacuví profeta Nyoo ta cha naha. Yaha cuan ta ra cacuví nuu vehe ñuhu catyí ra chi ra hermano nyicú cuan, vatyí tatu iyó noo tuhun cuñí ra cahan ra chihin ñáyivi, cuví cahan ra. ¹⁶Tyicuan ta ndicuita ra Pablo ta sacuví ra noo seña

chihin ndaha ra vatyí na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo. ¹⁷ Nyoo cuenda yo, ñu Israel, nacachi vaha ra chi sutu chahnu yo. Ta quivi cha iyó ca ñu ityi Egipto sacuvi ra noo ñuu cahnu chi ñu. Vasi ñima ñáyivi ñuu cuan cuví ñu, soco sanducuaaha ra chi ñu. Yahá cuan ta tava ra chi ñu ityi cuan chihin tunyee iñi chi ra. ¹⁸ Ta cunyeē iñi Nyoo tandihi cuhva chiyo ñu nu chicá noo ñu ñuhú ityi chichi cha uvi xico cuiya. ¹⁹ Ta sanaa ra ucha tahan ñuu nahnu cha chiyo nicahnu Canaán, vatyí chahá ra ñuhú cuan chi sutu chahnu yo. ²⁰ Yahá cuan ta sacuvi Nyoo vatyí cunyaca ñaha maa maa ri juez chi ñáyivi cuan. Tari noo cumi ciento sisava cuiya chinyaca ñaha juez chi ñu nyacua nya quivi chinyaca ñaha ra profeta Samuel chi ñu. ²¹ Tyicuan ta maa ñu chican ñu noo rey cha cunyaca ñaha chi ñu. Ta Nyoo chahá ra chi ra Saúl sehe ra Cis chi ñu, vatyí cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyaca ñaha ra chi ñu. ²² Yahá cuan ta Nyoo tava ra chi ra Saúl cha cuví ra rey. Ta chahá ra vatyí cuví ra David rey. Ta catyí ra: “Nyehí vatyí ra David sehe ra Isaí cuví ra noo rayhi cha tahán iñi cuhva iyó. Ta cusacuvi ra tandihi cha cuñí yuhu”, catyí Nyoo tuhun ra David. ²³ Ta minoo ra vachi tata ra David cuan ican cuví ra Jesús. Ta maa Nyoo tachi chi ra vatyí sacacu ra chi yo ñu Israel, tari catyí ra chi sutu chahnu yo. ²⁴ Ta cumañi ca quichi ra Jesús, ra Juan ra sacondutya chi ñáyivi cahan ra nuu tandihi ñáyivi Israel. Ta catyí ra chi ñu vatyí cuñí chi cha ndu uvi iñi ñu cuatyí ñu, ta condutya ñu. ²⁵ Ta cha cuandihí tyiño saha ra Juan ta catyí ra: “¿Atu cuñí maa ndo vatyí yuhu cuví noo ra cahnu cha saquichi Nyoo? Soco ñima yuhu cuví ra cahnu cuan. Vatyí chata cha yahá yuhu

ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnu xaan ra cuví ra”, catyí ra Juan.

²⁶ Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu añima yo. ²⁷ Ñáyivi ñuu Jerusalén ta ra cuví nuu chi ñu cuan, ña chitó ñu vatyí ra Jesús cuví ra cha sacacú chi yo. Ta ni ña cutuñí iñi ñu tuhun cha catyaa ra profeta Nyoo ta cha naha, vasi sacuaaha vavaha ñu tuhun cuan tandihi quivi cha nyitatu ñu, soco ña cutuñí iñi ñu. Ta quivi chahñi ñu chi ra Jesús chino cava tari cuhva catyí ra profeta Nyoo cuan. ²⁸ Vatyí vasi ñahri cuatyí ra nañihí ñu, soco chican ñu chi ra Pilato na tyihi ra tyiño cucahñi chi ra. ²⁹ Ta cha yahá sacuvi ñu chi ra tari cuhva catyí maa tuhun ra nu libru Nyoo ta chihí ra. Tyicuan ta sanoo ñu chi ra nu cruzi. Ta tyihí ñu chi ra chichi ñuhú. ³⁰ Soco Nyoo sanandoto ra chi ra. ³¹ Ta chichi cha cuaha quivi tuví ra nuu ra cha quichi coyo chihin ra quivi quita ra ityi Galilea, ta quichi ra Jerusalén. Ta ican ra cuan cacahán tuhun ra chihin ñáyivi vityin. ³² Ta yucuan chaha nyuhu cahan ndi tuhun vaha cha catyí Nyoo chi sutu chahnu yo vatyí cuhva ra chi yo. ³³ Vatyí cha cuenda cha vaha chi maa yo cha cuví yo ñáyivi vachi tata ñu cuan, sacuvi maa Nyoo cha catyí ra. Vatyí sanandoto ra chi ra Jesús tari cuhva nyaá nu cu uvi salmo nu catyí Nyoo tyehe caa: “Sehi cuví chuun, ta yuhu chahí ñáyivi coun vityin”, catyí Nyoo. ³⁴ Nyoo tyaa ra cuhva vatyí sanandoto ra chi ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chi nyoho cha vaha cha catyí chi ra David.” ³⁵ Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chi. ³⁶ Ra David sacuvi ra tyiño nuu ñu cha chiyo quivi chiyo

ra, yoso cuhva cha catyí Nyoo chi ra tyi sacuvi ra. Yahá cuan ta chihí ra ta chicuchí ñu chi ra tari chicuchí ñu chi sutu ra. Ta tyahyu coño ñuhu ra. ³⁷Soco ra cha sanandoto Nyoo chí, ña tyahyu coño ñuhu ra. ³⁸Yañi, cuñi chi coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo. ³⁹Ta cha cuenda ra Jesús sahá Nyoo ticahnu iñi chí tandihí ñu cha chinó iñi chí ra, tyi ley ra Moisés ña cuví sacuvaha chí yo nuu Nyoo. ⁴⁰Saha ndo cuenda coto ndoo siquí ndo cha catyaa ra profeta Nyoo nu catyí ra tyehé caa:

⁴¹Nyehé nyoho, ra chacú nyaa, tahán chí cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quívi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyivi chí ndo, catyí Nyoo.

⁴²Ndihí cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chí ra, vatyí na cahan tucu ra tuhun ihya chihin ñu inga vitya quívi cha nyitatu ñu. ⁴³Cuhva cha ndihí ndu iin ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chí ra Pablo ta chí ra Bernabé. Ta chahá ra tuhun chí ñu vatyí na cahun ca ñu ityí nuu ca chihin Nyoo. Ta ñaquehen vaha ñu tumañi iñi cha chahá Nyoo chí ñu. ⁴⁴Cha inga vitya quívi nyitatu ñu, ndu iin ri ñu. Ta cha yatyin cha tandihí ñáyivi ñuu cuan ndu iin ri ñu vatyí cuñi ñu tuhun Nyoo. ⁴⁵Soco cuhva cha canyehe ra Israel, cuxaan ra vatyí nyehe ra vatyí cuaha ñáyivi nyicón chí ra cuan. Ta quichaha cacuvi yuhu ra chihin ra Pablo, ta cacahan ra chí ra. ⁴⁶Soco ña yuhví ra Pablo ta ra Bernabé. Ta quichaha cacatyí ra chí ra:

—Cuñi chí cha cahan xihna ndi tuhun Nyoo chihin nyoho cha cuví ndo ñu Is-

rael. Soco ña cuñi ndo ñaquehen ndo. Ta cuñi maa ndo vatyí ña ñaña ndo cha ñihi ndo ñáyivi chaa cha ma naa ca maa. Yucuan chaha cahun ndi cucahan ndi chihin ñu cha ñima ñu Israel cuví. ⁴⁷Vatyí tyicuan caa tachí Sutu Mañi yo chí ndi ta catyí ra tyehé caa:

Tyái chuun tari ñuhu chí ñáyivi nicahnu ñuhu ñáyivi.

Tacuhva vatyí cusañahun ityí chí ñu yoso caa cacu añima ñu, catyí Nyoo.

⁴⁸Cuhva cha cachini ra cha ñima ra Israel cuví, ndusiñi cuñi ra. Ta quichaha catyí ra vatyí tuhun Nyoo vaha xaan. Ta nachino iñi tandihí ñu cha nacachi maa Nyoo chii, vatyí coo ñu ñáyivi chaa cha ma naa ca maa. ⁴⁹Ta tyicuan caa chitya tuhun Nyoo tandihí ityí ñuu cuan.

⁵⁰Soco ra Israel cacahan ra chihin suhva ñusihi tyayii cha nyicón ley ra Moisés. Catyí ra chí ñu vatyí ña vaha tuhun cahan ra Pablo. Ta cahan tucu ra chihin ra cuví nuu chí ñuu cuan. Ta yucuan cuví nu quichaha chica nyicon ñu chí ra Pablo ta chí ra Bernabé, nyacua nya cha tava ñehe ñu chí ra ñuu cuan. ⁵¹Tyicuan ta canaquisi ra ñiyaca chaha ra tari noo seña vatyí ndoo cuatyí ñáyivi cuan siquí maa ñu. Ta cuahan coyo ra ñuu Iconio.

⁵²Soco ñu yihí cuenda Nyoo ñuu Antioquía cuan sii xaan cacuví chí ñu. Ta tyitu ñu chihin Tatyí Ii.

Nu ñohó ra Pablo ta ra Bernabé ñuu Iconio

14 Ñohó ra Pablo ta ra Bernabé ñuu Iconio. Ta caquihvi ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyivi. Ta cuaha xaan ñu nachino iñi ñu chí ra Cristo, ñu Israel ta ñu cha ñima ñu Israel cuví ñandihí. ²Soco ra Israel cha ña chinó iñi chí ra Cristo catyiyuhú ra chí ñu cha ñima ñu Israel cuví vatyí caca ña vaha iñi ñu nyehe ñu chí ra yihí cuenda ra Cristo. ³Yucuan chaha ra Pablo ta ra

Bernabé candoo ra yucuan cuaha quivi. Ta chihin cha ñi ñi ra cacahán ra tuhun ra Cristo. Ta chinó xaan ñi ra chi Sutu Mañi yo. Ta Sutu Mañi yo tyinyee ra chi ra cha cacahán ra tuhun ra yoso caa cuñi ra chi yo. Ta chaha Sutu Mañi yo cha casacuví ra seña ta milagru tacuhva coto ñáyivi tyi ndicha cha cahan ra. ⁴Soco ñáyivi ñuu, ña ñin ri cuví ñu. Yihí ñu cuahan ñu tumañi ñi chi ra Israel. Ta inga tucu ñu cuahan ñu tumañi ñi chi ra apóstol. ⁵Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra siqui ra, ta catuchí ra yuu chi ra. ⁶Soco ra Pablo ta ra Bernabé ñihí ra tuhun vatyí cusacuví ra tyicuan caa, ta cuahan coyo ra nya ñuu Listra, ta nya ñuu Derbe ityi Licaonia. Ta cachicá noo ra ityi cuan. ⁷Ta cacahan tucu ra tuhun Nyoo yoso caa sacacu ra ñima yo.

Nu cañi ñáyivi yuu chi ra Pablo nya ñuu Listra

⁸Nya Listra iyó noo rayii cha pehe chaha. Ta nya ndaha cacu ra ta ña cuví caca ra. Vatyí pehe ninduvi chaha ra. ⁹Ta suri maa ra pehe chaha cuan tyasohó vavaha ra nu cahán ra Pablo. Ta ra Pablo, tuví ñi ra vatyí chinó ñi ra cuan vatyí cuví nduvaha ra. ¹⁰Tyicuan ta ra Pablo cahan ra chihin cha chaa ndusu ra, ta catyí ra:

—Ñicuinyaa ndoo —catyí ra Pablo chi ra.

Ta ra cuan, noo ri caña ndava ra, ta nicuinyaa ra. Ta quichaha chica ra. ¹¹Cha nyehé ñáyivi cha sacuví ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayii chaa coyo nu nyicú yo —catyí ñu.

¹²Ta catyí ñu tyi ra Bernabé cuví ra noo nyoo cha nañ Júpiter, ta ra Pablo cuví nyoo cha nañ Mercurio, vatyí ican ra cuví ra cahán. ¹³Ta iyó noo tata sutu

cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichí nyaca ra toro ta ita vatyí maa ra ta ñáyivi cuñi ñu sacahnu ñu chi ra Pablo ta chi ra Bernabé. Ta cuacahñi ñu toro tyi cuacuhva cuenda ñu chi ra, vatyí cuñi ñu tyi nyoo cacuví ra. ¹⁴Soco cuhva cha catuví ñi ra apóstol, ra Bernabé ta ra Pablo, cha chicá xiñi ñu, quichaha chahnyá ra sahna ra. Ta casacuví ra tyicuan caa tari noo seña vatyí ña ndoo ra vaha. Ta quihví coyo ra mahñu nu tuvi ñáyivi, ta cacana chaa ra, ¹⁵ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayii ri cuví ndi tari maa ndo. Ta vachi ndi vatyí catyí ndi chi ndo vatyí na saña ndo cha sacuvi ndo tyehe caa. Vatyí ña chiñuhu maa cha tyehe caa. Ta na cunyicon ndo chi Nyoo nyitó. Vatyí ican ra savaha andivi ta ñuhu ñáyivi. Ta savaha ra tyañuhu ta tandihí cha iyó chichi tyañuhu cuan. ¹⁶Ta tyiembu chahnu ta nya vityin, Nyoo saña ndaha ra chi ñáyivi na sacuvi maa ñu yoso cuhva cuñi ñu, ¹⁷vasi tyicuan ri sañahá ra chi ñu yóo ra cuví ra, chihin cha vaha cha sacuví ra. Maa ra sacoon ra savi nu canyicú yo. Chahá ra cha vaha coo tyiño saha yo quivi tahan chí. Ta chahá ra cachi yo. Ta chahá ra cha cusii cuñi ñima yo —catyí ra Pablo chí ñu.

¹⁸Soco vasi catyí ra tyicuan caa, yii xaan ta chasi ra cha cahñi ñu toro cuan, vatyí cuñi ñu sacahnu ñu chi ra chihin cuan.

¹⁹Tyicuan ta chaa coyo suhva ra Israel, ra ña chinó ñi chi ra Cristo, ra ñuu Antioquia, ta ra ñuu Iconio. Ta tyiyuhu ra chi ñáyivi, ta catyí ra vatyí na tuchi ñu yuu chi ra Pablo. Ta tyicuan caa sacuví ñu. Ta cuñi maa ñu vatyí cha chihí ra. Ta xita quiñoho ñu chi ra ityi chata ñuu. ²⁰Soco candu ñin ri ra cayihí cuenda Nyoo nu catuví ra Pablo. Ta ndicuita ri ra. Ta quihví ra inga chaha chichi ñuu.

Ta cha inga quivi cuahan ra ñuu cha ñañí Derbe ta cuahan ra Bernabé chihin ra.

²¹ Ta cahañ tucu ra tuhun Nyoo nya ñuu Derbe yoso caa sacacu Nyoo añaïma yo. Ta cuaha ñáyivi nacuhvá ñu chi ñu chi Nyoo. Yahá cuan ta cuanuhu coyo ra ityi quichi ra. Ta yahá ra ñuu Lистра ta ñuu Iconio inga chaha, ta nachaa ra nya Antioquía. ²² Ta tandíhi ñuu cuan sanduní ca ra iñi ñu yihí cuenda Nyoo. Ta catyí ra chi ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chi ñu vatyí tatu cuñí yo cha cunyacá ñaha Nyoo chi yo, cuñí chi cha nyehe yo tindoho. ²³ Ta canatyiso ra chi ra ca quíhi ndaha chi ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chi Nyoo cha cuenda ra. Yahá cuan ta catyí ra chi ra:

—Chjño iñi ndo chi Sutu Mañi yo. Maa ra na cocumi ra chi ndo —catyí ra chi ra.

Nu cuanuhu coyo ra Pablo ta ra Bernabé Antioquía ityi Siria

²⁴ Yahá cuan ta yahá coyo ra Pablo ta ra Bernabé ityi Pisidia, ta chaá coyo ra ityi Panfilia. ²⁵ Cahañ ra tuhun Nyoo ñuu Perge. Yahá cuan ta cahañ ra ñuu Atalia. ²⁶ Yucuan quíhví coyo ra chichi noo barcu ta cuanuhu coyo ra Antioquía. Yucuan cuví ñuu nu natyaá ñu chi ra ndaha Nyoo tyi cusacuví ra tyiño nuu ra, ta vityin cha nachaa coyo ra. ²⁷ Cuhva cha nachaa coyo ra Antioquía sandu iñ ri ra chi ñu yihí cuenda Nyoo. Ta nacatyí ra chi ñu tandíhi cha sacuví Nyoo chihin ra. Ta yoso caa nuña Sutu Mañi yo ityi vatyí chinó tucu iñi ñu cha ñïma ñu Israel cuví. ²⁸ Ta naha xaan ndoq ra Pablo ta ra Bernabé chihin ñu yihí cuenda Nyoo ñuu cuan.

Nu casandaa ra apóstol tyiño nya Jerusalén

15 Nyaá ca ra Pablo ta ra Bernabé Antioquía, ta chaá coyo ra quita coyo ityi Judea. Ta quichaha sañahá ra chi ra yihí cuenda Nyoo. Ta catyí ra vatyí cuñí chi sacuvi ra costumbre circuncisión tari cuhva catyí ra Moisés, tyicuan ta cacu ra. ²⁻³ Ta ñiñi xaan cahañ ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquía cuan chi ra Pablo ta ra Bernabé chihin suhva ca ra vatyí cuhun coyo ra Jerusalén. Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yahá ra ityi Fenicia ta Samaria. Ta canacatyí ra chi ñu yihí cuenda Nyoo yoso caa sañá ñu cha ñïma ñu Israel cuví tuhun chahnu cha chingo iñi ñu. Vatyí nacuhvá cuenda ñu chi ñu chi Nyoo. Ta tandíhi ñu hermano cusíi xaan cuñí ñu cha chitó ñu tuhun cuan.

⁴ Quivi chaá coyo ra Pablo ta ra Bernabé Jerusalén, cuahan ra nu ndu iñ ri ñu yihí cuenda Nyoo. Ta tandíhi ñu chihin ra apóstol, ta ra yihí ndaha chi ñu, chaha ñu lugar chi ra. Ta canacatyí ra tandíhi cha sacuví Nyoo chihin ra. ⁵ Soco suhva ra fariseo cha cachinó iñi chi ra Cristo, nicuinanyaá ra ta catyí ra:

—Tandíhi ra cha ñïma ra Israel cuví ta chinó iñi ra chi ra Jesús, niñi cuñí chi cha sacuvi ra costumbre circuncisión. Ta cuñí tucu chi cha sacuví ra cuhva catyí ley cha tyaa ra Moisés —catyí ra.

⁶ Tyicuan ta candu iñ ri apóstol ta ra yihí ndaha chi ñu vehe ñuhu vatyí candatuhun vaha ra tuhun cuan. ⁷ Cha yahá cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandíhi yo cachí Nyoo chi yuhu ra ndahvi quivi cuan, vatyí cahin tuhun

yoso caa cacu ñima yo chihin ñu cha ñima ñu Israel cuví, vatyí nachino iñi ñu chi Sutu Mañi yo. ⁸Ta Nyoo, ra chitó ñima tandihi ñáyivi, sañaha ra chi yo vatyí cuñi ra chi ñu cuan. Ican tuhun chaha ra Tatyí Ii ra chi ñu, tari chaha ra chi yo. ⁹Nyoo ña sahá ra tyi vaha ca yoó cha nuu ñu cuan. Soco sanduvi tucu ra ñima maa ñu cha cuenda cha chinó iñi ñu chi ra. ¹⁰Vityin ñacaca xiñi yo cuhva cuñi Nyoo. Vatyí ña vaha cha tyisó yo ley ra Moisés siqui ñu. Vatyí niri maa sutu chahnu yo ta niri maa yo ta ña cuví naquehen vaha yo ley cuan. ¹¹Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹²Tyicuan ta taxi ri cacuví tandihi ra. Ta tyasohó ra tuhun cahan ra Bernabé ta ra Pablo. Vatyí canacatyí ra seña ta milagru cha sacuví Nyoo nu cacahan ra tuhun Nyoo nu nyicú ñu cha ñima ñu Israel cuví. ¹³Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuñi ndo tuhun cahín.

¹⁴Cha nacatyí ra Simón Pedro chi yo yoso caa quichaha chaha Nyoo tumañi iñi chi ñu cha ñima ñu Israel cuví. Vatyí cachí tucu ra chi suhva ñu vatyí cuví ñu noo ñáyivi cuenda ra. ¹⁵Ta ñin ri nanduví tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehe caa:

¹⁶Yaha tandihi tuhun ihya cuquichi tiquí nu nyaá ndo.

Quivi chiyo ra David, vaha sacahnu ñáyivi chii.

Soco yaha cuan sandihi ñu tuhun cha sacahnu ñu chii.

Soco cuquichi tiquí ta tari cha cuna-coñehi vehe ñuhu ra David inga chaha.

Vatyí cusacahnu tucu ñáyivi chii.

¹⁷Tacuhva cuví nanducu tandihi ca ñáyivi chii, tandihi ñu cha ñima ñu Israel cuví cha chicán tahvi chihin sivi.

¹⁸Tyicuan caa catyí Sutu Mañi yo ta sañaha ra tuhun ihya chi ñáyivi chiyo ta cha naha ta chi ñáyivi cha iyó vityin.

¹⁹Yucuan chaha catyí yuhu vatyí ña vaha sayanga yo chi ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo tyi cuñi chi cha quichaha ñu ley chahnu. ²⁰Vaha ri maa chihin cha sacuhun yo tutu chi ñu. Ta catyí yo chi ñu vatyí ma cachi ñu coño cha chaha cuenda ñáyivi chi xitohyo. Ta ni noo ñu ta ma coo ri maa ñusihi o rayi chi ñu, tatu ñima ñasihi o yíi ñu cuví. Ta ma cachi ñu coño quití chihí cha cava ñu sucun ta ña chati niñi. Ta ma cachi ñu niñi. ²¹Vatyí nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quivi quivi nyitatú ñu, sacuaha ra tuhun cha tyaa ra Moisés —catyí ra Jacobo chi ra.

²²Tyicuan ta ra apóstol ta ra cayihí ndaha chi ñu nyicú vehe ñuhu chihin tandihi ñu yihí cuenda Nyoo nacachí ñu chi suhva ra. Ta yaha cuan ta tachi ñu chi ra vatyí cuhun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañi Barsabás, ta ra Silas. Ican ra cacuví ra ra cananyisó tyiño vehe ñuhu ñuu Jerusalén cuan. ²³Ta chihin ra tachi ñu noo carta. Ta catyí carta cuan tyehe caa:

“Nyuhu ra apóstol, ta ra yihí ndaha chi ñu nyicú vehe ñuhu ta yañi ndo cuenda Nyoo, tandihi ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandihi ri ndo cha iyó ndo Antioquía ta nyoho ñu Siria, ta ñu Cilicia ñandihi, sacuhún ndi carta

ihya chi tandihi ri ndo. ²⁴ Chitó ndi vatyí quitá suhva ra ityi nu nyicú ndi ihya. Ta cuahan ra nu nyicu ndo. Soco ña catyi nyuhu chi ra tyi cuhun ra cusayanga ra chi ndo chihin tuhun cahan ra. Satondó ra cuan xiñi ndo vatyí catyí ra chi ndo tyi cuñí chi cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyi tyi cuhun ra cucatyí ra chi ndo tyicuan caa. ²⁵ Yucuan chaha ndu iñi ri ndi ta nacachi tahan tuhun cahan ndi ta vaha cuñí ndi cha tachi ndi chi ra hermano ihya chihin ra Pablo ta ra Bernabé nu nyicu ndo. ²⁶ Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñí ñáyivi cahni ñu chi ra soco ña sandihi ra tuhun cha sacoto ra tuhun Sutu Mañi yo Jesucristo. ²⁷ Ta yucuan chaha tachí ndi chi ra Judas ta chi ra Silas. Ta maa ra cuahan ra chihin yuhu ra chihin ndo, vatyí nacatyí ra tandihi cha tyaa ndi nu tutu ihya. ²⁸ Vatyí niri Tatyí li ta niri nyuhu ta ña cuñí ndi tyiso ca ndi carga siqui ndo, soco ihya ri cha niñi ca tahán chi cha naquehen vaha ndo. ²⁹ Ma cachi ndo coño cha chaha cuenda ñu chi xitohyo. Ta suri ma cachi ndo niñi, ni coño quití cha chihí ta ña chatí niñi ti. Ta ma coo ñusihi o rayi chi ndo tatu ñima ñasihi ndo o yii ndo cuví. Tatu ma sacuví ndo tyicuan caa, vaha xaan cuacoo ndo. Ta Nyoo na cocumi ra chi ndo”, catyí ra nu carta cuan.

³⁰ Ta cuahan coyo ra cha catachi ra chi cuan. Ta chaq coyo ra Antioquía. Ta sandu iñi ri ra chi tandihi ñu, ta nacuhva cuenda ra carta cuan. ³¹ Cuhva cha sacuhá ñu carta cuan ndusi xaan cuñí ñu vatyí vaha xaan cahan chi. ³² Ta ra Judas ta ra Silas cuví tucu ra cuan profeta cuenda Nyoo. Ta sandunií ra iñi ra hermano chihin tuhun cahan ra. ³³ Ta cha yahá chinyicu ra cuan suhva quivi ta cuanuhu coyo ra nya nu nyicú ñu catachi chi ra. Ta tandihi ñu yihí cuenda

ra Cristo catyi ñu vatyí na cuhun vaha ra. ³⁴ Soco ra Silas natyaa ra cuhva vatyí cundoo ra. ³⁵ Ta ra Pablo ta ra Bernabé candoo tucu ra Antioquía yucuan. Ta maa ra chihin cuaha ca ra casañaha ca ra chi ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusiin ra chihin ra Bernabé

³⁶ Ta cha yahá suhva quivi ta catyí ra Pablo chi ra Bernabé:

—Coho inga chaha cunyehe yo nu nyicú ñu yihí cuenda ra Cristo tandihi ri ñuu nu cahan yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷ Ta ra Bernabé cuñí ra cha cuhun tucu ra Juan Marcos chihin ra. ³⁸ Soco ra Pablo ña tahán iñi ra cha cuhun ra Juan chihin ra, vatyí sandoo ra chi ra nya Panfilia quivi cuan. Ta ña chahan ca ra chisaha tyiño ra chihin ra. ³⁹ Ta ña chitahan iñi ni noo ra, ta cacusiin ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre. ⁴⁰ Ta ra Pablo cachi ra chi ra Silas. Ta cha yahá chican tahvi ra hermano chi Nyoo na tyinyee ra chi ra, ta cuahan coyo ra. ⁴¹ Ta yahá ra ityi Siria, ta ityi Cilicia, ta sandunií ca ra iñi ñu yihí cuenda Nyoo noo noo ñuu.

Nu cuahan ra Timoteo chihin ra Pablo ta ra Silas

16 Ra Pablo ta ra Silas chaq coyo ra ñuu Derbe, ta ñuu Listra. Ta yucuan nañihí ra chi noo ra yihí cuenda Cristo. Nañí ra Timoteo. Ta sihi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuví ra. ² Vaha xaan chicá ra Timoteo chihin Nyoo catyí ñu yihí cuenda Cristo ñuu Listra ta ñuu Iconio. ³ Ta ra Pablo cuñí ra cha cuhun ra Timoteo chihin ra.

Ta saḡa ra circuncidar chi ra Timoteo. Vatyí coto ma cuiñi ñu Israel cha iyó ityi cuan tuhun ra Cristo cha cahán ra. Vatyí tandihi ñu chitó ñu vatyí sutu ra cuví ra ra ñuu Grecia. ⁴Tyicuan ta cuahan coyo ra noo noo ñuu. Ta nacatyí ra chi ñu yihí cuenda ra Cristo tuhun cha chaha ra apóstol ta ra yihí ndaha chi ñu nyicu vehe ñuhu Jerusalén chi ra. ⁵Ta tyicuan caa ta ndunií ca iñi ñu yihí cuenda ra Cristo ta chino ca iñi ñu chi Nyoo. Ta tahan quivi ta cuahan nducuaha ca ñu.

Nu nyehé ra Pablo noo visión chi noo ra Macedonia

⁶Ña chaha Tatyí li cha cahan ra tuhun Nyoo ityi Asia. Yucuan chaha yaha sava ra ityi Frigia nu iyó xahñi ñuhu chihin ityi Galacia. ⁷Ta chaḡ coyo tucu ra ityi Misia. Ta cuiñi tucu ra cuhun coyo ra ityi Bitinia, soco Tatyí li ra Jesucristo ña chaha cuhun coyo ra. ⁸Tyicuan ta nya sava ri yaha ra ñuu Misia ta canoo coyo ra ñuu Troas cha nyaá yuhu tyañuhu. ⁹Cañohó ra ñuu Troas cuan, ta noo cha cuaa nyehe ra Pablo noo visión. Nyehe ra chi noo rayii ityi Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha, vatyí tyinyeun chi ndi”, catyí ra. ¹⁰Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvaha ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo cana chi ndi, vatyí cahan ndi tuhun ra yoso caa sacacú ra añaima yo chihin ñáyivi ityi cuan.

Nu ñohó ra Pablo ta ra Silas ñuu Filipos

¹¹Quihvi ndi noo barcu ñuu Troas. Ta chahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quivi chaḡ ndi ñuu Neápolis. ¹²Ta yucuan quita ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnu ca cha

nuu tandihi ñuu ityi Macedonia cuan. Ta yucuan chinyicu ndi suhva quivi. ¹³Noo quivi cha nyitatu ñáyivi ta quita ndi ityi chata ñuu, yatyin noo yutya nu tuhvá ñu chican tahvi ñu chi Nyoo. Chicunyaḡ ndi yucuan ta cahán ndi tuhun Nyoo chihin ñusihi cha candu iin ri yucuan. ¹⁴Noo ñaha nañi ña Lidia. Ta ñuu ña cuví Tiatira. Ta tuhvá ña xico ña sahna finu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chiñi ña cha cahán ra Pablo. Ta Nyoo nuña ra añaima ña na quichaha ña cha cahan ra. ¹⁵Ta condutya ña chihin ñáyivi chi ña. Ta yaha cuan ta chacu ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, coo ndo vehi —catyí ña chi ndi.

Ta saniñi ña chi ndi cha ndoo ndi vehe ña.

¹⁶Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihí noo tatyí ña vaha chi ña. Yucuan chaha cuví nacoto ña ñáá ndihi cha cucuvi ityi nuu. Ta cuví ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyí cuví nacotó ña. ¹⁷Ta ñaha tyivaa cuan quichaha nyicon ña chi ndi, ta chi ra Pablo ñandihi. Ta cana chaa ña ta catyí ña:

—Rayii ihya ra casacuví tyiño nuu Nyoo cahnu cuví ra. Ta cahán ra tuhun yoso caa cuví cacu añaima yo —catyí ña.

¹⁸Cuaha quivi sacuvi ñaha tyivaa cuan tyicuan caa. Tyicuan ta ra Pablo ña cunyeé ca iñi ra, ta nanyocava ra ta catyí ra chi tatyí ña vaha cha yihí chi ña:

—Chihin sivi ra Jesucristo catyí chuun vatyí quiton chi ñaha tyivaa ihya —catyí ra.

Ta tatyí ña vaha cuan quita chi chi ña caa cuhva ri cuan.

¹⁹ Soco cuhva cha canyehē chitoho ña vatyí ma cuví ca saha ganaa ra xuhun chihin ña, catiñ ra chi ra Pablo ta ra Silas chinyaca ra chi ra nya vehe tyiño. ²⁰ Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyivi ñuu yo. ²¹ Ta sañahá ra costumbre cha ña cuví naquehen yo, niri ña cuví sacuví yo vatyí ñu cuenda ñuu Roma cuví yo —catyí ra.

²² Tyicuan ta nduxaan ñáyivi chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun. ²³ Cha yaha cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra. ²⁴ Cuhva cha quehen ra sahá cumi cuan tuhun, tyihí ra chi ra nya chichi cuii vehe caa. Ta tyihí vaha ra chaha ra ticu vitu. ²⁵ Soco ñáa cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan catyasohó ra. ²⁶ Ta saná iñi ra ta quichí noo cha taan ñihi vavaha. Ta naquisi chi cimientu vehe caa cuan, ta caa cuhva ri cuan nuña tandihí yuvehe, ta ndachi cadena tandihí ra ñohó vehe caa cuan. ²⁷ Ta cha ndoyo ra sahá cumi cuan, nyehe ra vatyí tacoho yuvehe. Tyicuan ta tava ra mityi ra vatyí cahñi maa ra chi ra. Vatyí chicá xiñi ra vatyí ndihí ra ñohó vehe caa cuan cachino. ²⁸ Soco ra Pablo cana chaa ra chi ra, ta catyí ra:

—Ma cahñun chuun, vatyí tandihí ndi nyicú ndi ihya —catyí ra chi ra.

²⁹ Tyicuan ta ra sahá cumi cuan chican ra noo ñuhū. Ta quicono ra quihvi ra nu cañohó ra. Ta nihí ra chihin cha yuhví ra. Ta chicuiñi chiti ra nuu ra Pablo ta ra Silas. ³⁰ Numi ri tava ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuvi ta cacu añime? —catyí ra chi ra.

³¹ Ta ra cuan canacahan ra ta cacatyí ra:

—Chino iñi chi Sutu Mañi yo Jesucristo ta cacun, maun ta ñáyivi chuun ñandihí —catyí ra.

³² Ta cacahan ra tuhun Sutu Mañi yo chihin ra ta chihin tandihí ñu nyicu vehe ra. ³³ Ta suri maa cha cuaa cuan ra sahá cumi vehe caa cuan nacatyá ra nu cahvi chi nduvi tahan ra nu cañi ra chi ra. Yaha cuan ta maa ra ta tandihí ñáyivi chi ra condutyá ñu suri cha cuaa cuan. ³⁴ Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra sii xaan cuñí ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵ Tuví inga quivi ta catachí ra cacuví tyiño chi policia nu nyaá ra sahá cumi cuan, ta catyí ra vatyí na saña ra chi ra Pablo. ³⁶ Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

³⁷ Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chi ndi tari cuhva tahán chi. Ta tyihí ra chi ndi vehe caa. Ta vityin cuñí ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

³⁸ Ta ra policia nacatyí ra chi ra cacuví tyiño. Ta ra cuan cayuhvi ra cuví cha cachitó ra vatyí ra cuenda ñuu Roma cuví ra Pablo. ³⁹ Ta chahan coyo ra chinandacan ra ticahnu iñi chi ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quita ra ñuu cuan. ⁴⁰ Ta cha quita coyo ra vehe caa, chahan coyo ra vehe cu Lidia. Ta yaha

cuan ta chinyehę ra chi ra hermano ta sandunię ra iņi ra ta cuahan coyo ra.

Nu naquiqui náyivi űuu Tesalónica

17 Nu cuahan coyo ra Pablo ta ra Silas, cayaha coyo ra űuu Anfópolis, ta űuu Apolonia. Yaha cuan ta chaę coyo ra űuu Tesalónica nu nyaá noo vehe űuhu űu Israel. ²Ta chahan ra Pablo vehe űuhu cuan tari cuhva tuhva maa ra chahán noo noo űuu. Ta cahan ra tuhun Nyoo chihin náyivi chichi vehe űuhu cuan uņi tahan quivi nyitatu űu. ³Quehen ra libru tuhun Nyoo ta saňaha ra tuhun ra Cristo chi űu yoso caa catyí chi vatyí cunyehe ra tindoho ta cucúvi ra. Yaha cuan cunandoto ra. Ta catyí ra chi űu vatyí suri maa ra Jesús cha cahán ra tuhun chihin űu cuví ra Cristo.

⁴Ta suhva náyivi Israel cuan nachino iņi űu. Ta candu iņ ri űu chihin ra Pablo ta ra Silas. Ta cachino tucu iņi cuaha űu Grecia cha sacahnú chi Nyoo. Ta cuaha űusihí tyayii űuu cuan nandihí. ⁵Soco ra Israel cha űa chinó iņi, quiņi cacuńi ra cha nyehé ra vatyí nyicón náyivi chi ra Pablo. Ta sandu iņ ri ra chi noo ityi ra quiņi iyó cha cachicá noo yanga ri maa. Ta sanaquiqui ra űuu cuan. Ta quihvi ra vehe ra Jasón, nanducú ra chi ra Pablo ta chi ra Silas, vatyí tava ra chi ra, ta nacuhva cuenda ra chi ra chi náyivi. ⁶Soco cha cuenda cha űa naňihí ra chi ra Pablo ta ra Silas yucuan, ta quehen ra chi ra Jasón. Ta xita quiňoho ra chi ra ta chi suhva ca ra hermano ta cuahan coyo ra nuu ra cuví tyiňo űuu cuan. Ta canaę chaa ra ta catyí ra:

—Ra ihya cuví ra cachicá noo satondó chi tandihí náyivi nicahnu űuhu náyivi. Ta vityin chaę coyo tucu ra ihya. ⁷Ta ra Jasón chiňa chaha ra vehe ra cunyicu ra. Ta tandihí maa ra űa sahá ra náyivi chi ra cuví rey cahnu nya Roma. Vatyí catyí ra vatyí iyó nonga rey ta naňi ra Jesús.

⁸Cha cachiņi űu tuhun cuan, náyivi ta ra cacuví tyiňo canaquiqui űu. ⁹Soco ra Jasón ta inga ra cachaha ra xuhun ta caquita yica ra.

Nu cuahan coyo ra Pablo ta ra Silas űuu Berea

¹⁰Ta suri cha cuaa cuan quiyi cui ri casacuhun ra hermano chi ra Pablo ta ra Silas ityi űuu Berea. Ta cha chaę coyo ra yucuan ta chahan coyo ra vehe űuhu űu Israel. ¹¹Ta ra Israel cha iyó űuu Berea cuan vaha ca náyivi cacuví ra ta űima ca ra Tesalónica. Vatyí chihin cha űi iņi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra. ¹²Yucuan chaha cuaha vavaha űu nachino iņi űu chi ra Cristo. Ta űu Grecia nachino tucu iņi űu cuan, tari űusihí tyayii ta rayii nandihí. ¹³Soco cha cachito ra Israel cha ca iyó űuu Tesalónica vatyí ra Pablo űohó ra Berea cahán ra tuhun Nyoo, ta chahan coyo ra ta sanaquiqui ra chi náyivi yucuan. ¹⁴Soco ra hermano numi cui ri tachí ra chi ra Pablo nya ityi yuhu tyaňuhu. Soco ra Silas ta ra Timoteo candoę ra Berea. ¹⁵Ta ra cha cuahan coyo chihin ra Pablo chinyaca ra chi ra nya űuu Atenas. Tyicuan ta cuanuhu coyo ra nya Berea cuanacuhva ra tyiňo cha tachí ra Pablo chi ra Silas ta chi ra Timoteo, na sanumi ra ta cahun ra nu nyaá ra.

Nu űohó ra Pablo űuu Atenas

¹⁶Cha niri ca cha nyatú ra Pablo chi ra Silas ta ra Timoteo űuu Atenas cuan quiņi cuńi aňima ra cha nyehé ra vatyí cuaha xan xitohyo iyó űuu cuan. ¹⁷Yucuan chaha cahan ra chihin ra Israel, ta chihin inga ra cha tuhvá sacahnú chi Nyoo chichi vehe űuhu cuan. Ta ndi quivi cahán ra chihin űu cha nyicu nuyahvi nandihí. ¹⁸Ta űihí tahan ra chi-

hin ñu cha sacuaha tuhun sañahá noo ityi ñáyivi cha nañi ñu epicúreo. Ta ñihi tahan tucu ra chihin ñu cha sacuaha tuhun sañahá ñáyivi estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyí ra Pablo cahán ra tuhun ra Jesús, ta cahán tucu ra tuhun cha nandoto ñáyivi chihí. ¹⁹ Tyicuan ta chinyaca ra chi ra Pablo noo nu nañi Areópago, nu tuhva ra cacuvi tyiño ndu iin ri ra. Ta cacatyí ra chi ra:

—Cuñí ndi coto ndi tuhun chaa cha vachi sañahún. ²⁰ Vatyí sacotón tuhun cha ña chitó ndi. Ta cuñí ndi coto ndi ñáá cha cuñí chi catyí tandihi tuhun ihya —cacatyí ra chi ra.

²¹ Vatyí tandihi ñu Atenas ta ñu inga ñuu cha iyó yucuan tahán xaan iñi ñu tyasoho ñu ta nacatyí ñu ñáá ndihi tuhun chaa.

²² Tyicuan ta ra Pablo nicuinanyaa ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyí chinó xaan iñi ndo chi cuaha nyoo.

²³ Vatyí चाहिन chinyehi nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo. ²⁴ Nyoo cha savaha ñuhu ñáyivi ta tandihi cha iyó siqui ñuhu ñáyivi. Chi maa ra cuví andivi ta ñuhu ñáyivi. Ta ña iyó ra chichi vehe ñuhu cha savahá ñáyivi. ²⁵ Ta ña itá iñi ra cha tyinyee ñáyivi chi ra. Vatyí suri maa ra chaha ra ñáyivi coo tandihi yo. Ta chahá ra tatyí cha xitá yo. Maa ra chaha tandihi chi yo. ²⁶ Cha xihna ri sava-

ha Nyoo chi noo tuhun ri rayii. Ta maa ra cuví sutu tandihi yo. Yucuan chaha noo ri ñiñi nyisó tandihi yo. Ta chaha Nyoo cha coo yo nicahnu ñuhu ñáyivi. Cha ni cumañi ca savaha ra chi yo ta catyí ra ñáá cuiya coo noo noo yo siqui ñuhu ñáyivi ihya. Ta catyí tucu ra nya cucoo noo noo yo. ²⁷ Tyicuan caa sacuvi ra vatyí tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuvi nañihi yo chi ra. Soco cha ndicha, Nyoo ña cañi nyaá ra chihin noo noo yo. ²⁸ Vatyí cha cuenda Nyoo iyó yo ta candá yo. Tari catyí tucu noo ra ñuu ndo, vatyí catyí ra: “Ñáyivi chi Nyoo cuví chi yo”, catyí ra. ²⁹ Tatu ñáyivi chi Nyoo cuví yo, ña tahán chi caca xiñi yo vatyí Nyoo cuví ra noo xitohyo cha chinó chihin xuhun cuaan, o xuhun cuichin, o chihin yuu vaha cha savahá ñáyivi cuhva chicá xiñi maa ñu. ³⁰ Nyoo sahá ra ticahnu iñi chi ñu chiyo ta cha naha, vatyí ña chitó ñu. Soco vityin catyí ra chi tandihi ñáyivi tandihi ri ityi vatyí na ndu uvi iñi ñu cuatyí ñu. ³¹ Vatyí Nyoo tyaa ra cuhva vatyí coo noo quivi cha cucutuñi chi ñáyivi iyó siqui ñuhu ñáyivi nuu noo ra cha nacachi vaha maa ra chi. Ta sañaha ra chi tandihi yo vatyí tyicuan caa cuví vatyí sanandoto ra chi ra cuan cha yaha chihí ra —catyí ra Pablo.

³² Cuhva cha chiñí ñu tuhun cha nandoto ñu chihí, yihí ñu chacu nyaá ñu, ta inga ñu catyí:

—Quichun inga quivi ta cahun tuhun ihya chihin ndi —catyí ñu.

³³ Tyicuan ta cuahan ra Pablo. ³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañi ra Dionisio, ta cuví ra noo ra cuví tyiño ñuu cha tuhvá ndu iin nya Areópago cuan. Ta noo ñaha sihi cha nañi Dámaris chino tucu iñi ña, ta inga tucu ñu ñándihi.

Nu ñohó ra Pablo ñuu Corinto

18 Yahá cuan ta quitá ra Pablo ñuu Atenas ta cuahan ra ñuu Corinto. ²Ta yucuan nañihí ra chi noo ra Israel tari maa ra. Nañí ra Aquila. Ta ñuu Ponto cacú ra. Ta maa ra chihin ñasihí ra, cu Priscila quitá ñu Italia. vatyí ra Claudio, ra cuví rey cahnu yucuan, tava ra tandihí ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan. ³Ta ñin ri tyiño sacuví ra chihin ñu. Savahá ñu vehe sahma. Ta ndoq ra chihin ñu vatyí sahá tyiño ñu ñin ri. ⁴Ta quívi nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyí nducú ra cuhva cha chino ñin ñu chi ra Jesucristo.

⁵Ta quívi chaq coyo ra Silas ta ra Timoteo cha quitá ra Macedonia, ra Pablo sandoq ra tyiño sahá ra ta ñin ri ca tyiño cha cahán ra tuhun Nyoo nicunyaá ra. Ta catyí cachi ra chi ñu Israel vatyí ra Jesús cuví Cristo ra cha nyatú xaan ñu. ⁶Soco ñu cuan xaan cuñí ñu. Ta quichahá chahan ña vaha ñu siquí Sutu Mañi yo. Tyicuan ta ra Pablo naquisí ra sahma ra tari noo seña vatyí cuandoo cuatyí ñu siquí ñu. Ta catyí ra chi ñu:

—Cuatyí maa ndo cuví tatu cuhun ndo anyaya. Ñahri ca nyaá siquí. Vityin ta ityi nuu ca cuhin cucahin chihin ñu cha ñima ñu Israel cuví —catyí ra chi ñu.

⁷Ta quitá ra vehe ñuhu cuan. Ta cuahan ra vehe noo ra cha nañí Justo. Noo ra cha sacahnú chi Nyoo. Ta nyaá vehe ra ityi xiin vehe ñuhu cuan. ⁸Ta noo ra cha nañí Crispo, ra cuví nuu vehe ñuhu cuan nachino ñin ra chi Sutu Mañi yo, ta ñáyivi chi ra ñandihí. Ta cuaha ca ñáyivi iyó Corinto cuan, cha yahá cha chiñí ñu tuhun cahán ra Pablo, nachino tucu ñin ñu chi ra Jesús, ta condutya ñu. ⁹Tyicuan ta noo cha cuaa nyehé ra Pablo

noo visión. Ta cahán Sutu Mañi yo chihin ra, ta catyí ra:

—Ma yuhvun. Cahán ca tuhin ta ma sandihun cha cahun. ¹⁰Vatyí yuhu nyái chuhun. Ta yori cuví satasi ñin chuun. Vatyí cuaha xaan ñáyivi nyaá sacaqui ñuu ihya —catyí Sutu Mañi yo chi ra Pablo.

¹¹Yucuan chaha ra Pablo ndoq ra noo cuiya sisava ñuu Corinto cuan. Sañahá ra tuhun Nyoo chi ñáyivi.

¹²Soco quívi cha cuví ra Galión gobernador nicahnu ityi Acaya cuan, candu ñin ri ra Israel siquí ra Pablo. Ta cachican ra cuatyí chaha ra nuu ra gobernador. ¹³Ta cacatyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo cuhva cha ñahri nyaá nu ley ndi —cacatyí ra.

¹⁴Tyicuan ta cuhva cha cuanacahan ra Pablo, nacahan ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahnu o cuatyí ndiyi cuví sandai yoso cuhva tahán chi. ¹⁵Soco maa maa ri tuhun cahán ri cuví ihya. Ta yuhu ña cuñí sandai tyiño ihya, ta siñ ri cuenda ley maa ndo cuví. Nyehe maa ndo. Sandaa ndo tyiño vatyí yuhu ña cuñí cuvi juez cuenda ihya —catyí gobernador cuan.

¹⁶Ta tava ra chi ra nu cuví vehe tyiño ra. ¹⁷Tyicuan ta tandihí ra Grecia catiñ ra chi ra Sóstenes, ra cuví nuu vehe ñuhu ñu Israel. Ta cacañí ra chi ra suri maa nuu ra Galión, ra cuví gobernador cuan. Soco ra Galión cuan ña cahán ri ra.

Nu cuanuhu ra Pablo ñuu Antioquía.

Yahá cuan ta cuahan tucu ra tuhun Nyoo, cha cu uñi chaha

¹⁸Ta ra Pablo ndoq ca ra ñuu Corinto cuaha quívi. Yahá cuan ta catyí ra chi ra hermano vatyí cuhun ra. Ta cuahan ra Aquila chihin cu Priscila chihin ra Pablo. Tyicuan ta chaq coyo ñu Cen-

crea. Ta ra Pablo satya ndii ra xiini ra vatyí sacuví ra noo cha tyaá ra cuhva tyi sacuvi ra nuu Nyoo. Tyicuan ta caquihvi ñu chichi noo barcu cha cuahan ityi Siria. ¹⁹Ta cha chaá barcu cuan nya ñuu Éfeso, ta caquitá ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cuhan ra chihin ñu Israel cha ndu iin ri yucuan. ²⁰Ta chacu ndahvi ñu nuu ra na ndoo ra cuaha ca quivi. Soco ña cuñí ra. ²¹Ta catyí ra chi ñu vatyí cha cuahan ra, ta catyí tucu ra tyehe caa:

—Cuñí chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñí ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityi Siria. ²²Quivi nachaa ra ñuu Cesarea ityi Siria cuan, chahan ra chicuhva ra nocumi chi ñu yihí cuenda Nyoo Jerusalén. Yahá cuan ta cuahan ra Antioquía. ²³Ta cha yahá chinyaa ra suhva quivi yucuan, quitá ra ta cuahan ra tahan tahan ñuu ityi Galacia ta Frigia. Ta sandunií ra iini tandihi ñu yihí cuenda Nyoo.

Nu cahán ra Apolos tuhun Nyoo ñuu Éfeso

²⁴Quivi cuan chaá noo ra Israel ñuu Éfeso. Nañí ra Apolos. Ta ñuu ra cuví Alejandría. Ta cuví ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libru. ²⁵Ta vaha xaan cutuhva ra tuhun Sutu Mañi yo. Ta cahán ra chihin cha nii iini ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyá ra Juan ri chitó ra. ²⁶Ta quichaha cahan ra chichi vehe ñuhu chihin cha nii iini ra. Ta cuhva cha chiñi ra Aquila ta cu Priscila, tava siin ñu chi ra ta nacatyí cachi ca ñu tuhun ityi Nyoo chi ra. ²⁷Tyicuan ta

quichaha cuñí ra Apolos cuhun ra ityi Acaya. Ta ra hermano catyinyee ra chi ra. Ta catyaa ra noo carta chi ñu yihí cuenda Nyoo ityi cuan, ta catyí ra chi ñu vatyí na vaha cahan ñu chihin ra tatu chaa ra. Tyicuan ta cuahan ra. Ta cuhva cha chaá ra Acaya cuan tyinyee xaan ra chi ñu chinó iini chi Nyoo cha cuenda tumañi iini cha chaha ra chi ñu. ²⁸Vatyí nu tuvi sañaha cachi xaan ra yoso caa cuhva ña vaha cha sacuvi ñu Israel. Ta sañaha ra cha catyí nu tutu Nyoo vatyí ra Jesús cuví Cristo, ra cha nyatú xaan ñu chi.

Nu cuahan tucu ra Pablo ñuu Éfeso

19 Cha ni ri ca cha ñohó ra Apolos ñuu Corinto, ra Pablo yahá ra ityi yucu ta chaá ra nya ñuu Éfeso. Ta yucuan nañihí ra chi cuaha ri ra yihí cuenda Nyoo. ²Ta ndaca tuhun ra chi ra:

—¿Atu naquehen ndo Tatyí li quivi nachino iini ndo? —catyí ra Pablo chi ra.

Ta canacahan ra cuan ta catyí ra:

—Ni chiin ña chitó ndi cha iyó Tatyí li.

³Tyicuan ta ra Pablo ndaca tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

⁴Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi iini cuatyí. Soco catyí tucu ra chi ñu vatyí cuñí chi cha chino iini ñu chi ra cha cuaquichi ta ican ra cuan cuví ra Cristo Jesús —catyí ra Pablo chi ra.

⁵Cuhva cha cachiñi ra cha catyí ra Pablo tuhun ihya, tyicuan ta nacondutyá ra inga chaha chihin sivi Sutu Mañi yo Jesús. ⁶Ta cuhva cha tyiso ra Pablo ndaha ra siqui ra, quichi Tatyí li siqui ra. Ta quichaha cahan ra inga sahan. Ta saha ra profetizar, o chaha cuenda ra tuhun chaha Tatyí li Nyoo chi ra cuví

cuan. ⁷ Ta uchi uvi tahan ra cha tandihi ra.

⁸ Tyicuan ri chica ra Pablo vehe nuhu nuu cuan chichi cha uñi yoo. Ta cahan ra tuhun Nyoo chihin cha ni iñi ra. Ta nihi cahan ra chihin nu yoso caa nyaca naha Nyoo añima yo. ⁹ Soco yihí nu sandava nu añima nu. Ta ña cuñi nu chino iñi nu. Ta cahan ña vaha nu siqui tuhun ra Cristo nuu ñáyivi, ta catyí nu vatyí ña vaha ityi Sutu Mañi yo. Tyicuan ta ra Pablo canyaha ra nu nyicu nu. Ta chinyaca ra chi nu chinó iñi chi ra Cristo noo sicuela ra cha nañi Tiranno. Ta yucuan cahan ra tuhun ra Cristo chihin ñáyivi ndiquivi ri. ¹⁰ Ta tyicuan caa chinyacuví ra chichi cha uvi cuiya. Ta tandihi ñáyivi nicahnu ityi Asia cuan chiñi nu tuhun Sutu Mañi yo Jesús, tari nu Israel ta nu cha ñima nu Israel cuvi ñándihi. ¹¹ Ta nahnu milagru sacuví Nyoo chihin ndaha ra Pablo. ¹² Vatyí nyacua nya pañitu ta sahma cha tiin ra Pablo, ta chinyaca nu chi nu cuhví ta nduvaha nu. Ta nu yihí tatyí ña vaha chi, quita chi chi nu.

¹³ Ta iyó suhva ra Israel cha cachica noo tahan tahan nuu. Catava ra tatyí ña vaha chi ñáyivi. Ta cacuñi ra cotyiño ra sivi Sutu Mañi yo Jesús vatyí tava ra chi tatyí ña vaha. Ta catyí ra chi tatyí ña vaha cuan:

—Chihin sivi ra Jesús cha cahan ra Pablo tuhun catyí chi ndo vatyí quita ndo —catyí ra.

¹⁴ Tyehe caa chinyacuví ndi ucha tahan sehe noo ra Israel cha nañi Esceva. Ta ra Esceva cuan cuví ra noo ra cuví nuu chi tata sutu. ¹⁵ Ta cha cacahan ra cuan chihin tatyí ña vaha cuan, nacahan tatyí ña vaha cuan chihin ra ta catyí chi tyehe caa:

—Ñohó nui chi ra Jesús. Ta chité yóó ra cuví ra Pablo. Soco nyoho ¿yóó ra cuví nyoho? —catyí tatyí ña vaha cuan chi ra.

¹⁶ Tyicuan ta ra cha yihí tatyí ña vaha cuan chii, ndava ra siqui ra cuan. Ta chihin cha cuaha fuerza ra cuví chasaha ra chi tandihi ra. Ta chahnya cuatyí ra sahma ra. Ta sanduvityaa ra chi ra. Ta sañicuehe ra chi ra. Yucuan ta chihin cha cayuhvi ra ta cachino ra ta cuahan coyo ra. ¹⁷ Tyicuan ta tandihi nu Éfeso, nu Israel, ta nu cha ñima nu Israel cuví ñándihi, chito nu tuhun cuan. Ta yuhví xaan nu cuví. Ta sacahnú nu sivi Sutu Mañi yo Jesús.

¹⁸ Ta cuaha xaan nu chinó iñi nu chi ra. Ta cha coyo nu ta nahma nu cuatyí nu, tandihi cha ña vaha cha chinyacuví nu ta ityi chata ca. ¹⁹ Ta cuaha nu cha sacuhaha tuhun tasi, quichi nyaca nu libro nu. Ta chahmi nu libro cuan nuu tandihi ñáyivi. Ta natava nu cuenda yoso yahvi libro cuan. Cha tandihi quita ta cha uvi xico uchi mil xuhun cuichin. ²⁰ Ta tyicuan ri ta cuahan chitya ca tuhun Sutu Mañi yo. Ta nducuhaha ca nu yihí cuenda ra. Ta tyicuan caa nyehé ñáyivi yoso cha cahnú tunyee iñi iyó chi ra. ²¹ Ta cha yaha tuhun ihya, ra Pablo natyaa ra cuhva cha cuhun ra ityi Macedonia, ta ityi Acaya. Yaha cuan ta cunuhu ra nya Jerusalén tyaá ra cuhva. Ta catyí ra vatyí yaha cuan ta cuñi chi cha cuhun ra nya nuu Roma. ²² Tyicuan ta tachí ra chi uvi tahan ra tyinyeé chi ra nya Macedonia, ra Timoteo ta ra Erasto. Soco ndoo maa ra suhva ca quivi ityi Asia cuan.

Nu naquiquí ñáyivi Éfeso siqui tuhun Nyoo

²³ Ta suri quivi cuan naquiquí ñáyivi nuu Éfeso siqui tuhun Nyoo, ²⁴ vatyí noo ra cha nañi Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe nuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra. ²⁵ Ta cana ra Demetrio

cuan chi ra cha sahá tyiño chihin ra. Ta cana tucu ra chi ra cha casahá tyiño iin ri tyiño cuan. Ta catyí ra chi ra:

—Nyoho ra tahan yo, chitó ndo vatyí chihin tyiño ihya iyó cha tyayí yo. ²⁶ Soco nyoho nyehé ndo ta chiñí ndo yoso caa sacuví ra Pablo ñuu yo Éfeso ihya, ta nicahnu ityi Asia. Vatyí catyí ra tyí nyoo cha savahá ñáyivi ñima Nyoo cuví. Ta cuaha xaan ñáyivi nachino iñi sahá ra. ²⁷ Ta ña vaha cha sacuví ra vatyí ma quiyahví ca xitohyo cha savahá yo. Ta siin ri ma sacahnu ca ñáyivi chi nyoo Diana ta ma saha ca ñu ñáyivi vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandíhi ñáyivi ityi Asia chihin ñu nicahnu ñáyivi sacahnú ñu chi ña. Ta nu cuahan ca chi quívi ma sacahnu ca ñáyivi chi ña tatu chino iñi ñu cha cahán ra Pablo —catyí ra Demetrio.

²⁸ Ta cuhva cha cachiñi ra cha catyí ra, Xaan xaan cacuñí ra. Ta quichaha cana chaa ra ta cacatyí ra:

—Cahnu xaan cuví cu Diana, nyoo cuenda ñáyivi Éfeso ihya —catyí ra.

²⁹ Ta cutondó xiñi tandíhi ñu ñuu cuan. Ta catiñ ñu chi ra Gayo, ta chi ra Aristarco, uvi ra Macedonia cha chicá noo chihin ra Pablo. Ta caxitá quiñoho ra chi ra nyacua nya nu tuhva ñu candu iin ri ñu. ³⁰ Ta ra Pablo cuñí ra quiñvi ra nu nataca ñáyivi vatyí cahan ra chihin ñu. Soco ra hermano, ña chaha ra. ³¹ Ta tyicuan caa tucu suhva ra cuví tyiño ityi Asia, ra cuví amigo ra Pablo, tachí ra tyiño vatyí ña tahán chi tyihí ra chi ra yucuan. ³² Ta nu ndu iin ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáá tuhun cha natacá ñu. ³³ Tyicuan ta ñu Israel, tyatyíño ñu chi noo ra cha nañí Alejandro na quita ra ityi nuu. Ta suhva ñu tayucú yucuan nacatyí ñu chi ra yoso caa cucahan ra. Tyicuan ta

sacuví ra seña chihin ndaha ra vatyí na taxi ri cuví ñu vatyí cuñí ra catyí ra vatyí ñahri cuatyí ñu Israel. ³⁴ Soco cuhva cha chitó ñu vatyí ra Israel cuví ra, tandíhi maa ñu cana chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵ Tyicuan ta secretario ñuu cuan cuhva cha cuví sacutaxin ra ñáyivi, ta catyí ra:

—Nyoho tata ñuu Éfeso ihya. Tandíhi ñáyivi chitó ñu vatyí nyaá siqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumí yo xitohyo ña cha cana cava ityi andivi.

³⁶ Ta yori cuví catyí tyi ña ndicha. Taxi ri ndo, ta ma cunyacuví ri maa ndo tatu ña chitó ndo ñáá cha cuacunyacuví ndo.

³⁷ Vatyí ra cha quichí nyaca ndo ihya ñahri cha suhú ra vehe ñuhu ndo. Ta ni ña cahán ña vaha ra siqui nyoo cuenda ndo. ³⁸ Tatu ra Demetrio ta ra cha sahá tyiño chihin ra chicán ra cuatyí chaha noo ra, na cuhun ra nu nyaá juez. Cuví cacan ra cuatyí nuu ra cuan, ta maa ra cusandaa ra cuatyí cuan. ³⁹ Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley.

⁴⁰ Vatyí tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chi yo ñáá cuenda naquiquí yo —catyí ra cuví secretario cuan.

⁴¹ Ta cha yaha catyí ra tuhun cuan catyí ra vatyí na cunuhu ñu nya vehe ñu.

Nu yahá ra Pablo ityi Macedonia ta cuahan ra Grecia

20 Cha yaha tuhun cha naquiquí ñáyivi ñuu Éfeso cuan, cana ra Pablo chi tandíhi ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chi ñu. Vatyí maa ra chaa chi quívi cha cuhun ra inga ityi. Ta ca-

han ra chihin ñu. Tyicuan ta cuahan ra Macedonia. ²Ta chahan ra tandihi ityi cuan ta sanduniñ ca ra iñi tandihi ñu yihí cuenda ra Cristo cha iyó ityi cuan chihin tuhun cahán ra. Tyicuan ta chaq ra ityi Grecia. ³Ta yucuan ndoo ra uñi yoo. Ta cha nyaá ra cha cuaquehen ra barcu ta cuhun ra Siria, ta chito ra vatyí nducú ñáyivi Israel chi ra vatyí cahñi ñu chi ra. Yucuan chaha natyaa ra iñi ra cha cuhun ra chihin chaha ra ityi nu ñuhu ri. Ta nayaha ra inga chaha ityi Macedonia. ⁴Ta cuahan ra Sópater, ra ñuu Berea chihin ra. Ta cuahan ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahan ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo. ⁵Ra hermano ihya cayaha ra ityi nuu ta canyatú ra chi ndi ñuu Troas. ⁶Ta nyuhu nyatú ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quitá ndi ñuu Filipino chihin barcu. Ta nu cu ohon quivi ta natahan ndi chi ra cha cuahan ityi nuu nya ñuu Troas. Ta yucuan ndoo ndi ucha quivi.

Nu cahán ra Pablo tuhun Nyoo ñuu Troas

⁷Ta cha timingu cuan ndu ín ri ndi chihin ñu yihí cuenda Nyoo ñuu Troas cuan. Ta quivi cuan cuacachi ndi pan ta coho ndi vinu vatyí nicohon iñi ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuvi ora ñuu, vatyí cha nyaá cha cuhun ndi inga quivi cuan. ⁸Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhu candil cayú. ⁹Ta noo ra tyivaa cha nañí Eutico nyaá ra ventana tyasohó ra, soco ña cunyeë ra ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacava ra nya nu ñuhu. Ta nacoñehé ra chi ra soco cha chihí ra.

¹⁰Tyicuan ta ra Pablo noo ra ta chaq ra nu catuví ra tyivaa cuan. Ta natyihí nundaha ra chi ra tyivaa cuan, ta catyí ra chi ndii hermano:

—Ma yuhvi ndo. Nyitó ra —catyí ra.

¹¹Tyicuan ta nandaq tucu ra Pablo ta chachí ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra. ¹²Ta ra tyivaa cuan nandoto ra ta cuanuhu ra nya vehe ra. Ta sii xaan nanduví cuñi ñu.

Nu quitá ra Pablo ñuu Troas ta cuahan ra nya ñuu Mileto

¹³Nyuhu yaha ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaaq maa ndi tyiño chihin ra. Vatyí maa ra cuñí ra cuhun ra ityi nu ñuhú ri chihin chaha ra. ¹⁴Ta cuhva cha nañihí tahan ndi chihin ra nya ñuu Asón cuan, quihvi ra chichi barcu chihin ndi ta cuahan ndi nya ñuu Mitilene. ¹⁵Quitá ndi yucuan ta yaha ndi ityi nuu noo ñuhú luhlu cha nañí Quío nyaá mahñu tyañuhu. Ta cha inga quivi cuan chaq ndi inga ñuhú luhlu cha nañí Samos. Yaha ndi yucuan ta nyitatu ndi ñuu Trogilio. Ta cha inga quivi chaq ndi nya ñuu Mileto. ¹⁶Tyicuan caa cuví vatyí ra Pablo ña cuñi ra cunyaa ca ra cuaha quivi ityi Asia. Ña cuñí ra cuhun ra Éfeso vatyí numi ri cuñí ra cha ra ñuu Jerusalén, vatyí tatu cuhva chi cuhva cunyaa ra quivi vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyí cuhun ra ta ma quichi ca ra

¹⁷Ta cuhva cha nyicu ndi ñuu Mileto, cana ra Pablo chi ra yihí ndaha chi ñu yihí cuenda Nyoo Éfeso. ¹⁸Ta cuhva cha chaq coyo ra, catyí ra tyehe caa chi ra:

—Maa ndo chito ndo yoso caa cuhva chica noi nyata quivi xihna ri cha chai

Asia ihya. ¹⁹Tandihí quiví cha chinyají chihin ndo ta sacuví tyiño nuu Sutu Mañi yo chihin cha nduquí cuhva cha ma cahnu sahi chii, vasi cuaha tindoho chihin cha cuaha tucuihya iñi. Ta cuaha tindoho quichi siqui sacuví ñáyiví Israel. ²⁰Soco ña sandihí cha cahán noi tuhun Nyoo nuu ndo. Vatyí ihya cuví tandihí cha chiñuhú chi ndo tacuhva coo vaha ndo. Ta sañahí tuhun Nyoo chi ndo nu ndu iin ri ndo ta nya vehe ndo ñandihí. ²¹Ta sañahí tuhun ihya chi ñu Israel ta chi ñu cha ñima ñu Israel cuví. Sañahí chi ñu na nasama ñu cuhva iyó ñu nuu Nyoo ta nachino iñi ñu chi Sutu Mañi yo Jesucristo. ²²Ta vityin cuhin nya ñuu Jerusalén vatyí maa Tatyí li catyí. Ta ña chité ñáá cha cucuvi chii yucuan. ²³Soco noo ri cha chité vatyí tandihí ri nu cuahín Tatyí li catyí chii vatyí nyatú vehe caa chii, ta cuaha tindoho ñandihí. ²⁴Soco ni noo ihya ta ña chicá xiñi. Ta ni ñayiví ta ña vale cha cuenda mai, tacuhva vatyí chihin tusii iñi ta cuví sañihí sahatyiñe tyiño cha chaha Sutu Mañi yo Jesús chii, cha sañahi tuhun vaha yoso cuhva cuñí Nyoo chi yo.

²⁵Ta vityin chitó vahi vatyí tandihí nyoho cha cahin tuhun Nyoo chihin ndo, ma nyehe ca maa ndo chii. ²⁶Yucuan chaha cuñí catyí chi ndo vityin vatyí ñahri ca cuatyí yuhu cha cuenda ni noo nyoho. ²⁷Vatyí chihin cha niñi cuñí ta cahin tuhun Nyoo chihin ndo ta ñahri cha tixehí. ²⁸Yucuan chaha saha ndo cuenda chi ndo. Ta saha tucu ndo cuenda chi tandihí ñu yihí cuenda Nyoo. Vatyí maa Tatyí li tyatyño chi ndo vatyí saha cuenda ndo chi ñáyiví iyó vehe ñuhu Sutu Mañi yo. Maa ra satá ra chi ñu chihin niñi ra. ²⁹Vatyí chité vatyí quiví cuhin, cuquichi inga ra. Ta cuñi ra sativí ra chi ñu yihí cuenda Sutu Mañi yo. Tari lobo xaan cha chahí chi mbee, tyicuan caa cuquichi ra cuan sativí ra añaíma ndo. ³⁰Ta suri nu nyicu ndo, cundicuita

suhva ra. Ta cusañaha ra cha ña ndicha tacuhva cunyicon ndo chi ra. ³¹Yucuan chaha saha vaha ndo cuenda. Nícohon iñi ndo vatyí chichi cha uñi cuiya ña sandihí cha cahín tuhun Nyoo nuu ndo. Cha ñicahñu ta cha cuaa cahín chihin noo noo nyoho, ta chihin cha cuihya iñi coto sandihí ndo tuhun Nyoo.

³²Ta vityin nyoho yañi, natyaí chi ndo ndaha Nyoo. Saha ndo cuenda ndii tuhun cahan ra chihin yo. Sacotó ra chi yo tyi cuñí xaan ra chi yo. Ta yucuan sandunyeé xaan chi iñi yo tacuhva cuví yo ñáyiví yihí vaha cuenda ra chihin tandihí inga ñu cha nacuhva cuenda ñu chi ñu chi ra. ³³Yuhu ña nyiyó iñi ni minoo cha iyó chi ndo. Ni ri xuhun ndo, ni ri sahna ndo. ³⁴Nyoho chitó vaha ndo vatyí sahá tyiño xain chihin ndahi tacuhva ñihí cha chiñuhú chii chihin ra chicá noo chihin. ³⁵Tyicuan ri sañahí chi ndo vatyí cuñí chi cha saha tyiño ndo ta tyinyee ndo chi ñu iyó cha chiñuhu chi. Ta nícohon iñi ndo tuhun cahán Sutu Mañi yo Jesús nu catyí ra tyehe caa: “Sií ca cuñi noo ñáyiví ñu chahá, ta ñima ca ñu ita iñi”, catyí Sutu Mañi yo.

³⁶Cha yaha cha catyí ra Pablo tuhun ihya, chicuñi chiti ra. Ta chican tahvi ra chihin tandihí ñu. ³⁷Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chi ra. ³⁸Vatyí ra Pablo catyí ra tyi cuhun ra inga ñuu ta ma cuhun ca ra nu nyicu ñu. Tyicuan ta chinyaca ñu chi ra nyacua nya nu quihví ra chichi barcu.

Nu cuahan ra Pablo ñuu Jerusalén

21 Tyicuan ta sandoo ndi chi ra hermano ta quihví ndi chichi barcu. Ta cuahan ndi iin ndoo ityi ri nya Cos noo ñuhú luhlu mahñu tyañuhu. Ta cha inga quiví cha ndi nya Rodas inga ñuhú luhlu ri. Yucuan ta cuahan ndi nya Pátara. ²Ta ñuu Pátara cuan nañihí ndi nonga barcu cha cuahan nya Fenicia. Ta

quihvi ndi chichi inga barcu cuan ta cuahan ndi. ³Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta chaá ndi nya ñuu Tiro vatyí yucuan cuatava ra carga cha nyisó barcu cuan. ⁴Ta cha nañihí ndi chi ñu yihí cuenda Nyoo ñuu cuan, ndoo ndi chihin ñu ucha quívi. Ta catyí ñu chi ra Pablo vatyí ña tahán chi cha cuhan ra Jerusalén vatyí tyicuan caa sañaha Tatyí Ii chi ñu. ⁵Soco cha ndihí ucha quívi cuan quitá ndi ñuu cuan. Ta nu cuaquita ndi tandihí ra hermano chihin ñasihí ra ta sehe ra chinyaca ñu chi ndi nyacua nya ityi chata ñuu. Ta nu ñiti yuhu tyañuhu cuan nicuini chiti ndi, ta chicán tahvi ndi chi Nyoo. ⁶Tyicuan ta nanumi ndi chi tahan ndi. Tyicuan ta quihvi ndi chichi barcu. Ta maa ñu cuanuhú coyo ñu vehe ñu.

⁷Ta quitá ndi ñuu Tiro cuan ta cuahan ndi nya ñuu Tolemaida. Ta yucuan chaha ndi nocumi chi ñu hermano. Ta ndoo ndi chihin ñu noo quívi. ⁸Ta cha inga quívi quitá ndi ta cuahan ndi ñuu Cesarea. Ta yucuan chahan ndi vehe ra Felipe ra cha sacotó xaan chi ñáyivi yoso caa sacacu Nyoo añima ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra. ⁹Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahán Nyoo. O cuvi chi cuan sahá ñu profetizar. ¹⁰Ta cha cuaha ri quívi cha chaá ndi yucuan, tyicuan ta chaá noo profeta Nyoo cha nañí Agabo. Quichi ra ityi Judea. ¹¹Quichi nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyí ra:

—Tatyí Ii Nyoo catyí chii vatyí tyehe caa cunuhñi chitoho sincho ihya nya Jerusalén. Ta cucuhva cuenda ñáyivi Israel chi ra chi ra inga ñuu —catyí ra Agabo.

¹²Cha chiñi ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyí ma cuhan ra Jerusalén.

¹³Soco ra Pablo catyí ra:

—¿Ñáá tuhun chacú ndo ta sanducuihyá ndo ñni? Yuhu ñahri cuende. Ñima cha cunuhñi ri, vasi cahñi ra chii soco cha cuenda Sutu Mañi yo Jesús —catyí ra chi ndi.

¹⁴Ta cha nyehe ndi tyi ña cuvi chasaha ndi chi ra, saña ndi. Ta catyí ndi:

—Na cuvi maa cuhva cuñí maa Sutu Mañi yo.

¹⁵Cha yaha tuhun ihya sanduvaha ndi chi ndi ta cuahan ndi nya Jerusalén.

¹⁶Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra ñuhú Chipre. Mnasón nañí ra. Cuaha xaan cuiya chinó ñni ra chi ra Cristo. Maa ra chinyaca ra chi ndi nya vehe ra cha nyaá Jerusalén vatyí yucuan cunyaa ndi.

Nu cuanyehe ra Pablo nu nyaá ra Jacobo

¹⁷Cuhva cha chaá ndi Jerusalén, ñu yihí cuenda ra Cristo chihin cha siñ cuñí ñu cahán ñu chihin ndi. ¹⁸Ta inga quívi cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihí ra yihí ndaha vehe ñuhu. ¹⁹Chaha ra Pablo nocumi chi ra. Yaha cuan ta nacatyí ra tahan tahan ri tuhun yoso caa chotyño Nyoo chi ra nu cahan ra tuhun Nyoo chihin ñu cha ñima ñu Israel cuví. ²⁰Cuhva cha cachiñi ñu tuhun ihya, casacahnu ñu chi Nyoo, ta catyí ñu chi ra Pablo:

—Vaha yañi yo, soco cha nyehun vatyí cuaha xaan mil ñu Israel chinó ñni ñu chi ra Cristo. Ta tandihí ñu catyí ñu vatyí ñni cha cunyicon yo ley ra Moisés. ²¹Ta ñihí ñu tuhun vatyí yoho sañahún chi tandihí ñu Israel cha iyó inga ñuu vatyí ma quichaha ca ñu ley cha sañaha ra Moisés, ta catyún chi ñu vatyí

ña tahán chi sacuví ñu costumbre circuncisión chihin cha lee sehe ñu, ta ni ma sacuví ca ñu costumbre chahnu yo. ²² ¿Yoso caa sacuví yo vityin? Vatyí ñáyivi cuañihi ñu tuhun tyi chaun ihya. ²³ Vaha taxin ca cha sacuvun tyehe caa. Ihya iyó cumi tahan rayii cha nyaá sacuví ra noo cha tyaá ra cuhva tyi sacuví ra nuu Nyoo. ²⁴ Cuahan chihin ra na ndundiun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndii xiñi ra cuhva catyí ley. Ta cha sacuvun tyicuan caa ta coto tandihi ñáyivi vatyí ña ndicha cha cahán ñu sicun, soco cunyehe ñu vatyí quichahá tucu yoho ley ra Moisés. ²⁵ Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyí ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quití cha cava ñu sucun ta ña chati niñi. Ta ni noo ñu ta ma coo ñusihi o rayii chi ñu tatu ñima ñasihi o yii ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

²⁶ Tyicuan ta tuví inga quivi ta cuahan ra Pablo chihin ndi cumi tahan ra cuan. Ta sandundií ra chi ra nuu Nyoo iin ri chihin ra cuan. Tyicuan ta quihví ra chichi vehe ñuhu cahnu vatyí sacoto ra chi tata sutu ama cundihi cha ucha quivi cha ndundií ndi cumi tahan ra cuan, ta cuacuhva ra ofrenda cha cuenda noo noo ra. ²⁷ Soco cha cuñí cuii ri ndihi ucha quivi cuan, ta suhva ra Israel cha quichí nya Asia canyehe ra chi ra Pablo chichi vehe ñuhu. Ta casanaquiquí ra chi tandihi ñáyivi, ta catiñ ra chi ra Pablo. ²⁸ Ta cacanachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihi ri ityi. Ta sañahá ra chi tandihi

ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyaá ra Moisés, ta ña vaha vehe ñuhu ihya. Ta siin ri vityin tyihí ra chi suhva ra Grecia chichi vehe ñuhu sativí ra nu ii ihya —catyí ra canachaá ra.

²⁹ Tyehe caa cacatyí ra vatyí ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Éfeso. Ta cacuñí maa ra vatyí ra Pablo chinyaca chi ra chichi vehe ñuhu. ³⁰ Ta tandihi ri ñáyivi ñuu naquiquí ñu. Ta ñáyivi chinó vavaha ñu vachi coyo ñu. Tyicuan ta catiñ ñu chi ra Pablo. Ta caxita quínoho ñu chi ra nya ityi chata vehe ñuhu, ta numi ri nacasi ñu yuvehe. ³¹ Cha cuñí ñu cahñi ñu chi ra, ta chaá tyiño chi comandante cuenda sindaro vatyí tandihi ñu Jerusalén iyó xaan naquiquí. ³² Tyicuan ta comandante cuan sandu iin ri ra capitán ta sindaro. Ta cachino ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihí ñu cha cañí ñu chi ra Pablo. ³³ Tyicuan ta tuhva comandante nu nyaá ra Pablo. Ta tachí ra tyiño natiin sindaro chi ra, ta cháhñi ra chi ra chihin uvi tahan cadena. Yahá cuan ta ndaca tuhun ra chi ra yóo ra cuví ra, ta ñáá cha sacuví ra. ³⁴ Soco ñáyivi siin siin tuhun canachaá ñu. Ta comandante cuan ña cutuñí maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel. ³⁵ Cuhva cha cachaá ra nu cuayi yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaá soco sindaro cuan chi ra. ³⁶ Vatyí tandihi ñu nyicón ñu chi ra, ta canachaá ñu ta catyí ñu:

—¡Cahñi ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego? ³⁸Tu tyicuan caa, ñima yoho cuví ra ñuu Egipto cha quichí quívi cuan ta sacañi tahan ra chi ñáyivi síqui gobiernu ta chinyacá ra chi cumi mil tahan ñáyivi ityi ñuhu ityi —catyí comandante cuan chi ra Pablo.

³⁹Tyicuan ta ra Pablo catyí ra chi ra:

—Yuhu noo ra Israel cuví ta caquí noo ñuu cha nañí Tarso cha cuví minoo ñuu cahnu ityi Cilicia. Soco saha noo tumañi ñi chii vatyi cuhvon nacahin chiin chihin ñáyivi —catyí ra Pablo chi comandante cuan.

⁴⁰Tyicuan ta chahá comandante cuan permiso chi ra. Tyicuan ta nicuinanyaa ra nu cuayi ta chahá ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22—Nyoho tata, ta nyoho yañi, cuiñi ndo cha catyí chi ndo tyi coto ndo vatyi yuhu ñahri cuatyí —catyí ra Pablo chi ñáyivi cuan.

²Cha cachiñi ñu vatyi cahán ra chihin ñu chihin sahan hebreo, taxi ri cacuvi ñu. Ta ra Pablo catyí ra:

³—Yuhu ra Israel cuví tari maa ndo. Ta caquí ñuu Tarso ityi Cilicia. Soco Jerusalén ihya chahni. Ta ra Gamaliel sañaha chii tandihi maa cuhva yoso caa quichahi ley sutu chahnu yo. Ta tyicuan ri nduquí cuhva sacuví tyiño nuu Nyoo chihin cha tandihi añime, tari maa cuhva nyacuví nyoho quívi vityin. ⁴Yuhu, nu quichi chí chicá nyiquen ta satañi ñi chí ñu yihí cuenda ra Cristo. Ta nacuhvā cuende chí ñu na cacahñi ra chí ñu. Ta tyihí chí ñu chichi vehe caa, rayi ta ñusihi. ⁵Ra cuví nuu chí tata sutu chihin ra cacuví mandoñi, cacuví ra cha ndaa vatyi ican ra chahá tutu vatyi cuví tiin chí yañi yo, ra yihí cuenda ra Cristo ñuu Damasco. Chahin nyicuan chinanduquí chí ñu chinó ñi chí ra Cristo, vatyi

tacuhva cunuhñi ñu chihin cadena, ta quichi nyaque chí ñu nya Jerusalén ihya vatyi cutachi tuñi ra chahnu chí ñu.

Nu nacatyí ra Pablo yoso caa nanduví ra cuenda ra Cristo

(Hch. 9.1-19; 26.12-18)

⁶Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana ñi ta ndundichin nicachico nu cuahin chihin noo nduva ñuhu cha quichi ityi andivi. ⁷Tyicuan ta nduve nu ñuhú. Yaha cuan ta chiñi noo ndusu cha catyí chii: “Saulo, Saulo, ¿ñáá tuhun cha chicá nyicon chii tyehe caa?” catyí ndusu cuan chii. ⁸Tyicuan ta ndacá tuhun chí ra ta catyí: “¿Yóó yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chí”, catyí ra. ⁹Ndi ra cha cuahan coyo chihin canyehe ra ñuhu cuan, ta nayuhvi ra. Soco ña cachiñi ra ndusu ra cha cahán chihin. ¹⁰Tyicuan ta quichahá catyí yuhu chí ra: “Sutu Mañi yuhu, ¿ñáá cha tahán chí sacuvi?” Ta catyí ra chii: “Ndicuita ta cuahan nya Damasco. Ta yucuan cucatyí noo ra chuun tandihi cha tahán chí sacuvun”, catyí Sutu Mañi yo chii. ¹¹Ta vatyi nducuañ saha ñuhu cuan, ra tahin cayindahá ndahi ta cachinyaca ra chii nya Damasco.

¹²Ta yucuan iyó noo ra cha nañi Ananías. Ta sacahnú xaan ra chí Nyoo cuhva catyí ley cha tyaá ra Moisés. Ta tandihi ñu Israel cha iyó Damasco catyí ñu vatyi vaha xaan ñáyivi cuví ra Ananías. ¹³Quichí nyehé ra cuan chii. Ta cuhva cha chaá ra, catyí ra chii: “Yañi Saulo, nanyehe inga chaha”, catyí ra chii. Ta caa cuhva ri cuan nanyehi. Ta cuví nyehi chí ra Ananías cuan. ¹⁴Ta catyí ra chii: “Nyoo cuenda sutu yo nacachi ra chuun nyata ityi chata ca, vatyi coton cuhva cuñi ra, ta nyehun chí ra Jesucristo vatyi vaha ra, ta cuiñun ndusu ra. ¹⁵Vatyi yoho cuacahun tuhun

ra nuu tandihi ñáyivi. Cuanacatyun cha nyehun ta cha chiñun. ¹⁶Ta vityin, ma cuatu con. Ndícuita ta condutyon. Ta cacan tahvun chi Sutu Mañi yo tyi cuasan-dachi ra cuatyun”, catyí ra Ananías chii.

Nu nacatyí ra Pablo yoso caa chahá Nyoo tyiño chi ra vatyí cuhun ra inga ñuu cucahan ra tuhun ra Cristo

¹⁷Yaha cuan ta cuanuhin Jerusalén ta cuhva cha nachai, chahin vehe ñuhu cahnu chicacān tahvi. Ta nyehi noo visión. ¹⁸Nyehi chi Sutu Mañi yo. Ta catyí ra chii: “Sanumi. Quita cha numi ri Jerusalén vatyí ma chino iñi ñu tuhun cha cucahun”, catyí ra chii. ¹⁹Tyicuan ta quichaha catyí yuhu chi ra: “Sutu Mañi yuhu, maa ñu chitó ñu vatyí yuhu chahin tandihi vehe ñuhu. Ta tijñ chi ñu chinó iñi chuun, ta tyihí chi ñu vehe caa ta cañi chi ñu. ²⁰Ta quivi chati niñi ra Esteban ra cha cahan cuendon, yuhu ñandihí nyaí yucuan. Ta ndoi vaha cha chahñi ñu chi ra. Ta sahadumí sahma ra cha cachahñi chi ra”, catyí yuhu chi Sutu Mañi yo. ²¹Tyicuan ta catyí ra chii: “Cuahan, vatyí tachí chuun nu cañi, nu nyicu ñu cha ñima ñu Israel cuví”, catyí Sutu Mañi yo chii.

Nu nyaá ra Pablo ndaha ra comandante cuenda ñuu Roma

²²Ihya ri tyasohó ñu tuhun cahan ra Pablo. Tyicuan ta quichahá canachaá ñu ta catyí ñu:

—¡Cahñi ndo chi ra chiña! Ña tahan chi coo ra ñayivi —catyí ñu.

²³Ta canachaá ca ñu. Ta sacaá ñu sahma ñu. Ta sacaá ñu ñiyaca nu tatyí cha cuenda cha xaan xaan cuñí ñu. ²⁴Yucuan chaha comandante cuan catyí ra na cutyihí sindaro chi ra chichi cuartel. Ta tachí ra tyiño na cañi ra chi ra, vatyí cuñí ra cha quita cha ndaa ñáá tuhun cha canachaá ñáyivi siqui ra cha tyicuan caa. ²⁵Soco cha yaha cachahñi ra chi

ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

—¿Atu iyó ityi chi nyoho cha cañi ndo chii? Vatyí yuhu ra cuenda ñuu Roma cuví ta siñ ri ta cutuñi ca chii nu juez —catyí ra Pablo chi ra.

²⁶Cuhva cha chiñi capitán cha cahan ra Pablo, chahan ra chisacoto ra chi comandante. Ta catyí ra chi ra:

—Saha cuenda chuun chihin cha nyacuvún. Vatyí ra cuan, ra cuenda ñuu Roma cuví ra —catyí ra chi ra.

²⁷Tyicuan ta comandante cuan cuahan ra nu nyaá ra Pablo. Ta ndacá tuhun ra chi ra tatu ndicha vatyí ra cuenda ñuu Roma cuví ra. Ta ra Pablo catyí ra vatyí ican. ²⁸Tyicuan ta catyí comandante cuan chi ra:

—Yuhu cuaha xaan xuhun tyiyahvi ta nanduví noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caqui —catyí ra.

²⁹Ta tyicuan caa ta sindaro cha cuacañi chi ra canyahá ra ta cuahan coyo ra. Ta nyacua nya comandante ta nayuhvi ra cha cuenda cha chahñi ra chi ra chihin cadena. [Vatyí cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu iin ri ra Israel

³⁰Tuvi inga quivi ta comandante cuan cuñí ra coto ra ñáá cuatyí tyaá ñu Israel chaha ra Pablo. Ta ndachí ra cadena cha nuhñi ra. Ta tachí ra tyiño na ndu iin ri ra cuví nuu chi tata sutu, ta tandihi ra cuenda junta. Tyicuan ta tavá ra chi ra Pablo vehe caa ta chinyaca ra chi ra nu iyó junta cuan.

23 Ta ra Pablo nyehé ra chi tandihi ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quivi ihya iyó vahi nuu Nyoo ta ñahri cha ña vaha sacuví nuu ra —catyí ra Pablo.

²Tyicuan ta ra Ananías ra cuví nuu chi tata sutu tachí ra chi ra nyicú yatyin ri nu nyaá ra Pablo, na nacañi ra ndaha yuhu ra. ³Soco ra Pablo nacahan ra nu cahán ra ta catyí ra:

—¡Xihna ca chi maun cucañi Nyoo, vatyi sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáá tuhun cha tachun nacañi ra chii? ta ñima tyicuan caa catyí ley —catyí ra Pablo.

⁴Tyicuan ta ra canyicu yucuan catyí ra chi ra:

—Ña vaha cha cahún chi ra cuví nuu chi tata sutu cuenda Nyoo —catyí ra chi ra Pablo.

⁵Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyi catyí tuhun Nyoo tyi ma cahan ña vaha yo siqui ra cuví tyiño ñuu yo —catyí ra.

⁶Tyicuan ta tuví iñi ra Pablo vatyi suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñi chi nuu ndo vatyi chinó iñi tyi nandotó ñu chihi —catyí ra Pablo.

⁷Cuhva cha catyí ra tuhun ihya, ra fariseo ta ra saduceo, quichaha candatuhun tahan ra suri chihin tahan maa ra, ta cacusiñ ra. ⁸Vatyi ra saduceo catyí ra vatyi ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihí ihya. ⁹Tandihí ra vaa ri ca cananduví ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyehe xihna ndo, ñahri cha ña vaha sacuví ra ihya. Soco tatu noo ángel ca-

han chihin ra, saha yo cuenda coto vaha siqui Nyoo cahán ña vaha yo —catyí ra.

¹⁰Cha chiñi ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachí ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel. ¹¹Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sanduniñi iñun, Pablo. Vatyi tari cahún tuhun Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel cuhva cahñi ra chi ra Pablo

¹²Cha inga quivi, suhva ra Israel catyihí tahan ra tuhun. Catyí ra vatyi ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra. ¹³Yaha ca uvi xico ra catyihí tahan tuhun ihya nuu Nyoo. ¹⁴Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu iñ ri tuhun cahan ndi nuu Nyoo vatyi ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi. ¹⁵Ta vityin nyoho sacuhun ndo tuhun chi comandante. Catyi ndo chi ra na quichi nyaca ra chi ra Pablo nuu ndo ityaan. Saha ndo tuhun vatyi cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶Soco sehe cuhva ra Pablo chiñi cue cha cahán ra. Ta chahan cue chisacoto cue chi ra Pablo nya cuartel. ¹⁷Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyi iyó noo tuhun

cuñí cue sacoto cue chi ra —catyí ra Pablo chi ra.

¹⁸Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyí quichi nyaque chi ra cuehe luhlu ihya vatyí cuñí cue cahan cue chuhun —catyí ra chi ra.

¹⁹Tyicuan ta tiñ comandante ndaha ra cuehe luhlu cuan ta tava siin ra chi cue ta catyí ra chi cue:

—¿Ñáá túhun cuñun catyun chii?

²⁰Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyí catyí ra chuun na sacuhun chi ra Pablo nu iyó junta tyaan. Vatyí casaha ri maa ra cha cuñí ra cha cutuñi vaha ca chi ra. ²¹Soco ma chino iñun chi ra vatyí yaha ca uvi xico tahan ra nyatú xehe chi ra ityí. Ta tyanaha ra chihin nuu Nyoo vatyí ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacúvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²²Tyicuan ta catyí comandante chi ra cuehe luhlu cuan vatyí yori chihin cahán cue tuhun cha catyí cue chi ra. Yaha cuan ta natachí ra chi cue.

Nu cacu ra Pablo ndaha ra Israel ta cuahan ra nuu ra gobernador cha nañi Félix

²³Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyí cuhun ndo Cesarea cuhva caa iñin cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza. ²⁴Sanduvaha ndo caballo coso ra Pablo. Ta saha cuenda vaha ndo chi ra

ityí cuahan ndo na chaa vaha ra nu nyaa ra Félix gobernador —catyí comandante chi capitán cuan.

²⁵Tyicuan ta tyaa ra noo tutu quindaha ra cuhun ra. Ta tuhun cha tyaa ra nu carta, ican cuví ihya:

²⁶“Yuhu ra Claudio Lisias sacuhin noo carta ihya chi yoho, tata gobernador Félix, vatyí vaha ñáyivi cuvun. Ihya vachi nocumi chuun.

²⁷Ra Pablo ihya, catiñin ra Israel chi ra. Ta cacuñí ra cacahñi ra chi ra. Soco cuhva cha chite vatyí ra cuenda nuu Roma cuví ra, chahin chihin sindaro ta sacaquí chi ra. ²⁸Ta vatyí cuñí cote ñáá cuatyí tyaá ñu siqui ra, chinyaque chi ra nu iyó junta ra cacuví mandoñi ñu Israel.

²⁹Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chi ra. Ta ni ri ña tahán chi cohon ra vehe caa. ³⁰Soco vatyí ñihí tuhun vatyí ra Israel canducu cahñi ra chi ra, yucuan chaha tachí chi ra nuu yoho. Ta catyí tiqui chi ra cha tyaá cuatyí siqui ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaa ra.

³¹Tyicuan ta quehen sindaro chi ra Pablo tari cuhva catyí ra Claudio chi ra, ta chinyaca ra chi ra nya Antípatris suri maa cha cuaa cuan. ³²Cha inga quiví sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo. ³³Ta cuhva cha chaa coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihí. ³⁴Cha yaha cha sacuahā ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vatyí ra Cilicia cuví ra ³⁵ta catyí ra chi ra:

—Na quichi xihna ra tyaá cuatyí chahun. Tyicuan ta cusandai tyiñon —catyí ra chi ra.

Tyicuan ta tachí ra tyiño na casaha cumi sindaro chi ra nya vehe tyiño cha savahá ra Herodes ta cha naha.

Nu cutuñí chi ra Pablo nuu ra Félix

24 Yahá ohon quivi ta ra Ananías, ra cuví nuu chi tata sutu, chaá ra ñuu Cesarea cuan chihin suhva ra cacuví mandoñi, ta chihin noo ra cahan chaha ñáyivi cha nañí Tértulo. Chaá coyo ra nuu ra gobernador Félix vatyí cacán ra cuatyí chaha ra Pablo. ²Tyicuan ta tachí ra Félix na quichi nyaca sindaro chi ra Pablo. Tyicuan ta quichahá chican ra Tértulo cuatyí chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vatyí taxi ri iyó ñuu ndi, ta vaha iyó ndi vatyí yindaha vahun ñuu ndi. ³Nacuhvá xaan ndi tyahvi nyoo chi yoho tata Félix, vatyí yoho, vaha ñáyivi cuvún. ⁴Soco ña cuñí sayangue chuun chihin cha cuaha tuhun cahin, yucuan chaha chiquén noo tumañi ñi chuun na cuiñun suhva tuhun cuacahan ndi. ⁵Vatyí chitó ndi tyi rayii ihya ñima ra vaha cuví ra, noo cuehe cuví ra. Ta tandihi ri ityi sanaquiquí ra chi ñu Israel. Ta ican ra cuví xiñi noo ityi ñáyivi nyicón chi ra Jesús ra ñuu Nazaret. ⁶Ny-acua cuñí ra sacuvi ra noo cha ña tahán chi vatyí ña sahá ra ñáyivi vehe ñuhu cahnu. Ta nyuhu tiñ ndi chi ra, tacuhva tachi tuñi ndi chi ra tari cuhva ley maa ndi. ⁷Soco comandante Licias chasí ri ra ta chihin cuaha fuerza ta tinyaa ra chi ra chi ndi. ⁸Ta catyí ra vatyí tatu cuñí ndi cacán ndi cuatyí chaha ra, cuñí chi cha cacán ndi nuu maun. Nyehe maun. Sañahmon chi ra ta coton tyi ndicha cha catyí ndi —catyí ra Tértulo.

⁹Tyicuan caa tucu ra Israel cha canyicu yucuan, catyí ra vatyí ndicha tandihi tuhun cahan ra Tértulo. ¹⁰Tyicuan ta ra Félix savahá ra seña chi

ra Pablo vatyí nacahan ra. Ta ra Pablo quichaha catyí ra:

—Chité tyi cha cuaha xaan cuiya ny-acá ñahun ñuu ihya. Ta yucuan chaha sii vavaha cuñí vatyí nuu maun cuacutuñi chi yuhu vityin. ¹¹Tatu ndaca tuhun cuacoton tyi cha iyó ri noo uchi uvi quivi cha chahin Jerusalén. Chahin yucuan vatyí sacahni chi Nyoo. ¹²Ta yori chihin cuví yuhi. Ni ña sanaquiquí chi ñáyivi chichi vehe ñuhu cahnu. Ñahri maa sacuvi, ni ri chichi vehe ñuhu, ni ri chichi ñuu. ¹³Ta cuatyí cha tyaá ra ihya siqui, ña ndicha maa. ¹⁴Soco noo cha catyí chi ndo vityin vatyí yuhu sacahni chi Nyoo cha sacahnú sutu chahni. Sacahni chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó ñi ndii maa tuhun cha nyaá nu libru ley cha tyaá ra Moisés. Ta chinó ñi tandihi tuhun catyaa ra profeta cuenda Nyoo ñandihí. ¹⁵Ta suri chinó ñi vatyí Nyoo cusanandoto ra ñáyivi chihí, ñu vaha ta ñu quiñi iyó, tari chinó ñi tucu maa ra ihya. ¹⁶Ta yucuan chaha tyicuan ri nduquí cuhva cha cachi cói nuu Nyoo, ta nuu ñáyivi ñandihí.

¹⁷Cuaha cuiya chica noj inga ityi. Yahá cuan ta cuanuhi nya Jerusalén ñui vatyí nacuhva cuende xuhun chi ñu ndahvi ñu yihí cuenda Nyoo, ta vatyí cuhve noo cha cuhve chi Nyoo. ¹⁸Yuhu tyicuan caa sacuví chichi vehe ñuhu cahnu, ta suhva ra Israel ityi Asia, nyehe ra chii yucuan cha yahá cha sandundi chii nuu Nyoo cuhva catyí maa nu ley ndi. Soco ña cuaha ñáyivi nyicu, ta ni ña naquiquí ñu. ¹⁹Ican ra cha nyehe chii cuan, cuñí chi cha quichi ra ta cuhva ra cuenda tatu iyó cha sacuvi. ²⁰O ña-catyí maa ra cha canyicu ihya tatu nañihí ra cuatyí yuhu quivi cutuñi chii nuu ra nu chiyo junta ra cacuví nuu chi ñu Israel. ²¹O vasi cuví chi cha cuenda noo ri tuhun chahin chihin nuu ra nyicú junta cuan tyehe caa: “Nyoho nducú ndo cu-

atyí chahi cha cuenda tyí chinó iñi cha nandotó ñáyivi chihí” —catyí ra Pablo.

²²Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyí ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³Tyicuan ta tachí ra Félix chi capitán na cunatyihí ra chí ra Pablo vehe caa. Soco ma ñihí xaan saha cumi ra chí ra. Ta na cuhva ra cuhun ra tahan ra nu ñohó ra, ta cahan ra chihin ra.

²⁴Yahá suhva quivi ta nachaá ra Félix inga chaha chihin cu Drusila ñasihi ra. Ta cuví ña ñaha Israel. Ta tachí ra na quichi ra Pablo vatyi cuñí ñu tyasoho ñu yoso caa tuhun cha chinó iñi ra chí ra Jesucristo. ²⁵Ta ra Pablo cahan ra tuhun yoso caa tahán chi sacuvi yo cha vaha, yoso caa cunyaca ñaha maa yo chí yo ta ma sacuvi yo cha quiñi caa. Ta cahan tucu ra yoso caa cucutuñi chí yo nuu Nyoo quivi tahan chí. Ta ra Félix yuhví xaan ra cuvi, ta catyí ra chí ra:

—Cuahan vityin. Ta na nanuña xihne, ta cana mai chuun inga chaha —catyí ra chí ra.

²⁶Ta ra Félix cuñí maa ra tyí ra Pablo cucuhva ra xuhun chí ra, tacuhva vatyi numi ri saña ra chí ra. Yucuan chaha vatyi tyito tyito ri caná ra chí ra, vatyi ndatuhun ra chihin ra. ²⁷Uvi cuiya yahá, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chí ra Pablo vehe caa.

Nu cutuñí chí ra Pablo nuu ra Festo

25 Tyicuan ta cha cu uñi quivi cha cuví ra Festo tyiño, quitá ra ñuu Cesarea cuan ta cuahan ra nya ñuu Jerusalén. ²Chaá ra Jerusalén, tyicuan ta chaá coyo ra cuví nuu chí tata sutu ta ra cuví tyiño ñu Israel ta cachican ra cuatyí chaha ra Pablo. ³Ta chican ra noo

tumañi iñi cahnu chí ra Festo. Cuñí ra vatyi tachi ra Festo tyiño na quichi nyaca sindaro chí ra Pablo nya Jerusalén. Vatyi maa ra cuñí ra cahñi ra chí ra ityi vachi ri ra. ⁴Soco ra Festo nacahan ra, ta catyí ra:

—Ra Pablo ñohó ra vehe caa nya Cesarea. Ta yuhu tyái cuhva cha cunuhi yucuan cha numi ri. ⁵Yucuan chaha, nyoho cha cuví ndo tyiño ñuu ihya, cuhun maa ndo chihin. Tyicuan ta cuvi cacando cuatyí chaha ra tatu iyó cha sacuvi ra —catyí ra Festo chí ra.

⁶Uña o uchi ri quivi chí nyaa ra Festo Jerusalén, ta cuanuhu ra Cesarea. Ta cha inga quivi chaá ra chichi vehe tyiño ra vatyi cutuñi chí ra ca iyó cuatyí nuu ra. Tyicuan ta caná ra chí ra Pablo. ⁷Cuhva cha quihví ra Pablo, catuhvá ra Israel cha quichí coyo nya Jerusalén, ta quichahá catyaa ra cuatyí cahnu siquí ra. Soco ñahri maa cha ndaa catavá ra. ⁸Tyicuan ta cahan ra Pablo ta catyí ra:

—Yuhu ni noo cuatyí ta sacuvi que, ni siquí ley ñu Israel, ni siquí vehe ñuhu cahnu Jerusalén, ni siquí rey cahnu Roma —catyí ra.

⁹Soco vatyi cuñí ra Festo ndoo vaha ra chihin ra Israel, ndacá tuhun ra chí ra Pablo:

—¿Atu cuñún cuhun Jerusalén vatyi sandaí tyiñon nyicuan? —catyí ra chí ra.

¹⁰Ta ra Pablo catyí ra:

—Cha nyaí nu maun. Ta maun cuví ra cuví tyiño cuenda rey cahnu Roma. Ihya cuví nu tahán chí cutuñi chíí, vatyi ra cuenda ñuu Roma cuví. Ta chitó vahun tyí ñahri maa sacuvi chí ñu Israel. ¹¹Tatu sacuvi noo cuatyí cahnu cha tahán chí cahñi ndo chíí, ma nduqui cuhva caqui. Soco tatu ña ndicha tuhun cha cahan ra Israel ihya, yori cha iyó ityi chíí cha cuhva cuenda chíí chí ra cuñí cahñi chíí. Chiquén vatyi cuhin nuu rey cahnu vatyi cutuñi chíí nuu maa ra —catyí ra Pablo chí ra Festo.

¹²Tyicuan ta ra Festo cha yaha cha cahan tahan ra chihin ra tyinyeé chi ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnu. Vaha. Cua cahun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

¹³Yaha suhva quivi, tyicuan ta chaq rey Agripa chihin cu Berenice nya Cesarea, vatyí cuacuhva ñu nocumi chi ra Festo. ¹⁴Quita suhva quivi chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayii ihya cha sandoo ra Félix vehe caa. ¹⁵Ta cha chahin Jerusalén, ra cuví nuu chi tata sutu, ta ra cacuví mandoñi ñu Israel chaha cuenda ra noo tutu cuatyí ra, ta chicán ñu na cúvi ra. ¹⁶Ta catyí yuhu chi tandihí ra vatyí ña tuhvá ra cuví tyiño cuenda Roma chahni chi noo ñáyivi tatu ta cahan tahan ca ñu ta nducu ñu cuhva sacacu ñu chi ñu. ¹⁷Yucuan chaha, quivi quichi coyo ra cacuví nuu chi ñu Israel cuan, ña sacunají cuhva. Ta cha inga quivi chahin vehe tyiño vatyí cutuñi chi ra cha cacahán ra tuhun. Ta tachi tyiño na quichi ra cuan. ¹⁸Soco ra catyáa cuatyí siqui ra, ña cuaha maa tuhun cacahan ra. Ta cuñí maa yuhu vatyí cahnu cuatyí cuatyaa ra siqui ra. ¹⁹Cuñí ra cuan cuatyí chihin ra cha cuenda tuhun costumbre, cuhva chinó iñi ñu Israel. Cahán ra tuhun noo ra cha nañi Jesús cha chihí. Ta ra Pablo catyí ra vatyí iyó ra. ²⁰Ta ña chité yoso caa sacuvi chihin tuhun cha tyicuan caa, ta ndaca tuhun chi ra Pablo tatu cuñí ra cahun ra Jerusalén, vatyí cutuñí chi ra cuenda tuhun ihya. ²¹Soco maa ra chicán ra cha cutuñi chi ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chi ra nuu ra Augusto —catyí ra Festo chi rey Agripa.

²²Tyicuan ta ra Agripa catyí ra chi ra Festo:

—Cuñí tucu yuhu cuiñi cha cahán ra cuan —catyí ra.

Ta ra Festo catyí ra chi ra:

—Tyaan cuiñun cha cahán ra —catyí ra chi ra.

²³Tuvi inga quivi ta chaq ra Agripa chihin cu Berenice. Iyo xaan caa ñu quihvi coyo ñu chichi vehe vatyí cuví ñu. Quihvi tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo. ²⁴Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehe ndo chi ra ihya. Tandihí ñu Israel ñuu Jerusalén ta ñu Cesarea cahan ñu siqui ra. Ta ña sandihí ñu cha catyí ñu chii vatyí tahán chi cúvi ra. ²⁵Soco cha cuenda yuhu ñahri cuatyí ra cha tahán chi cúvi ra. Ta suri maa ra chicán cha cutuñi chi ra nuu ra Augusto. Yucuan chaha cutachi chi ra. ²⁶Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha cusacuhin chi ra nyacá ñaha chi yo. Yucuan chaha cané chi ra Pablo nuu ndo, ta nuu yoho Rey Agripa, tacuhva tyi ndaca tuhun chi ra ta cote ñáá cha tahán chi sacote chi rey cahnu. ²⁷Vatyí ña vaha cha sacuhin chi ra tatu ñahri tuhun cahín ñáá cuatyí ra.

Nu quichaha cahán ra Pablo nuu rey Agripa

26 Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaq ra ndaha ra ta catyí ra tyehe caa:

²—Sii xaan cuñí vatyí cuví cahun nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel siqui. ³Vatyí, yoho chitón tandihí costumbre cha iyó chi yo ñu Israel. Ta chitón tuhun tuhva yo cuví

yuhu. Yucuan chaha chiquén chuun nacuíñi vahun cha cahín.

Nu catyí ra Pablo chi ra Agripa yoso caa ñayivi ra cha ni cumañi ca quihvi ra cuenda ra Cristo

⁴Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén. ⁵Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín. ⁶Ta vityin nanyaí ihya ta cutuñi chii cha cuenda vatyí chinó iñi cha sanandotó Nyoo chi ñáyivi chihí, tari cuhva catyí ra chi sutu chahnu yo ta cha naha. ⁷Ndi uchi uvi tahan ityi ñáyivi Israel ñu vachi tata sutu chahnu yo nyatú tucu ñu nyehe ñu tyi ndicha cusanandoto Nyoo chi ñáyivi chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyáá ra Israel cuatyí siqui vityin, yoho rey Agripa. ⁸¿O ña chinó iñi nyoho vatyí Nyoo sanandotó ra chi ñu chihí?

⁹Ta quivi cuan suri mai chicá xiñi vatyí vaha cha tachi tuñi chi ñáyivi chinó iñi chi ra Jesús ra ñuu Nazaret. ¹⁰Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi. ¹¹Cuaha chaha sanyehí tindoho chi ñu ta sahí fuerza chi ñu nacahan ña vaha ñu siqui ra Jesús. Tyehé caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chicá nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo

(Hch. 9.1-19; 22.6-16)

¹²Ta yucuan chaha cuahin quivi cuan nya ñuu Damasco chihin ndusu yuhu ra cuví nuu chi tata sutu. ¹³Soco yoho Rey, ityi cuahin ñáá cuhva ora, nyehí noo nduva ñuhu quichí andívi, ñihí ca ican saha ñuhu ñanyii. Sandundichin chi nicachico nu cuahin ta ra cuahan coyo chihin. ¹⁴Tyicuan ta tandihí ndi nduva ndi nu ñuhú. Ta chiñi noo ndusu cha cahán chihin, chihin sahan yo hebreo, ta catyí chi chii: “Saulo, Saulo, ¿ñáá tuhun cha chicá nyicon chii? Tari noo quití chañí nyaa ti chata cha xaan cha saquehén ityi ra chi ti, tyicuan caa cuñún sañicuehun suri chi maun”, catyí ndusu cuan chii. ¹⁵Tyicuan ta catyí yuhu: “¿Yóó yoho tata?” Ta Sutú Mañi yo catyí ra chii: “Yuhu cuví ra Jesús, ra cha chicá nyicon chi. ¹⁶Ndicuita ta cuñanyaun, vatyí yuhu tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi. ¹⁷Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin. ¹⁸Vatyí na nuñon nuu ñu, ta sañahun chi ñu cha ndicha, ta ma sacuví ca ñu cha ña vaha. Soco sacuví ñu cha vaha nu ndichin Nyoo vatyí quitá ñu chichi ndaha ra ña vaha ta ndihvi ñu ndaha Nyoo tacuhva vatyí tyicuan caa cusahi ticahnu iñi cuatyí ñu ta cunaquehen ñu cha vaha cha chahá Nyoo chi ñáyivi yihí cuenda ra”, catyí Sutú Mañi yo chii. ¹⁹Yucuan chaha rey Agripa, sacuví cha catyí Sutú Mañi yo ra Jesucristo chii nu sañaha ra chi ra chii. ²⁰Ta cahin tuhun ra xihna ca chihin ñu nyicu ñuu Damasco. Yaha cuan ta cahin chihin ñu ñuu Jerusalén ta tandihí ityi Judea. Ta cahín chihin ñu cha ñima ñu Israel cuví

ñandihí. Sacote chi ñu nandu uvi iñi ñu cuatyí ñu, ta nandihvi ñu chichi ndaha Nyoo cha ndicha cuii. Na nasama ñu cuhva iyó ñu chihin cha sacuvi ñu cha vaha. ²¹ Cha cuenda ihya catiñ ra Israel chii chichi vehe ñuhu cahnu. Ta cacuñi ra cahñi ra chii. ²² Soco maa Nyoo tyinyeé chii. Ta iyó que nya vityin. Ta cahín tuhun Nyoo chihin tandihí ñáyivi, ñu ndahvi ta ñu tyayí. Ta ña cahín inga tuhun cha ña catyí ra Moisés ta ra profeta, vatyí cucuvi nu cuahan ca chi. ²³ Vatyí catyí ra vatyí tahán chi cha cunyehe ra Cristo tindoho. Ta cha yaha cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhu ityi cuahan ñáyivi vatyí sacotó ra yoso caa cacu añima ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñí ra cha nachino iñi rey Agripa ta cunyicon ra chi ra Cristo

²⁴ Cuhva cha catyí ra Pablo tuhun ihya, ra Festo canachaꝝ ra, ta catyí ra:

—¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chi ra.

²⁵ Soco ra Pablo catyí ra chi ra:

—Ña loco yuhu, yoho tata Festo. Soco cha cahín, maa maa ri tuhun ndicha cuví. ²⁶ Ihya nyaá rey Agripa. Ta chitó vaha ra tuhun ihya. Yucuan chaha cahín chihin cha ña cahán nui. Vatyí chité tyi chitó tucu maa ra tuhun ihya, vatyí ñima tuhun xehe cuví. ²⁷ Yoho rey Agripa, ¿atu chinó iñun tuhun cha catyaaꝝ ra profeta cuenda Nyoo ta cha naha? Yuhu chité vatyí chinó iñun —catyí ra Pablo chi ra Agripa.

²⁸ Tyicuan ta ra Agripa catyí ra chi ra:

—Suhva cuii ri ca ta nachino iñi tuhun cahun ta quihvi cuenda ra Jesús —catyí rey Agripa chi ra Pablo.

²⁹ Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyí na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chiñí tuhun cahín. Noo ri cha ña cuñí, cha quihí cadena ndaha ndo tari mai vityin —catyí ra Pablo.

³⁰ Cha yaha cha catyí ra Pablo tuhun ihya, ndicuita rey ta gobernador ta cu Berenice, ta tandihí ra canyicú yucuan.

³¹ Ta cha yaha quita coyo ñu, ta cacatyí ñu chi tahan ñu:

—Ñahri cuatyí ra ihya cha ñihi xaan. Ña tahán chi cúvi ra. Ta ni ña tahán chi cohon ra vehe caa —catyí ñu.

³² Ta ra Agripa catyí ra chi ra Festo:

—Cuví saña yo chi ra, tyehe ta ñima maa ra chicán cha cutuñi chi ra nuu ra cuví rey cahnu —catyí ra.

Nu tachí ra Festo chi ra Pablo nya ñuu Roma

27 Quivi cha catyaaꝝ ra Festo ta ra Agripa cuhva tyi tachí ra chi ndi nya ñuu Roma ityi Italia, nacuhva cuenda ra chi ra Pablo ta suhva ca ra chi noo capitán cha nañi Julio. Yihí ra noo batallón sindaro, cha nañi Cuenda Ra Augusto. ² Ta cuahan tucu ra Aristarco chihin ndi ñandihí. Ra ñuu Tesalónica cha nyaá ityi Macedonia cuví ra. Tyicuan ta quihvi ndi chichi noo barcu cha quichi ityi ñuu Adramitio ta cuhun chi ñuu cha nyicú yuhu tyañuhu ityi Asia. ³ Cha inga quivi chaꝝ ndi puerto Sidón. Ta ra Julio vaha ñáyivi cuví ra chihin ra Pablo. Ta chahaꝝ ra cha cunyehe ra chi ra tahan ra ñuu cuan. ⁴ Yahaꝝ cuan ta quita ndi Sidón ta casandaꝝ ra sahma barcu cuan ta chihin fuerza tatyí ri cuahan ndi. Ta vatyí caa tatyí siqui ndi yahaꝝ ndi chiyo xehe ca ñuhú Chipre. Vatyí ña ñihi xaan caa tatyí chiyo cuan. ⁵ Yaha sava ndi tyañuhu ityi nuu Cilicia ta Panfilia, ta chaꝝ ndi noo ñuu cha nañi Mira ityi Licia. Ta noꝝ ndi barcu cuan.

⁶Yucuan nañihí capitán cuenda sindaro nonga barcu cha quichi nya ñuu Alejandría ta cuahan chi Italia. Ta catyí capitán na quihvi ndi barcu cuan vatyí cuhun ca ndi nu cuahan ndi. ⁷Cuaha quívi chicá ndi cuee ri. Ta chihin cha cuaha tindoho ta chaá ndi yatyin ri ñuu Gnido. Ta cha cuenda cha ñihi xaan caá tatyí, ña chahá chi cha cuhun ndi ityi nuu, ta yahá ndi yatyin ri ñuu Salmón. Ta nacuíco ndi ityi yuhu ñuhú Creta. ⁸Nducú ndi cuhva cha cuhun ndi yuhu tyañuhu cuan ta chaá ndi nu nañí Buenos Puertos yatyin ri ñuu Lasea.

⁹Cha cuaha xaan quívi yahá ta cha yica xaan nanduví cha caca noo ndi ityi nu tyañuhu. Vatyí cha yahá quívi vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chahá ra tuhun chi ra sacaca barcu cuan, ¹⁰ta catyí ra:

—Nyoho ra canyicú ihya, cuiñi ndo tuhun cahín. Nye hí vatyí yica xaan cuhva cuahan yo. Ta tuví ñi vatyí cuaha xaan cusacunaa yo. Cunaan barcu ta cha nyisó chi ta nyacua nya maa yo ñandihi. Vaha taxin ca nandoo yo ihya —catyí ra chi ra.

¹¹Soco capitán cuenda sindaro cuan quichahá ca ra chi ra sacacá barcu chihin chitoho barcu ta ñima ca chi ra Pablo. ¹²Ña cuví yaha ndi yoo vichin yucuan tyi ñihi xaan tuhvá caa tatyí, ta yica xaan cuenda barcu. Yucuan chaha tandihi ra ta catyí ra:

—Vaha ca cha quita yo ihya ta nducu yo cuhva cha yo nya ñuu Fenice suri ñuhú Creta ihya. Yucuan cuví noo nu vaha cunyaa barcu vatyí nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³Tyicuan ta quichahá caa chiin tatyí cha quichi ityi sur. Ta cuñí maa ra vatyí vaha xaan vatyí ñima tatyí ñihi cuví, ta cuví cuhun ra chihin barcu ra nicañi ri

yuhu tyañuhu ñuhú Creta cuan. ¹⁴Ña cuaha ri chicá ra ta quichahá caa noo tatyí xaan cha quichi ityi norte. Ta tyandahá chi barcu inga ityi. ¹⁵Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuñí maa chi.

¹⁶Ta tyandahá tatyí chi ndi ityi chiyo satyin noo ñuhú luhlu cha nañí Clauda. Ta chihin cha yíi xaan naquehen ndi lancha luhlu cha xitá quiñocho barcu, ta natyihí ndi ityi chichi barcu coto nyee chi. ¹⁷Ta cha yahá natyihí ra lancha cuan, yucuan ta chahñi vaha ra yoho nichachico barcu vatyí coo fuerza chi. Ta yuhví ra coto tahan ra nu yaxin ndutya ta quihvi barcu cuan chichi ñiti vita iyó yuhu tyañuhu nu nañí chi Sirte, yucuan chaha sanoo ra sahma barcu ta chahá ra cha cuhun barcu yoso cuhva tyandahá tatyí. ¹⁸Ta cha inga quívi suri ñihi xaan caá tatyí. Yucuan chaha quichahá catuchi ra carga nu tyañuhu. ¹⁹Ta cha cu uñi quívi quehen ndi ndaha tyiño barcu ta tyihí ndi nu tyañuhu. ²⁰Ta cuaha quívi ña nyehe ndi ni ñanyii ta ni tiño. Ta ñihi tatyí nañí chi ndi. Yucuan chaha ña tyaá ca ndi cuhva cha cacu ndi.

²¹Cuaha quívi yahá ta ña chachí ndi. Tyicuan ta catyí ra Pablo chi tandihi ra:

—Nyehe ndo, vaha ca tyehe ta quichahá ndo chíi quívi cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo. ²²Soco vityin ma caca xaan ñi ndo vatyí ni noo yo ta ma cuví yo. Barcu ihya cuví cha cunaan. ²³Vatyí Nyoo nyacá ñaha ra chíi, ta sacuví tyiño nuu ra, sanyehe ra noo visión chíi cuñi. Ta tuví noo ángel nui. ²⁴Ta catyí ángel cuan chíi: “Ma yuhvun, Pablo. Vatyí cuñí chi cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandihi ra canyicu chuhun chichi barcu”, catyí ángel cuan chíi. ²⁵Yucuan chaha nyoho

cha ñohó ndo chichi barcu, sanii ndo iñi ndo. Vatyí yuhu chinó iñi chi Nyoo. Ta chitó vahi vatyí cuví tari cuhva catyí ángel cuan chii. ²⁶Vasí cuanyee barcu soco cuachaa yo noo ñuhú luhlu —catyí ra Pablo chi tandihi ndi.

²⁷Noo cha cuaa quívi ndihi chahun quívi chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyí chi barcu ndi nu tyañuhu. Ta vasí ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú. ²⁸Tyicuan ta tyicuhva ra cha cono ndutya. Ta nyehe ra tyi oco chahun iñn tahan metro iyó. Cuañan ndi chiin ca ityi nuu ca. Ta tyicuhva tucu ra inga chaha. Ta iyó oco ucha metro. ²⁹Ta cayuhví ra coto nañi barcu cuan chata yuu. Yucuan chaha casanoó ra cumi tahan caa vee cha nyaa ganchu nuu, ityi chata barcu. Ta ña iñi ca ra cha cundichin. ³⁰Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoó ra lancha cuan nu ndutya ityi nuu barcu cuan. Ta sahá ri maa ra tyi inga caa casanoó ra. ³¹Soco ra Pablo sacoto ra chi capitán ta chi sindaro ta catyí ra:

—Tatu ma ndoo ra cuan chichi barcu. Nyoho ma cuví cacu ndo —catyí ra chi ra.

³²Tyicuan ta sindaro cachahnya ra yoho lancha. Ta casanacava ra nu ndutya. ³³Ta cha ñaa ca cuan ra Pablo catyí ra chi tandihi ra:

—Cha iyó uchi cumi quívi cha ta cachi ca yo. ³⁴Catyí chi ndo, na cachi yo vityin. Niñi xaan cuñí chi cha cachi yo ta ndunye coño ñuhu yo. Vatyí cucacu yo ta ni noo ixi xiñi yo ta ma cunaa.

³⁵Ta cha catyí ra tuhun ihya, ra Pablo quehen ra noo pan ta nacuhva ra tyahvi nyoo chi Nyoo nuu tandihi ra. Tyicuan ta tahvi ra ta quichaha chachi ra. ³⁶Tyicuan ta tandihi ca ra canduniñ ca iñi ra ta cachachi ra ñandihi. ³⁷Ta cha

tandihi ndi cha ñohó ndi chichi barcu cuan, quita uvi ciento uñi xico chahun iñn tahan ñáyivi. ³⁸Cuhva cha ndihi ca chachi ra ta tuchi ra yitin cha yihí trigu nu tyañuhu na nduñahma ca barcu.

Nu nyeé barcu

³⁹Yaha cuan ta cundichin. Ta canyehe ra cha sacacá barcu noo ñuhú, soco ña canicoñon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan. ⁴⁰Cachahnya ra yoho cha nuñi caa vee cuan. Ta sandoo ra chichi tyañuhu. Ta casandutaya ra vitu cha sanacuico barcu. Tyicuan ta casandaa ra sahma cha tuhvá chitacaá ityi nuu barcu. Ta quichaha quehen tatyí sahma cuan, ta sacuhún chi barcu nya nu iyó ñiti cuan. ⁴¹Ta cha barcu cuan noo nu nañi tahan ndutya. Ta nyee xiñi chi chichi ñiti. Ta ña cuví ca natava ra. Ta suhva ca cha ña quihvi chichi ñiti, ñihi xaan cañi tyañuhu chi chi, nyacua tahvi cuatyí chi. ⁴²Tyicuan ta sindaro cacuñí ra cahñi ra chi ndii cuii maa ra cuañan cuacutuñi chi nuu ra cuví rey cahnu, coto cacono ra. ⁴³Soco capitán sindaro cuñí ra sacacu ra chi ra Pablo. Yucuan chaha ña chaha ra cahñi ra chi ra, soco catyí ra vatyí nya ra cachitó sutya, na cuhun cuee ra nu ndutya ta quita ra nya ñuhú ityi. ⁴⁴Ta tandihi ca ra cha ña cacuví sutya, na quehen ra vitu cha nyisó barcu, ta suhva ra chihin yiquin vitu barcu cha tahvi tyañuhu. Ta tyicuan caa cacacu tandihi ndi ta quita ndi ñuhú ityi.

Nu ñohó ra Pablo ñuhú Malta

28 Cuhva cha cha yaha cacu ndi ta catyí ñáyivi iyó ñuhú cuan vatyí nu nyaá ndi nañi chi Malta, o Melita. ²Ta vaha xaan tyiñuhu ñu chi ndi. Ta sanatahan ñu ñuhu vatyí coón savi ta vichin xaan. Ta catyí ñu chi tandihi ndi, natuhva ndi yuhu ñuhu cuan natava ndi

cha vichin ndi. ³Tyicuan ta ra Pablo naquehen ra suhva nducu tyihí ra nu ñuhú. Ta noo coo quitá chichi nducu cuan, cha cuenda cha ihñi. Ta chachí yihí ti ndaha ra Pablo ta ndoo ti tacaá ti ndaha ra. ⁴Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chi tahan ñu:

—Ra ihya vasi noo ra chahñi ñáyivi cuví ra, vatyí vasi cacú ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵Soco ra Pablo naquisi ra chi coo cuan, ta canacava ti nu ñuhú, ta ñahri cuví chi ra. ⁶Tandihi ñu nyatú ñu ñáá cuhva ndaa nu tyaá ti, o ñáá cuhva cúvi ra. Soco cha yaha nyatu xaan ñu, ta nyehe ñu vatyí ñahri maa cuví chi ra. Tyicuan ta nasama ñu cuhva chicá xiñi ñu, ta quichaha catyí ñu:

—Minoo nyoo cuví ra —catyí ñu.

⁷Yatyn ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahān ra chihin ndi. Ta tyiñuhu xaan ra chi ndi, ndoo ndi vehe ra uñi quivi. ⁸Ta cuhví xaan sutu ra chihin cahñi ta cha chiyó ra. Ta ra Pablo chahān ra chinyehe ra nu catuví ra. Ta chican tahvi ra chaha ra. Ta tyiso ra ndaha ra siquí ra ta nduvaha ra. ⁹Yaha cuan ta quichaha caquichí tucu inga ñu cuhví cha iyó ñuu cuan. Ta nduvaha tucu ñu. ¹⁰Ta tandihi ñu tyiñuhu xaan ñu chi ndi. Ta quivi quihví ndi chichi barcu cha cuacuhun ndi, chahā ñu tandihi cha cuchíñuhu chi ndi ityi cahun ndi.

Nu chaá ra Pablo ñuu Roma

¹¹Uñi yoo ñoho ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoo chí Malta nya yaha yoo vichin. Ta nyaa noo cha natava ñu, noo xiñahñu nyoo Cástor ta nyoo Pólux, xiñi chí. Quihví ndi barcu cuan ta cuahan ndi. ¹²Ta chaá ndi ñuu Siracusa. Ta yucuan ndoo ndi

uñi quivi. ¹³Ta yucuan ta quitá ndi ta cuahan ndi ityi yuhu tyañuhu nyacua nya chaá ndi ñuu Regio. Ta cha inga quivi cuan caa xaan tatyí cha quichi ityi sur ta chica ndi uvi quivi ta chaá ndi ñuu Puteoli. ¹⁴Yucuan ñihí tahan ndi chihin suhva ra hermano. Ta catyí ra chi ndi cha ndoo ndi noo vitya chihin ra. Yaha cuan ta quitá ndi ta cuahan ndi nya ñuu Roma. ¹⁵Ta ñu yihí cuenda Nyoo ñuu Roma cuan ñihí ñu tuhun tyi cua cha ndi. Ta chahān coyo ñu chisatahan ñu chi ndi ityi. Suhva ñu nyatú ñu chi ndi Nuyahví Apio. Ta inga ñu ñihí tahan ñu chihin ndi nya nu nañi Tres Tabernas. Ta cha nanyehe ra Pablo chí ñu, nacuhva ra tyahvi nyoo chí Nyoo. Ta ndunií ca iñi ra. ¹⁶Cuhva cha chaá ndi Roma cuan, capitán cuan nacuhva cuenda ra chí ra ca iyó cuatyí cuan chí noo ra cuví nuu chí ra sahá cumi vehe caa. Ta chahā ra cuan cha coo siñn ra Pablo. Ta noo ri sindaro sahá cumi chí ra.

Nu cahān ra Pablo tuhun Nyoo ñuu Roma

¹⁷Uñi quivi cha yaha chaá ndi yucuan. Tyicuan ta tachí ra Pablo tyiño naquichí coyo ra cacuví nuu cuenda ñayivi Israel cha iyó ñuu Roma cuan. Ta cuhva cha ndu iñn ri ra, quichaha catyí ra chí ra:

—Nyoho yañi, vasi ñahri sacuví chí ñu Israel tahan yo, ta ni ñahri sacuví siquí costumbre sutu chahnu yo, soco chahā cuenda ra Israel chii chí ra ñuu Roma. Ta ñohi vehe caa Jerusalén ndaha ra ñuu Roma. ¹⁸Ta cha cutuñí chí, ta cuñí ra nyacá ñaha casaña ra chii. Vatyí ñahri cuatyí cha cahnu cha tahán chí cuví. ¹⁹Soco cha cuenda cha nduxaan xaan ra Israel siquí, chican taxin cha cutuñi chii nuu maa rey cahnu. Vasi ñahri cuatyí cuacaquen siquí ñu ñui nuu ra. ²⁰Yucuan chaha canē chí nyoho vatyí cohon nui chí ndo, ta sacoté chí ndo vatyí nuhñi yuhu chihin cadena vityin

cha cuenda cha yihí iñi yo, ñu Israel, chi Nyoo —catyí ra Pablo.

²¹ Tyicuan ta catyí ra Israel chi ra Pablo:

—Ña chitó maa ndi tuhun yoho. Ta yori casacoto chi ndi, ni chihin carta, ta ni ta yori ca quichí ityi Judea sacoto cha caun, o cahan ña vaha ñu sicun. ²² Soco cuñí ndi cuiñi ndi tuhun chicá xiñi yoho. Vatyí chitó ndi vatyí tandihí ri ityi cahan ña vaha ñáyivi siqui tuhun chaa ihya —catyí ra Israel chi ra Pablo.

²³ Tyicuan ta catyihí tahan ra tuhun nya quivi quichi coyo ra inga chaha. Ta cha chaá quivi cuan, chaá coyo cuaha ñáyivi nu iyó ra Pablo. Ta nya ñaha ri ta nya cha cuaa cahan ra Pablo tuhun yoso caa nyacá ñaha Nyoo ánimo yo. Ta chihin ley ra Moisés ta tuhun cha catyaá ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra. ²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu. ²⁵ Ta vatyí ña iin ri chino iñi ñu ta siin siin tuhun cahan ñu, ta quichahá cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí Ii chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyí chi ñáyivi ihya tyehe caa:
Nyoho cucuiñi ndo tuhun Nyoo.

Soco ma cutuñi iñi ndo.

Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo.

Tyicuan caa catyí chi ñu.

²⁷ Vatyí ánimo ñu cha ndundava xaan.

Ta chiñí ri maa ñu tuhun Nyoo.

Ta natahán chiti nuu ñu,

tacuhva cha ma cuvi nyehe ñu.

Ta nicunyasí soho ñu.

Yucuan chaha ña chiñí ñu, ta ndundava ánimo ñu.

Yucuan chaha ña cuñí ñu quihvi ñu chichi ndahi na sanduvahi chi ñu, catyí Tatyí Ii chihin yuhu ra Isaías ta cha naha.

²⁸ 'Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyí ra Pablo chi ñu.

²⁹ Cuhva cha catyí ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahan ra Pablo chihin ra.

³⁰ Uvi cuiya nanií ndoo ra Pablo vehe nu nyaá ra cuenda yoo ñuu Roma cuan. Ta vaha cahan ra chihin tandihí ñu chahan vehe ra. ³¹ Ta chihin cha niñi iñi ra ta cahan ra tuhun yoso caa nyacá ñaha Nyoo ánimo yo. Ta sañahá ra tuhun Sutu Mañi yo ra Jesucristo. Ta yori chasí cha cahan ra.

Carta Cha Sacuhun Ra Apóstol Pablo Chi Ñáyivi Nuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

1 Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyi cuví apóstol chi ra, tacuhva vatyi sacote chi ñáyivi yoso caa sacacu Nyoo añaime yo.

²Ihya cuví tuhun cha catyí Nyoo chi yo tyi cusacuvi ra, ta chicunya nu tutu tuhun ra tandihi cha tyaa ra profeta ta cha naha. ³Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyi quichi ra siqui ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra. ⁴Ta Nyoo chihin Tatyí li ra sacoto cachi ra chi yo vatyi Sehe ra cuví chi ra, vatyi sanandoto ra chi ra chihin cha ndicha ñuhu ra. ⁵Ta cha cuenda maa ra Jesucristo chaha Nyoo tumañi iñi chi nyuhu cha cuhun ndi cucaca ndi tyiño ra, tacuhva nachino iñi ñáyivi chi ra nichahnu ñuhu ñáyivi, ta quichaha ñu chi ra. ⁶Ta mahñu ñu cuan, ñohó tucu nyoho vatyi suri nacana tucu ra Jesucristo chi nyoho.

⁷Sacuhín tutu ihya chi tandihi nyoho cha iyó ndo ñuu Roma. Cuñí Nyoo chi ndo ta nacana ra chi ndo vatyi coo ndo noo ñáyivi cachi cha sachahnu ndo chi ra. Na naquehen ndo cha vaha ta cha taxi ri cuñí añaime ndo cha chahá Sutu yo Nyoo ta Sutu Mañi yo Jesucristo chi yo.

Nu catyí ra Pablo vatyi cuñí ra cuhun ra ñuu Roma

⁸Cha xihna ri chahí tyahvi nyoo chi Nyoi chihin sivi ra Jesucristo, cha cuenda tandihi nyoho. Vatyi tandihi ri ityi cahán ñu tuhun vatyi chinó xaan

iñi ndo chi ra Jesucristo. ⁹Ta tyiño nuu Nyoo sacuví yuhu chihin cha tandihi añaime. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyi chitó ra tyi tyicuan ri nichohón iñi chi ndo cuhva cha chicán tahvi chi ra. Ta chicán tahvi cha cuenda ndo. ¹⁰Chiquén chi Nyoo na cuvi cuhva cuñí ra, ta cuhin nu nyicú ndo, vatyi cha naha xaan cuñí cuhin. ¹¹Vatyi cuñí tyinyei chi ndo, ta naquehen ndo cha vaha cha chahá Nyoo ta cuni ca iñi ndo. ¹²O cuñí chi catyí vatyi sani yo iñi tahan yo chihin cha chinó iñi yo, tari chinó iñi nyoho ta yuhu ñandihí.

¹³Yañi, cuñí tyi coto ndo vatyi cuaha xaan chaha cuñí cunyehe nu nyicú ndo, soco nya vityin ta ña chaha chi cuhva chii. Cuñí vatyi cuni ca iñi ndo tari nduni ca iñi ñu vehe ñuhu inga ñuu nu chahín. Vatyi tatu nduni iñi ndo, nduni tucu iñi yuhu. ¹⁴Vatyi nyaá siqui cha cahin tuhun Nyoo chihin tandihi ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñi iñi. Tahán chi cha cahin chihin tandihi ri ñu. ¹⁵Yucuan chaha, cha cuenda yuhu, cuñí xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶Yuhu ña cahán nui cahín tuhun Nyoo, vatyi ihya cuví fuerza Nyoo cha sacacú chi tandihi ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu. ¹⁷Vatyi tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñáyivi chaa chihin ra. Tyehe caa nyaá nu tutu tuhun Nyoo: “Ñu cha nduvaha añaime saha Nyoo, coo ñu noo ñáyivi chaa chihin cha chinó iñi ñu chi ra.”

Tandihí ñáyivi ta iyó cuatyí ñu

¹⁸ Ta nyehé yo vatyí nya nu nyaá Nyoo nya andivi ta tachí tuñi ra chi ñáyivi quiñi iyó, ñáyivi ña vaha. Ta cha quiñi iyó ñu, ña chahá chi coto ñu cha ndicha. ¹⁹ Chitó vaha ñu tyi tuhun vaha cuví tuhun Nyoo vatyí suri maa Nyoo sañahá ra chi ñu. ²⁰ Vatyí vasi ña nyehé yo chi ra, cuví coto yo vatyí iyó ra vatyí nyehé yo tandihí cha savahá ra. Nyata chingó ñuhu ñayivi ta tandihí cha savahá ra ta sañahá chi chi yo vatyí maa ra cuví Nyoo, ta tunyee iñi cha iyó chi ra ma ndihí maa. Yucuan chaha ma cuví catyí ñáyivi tyi yori Nyoo iyó. ²¹ Ta vasi cha chitó ñu tyi iyó noo Nyoo cahnu, soco ña sacahnú ñu chi ra tari cuhva tahán chi cha sacahnu yo chi ra. Ni ña nacuhva ñu tyahvi nyoo chi ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondo cha chiñi tuñi xiñi ñu ta ndoq ñu nu ñaa iñi. ²² Vasi catyí ñu tyi chitó xaan ñu soco ñu tondo cuví ñu. ²³ Vatyí cha nuu cha sacahnú ñu chi Nyoo ra cahnu ca cuví, ra ña tuhva chihi; sacahnú ñu chi xitohyo cha caá tari caá ñáyivi tuhva chihi. Ta nyacua nya xitohyo cha tari caá saa, ta coo, ta quití cha cumi tahan chaha, ta sacahnú ñu.

²⁴ Yucuan chaha saña ndaha ndihi Nyoo chi ñu na sacuvi ñu tandihí cha quiñi caa cha quichí cuvi iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu. ²⁵ Vatyí ña chinó iñi ñu cha ndicha vaha Nyoo. Vatyí noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savahá Nyoo ta ña cuñí ñu sacahnú ñu chi maa maa ra. Vatyí chi maa ra tahán chi sacahnú yo tyicuan ri maa. Ta na cuví chi tyicuan caa.

²⁶ Yucuan chaha saña ndaha Nyoo chi ñu na sacuvi ca ñu cha chahá ticahan nuu chi ñu. Vatyí nyacua nya ñusihi

nasama ñu cuhva nyacuví ñu, vatyí ca iyó ñu chihin tahan sihi ñu, ta ña tahán chi tyicuan caa. ²⁷ Ta tyicuan caa tucu rayii, casandihí ra cha ca iyó ra chihin ñasihi ra, ta quichí cuvi iñi ra cacoo ra chihin tahan yii ra. Ta canyacuví ra chihin ra tahan ra, tuhun cha chahá ticahan nuu chi ra. Ta cha cuenda cuan tachí tuñi Nyoo chi ra ta tiví ra cha cuenda cha quiñi caa cha canyacuví ra. ²⁸ Ta chaha cha ña cuñí ca ñáyivi nacoto nuu ñu chi Nyoo, yucuan chaha saña ndaha ra chi ñu na caca maa xiñi ñu cha quiñi caa, ta sacuvi ñu cha ña tahán chi sacuvi ñu. ²⁹ Vatyí tandihí nuu cha ña vaha sacuvi ñu. Iyó ñu chihin inga rayii ta ñima yii ñu cuví. Ta iyó ra chihin inga ñusihi ta ñima ñasihi ra cuví. Quiñi xaan iyó ñu. Quichi cuvi xaan iñi ñu coo ca chi ñu. Nyacuví ñu cha quiñi caa. Nyiyó xaan iñi ñu cha chi inga ñáyivi. Chahñí ñu. Iyó ñu tisihi chihin tahan ñu. Sandaví ñaha ñu chi tahan ñu. Ta quiñi xaan ca iyó ñu. Ta ñii ñu cuendu. ³⁰ Cahán ña vaha ñu siqui inga ñáyivi. Ta tasi cuñí ñu nyehe ñu chi Nyoo. Tyityi iñi ñu. Ta cahnu sahá ñu chi ñu. Casanducuahá ca ñu cha quiñi caa. Ta ña quichahá ñu chi sutu ñu, ta chi sihi ñu. ³¹ Ña cuñí ñu tyasoho ñu tuhun vaha. Ña sacuvi ñu tuhun cahán ñu. Yori maa chi cuñí ñu. Ta ña casahá ñu ticahnu iñi chi tahan ñu. Ña ndahvi cuñí ñu nyehe ñu chi tahan ñu. ³² Maa ñu chitó vaha ñu ñaa cha catyí Nyoo tyi sacuvi ñu, chitó ñu vatyí ñu casacuví cha ña vaha, tahán chi tuhun chihi chi ñu ta cuhun ñu anyaya. Soco maa ñu sañihí ca ñu sacuvi ñu. Ta nyacua sii cuñí ñu tatu sacuvi inga ñáyivi cha quiñi caa.

Tachí tuñi Nyoo chi ñáyivi soco chihin cha ndicha

2 Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún

cha caá inga ñu ta cahún, suri maun sacouín cuatyun. Vatyí suri iin ri cha sacuvún chihin ñu nyehún ta cahún. ²Vatyí chitó yo vatyí Nyoo tachí tuñi ra chí ñu nyacuví tyehe caa, soco chihin cha ndicha ta chihin cha ndaa, tachí tuñi ra. ³Ta yoho cha cahán nyaun chi inga ñu, suri iin ri cha sacuvún chihin ñu. Cutachi tuñi Nyoo chuun cha cahún tyehe caa. ⁴¿Ñáá tuhun ña quichahún cha cundahví cuñí Nyoo nyehé ra chí yo ta cunyeé xaan ra cha sacuví yo? Vaha xaan ñáyivi cuví ra chihin yo. ¿Atu ña tuví iñun vatyí cha cuenda cha cundahví cuñi ra nyehé ra chuun, ta nyatú ra cha nasamon cuhva iyón? ⁵Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaun, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quívi cutachi tuñi ra chí ñáyivi. Ta cunyehe yo tyi chihin cha ndaa ta chihin cha ndicha tachí tuñi ra chí yo. ⁶Tatu sacuví yo cha ña vaha, cutahan chí cha ña vaha chí yo. Tatu sacuví yo cha vaha cutahan chí cha vaha chí yo quívi cutachi tuñi ra chí yo. ⁷Ta cuhva ra ñáyivi cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandíhi cuan chí ñu cha cuenda vatyí sacuví ñu maa maa ri cha vaha chihin cha cama iñi ñu. ⁸Soco ñihi xaan cutachi tuñi ra chí ñáyivi sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha. ⁹Cuaha xaan tindocho ta tucuihya iñi cunyehe tandíhi ñu casacuví cha ña vaha. Ta cha xihna ri cutachi tuñi ra chí ñu ñuu Israel, ñáyivi cuenda ra. Ta tyicuan caa tucu cutachi tuñi ra chí ñu cha ñima ñu Israel cuví. ¹⁰Soco chí tandíhi ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chí ñu Israel, tyicuan ta chí ñu cha ñima ñu Israel cuví.

Ta cucatyí ra tyi sii cuñi ra chihin ñu. Ta cucuhva ra cha taxi ri coo añima ñu.

¹¹Vatyí Nyoo ña cachí ra chí yo. Cuví ri yo ñu chitó, o cuví ri yo ñu ña chitó, iin ri cuhva cuñí maa ra chí yo. ¹²Vatyí tandíhi ñu casacuví cuatyí ta ña chitó ñu ley cha chahá Nyoo chí ra Moisés, cunaan ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahá Nyoo chí ra Moisés, cutachi tuñi Nyoo chí ñu yoso cuhva catyí suri maa nuu ley cuan. ¹³Vatyí ñu cha chíñí ley, ta ña nyacuví ñu cuhva catyí Nyoo, ñima ñáyivi vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo. ¹⁴Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi añima ñu, ican cuví ley ñu. ¹⁵Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chíñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu. ¹⁶Cha tyaa Nyoo tyiño chí ra Jesucristo vatyí coo quívi cusandaa ra cuatyí tandíhi ñáyivi iyó síqui ñuhu ñáyivi cha cuenda tandíhi tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chahá Nyoo chí ra Moisés

¹⁷Soco yoho catyún tyi ra Israel cuvín. Ta catyún tyi sacuvún cuhva catyí ley cha chahá Nyoo chí ra Moisés, ra cuví nuu chí ñu Israel quívi cuan. Ta cahnu sahún chuun tyi catyún tyi caá tuhun Nyoo añimon. ¹⁸Ta chítón cuhva cuñí Nyoo ta ley cuan sañahá chí chuun cha nacachún cha vaha, catyún. ¹⁹Ta vaha xaan sañahún ityi chí ñu cuaa, cuñí maun. Vaha xaan sacatón ñuhú chí ñu cuahan nu ñaa iñi, cuñí maun. ²⁰Ta cuñí maun vatyí chitón saquehen ityun chí

ñu cha ña chitó. Ta vatyi chitón tandihi cuii ley ta cha ndicha, chitón yoso caa sañahun chi ñu ña chitó, cuñi maun. ²¹Tatu tyicuan caa yoho sañahún chi inga ñáyivi, ¿ñáá tuhun ña sañahún chi maun? Tatu suri maun catyún vatyi ña tahán chi suhu yo, ¿ñáá tuhun cha tyi maun suhún? ²²Tatu suri maun catyún vatyi ña tahán chi coo inga ñusihi chi noo rayii, o inga rayii chi noo ñaha sihi, ¿ñáá tuhun cha vatyi maun tyicuan caa sacuvún? Tatu tasi cuñún chi xitohyo, ¿ñáá tuhun cha suhún cha tyayii cha iyó nu nyicú chi chichi vehe ñuhu? ²³Cahnu sahún chuun vatyi chitón ley Nyoo, soco ticahan nuu chahún chi Nyoo cha cuenda cha ña sacuvún ley cuan. ²⁴Yucuan chaha vatyi nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chi.

²⁵Ndicha vatyi cha sacuvi ñu tuhun cha tahn̄ya chiin ñii xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyi ñáyivi chi Nyoo cuvún. Tuhun cuan tyinyeé chi chuun soco tatu quichahún tandihi ley cha chaha Nyoo chí ra Moisés ñandihi. Soco tatu ña sacuvún cha catyí ley cuan, tari quivi cha ña sacuvun costumbre circuncisión cuví cuan. ²⁶Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuvi ñu costumbre circuncisión cuan, vasi ña sacuvi ñu. ²⁷Ra cha ña sacuvi costumbre cuan, soco quichahá ra cuhva catyí ley, cusanatuví ra chi yoho cha ña quichahún, ta yoho, ra chitó ley ta ra sacuvi costumbre circuncisión cuvún. ²⁸Vatyi ñima cha cuenda vatyi ñu Israel cuví ndo ta chihin cuan ta cuví ndo ñáyivi chi Nyoo. Ta ni ñima cha cuenda cha sacuvi ndo tuhun circuncisión. ²⁹Vatyi ñáyivi nyaá ley Nyoo añima, ican ñu cuví ñu ñu Israel cha ndicha vaha. Tari quivi tyaa

Tatyi li seña cuan añima ñu, ta ñima ñii ri ñu. Tatyi li Nyoo sacuví cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3 Tatu tyicuan caa, ¿ñáá cha tyinyeé chi yo cha cuví yo ñu Israel? ¿O atu tyinyeé chi chi yo cha sacuví yo tuhun circuncisión? ²Cuaha cuhva tyinyeé chi. Cha xihna ri, Nyoo chaha ra ley maa ra chi yo ñu Israel. ³Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuvi ca Nyoo cuhva catyí ra? ⁴¡Ñima! Soco na saha yo cuenda vatyi Nyoo ndicha ra. Sacuví ra tandihi cuhva cha catyí ra. Vasi tandihi ñáyivi cahán ñu cuendu. Vatyi nu tutu Nyoo catyí chi tuhun ra tyehe caa:

Sutu Mañi yuhu, cunyehe ñáyivi vatyi ñahri cuendu cahún.

Ta cunyehe vaha ñu chuun vatyi ndicha cha cahún.

⁵Chitó yo vatyi vaha ca quetuvi noo cha ndii tatu nyaá noo cha mecu xiin. Ndií xaan ca nyehe cuan. Cha ndicha cuví cuan. Soco catyí ñáyivi vatyi tyicuan caa tucu maa Nyoo chihin yo, ndii xaan ca natuvi ra tatu yoó ta cunyacuvi ca yo cha quiñi caa. Sacahnú yo chí ra cuví cuan, catyí ñu. Tyicuan ta ña tahán chí tachi tuñi ra chí yo, catyí ñu. Soco tatu tachí tuñi ra chí yo, ña vaha ra vatyi yoó sacahnú yo chí ra, catyí ñu. ⁶Ña vaha cuhva cahán ñu, vatyi tyehe ta ña vaha Nyoo ma cuvi tachi tuñi ra chí yo. Soco chitó yo tyi tahán chí tachi tuñi ra chí yo cha cuenda cuatyí yo. ⁷Tatu nyehé yo tyi vaha Nyoo chihin cuatyí sacuví ñáyivi, ¿atu tahán chí tachi tuñi ra chí ñu? Catyí ñu tyi ña tahán chí, soco ña ndicha. ⁸Tyehe ta ndicha cha cahán ñu cuan, vaha taxin ca sacuvi yo maa maa ri cha quiñi caa tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cu-

tachi tuñi Nyoo chi ñu chaha cha catyí tyi cahán ñu cuendu siqui ndi.

Tandihi yo ta iyó cuatyí yo

⁹Ta yoso caa ¿atu vaha ca yoó ñu Israel ta ñima ca inga ñáyivi? ¡Ñima! Vatyí cha yaha sañahi chi ndo vatyí iyó cuatyí tandihi yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo. ¹⁰Tyicuan caa catyí nu tutu Nyoo, nu catyí chi tyehe caa:

Yori maa ñáyivi vaha iyó, cha ni ña noo maa.

¹¹Yori ñu cutuñí iñi tuhun Nyoo.

Yori maa nanducú chi Nyoo.

¹²Tandihi ñu sandoq ñu chi Nyoo, ta tandihi ñu ta sacunaq ñu chi ñu.

Yori maa ñu sacuví cha vaha.

Cha ni ña noo maa.

¹³Tari noo ñaña ndiyi cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chi tahan ñu.

¹⁴Maa maa ri ca maa cha quiñi caa cahán ñu.

¹⁵Yatyí xaan ñu cha cacahñi ñu chi tahan ñu.

¹⁶Chahá xaan ñu tundoho ta tucuihya iñi chi ñáyivi chihin cuhva iyó ñu.

¹⁷Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

¹⁸Ni ña chicá iñi ñu tatu tachi tuñi Nyoo chi ñu noo quivi, catyí chi nu tutu Nyoo.

¹⁹Chitó yo vatyí tandihi cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyí ma cuvi catyí ñu tyi ñahri cuatyí ñu. Soco coto ñu vatyí cutahan chi cutachi tuñi Nyoo chi ñu vatyí iyó cuatyí ñu. Ta tyicuan caa tucu tandihi ñáyivi iyó siqui ñuhu ñayivi. ²⁰Ni minoo ñáyivi

ma cuvi cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá chi cha cuenda vatyí sacotó chi chi yo tyi iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

²¹Soco vityin sandoq yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañaha ra chi yo nu tutu tuhun ra cha tyaq profeta ta cha naha. Tatu sacuahá yo yucuan, coto yo noo cha ndicha. ²²Vatyí cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chi yo tatu ñu Israel cuví yo o ñima.

²³Tandihi ri ñáyivi sacuví ñu cuatyí, ta cañi xaan nyaá ñu chihin cuhva cuñí Nyoo, ta cha tyaquí Nyoo ma cuvi cun-yaa chihin ñu. ²⁴Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tiñ cuenda ca ra cuatyí yo. Vatyí chahnya ra Cristo Jesús cuatyí yo. ²⁵Nyoo saquichi ra chi ra Cristo vatyí cati niñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chi yo tatu chinó iñi yo chi ra Cristo. Ta cuvi chi tyehe caa, tacuhva nyehe ñáyivi tyi Nyoo vaha ra. Ta tyembu chahnu, Nyoo ña tiñ cuenda ra cuatyí ñáyivi cha cuenda vatyí cuchaa chi noo quivi cha cuquichi ra Cristo ta sanaa ra cuatyí ñu. ²⁶Ta tyicuan caa cuvi tacuhva vatyí nyehé ñáyivi vatyí Nyoo tyicuan ri vaha ra, ta sahá ra tuhun tyi vaha tandihi ñu chinó iñi chi ra Jesús.

²⁷¿Atu cuví sacahnu yo chi yo vityin? Ma cuvi. ¿Ñáá tuhun? Cha cuenda vatyí ma cuvi catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chi ra ta cuvaha yo nuu ra. ²⁸Cha chitó vaha yo vityin vatyí Nyoo sacuva-

hã ra chi yo nuu ra chihin cha chinó ñi ra chi ra, ta ñima chihin cha sacuví yo cha catyí ley ta cuvaha yo nuu ra.

²⁹ ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra. ³⁰ Vatyí noo tuhun ri maa ra iyó. Ta ican ra sacuvahã ra chi yo nuu ra cha cuenda cha chinó ñi ra chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví. ³¹ Tatu tyicuan caa, ¿atu ña vaha ca ley chahnu cuan? ¿Ñima cha ña vaha ca! Vaha. Soco vityin chihin fuerza maa ra Cristo sañahá yo vatyí ndii maa cha catyí ley cuan ta ndicha.

Cuhva chiyo ra Abraham sañahá chi chi yo yoso caa cuvaha yo nuu Nyoo

4 ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra? ² Tyehe ta cuvahã ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chi ra, soco ñima nuu Nyoo. ³ Vatyí ¿ñáá catyí nu tutu tuhun Nyoo? Catyí chi vatyí ra Abraham chinqo ñi ra chi Nyoo, ta cha cuenda cha chinó ñi ra chi Nyoo, Nyoo sahã ra tuhun tyi vaha ra. ⁴ Vaha, vityin cuacuhve noo cuhva chi ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño sahã ra, ican cuví. ⁵ Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó ñi ra vatyí Nyoo sahá ra tucahnu ñi chi ñu iyó cuatyí, Nyoo cusaha ra tuhun tyi vaha ra cha cuenda cha chinó ñi ra chi ra. ⁶ Ra David cahan ra tuhun tusii ñi cha iyó chi ñáyivi cha sahã Nyoo tuhun vatyí vaha ta ña tiín cuenda ra cuatyí cha sacuví ñu. ⁷ Tyehe caa catyí ra David:

Ñáyivi cha sahã Nyoo tucahnu ñi cuatyí, sii xaan cuñí ñu, vatyí Nyoo ña tiín cuenda ra cuatyí ñu.

⁸ Sii xaan cuñí ñu ña tiín cuenda Nyoo cuatyí.

⁹ ¿Atu cha cuenda ri ñu sacuví tuhun cha tahnya ñii cuví tusii ñi ihya, o cuví tucu chi cha cuenda ñu ña sacuví cuan? Cha yahã sañahi chi ndo vatyí Nyoo sahã ra tuhun tyi vaha ra Abraham cha cuenda cha chinó ñi ra chi ra. ¹⁰ Soco ¿ama sahã ra tuhun tyi vaha ra? ¿Atu cha ni cumañi ca sacuví ra Abraham tuhun circuncisión cuan, o cha yahã? Ñima nya cha yahã, soco cha ni cumañi ca. ¹¹ Yahã cuan ta sacuví ra Abraham tuhun cuan, tari noo seña ri o sellu vatyí Nyoo cha yahã sahã ra tuhun tyi vaha ra cha cuenda cha chinó ñi ra chi ra. Ta cha cuenda ihya cuví ra Abraham tari noo sutu tandihi yo ñu chinó ñi Nyoo vasi ña sacuví yo tuhun circuncisión. Ta tyicuan caa, Nyoo sahã ra tuhun vatyí vaha yo. ¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu ñi ñu chi Nyoo tari chinó ñi tucu maa ra Abraham sutu chahnu yo, quívi cha ta sacuví ca ra tuhun cuan.

Chihin cha chinó ñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñayivi chihin ra. Soco savahã Nyoo promesa cuan, ñima cha cuenda vatyí ra Abraham sacuví ra cha catyí ley, soco cha cuenda vatyí chinó ñi ra chi Nyoo, ta Nyoo sahã ra tuhun vatyí vaha ra. ¹⁴ Tyehe ta maa maa ri ñu cha sacuví cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó ñi yo chi Nyoo, ta ni ñahri yahvi nyaá cha catyí ra tyi cuhva ra chiyo. ¹⁵ Vatyí ley cuan sañahá chi vatyí tahn chi tachi tuñi Nyoo chi yo tatu ña sacuví

yo cuhva catyí chi. Soco tyehe ta ñahri ley iyó, ñahri cuatyí yo coo.

¹⁶Yucuan chaha cuñihi yo promesa Nyoo cha cuenda cha chinó iñi yo chi ra, tacuhva vatyí cuví chi noo tumañi iñi cha chahá ra chi tandihi yo cha cuví yo ñáyivi chi ra Abraham. Nima ñu chinó ri iñi chi Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chi Nyoo ri chinó iñi ñu tari chinó iñi ra Abraham. Ican ra cuví sutu tandihi ñáyivi cha chinó iñi chi Nyoo.

¹⁷Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyivi?”, coo siqui ñuhu ñáyivi”, catyí ra chi ra Abraham. Ta cha catyí ra tyicuan caa, cuñí chi catyí vatyí cuví yo sehe ra Abraham nuu Nyoo. Chinó iñi ra Abraham chi Nyoo, vatyí Nyoo sanandotó ra ndiyi, ta chihin tuhun cahán ra sacoo ra cha cumañi ca coo.

¹⁸Ra Abraham chinó iñi ra chi Nyoo vasi ma cuví ñihi ra promesa cuan tyaa maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihí ra promesa Nyoo ta cuví ra sutu cuaha ñáyivi, tari cuhva catyí Nyoo chi ra: “Tyehe caa cucucuaha ñáyivi chuun”, catyí ra chi ra. ¹⁹Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñí cuví ra. Tari maa ra ta tari cu Sara ñasihi ra, ma cuví ca coo sehe ñu, tyí cha chahnu xaan ñu. ²⁰Soco ña ndu uvi iñi ra cha cuñihi ra cha catyí Nyoo tyí cuhva ra chi ra. Soco chinó iñi ra chihin cha ñi iñi ra. Ta yihí ca iñi ra chi Nyoo. Ta sacahnú ra chi ra, ²¹cha cuenda vatyí chitó vaha ra vatyí Nyoo iyó tunyee iñi chi ra cha cusacuví ra cha catyí ra chi ra. ²²Yucuan chaha Nyoo saha ra tuhun tyí vaha ra cha cuenda cha chinó iñi ra chi ra.

²³Saha Nyoo tuhun vatyí vaha ra Abraham chaha cha chinó iñi ra chi ra. Ña chicunyaá nuu tutu vatyí noo ri ra Abraham cuvaha ra, ²⁴soco chicunyaá

tucu nuu tutu cha cuenda yoó. Vatyí sahá Nyoo tuhun tyí vaha tucu yo vatyí chinó iñi yo chi ra, vatyí ican ra sanandotó chi ra Jesús, Sutu Mañi yo. ²⁵Ta maa ra chahá cuenda chi ra Jesús tyí cuví ra cha cuenda cuatyí yo, ta nandotó ra tacuhva vatyí cuví cuvaha yo nuu ra.

Vityin cha nicoo vaha yo chihin Nyoo, cuaha cha vaha cucuhva ra chi yo

5 Ta cha yaha nduvaha ñima yo nuu Nyoo cha cuenda cha chinó iñi yo chi ra, nicoo vaha yo chihin ra cha cuenda Sutu Mañi yo Jesucristo. ²Vatyí cha cuenda ra Cristo ñihí yo cha vaha Nyoo cha cuenda cha chinó iñi yo chi ra. Yucuan chaha ñi iñi yo ta sii cuñí yo, ta yihí vaha iñi yo vatyí cucuhva ra cha cucahnu cuví yo chihin ra. ³Ta ñima yucuan ri cusii cuñí yo, tahán tucu chi cusii cuñí yo quivi nyehé yo tindoho. Vatyí chitó yo vatyí cha nyehé yo tindoho cuan cutuhva ca yo coo cha cama iñi yo. ⁴Ta tatu chihin cha cama iñi yo, yaha yo tindoho, quita vaha yo nuu Nyoo. Ta yucuan ta chitó vaha yo tyí cuñihi yo ndii maa cha cucuhva ra chi yo. ⁵Tatu yihí iñi yo chi maa ra, ma cucahan nuu yo nyehé yo chi ra, vatyí cuñí xaan ra chi yo cha cuenda Tatyí Ii ra cha chahá ra cunyaá ñima yo.

⁶Vatyí quivi cha ña ñihí ca yo yoso caa sacuví yo chihin cha cuaha cuatyí yo, quivi cuan quichí ra Cristo, quichí cuví ra cha cuenda yo ñu iyó cuatyí. ⁷Chitó yo vatyí yori caña iñi cuví tyiño nuu noo ñáyivi. Vasi xityi ri caña iñi ñu cuhva ñu ñáyivi ñu cha cuenda noo ñu vaha xaan. ⁸Soco yucuan cuví nu sañaha Nyoo vatyí cuñí ra chi yo, vatyí quichi cuví ra Cristo cha cuenda yo vasi iyó xaan cuatyí yo. ⁹Ta vityin cha cha yaha cuvaha yo nuu Nyoo cuenda cha chihí ra Cristo, yucuan chaha chitó vaha yo tyí ma cuhun ca yo anyaya nu cutachi tuñi Nyoo chi ñáyivi ña chinó iñi chi ra.

¹⁰ Quiví cuan xaan cuvī iñi yo chi Nyoo, soco sanicoḡ vaha ra chi yo chihin ra cha cuenda cha chihī Sehe ra. Yucuan chaha chitó vaha yo tyi cusacacu ndihī ra chi yo vatyí iyó ñáyivī ra Cristo añima yo vityin cha iyó vaha yo chihin ra. ¹¹ Ta ñima ihya ri, soco cusii tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoḡ vaha yo chihin Nyoo.

Ra Adán ta ra Cristo

¹² Cha cuenda noo rayii quihvī cuatyí siqui ñuhu ñáyivī ta chicoḡ tuhun chihī. Ta tuhun chihī cuan chicoḡ chi siqui tandihī ñáyivī vatyí tandihī ñu sacuvī ñu cuatyí cha cuenda ra Adán. ¹³ Nyata ni cumañi ca cuhva Nyoo ley chi ra Moisés ta cha iyó cuatyí siqui ñuhu ñáyivī, soco ña tiñ Nyoo cuenda cuatyí ñáyivī ta ni cumañi ca cuhva ra ley cuan. ¹⁴ Soco nyacua nya quivī ra Adán ta nyacua nya quivī ra Moisés, chinyaca ñaha tuhun chihī chi ñu cha sacuvī cuatyí, vasi ñima tahan cuatyí ra Adán cuvī, cha ña quichaha ra chi Nyoo. Ta ra Adán cuvī ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chi chihin tumañi iñi cha chaha Nyoo chi yo. Vatyí cha cuenda cuatyí noo rayii cuan, cuaha xaan ñáyivī chihī. Soco sacacú Nyoo chi yo cha caha ri, cha cuenda noo ri rayii ta ican ra ihya cuvī ra Jesucristo. Ta cahnu xaan ca cuvī cuan. Ta cha cuenda cha vaha chi cuaha ñáyivī cuvī. ¹⁶ Cuatyí noo ri rayii ra Adán cuan, ma cuvī ndiquí tahan chi chihin cha sacacú Nyoo chi yo. Vatyí cha cuenda cuatyí noo ri ra cuan, Nyoo tachí tuñi ra chi ñáyivī. Soco vityin chihin cha ñahri tyiyahví yo, Nyoo sacacú ra chi yo ta sahá ra tuhun tyi vaha yo nuu ra, vasi cuaha xaan cuatyí sacuvī yo. ¹⁷ Ndicha vatyí quichaha nyaca ñaha tuhun chihī siqui ñuhu ñáyivī cha cuenda cuatyí noo

ri rayii. Ta cha tyicuan caa chitó yo vatyí cahnu ca cuvī cha vaha cha sacuvī nonga ra, ra Jesucristo. Vatyí tandihī ñu cha ñihī cha vaha cha chahá Nyoo, cha cuvaha ñu nuu ra, ta iyó ñu ñáyivī chaa chihin tunyee iñi ra Jesucristo. ¹⁸ Tari cha catyí cuatyí ra Adán ta tachí tuñi Nyoo chi tandihī ñáyivī iyó siqui ñuhu ñáyivī, tyicuan caa tucu cha cuenda cha vaha cha sacuvī ra Jesucristo, Nyoo saha ra tuhun tyi vaha ñáyivī nuu ra ta chahá ra noo ñáyivī vaha coo tandihī ñu. ¹⁹ O cuñí chi catyí tyehe caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoḡ cuatyí ñu. Ta suri tyicuan caa tucu cha catyí cha quichaha ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyí Nyoo chaha cuenda ra ley cuan chi ra Moisés tacuhva nacoto ñáyivī tyi iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnu ca tucahnu iñi iyó chi ra chihin yo vatyí cuñí xaan ca ra chi yo. ²¹ Tari chinyaca ñaha cuatyí chi yo ta chaha chi tuhun chihī chi yo, tyicuan caa tucu nyacá ñaha tumañi iñi Nyoo chi yo vityin ta sacuvaha ra chi yo nuu ra vatyí coo yo noo ñáyivī cha ma naa ca maa cha cuenda Sutu Mañi yo Jesucristo.

Ma sacuvi ca yo cuatyí soco sacuvi yo cuhva catyí ra Cristo

6 ¿Yoso caa catyí yo vityin? ¿Atu cusacuvi ca yo cuatyí tacuhva vatyí sañaha Nyoo vatyí cuaha xaan tucahnu iñi iyó chi ra? ² Ma sacuvi ca yo. Yoó cha yaha ndu uvi iñi yo cuatyí yo. Tari quivī chihī cuatyí yo cuvī cuan. Ta ¿yoso caa cuvī sacuvi ca yo vityin? Ma cuvī ca. ³ ¿Atu ña chitó nyoho vatyí cha ndu iñi ri yo chihin ra Cristo Jesús cha cuenda cha condutyá yo? Tari quivī chihī yo chihin ra cuvī cuan. ⁴ Vatyí cha cuenda cha condutyá yo, tari quivī cha quihvī yo chichi ñuhú iñi ri chihin ra Cristo quivī chihī

ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyí coo yo noo ñáyiví chaa chihin ra.

⁵Ta ñin ri coño ñuhu nanduví yo chihin ra, tari quiví chihí yo ñin ri chihin ra cuví cuan, ta cha tyicuan caa, cunandoto tucu yo tari nandoto ra. ⁶Ta chitó yo vatyí tandihí cuhva chiyo yo ta ityi chata ca, cha yaha chihí chi nu cruzi chihin ra Cristo, tacuhva vatyí coño ñuhu cuatyí yo ma cuví ca cunyaca ñaha chi chi yo. ⁷Vatyí ñu cha yahá chihí, ma cuví ca sacuví ñu cuatyí. ⁸Ta tatu cha yahá chihí yo chihin ra Cristo, chinó ñni yo vatyí cucoo tucu yo chihin ra. ⁹Ta chitó yo vatyí cha yahá chihí ra Cristo, noo ri chaha nandoto ra, ta ma cúvi ca ra. Ñahri ca tunyee ñni iyó chi tuhun chihi cha cunyaca ñaha ca chi chi ra. ¹⁰Yahá cha chihí ra Cristo cha catyí cuatyí ñáyiví, nandoto ra cha ma cúvi ca maa ra. Ta vityin iyó ra cha cuenda maa Nyoo. ¹¹Ta tyicuan caa tucu maa yo, ma sacuví ca yo cuatyí. Saha yo tuhun tyi cha yahá chihí yo cha cuenda cuatyí cuan. Soco coo yo cuhva cuñí Nyoo cha cuenda cha ñin ri cuví yo chihin ra Cristo Jesús Sutu Mañi yo.

¹²Yucuan chaha yoó ma cuhva yo ityi cha cunyaca ñaha ca cuatyí chi coño ñuhu yo. Ma cuhva yo ityi chi coño ñuhu yo cha saniñi chi chi yo cha sacuví yo noo cha ña vaha cha cuñí chi. ¹³Ma cuhva yo ityi chi coño ñuhu yo cha sacuví chi cha quiñi caa. Soco cuhva cuenda yo chi yo chi Nyoo, tari noo ñáyiví cha chihí ta nandoto. Cuhva cuenda yo coño ñuhu yo chi Nyoo tacuhva vatyí sacuví yo cha vaha. ¹⁴Vatyí cuatyí yo ma cuví ca chasaha chi chi yo. Vatyí ley cha tyaá ra Moisés, ña nyacá ñaha ca chi chi yo, soco cha cacuñi aña yo ta iyó yo cha cuenda tumañi ñni cha chahá Nyoo chi yo.

Cuví yo tari noo musu cha sacuví cha vaha

¹⁵Iyó yo cha cuenda tumañi ñni cuan, ta vityin ña nyacá ñaha ca ley chi yo. ¿Ta tatu ña nyaca ñaha ca ley chi yo, atu tahán chi sacuví ca yo cuatyí? Ña tahán chi. ¹⁶Nyoho chitó vaha ndo vatyí tatu cuví ndo musu noo ra, tahán chi sacuví ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuví yo, tari noo chitoho yo cuví cuatyí cuan, vatyí quichahá yo chi cuan. Ta cunaa yo chihin cuan. Soco tatu quichahá yo chi Nyoo, cusaha ra tuhun tyi vaha yo. ¹⁷Soco tyahvi nyoo chi Nyoo, tyi nyoho nu quichi chi cuví ndo noo musu chi cuatyí vatyí quichahá ndo chi cuan. Soco vityin chihin cha ñni ñni ndo quichahá ndo tuhun Nyoo cha sañahá ñu chi ndo. ¹⁸Cha yahá cundaá cuatyí ndo, ta vityin ña nyacá ñaha ca chi chi ndo. Ta vityin cuví ndo noo musu cha cua sacuví cha vaha. ¹⁹Cahín noo cuhva cha ña yí ri chihin ndo vatyí ta cutuñi vaha ca ñni ndo tuhun Nyoo. Quiví cuan chahá cuenda ndo coño ñuhu ndo chi cha quiñi caa ta cha ña vaha vatyí sacuví ndo cha ña vaha. Vityin ñacuhva cuenda ndo coño ñuhu ndo chi Nyoo tacuhva vatyí coo ndo noo ñáyiví cachi, ta maa maa ri cha vaha sacuví ndo nuu ra.

²⁰Quiví cuví ndo musu cha quiñi caa, ña cuví sacuví ndo cha vaha. ²¹Soco ¿ñáá cha ñihí ndo chihin cuan? Maa ri ticahan nuu chahá cuan chi ndo. Ta ña tuví ñni ndo. Maa ri tuhun chihi ta anyaya nyisó cuan. ²²Soco vityin ña nyacá ñaha ca cuatyí chi ndo. Ta vityin cha sacuví ndo tyiño nuu Nyoo. Ta ihya ndicha tyinyee chi chi ndo vatyí chihin ihya cuví coo ndo noo ñáyiví cachi. Ta nu ndihí tuhun tyicuan ri maa cucoo ndo chihin Nyoo. ²³Cha sacuví yo cuatyí,

ican cuan chahá tuhun chihi chi yo. Soco tumañi iñi cha chahá Nyoo chi yo, ican cuan cuví ñáyiví cha ma naa ca maa. Ta ican cuan chahá ra ta ñahri tyiyahvi yo, cha cuenda cha iin ri cuví yo chihin ra Cristo Jesús, Sutu Mañi yo.

Ña nyacá ñaha ca ley chahnu chi ñu yihí cuenda ra Cristo

7 Yañi, nyoho ñu chitó ley cuví ndo, chitó ndo vatyi ley nyacá ñaha chi chi noo ñáyiví cha ni ri ca cha iyó ñu. ²⁻³Ta cuñun, noo ñaha tandaha, catyi ley vatyi coo ña chihin yii ña nyacua nya cúvi ra. Ta tatu iyó ña chihin inga rayii cha ni ri cha iyó yii ña, chicoo cuatyí ña nuu Nyoo. Soco tatu cha yahá chihi yii ña, ña nyacá ñaha ca ley cuenda ñu tandaha chi ña, ta cuví tandaha ña chihin inga ra, ta ma coo cuatyí ña nuu Nyoo.

⁴Ta tyicuan caa tucu nyoho yañi. Cha chihí ndo cha cuenda ley chahnu ta cuví ndo ñu cuenda ra Cristo vatyi ican ra cuví yii ndo vityin. Ta ican ra cuví ra cha nandoto, tacuhva vatyi cuví cotyiño Nyoo chi yo ta sacuvi yo cha vaha. ⁵Quiví chiyo yo cuhva cuñi coño ñuhu yo, ley chahnu cha tyaá ra Moisés, tacuhva sanaquiquí ri chi chi yo cha sacuvi yo cha quiñi caa, vatyi catyí chi tyi ma sacuvi yo. Soco sacuví yo, ta yucuan cuví cha chahá tuhun chihi chi añaima yo. ⁶Soco vityin ña nyacá ñaha ca ley chahnu cuan chi yo, vatyi cha yahá chihi cha quiñi caa yo chihin ra Cristo. Ta vityin cuví sacuvi yo tyiño nuu Nyoo vatyi iyó yo ñáyiví chaa cha chahá Tatyí Ii Nyoo chi yo, ta ña sacuví ca yo tari sacuví yo quivi nyicon xaan yo ley chahnu cuan.

Ley Nyoo, ican sañahá vatyi iyó cuatyí yo

⁷Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuví ley cuan, ma cote ñáá

cha cuví cuatyí. Ni ma cote tyi ña vaha cha quichi cuví iñi cha chii inga ñáyiví, tyehe ta ña catyí ley cuan vatyi ña vaha. ⁸Tyehe ta ñahri ley cuan, ma cote ñáá cha cuví cuatyí, ta ma cuñi xain sacuvi, soco quivi cha chité ñáá cha cuví cuatyí, yucuan quivi quichí cuví xaan iñi sacuvi, vatyi naquiquí cha quiñi caa cha iyó chi. Soco tyehe ta ñahri ley, ma coto yo tyi iyó cuatyí. ⁹Ta quivi cha ña chite ñáá tuhun cahán ley cha chahá Nyoo chi ra Moisés, chica iñi vatyi ñahri cuatyí iyó nuu Nyoo. Soco quivi chite ley cuan, ta chite vatyi tahán chi cunai nuu Nyoo vatyi iyó cuatyí. ¹⁰Catyí ley cuan tyi tatu quichahí chi chi, cucoi tyicuan ri maa. Soco cha nuu cha ñihi tahvi añaime chihin ley cuan, cunaa ndihi nuu Nyoo. ¹¹Ta cuatyí cha iyó chii, sandaví ñaha chi chii vatyi chotyino chi ley chahnu cuan tacuhva vatyi tahán chi cunai nuu Nyoo, vatyi ña quichahí nu cahán ley cuan.

¹²Ley cha chahá Nyoo chi ra Moisés, vaha xaan, vatyi tuhun cha chahá maa Nyoo cuví, ta tandíhi cha catyí ra vatyi sacuvi yo, vaha xaan ta cuíti xaan. ¹³Ta ley vaha cuan, ¿atu ican cuan sativí chii? Ñima. Cuatyí cha sacuví, ican sativí chii, yucuan chaha tahán chi cunai nuu Nyoo. Vatyi ley vaha cuan, ican cuví cha sañahá chii vatyi cuatyí cuví cha sacuví. Ta cha tyicuan caa, sañahá ley vatyi quiñi xaan caa cha sacuví yo cuatyí.

¹⁴Ta chitó yo vatyi ley cuan, Nyoo chahá. Ta ñahri cuatyí ley cuan. Soco mai iyó cuatyí vatyi sacuví cha quiñi caa ta nyacá ñaha cuatyí cuan chii. ¹⁵Ña cutuñí iñi ñáá cha tahin. Vatyi cuñí sacuvi cha vaha, ta ña cuví sacuvi. Ta cha ña vaha cha ña cuñí sacuvi, ican cuan sacuví. ¹⁶Cuñí xain sacuvi cha vaha, soco ña cuví sacuvi, ta cha tyicuan caa tiin cuenda vatyi ley chahnu Nyoo, vaha chi. ¹⁷Ñima ca mai sacuví cha ña vaha, soco cuatyí cha iyó chii, ican cuan

sacuví cha ña vaha. ¹⁸Vatyi chité vatyi iyó cuatyí cha cuenda coño ñuhi. Yucuan chaha ñahri cha vaha sacuví, vatyi quichí cuvi iñi sacuvi cha vaha, soco ña cuví. ¹⁹Cuñí sacuvi cha vaha, soco ña sacuví ta sañihí que sacuvi cha ña vaha. ²⁰Ta tatu sacuví cha ña cuñí sacuvi, ñima ca mai sacuví, soco cuatyí cha iyó chii, ican can sacuví.

²¹Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví. ²²Vatyi chichi añime tahán xaan iñi ley Nyoo. ²³Soco iyó inga ley chichi coño ñuhi, ta ña tahán iñi chi cuhva cha tahán iñi añime. Ta chahá chi cha cunyaca ñaha cuatyí cha iyó chichi coño ñuhi chii. ²⁴¡Ndahvi yuhu ra ndahvi! ¿Yóo ra cusacacu chii tacuhva ma cunai nuu Nyoo chihin cuhva ña vaha cha nyacuví coño ñuhi? ²⁵Noo tuhun ri maa Nyoo sacacú ra chii cha cuenda ra Jesucristo. ¡Tyahvi nyoo chi Nyoo cha cuenda cuan! Ta vityin nyehí vatyi chihin añime cuñí sacuví ley Nyoo, soco coño ñuhi cuñí chi sacuví chi ley cuatyí.

Tatyi Ii Nyoo tyinyeé chi chi yo ta cuví coo yo noo ñayiví chaa

8 Soco vityin, Nyoo ma tachi tuñi ca ra chi ñu ndu iin ri chihin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyi Ii ra. ²Ta tyicuan caa tucu yuhu, Tatyi Ii Nyoo nyacá ñaha chii vityin vatyi ndachí chi chii, ta chahá chi noo ñayiví chaa coi cha cuenda cha iin ri cuví chihin ra Cristo Jesús. Ta vityin ña nyacá ñaha ca ley cuatyí ta tuhun chihi chii. ³Nyoo sacuví ra noo cha ña cuví sacuvi ley cha quehen cuenda ra Moisés, vatyi ña cuví chasaha chi coño ñuhu cuatyí yo cha nyacá ñaha chi yo. Yucuan chaha Nyoo saquichí ra chi Sehe ra. Quichí ra chihin noo coño ñuhu tari maa yo, ta chihí ra cha cuenda cuatyí yo, ta sandihí ra tuhun cha nyacá ñaha cuatyí chi yo.

⁴Sacuví Nyoo tyehe caa tacuhva cuví sacuvi yo cuhva catyí ley ra, vatyi ñima ca cuhva cuñí coño ñuhu yo iyó yo, soco iyó yo cuhva cuñí Tatyi Ii Nyoo.

⁵Vatyi ñu iyó cuhva cuñí coño ñuhu, cuhva cuñí chi chicá xiñi ñu, soco ñu iyó cuhva cuñí Tatyi Ii Nyoo, cuhva cuñí Tatyi Ii Nyoo chicá xiñi ñu. ⁶Ta ñu chicá xaan xiñi maa maa ri tuhun cha cuñí coño ñuhu ñu, cunaa ñu nuu Nyoo. Soco ñu chicá xiñi cuhva cuñí Tatyi Ii. Iyó cha taxi ri añima ñu ta cucoo ñu ñayiví tyicuan ri maa chihin Nyoo. ⁷Ñu cha maa maa ri cuhva cuñí coño ñuhu chicá xiñi, ñu xaan iñi chi Nyoo cuví ñu, vatyi ni ña cuñí ñu ta ni ña cuví sacuvi ñu cha catyí ley ra. ⁸Yucuan chaha ñu iyó cuhva cuñí coño ñuhu, ña cuví sacuvi ñu cuhva tahán iñi Nyoo. ⁹Soco nyoho ña iyó ca ndo cuhva cuñí coño ñuhu, vatyi tatu ndicha cha iyó Tatyi Ii Nyoo añima ndo, iyó ndo chihin cha iin ri cuví ndo chihin Tatyi Ii Nyoo. Ñu cha yori Tatyi Ii ra Cristo ñohó añima, ñima ñu cuenda ra Cristo cuví chi ñu. ¹⁰Soco ñu iyó ra Cristo añima, nyitó añima ñu vatyi sanduvaha Nyoo. Soco coño ñuhu ñu chihí chi cha catyí cuatyí. ¹¹Nyoo sanandoto ra chi ra Jesús cha yaha cha chihí ra. Ta tyicuan caa tucu nyoho, tatu iyó Tatyi Ii Nyoo añima ndo, cusanan-doto tucu Nyoo chi coño ñuhu ndo chihin Tatyi Ii ra.

¹²Ta tyicuan caa yañi, nyaá noo cha nyaá siquí yo cha sacuvi yo, soco ñima cha sacuvi yo cuhva cuñí coño ñuhu yo. ¹³Vatyi tatu iyó ndo maa maa ri cuhva cuñí coño ñuhu ndo, cunaa ndo nuu Nyoo. Soco tatu iyó ndo cuhva cuñí Tatyi Ii Nyoo chihin tunyee iñi ra, cuví chasaha ndo chi cha quiñi caa cha cuñí coño ñuhu ndo ta cuconyito ndo cha ndicha cuii.

¹⁴Vatyi tandihí ñu sacuví cuhva saquehén ityi Tatyi Ii Nyoo, sehe Nyoo cuví chi ñu. ¹⁵Nya quiví cha tiin cuenda

yo Tatyí li Nyoo ta ña yuhví ca yo chi ra, vatyí ñíma tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí li sacahán chi yo na cahan yo chihin Nyoo tyehe caa: “Sutu Mañi yuhu”, catyí yo chi ra.

¹⁶ Ta suri maa Tatyí li cuan ndu ñin ri chi chihin cha chiñi tuñi yo ta sacoto chi chi yo vatyí cha cuví yo sehe Nyoo. ¹⁷ Ta cha cuenda cha cuví yo sehe ra, iyó ityi chi yo cha ñihi yo cha vaha cha catyí Nyoo tyi cuhva ra chi yo, ñin ri chihin ra Cristo. Vatyí tatu ñin ri nyehé yo tindoho chihin ra Cristo, suri ñin ri cucahnu yo chihin ra.

¹⁸ Chité vatyí tindoho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo. ¹⁹ Tandíhi cha savaha Nyoo cuñi xaan chi nyehe chi, ta nyatú chi quivi cha cusañaha ra yóo cha cuví tandíhi sehe ra. ²⁰ Vatyí tandíhi cha savaha Nyoo tiví chi. Vasi ña cuñi chi tiví chi soco Nyoo chaha ra cha tiví chi cha cuenda cuatyí cha sacuví ñáyivi. Soco catyí Nyoo tyi coo quivi ta cunduchaa tucu chi inga chaha. ²¹ Tandíhi cha savaha Nyoo ta cunduchaa tucu chi inga chaha, ta ma cutivi ca, quivi cha cunasama Nyoo cuhva iyó chi vityin. Ta cucusií cuñi chi ñin ri chihin tandíhi sehe Nyoo vatyí ma tiví ca chi. ²² Chitó yo vatyí tandíhi cha savaha Nyoo ta nyehé xaan chi tindoho. Cahnu xaan tindoho nyehé chi tari cha uhvi cha nyehé noo ñaha sihi cha cacú sehe ña. ²³ Ta ñíma maa ri maa chi nyehé tindoho, soco nyehé tucu yoó. Vasi cha natiin cuenda yo Tatyí li cha chaha quiyi Nyoo chi yo, soco cahnu xaan tindoho nyehé yo, vatyí cuñi xaan yo cha tahán ri chi quivi cha cunanduvi yo sehe ra. Vatyí cunasama ra cuhva iyó coño ñuhu yo. ²⁴ Vasi ta ñihi ca yo tandíhi cuan soco chitó yo tyi cuñihi yo vatyí chino ñi yo ta chihin cuan cacu yo. Tatu nyatú yo cha cu-

tahan chi chi yo, cuñi chi catyi vatyí ta ñihi ca yo. Tatu cha yaha ñihi yo chi chi, ma cuatu ca yo. ²⁵ Soco tatu yihí ñi yo cha ñihi yo noo cha ta nyehe ca yo, cuñi chi cha cuatu yo chihin cha cama ñi yo.

²⁶ Ta suri tyicuan caa tyinyeé tucu Tatyí li chi yo chihin cha vita cuñi yo vatyí ña chitó yo yoso caa cacan tahvi yo chi Nyoo cuhva tahán chi. Ta Tatyí li cuan chicán tahvi chi chi Nyoo cha cuenda yo chihin noo tuhun cha ña cuví nacatyí yo. ²⁷ Chitó maa Nyoo ñáá cha caá ñíma yo, ta chitó ra ñáá cha cuñi Tatyí li ra cacan chi, vatyí chicán chi cuhva cuñi maa ra cha cuenda ñáyivi cuenda ra.

²⁸ Chitó yo vatyí ñáyivi, ñu cuñi vavaha chi Nyoo, tandíhi cha cuví chi ñu ta tyinyeé chi chi ñu, vatyí maa ñu cuví ñu nacachi ra, tari cuhva tyaá ra cuhva chi ñu. ²⁹ Vatyí nya quivi xihna ri, ta cha ñohó nuu Nyoo yóo cuví ñu cucunyicon chi ra. Ta tyaá ra cuhva chi ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñihi ca cha nuu tandíhi ca yañi ra, ñu yihí tuhun Nyoo. ³⁰ Ta ñu cha tyaá Nyoo cuhva tyi cuví ñu sehe ra, nacana tucu ra chi ñu. Ta ñu cha nacana ra, suri sacuvaha ra chi ñu nuu ra. Ta ñu cha sacuvaha ra chi, chaha ra cha cucahnu cuví ñu chihin ra.

³¹ ¿Ñáá cha catyi yo cha tyicuan caa? Tatu Nyoo ta nyaá ra tumañi ñi chi yo, ¿yóo cha cuví tyaá cuatyí siqui yo? Yori. ³² Nyoo ña catyi ra cha ma cuhva cuenda ra sehe ra, soco chaha cuenda ra chi ra vatyí cúvi ra cha cuenda tandíhi yo. Ta tatu tyicuan caa, ¿atu ma cuhva tucu ra tandíhi ca cha chiñuhú chi yo ñin ri chihin Sehe ra? Cuhva ra. ³³ ¿Yóo cha cuví tyaá cuatyí siqui ñu cha nacachi Nyoo? Yori. Vatyí Nyoo ican ra cuví ra sava ra tuhun tyi vaha ñu nuu ra. ³⁴ ¿Yóo cha cuví catyi tyi cuhun yo anyaya? Yori. Vatyí ra Cristo cuví ra chihí cha cuenda cuatyí yo, ta nandoto ra ta vityin nyaá ra

chiyo vaha ndaha Nyoo, ta chicán tahvi ra nuu Nyoo cha cuenda yo. ³⁵Ñahri cha cuví sacuachiyo chi yo chihin cuhva cuñí xaan ra Cristo chi yo. Vatyí vasi nyehé xaan yo tindoho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihí yo, soco ma cuvi sacuachiyo tandihí tindoho cuan chi yo chihin cuhva cuñí ra chi yo. ³⁶Vatyí tyehe caa cahán chi nu tutu Nyoo tuhun tindoho cha cunyehe yo:

Cha cuendon, Sutu Mañi yuhu, ta cuñí cahñi ñáyivi chi ndi tandihí quivi. Ta tari noo mbee cha cua cahñi ñu, tyicuan caa sacuví ñu chi ndi, catyí chi.

³⁷Soco vasi yahá yo tandihí tindoho cuan, soco cucuvi vaha ca chasaha yo cha cuenda ra cha cuñí xaan chi yo. ³⁸Yucuan chaha chitó vahi vatyí ñahri maa cha cuví sacuachiyo chi yo chihin cuhva cuñí xaan Nyoo chi yo. Ni tuhun chihí, ni ñáyivi iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuvi sacusiin chi chi yo chihin Nyoo. ³⁹Ni cha iyó nu sucun, ni cha iyó nu cono xaan, ni nonga cha savahá Nyoo, ma cuvi sacusiin chi chi yo chihin Nyoo, ra cuñí xaan chi yo cha cuenda ra Cristo Jesús Sutu Mañi yo.

Nyoo nacachí ra chi ñu ñuu Israel

9 Cahín cha ndicha, tari tuhvá cahán noo ra chinó ñni chi ra Cristo. Ña sandaví ñahi, vatyí Tatyí Ii Nyoo ican saquehén ityi cha chiñi tuñi xiñi. Yucuan chaha chitó vahi vatyí cha ndicha cahín nu catyí tyi ²cuihya xaan cuñí ta tyicuan ri uhvi cuñí añime ³cha cuenda ñu ñui ñu Israel. Cuñí xain chi ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa. ⁴Ta maa ñu, tata ra Israel vachi ñu. Ta Nyoo naquehén cuenda ra

chi ñu tari cha sehe ra. Ta sañahá ra cuhva caá ra chi ñu, tyi cahnu xaan ra cuví ra, vatyí chinyaa ra chihin ñu. Ta natyihí tahan ra tuhun chihin ñu, ta chahá ra ley ra chi ra Moisés vatyí cuhva ra chi ñu. Ta sañahá ra cuhva cuñí ra cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi. ⁵Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chi ra tyicuan ri maa! ¡Ta na cuvi chi tyicuan caa!

⁶¿Atu catyí vatyí ña sacuví Nyoo tari cuhva catyí ra chi ñu Israel ta cha naha? Ñima. Soco cuñí chi coto yo tyi ña tandihí ñáyivi Israel cuví ñu ñu Israel cha ndicha. ⁷Ña tandihí ñu tata ra Abraham ta cuví ñu sehe ra cha ndicha. Vatyí tuhun cha cahán maa Nyoo chihin ra, cahán chi cha cuenda noo ri sehe ra. Vatyí catyí Nyoo chi ra tyehe caa: “Cha cuenda ra Isaac sehun cucoo ñáyivi chuun.” ⁸Ihya sañahá chi yo vatyí ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandihí ñáyivi chinó ñni tuhun catyí Nyoo tyi cusacuvi ra, ican ñu cuví ñu sehe ra cha ndicha. ⁹Vatyí cha catyí Nyoo tyi cuhva ra chi ra Abraham, ican cuví ihya: “Quivi cha tahán chí, cuquichi nu nyicú ndo ta cu Sara cucoo noo sehe ña”, catyí Nyoo chi ra.

¹⁰Ta ñima yucuan ri. Vatyí ni nduvi sehe cu Rebeca, ñni ri sutu ra, sutu chahnu yo, ra Isaac. ¹¹⁻¹²Soco cha ni cumañi ca cacu ndotyin, ta sacuvi ca ndotyin ni cha vaha, ni cha ña vaha, ta catyí Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuví Nyoo tyicuan caa vatyí cachí ra chi ñáyivi cha cuñí maa ra, ta ñima cha cuenda cha sacuvi ñu. ¹³Tari catyí ra nu

tutu ra tyehe caa: “Cuñí que chi ra Jacob, ta chi ra Esaú ña cuñí.”

¹⁴ ¿Tu tyicuan caa ñáa cha cucatyí yo? ¿Atu cuví catyí yo tyi ña vaha cha sacuví Nyoo? ¡Ma cuví! ¹⁵ Vatyí catyí ra chi ra Moisés tyehe caa: “Cu cundahví cuñí yóo ñáyivi cuñí mai cundahví cuñí.” ¹⁶ Ta tyicuan caa chitó yo vatyí ma cundahví cuñí Nyoo nyehe ra chi ñáyivi cha cuenda cuhva cuñí maa ñu, o cha cuenda cha sacuví ñu. Soco cuhva cuñí maa Nyoo cucuvi. Vatyí maa ra cuví ra cundahví iñi yóo chí cuñí maa ra. ¹⁷ Vatyí nu tutu ra, catyí ra chí rey Egipto tyehe caa: “Sacuví rey chuun tacuhva sañahí tunyee iñi cha iyó chii chi ndo, ta tandihí ñáyivi cucoto ñu yóo ra cuví yuhu”, catyí Nyoo. ¹⁸ Ta tyicuan caa Nyoo cundahví cuñí ra yóo ñáyivi cuñí maa ra. Ta suri sandundavá tucu ra añima ñu cuñí maa ra sandundava ra.

¹⁹ Ta cu catyun chii: “Tatu tyicuan caa, ¿ñáa tuhun cha tyaa Nyoo cuatyí siqui ñáyivi? Vatyí ¿yóo cha cuví nacahnu cuhva cuñí ra? ¡Yori!” ²⁰ Soco ña vaha cuhva chicá iñun cha tyicuan caa. Vatyí yori cuví catyí tyi ña vaha cha sacuví Nyoo. ¿Yóo ra cuví yoho vatyí nacahun nu cahán Nyoo? ¿Atu cuví catyí quisi ñuhú cuan chí ñu cha savaha chí chí vatyí ña tahán iñi chí cuhva cha savaha ñu chí chí? Ma cuví. ²¹ Vatyí ñu cha savahá ndaha tyiño iyó ityi chí ñu savahá maa ñu ñáa cha cuñí ñu chihin nyahyu cuan. Chihin nyahyu cuan cuví savaha ñu noo quisi finu xaan. Ta cuví savaha tucu ñu noo cha ndahví ri.

²² Tyicuan caa tucu Nyoo, iyó ityi chí ra cha tachi tuñi ra chí ñáyivi quiñi iyó cha cuenda cha sacuví ñu cha ña vaha. Ta cuví sañaha ra chí ñu tyi iyó xaan tunyee iñi chí ra. Soco sanyee xaan ra iñi ra chihin ñáyivi cuan. Ta chí maa ñu tahán chí tachi tuñi ra. Ta tahán chí sanaa ra chí ñu. ²³ Ta iyó tucu ityi chí ra cha sahá ra tucahnu iñi chí ñu savaha maa ra

vatyí sañahá ra tyi cahnu ra cuví ra. Maa ñu cuví ñu ñu cachí ra vatyí cuñihi ñu tandihí cha vaha, ta cucoo ñu gloria chihin ra. ²⁴ Ta suri maa yo cuví ñu cuan. Vatyí Nyoo cana ra chí yo. Yihí yo cuví yo ñu Israel, ta yihí yo cha ñima ñu Israel cuví yo. ²⁵ Tari catyí Nyoo nu tutu cha tyaa ra Oseas tyehe caa:

Ñu cha ñima ñu ñui cucatyí yuhu tyi ñáyivi chii cuví chí ñu.

Ñu cha ña cuñí, cunacuñi chí ñu, catyí Nyoo.

²⁶ Ta suri nu catyí Nyoo chí ñu tyehe caa: “Nyoho ñima ñáyivi chii cuví ndo.” Ta suri yucuan cunacatyí tucu ra chí ñu: “Sehe yuhu, ra cuví Nyoo nyito, cuacuvi ndo.” ²⁷ Soco cha cuenda ñu Israel catyí ra Isaías tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu. ²⁸ Vatyí Sutu Mañi yo numi ri cusacuvi ra tandihí cha catyí ra tyi cusacuvi ra siqui ñuhu ñáyivi chihin cha cachí.” ²⁹ Tari catyí tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihí cha iyó andivi, ta ma sacacu ra chí suhva yo, cunaa tandihí yo, Tari naa ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

³⁰ ¿Tatu tyicuan caa, ñáa cha catyí yo? Ñáyivi cha ñima ñu Israel cuví, ña nanducú ñu cuhva cuvaha ñu nuu Nyoo, ta ican ñu cuví ñu cuvahá nuu ra cha cuenda cha chinó iñi ñu chí ra. ³¹ Ta ñu Israel nycón xaan ñu ley, tyi cuñí maa ñu tyi cuvaha ñu nuu Nyoo chihin cuan, soco ña cuví. ³² ¿Ñáa tuhun? Vatyí cuñí ñu cuvaha ñu nuu Nyoo chihin cha sacuví ñu ley cuan, ta ña cuñí ñu cuvaha ñu nuu ra chihin cha chinó iñi ñu chí ra. Yucuan chaha vatyí tari cha catyihí chaha ñu chihin noo yuu cuví chí cuan.

³³Yuu cuan cahán Nyoo tuhun nu tutu ra tyehe caa:

Ñuu Sión, yucuan tyaj chi noo rayii cha cuví tari noo yuu.

Noo yuu cha sanduvá chi ñáyivi cuví ra.

Soco ñu chinó iñi chi ra ma cucahan nuu ñu, catyí Nyoo nu tutu ra.

10 Yañi, cuñí xain chihin cha tandihi añime cha cacu ñu Israel. Ta cha chican tahvi xain cha cuenda ñu. ²Cha ndicha cuví vatyí cuñí xaan ñu sacahnú ñu chi Nyoo, soco ña ñihí ñu cuhva yoso caa tahán chi sacuví ñu. ³Vatyí ña chitó ñu yoso caa sacuvahá Nyoo chi ñáyivi nuu ra. Ta nducú ñu cuhva sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu. ⁴Vatyí ra Cristo cha quichí ra ta sacuví ra tandihi cha catyí ley, ta sacuví ra vatyí tandihi ñu chinó iñi chi ra, cuvaha ñu nuu Nyoo.

⁵Catyí ra Moisés vatyí cuví cuvaha ñáyivi, soco tatu quichahá ñu cha catyí ley, vatyí catyí ra tyehe caa: “Ñu cha quichahá tandihi cha catyí ley, coo ñu noo ñáyivi cha ma naa ca maa.” ⁶Soco cha cuvaha yo nuu Nyoo cha cuenda cha chinó iñi yo chi ra Cristo, catyí nuu tutu Nyoo tyehe caa: “Ma caca xiñun vatyí cuñí chi cha cundaa noo ra andivi ta cusanoo ra chi ra Cristo tacuhva sacacu ra chi yo.” Ma caca xiñun tyicuan caa vatyí cha yaha quichi ra Cristo. ⁷Ni ma caca xiñun vatyí cuñí chi cha cunoo noo ra chichi ñuhú vatyí sanandoto ra chi ra Cristo, vatyí cha yaha nandoto ra. ⁸Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta añima ndo nyaá chi.” Ta suri tuhun cuan sacoto ndi chi ndo, tuhun cha quichí ra Cristo ta nandoto ra. Ican cuví tuhun cha tahán chi chinó iñi yo. ⁹Tatu chihin yuhun catyún vatyí ra Jesús cuví Sutu Mañi yo, ta chihin añimon chinó iñun tyi Nyoo sanandoto ra chi ra cha

yaha chihí ra, cucacu añimon. ¹⁰Vatyí chihin añima yo cuñí chi chino iñi yo chi ra Cristo tacuhva cuví cuvaha yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu añima yo. ¹¹Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.” ¹²Vatyí Nyoo iin ri cuvaha nyehé ra chi ñu Israel ta chi ñu inga ñuu. Vatyí suri maa ra cuví ra ra nyacá ñaha chi tandihi yo. Ta nasocó xaan ra chi tandihi yo cha chicán tahvi yo chi ra. ¹³Vatyí tyehe caa catyí tuhun Nyoo: “Tandihí ñu cha chicán tahvi chi ra Jesús cucacu añima ñu.” ¹⁴Soco ¿yoso caa cucacan tahvi ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cahan tuhun ra chihin ñu? ¹⁵Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaquí nu chaa ñu cahán tuhun vaha nuu ñáyivi.” ¹⁶Soco ña tandihí ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaías: “Sutu Mañi yuhu, yori cuñí chino iñi tuhun cahán ndi”, catyí ra. ¹⁷Yucuan chaha cha chiñí xihna yo tuhun ra Cristo, tyicuan ta chino iñi yo chi ra.

¹⁸Soco ndacá tuhin ihya: ¿Atu ña chiñi ñu Israel tuhun Nyoo? ¡Chiñi ñu! Vatyí nu tutu Nyoo catyí chi tyehe caa: Sutu Mañi yuhu, cha sacoto ñáyivi tuhun maun nicahnu siquí ñuhu ñáyivi, catyí chi nu tutu Nyoo.

¹⁹Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaa ra tuhun cahán Nyoo chihin ñu Israel tyehe caa:

Nyoho, cucuquiñi cuñi ndo vatyí cucuhve cha vaha chi noo ityi ñáyivi

cha ñima ri tuhun, ñáyivi cha ña cutuñí iñi.

Ta cunaquiqui tisihi ndo nyehé ndo chi ñu, catyí Nyoo.

²⁰Ta ra Isaías caña iñi ra catyí ra tyi ñu cha ña nanducu chi Nyoo, nañihí ñu chi ra. Ta sañahá ra chi ra chi ñu cha ña ndaca tuhun tuhun ra. ²¹Ta tyaá tucu ra Isaías tuhun cahán Nyoo chihin ñu Israel tyehe caa: “Ndiyaca cane chi ñáyivi chíi, nacuhva cuenda ñu chi ñu chíi, soco ña quichahá ñu. Ndava xaan iñi ñu”, catyí Nyoo.

Yihí ñu Israel cha ñihí ñu cuhva cacu aña ñu

11 ¿Atu ña cuñí ca Nyoo chi ñu Israel? Ñima cha ña cuñí ca ra chi ñu, vatyi suri ra Israel cuví tucu yuhu. Vatyi tata ra Abraham ta tata ra Benjamín cuví. ²Nyata cha naha cachí Nyoo chi ñu Israel tacuhva cuví ñu ñáyivi chi ra. Ta vityin ñima cha sacuachiyó ndíhi ra chi ñu, vatyi chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa: ³“Sutu Mañi yuhu, chahñi ñu chi ra cuví profeta maun, ta satani ñu arta vehe ñuhu maun. Noo tuhun ri ca mai ndoo, ta cuñí ñu cahñi ndíhi ñu chíi”, catyí ra. ⁴Soco nacahan Nyoo ta catyí ra chi ra Elías: “Ñima maa ri maun ndoo. Ucha ca mil ñáyivi naquehen vahi cha ña chicuñi chiti ñu nuu xitohyo nyoo Baal”, catyí Nyoo chi ra. ⁵Ta suri tyicuan caa vityin, ndoo suhva ñu sacahnú chi Nyoo. Ican ñu nacachí Nyoo chíi tyi cusaha ra tucahnu iñi chi ñu. ⁶Vatyi cha cuenda cha vaha ñáyivi cuví Nyoo ta sahá ra ticahnu iñi chi yo. Tyehe ta chihin cha vaha ñáyivi cuví maa yo ta sahá Nyoo tucahnu iñi chi yo, cuñí chi catyí tyi ñima ca chihin cha vaha maa ra ta sacacú ra chi yo.

⁷Ta ¿yoso caa? Ñu Israel nanducu xaan ñu cuhva cuvaha ñu nuu Nyoo

soco ña ñihí ñu cuhva. Soco ñu cha nacachí maa Nyoo chíi, ñihí ñu cuan cuhva. Ta inga ñu Israel cuan ndundava xaan aña ñu. ⁸Tari catyí nu tutu Nyoo tyehe caa: “Nyoo chahá ra noo cuhva chi ñu cha ma cutuñi iñi ñu. Ta chahá ra chiti nuu cha ña cutuñi iñi ñu cha nyehe ñu. Ta chahá ra soho ñu soco ña cutuñi iñi ñu cha chiñi ñu, ta nyacua nya vityin ta tyicuan caa ñu.” ⁹Ta suri catyí tucu ra David tyehe caa:

Sii xaan cuñí ñu chihin vico cha iyó ñu, soco yucuan cuví trampa cha sanacava chi ñu. Ta cha cuenda cuan ta cutachi tuñi Nyoo chi ñu.

¹⁰Ta tari cha cunducuaa ñu vatyi ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹Ta vityin ndaca tuhun ihya: ¿Atu cha cuenda cha ña quichahá ñu Israel cuan nu cahán Nyoo, ta ndoo ri maa ñu cha ma cacu ca aña ñu? Ñima. Vatyi cha cuenda cha ña quichahá ñu chi ra cha saquichí Nyoo, yucuan chaha sacacu Nyoo chi inga ñu cha ñima ñu Israel cuví. Ta tyicuan caa ta cuquiñi cuñí ñu Israel vatyi nachino iñi inga ñáyivi. Ta cha tyicuan caa ta cuquichí cuví tucu iñi ñu cha cacu aña ñu. ¹²Tatu cha cuenda cha ña quichahá ñáyivi Israel cuhva cha chahá Nyoo chíi ñu, cuví chi cha vaha cha cuenda tandíhi ca ñáyivi, vatyi chahá chi cuhva, ta cuaha xaan ñu nachino iñi ñu chíi ra Cristo, nyaca cuví quivi cundíhvi tucu ñu Israel cuenda Nyoo inga chaha. Yucuan quivi, vaha xaan ta tyaquí xaan cucuvi.

¹³Ta iyó suhva cha cuñí catyí chi nyoho cha ñima ñu Israel cuví ndo, vatyi ra Jesús tyatyño ra chíi cha cuhin nu iyó ñáyivi cha ñima ñu Israel cuví. Ta chité

vatyi ñiñi xaan cuví tyiño cha chaha maa Nyoo chii. ¹⁴ Ta cuñí tiqui vatyí cunyehe ñáyivi Israel ñu ñui cuhva chinó iñi ndo chi Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu añima ñu. ¹⁵ Vatyí cha cuenda cha ña natiñ cuenda Nyoo chi ñu Israel cuví cuvaha inga ñáyivi nuu ra. Vaha xaan cha tyicuan caa ta nyaca cuví quívi cunatiñ cuenda tucu ra inga chaha chi ñu Israel, cucuvi tari cha cunandoto ñu nu chihí ñu. ¹⁶ Tatu vaha noo pan cha savaha yo cha xihna ri chihin yuchan pan cuan, vaha tandíhi ca yuchan cuan. Ta tatu vaha yoho noo yutun, tandíhi ca soco tun, ta vaha. Ta tyicuan caa tucu ñu Israel, cuñí Nyoo chi ñu cha cuenda cha vaha ra cha vachi ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnya Nyoo chi suhva ñu vatyí ña chinqo iñi ñu chi ra. Ta chaha tu olivo cuan natyaa tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chi ndo chaha tu olivo cha xihna ri cuan. Ta tyicuan caa ndu iñi ri ndo chihin tu olivo Nyoo ta naquehén ndo tandíhi cha vaha cha iyó chi ra. ¹⁸ Soco ma saha ndo tyi vaha ca ndo ican saha inga ñu cha cuví soco tu olivo cha chahnya Nyoo. Vatyí tatu cuñí maa ndo tyi vaha ca ndo, cuñí chi nichon iñi ndo vatyí ñima maa ndo nyisó ndo chi yoho yutun cuan, soco maa yoho yutun cuan nyisó chi ndo.

¹⁹ O catyí ndo: “Ican, soco chahnya Nyoo soco yutun cuan tacuhva nicun-
yaa maa ndi chaha tun.” ²⁰ Vaha. Soco chahnya Nyoo soco cuan cha cuenda tyi ña chinqo iñi ñu chi ra. Ta nyoho nicun-
yaa ndo yucuan, soco cha cuenda cha chinó ri iñi ndo chi ra. Yucuan chaha ma sacahnu ndo chi ndo, soco saha ndo cuenda chi ndo. ²¹ Vatyí tatu ña saha Nyoo ticahnu iñi chi ñu cha cuví soco vaha cuan, ni chi nyoho ta ma saha ra

ticahnu iñi tatu ña chinó vaha iñi ndo chi ra. ²² Nyehé yoso cha vaha Nyoo, soco tyicuan tucu xaan ra chihin ñu cha ña natiñ cuenda tumañi iñi chahá ra. Soco chihin nyoho, vaha xaan ñáyivi cuví ra. Soco cuñí chi cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnya tucu ra chi nyoho. ²³ Soco tatu nachino tucu iñi ñu Israel inga chaha, cu nicun-
yaa tucu ñu nu coyó ñu. Vatyí Nyoo iyó tunyee iñi chi ra cha natyatahan tucu ra chi ñu cuan inga chaha. ²⁴ Vatyí tatu nyoho cha ñima ñu Israel cuví ndo, ta quehen Nyoo chi ndo cha cuví ndo tari soco noo yutun olivo cuhu, ta natyaa tahan ra chi ndo chihin tu olivo vaha cha cumí ra, jta nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chi ñu inga chaha chaha tu olivo nu coyó ñu!

Nu ndíhi ta cucacu tucu ñu Israel

²⁵ Vatyí yañi, cuñí cha coto ndo noo tuhun xehe cha sacuví Nyoo, tacuhva vatyí ma caca xiñi ndo vatyí chitó xaan ndo. Vatyí ñu Israel ndundava añima ñu suhva quívi, nyacua nya cha cuví nachino iñi inga ñáyivi chi Nyoo. ²⁶ Ta cha yaha quíhvi inga ñu cuenda Nyoo, tyicuan ta tandíhi ñu Israel cucacu añima ñu, vatyí nu tutu Nyoo catyí chi tyehe caa:

Ra cha cusacacu chi ñáyivi, ityi Sión cuquichi ra.

Ta cusacanyaha ra cuatyí cha iyó chi ñáyivi chi ra Jacob.

²⁷ Ta ihya cuví tuhun cha cunatyíhi tahin chihin ñu, quívi na sacuachiye cuatyí ñu, catyí Nyoo nu tutu ra.

²⁸ Cuxaán xaan ñu Israel chihin Nyoo cha cuenda tuhun vaha ra Cristo cha cacu añima yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyí cachinqo iñi ra chi ra quívi cachiyo ra, ta yucuan

chaha cachí ra chi ra. ²⁹Vatyi noo cha cha yahá chaha Nyoo ña natinyaá ra. Ni ña ndu uvi iñi ra cha yaha nacana ra chi yo. ³⁰Nyoho, ta ityi chata ca, nacahnū ndo nu cahán Nyoo. Soco vityin, Nyoo cundahvi cuñí ra nyehé ra chi ndo cha cuenda vatyi ñu Israel nacahnú ñu nu cahán ra. ³¹Nacahnú ñu nu cahán Nyoo vityin tari nacahnū maa ndo quivi cuan. Ta tari cundahví cuñí Nyoo nyehé ra chi ndo vityin, tyicuan caa tucu cundahvi cuñí ra nyehe ra chi ñu Israel ñandíhi. ³²Vatyi Nyoo chahá ra ityi chi tandíhi ñáyivi cha nacahnú ñu nu cahán ra, tacuhva vatyi cundahvi cuñí ra nyehé ra inuu ri chi tandíhi yo.

³³¡Ñana cha cahnu cuví cha tyayii Nyoo! ¡Ñana cha vaha cha chitó xaan ra, ta cha chíni tuñi ra! Ma cuvi nacatyi yo kuhva chicá iñi ra, ni ma chaa yo cutuñi iñi yo kuhva sacuví ra. ³⁴Vatyi ¿yóo cha cutuñi iñi kuhva chicá xiñi Sutu Mañi yo? ¿O yóo cha sañahá chi ra? Yori. ³⁵Vatyi yori cha cuví kuhva xihna ca noo cha vaha chi Nyoo ta cha cuenda cuan ta quihi iñi ñu vatyi na kuhva tucu Nyoo chi ñu. ³⁶Vatyi tandíhi maa cha iyó, maa Nyoo savaha, ta chino chi ta iyó chi cha cuenda ra. ¡Cahnu xaan ca cuví Nyoo tyicuan ri maa! Ta na cuvi chi tyicuan caa.

Na coo yo noo ñáyivi cha sacuvi yo kuhva cuñí Nyoo

12 Yucuan chaha yañi, chacú ndahvi nuu ndo cha cuenda cha ndahvi cuñí Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyi yucuan cuví kuhva tñin cuenda ra cha sacahnú yo chi ra. ²Ta ma coo ca yo kuhva iyó ñáyivi iyó siqui ñuhu ñáyivi ihya. Soco na nasama yo kuhva iyó yo chihin cha nduchaa kuhva chicá xiñi yo. Ta tyicuan caa ta coto yo yoso kuhva cuñí Nyoo chihin yo vatyi coto yo nya cha vaha, ta nya cha tahán iñi ra. Ta

coto yo ñáá ndíhi cha tahán chi sacuvi yo.

³Nyoo, cha catyi cha vaha ñáyivi cuví ra, ta tyatyiño ra chii vatyi cuví apóstol chi ra, yucuan chaha catyí chi tandíhi nyoho vatyi ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso kuhva iyó ndo chihin yoso kuhva cha vaha chahá Nyoo chi ndo iin ri chihin cha chinó iñi ndo chi ra. ⁴Vatyi cha noo coño ñuhu, cuaha xaan kuhva iyó chi, ta ña iin ri maa tyiño saha chi. Chiti nuu yo, noo tyiño sahá chi, ta soho yo inga tyiño sahá chi. ⁵Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha iin ri cuví yo chihin ra, ta iin ri cuví yo chihin tahan yo. Tari cha noo ri coño ñuhu cuví tandíhi ri yo.

⁶Siin siin tyiño chahá Nyoo chi yo, yoso kuhva cha cuñí maa ra kuhva ra chi noo noo yo. Ta cuñí chi cotyiño vaha yo cha vaha cuan. Tatu chahá Nyoo cha vaha cha sahá yo profetizar, na chino iñi yo tyi ican cuan chahá ra chi yo, ta na naquehen yo tuhun sacoto ra chi yo ta nacatyi yo chi ñáyivi. ⁷Tatu chahá ra cha vaha cha sacuví yo tyiño nuu inga ñu, cuñí chi sacuví vaha yo. Tatu chahá ra cha cuví sañaha yo chi inga ñu, cuñí chi cunyaa yo tyiño cuan. ⁸Tatu chahá ra cha cuví kuhva yo tuhun chi ñáyivi na ndu nii iñi ñu, cuñí chi cunyaa yo tyiño cuan. Ta ñu cha chahá Nyoo xuhun chi, cuñí chi kuhva ñu chihin cha nii iñi ñu. Tatu chahá Nyoo cha saquehen ityun chi ñu yihí cuenda ra, chihin cha nii iñun sacuvun. Tatu chahá Nyoo cha tyinyeé yo chi ñu chiñuhú cha chiñuhú chii, cuñí chi sacuví yo chihin cha sii cuñí yo.

Nu catyí ra Pablo yoso caa sacuvi yo cha yihí yo cuenda ra Cristo

⁹Cuñi ndo chihin cha ndicha chi tahan ndo. Ta cütasi cuñi ndo chi cha ña vaha. Ta cunyicon ndo cha vaha. ¹⁰Cuñí chi

cha cuñí ndo chi tahan ndo cuenda Nyoo tari cha tahan ndo cha iin ri sihi iin ri sutu ndo. Ta quichaha ndo chi ñu ta saha ndo ñáyivi chi ñu.

¹¹ Sañihi ndo iñi ndo. Ma cusuchan ndo. Ta sacuvi ndo tyiño nuu Sutú Mañi yo chihin cha ñi añima ndo.

¹² Siñ cuñi ndo coo ndo ñáyivi, vatyi chitó ndo vatyi cucoo ndo chihin Nyoo nu cuahan ca chi. Sanyee ndo iñi ndo tatu nyehé ndo tindoho. Ta ma sandihi maa ndo cha cacán tahvi ndo chi Nyoo nyita ri.

¹³ Tyinyee ndo chi ñu yihí cuenda Nyoo chihin ñáá cha chiñuhú chi ñu. Vaha tyiñuhu ndo chi ñu chaa vehe ndo.

¹⁴ Vaha cahan ndo siqui ñu cha cahán chi ndo. Ta ma soco ndo chi ñu. Cacan tahvi ndo cha cuenda ñu nuu Nyoo tacuhva na nasoco ra chi ñu.

¹⁵ Cusiñ cuñi ndo chihin ñu siñ cuñí, ta cuacu ndo chihin ñu chacú chaa cha cuihya cuñí ñu.

¹⁶ Iin ri cuvi ndo chihin tahan ndo. Ta ma cahnu saha ndo chi ndo. Inuu ri saha ndo chi ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuví cha ña vaha chihin ndo. Soco sañiñi ndo sacuvi ndo cha vaha nuu tandihi ñáyivi. ¹⁸ Sañiñi ndo cha coo taxi ri ndo chihin tandihi ñáyivi. ¹⁹ Yañi luhlí, tatu yóo cha satasí iñi chi ndo, ma tachi tuñi ri maa ndo chi ñu, soco saña ndo ta natyaa ndo ndaha Nyoo na tachi tuñi maa ra chi ñu. Vatyi nu tutu Nyoo catyí chi tyehe caa: “Yuhu tahán chi tachi tuñi, yuhu cutyiahvi chi ñu”, catyí Sutú Mañi yo. ²⁰ Ta suri catyí tucu ra: “Tatu ra xaan iñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyi cha sacuvún tyehe caa, sacuvún cha nyacua nducua soho ra chihin ticahan nuu.” ²¹ Ma cuhvon cha cunyaca ñaha cha ña vaha chuun, soco sañiñun ta cuvi chasahun

chi cha ña vaha chihin cha sacuvún cha vaha.

13 Tandihi ñáyivi cuñí chi cha quichaha ñu chi ra cacuví tyiño cuenda gobiernu. Vatyi yori ra cuví tyiño cha ñima Nyoo tyaa tyiño chi ra. Ta ra cuví tyiño cha iyó, maa Nyoo tyiso chi ra. ² Yucuan chaha, ñu cha ña quichahá chi ra cacuví tyiño, cuñí chi catyi vatyi ña quichahá ñu cuhva catyi Nyoo. Ta ñu cha sacuví tyicuan caa, chicoo cutyi ñu cha cuenda cuan, ta cucutuñi chi ñu. ³ Vatyi ra cacuví gobiernu, ña nyaá ra cha cuenda cha sayuhví ra chi ñu cha sacuví cha vaha, soco nyaá ra vatyi tachi tuñi ra chi ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuvún. ⁴ Vatyi nyaá ra tyiño vatyi sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chi cuyuhvun chi ra. Vatyi ña nyaá ri maa ra, soco nyaá ra vatyi tachi tuñi ra chi ñáyivi cha sacuví cha ña vaha, vatyi tyiño cuan tyaa Nyoo chi ra. ⁵ Yucuan chaha ñiñi cuñí chi cha quichaha ndo chi ra cacuví tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyi chitó ndo tyi tyicuan caa tahán chi sacuvi ndo. ⁶ Ta siñ ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyi yucuan cuví tyiño tahán chi cunyaa ra, ta cha tyicuan caa tyiño nuu Nyoo sacuví ra.

⁷ Cuhva ndo cha tahán chi chi minoo minoo ñáyivi. Tyiyahvi ndo cha cuenda ñáá cha tahán chi tyiyahvi ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi. ⁸ Ma coso yica ndo chi ni noo ñáyivi. Soco cuñi ndo chi tahan ndo, vatyi tatu cuñí ndo chi tahan ndo sacuví ndo tandihi cha

catyí ley Nyoo cha tyaa ra Moisés vatyi sacuvi yo. ⁹Catyí ley Nyoo tyehe caa: “Ma coo inga ñusihí o rayii chuun tatu ñima ñasihun o yiun cuví. Ma cahñun chí ñáyivi. Ma suhun. Ma cahun cuendu siqui ni noo ñáyivi. Ma quichi cuvi iñun cha chíi ñáyivi.” Tatu ndicha cha cuñún chí tahun, tari cha cuñún chí maun, sacuví tucun tandihí ihya ta tandihí ca inga ca ley. ¹⁰Tatu cuñún chí tahun, ñahri cha ña vaha cua sacuvun chí ñu. Chihin cha cuñí yo chí tahan yo, sacuví yo tandihí cha catyí ley Nyoo cha tyaa ra Moisés.

¹¹Chihin tuhun ihya saha yo cuenda quivi iyó yo. Vatyi cha chaq chí cuhva cha ndoyo yo ta ma cundihñi yo. Vatyi quivi nachino iñi yo chí ra Cristo, naha xaan ca nyaá quichi quivi cucacu ndihí añima yo, soco vityin cha cuy- atyin. ¹²Cha cua yaha cha cha cuaa. Ta cha cua cundichin. Yucuan chaha cuñí chí sandihí yo cha sacuvi yo cha sacuví ñu iyó nu ñaa iñi. Ta tahán chí sacuvi yo cuhva sacuví ñáyivi iyó nu ndichin. ¹³Cachi cuñí chí coo yo. Vatyi nu ndichin Nyoo iyó yo. Ta ma coho yo ndixi, ta ma coo yo vico nu chíi xaan ñu ndixi. Ta ni ma coo yo chihin savaha ri ñusihí o rayii. Ni ma coo viciu chí yo. Ta ma cutasi cuñí yo nyehe yo chí tahan yo. Ta ma nyiyo iñi yo nyehe yo chí ñu. ¹⁴Soco coo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihvi noo yo. Ta ma quihí iñi ndo cha sacuvi ndo cuhva cuñí coño ñuhu ndo.

Ma cahan nyaun chí tahun

14 Tatu noo ñáyivi yihí cuenda Nyoo ta chiin ri chinó iñi ñu chí ra, ña vaha cha ma tiin cuenda ndo chí ñu. Vaha natiiin cuenda ndo chí ñu soco ma cuvi yuhu ndo chihin ñu siqui tuhun cha chicá uvi iñi ñu. ²Vatyi yihí ñáyivi cuñí maa ñu vatyi cuví cachi ñu tandihí.

Ta yihí tucu ñu cha ña chinó vaha iñi ñu, ta maa maa ri yucu chachí ñu. ³Soco ñu chachí tandihí cuan, tahán chí cha tiin cuenda ñu chí ñu cha chachí yucu ri. Ta ñu chachí yucu ri, ma cahan nya ñu chí inga ñu cuan. Vatyi Nyoo tiin cuenda ra chí ñu cuan. ⁴Vatyi zyóo ñu cuví yoho vatyi cahan nyaun chí ñu cha sacuví tyiño nuu inga ra? Vatyi tatu vaha o ña vaha sacuví ñu soco nyehe maa ra cuví nuu chí ñu chihin ñu. Ta vaha cuquita ñu vatyi Sutu Mañi yo iyó tunyee iñi chí ra ta cutyinyee ra chí ñu tacuhva quita vaha ñu.

⁵Inga tucu cuhva: Yihí ñu cha sacahnú ca ñu chí noo quivi ta ñima ca inga quivi. Ta yihí tucu ñu cha cuñí maa ñu vatyi inuu ri tandihí quivi. Tahan tahan yo cuñí chí coto vaha yo yoso cuhva chicá xiñi yo. ⁶Ñu cha naquehén vaha noo quivi, naquehén vaha ñu cha cuenda cha sacahnú ñu chí Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chí Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chí Sutu Mañi yo, ta nacuhva ñu tyahvi nyoo chí Nyoo tyi chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chí Sutu Mañi yo ta suri nacuhva tucu ñu cuan tyahvi nyoo chí ra.

⁷Vatyi ni noo yo ña iyó yo chihin fuerza maa yo. Ni ñima maa yo catyí ama cúvi yo. ⁸Vatyi tatu iyó yo, iyó yo tacuhva sacuvi yo tyiño nuu Nyoo, ta tatu chíi yo, chíi yo tyi Sutu Mañi yo naquehen cuenda ra añima yo. Yucuan chaha tatu iyó yo, o chíi yo soco chí Sutu Mañi yo cuví chí yo. ⁹Vatyi ra Cristo chíi ra ta nandoto tucu ra vatyi tacuhva cunyaca ñaha ra chí ñu nyitó ta chí ñu chíi.

¹⁰Soco yoho, ¿ñáá tuhun cha nyehé nyaun chí yañun? ¿O ñáá tuhun cha ña natiiin cuendon chí ra? Vatyi tandihí yo

cutahan chi cucuhva cuenda yo chi yo nuu Nyoo vatyí cutuñi chi yo nuu ra.

¹¹ Vatyí nu tutu Nyoo catyí chi tyehe caa: Cha ndicha ndicha cuii vatyí yuhu nyité, catyí Sutu Mañi yo.

Ta tandihi cuii ñáyivi cunacuiñi chiti ñu nuí.

Ta tandihi ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihi ñáyivi, catyí Nyoo.

¹² Yucuan chaha noo noo maa yo ta cunacuhva yo cuenda cha sacuví yo chi Nyoo.

Ma sanacavon nu cuatyí chi yañun

¹³ Yucuan chaha, ña tahán ca chi cahhan nyaa yo chi tahan yo. Soco nducu yo cuhva cha ma sanacava yo chi ñu nu cuatyí coto sandihi ñu tuhun cha chino iñi ñu. ¹⁴ Yuhu chité vatyí ñahri cha ma cuví cachi, vatyí chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha. ¹⁵ Soco tatu cha cuenda cha chachún ta quiñi cuñi yañun, ña ndicha cha cuñún chi ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyí ra Cristo chihí ra cha cuenda ñu. ¹⁶ Ma cuhva ndo cha cahan ña vaha ñu siqui noo cha chahá Nyoo ityi chuun tyi cachun. ¹⁷ Vatyí cha nyacá ñaha Nyoo chi yo cuví chi noo cha cachi coo yo nuu ra. Cusifí cuñi yo ta taxi ri cuñi añima yo cha cuenda Tatyí li Nyoo cha nyaá añima yo. Ta ña niñi tuhun cha chachi yo o cha chihi yo. ¹⁸ Ñu sacuví tyiño nuu ra Cristo tyehe caa, sii cuñi Nyoo nyehé ra chi ñu, ta catyí tucu ñáyivi tyi vaha ñáyivi cuví ñu.

¹⁹ Yucuan chaha cuñi chi cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo. ²⁰ Ma sativun tyiño sahá

Nyoo añima inga ñáyivi cha cuenda noo cha chachí run. Ndicha vatyí tandihi cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu. ²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuvi yo nu chinó iñi ñu chi Nyoo. ²² Tatu chinó iñun vatyí cuví cachun tandihi, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sii xaan cuñi yo tatu ña chicá uvi iñi yo noo cha chaha Nyoo ityi chi yo cha sacuví yo. ²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihi cha sacuví yo chihin cha ña chiño iñi yo tyi chaha Nyoo ityi chi yo tyi sacuvi yo, cuatyí cuví.

Na sacuvi yo cha tahán iñi tahan yo, ta ñima cha tahán iñi ri maa yo

15 Yoó cha ñihi nyaá yo chihin ñu cha ña ñihi nyaá chihin Nyoo. Ta ma nducu yo cha tahán iñi ri maa yo. ² Tahan tahan yo cuñi chi cha sacuvi yo cuhva tahán iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo. ³ Vatyí ni ri ra Cristo ña sacuví ra cuhva tahán iñi maa ra, soco cuví chi ra tari catyí nu tutu Nyoo tyehe caa: “Tandihi cha cahán ñáyivi chi Nyoo, chi ra Cristo cahán ñu”, catyí chi. ⁴ Vatyí tandihi cha chicunyaá nu tutu Nyoo ta ityi chata ca, chicunyaá chi cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñi añima yo cha cuenda cha sacuahá yo nu tutu Nyoo. ⁵ Ta Nyoo ican ra chahá cha cama iñi yo, ta chahá ra cha vaha cuñi añima yo. Na tyinyee ca ra chi yo cha coo yo chihin cha iñi ri cuví yo

chihin tahan yo tari cuhva iyó ra Cristo Jesús. ⁶Vatyí tacuhva tandíhi yo iin ri noo cuhva sacahnu yo chi Nyoo Sutu ra Jesucristo ra nyacá ñaha chi yo.

**Ñáyivi ñima ñu Israel cuví,
cucuñi ñu tuhun Nyoo**

⁷Yucuan chaha t̄in cuenda vaha yo chi tahan yo tacuhva vatyí sacahnu yo chi Nyoo tari t̄in cuenda vaha ra Cristo chi maa yo cha cuenda vatyí sacahnú ra chi Nyoo. ⁸Vatyí catyí yuhu chi ndo vatyí ra Cristo quichí tyinyee ra chi yo cha cuví yo ñu Israel, tacuhva sacuvi ra cha catyí Nyoo chi sutu chahnu yo tyí cusacuví ra. Ta tyicuan caa ta sañahá ra Cristo vatyí Nyoo sacuví ra cha catyí ra tyí sacuvi ra. ⁹Ta quichí tucu ra Cristo tacuhva vatyí ñu cha ñima ñu Israel cuví sacahnu tucu ñu cuan chi Nyoo, vatyí Nyoo ndahvi cuñí ra nyehe ra chi ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandíhi ityi ñu iyó siqui ñuhu ñayivi. Ta cucate yaa cha cuenda cha sacahní chuun nuu ñu, catyí chi.

¹⁰Ta inga tucu nu catyí chi nu tutu Nyoo tyehe caa:

Cusií cuñi nyoho ñu cha ñima ñu Israel cuví.

Cusií cuñi ndo chihin ñu Israel cha cuví ñu ñáyivi cuenda Nyoo.

¹¹Ta inga tucu nu catyí chi nu tutu Nyoo tyehe caa:

Sacahnu ndo chi Sutu Mañi yo, nyoho ñu cha ñima ñu Israel cuví.

Tandíhi ñáyivi sacahnú ñu chi ra cha cuenda cha cahnu xaan cuví maa ra.

¹²Tyaá tucu ra Isaías nu tutu Nyoo tyehe caa:

Cucacu minoo ra vachi tata ra Isaí.

Cuquichí ra vatyí cunyaca ñaha ra chi ñu cha ñima ñu Israel cuví.

Ta maa ñu cuquihí iñi ñu chi ra vatyí cusacacu ra chi ñu.

¹³Nyoo ican ra chahá tunyee iñi chi yo ta chitó yo tyí cuhva ra cha cuhva ra chi yo. ¡Na sacutu ra chi ndo chihin tusii iñi! Ta coo cha taxi ri cuñí añima ndo cha cuenda cha chinó iñi ndo chi ra, tacuhva vatyí chihin tunyee iñi Tatyí li ra ta quihí vaha iñi ndo cha cucuhva ra chi ndo.

¹⁴Yañi luhli, chitó vahi vatyí nyoho vaha xaan ñáyivi cuví ndo ta chitó ndo tandíhi, ta chitó vaha ndo cuhva ndo tuhun chi tahan ndo. ¹⁵Soco nu carta ihya ñihi xaan cahín siqui tandíhi tuhun cha tyai, tacuhva cha ma naa iñi ndo. Tyehe caa sacuvi cha cuenda tyí Nyoo chahá ra tumañi iñi chii ¹⁶cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacu ra añima ñáyivi. Tyehe caa sacuví tacuhva vatyí ñu cha ñima ñu Israel cuví, cuví nacuhva cuende chi ñu chi Nyoo tari noo ofrenda cha tahan iñi ra, vatyí cha ndundí ñu nuu ra cha cuenda Tatyí li ra.

¹⁷Cha cuenda cha nacuhva cuende chii chi ra Cristo Jesús, yucuan cuenda cuví cusii cuñi ta chité tyí vaha quitá tyiño sacuví nuu Nyoo. ¹⁸Vatyí ña cañá iñi cahin cha ña nyehí. Soco nacatyí cha sacuvi ra Cristo nu chicá noi cahín tuhun Nyoo tacuhva vatyí ñu cha ñima ñu Israel cuví quichaha ñu chi Nyoo. Ta ihya ndicha cha cahín. ¹⁹Vatyí chihin seña ta milagra ta chihin tunyee iñi Tatyí li ra sacuvi ra. Ta tyicuan caa cahín tuhun cha cacu añima ñu sahá ra. Quichahí nya Jerusalén ta tandíhi ityi ta nyacua nya Ilírico. ²⁰Ta tyicuan caa saniñí cahin tuhun cha cacu añima yo maa maa ri nu ta cuñi ca maa ñáyivi tuhun ra Cristo, tacuhva vatyí ma saha tyiñe nu quichahá saha tyiño inga ra. ²¹Tari catyí nu tutu Nyoo tyehe caa:

Cucoto ñáyivi cha ta coto ca maa tuhun ra.

Ta cucutuñi iñi ñu cha ta ñaha ca maa cuiñi tuhun ra, catyí chi.

**Nu tyaá ra Pablo cuhva cha
cuhun ra ñuu Roma**

²² Yucuan chaha ña cuví maa tuhun cha cuhin cunyehe nu nyicú ndo, vasi cuaha xaan chaha cuiñi cuhin. ²³ Soco vityin cha ndiñi tyiño sahi ityi ñuu ihya. Ta cha cuaha xaan cuiya cuiñi cuhin cunyehe nu nyicú ndo ta cunyai suhva quivi chihin ndo. ²⁴ Nyeheí tatu cuhin cunyehe nu nyicú ndo quivi cuhin España. Ta cha yaha cha cunyehe chi ndo, nyehi tatu cuví tyinyee ndo chii ta cuhaa ndiñi nu cuahin. ²⁵ Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan. ²⁶ Vatyí ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chi ñu ndahvi ñu cuenda Nyoo cha iyó Jerusalén. ²⁷ Tyehe caa quichi cuví iñi ñu sacuví ñu. Ta ndicha vatyí tahán chi sacuví ñu. Vatyí tari maa ñu Israel, ñu chinó iñi chi ra Cristo, chaha ñu tuhun Nyoo chi ñu cha ñima ñu Israel cuví, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu. ²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo. ²⁹ Chitó vahi vatyí na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chii.

³⁰ Yañi, chacú ndahvi nuu ndo na cu iñi ri ndo chihin, chihin tindoho cha nyehí, ta çacan tahvi ndo chi Nyoo cha cuende vatyí cuiñi ndo chi Sutu Mañi yo Jesucristo, ta vatyí chahá Tatyí Ii Nyoo cha cuiñi ndo chii. ³¹ Çacan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta çacan ndo cha cuenda cha nyisé ihya cha cuenda ñu cuenda Nyoo ñu

Jerusalén cuan, na natiin cuenda vaha ñu. ³² Vatyí tatu Nyoo ta cuiñi ra, chihin cha sii cuiñi quichi nyehi chi ndo ta cuví nyitati iñi ri chihin ndo. ³³ Ta Nyoo ra chahá cha taxi ri coo añima yo, na cun-yaa ra chihin tandiñi ndo. Ta nacuvi tyicuan caa.

**Nu sacuhún ra Pablo
nocumi chi ñu amigo ra**

16 Sacoté chi ndo cha cuenda hermana Febe vatyí tyinyee xaan ña chi ñu yihí cuenda Nyoo ñuu Cencrea. ² Tiiñ cuenda vaha ndo chi ña tari tiñ cuenda Sutu Mañi yo, tari tahán chi sacuvi ñu yihí cuenda Nyoo. Ta tyinyee ndo chi ña chihin tandiñi cha chiñuhu chi ña, vatyí cuaha xaan ñu tyinyee ña chi, ta chi yuhu ñandiñi.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús. ⁴ Chahnya iñi ñu ñayivi ñu quivi cuan cha cuenda cha sacacu ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco tandiñi tucu ñu cha ñima ñu Israel cuví, ta yihí tucu ñu cuenda Nyoo. ⁵ Cuhva tucu ndo nocumi chi ñu yihí cuenda Nyoo cha candú iñi ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya. ⁶ Cuhva ndo nocumi chi cu María. Sahá tyiño xaan ña nu nyicú ndo. ⁷ Cuhva ndo nocumi chi ñu ñui, ra Andrónico ta ra Junias, ra tahin cha ñohō chihin vehe caa. Cahnu tyiño casahá ra cuenda Sutu Mañi yo chihin tandiñi ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo. ⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandiñi. ¹⁰ Cuhva

ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo ñandihí. ¹¹ Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutu Mañi yo. ¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo. ¹³ Cuhva ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutu Mañi yo. Ta vachi tucu noo cumi chi sihi ra Rufo. Cuví ña tari sihi. ¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra. ¹⁵ Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpas ta chi tandihí ñu cuenda Nyoo cha nyicú chihin ñu.

¹⁶ Nacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahvi nuu ndo, na saha ndo cuenda chi ñu cuñí sasiñ chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan. ¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu aña ñáyivi ndahvi chihin tuhun vita cahán ñu. ¹⁹ Tandihí ñáyivi chitó yoso caa quichahá vaha ndo chi Nyoo. Yucuan chaha cusí xaan cuñí chihin ndo, ta cuñí vatyí natyihí tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha. ²⁰ Nyoo ra iyó tandihí cha taxi ri aña, numi ri cuhva ra cha saha ganaa ndo chi ra ña

vaha, ta cuhva ra cha cuañi ndo siqui ra. Na nasoco Sutu Mañi yo Jesucristo chi ndo.

²¹ Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chi ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chi ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi iin ri yihí yo cuenda Sutu Mañi yo.

²³ Saquichí ra Gayo nocumi chi ndo ñandihí. Vehe ra nyaí suri ihya ndú iin ri ndi tandihí ñu yihí cuenda Nyoo. Ra Erasto ra cuví tesorero ñuu ihya, saquichí ra nocumi chi ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chi tandihí ndo. Ta na cuvi chi tyicuan caa.

Nu ndihí cahán ra Pablo ta sacahnú ra chi Nyoo

²⁵ Ta vityin na sacahnu yo chi Nyoo, vatyí maa ra cuví ra cucuhva cha cuniñi iñi ndo, ta ma sandihí ndo cha chinó iñi ndo tuhun ra cha sacacú ra aña yo. Ican cuví tuhun cahín ta tuhun cha sañahí cha cuenda ra Jesucristo. Iin ri cuví chi chihin tuhun cha ñohó xehe ta cha naha nyata ni cumañi chino ñuhu ñayivi. ²⁶ Soco vityin sañahá Nyoo chi yo cha cuenda tutu cha casandoo ra profeta, ra cachaha cuenda tuhun ra ta cha naha. Catyí Nyoo, ra iyó tyicuan ri maa, tyi vityin tahán chi coto tandihí ñáyivi tacuhva chino iñi ñu chi ra ta quichaha ñu tuhun cahán ra. ²⁷ Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyivi Nuu Corinto Cha Yihí Cuenda Nyoo

Nu tyaá ra Pablo noo tutu chi ñáyivi ñuu Corinto cha yihí cuenda Nyoo

1 Yuhu ra Pablo, nacana Nyoo chii vatyi cuñí ra cha cuví noo apóstol ra Jesucristo, o cuñí chi catyí vatyi tachi ra chii nacaque tyiño ra. Yuhu chihin ra Sóstenes yañi yo ²saquichí ndi noo carta ihya chi ndo cha nyicú ndo vehe ñuhu cuenda Nyoo cha nyaá ñuu Corinto. Ñáyivi chi Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyi nanduvi ndo noo ñáyivi vaha cuenda ra, chihin tandihi ñáyivi cha sacahnú chi Sutu Mañi yo Jesucristo tandihi ri ityi. Vatyi cuví ra Nyoo cuenda ñu ta cuenda maa yo ñandihí. ³Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo añima ndo.

Yoso caa nasocó Nyoo chi ñu yihí cuenda ra

⁴Tyicuan ri nacuhvé tyahvi nyoo chi Nyoo cha catyi maa ndo, vatyi chahá ra cha vaha chi ndo cuenda ra Cristo Jesús. ⁵Ta cha ñin ri cuví ndo chihin ra Cristo, Nyoo chahá ra tunyee ñi ra chi ndo tacuhva cuví cahán ndo tuhun ra. Ta chahá ra cha chiñi tuñi vaha chi ndo. ⁶Ta tandihí cha catyi chi ndo, tuhun ra Cristo, cuahán chino cava ñayivi ndo vityin. ⁷Yucuan chaha ñahri cha cumañí chi ndo. Chahá Nyoo tandihí cha vaha chi ndo cha ni ri ca cha nyatú ndo quivi quichi Sutu Mañi yo Jesucristo. ⁸Nyoo cusaha cuenda ra chi ndo nyacua nya naa ñayivi tacuhva yori cuví catyi ñáa cha catyi chi ndo quivi quichi Sutu Mañi yo Jesucristo. ⁹Nyoo tyicuan ri sacuví ra

tari cuhva catyi ra. Ta maa ra cuví ra nacana chi ndo tyi cu ñin ri ndo chihin Sehe ra, ra Jesucristo, Sutu Mañi yo.

Tatu yihí yo cuenda Sutu Mañi yo, ña vaha cha cusiin yo

¹⁰Yañi, chiquén chi ndo chihin sivi Sutu Mañi yo Jesucristo, na ñin ri cuví ndo ta ma cusiin ndo. Ta ñin ri cuhva caça xiñi ndo. Ta ñin ri tuhun quihí ñi ndo. ¹¹Catyí chi ndo tyehe caa, yañi, tyi catyi ñáyivi chi ra Cloé chii, vatyi iyó tisihi nu nyicú ndo. ¹²Vatyi nyoho siin siin cuhva cahán ndo. Noo ndo catyi ndo: “Yuhu, cuenda ra Pablo yihí.” Inga ndo catyi ndo: “Yuhu, cuenda ra Apolos yihí.” Inga ndo catyi ndo: “Yuhu, cuenda ra Pedro yihí.” Inga ndo catyi ndo: “Yuhu, cuenda ra Cristo yihí.” ¹³¿Atu tahvi sava ra Cristo? ¿Atu chihí yuhu ra Pablo nu cruzi cha catyi ndo? ¿Atu condutyá ndo chihin sivi yuhu? Ñima. ¹⁴Tyahvi nyoo chi Nyoo vatyi yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri. ¹⁵Tyicuan caa ta ni noo ndo ta ma cuví catyi ndo vatyi condutyá ndo chihin sivi. ¹⁶Aan, ta suri sacondutyá tiqui chi ñáyivi chi ra Estéfanos. Soco ña nichón ñi cha sacondutyé chi inga ndo. ¹⁷Vatyi ra Cristo ña tachi ra chii tyi sacondutyé. Soco tachi ra tyiño chii vatyi cahin tuhun ra yoso caa sacacú ra chi yo. Soco ña cahín chihin cha chiñi tuñi ñayivi ihya, coto catyi ñáyivi chii tyi ñahri yahvi nyaá cha chihí ra Cristo cuenda cuatyí yo.

Vaha ca cha chiñi tuñi Nyoo ta ñima ca cha chiñi tuñi ñayivi ihya

¹⁸Tuhun cha chihí ra Cristo nu cruzi cha catyi cuatyí yo, ñima ri tuhun cuví cuan cha cuenda chi ñáyivi cha cunaa nu cuví anyaya. Soco cha cuenda chi maa yo cha cuví yo ñáyivi cacú añima, tunyee ñi cha chahá Nyoo chi yo cuví

cuan. ¹⁹ Vatyí tyicuan caa tucu catyí maa tuhun Nyoo:

Cusanai cha chiñi tuñi ra cuñí maa tyi chitó xaan.

Ta cha chitó xaan ra chiñi tuñi cutave iin chiyo xiin, catyí Nyoo.

²⁰ Ñahri tuhun cha chitó xaan ra chiñi tuñi, ta ra sacuaaha, ta ra chitó xaan nacaahan ñáá ndihí tuhun iyó siqui ñuhu ñayiví ihya. Vatyí cha chiñi tuñi cha iyó siqui ñuhu ñayiví ihya, cha ñima ri tuhun nasaha Nyoo chí cuan. ²¹ Nyoo chihin cha chiñi tuñi ra tyaá ra cuhva vatyí ma cuví cohon nuu ñáyivi chi ra chihin cha chiñi tuñi cha iyó siqui ñuhu ñayiví ihya, soco tyaá ra cuhva vatyí sacacú ra chí ñu chinó iñi tuhun cha cahan noo ñáyivi nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chí Nyoo.

²² Vatyí ñáyivi Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñayiví ihya nanducú ñu. ²³ Soco yoó sacotó yo tuhun ra Cristo, ra chihí nu cruzi. Ta ñáyivi Israel cahán nuu ñu chiñí ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya. ²⁴ Soco cha cuenda chí ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee iñi ta cha chiñi tuñi Nyoo. ²⁵ Vatyí cuñí maa ñáyivi vatyí noo cha ñima ri tuhun cuví cha sacuví Nyoo. Soco chiñi tuñi xaan ca Nyoo ta ñima ca ñáyivi iyó siqui ñuhu ñayiví ihya. Ta cuñí maa ñayiví tyi ña ñihí fuerza Nyoo. Soco ican cuan cuví fuerza cha ñihi ca cha nuu fuerza tandihí ñáyivi. ²⁶ Yañi, cuñí chí coto ndo vatyí Nyoo nacana ra chí ndo vasi maa ri ñáyivi soho cuví ndo, ta mañi ndo cuví ndo ñáyivi tyayí o ñáyivi chitó xaan cha chiñi tuñi ñayiví ihya. ²⁷ Soco Nyoo nacachí vaha ra chí ñáyivi soho. Vatyí cuhvá ñu ticahan nuu chí ñu cuñí maa tyi chiñi tuñi xaan. Ta nacachí vaha ra chí ñáyivi ñahri fuerza

vatyí cuhva ñu ticahan nuu chí ñu cuñí maa tyi iyó xaan fuerza. ²⁸ Nyoo nacachí vaha ra chí ñáyivi ndahvi cha cuñí maa ñáyivi tyi ña chiñuhú ñu. Nacachí ra chí ñáyivi cha ña cuñí nyehe ñáyivi chii, vatyí sanocuee ra chí ra cuví tyiño nahnu. ²⁹ Tyicuan caa sacuví Nyoo tacuhva tyi yori sacahnú chii nuu ra. ³⁰ Soco maa maa Nyoo sacu iñ ri ra chí yo chihin ra Cristo Jesús. Ta sacuví ra tyi ra Cristo cuhva ra cha chiñi tuñi chí yo, ta sacuvahá ra chí yo ta sandundií ra chí yo nuu Nyoo vatyí tyiyahví ra chihin ñiñi ra cha catyí cuatyí yo, tacuhva cuví cacu yo. ³¹ Yucuan chaha sacuví yo tari cuhva catyí nu tutu Nyoo tyehé caa: “Tatu yóó cha cuñí cuyaa, vaha na cuyaa maa soco chihin Nyoo.”

Tuhun ra Cristo, ra chihí nu cruzi

2 Soco yañi, quivi chahin chicahin tuhun Nyoo chihin ndo, ña cahin tuhun cha chiñi tuñi ñuhu ñayiví ihya. ² Soco maa ri maa tuhun ra Jesucristo, yoso caa chihí ra nu cruzi cha catyí cuatyí yo tyai xiñi ta nacatyí chí ndo. ³ Ta chají nu nyicu ndo tari cha ñahri fuerze. Ta nihí chihin cha yuhvi. ⁴ Ta cuhva cha cahin nuu ndo, ña cahin chihin tuhun tyaquí tuhun cha chiñi tuñi tari cahán noo ra chitó xaan. Ñima. Soco chihin fuerza maa Tatyí Ii Nyoo cahin chihin ndo. ⁵ Tacuhva vatyí nachino iñi ndo chí Nyoo soco cha cuenda fuerza maa Nyoo. Ta ñima cha cuenda cha chiñi tuñi ñayiví ihya.

Nyoo chahá ra cha cohon nuu yo chí ra chihin Tatyí Ii ra

⁶ Soco suvita ri tyi cahán ndi tuhun cha chiñi tuñi chihin ñu cha ñihi ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñayiví ihya, ni ri cha chiñi tuñi ra nyacá ñaha siqui ñuhu ñayiví. Vatyí maa ra cucunaa ra. ⁷ Soco tuhun xehe cha chiñi

tuñi maa Nyoo cahán ndi. Vatyí Nyoo chicumí xehe ra minoo tuhun vaha nya ta ni cumañi chino ñuhu ñayiví ihya. Vatyí tyaá ra cuhva tyi cucacu añima yo ta cunyaa yo noo nu vaha chihin ra tyicuan ri maa. ⁸Ta tuhun ihya ta cutuñi ca iñi ni noo ra nyacá ñaha ñuhu ñayiví ihya. Vatyí tyehe ta cutuñi iñi ra, ma catyaa ra chi Sutu Mañi yo, ra nyacá ñaha gloria, nu cruzi. ⁹Soco tari cuhva catyí maa tuhun Nyoo:

Nyoo sanduvahá ra noo cha vaha xaan tyi cuhva ra chi ñáyiví cha cuñí chi ra.

Ta ni noo ñáyiví ta nyehe ca ñu, ta ta cuiñi ca ñu, ta ta ndichi ca xiñi ñu yoso cuhva cha vaha cha chahá Nyoo chi yo, catyí tuhun Nyoo.

¹⁰Soco Nyoo chahá ra Tatyí Ii ra vatyí cutuñi iñi yo tuhun ihya. Vatyí Tatyí Ii ra sañahá chi tandihi chi yo nyacua nya tuhun cha xehe ca cha cumí maa Nyoo.

¹¹Ma cuvi coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí Ii Nyoo chitó cha yihí iñi maa Nyoo. ¹²Yoó ñima cha chiñi tuñi ñuhu ñayiví naquehen yo, soco maa Nyoo chahá ra Tatyí Ii ra chi yo vatyí sacoto chi chi yo yoso caa cha tyaquí cha chahá Nyoo chi yo. ¹³Tuhun cha cahán ndi chihin ndo ihya, tuhun cha sañahá maa Tatyí Ii Nyoo chi ndi cuví. Ñima tuhun cha cutuhvá ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí Ii Nyoo chi ndi chi ñu cha yihí Tatyí Ii Nyoo chi.

¹⁴Soco ñu cha ña yihí Tatyí Ii Nyoo chi, ña cutuñi iñi ñu ta ña cuñí ñu cuiñi ñu cha sañaha Tatyí Ii Nyoo chi ñu, vatyí cuñí maa ñu tyi tuhun cha ñima ri tuhun cuví cuan. Vatyí iin ri maa ñu cha yihí Tatyí Ii Nyoo cuví cutuñi iñi ñu tuhun cuan. ¹⁵Soco ñu yihí Tatyí Ii Nyoo cuví cutuñi iñi ñu. Ta chitó ñu tatu vaha o ña vaha ñáá noo tuhun. Soco ma cuvi catyí

inga ñáyiví tatu vaha o ña vaha cha caá añima maa ñu. ¹⁶Vatyí tuhun Nyoo catyí chi: “Yori chitó tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yoó cha yihí yo Tatyí Ii Nyoo, chitó yo cha chicá xiñi ra Cristo.

Ña tahán chi cunyicon yo chi noo ra yañi yo, chi Nyoo na cunyicon yo

3 Soco yañi, quívi cuan ña cuví cahin chihin ndo tari cahín chihin ñu saquehén ityi Tatyí Ii Nyoo chi, soco cahín chihin ndo tari cahín chihin ñu ni nachino iñi chi Nyoo, tari cha vatyí ni nyihi ndo chihin tuhun ra Cristo cuví cuan. ²Cahín chihin ndo chihin tuhun cha ña yí ri cutuñi iñi ndo. Tari chahá yo sicuí coho cha lee cha ta cuvi ca cachi nyayu, tyicuan caa sacuví chihin ndo. Vatyí nyoho, quívi cuan ta cuví ca chi ndo. ¡Ta ni vityin ta ta cuvi ca chi ndo! ³Vatyí ni chicá ca xiñi ndo cuhva chicá xiñi ñáyiví iyó siquí ñuhu ñayiví ihya. Nyiyó iñi ndo. Iyó tisihi nu nyicú ndo. Cacusiin ndo. Ni chicá ca xiñi ndo tuhun ñuhu ñayiví ihya. Ta nyacuví ndo tari nyacuví ñáyiví cha ña ñohó nuu Nyoo. ⁴Vatyí yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñí chi catyí tyi nyacuví ndo tari nyacuví ñáyiví ña ñohó nuu chi Nyoo.

⁵Vatyí ¿yoó ra cuví yuhu, ra Pablo? Ta ¿yoó ra cuví ra Apolos? vatyí cañi tahan ndo cha catyí ndi. Vatyí noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyí maa Nyoo tyi sacuvi ndi. ⁶Yuhu tachí chiti tuhun Nyoo añima ndo. Ta ra Apolos chosó ra. Soco Nyoo sacuahñu ra tuhun ra añima ndo. ⁷Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihi. Vatyí maa ra sacuahñu

ra tuhun ra añima ndo. ⁸Ra cha tachí ta ra cha chosó, ñin ri ra cuví ra. Ta cuñihi ra nu vaha sahá Nyoo yoso cuhva tyiño sahá noo noo ra. ⁹Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo. ¹⁰Catyí Nyoo tyi yuhu cuví tari noo ra cuví nuu cha sama vehe. Vatyí chaquín cuhva vehe cuan ta tyihí chaha chí ñuhú. Ta inga ra samá ityí siquí. Soco cuñí chí sahá ra cuenda yoso cuhva samá ra siquí cuan. ¹¹Ta yori cuví cacun inga cuhva vatyí cha caá cuhva cuan. Vatyí suri maa ra Jesucristo cuví cuhva cuan. ¹²Ta siquí cuhva cuan cuví sama yo chihin xuhun cuaan, chihin xuhun cuichin, chihin yuu tyaquí, o chihin vitu, o chihin tuñama o chihin ndaha numa. ¹³Soco quívi cutuñi chí ñáyivi, cunyehe ra Cristo tyiño saha noo noo yo. Vatyí cuquichi ra chihin ñuhu. Ta ñuhu cuan cucahmi chí nya cha ña vaha. ¹⁴Ta tatu yihí ñu sacuvi ñu tyiño vaha, ma cayu chí. Cuñihi ñu cha cuhva Nyoo chí ñu. ¹⁵Soco tatu tyiño sahá ñu ta ndii cayu, cunaa tandihi tyiño sahá ñu. Cacú maa ñu soco tari noo ra cha cuyatyí ca quita nu ñuhu. Vatyí chiin cuii ri ca ta cayu ra.

¹⁶¿Atu ña chitó ndo vatyí vehe ñuhu Nyoo cuví chí ndo, ta Tatyí li Nyoo iyó ra añima ndo? ¹⁷Tatu nya noo ñu sativí vehe ñuhu Nyoo, Nyoo cusanaa ra chí ñu, vatyí vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸Ni noo ndo ta ma sandavi ñaha ndo chí ndo. Tatu nya nyoho cuñí maa ndo tyi chitó xaan ndo cha chiñi tuñi ñáyivi ihya, ndahvi saha ndo chí ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chí ndo. ¹⁹Vatyí cha chiñi tuñi ñáyivi ihya cuví chí noo cha ñima ri tuhun nuu Nyoo. Vatyí tuhun Nyoo catyí chí: “Nyoo

sanacavá ra chí ra chitó, suri maa nu trampa cha savaha ra.” ²⁰Ta catyí tucu chí: “Sutu Mañi yo chitó ra vatyí cha chicá xiñi noo ra chitó, cha ñima ri tuhun cuví.” ²¹Yucuan chaha ni noo ndo ña tahán chí sacahnú ndo chí ndo tatu nyicón ndo chí noo rayii. Vatyí tandihi cha iyó ta chí maa ndo cuví, tyi maa Nyoo chaha ra chí ndo. ²²Yuhu ra Pablo, ra Apolos, ra Pedro, maa Nyoo chaha ra chí ndi chí ndo tyi nacatyí ndi tuhun ra chí ndo. Ta ñuhu ñáyivi ihya, ñáyivi iyó yo, tuhun chihí, cha cuví vityin, cha cuví nu cuahan ca chí, tandihi ta chí maa ndo cuví. ²³Ta siin ri, maa ndo, chí ra Cristo cuví chí ndo, ta ra Cristo, chí Nyoo cuví chí ra.

Ma sacahnu yo chí yo ta ni chí noo yañi yo

4 Cuñí chí vatyí nyehé ndo chí ndi tari noo ra sahá tyiño chihin ra Cristo. Vatyí tyaa Nyoo tyiño chí ndi vatyí sañaha ndi tuhun xehe ra cha ña chitó ñáyivi nu quichí chí. ²Ta cuñí chí vatyí nyuhu cha cuví ndi musu Nyoo nyita ri quichahá ndi tandihi cha catyí ra chí ndi. ³Soco cha cuenda yuhu, ña quichahí tatu cahán ndo chii. O tatu cutuñí chii nuu noo ra cuví tyiño, ñahri cuende. Ta ni ri mai ta ña catyí tyi vahi. ⁴Vasi tuví iñi mai tyi ñahri ca cuatyí, soco ña cuñí chí catyí vatyí ñahri cuatyí nuu Nyoo. Vatyí nuu maa Sutu Mañi yo cucutuñí chí yo. ⁵Ican tuhun, nyoho ma cahan ndo chí ndi. Cuatu ndo quívi quichi ra Cristo. Ta maa ra cutava nu ndichin cha ñohó xehe nu ñaa iñi. Vatyí cusanatuvi ra cha caá añima noo noo yo. Tyicuan ta Nyoo cutyiyahvi ra yoso cuhva sacuvi noo noo yo.

⁶Yañi, cahín tuhun ihya chihin ndo cuenda cha vaha chí maa ndo. Vatyí nyehé ndo cuhva iyé, ta cuhva iyó ra Apolos. Vatyí ña cahnu sahá ndi chí ndi. Ta tyicuan caa tucu maa ndo, cutuhva

ndo sacuvi ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihi ñáyivi. ⁷Ni noo ndo ta ña cahnu ca ra cuví ndo ican saha inga ndo. Vatyí cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyí ñima maa ndo ñihí.

⁸Cha cuhva cha cuñí maa ndo vatyí tandihi tuhun Nyoo chitó ndo, ta ñahri ca cha cumañí chi ndo. Ta cuñí maa ndo tyi Rey cuví ndo. Ta ña chiñuhú ca nyuhu chi ndo, cuñí maa ndo. Vaha tyehe ta tyicuan caa, tacuhva vatyí cuvi tucu nyuhu rey chihin ndo. ⁹Nyuhu cha cuví ndi apóstol, tari maa cha sandoo Nyoo chi ndi nya chata ca, cahvi ñi. Vatyí nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policía chihin ndi ityi cahnu vatyí tacuhva tyi nyehe ñáyivi ta ángel chi ndi. ¹⁰Sahá ñáyivi tyi ra tondo cuví ndi cha cuenda ra Cristo. Ta nyoho cuñí maa ndo tyi chitó xaan ndo tuhun ra Cristo. Nyuhu cuví ndi tari noo ra cha ñahri fuerza, cha ni ri ca cha nyoho cuñí maa ndo tyi cuaha xaan fuerza ndo iyó. Tasi cuñí nyehe ñáyivi chi ndi, ta chi nyoho sahá ñu ñáyivi. ¹¹Nya vityin, nyehé ndi tindoho. Chisocó ndi. Ityi ndi ndutyá. Cumañí sahma ndi. Ñahri vehe ndi iyó. Ta ñáyivi, tasí ñi chi ndi. ¹²Ta chitátú ndi cha sahá tyiño ndi chihin ndaha ndi. Cahán ñáyivi chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi. ¹³Cahán ña vaha ñu siqui ndi. Soco ña yatyín ñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

¹⁴Sacuhín tuhun ihya chi ndo, soco ñima ticahan nuu chahí chi ndo. Soco chahí tuhun chi ndo tari chahí tuhun chi

sehi tyi cuñí chi ndo. ¹⁵Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú añima ndo. ¹⁶Ta tyicuan caa catyí chi ndo na cunyicon ndo cuhva iyé.

¹⁷Yucuan chaha tachí chi ra Timoteo, sehi cuenda Sutu Mañi yo, nu nyicu ndo. Nii xaan ñi ra nyicón ra chi Nyoo. Ta cuñí xain chi ra. Maa ra cuasanicohon ra ñi ndo yoso cuhva iyé, vatyí chinó ñi chi ra Cristo. Cusañaha ra chi ndo yoso cuhva sañahí tandihi ri vehe ñuhu. ¹⁸Yihí nyoho cahnu sahá ndo chi ndo. Cuñí maa ndo vatyí ma cuhun que nu nyicú ndo. ¹⁹Soco tyaí cuhva tyi cunyehe nu nyicu ndo cha numi ri, tatu Sutu Mañi yo ta cuñí ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra. ²⁰Vatyí tatu ndicha cha chahá ra cha cunyacá ñaha Nyoo chi ra, ma cahan ri ra. Soco cuatuví ñi yo vatyí nyaá fuerza Nyoo chihin ra. ²¹¿Ñáa cha cuñí nyoho vii? ¿Atu cha quichi tachi tuñi chi ndo, o cha quichi nyehi chi ndo chihin cha vita ñi?

Nu cutuñi chi noo ra chiyo chihin sihi queen

5 Catyí ñu chii vatyí iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyí ni ñu ña ñohó nuu chi Nyoo ta ña nyacuví ñu tari nyoho. ²¡Ta tyicuan caa ta cahnu sahá ndo chi ndo cha nuu cha cucuihyá ñi ndo! Cuñí chi vatyí catyí ndo chi ra cha nyacuví cha quiñi caa cuan vatyí ma cutahan ca ra chihin ndo. ³⁻⁴Vasi ña nyaá chihin ndo chihin coño ñuhi, soco cõhon ñi ndo vatyí ñohó ñi tuhun ndo, tari cha nyaá mai chihin ndo cuví cuan. Ta cha sandai tyiño ra cha sacuví cuatyí cuan chihin sivi maa Sutu Mañi yo Jesucristo. Cuñí chi tyi ndu ñi

ri ndo. Ta saha ndo tuhun tyi nyaf chihin ndo. Ta cunyaa fuerza maa Sutu Mañi yo Jesús chihin ndo ñandihí. ⁵Tyicuan ta cuñi chi vatyí nacuhva cuenda ndo chi ra cuan chi cuihna, tacuhva nativi ndihí coño ñuhu ra. Ta cuhva cuví cacu añima ra quiví quichi Sutu Mañi yo Jesucristo.

⁶Ña tahán chi sacahnu ndo chi ndo chihin cha sacuví ndo. Vatyí nyehé ndii ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyí chihin chiin ri yuchan iya ta nandaa nanií yuchan pan? ⁷Tava ñehe ndo yuchan iya chahnu cha cuví cha ña vaha cha sativí chi ndo. Tyicuan ta cuví ndo tari pan cha ñahri yuchan iya yihí chihin, cha tuhva yo chachí cha vico pas-cua. Ta pan cuan, ican cuví ndo vatyí ra Cristo cuví mbee cha chihi cha catyí cuatyí yo. ⁸Yucuan chaha tahán chi cachi coo yo cuenda cha chihí maa ra Cristo cha catyí yo. Ta sandoó yo cha quiñi caa cha sacuví yo ityí chata cha cuví tari yuchan iya chahnu. Ta cahán yo maa maa ri cha ndicha chihin cha nii iñi yo. Vatyí cuví chi tari pan cha ñahri yuchan iya yihí.

⁹Nuu inga carta cha yaha saquichi chi ndo, catyí chi ndo vatyí nyoho ma cohon naha ndo tuhun chihin ñu cha sacuví cha iyó ri maa chihin ñusihí o rayii. ¹⁰Ta cha catyí chi ndo tyehe caa, ñima cha cuachiyo ndo ingaña ri nu nyicú ñu cha iyó chihin rayii o ñusihí, ta ñima yii ñu o ñasihí ra cuví, o ñu nyiyó iñi, o ñu suhú, o ñu sacahnú xitohyo. Vatyí tatu tyicuan caa, cuñi chi cha quita ndo ingaña ri ñuhu ñayiví. ¹¹Soco cha cuñi catyí chi ndo vatyí ma cohon naha ndo tuhun chihin noo ñu cha catyí vatyí hermano cuví ñu, ta iyó ri maa ñu chihin rayii o chihin ñusihí ta ñima yii ñu o ñasihí ra cuví, o nyiyó iñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu. ¹²⁻¹³Vatyí yoó

ñā tahán chi sahá yo cuenda chi ra ñā ñohó nuu chi Nyoo. Nyoo cuvi ra sahá cuenda chi ñu cuan. Soco nyoho cuñi chi sahá ndo cuenda chi ñu yihí cuenda Nyoo. Yucuan chaha tavá ñehe ndo chi ra iyó cuatyí chiña nu nyicu ndo.

Ma cacan yo cuatyí chaha noo yañi yo cuenda Nyoo nuu ra cuví tyiño

6 ¿Yoso caa quichi cuví iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chi ra yihí cuenda Nyoo, tacuhva canyehé ra nya ra iyó cuatyí? ²¿Atu ña chitó ndo vatyí suri maa ndo cusandaa ndo cuatyí ñáyivi iyó siqui ñuhu ñayiví ihya nu cuahan ca chi? Ta tatu maa ndo cusandaa ndo cuatyí cuan, ¿atu ma cuví sandaa ndo noo tyiño cha ñima ri tuhun ihya? ³¿Atu ña chitó ndo vatyí nyacua nya ángel ta cutuñi chi ra nuu yo? ¿Ta nyaca cuví noo tuhun luhlu ñayiví ihya! ⁴Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo. ⁵Ihya ndicha tuhun catyí chi ndo, na coo chiin ticahan nuu nuu ndo. ¿Atu yori ndicha cuii noo ra cuví sandaa noo tyiño yañi yo nu canyicú nyoho chiña? ⁶Vatyí cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño iñi chi Nyoo.

⁷Cha iyó tisihi nu nyicú ndo, ña vaha. Vaha taxin ca cunyeer ri ndo tatu sacuvi ñu cha ña vaha chihin ndo. Saña ndo, na suhu maa ñu cha chii ndo. ⁸¿Soco nyoho suri maa ndo sataśi ndihí ca iñi ndo chi ñáyivi, ta nyacua nya cha chii yañi ndo ta suhú ndo!

⁹⁻¹⁰¿Atu ña chitó ndo vatyí ñu quiñi iyó ma quihvi ñu nu nyacá ñaha Nyoo? Ma sandavi ñaha ndo chi ndo. Ma quihvi tandihí ñu iyó ri maa chihin ñusihí o chihin rayii cha tyicuan ri caa. Ta ni

ri ñu cha sacahnú xitohyo, ni ri ñáyivi cha iyó ñasihi o yíi, ta cavá noo ñu chihin inga ñaha o chihin inga rayii, ni ra iyó chihin tahan yíi, ni ra suhú, ni ra nyiyó iñi cha tyayii, ni ra chiñí, ni ri ñu cuendu, ni ri ñu chitó yoso caa sacuví cha quiñi caa, ma ñihi ñu cha vaha nu nyacá ñaha Nyoo. ¹¹ Vatyí tyicuan caa cuví suhva nyoho. Soco Nyoo cha sandundi ra añima ndo chihin Tatyí Ii ra. Cha sacuvahá Sutu Mañi yo Jesucristo chi ndo nuu Nyoo.

Coño ñuhu yo cuví vehe ñuhu Nyoo

¹² Cattyí chi tuhun vatyí libre iyó yo cha sacuví yo tandihi cha cuñí yo. Cha ndicha cuví. Soco ña tandihi ta cuví chi cha vaha chi yo. Ndicha libre iyó yo cha sacuví yo tandihi, soco sáha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chi chi yo. ¹³ Cattyí ñáyivi vatyí chahá Nyoo nyayu cha cuenda chichi yo. Ta chahá ra chichi yo cha cuenda cha cachi yo nyayu. Cha ndicha cuví. Soco ninduvi cuan cusanaa Nyoo quívi naa ñayivi. Ta ña ndicha cha coño ñuhu yo cuví cha cuenda cha sacuví yo cha ña vaha chihin ñusihi o chihin rayii. Vatyí coño ñuhu yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo. ¹⁴ Tari sanandoto Nyoo chi ra Cristo Jesús, tyicuan caa cusandoto ra chi yo chihin tunyee iñi ra.

¹⁵ ¿Atu ña chitó ndo vatyí tandihi yo cha yihí yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chiin coño ñuhu ra Cristo ta sativí chihin noo ñaha cata iñi? Ña tahán chi cunyacuvi yuhu tyicuan caa. ¹⁶ ¿Atu ña chitó ndo vatyí tatu noo rayii ndu iñi ri ra chihin noo ñaha cata iñi, noo ri coño ñuhu nanduví ra chihin ña? Vatyí nu tutu Nyoo cattyí chi tyehe caa: “Cha ninduvi ñu, noo ri nanduvi ñu.” Ta

ña tahán chi cu iñi ri ra yihí cuenda Nyoo chihin ñaha cata iñi. ¹⁷ Soco tatu noo ñáyivi nacuhvá cuenda ñu añima ñu chi ra Cristo, yucuan cuví nu quihví Tatyí Ii ra añima ñu ta noo ri nanduví ñu chihin ra.

¹⁸ Sanaa ndo iñi ndo tatu quichi cuví iñi ndo chi ñusihi o rayii tatu ñima ñasihi ndo o ñima yíi ndo cuví. Vatyí tandihi inga nu cuatyí cha nyacuví ñáyivi ña sativí chi coño ñuhu ñu. Soco ñu nyacuví cuatyí chihin cha iyó ñu chihin ñusihi o rayii cha tyicuan ri caa, sativí ñu coño ñuhu ñu. ¹⁹ ¿Atu ña chitó ndo vatyí coño ñuhu yo cuví vehe Tatyí Ii cha chahá Nyoo chi yo, vatyí cunyaa ra chihin yo? Yoó ñima maa yo nyacá ñaha yo chi yo, Nyoo cuví ra nyacá ñaha chi yo. ²⁰ Vatyí Nyoo sata ra chi yo ta yahvi xaan chahá ra chi yo. Yucuan chaha cuñí chi vatyí sacahnú yo chi Nyoo chihin coño ñuhu yo, ta chihin cha chiñi tuñi yo vatyí ninduvi cuan, chi maa Nyoo cuví.

Chahá ra Pablo tuhun yoso caa coo ñu tandahá noo ñayivi vaha

7 Ta vityin cuacatyí tuhun cha ndaca tuhun ndo chii nu tutu cha sacuhun ndo chii. Ndicha vatyí vaha cha ma tandaha yo. ² Soco vatyí iyó xaan tuhun cha quichí cuví iñi ñáyivi cha coo ñu chihin ñáyivi cha tyicuan ri caa. Yucuan chaha cuñí chi vatyí tahan tahan rayii coo noo ñasihi ra, ta tahan tahan ñusihi coo noo yíi ñu. ³ Na sacuvi rayii cuhva tahán chi chihin ñasihi ra. Ta tyicuan caa tucu maa ñusihi, na sacuvi ñu cuhva tahán chi chihin yíi ñu. ⁴ Ñaha sihi cuan ma cuví cunyaca ñaha ri maa ña coño ñuhu ña. Vatyí chi yíi ña cuví coño ñuhu ña. Tyicuan caa tucu maa yíi ña, ma cuví cunyaca ñaha ri maa ra coño ñuhu ra vatyí chi ñasihi ra cuví coño ñuhu ra. ⁵ Coto ñaha ma cuhva ndo chi ndo chi tahan ndo. Tatu cuñí ndo nanducu ndo chi Nyoo chihin oración, iñi ri cuhva

caça xiñi nanduvi ndo. Ta ma cuhva ndo chi ndo chi tahan ndo suhva quivi. Yaha cuan tyicuan ta cuhva tucu ndo chi ndo chi tahan ndo coto ma cunye ndo. Ta coto nducu nyehe ra ña vaha chi ndo ta cahun ndo cunducu ndo inga ñusihi o inga rayii. Ta ña vaha cha tyicuan caa.

⁶Cha catyí chi ndo tyehe caa ñima cha catyí tyi tandaha ndo. Ña saniñi chi ndo cha tandaha ndo. Soco cuví tandaha ndo tatu cuñi ndo. ⁷Cha cuenda chi yuhu, vaha ca coo maa ri maa ndo tari mai. Soco Nyoo siin siin fuerza chahá ra chi noo noo yo. Yihí yo chahá ra fuerza chi yo vatyi cuví coo maa ri maa yo. Ta yihí yo ña chaha ra fuerza cha coo maa ri maa yo.

⁸Chi ñu tyivaa ta chi ñu chihí yii, chahí tuhun chi ñu. Vaha ca cha ma coo yii ñu tari mai. ⁹Soco tatu ma cunye ñu cha ma coo yii ñu, vaha ca cha tandaha ñu ta ñima ca cha quichi ri cuví iñi ñu tandaha ñu, ta ña tandaha ñu.

¹⁰Soco ñu cha yaha tandaha, catyí chi ñu vatyi ma sanandoo ñu chi yii ñu. Cha ndicha cuví vatyi mandamiento ihya ñima cha ndichí xiñi ri cuví soco maa Sutu Mañi yo catyí. ¹¹Soco tatu noo ñaha sihi ta sanandoo ña yii ña, cuñi chi vatyi ndoo ña cunyaa ña cha ma tandaha ca ña. O naquehen ña chi yii ña. Ta suri tyicuan caa, ña tahán chi sanandoo rayii chi ñasihi ra.

¹²Ta cha cuenda chi yuhu catyí chi inga ndo tuhun ihya. Vatyi tatu ñasihi noo hermano ta ña chinó iñi ña chi Nyoo, soco ndoó ña vaha cha cunyaa ña chihin ra, ñahri ityi iyó chi ra cha sanandoo ra chi ña. ¹³O tatu yii noo hermana, ta ña chinó iñi ra chi Nyoo, soco ndoó ra vaha cha cunyaa ra chihin ña, ñahri ityi iyó chi ña cha sanandoo ña chi ra. ¹⁴Vatyi cha yahá nasoco Nyoo chi rayii cha ña chinó iñi cuan cha cuenda cha iin ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha

cha ña chinó iñi chi Nyoo cha cuenda cha iin ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyin tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasocó Nyoo chi sehe ndo. ¹⁵O tatu rayii o ñusihi cha ña chinó iñi chi Nyoo, ta cuñi ñu sanandoo ñu chi tahan ñu cha chinó iñi chi Nyoo, na sanandoo maa ñu. Tyicuan ta ra hermano o ñaha hermana ndoó ñu libre. Vatyi maa Nyoo cuñi ra vatyi coo vaha yo chihin cha ñahri tisihi. ¹⁶Vatyi ña chitó minoo ñaha sihi tatu cacu añima yii ña saha ña. Ta ni ri noo rayii ña chitó ra tatu cacu añima ñasihi ra saha ra.

¹⁷Ta tyicuan caa catyí chi ndo vatyi coo ndo yoso cuhva catyí Sutu Mañi yo chi ndo. Ta yoso cuhva iyó ndo quivi nacana Nyoo chi ndo. Ta tyicuan caa catyí chi tandihí ñu yihí cuenda Nyoo noo noo vehe ñuhu. ¹⁸Tatu Nyoo ta nacana ra chi noo nyoho ta cha yahá sacuvi ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuvi ñu costumbre cuan chihin ndo, ña tahán ca chi sacuvi ndo vityin. ¹⁹Ña niñi xaan cha sacuví yo, o cha ma sacuvi yo costumbre circuncisión cuan. Soco cha niñi ca cha quichahá yo tuhun cahán Nyoo. ²⁰Tahan tahan ndo cuñi chi ndoó ndo yoso cuhva cha iyó ndo quivi cha nacana Nyoo chi ndo. ²¹Vatyi tatu iyó chitoho ndo cha nyacá ñaha chi ndo quivi cha nacana Nyoo chi ndo, ma caca iñi ndo, soco tatu chahá chi cuhva cha ndoó ndo libre, cuñi chi nducu ndo cuhva ta ndoó ndo libre. ²²Vatyi quivi nacana Nyoo chi noo ra cha iyó chitoho, nduvi ra tari noo ra cha libre iyó, vatyi sacuví ra tyiño nuu Sutu Mañi yo. Ta suri tyicuan caa tucu ra cha iyó libre quivi cha nacana Nyoo chi ra. Vityin ra Cristo nyacá ñaha chi ra. ²³Sata Nyoo chi nyoho. Ta yahvi xaan chahá ra chi ndo. Yucuan chaha ma

cuhva ndo cha cunyaca ñaha rayii chi ndo. Ta ma sacuvi ndo tyiño nuu ra. ²⁴Ta tyicuan caa catyí chi ndo yañi, coo ndo tari cuhva chiyo ndo quivi nacana Nyoo chi ndo.

²⁵Ta tyicuan tucu ñu cha ta tandaha ca. Ñahri tuhun chaha Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahín tyi cha chító ndo vatyí cha ndahví cuñí Nyoo nyehe ra chii ta chaha ra tyiño ihya chii. ²⁶Cha cuenda chi yuhu, vaha taxin ca ma tandaha ndo. Vatyí cuaha xaan tindoho ñayivi cha iyó yo vityin. ²⁷Soco tatu cha iyó ñasihi noo hermano, ma nducu ra cuhva cha sanando ra chi ña. O tatu ta coo ca ñasihi ra, ma nducu ra chi ña. ²⁸Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindoho cunyehe ñu ñayivi ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñí cha nyehé ndo tindoho ta tisihi cuan.

²⁹Yañi, cha vityin ta ityi nuu ña cuaha ca quivi nyaá. Cuñí chi vatyí ra cha iyó ñasihi cuví ra tari noo ra cha yori ñasihi. Vatyí nyita ri tahán chi caca xiñi ra tuhun Nyoo. ³⁰Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusii iñi, soco ma quichaha xaan ndo tusii iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Naçuhva ndo tandihi cuan chi Nyoo. ³¹Ta ra iyó xaan cha chii ñayivi ihya, ma quichaha xaan ra chi cuan, soco cotyiño ra tyiño Nyoo. Vatyí ñayivi cha nyehé yo ihya cha cuahán sandihi xaan chi.

³²Cuñí vatyí nyoho ma caca xaan xiñi ndo tuhun cha iyó ñayivi ihya. Ñin ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñí maa Sutu Mañi yo. ³³Soco tatu cha tandaha ra, chicá xiñi

ra yoso caa coo vaha ra ñayivi cuhva tahan iñi ñasihi ra. ³⁴Ta siin cuhva iyó noo ñusihi cha cha yaha tandaha, ta siin cuhva iyó tucu noo ñusihi cha cumañi ca tandaha. Ñaha cha cumañi ca tandaha chicá xiñi ña ñin ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ñi añima ña. Soco ñaha cha cha yaha tandaha chicá xiñi ña yoso caa coo vaha ña ñayivi ihya cuhva tahán iñi yii ña.

³⁵Catyí tuhun ihya chi ndo cuenda cha vaha chi maa ndo. Ñima cha saniñi chi ndo. Soco vatyí coo vaha ndo noo ñayivi chihin cha ñahri sayangá chi ndo. Ta ñin ri tyiño Nyoo sacuvi ndo.

³⁶Soco nya nyoho chicá xiñi ndo vatyí vaha cha tandaha ndo vatyí cha cuayaha quivi ndo; vaha, tandaha ndo tatu cuñí ndo. Ñima cuatyí cuví cuan. ³⁷Soco tatu inga ndo cha nacuaan vaha iñi ndo vatyí cuandoo ndo cha ma tandaha ndo, vaha tucu. ³⁸Tu tandaha ndo, vaha. Tu ma tandaha ndo, vaha ca.

³⁹Soco catyí nu ley Nyoo chi yo vatyí tahán chi cunyaca ñaha rayii chi ñasihi ra cha ni ri ca cha iyó ra. Soco tatu chihí ra, iyó ityi chi ña cha tandaha ña yóo chihin cuñí maa ña. Soco tatu ra yihí cuenda Nyoo cuví ra. ⁴⁰Soco vaha ca coo ña ñayivi tatu ma tandaha ña inga chaha. Ihya cuví cha chicá xiñi yuhu. Ta chahí tuhun ihya chi ndo chihin Tatyí Ii maa Nyoo, cahvi iñi.

Nu sañahá ra Pablo vatyí ma sacoo yo cuatyí inga ñayivi

8 Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chító yo tatu vaha o ña vaha cachi yo nyayu cuan. Ta cha cuenda cha chító yo, yucuan chaha cahnu xaan sahá yo chi yo ta sativí cuan chi yo. Soco cha cuñí yo chi tahan yo sandunyeé cuan chi

yo. ²Tatu yihí ndo cha cuñí maa ndo tyi chitó ndo, cha cuenda vatyí ta coto ca ndo yoso cuhva cuñí chí cuví cuan. ³Soco Nyoo ñohó nuu ra chí ñu ñii vaha iñi cuñí chí ra.

⁴Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chí, vatyí noo ri maa Nyoo iyó. ⁵Vasi cuñí maa ñáyivi vatyí cuaha xaan Nyoo iyó nu ñuhu ñáyivi ihya ta andivi, ⁶soco cha cuenda chí maa yo noo ri Nyoo Sutu yo iyó. Ta maa ra savaha ra tandihí cuii maa cha iyó. Ta yoó iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savaha ra tandihí maa cha iyó, nyacua nya chí maa yo.

⁷Soco ña tandihí yo chitó yo tuhun ihya. Vatyí suhva ñu tahan yo cuenda Nyoo, ta ni cumañi ca quihvi ñu cuenda Nyoo, sacahnu ñu xitohyo. Ta cha caan ñu sacahnu ñu chí cuan ta cuñí maa ñu tyi nyitó xitohyo cuan. Vatyí ña ñii vaha iñi ñu nyicón ñu chí Nyoo. Ta tatu chachí ñu nyayu cha chahá ñáyivi chí xitohyo cuan, cuñí maa ñu vatyí chicoó cuatyí ñu cuenda xitohyo cuan nuu Nyoo. ⁸Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo. ⁹Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví sanacava ndo nuu cuatyí chí ñu ni quihvi ri cuenda Nyoo, vatyí ñu cuan cuñí maa ñu tyi chicoo cuatyí ñu tatu chachí ñu nyayu cuan. ¹⁰Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun. ¹¹Ta ra yañi yo cutivi añaima ra vatyí cuñí maa ra tyi chicoo cuatyí ra. Ta ra cuan chihí ra Cristo cha

cuenda ra. Ta vityin chicoo cuatyí ra cuñí maa ra. Ta yoho cha chitón, sicun chuhun cuatyí cuan. ¹²Yucuan chaha tatu sanacavá yo chí noo yañi yo cha ña ñihi vaha cuahán chihin Nyoo, chicoó cuatyí yo nuu ra Cristo. ¹³Yucuan chaha tatu sanacavé chí noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chí ra nuu cuatyí.

Cha tahán chí sacuví ra apóstol Nyoo

9 Yuhu cuví noo ra apóstol Nyoo. Ta yori ñáyivi nyacá ñaha chii. Vatyí nyehí chí ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyí chinó iñi ndo tuhun Nyoo cha sacote chí ndo. ²Vasi ña cuñí ñáyivi chinó iñi ñu cha apóstol Nyoo cuví, soco cha cuenda nyoho ican cuví. Vatyí cha cuenda cha chinó iñi ndo chí Sutu Mañi yo, cuví ndo cha ndaa vatyí ndicha cha apóstol cuví.

³Ihya cuví tuhun cuacahin cuenda ñu cha cahán nyaa chii. ⁴Iyó chí ityi chii cha quehín tandihí cha chahá ñu cachi ta cha chahá ñu cohi. ⁵Ta siin ri cha coo noo ñasihi cha chinó iñi chí Nyoo, tari yañi ra Jesús, ta ra Pedro ta tandihí ca ra apóstol. ⁶O chicá xiñi ndo vatyí yuhu ri ta ra Bernabé tahán chí saha tyiño ndi chihin ndaha ndi ta sata ndi cha chiñuhú chí ndi. ¿Atu ña tahán chí chí nyuhu sandoo ndi tyiño cuan ta cahán ndi tuhun Nyoo? ⁷Ra cha cuví sindaro tyiyahví gobiernu chí ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cumi mbee chihí ra sicui ti. ⁸Ta ma cuñi ndo vatyí tuhun ihya cha ndichi xiñi ri mai cuví. Vatyí nu ley cha tyaa ra Moisés catyí chí tyehe caa: ⁹“Ma tyihi ndo yoho yuhu quití cha sandundí trigo, vatyí tahán maa chí cachi ti suhva trigu nu sahá tyiño ti.” Ndicha vatyí Nyoo

catyí ra tyehe caa soco ñima vatyí cuniñi xaan cuñi ra chihin quiti. ¹⁰Soco na cutuñi ca iñi yo vatyí tari ra tahví ñuhu ta ra cha tachí, tahán chi vatyí cuita iñi ra vatyí cunaquehen ra cha quita nu saha tyiño ra. ¹¹Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chiti cuvi cuan. Ta tahán chi tyi tyinyeé ndo chi ndi cha cuenda cha sacotó ndi tuhun Nyoo chi ndo. ¹²Tatu tyinyeé ndo chi inga ra cha ña quichi tyihi tuhun Nyoo nu nyicú ndo, tahán ca chi cha tyinyee ndo chi nyuhu, vatyí nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihi. Ta ña sayangá ndi chi ndo chihin cha chiñuhú chi ndi. Tacuhva cha ma sandihi ndo tuhun ra Cristo. ¹³Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyí tahán chi tavá siin ra suhva coño quiti vatyí cachi ra. Ta tandihi ca coño cuan cucahmi ra tari cuhva catyí maa Nyoo chi ra. ¹⁴Ta suri tyicuan caa catyí Sutu Mañi yo, vatyí tahán chi tyinyeé ñu yihí cuenda Nyoo chi ra cahán tuhun Nyoo chihin ñu. ¹⁵Soco yuhu ni noo chaha ña chiquen cha tahán chi chii. Ta ni ña tyái tuhun ihya vatyí cuñí cha cuhva ndo cha cuhva ndo chii. Vatyí tatu chiquén cha tahán chi chii, ña siñ cuñí cahín tuhun Nyoo. Vaha taxin ca cuñí cha cúvi ta ñima ca cha caquen xuhun chi ndo.

¹⁶Cha cuenda chi yuhu ñima cha cahnu sahí chii cha cahín tuhun Nyoo. Soco vatyí nyaá siqui cha sacuví. Soco ndahvi cuví yuhu ra ndahvi tatu ma cahin tuhun Nyoo ihya. ¹⁷Yucuan chaha tatu sacuví chihin cha iyó iñi, cuñihi yahvi. Soco tatu sacuví chihin fuerza, suri cuví chi, vatyí noo tyiño cha tachí maa Nyoo chii tyi sacuví, tahán chi cha sacuví. ¹⁸Ta tyicuan caa, yahvi cha ñihi, ican cuví cha siñ cuñí cahín tuhun ra

Cristo. Ta ña chiquén cha tahán chi chii cha cuenda cha cahín tuhun ra.

¹⁹Vasi ñima musu cuví yuhu. Soco nanduví musu tandihi ñáyivi. Vatyí tyicuan caa saha ganai cuaha ca ñáyivi cuenda ra Cristo. ²⁰Tatu ñohí nu nyicú ra Israel, nanduví tari maa ra tacuhva vatyí tyasoho ra tuhun cahin. Vatyí cuñi saha ganai chi ra cuenda ra Cristo. Vatyí ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chii. ²¹Soco tatu cuñí saha ganai chi ñu ña quichahá ley ra Moisés, sacuví tari cuhva sacuví ñu. Vatyí tacuhva saha ganai chi ñu. Soco ley maa Nyoo nyacá ñaha chii vatyí chihin ley ra Cristo chicá noi ta ña cuví cunyacuvi cha quiñi caa tari nyacuví maa ñu. ²²Tatu nyaí chihin noo ra cha ta coo vaha ca fuerza Nyoo chii, nanduví tari maa ra, vatyí tacuhva cahan que tuhun Nyoo chihin ra. Ta ndunyeé ca iñi ra chihin tunyee iñi Nyoo. Nanduví yuhu tari cuhva caa noo noo ñáyivi, vatyí tacuhva tyasoho ñu tuhun Nyoo cha cahín ta cacú añima ñu. ²³Tyicuan caa sacuví tacuhva cuví sacoté tuhun Nyoo chi ñáyivi. Vatyí tacuhva ñihi tumañi iñi cha chahá maa Nyoo chi yo.

²⁴Chitó ndo vatyí noo sihva cha chinó ñu, tandihi ñu chinó, soco noo ri ñu sahá ganaa. Tyicuan caa tucu maa yo, cuñí chi cha ñihi cunyicon yo chi Nyoo tacuhva sahá ganaa yo nu vaha cha chahá ra chi yo. ²⁵Tandihí ñu cuahan sihva, sandoo ñu tandihi cha satyño chi ñu vatyí cuñí ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tiví ca maa. ²⁶Cha cuenda yuhu ña chinó tondo ri mai, ni ña cañi tahan tondo ri mai. ²⁷Soco ñihi nyacá ñahi chi coño ñuhi. Ta saniñ quichahí chi Nyoo. Coto suri mai cha yaha sañahi chi inga ra ta ndoí.

**Nu sañahá ra Pablo vatyi
ma tyaa xiin yo Nyoo**

10¹⁻² Yañi, ña cuñi cha naa iñi ndo cha cuví chi sutu chahnu yo ta cha naha. Nyoo tyinyee ra chi ñu, ta tachi ra noo vico vatyi cahun ityi nuu ñu coto cunaa ñu. Iin ri nanduví ñu chihin ra Moisés, ra cuví nuu chi ñu, ta yaha sava ñu tyañuhu. Ta cha tyicuan caa, tari cha condutyá ñu chihin vico cuan ta chihin tyañuhu cuví cuan. ³ Ta tandihi ñu chachi ñu iin ri nyayu cha chaha maa Nyoo. ⁴ Ta tandihi ñu chihí ñu iin ri ndutya cha chaha maa Nyoo. Vatyi ndutya cuan tava ra chata noo yuu cha cuahan chihin ñu. Ta yuu cuan ra Cristo cuví. ⁵ Soco vasi nyehe ñu cuaha milagru cha sacuví Nyoo, cuaha ñu ña quichaha ñu tuhun cahan ra chihin ñu. Ta chihí ñu chiqui ndii cuan, ta yucuan ndoo ñu.

⁶ Tandihí tuhun ihya chahá chi noo cuhva chi yo. Vatyi tacuhva ma cuñi yo sacuví yo cha ña vaha tari sacuví ñu cuan. ⁷ Yucuan chaha ma sacahnu nyoho chi xitohyo, tari chinyacuví suhva ñu cuan ta cha naha, tari catyí nu tutu Nyoo tyehe caa: “Ta cachiyó ñu vico, ta cachachi ñu, ta cachihí ñu.” ⁸ Ta ma coo ri maa yo chihin inga ñusihí o chihin inga rayii tatu ñima ñasihí yo cuví, o yii ñu cuví, tari chinyacuví suhva ñu cuan. Ta noo ri quivi chihí oco uñi mil ñu cha cuenda cha chinyacuví ñu cha quiñi caa cuan. ⁹ Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuví suhva ñu cuan. Ta cachihí ñu cha tyaa coo chi ñu, cha cuenda cha cuñi ñu nducú nyehe ñu chi ra. ¹⁰ Ta ni ma cahan ña vaha ndo siqui Nyoo, tari cahan ña vaha suhva ñu cuan siqui ra. Ta saquichí ra ángel cuenda ra ta chahñi ra chi ñu.

¹¹ Tandihí ihya cuví chi sutu chahnu yo cha chiyó ta cha naha. Ta chicun-

yaa chi nu libru Nyoo tari noo cuhva vatyi sacotó ra chi yo cha iyó yo ñayiví ihya vityin, nu cuahán sandihí chi. ¹² Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha. ¹³ Tindoho cha nyehé ndo, cuñi maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chi Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chi ndo, tyicuan ta Nyoo cunducu ra cuhva cha quita ndo chichi tindoho cuan ta cuví cunyeé ndo.

¹⁴ Yucuan chaha yañi, ma sacahnu ndo chi xitohyo. ¹⁵ Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chi ndo. Ta nyehe ndo tatu ndicha o ña ndicha tuhun cahín chihin ndo. ¹⁶ Quivi cha nicohón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñi chi catyí vatyi iin ri cuví yo chihin ra Cristo cuenda niñi ra. Ta chachi yo pan ta cuñi chi catyí vatyi iin ri cuví yo chihin ra cuenda coño ñuhu ra. ¹⁷ Vatyi vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quiti cha chahá ñu chi Nyoo, ta cha cuenda cha nyacuví ñu cha tyicuan caa, iin ri cuví ñu chihin cuan. ¹⁹ Ñima cha catyí chi ndo tyi vale xitohyo cha sacahnú ñu ña ñohó nuu chi Nyoo. Ña vale, ni ri coño cha chahá ñu chi xitohyo cuan ta ña vale. ²⁰ Soco catyí chi ndo vatyi ñu ña ñohó nuu chi Nyoo chahá ñu cha chahá ñu, soco chi ra ña vaha. Ta ñima chi Nyoo. Ta ña tahán chi cha ndu iin ri ndo chihin ra ña vaha. ²¹ Vatyi ma cuvi coho yo copa Nyoo ta suri cuhva cuan ta coho tucu yo copa ra ña vaha. Ta ma cuvi cachi yo nu mesa Nyoo. Ta suri cuhva

cuan cachi yo nu mesa ra ña vaha. ²² Ma cuhva yo tisihi chi Nyoo vatyi maa ra iyó ca fuerza chi ra ta ñima ca maa yo.

Sacuvi yo ñáá cha sacuvi yo, soco cha cuenda cha vaha chi tahan yo

²³ Catyí chi tuhun: “Cuví sacuvi yo ñáá cha cuñí yo. Soco ña tandihi ta cuví chi cha vaha chi yo.” Ta ndicha cuví sacuvi yo cha cuñí yo. Soco ña tandihi ta tyinyeé chi chi yo cha cuahnu yo chihin tuhun Nyoo. ²⁴ Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

²⁵ Cachi ndo ñáá coño cha xicó ñu nuyahvi. Ta ma ndaca tuhun ndo ta ma ndichi xiñi ndo yóó chi cuenda cuví. ²⁶ Vatyi ñuhu ñayivi ta tandihi cha iyó nuu chi, chi maa Nyoo cuví.

²⁷ O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñí ndo cuhun ndo, cūhun ndo ta cachi ndo tandihi cha chahá ñu cachi ndo. Ta ma ndaca tuhun ndo ñáá cuenda cuví. ²⁸ Soco tatu nya noo ñu catyí ñu chi ndo: “Nyayu ihya nyayu cha chahá cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi añima ñu cha catyi chi ndo tyicuan caa. ²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyi inga ñáyivi? ³⁰ Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyi ña vaha cachí”, catyí ndo. ³¹ Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco chi maa Nyoo sacahnu ndo chihin cha sacuví ndo. ³² Ta ma cuhva ndo cuhva cha canacavá noo tahan ndo, ni ra Israel, ni ñáyivi cha ñima ñu Israel cuví, ni ñu yihí cuenda Nyoo. ³³ Tari yuhu, nanduquí cha vaha cuví chi ñáyivi. Ña nanduquí cha vaha

chi mai, soco cha vaha chi inga ñáyivi nanduquí. Vatyi tacuhva cacu añima ñu.

11 Cuñí vatyi cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu íñ ri yo

² Yañi, sii xaan cuñí vatyi tyicuan ri nichón iñi ndo chii. Ta quichahá ndo cha sañahí chi ndo. ³ Soco cuñí tyi coto ndo vatyi ra Cristo cuví xiñi noo noo rayii, ta rayii cuví xiñi ñasihí ra, tari Nyoo cuví ra xiñi ra Cristo. ⁴ Tatu noo rayii, nyasí xiñi ra ta chicán tahvi ra o cahán ra tuhun cha chahá Nyoo chi ra, ticahan nuu chahá ra chi ra cuví xiñi ra. ⁵ Soco tatu noo ñaha sihi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chi ña, tari cha satya ndii xiñi ña cuví cuan. Ta ticahan nuu chahá ña chi ra cuví xiñi ña.

⁶ Tatu noo ñaha sihi ña chasí ña xiñi ña, vaha taxin ca nacahnya ña tandihi ixi xiñi ña. O tatu cahán nuu ña cha satyá ndii ixi xiñi ña, nacasi ña xiñi ña. ⁷ Ña tahán chi casi rayii xiñi ra. Vatyi cuhva caá Nyoo caa ra, vatyi nyacá ñaha ra chi ñasihí ra, tari nyacá ñaha Nyoo chi ra. Soco noo ñaha sihi chahá ña cha cunyaca ñaha yi ña chi ña. ⁸ Vatyi quivi savaha Nyoo chi rayii, ña savaha ra chi ra chihin yiqui naha ñaha sihi. Soco chihin yiqui naha rayii savaha Nyoo chi ñaha sihi. ⁹ Ta cha catyi rayii, ta chinqo ñaha sihi. ¹⁰ Yucuan chaha ñusihí cuñí chi cunyasi xiñi ñu. Vatyi ican cuan cuví noo seña vatyi nyacá ñaha yi ñu chi ñu. Ta cha cuenda cha vaha chi ángel cuví. ¹¹ Soco tyaa maa Nyoo cuhva vatyi chiñuhú rayii chi ñusihí. Ta chiñuhú ñusihí chi rayii. ¹² Vatyi ndicha ñaha sihi chinqo ña chihin yiqui naha rayii, tari quivi cha sacacu ra chi ña cuví cuan. Soco nya cua nya quivi cuan ta maa ña quichaha sacacu ña chi rayii. Ta nya cua

nya vityin ñusihi ta rayii maa Nyoo chahá cha coo ni nduvi tahan ñu.

¹³Nyehe maa ndo. ¿Atu vaha quetuví cha ña nyasí xiñi ñusihi ta chicán tahvi ñu chichi vehe ñuhu? ¹⁴Vatyi cha chitó ndo vatyi ticahan nuu cuvi chi rayii tatu nañi xiñi ra. ¹⁵Soco ñusihi, vaha cha cunañi xiñi ñu vatyi Nyoo chahá ra ixi nañi chi ñu vatyi casi chi xiñi ñu. ¹⁶Soco tatu yóo cha cuñí cuví yuhu cha catyi tuhun ihya, cuñí chi coto ndo vatyi ni nyuhu ta ni vehe ñuhu Nyoo, ñahri inga costumbre iyó chi ndi.

Nu sañahá ra Pablo chi ñu vatyi ña vaha cuhva chachí ñu Santa Cena

¹⁷Yañi, nonga tuhun cuacatyí chi ndo. Vatyi ña sii cuñí chihin ndo, vatyi ndu ín ri ndo, soco ña chahá chi cha vaha chi ndo. Ta sativí chi chi ndo. ¹⁸Ta cuaha xaan ñáyivi nacatyí chii vatyi cuhva cha ndu ín ri ndo cha cuacoo culto, iyó ndo cha tavá siin ndo chi ndo. Ta suhva ri chinó iñi, ta suhva ña chinó tucu iñi. Soco vasi ndicha. ¹⁹Vasi cuñí chi coo tisihi nu nyicú ndo tacuhva coto yo nya ndo ndicha cha yihí cuenda Nyoo. ²⁰Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan. ²¹Vatyi cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ín ri tahan ndo. Ta yihí ndo cuaha chachí ndo. Ta chiñi ndo chihin vinu. Ta yihí ndo ña ñihí ndihi ndo cha cachi ndo. ²²¿Atu ñahri vehe ndo cachi ndo ta coho ndo? Vatyi cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chi ñu ñahri maa iyó chi. ¿Atu tahán chi catyí chi ndo vatyi vaha cuhva nyacuví ndo, cuñi maa ndo? Ña tahán chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáa tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

²³Vatyi yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda ra Judas chi Sutu Mañi yo chi ra xaan iñi chi ra, ra Jesús quehen ra noo pan. ²⁴Ta cha yahá nacuhva ra tyahvi nyoo chi Nyoo ta tahvi sava ra. Ta catyí ra: “Cachi ndo. Vatyi tari coño ñuhi cuví pan ihya. Ta cha catyi ndo ta cucúvi yuhu. Sacuvi ndo tyehe caa vatyi nicohon iñi ndo chii”, catyí ra Jesús. ²⁵Ta cha yahá cha cacuxiñi ra ta quehen ra Jesús copa ta catyí ra: “Chihin copa vinu ihya natyihí tahan Nyoo tuhun chaa chihin ndo vityin. Vatyi vinu cha yihí chichi copa ihya, niñi cuvi. Tahan ri cuacoho ndo, coho ndo cha cuenda cha nicohón iñi ndo chii”, catyí ra Jesús cha cuaa cuan. ²⁶Ta tahan ri cha ndu ín ri yo ta chachí yo pan ta chihí yo vinu sacotó yo chi ñáyivi vatyi cha catyi cuatyí yo chihí Sutu Mañi yo. Ta tyicuan caa sacotó yo chi ñáyivi nyacua nya quivi quichi tucu ra.

Ra Pablo chahá ra tuhun chi yo yoso caa sacotó yo Santa Cena

²⁷Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyi ña sahá yo ñáyivi coño ñuhu ta niñi ra Cristo. ²⁸Yucuan chaha cuñí chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu. ²⁹Vatyi tatu chachí yo ta chihí yo chihin cha ña sahá yo cuenda ñáa tuhun chihí ra Cristo, Nyoo cutachi tuñi ra chi yo. ³⁰Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo. ³¹Soco tatu sahá

vaha yo cuenda chi yo, Sutu Mañi yo ma tachi tuñi ra chi yo. ³²Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyivi iyó siquí ñuhu ñáyivi ihya.

³³Ta tyicuan caa nyoho yañi, tatu cuandu ñin ri ndo cha cuacoo Santa Cena, cuatu ndo chi noo noo tahan ndo ta cachi ndo ta coho ndo ñin ri. ³⁴Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quívi cha quichi nyehi nu nyicu ndo.

Cha vaha cha chahá Tatyí Ii Nyoo chi yo

12 Yañi, cuñí vatyí coto ndo ñáá ndíhi cha vaha cha chahá Tatyí Ii Nyoo chi noo noo yo.

²Chitó ndo vatyí quívi cha ña ñoho nuu ndo chi Nyoo, chahá ndo chi ndo cha cunyaca ñaha xitohyo cha ña cuví cahan. ³Yucuan chaha cuñí tyi coto ndo vatyí tatu noo ra catyí tyi ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyí tyi ra Cristo cuví Sutu Mañi yo, Tatyí Ii Nyoo yihí chi ra.

⁴Siin siin cha vaha naquehén noo noo yo, soco maa Tatyí Ii Nyoo ican chahá. ⁵Siin siin cuhva sahá tyiño yo soco tyiño nuu noo ri maa Sutu Mañi yo sacuví yo. ⁶Siin siin tunyee ñini chahá ra chi noo noo yo. Soco noo ri maa Nyoo cuví ra chotyíño chi tandíhi yo. ⁷Chi noo noo yo chahá ra tunyee ñini Tatyí Ii ra, tacuhva tyi tyinyeé yo chi tandíhi ñu yihí cuenda ra. ⁸Chi suhva ñu chahá Tatyí Ii Nyoo vatyí cahán ñu chihin cha chíni tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu. ⁹Ta chi inga ñu chahá ra cha chinó vavaha ñini ñu chi ra. Ta suri maa Tatyí Ii ra chahá ra tunyee ñini chi inga ñu vatyí cuví sanduvaha ñu chi ñu cuhví.

¹⁰Ta chi inga ñu chahá ra tunyee ñini vatyí cuví sacuvi ñu milagru. Ta inga ñu chahá cuenda ñu tuhun cahán Nyoo. Ta chi inga ñu chahá ra vatyí cuví cohon nuu ñu Tatyí Ii Nyoo ta tatyí ña vaha. Ta chi inga ñu chahá ra tunyee ñini ra vatyí cuví cahan ñu inga sahan cha ña chitó ñu. Ta chi inga ñu chahá ra tunyee ñini vatyí cuví nacoto ñu ta nacatyí ñu inga sahan cha cahán tahan ñu. ¹¹Soco tandíhi tuhun ihya, noo ri maa Tatyí Ii Nyoo chahá. Soco siin siin cuhva chahá ra chi noo noo yo, yoso cuhva cuñí maa ra.

Chichi cha tandíhi yo ta nduví yo noo ri coño ñuhu ra Cristo

¹²Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandíhi cuan nanduví chi noo ri coño ñuhu. ¹³Ta tyicuan caa tucu tandíhi yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutyá yo vatyí cuví yo noo ri coño ñuhu cuenda ra Cristo. Vatyí noo ri maa Tatyí Ii ra chahá ra tyi quihí chi tandíhi yo.

¹⁴Noo coño ñuhu cuaha xaan cuenda yihí tahan. Ñima minoo ri cuenda. ¹⁵Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi. ¹⁶O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyi catyí chi tyicuan caa ta cusandíhi chi cha cuví chi coño ñuhu. ¹⁷Tyehe ta tandíhi coño ñuhu yo cuví chiti nuu yo, yoso caa cuví cuiñi yo. O tyehe ta tandíhi coño ñuhu yo cuví soho yo, yoso caa cuví tahni yo. ¹⁸Soco Nyoo tyaá ra noo noo cuan nu cuñí maa ra. ¹⁹Tatu ñin cahnu ri caa coño ñuhu yo, ñima coño ñuhu cuví. Ta ña vaha quetuví. ²⁰Soco vasi cuaha cha

nyaá chi yo, vaha quetuví vatyi nyaá tandihi cha cuví coño ñuhu chi yo.

²¹ Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo: “Ña chiñuhú yoho chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.” ²² Ña vaha cha catyí chi tyicuan caa. Vatyi vasi luhlu ri noo coño ñuhu yo cha cuñí maa yo tyi ña chiñuhú chi yo, ican cuan cuví cha chiñuhú ca chi yo. ²³ Ta nu cuñí vaha yo, ican cuan sacuihnó vaha ca yo. Ta nu cuñí maa yo tyi ña tyaqui, ican cuan sacuví ca yo. ²⁴ Ta nu tyaqui ca, ña cuñí chi sacuvii yo. Soco maa Nyoo sandu ñin ri ra coño ñuhu yo, tacuhva vatyi nu cuñí maa yo tyi ña tyaqui, sacahnú ca yo. ²⁵ Tacuhva cha ma cusii coño ñuhu, tahan tahan chi cuñí chi quíhi ñi chi cha catyi inga tahan chi. ²⁶ Tatu suhva coño ñuhu yo nyehé chi tindoho, tandihi ri chi nyehé, ñima noo ri chi. Ta tatu suhva chi cusii cuñí chi, tandihi ri chi ta cusii cuñí chi, ñima noo ri chi.

²⁷ Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo. ²⁸ Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahán Nyoo cuví cuan. Ta cha cu uñi, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhvi, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra. ²⁹ Ña tandihi yo cuví yo apóstol. Ña tandihi yo cuví yo noo profeta. Ña tandihi yo cuví yo ra sañaha. Ña tandihi yo sacuví yo milagru. ³⁰ Ña tandihi yo chahá Nyoo vatyi sanduvahá yo ñu cuhvi. Ña tandihi yo cahán yo inga sahan cha ña chitó yo. Ña tandihi yo cuví nacoto yo ta nacatyi yo ñáá cha cuñí chi catyí noo cha cahán

yo chihin inga sahan. ³¹ Ta nducu ndo cuhva ñaquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

Chahá ra Pablo tuhun chi yo yoso caa tahán chi cha cuñí yo chi ñáyivi

13 Tatu yuhu ta cuví cahin cuaha ri nuu sahan iyó siqui ñuhu ñáyivi ihya, ta cuví cahan tiqui sahan ángel ñandihi, soco tatu ñahri cha cuñí chi Nyoo ta chi ñáyivi, cuví tari noo tambu cha nañi ri maa o noo caa cha chacú ndaxin ri maa. ² Tatu cuví cuhva cuende tuhun cahan Nyoo, o tatu cutuñí ñi tandihi tuhun xehe ca, ta chité tandihi, ta ña cuñí chi Nyoo ta chi ñáyivi, ñahri maa tuhun. Tatu chinó vavaha ñi chi Nyoo nyacua cuví catyi chi ra na tohon ra noo yucu cuan ta natyaa ra inga ityi, ta sacuví ra cha chiquén, soco tatu ña cuñí chi Nyoo ta chi ñáyivi, ñahri ra cuví. ³ O tatu cuhve tandihi cha iyó chii chi ñu ndahvi, ta nyacua cuhva cuende ñáyivi tyi cayu coño ñuhi, soco tatu ña cuñí chi Nyoo ta chi ñáyivi, ñahri maa tuhun.

⁴ Tatu cuñí yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó ñi yo cha chahá Nyoo chi inga ñu, ña cahnu sahá yo chi yo, ta ña yaá yo. ⁵ Tatu cuñí yo chi Nyoo ta chi ñáyivi, ña quíni iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo. ⁶ Tatu cuñí yo chi Nyoo ta chi ñáyivi, ña cusii cuñí yo ñáá ndihi cha ña vaha sacuví ñáyivi. Soco cusii cuñí yo cuenda cha vaha ta cha ndicha. ⁷ Tatu cuñí yo chi Nyoo ta chi ñáyivi, cunyeé yo nyehé yo tindoho sahá ñáyivi. Chinó ñi yo tyi cusacuvi ñu cha vaha. Nyatú yo cha nasama ñu cuhva iyó ñu. Chihin cha cama ñi yo ta cunyeé yo tandihi.

⁸ Cha cuñí yo chi Nyoo ta chi ñáyivi ma ndihi maa, soco coo quivi cha ma

coo ca tuhun cha sahá yo profetizar. Ta ma cahan ca yo inga sahan cha ña chitó yo, ta tandihi tuhun cha chitó xaan yo cundihi. ⁹Vityin chiin ri chitó yo ta chiin ri sahá yo profetizar. ¹⁰Soco quivi quichi ra Cristo, cunduvaha tandihi ta cucoto yo tandihi, ta cundihi tuhun cha chitó yo chiin ri.

¹¹Quivi cu luhlī cahin ta chīçā xiñi tari ra cuatyaa. Soco quivi chahnī sandoj cha nyacuvī tari ra cuatyaa. ¹²Ta tyicuan caa tucu, cuvī yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihi cuui ta cucoto yo, tari ñohó nuu Nyoo chi yo. ¹³Iyó uñi tahan cha ma ndihi maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñi yo chi Nyoo ta chi ñáyivi. Soco chichi cha ninduñi tahan cuan, cha chiñuhú ca chi yo, cha cuñi yo chi Nyoo ta chi ñáyivi.

Nu sañahá ra Pablo yoso caa cahán yo inga sahan cha ña chitó yo

14 Na sañihi yo cuñi yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí li Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuvī cuan. ²Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñi iñi ñu. Vatyí tuhun xehe cuvī tuhun cha cahán yo cha cuenda Tatyí li Nyoo. ³Soco tatu sahá yo profetizar, cutuñi iñi ñu. Ta chahnu ca ñu chihin tuhun Nyoo. Ta tyicuan caa sandunií yo ta sandunyeé ca yo iñi ñáyivi. ⁴Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihi ñu yihí cuenda Nyoo.

⁵Yuhu cuñi vatyí tandihi ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuvī nacoto ndo ñáá tuhun cahán noo tahan ndo chihin inga sahan, nacatyí ndo. Tyicuan ta cuvī tyinyee chi chi tandihi ndo. ⁶Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahín noo cha sanyehe Nyoo chii, o noo cha sacoto ra chii, o noo profesia, o noo cha sañahi chi ndo, tyinyeé chi chi tandihi cuui maa ndo.

⁷Tatu tiví yo noo cutu, o sacuacu yo noo guitarra ta ña quita vaha ndusu cuan sahá yo, ma coto yo ñáá yaa cuvī. ⁸Ta tatu nu iyó cuatyí ta ña tyacú vaha trompeta, yori coto ñáá cuhva tahan chi cañi tahan ra. ⁹Ta tyicuan caa yoó, tatu cahán yo inga sahan cha ña cutuñi iñi ñáyivi, ma coto ñu ñáá tuhun cahán yo. Tari cha cuvī yuhu ri maa yo cuvī cuan. ¹⁰Cuaha xaan nuu sahan iyó ñáyivi ihya. Ta noo noo nuu sahan ta iyó iyó ri cha cuñi chi catyí. ¹¹Soco tatu ña cutuñi iñi sahan cha cahán inga ñáyivi chihin, ma cuvī ndatuhin chihin ñu. Ta ni ri maa ñu ma cuvī ndatuhun ñu chihin yuhu. Cuvī ñu tari ñu inga ñuu cha cuende. ¹²Yucuan chaha nyoho cha cuñi xaan ndo naquehén ndo tunyee iñi cha chahá Tatyí li Nyoo, nducu ndo noo tunyee iñi cha vaha ca cutyinyee chi ñáyivi vehe ñuhu.

¹³Yucuan chaha nyoho cha cahán ndo inga sahan, cacan ndo chi Nyoo vatyí cuvī nacoto ndo ta nacatyí ndo chi tahan ndo. ¹⁴Vatyí tatu nacuatí chi Nyoo chihin noo sahan cha ña cutuñi iñi, espíritu mai cha yihí chichi coño ñuhi ican nacuatú soco cha chiñi tuñi xiñi ña cutuñi iñi chi. ¹⁵Yucuan chaha cuñi chi cacan tahvi chi Nyoo chihin inga sahan. Soco cuñi tucu chi cha cacan

tahvi chi ra chihin sahan cha cutuñí iñi. Ta cuñí tucu chi cha cate chihin sahan cha ña cutuñí iñi, Soco cuñí tucu chi cha cate chihin sahan cha cutuñí iñi yo ñandihí. ¹⁶ Vatyí tatu maa maa ri chihin sahan cha chahá Tatyí Ii Nyoo chuun, sacahnún chi ra, ma cutuñí iñi ñáyivi cha ña chitó ñáá cha cuví cuan. Ta ma cuví sacahnu ñu Nyoo chuhun. ¹⁷ Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyeé chi chí inga ñáyivi vatyí ña cutuñí iñi ñu tuhun cahún. ¹⁸ Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihí nyoho. ¹⁹ Soco chichi vehe ñuhu tahan ca iñi cahín vasi ohon tahan tuhun cha cutuñí iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñí iñi ndo.

²⁰ Chahnu cuhva caca xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuvi ndo. Vatyí cha lee ña nyacuví chi cha quiñi caa. ²¹ Catyí Nyoo nu libru ley ra tyehe caa: “Cucahin chihin ñáyivi ihya chihin yuhu ñáyivi inga ñuu ta chihin inga sahan. Cha ña cutuñí iñi ñu. Soco ni ri tyicuan caa ta ma quichaha ñu chii”, catyí Sutu Mañi yo. ²² Yucuan chaha tuhun cha cahán yo inga sahan cuví chi tari noo seña chí ñu cha ña chino iñi tuhun ra Cristo. Soco tuhun cha sahá yo profetizar, cuví chi cuenda ñu cha chinó iñi chí ra. ²³ Vatyí tatu ndu iñ ri ndo, ta tandihí ndo cahán ndo inga sahan ta quíhvi noo ñu cha ña yihí cuenda Nyoo, cucatyí ñu tyi ña vaha cuñí xiñi ndo. ²⁴ Soco tatu tandihí ndo sahá ndo profetizar, ta quíhvi noo ñu cha ña yihí cuenda Nyoo, o noo ñu ña cutuñí vaha iñi tuhun Nyoo, coto ñu tyi iyó cutatyí ñu cha cuenda tyi cutuñí iñi ñu cha cahán ndo. ²⁵ Ta tandihí cha caa chichi aña ñu cunacoto ñu. Ta nicuiñi chiti ñu ta sacahnu ñu chi Nyoo. Ta catyí ñu

vatyí ndicha ndicha cuii cha nyaá Nyoo chihin ndo.

Yoso caa sacóo yo culto minoo cha cachi minoo cha ndaa

²⁶ Yucuan chaha yañi, tatu cuandu iin ri yo, cuiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuvi chi noo cha chahá tunyee iñi maa Nyoo chi tandihí yo cha yihí yo cuenda ra. ²⁷ Tatu cuacahan yo inga sahan nu ndu iñ ri yo, cuñí chi cahan uvi yo o uñi ri yo, soco noo noo ri yo cahan. Ma cahan yo iin ri. Ta siin ri cuñí chi cha nacatyí noo yo tuhun cahán tahan yo. ²⁸ Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu iñ ri yo. Cahan yo inga sahan soco xehe ri chihin Nyoo tacuhva cuiñi ri maa yo. ²⁹ Tyicuan caa tucu tatu sahá yo profetizar, cahan uvi yo, o uñi ri yo. Ta tandihí ca yo saha yo cuenda tatu vaha cha cahán tahan yo. ³⁰ Soco tatu sacoto Nyoo ñáá noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñí chi sandihí ñu cha cahán ñu tacuhva cuví cahan inga ñu cuan. ³¹ Ta tyicuan caa tandihí ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyí tacuhva cutuhva tandihí ca ndo ta cunii ca iñi ndo. ³² Ñu cha sahá profetizar cuví cuatu noo ñu nya ndihí cahán inga ñu. Vatyí noo ri Nyoo cuví ra cha nyacá ñaha chí noo noo yo. ³³ Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu iin ri ra. ³⁴ Ñusiñi taxi ri na coo ñu. Cuñí chí quichaha ñu chí yii ñu tari catyí ley Nyoo. ³⁵ Tatu ñáá cha cuñí ñu coto ñu, na ndaca tuhun ñu chí yii ñu nya vehe ñu. Vatyí ña vaha

quetuví cha cahán ñusihí nu ndu iín ri yo.

³⁶Tatu siin cuhva chicá xiñi ndo, cuñí chi nicohón iñi ndo vatyí ñima chihin ndo quichahá tuhun Nyoo. Ta ñima nyoho ri naquehén tuhun Nyoo. ³⁷Tatu nya noo ndo cuñí maa ndo vatyí profeta cuví ndo, o tatu cuñí maa ndo tyi Tatyí li saquehén ityi ra chi ndo, cunacoto ndo vatyí cha catyí chi ndo ihya, mandamiento Sutu Mañi yo cuví. ³⁸Soco tatu ña cuñí ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan. ⁴⁰Soco sacuvi ndo tandihí chihin cha ndaa ta chihin cha cachi.

Yoso caa nandoto ra Cristo

15 Vityin yañi, cuñí vatyí nicohon iñi ndo tuhun ra Cristo, cha sacacú chi yo, cha cahin nuu ndo quivi cuan. Ta ican naquehen ndo ta ñi iñi ndo chinó iñi ndo. ²Ta suri cha cuenda tuhun ra Cristo cacú añima ndo tatu cuahán ndo tari cuhva sañahí chi ndo. Soco tatu natyihí caxiin ndo cuahan ndo, ñahri maa tuhun cha chinó iñi ndo chi Nyoo.

³Cha xihna ri sacote tuhun cha cuhve chi ndo. Ta sañahí chi ndo vatyí ra Cristo chihí ra cha catyí cuatyí yo, tari catyí nu libru Nyoo vatyí cucuvi. ⁴Tyicuan ta chicuchí ñu chi ra. Soco nu ndu uñi quivi nandoto ra tari catyí tucu nu libru Nyoo. ⁵Tyicuan ta tuví ra Cristo nuu ra Pedro ta yahá cuan ta nuu ndi uchi uvi tahan ra chicá tyiño ra. ⁶Yahá cuan ta noo chaha tuví ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yahá chihí ñu. ⁷Yahá cuan ta tuví ra nuu ra Jacobo. Yahá cuan ta nuu tandihí ra apóstol.

⁸Ta nu ndihí tuví tucu ra nuu yuhu, cha cuví tari noo ra cuatyaa cha cacú ta ta chaa ca yoo cacú. (Vatyí ta cutuñi ca iñi tuhun Nyoo cuví cuan.) ⁹Vatyí cha nuu tandihí ca ra apóstol cuví yuhu noo cha ñima ri tuhun. Ta ni ña nañé cha cuví apóstol vatyí chicá nyicon xain chi ñu ñohó cuenda Nyoo. ¹⁰Soco Nyoo vaha xaan ñáyivi cuví ra chihin. Ta ñima cha caha ri saha ra tumañi iñi chii cha cuví noo ra chicá tyiño ra. Ta ñihí ca sahá tyiñe ican saha inga ra. Soco ñima mai sahá tyiñe vatyí maa Nyoo nyaá chihin. Ta ican ra sacuví tandihí cuan. ¹¹Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuvi tuhun cha chinó iñi ndo.

Nu sañahá ra Pablo vatyí cha ndicha cuví vatyí cunandoto ñu ndiyi

¹²Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yihí ndo catyí ndo vatyí ma nandoto ñu ndiyi? ¹³Vatyí tatu ma nandoto ñu ndiyi, ni ri ra Cristo ta ña nandoto ra cuví cuan. ¹⁴Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun. ¹⁵Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyí ndi vatyí sanandoto Nyoo chi ra. Ta tatu ña ndicha cha nandoto ñu ndiyi, ña ndicha cha sanandoto Nyoo chi ra Cristo. ¹⁶Vatyí tyehe ta ma nandoto ñu ndiyi, ni ri ra Cristo ta ña nandoto ra. ¹⁷Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo. ¹⁸Ta ñu yihí cuenda ra ta cachihí ñu, cuanaa ri maa ñu cuví cuan. ¹⁹O tyehe ta ihya ri ñáyivi tyinyeé ra Cristo chi yo, ta ma nandoto yo quivi quichi ra, cuví yo noo ñu tondo cha nuu tandihí ca ñáyivi.

²⁰Soco chitó vaha yo vatyí cha ndicha cuví cha nandoto ra Cristo. Ta ican ra

cuví cha nandoto xihna ca mahñu ñu ndiyi. ²¹ Vatyí cha catyí cuatyí ra Adán ta chicoó tuhun chihi. Yucuan chaha tahán chi cúvi yo. Soco cha catyí cha nandoto ra Cristo tahán chi nandoto tucu ñu yihí cuenda ra. ²² Ta tari tandihí ñáyivi chihí cha cuenda ra Adán, tyicuan caa tucu cunandoto tandihí ñu cuenda ra Cristo. ²³ Soco noo noo yo cunandoto yo quívi tahan chi chí yo. Xihna ca ra Cristo nandoto. Yaha cuan ta quívi quichi tucu ra inga chaha cunandoto tucu ñu yihí cuenda ra. ²⁴ Yaha cuan ta cundihí tuhun ñuhu ñayiví ihya ta ma cunyaca ñaha ca ra cuví tyiño nahnu, ta tatyí ña vaha. Vatyí ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra. ²⁵ Vatyí ra Cristo cunyaca ñaha ra nyacua nya quívi cuhva Nyoo cha cuvi chasaha ra chi tandihí ra xaan iñi chi ra. ²⁶ Ta nya nu ndihí, cusanaa ra tuhun chihi. ²⁷ Vatyí cha yaha nacuhva cuenda Nyoo tandihí chi ra Cristo vatyí cunyaca ñaha ra. Soco nu catyí chi vatyí tandihí natyaa Nyoo ndaha ra, cuñí chi catyí vatyí ma cunyaca ñaha ra chi maa Nyoo vatyí ican maa Nyoo natyaa tandihí cuan ndaha ra. ²⁸ Soco quívi saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyí Nyoo cucuvi ra Nyoo cuenda tandihí maa cha iyó.

²⁹ Tatu tyehe ta ña nandoto ñu chihi, ¿ñáá tuhun yihí ñu condutyá ñu tyiño nuu ñu chihí?

³⁰ Ta tyicuan caa tucu mai, tatu ma nandote, ¿ñáá tuhun ndoí vaha cha ndí quívi nyatí tuhun chihi? ³¹ Tandihí quívi nyatí tuhun chihi. Soco ñahri caa vatyí síí cuñí chihin ndo. Vatyí chinó iñi ndo chí Sutu Mañi yo Jesucristo. ³² Ñáá ri tuhun nyehí tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñáyivi: “Na cachi

yo, na coho yo vatyí tyaan isa cúvi yo”, catyí maa ñáyivi cha ña chitó.

³³ Ma cuhva ndo cha sandavi ñaha ñu chí ndo. Vatyí iyó tucu tuhun cha catyí: “Tatu ñu tahan yo quiñi iyó ñu, cuví sativi ñu cuhva vaha cuahan yo.” ³⁴ Saha ndo cuenda cuhva iyó ndo. Ta ma sacuvi ca ndo cha quiñi caa. Vatyí chihin cuhva iyó suhva ndo chité tyi ña ñohó nuu ndo chí Nyoo. Catyí chí ndo tyehe caa vatyí nacoo ticahan nuu nuu ndo.

Nu sañahá ra Pablo yoso caa cusanandoto Nyoo chí yo quívi quichi ra Cristo

³⁵ Soco yihí ndo ndacá tuhun ndo: “¿Yoso caa cunandoto ñu chihi? ¿Ñáá coño ñuhu cucuiso ñu?” ³⁶ ¡Tondo xaan xiñi ndo! ¿Atu ña chitó ndo vatyí tatu tachí yo noo chiti yutun, cuñí chí cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñayiví.) ³⁷ Vatyí cha tachí yo ñima maa tun tachí yo. Soco chiti tun, an cuví ri nuñi, o trigo, o ñáá ndihí ca chiti. ³⁸ Ta cha cañá cuan Nyoo sacuví ra yoso cuhva cuñí maa ra chí noo noo cha cañá cuan. Vatyí siin siin cuhva caa noo noo nuu chiti. ³⁹ Ta tyicuan caa tucu tandihí coño ñuhu, ña in ri caá chí. Siin caa coño ñuhu ñáyivi. Siin caa coño ñuhu cuñí. Siin caa coño ñuhu saa. Siin caa coño ñuhu tiyaca. ⁴⁰ Ta tyicuan caa tucu cha iyó andivi. Siin caa cha iyó yucuan. Ta siin caa tucu cha iyó ñuhu ñayiví ihya. Ta cha iyó nya andivi tyaquí xaan, ta cha iyó siquí ñuhu ñayiví tyaquí tucu cuan soco siin caa. ⁴¹ Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño. ⁴² Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa. ⁴³ Chicuchi yo

noo cha numi ri tyahyu. Soco cunandoto noo cha tyaquí. Tyihi yo noo coño ñuhu pehe chichi ñuhú. Ta cunandoto noo cha nyee. ⁴⁴Vatyí chicuchí yo coño ñuhu yo cuenda ñayiví ihya chichi ñuhu. Ta cunandoto noo cha ñima ca cuenda ñayiví ihya cuví, soco cuenda Nyoo andiví. Tatu iyó coño ñuhu yo ñayiví ihya. Suri coo tucu noo cha ñima ca cuenda ñuhu ñayiví, soco cuenda andiví.

⁴⁵Catyí tuhun Nyoo vatyí ra Adán ra cha chiyo cha xihna ri, chahá Nyoo ñayiví coo ra. Soco ra Adán cu uvi, ra cuví Cristo, cuví ra Tatyí li ta chahá ra noo ñayiví cha ma naa ca maa chi yo. ⁴⁶Yucuan chaha, cha xihna ri tahán chi coo yo chihin coño ñuhu cuatyí yo. Ta yaha cuan ta coo yo cuenda Tatyí li Nyoo. ⁴⁷Rayii cha chingo cha xihna ri, chihin ñuhú chingo ra. Ra cuenda ñuhu ñayiví cuví ra. Ta rayii cu uvi cha cuví Sutu Mañi yo, ra cuenda andiví cuví ra. ⁴⁸Tandihí yo nyisó yo coño ñuhu cha chingo chihin ñuhú, tari coño ñuhu ra Adán. Ta cha cucuiso yo andiví cuví chi tari nyisó ra Cristo ra quichí nya andiví. ⁴⁹Tari ndacú yo chí rayii, ra cha chingo chihin ñuhú, tyicuan caa tucu cundacu yo chí ra Cristo ra quichi nya andiví.

⁵⁰Ta cuñí catyí chí ndo yañi, vatyí coño ñuhu yo ma cuví quihví chí andiví nu nyacá ñaha Nyoo. Noo cha tañi tyehe ri tiví ma cuví quihví noo nu ña tiví. ⁵¹Soco cuñí tyi coto ndo noo tuhun xehe cha yori maa chitó. Vatyí ña tandihí yo cucúvi yo. Soco tandihí yo ta cunasama cuhva caa yo. ⁵²Ta ñin yaha cuii ri, tari noo cha ndahvá nuu ri yo, nu ndihí tiví ángel trompeta. Vatyí cutiví ángel trompeta ta ñu ndiyi cunandoto ñu cha ma cúvi ca maa ñu. Ta Nyoo cunasama cuhva caá ñu. ⁵³Vatyí cuñí chí tyi nasama Nyoo coño ñuhu yo chihin noo cha ma naa ca maa. ⁵⁴Ta quiví cuan nasama coño ñuhu yo ta quehen yo cha

ma tiví maa. Cua cuvi tari catyí nu libru Nyoo tyehe caa:

“Nyoo cuví chasaha ra chí tuhun chíhi.”
⁵⁵Yoho, Tuhun Chíhi, ¿nya nyaa tunyee ñi chhuun vityin vatyí cahñun chí ndi?

¿Nya nyaa cha cua saha ganaun vityin, yoho Tuhun Chíhi?

⁵⁶Vatyí cuatyí yo ican chahá cha cahñi tuhun chíhi chí yo. Ta ley chahnu, ican cuví cha chahá fuerza chí chí. ⁵⁷Soco tyahví nyoo chí Nyoo, yañi. Vatyí sahá ganaa yo siquí cuan cha catyí Sutu Mañi yo Jesucristo.

⁵⁸Yucuan chaha yañi, na cuinanyaa yo chihin Nyoo chihin cha ñi ñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

Chahá ra Pablo tuhun chí ñu Corinto yoso caa tyinyee ñu chí tahan ñu cuenda Nyoo

16 Ta tuhun cha tyinyeé ndo xuhun chí ñu ndahvi, ñu yihí cuenda Nyoo. Cunya cuvi ndo tari catyí chí ñu nyicú tandihí vehe ñuhu ityi Galacia. ²Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihi siin ndo cha tahán chí cuhva ndo chí ñu, yoso cuhva cha chahá Nyoo chí ndo. ³Ta quiví cha quichi, cutachi nya ra cha cuñí maa ndo vatyí cunyaca ra xuhun cuan chihin carta chí tahan yo cha canyicú nya Jerusalén. ⁴Ta tatu tahan tucu chí cuhin, cuhun coyo ra chihin.

Yihí ñi ra Pablo nya ndihí nu cucahan ra tuhun ra Cristo

⁵Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi. ⁶Ta tatu chahá chí cuhva cundoí chihin ndo nyacua nya yahá yoo vichin. Tyicuan ta cuví tyinyeé

ndo chiin chii ta cuhin inga ñuu. ⁷Ña cuñí cha iin yaha ri yahi nu nyicu ndo. Vatyí cuñí ndoi suhva quívi chihin ndo tatu Sutu Mañi yo ta cuñí ra. ⁸Soco cun-yai ñuu Éfeso ihya, nyacua nya yaha quívi cha sanducahnú ñu Israel vico Pentecostés. Tyicuan ta quichi nu nyicu ndo. ⁹Cundoí suhva ihya vatyí vasi cuaha xaan ñáyivi ña cuñí nyehe ñu tuhun Nyoo, soco chahá xaan chi cuhva cahín tuhun Nyoo chihin ñáyivi ñuu ihya.

¹⁰Tatu chaa ra Timoteo, na cunyaa ra chihin ndo. Ta vaha tyíñuhu ndo chi ra. Vatyí sahá tyiño tucu maa ra cuenda Sutu Mañi yo tari mai. ¹¹Ta vaha çoó iñi ndo nyehé ndo chi ra. Ta tyínyee ndo chiin chi ra tyi quichi ra nu nyaí. Vatyí nyatí chi ra chihin inga yañi yo.

¹²Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñí ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihi ñu yihí cuenda Nyoo ñuu Corinto

¹³Sañihi ndo chinó ca iñi ndo chi Nyoo. Ta cunii iñi ndo ta nacoo vaha fuerza Nyoo chi ndo. ¹⁴Tandihí cha sacuví ndo, sacuví ndo cha cuenda cha cuñí ndo chi Nyoo ta chi tahan ndo.

¹⁵Chitó ndo yañi vatyí ñáyivi chi ra Estéfanos xihna ca ñu chinó iñi tuhun ra

Cristo ityi Acaya chiña. Ta vityin sacuví ñu tyiño nuu ra hermano. ¹⁶Ta catyí chi ndo vatyí saha ndo ñáyivi chi ñu cha iyó tari iyó ñu chiña, ta chi tandihí ñu cha tyinyeé ta sahá tyiño cuenda Nyoo. ¹⁷Ta cusii xaan cuñi cha quichi coyo ra Estéfanos ta ra Fortunato ta ra Acaico. Vatyí maa ra catyinyeé ra chi ndi. Vatyí tandihí ndo ña cuví quichi ndo vatyí cañi xaan ñuu ndo. ¹⁸Soco maa ra quichi coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha çoó iñi ndo nyehé ndo tyiño casacuví ra. Vatyí maa ra iin ri chi Nyoo canyicón ra.

¹⁹Ta vachí nocumi chi ndo sahá tandihí yañi yo ta tahan yo cha ndu iin ri ityi Asia ihya. Ta vachi tucu nocumi chi ndo sahá ra Aquila ta cu Priscila, ta ñu yihí cuenda Nyoo cha ndu iin ri vehe ñuhu nu cuví vehe ñu. ²⁰Vachi nocumi chi ndo sahá tandihí yañi yo, ta nacuhva maa ndo nocumi chi noo noo ndo nu ny-icú ndo chiña.

²¹Nocumi cha vachí chi ndo ihya, yuhu ra Pablo tyai chihin ndahi.

²²Tatu nya ñáyivi ña cuñí chi Sutu Mañi yo Jesucristo, nacuhun ñu anyaya. Soco yuhu catyí: ¡Sutu Mañi yuhu, ñaha!

²³Ta nasoco Sutu Mañi yo Jesucristo chi tandihí ndo. ²⁴Ta catyí chi ndo vatyí yuhu cuñí chi tandihí ndo cha cuenda ra Cristo Jesús. Ta nacuví chi tyicuan caa.

Carta Cha Cu Uvi Sacuhún Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu sacuhún ra Pablo noo tutu chi ñu ñuu Corinto cha yihí cuenda Nyoo

1 Yuhu ra Pablo, cuví noo ra apóstol ra Jesucristo vatyi Nyoo nacachí vaha ra chii. Ta yuhu ta ra Timoteo yañi yo tyaá ndi noo tutu ihya chi ndo cha cuví ndo ñáyivi ñuu Corinto cha yihí cuenda Nyoo, ta chi tandíhi ñu yihí cuenda Nyoo nicacahnu ityi Acaya chiña. ²Nyoo Sutu yo ta Sutu Mañi yo Jesucristo na nasoco ra chi ndo ta nacuhva ra cha taxi ri coo añima ndo.

Nu chicá noo ra Pablo sacotó ra tuhun ra Cristo nyehé xaan ra tindoho

³Na sacahnu yo chi Nyoo Sutu Sutu Mañi yo Jesucristo. Vatyi ican ra cuví Nyoo Sutu yo. Ta cundahvi xaan cuñi ra nyehé ra chi yo. Ta maa ra tyicuan ri naquehén ndahvi ra chi yo. ⁴Ta cuhva cha nyehé yo tindoho maa ra naquehén ndahvi ra chi yo. Vatyi tyicuan caa ta cuví naquehen ndahvi tucu maa yo chi ñu nyehé tindoho tari naquehén ndahvi tucu maa ra chi yo. ⁵Vatyi cha cuenda ra Cristo, nyehé xaan ndi tindoho ta suri cha cuenda ra Cristo naquehén ndahvi xaan Nyoo chi ndi. ⁶Tatu nyehé ndi tindoho cha cuenda cha sacotó ndi tuhun ra Cristo chi ndo, soco cha cuenda cha vaha chi ndo cuví vatyi tyicuan ta Nyoo naquehen ndahvi tucu ra chi ndo, ta sacacu ra chi ndo. Ta tatu Nyoo ta sandunyeé ra iñi ndi, cuví tucu chi cha cuenda cha sandunyeé tucu ra iñi maa ndo ta cacu ndo, ta siin ri tacuhva cha cunyeé ndo tindoho cha nyehé ndo. Vatyi iin ri tindoho nyehé yo. ⁷Vatyi chitó vaha ndi tatu nyehé ndo tindoho cha cuenda ra Cristo tari cha nyehé

nyuhu, maa ra cunaquehen ndahvi ra chi ndo, tari naquehén ndahvi tucu ra chi nyuhu.

⁸Yañi, cuñi ndi tyi coto ndo vatyi cuaha xaan tindoho nyehé ndi ta chinyaa ndi ityi Asia. Ñihi xaan chiyo tindoho nyacua cha ñahri ca fuerza ndi cahvi iñi ndi. Ta tyaá ndi cuhva vatyi cha yahá chihí ndi ta quita ndi yucuan. ⁹Cuñi maa ndi vatyi cha cha cuacúvi ndi. Ta ña cuví sacacu ndi chi ndi. Soco yucuan saña-há chi chi ndi na nachinó ca iñi ndi chi Nyoo ra sanandotó ndiyi. ¹⁰Nyoo sacacu ra chi ndi ndaha tuhun chihí quivi cuan, ta sacacú ca ra chi ndi nya vityin. Ta chitó ndi vatyi tyicuan ri cusacacu maa ra chi ndi. ¹¹Tatu tyinyeé ndo chi ndi chihin cha chicán tahvi ndo chaha ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chi Nyoo cha cuenda tyi ñihí ñu tuhun tyi Nyoo chahá ra cha vaha chi ndi, vatyi chicán tahvi ñu chaha ndi.

Nu nacatyí ra Pablo ñáá tuhun ña chaá ñaha ra ñuu Corinto

¹²Iyó noo tuhun cha cusii xaan cuñi ndi, vatyi yoso ri sandaví ñaha ndi. Vatyi cachi cuhva iyó ndi. Ta ndaa cuhva iyó ndi xihna ca chihin tandíhi ri ndo, ta chihin inga ñáyivi ñandíhi. Ta ñima chihin cha chíni tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chi ndi. ¹³⁻¹⁴Ta nu tutu cha sacuhún ndi chi ndo, maa maa ri tuhun cha cuví sacuaha ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandíhi tuhun cuan. Tacuhva cusii cuñi ndo chihin ndi quivi quichi Sutu Mañi yo. Ta cusii cuñi tucu maa ndi chihin ndo.

¹⁵⁻¹⁶Ta cha cuenda cha cusif iñi yo tyehe caa, tyai cuhva quivi cuan cha cuhun xihne nu nyicú ndo. Yihí iñi cha cuhin nu nyicú ndo, quivi cha yahí cha

cuahín nya Macedonia ihya. Ta quivi cha nayaha tiqui cha chahin Macedonia, cuhin inga chaha nu nyicú ndo. Tyicuan caa ta cuvi cusii ini ndo chihin yuhu uvi chaha, tyai cuhva. Ta tyicuan caa ta cuvi tyinyee ca ndo chii ta cuhin ityi Judea. ¹⁷O cuñi maa ndo vatyí ña tyai cuhva cha cuhin nu nyicu ndo. Ta vasi cuñi maa ndo vatyí sacuví tari ñayivi iyó siqui ñuhu ñayivi ihya. Vatyí catyí ñu tyi cuhun ñu, ta ña sacuví ñu. ¹⁸Maa Nyoo chitó ra vatyí ndicha cha cahín. Ta ña tuhvé sandavi ñahi. ¹⁹Vatyí yuhu ta ra Silvano ta ra Timoteo cahán ndi chihin ndo. Vatyí tuhun maa ra Cristo maa maa ri tuhun ndicha cuví. ²⁰Tyi cha cuenda maa ra ñihí yo tandihi cha vaha cha catyí Nyoo tyi cucuhva ra chi yo. Yucuan chaha cuhva cha sacahnú yo chi Nyoo, o chicán tahvi yo chi ra, catyí yo: “Amén”. Vatyí chitó yo tyi cuacuhva ra cha vaha chi yo cha cuenda ra Cristo. ²¹Ta Nyoo sanduní ca ra ini yo nu sandu in ri ra chi yo chihin ra Cristo. Ta nacachi ra chi yo. ²²Ta tari cha tyaa ra tuñi ra chi yo cuví cuan. Vatyí chaha ra Tatyí li ra quihí aña yocha cuenda cha cuñihi ca yo ñáa ca cha cucuhva ra chi yo.

²³Na naquehen Nyoo chii vityin ri tatu ña ndicha tuhun cua catyí chi ndo. Ta cuhun que nu nyicú ndo Corinto chiña vatyí tatu cuhin tyai cuhva cha cahín chiin chi ndo. Yucuan chaha ña cuñi ñahi cuhin vatyí nacuaan ini nyehí chi ndo. Ta Nyoo chiñi ra vatyí ndicha cha cahín. ²⁴Ñima cha cuñi ndi cunyaca ñaha ndi chi ndo yoso cuhva chinó ini ndo chi Nyoo. Vatyí chinó vaha ini ndo. Soco cha cuñi ndi tyinyee ca ndi chi ndo na coo ca tusii ini maa Nyoo aña ndo.

2 Yucuan chaha ña cuñi quichi tiqui nu nyicu ndo coto cuhva que tucuihya ini chi ndo. ²Vatyí tatu yuhu ta sanducuihyé ini ndo, yori ca cuví sandusii ini mai. Vatyí ma cuvi ca sandusii ndo ini tatu cha yaha sanducuihyé ini ndo.

³Yucuan chaha sacuhin tuhun cuan chi ndo. Vatyí tatu cuhin soco ma sanducuihya ndo ini chihin cuhva iyó ndo. Vatyí tahán chi sandusii ndo ini. Ta tatu sii cuñi yuhu, chité tyi tandihi yo ta cusii ini yo. ⁴Quivi cha tyai carta cuan chi ndo, chica xaan chiñi. Ta nducuihya xaan ini nyacua chaqui. Soco ñima cha sacuhin carta cuan chi ndo vatyí cuñi cha nducuihya ini ndo. Soco vatyí coto ndo vatyí yaha xaan cuñi chi ndo.

Nu chahá ra Pablo tuhun chi ñu yoso caa saha ñu ticahnu ini

⁵Tucuihya ini cha chaha ra chiña, ñima in ri chi yuhu chaha ra. Chaha tucu ra chiin chi tandihi nyoho ñandihí. Catyí tyehe caa tacuhva cha ma yaha xaan cahín. ⁶Vaha ri, cha iyó vaha. Ma cahan ca ndo chi ra. Ma tachi tuñi ca ndo chi ra. ⁷Ta vityin tahán chi vatyí saha ndo ticahnu ini chi ra. Ta naquehén ndahvi ndo chi ra, coto yaha xaan nducuihyá ini ra. ⁸Yucuan chaha catyí chi ndo sañaha ndo cha cuñi ndo chi ra. ⁹Sacuhin carta cuan chi ndo quivi cuan vatyí cuñi cote tatu sacuví ndo cuhva chahí chi ndo. ¹⁰Ta vityin tatu sahá ndo ticahnu ini, sahá tucu yuhu ticahnu ini yóo cha chahá tisihi chi yo. Tatu ndicha cha chahá ra tisihi chii. Soco sahí ticahnu ini chi ra cha cuenda cha vaha chi nyoho. Vatyí yucuan cuhva cuñi maa ra Cristo. ¹¹Vatyí chitó yo vatyí tatu ma saha yo ticahnu ini chi tahan yo, cuhna cutyihí ra cha quini caa aña yo. Vatyí maña xaan ra. Ta cuví sacaño tahan ra chi yo.

Ña ndoo ra Pablo ñuu Troas vatyí ña nañihí ra chi ra Tito

¹²Quivi chai ñuu Troas cha cuacahin tuhun ra Cristo, chahá chi cuhva cha sahá tyiñe tyiño nuu Sutu Mañi yo yucuan. ¹³Soco ña sii maa cuñi añaime. Vatyí ña nañihí chi yañi yo, ra Tito. Yu-

cuan chaha ña ndoo que ñuu cuan cahin chihin ñu. Ta vachi ityi Macedonia ihya.

Cahán ra Pablo tuhun ra Cristo chihin cha ñi ñi ra

¹⁴Soco tyahvi nyoo chi Nyoo vatyi ty-
icuan ri sahá ganaa yo chihin fuerza
ra Cristo Jesús. Vatyi sacotó yo tuhun
ra chi ñáyivi. Ta tuhun ra cha cahán
yo, cuví chi tari noo xico vixi chahan
cha caña tandihi ri ityi nu cuahán yo.
¹⁵Ta yoó cuví yo tari noo xico vixi cha
chahá cuenda ra Cristo chi Nyoo. Ta
caña xico cuan mahñu ñu cha cucacu
añima, ta mahñu ñu cha ma cacu añima
ñandihí. ¹⁶Soco cha cuenda ñu cha ma
cacu añima cuan, quiñi chahán, tari noo
xico ndiyi cuví tuhun cha sacotó yo chi
ñu, cuñí maa ñu. Vatyi sacotó yo yoso
caa cucuvi ñu vatyi ña chinó ñi ñu chi
ra Cristo. Soco cha cuenda ñu cha cacú
añima, vixi xaan chahán, Vatyi sacotó
yo yoso caa coo ñu ñayivi cha ma naa
ca maa. Soco ¿yoó cha cuví sacuvi tyiño
ihya? ¹⁷Nyuhu ña sacuví ndi tari sacuví
cuaha ra cachicá noo. Ra cuan cuñí ra
xuhun. Tuhun ra Cristo ñima noo cha
xicó yo cuví. Soco cahán ndi chihin cha
ñi ñi ndi tuhun ra vatyi ñi ri cuví ndi
chihin ra, ta Nyoo ta ra Cristo tachí ra
chi ndi.

Tuhun chaa cha quichi cacun ra Cristo

3 Ta cha cahán ndi tuhun ihya, ¿atu
cha cuñí ndi sayaa ndi chi ndi, cuñí
maa ndo? Ñima tyicuan caa. Ta yoó ¿atu
chiñuhú cha cuiso yo tutu cha catyí chi
vatyi vaha ñáyivi cuví yo, tari tuhva inga
ra canyiso? Ñima. ²Vatyi nyoho cuví
ndo carta ndi cha tyaá Nyoo añima ndi.
Vatyi cuví nyehe ñáyivi yoso caa nasama
Nyoo cuhva iyó ndo. Ta coto ñu tyi maa
maa ri cha vaha sañahá ndi chi ndo. ³Ta
cachi nyehé ñu tyi cuví ndo carta cha
tyaa ra Cristo vatyi nyehe ñu, ta nyuhu

nacuhva cuenda ndi carta cuan chi ñu.
Ta ñima chihin tinta tyaá Tatyí li Nyoo
nyitó añima ndo. Ta ni ñima nu yuu
chicunyaa.

⁴Cahán ndi tyehe caa vatyi chitó ndi
vatyi Nyoo cuacuhva ra cha quita vaha
tyiño sahá ndi. Vatyi tyinyeé ra Cristo
chi ndi. ⁵Ma caña ñi ndi caca xiñi ndi
tyi iyó tunyee ñi maa ndi cha sacuví
ndi ñáá cha sacuví ndi. Soco tandihi cha
sacuví ndi maa Nyoo sacuví. ⁶Maa Nyoo
chahá ra tunyee ñi ra chi ndi, ta sacotó
ndi tuhun chaa cha natyihí tahan ra
tuhun chihin yo. Vatyi Tatyí li ra chahá
ñayivi chaa coo yo. Ta ley chahnu cuan
cha chahá Nyoo chi ra Moisés, sacuhún
chi chi yo anyaya vatyi ña cuví quichaha
yo tandihi ley cuan.

⁷Ley chahnu cuan, chicunyaa chihin
letra chata yuu ta cha naha. Ta cuhva
cha chaá ra Moisés chihin cuan, tyaqui
xaan xiño nuu ra nyacua nayuhví ñu Is-
rael nanyehé ñu nuu ra. Soco suvita ri
tyi cha tyaqui cuan numi ri ndihí. Soco
tatu tyaqui cuví cuan, ⁸tyaqui ca cuví
tuhun chaa cha quichí nyaca Tatyí li
Nyoo chi yo. Tyaqui xaan ca cuan. ⁹Tatu
ley chahnu cha sacuhún chi yo anyaya,
tyaqui xaan cuví, nyaca cuví tuhun cha
saváha chi yo nuu Nyoo. Tyaqui xaan
ca cuví cuan. ¹⁰Vatyi ley chahnu tyaqui
xaan cuví quivi cuan, cuñí maa ñáyivi.
Soco vityin chitó yo tyi ña tyaqui xaan
cuví. Vatyi tyaqui xaan ca maa tuhun
ra Cristo cha sacacú chi yo nuu Nyoo.
¹¹Vatyi tatu tyaqui xaan cuví cha ñi
yaha ri chiyo, nyaca cuví noo cha ma
ndihí ca maa.

¹²Chitó ndi tyi ma naa cuan. Yu-
cuan chaha cahán ndi chihin cha ñi ñi
ndi. Ña cahán nuu ndi ta ña yuhví ndi.
¹³Ña sacuví ndi tari sacuví ra Moisés.
Vatyi chasí ra nuu ra chihin noo sahama,
tacuhva cha ma nyehe ñu Israel nu cu-
naa cha xiño cuan. ¹⁴Soco quivi cuan
ña cutuñí ñi ñu. Ta nyacua nya vityin

ta ña cutuñí iñi ñu. Vatyí tatu sacuahá ñu ley cuan tari quiví cha nyasí nuu ñu. Vatyí ña cutuñí iñi ñu. Soco noo tuhun ri maa ra Cristo nuñá ra nuu yo. ¹⁵ Ta nyacua nya vityin tatu sacuahá ñu Israel ley ra Moisés, ña cuví cutuñí iñi ñu. Vatyí tari noo cha nyasí nuu ñu. ¹⁶ Soco tatu nacuhvá ñu aña ñu chi Sutu Mañi yo, maa ra cunuña ra nuu ñu. ¹⁷ Vatyí Sutu Mañi yo, Tatyí li cuví ra. Ta tatu nyaá Tatyí Ii Sutu Mañi yo aña yo, sacotó ra chi yo tyi ña nyacá ñaha ca ley chahnu chi yo. ¹⁸ Yucuan chaha tandihí yo ña nyasí ca nuu yo. Ta vityin cuví yo tari noo ino, tacuhva cuví nyehe ñáyivi cha vaha Sutu Mañi yo. Ta cuahán ndu-vaha ca yo yoso cuhva sacuví Tatyí Ii Sutu Mañi yo chi yo.

4 Yucuan chaha ma ndu uvi maa iñi ndi, vatyí Nyoo nyehé ndahvi ra chi ndi. Ta tyaa tyiño ra chi ndi tyi cahan ndi tuhun ra chihin ñáyivi. ² Ña sacuví ndi cha xehe vatyí ticahan nuu cuví cuan. Ña chicá noo ndi sandaví ñaha ndi chi ñáyivi. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi nuu tandihí ñáyivi, na saha vaha ñu cuenda vatyí maa maa ri cha ndicha sañahá ndi. ³ Nyuhu ña tyihí xehe ndi tuhun Nyoo. Soco cha cuenda chi ñu cha cua cunaa ñohó xehe. ⁴ Cuihna, ra nyacá ñaha cha quiñi caa ñuhu ñáyivi ihya, ican ra chasí cha chiñi tuñi xiñi ñu cha ña chinó iñi chi Nyoo. Vatyí coto nyehe ñu cha ndichin Nyoo. Ta coto cutuñí iñi ñu yoso caa sacacú ra Cristo chi yo. Vatyí ra Cristo nyitó ra ta cuví ra xiñahñu Nyoo. ⁵ Cuhva cha cahán ndi chihin ñáyivi, ña cahán ndi tuhun maa ndi. Soco sacotó ndi tyi ra Jesucristo cuví ra Sutu Mañi yo. Ta nyuhu cuví ndi noo musu ndo cha catyi cha cuñí ndi chi ra. ⁶ Vatyí suri maa Nyoo catyi vatyí na ndundichin nu ñaa iñi quiví chinó ñuhu ñáyivi. Ican ra chahá ra cha

ndichin coo aña yo, tacuhva vatyí chihin cha ndichin cha chahá ra Cristo chi yo, cuví cutuñi ca iñi yo tyi cahnu xaan ca cuví maa Nyoo.

Chihin cha chinó ri iñi yo chi Nyoo coo yo noo ñáyivi chaa

⁷ Coño ñuhu yo cuví tari noo quisi ñuhú, vatyí noo cha ñima ri tuhun cuví. Vatyí tyicuan caa ta cuví nyehe ñáyivi tunyee iñi cha cahnu xaan cha iyó chi yo, maa Nyoo chahá, ta ñima tunyee iñi maa yo cuví. ⁸ Yucuan chaha vasi iyó tisihi tandihí ri ityi nu cuahán ndi, soco ña ndu uví iñi ndi. Vasi ña cutuñí iñi ndi tandihí cha cuví chi ndi, soco chitó ndi tyi quitá vaha ndi. ⁹ Vasi chicá nyicon ñu chi ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chi ndi soco ña chihí ndi. ¹⁰ Tandihí ri ityi nu cuahán ndi ta nyatú ndi tuhun chihi cha catyi tuhun ra Jesús. Vatyí yucuan cuhva nyehé ñu tyi iyó ndi ñáyivi chaa cha chahá ra chi yo. ¹¹ Vatyí nyuhu tandihí quiví, cha yatyin cúvi ndi cha cuenda ra Cristo tacuhva cuví nyehe ñáyivi vatyí yihí ñáyivi ra Cristo aña ndi. ¹² Nyatú ndi tuhun chihi cha cuenda cha cahán ndi tuhun Nyoo. Soco cha tyehe caa, nañihí ndo ñáyivi chaa.

¹³ Chinó iñi ndi chi Nyoo tari chingo iñi ra David. Ta tyaa ra nu libru Salmos: “Chinó iñi chi Nyoo, yucuan chaha cahán tuhun ra”, catyi ra David. Ta tyicuan caa tucu nyuhu. Chinó iñi ndi chi Nyoo. Ta yucuan chaha cahán ndi tuhun ra. ¹⁴ Vatyí chitó ndi vatyí Nyoo ra sanandoto chi Sutu Mañi yo Jesucristo, cusandoto tucu ra chi yo. Ta iin ri chihin nyoho, cunyaca ra chi yo nya gloria nu nyaá ra. ¹⁵ Tandihí ihya cuví cha vaha chi maa ndo ta chi inga ñáyivi. Vatyí cuaha cha vaha Nyoo cuñihi ndo. Ta cuaha ndo nacuhvá ndo tyahvi nyoo chi ra, ta sacahnú ndo chi ra.

¹⁶Yucuan chaha ña ndu uví maa iñi ndi. Vasi coño ñuhu ndi cha cuahán sandihí xaan chi. Soco ñayiví chaa cha iyó ndi cuahán nduchaa chi tahan tahan quivi. ¹⁷Tindoho cha nyehé ndi ñayiví ihya, tindoho iin yaha ri cuví. Vatyí chahá chi cha cunañihí ndi noo nu vaha ca cha ma ndihí maa nu nyaá Nyoo. ¹⁸Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñayiví ihya, ña naha maa chiyo. Soco cha ña cuví nyehé yo, yucuan cuví cha ma ndihí ca maa.

5 Ta chitó ndi vatyí quivi cúvi yo, coño ñuhu yo cunaa chi. Vatyí cuví chi tari noo vehe cha ña naha maa chiyo. Soco Nyoo cumí ra noo nu cunyaa añima yo, noo cha ma naa ca maa nya andiví. Ta ñima cha cacú chihin ndaha rayii ñayiví ihya cuví. ²Ndicha, cha ni ri ca cha iyó yo chichi coño ñuhu yo, nducuihyá xaan cuñí yo, vatyí nyatú tuhva yo nicoo yo chichi cha chahá Nyoo chi yo nya andiví. ³Vatyí cohon añima yo chichi cha chahá Nyoo tacuhva cha ma cuvityiaá yo. ⁴Cha ni ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyí ña cuñí yo quita ri maa añima yo chichi coño ñuhu cuan ta cuvityiaá chi. Soco cuñí yo cha coo añima yo chichi cha ma naa ca maa nya andiví ta tyicuan ri maa cuacoo yo. ⁵Ta Nyoo tyaa ra cuhva vatyí tyehe caa cucuvi chi yo. Ta chahá quiyi ri ra Tatyí Ii ra chi yo. Vatyí tacuhva coto yo tyi cuví naquehen ca yo tandihí ca cha cuacuhva ra chi yo.

⁶Ta yucuan chaha ma yuhvi yo cha cúvi yo. Vatyí chitó yo tyi cha ni ri ca cha iyó yo chichi coño ñuhu ihya ñayiví, ña yatyin nyaá yo chihin Sutu Mañi yo andiví. ⁷Vityin ña cuví nyehe yo chi ra, soco chihin cha chiñó ri iñi yo chi ra, iyó yo ñayiví ihya. ⁸Soco yihí vaha iñi yo chi ra ta cha cuñí yo quita yo chichi

coño ñuhu ihya vatyí cuhun yo cucunyaa yo chihin Sutu Mañi yo. ⁹Yucuan chaha sañihí ca ndi nducú ndi cuhva yoso caa cha tahan iñi Sutu Mañi yo sacuví ndi. Cuví ri cha iyó ca ndi chihin coño ñuhu ñayiví ihya. O cuví ri cha yori ca ndi, vatyí cha nyaá ndi chihin Sutu Mañi yo nya andiví. ¹⁰Vatyí tahan tahan yo ta cuhun yo nuu ra Cristo cucuhva yo cuenda nu nyaá cutuñi chi yo nuu ra. Ta cuñihí yo cha tahán chi chi yo, yoso cuhva cha vaha o cha ña vaha cha sacuvi noo noo yo quivi chiyo yo chihin coño ñuhu yo ñayiví ihya.

Nu sacotó ra Pablo yoso caa nicoo vaha yo chihin Nyoo

¹¹Vatyí chitó ndi vatyí Sutu Mañi yo cutachi tuñi ra chi ndi tatu ma sacuvi ndi tuhun cahán ra. Yucuan chaha nducú ndi cuhva cahán ndi chihin ñayiví na nacuhva cuenda ñu chi ñu chi Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandihí. ¹²Ñima cha cuñí ndi cuyaa ndi chihin cha cahán ndi tyehe caa, soco cha cuñí ndi vatyí nichohón iñi ndo vatyí tuhun ndicha sacotó ndi, ta cuví cusii iñi ndo chihin ndi. Ta cuñihí ndo cuhva cahán ndo chihin inga ra cha sacahnú chii. Catyí ra tyi vaha iyó ra, soco ñima cha ndicha caa añima ra. ¹³Tatu ña vaha cuñí xiñi ndi, cuñí maa ñayiví tyi cahín tuhin tyehe caa, soco cha cuenda maa Nyoo. Soco tatu vaha cuñí xiñi ndi, ta cachi tuhun cahán ndi, soco cha cuenda tyi cuñí ndi tyinyeé ndi chi ndo. ¹⁴Soco saniñí ndi chi ndi cha sacotó ndi tuhun ra Cristo chi ñayiví. Vatyí chitó ndi tyi cuñí xaan ra chi ñu. Ta chitó ndi tyi chihí ra cha catyí cuatyí tandihí cuii maa ñayiví. Ta yucuan chaha chihi tucu yo cha ma sacuvi ca yo cha ña vaha cha chinyacuví yo nu quichí chi. ¹⁵Ra Cristo chihí ra cha catyí tandihí yo vatyí tacuhva cha ma coo ca yo cuhva cuñí maa yo. Coo yo soco

cuhva cuñí maa ra. Vatyí chihí ra ta nandoto ra cha cuenda yo. ¹⁶Cha cuhva cha vityin, tatu nyehé yo chí noo ñáyivi, ma caca xiñi yo nyehe yo chí ñu tari chicá xiñi ñáyivi cha ña ñohó nuu chí Nyoo. Noo quívi tyicuan caa chicá xiñi vatyí ra Cristo cuví ra noo ra ñuhu ñáyivi ri. Vityin ña chicá ca xiñi tyicuan caa. ¹⁷Vatyí quívi nacuhva cuenda yo chí yo chí ra Cristo, maa ra sanduchaa ra añima yo. Ta tandíhi tuhun cha chicá xiñi yo nu quichí chí, ña chicá ca xiñi yo vityin. Vatyí maa ra nacuhva ra nonga cha chiñi tuñi chaa chí yo.

¹⁸Ta tandíhi ihya maa Nyoo sacuvi, vatyí sanicoo vaha ra chí yo chihin ra cha cuenda maa ra Cristo Jesús. Ta catyí ra chí yo vatyí na sacoto yo chí ñáyivi vatyí Nyoo cuñí ra cha nicoo vaha ñu chihin ra. ¹⁹Vatyí chihin cha chihí ra Cristo cha catyí cuatyí yo, ñáyivi nicoo vaha ñu chihin Nyoo. Ta Nyoo sahá ra tuhun tyi ñahri ca cuatyí ñu. Ta chí nyuhu, catyí ra vatyí sacotó ndi tuhun ihya chí ñu. ²⁰Ta vityin cuví ndi ra chicá tyiño ra Cristo. Ta tari cha maa Nyoo chacú ndahvi nuu ndo, vatyí tyiño maa ra chicá ndi. Ta yucuan chaha chacú ndahvi ndi nuu ndo chihin sívi ra Cristo, na nicoo vaha ndo chihin ra. ²¹Ra Cristo ña sacuvi ra ni minoo cuatyí. Soco Nyoo tachí ra chí ra síqui ñuhu ñáyivi ihya, quichí cúvi ra tari noo ra iyó cuatyí cahnu. Tacuhva vatyí cuví sacacu ra chí yo. Ta cha cuenda maa ra Cristo saha Nyoo tuhun tyi vaha yo nuu ra.

6 Yañi, ñin ri tyiño Nyoo sacuví yo. Yucuan chaha chacú ndahvi xaan ndi nuu ndo vatyí ma coo ndo tari cha ña ñohó nuu ndo Nyoo. Cotyño ndo tandíhi cha vaha cha chahá ra chí noo noo ndo. ²Vatyí catyí Nyoo nu tutu tyehe caa: Quívi tahan chí tyi sacaqui chuun, yuhu chiñi nu cahun ta tyinyeí chuun, catyí Nyoo.

Saha ndo cuenda tyi vityin cuví quívi tahan chí. Vityin cuví quívi sacacú Nyoo chí yo.

³Nducú xaan ndi cuhva cha ma nyehe nyaa ñáyivi tyiño Nyoo cha sacuví ndi, coto ma chino ñiñi ñu chí Nyoo. ⁴Soco cuñí ndi vatyí nyehé ñu vatyí ndicha cha cuví ndi musu Nyoo vatyí cunyeé ndi ñáá ndihi cha cuví chí ndi, tandíhi tindoho, tandíhi tisihi. ⁵Vasi cañi ñáyivi chí ndi, vasi tyihí ñu chí ndi vehe caa, vasi canachaá ityi ñu síqui ndi, soco cunyeé xaan ndi. Ta ñihi xaan sahá tyiño ndi nyacua ña quixí ndi. Ta yahá ndi soco.

⁶Ta tandíhi maa ihya cunyeé ndi vatyí ndicha ndicha cuii cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chihí ndi tisihi tandíhi cha cuví chí ndi. Ta vaha ñáyivi cuví ndi. Ta cuñí ndi chí ñáyivi. Ta nyaá maa Tatyí Ii Nyoo chihin ndi. ⁷Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandíhi cha vaha cha chahá maa ra chí ndi, tacuhva cuví chasaha ndi chí ra ña vaha. ⁸Iyó quívi cuñi nyehe ñáyivi chí ndi. Ta iyó quívi ña cuñi nyehe ñu chí ndi. Iyó quívi vaha cahán ñu síqui ndi. Ta iyó quívi quiñi cahán ñu síqui ndi. Iyó chaha catyí ñu vatyí ra cuendu cuví ndi. Soco maa maa ri cha ndicha cahán ndi. ⁹Sahá ñu chí ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chí ndi. Iyó quívi cha yatyin ri cúvi ndi, soco iyó ca ndi. Ta iyó quívi tachí tuñi ñu chí ndi, soco ña chihí ndi. ¹⁰Vasi iyó quívi cha nducuihyá ñiñi ndi, soco tyicuan ri síi cuñi ndi. Vatyí tyiño Nyoo sacuví ndi. Vasi ndahvi ndi, soco cuaha ñáyivi ñihi ñu cha vaha chihin tuhun cha chahá Nyoo chí ndi. Vasi ñahri maa iyó chí ndi, soco iyó tandíhi cha vaha Nyoo chí ndi.

¹¹Cahán ndi chihin ndo yañi, cha cuví ndo ñáyivi ñuu Corinto chiña. Catyí

cachi ndi chi ndo chihin cha ñiñ añima ndi vatyí ndicha cha cuñí ndi chi ndo. ¹²Nyuhu, ña quiñi cuñi ndi nyehe ndi chi ndo. Maa ndo cuví ñu ña vaha cuñí nyehe chi ndi. ¹³Chacú ndahvi ndi nuu ndo tari chacú ndahvi noo rayiñ nuu sehe ra, ñuñã ndo añima ndo, ta ma quiñi cuñí ndo nyehe ndo chi ndi, vatyí maa ndi ña quiñi cuñí ndi nyehé ndi chi ndo.

Cuví yo vehe Nyoo vatyi ñohó ra añima yo

¹⁴Ma ndu iin ri ndo chihin ñu ña chinó iñi chi Nyoo. Vatyí ña nacachí tahan añima ndo chihin ñu cuan. Vatyí cha vaha ma cuví ndu iin ri chihin cha ña vaha. Ta cha ndichin ma cuví ndu iin ri chihin cha ñaa iñi. ¹⁵Vatyí ra Cristo ña ndu iin ri ra chihin ra cuví cuihna. Ta tyicuan caa tucu ñu chinó iñi chi ra Cristo, ña nacachí tahan chi tatu ndu iin ri ñu chihin ñu ña chinó iñi chi ra. ¹⁶Ña chahá chi cha sacahnú yo Nyoo ta sacahnú tucu yo chi cha cuví xitohyo. Vatyí maa yo cuví yo vehe Nyoo nyitó. Tari catyi maa ra tuhun ihya ta cha naha: Coi ta caca noi chihin ñu. Ta yuhu cucuvi Nyoo ñu, ta maa ñu cucuvi ñu ñáyivi chii, catyi Nyoo.

¹⁷Yucuan chaha catyi tucu ra quívi cuan:

Quita ndo mahñu ñu ña chinó iñi chii.

Ta ma cutahan ndo chihin ñu.

Ta ma sacuvi ndo cha ña vaha.

Tyicuan ta cunaquehin chi ndo.

¹⁸Ta sutu ndo cucuvi chii.

Ta maa ndo cucuvi ndo sehi, catyi Sutu Mañi yo, ra iyó tandihí tunyee iñi chii.

7 Ican ihya cuví cha chahá Nyoo chi yo. Yucuan chaha yañi, cuñí chi nducu yo cuhva cuvaha yo nuu Nyoo. Ma sacuvi yo cha quiñi caa ni ri ma caca xiñi yo cha ña vaha. Na ndu cuiti coo yo vatyí sahá yo ñáyivi chi Nyoo.

Nu nacatyí ra Pablo yoso caa nasamã ñu cuhva iyó ñu

²Yañi, chacú ndahvi ndi nuu ndo, na cuvaha coo iñi ndo nyehé ndo chi ndi vatyí ñahri cha sacuvi ndi chi ni noo ndo. Ta ni ña sativi ndi chi ndo. Ni noo ndo ta ña sandavi ñaha ndi chi ndo. ³Cha catyi chi ndo tyehe caa ñima cha cahín chi ndo. Vatyí cha yaha catyi tiqui chi ndo ta ityi chata ca, vatyí ndicha cha cuñí chi ndo. Vatyí iin ri ñu cuví yo chihin Nyoo. Tatu iyó yo soco iin ri cuví yo. O tatu cúvi yo soco iin ri cuví tucu yo. ⁴Ñahri maa cha chica iñi chihin nyoho. Siñi xaan cuñí nyehi chi ndo. Ta yucuan chaha vasi nyehé ndi tindoho ihya, cuniñ ca iñi ndi. Ta cusii xaan ca cuñi ndi.

⁵Nya quívi chaã ndi Macedonia ihya, ta ta nyitatu ca maa ndi. Vatyí cuaha xaan tisihi ta tindoho nyehe ndi tandihí ri ityi chahan ndi. Ta cañi tahan ñu chihin ndi. Ta yuhví ndi. ⁶Soco Nyoo, tyicuan ri sanduniñ ca ra iñi yo tatu cuihyá cuñi yo. Ta sanduniñ ra iñi ndi cuhva cha chaã ra Tito. ⁷Ta ñima cha cuenda cha chaã ri ra. Soco cha cuenda cha nduniñ iñi ra saha nyoho. Nacatyí ra chi ndi vatyí cuñi xaan ndo nyehe ndo chi ndi. Ta chacu xaan ndo cha cuihya iñi ndo. Ta cuñi ca ndo chii, na. Ta cha cuenda cuan ndusiñ xaan ca cuñi vityin.

⁸Soco quívi cuan chica xaan xiñi vatyí chahí tucuihya iñi chi ndo chihin tutu cha sacuhin chi ndo. Ta ndu uví iñi cha sacuhin tutu cuan chi ndo. Soco suhva ri quívi, nducuihya iñi ndo. Ta vityin ña chicá ca xiñi cha cuenda tucuihya iñi cha chahí chi ndo. ⁹Ta vityin cusii xaan cuñí, ñima cha cuenda tucuihya iñi cha chiyo ndo, soco cha cuenda vatyí tucuihya iñi cuan sanandichí chi ndo ndaha Nyoo. Nyoho cunyeë ndo tucuihya iñi cuan yoso cuhva tahán iñi Nyoo, yucuan chaha cha vaha sacuvi ndi chihin ndo chihin tucuihya iñi cuan. ¹⁰Iyó tucui-

haya iñi cha maa Nyoo chahá, tacuhva ndu uvi iñi yo cuatyí yo ta nañihi yo ityi vaha cahun yo nu nyaa ra. Ta ña tahán chi cha cuxaán yo chi Nyoo cha cuenda cuan. Soco tucuihya iñi cha iyó chi ñu cha ña ñohó nuu chi Nyoo, ñima tucuihya iñi chi Nyoo cuví cuan. Vatyí ña tyinyeé chi chi ñu tacuhva cha ma cahun ñu anyaya. ¹¹Nyoho cunyeé ndo tucuihya iñi yoso cuhva tahán iñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya iñi ndo. Ta sandaḡ vaha ndo tyiño ra cuan. Cuxaan ndo chi ra. Ta nyacua cuñi ndo tachí tuñi ndo chi ra. Tandihí cuan, ta nayuhví ndo chi Nyoo. Ta nacatyí vaha ndo yoso caa cuahan. Yaha cuan ta nyacua quichí cuvi iñi ndo nyehe ndo chii. Ta cha cuenda cha sacuví ndo tari cuhva cuñí Nyoo, cuñí chi catyí vatyí ñahri cuatyí ndo cha cuenda cuan. ¹²Yucuan chaha quivi sacuhin carta cuan chi ndo ñima cha cuenda cha chicá xaan xiñi cuenda ra cha sacuví cuatyí cuan. Ta ni ñima cuenda ra cha nyehe tisihi cuan. Soco cha cuenda maa ndo, vatyí cuñí tyi coto ndo yoso cuhva chicá xiñi ndo tuhun ndi nuu Nyoo vatyí cuñí ndo tyinyeé ndo chi ndi. ¹³Yucuan chaha nduvaha cuñí aña ndi. Ta sii xaan cuñí ndi vatyí chitó ndi tyi cuñí ndo chi ndi.

Ta sii ca cuñí ndi cha nyehé ndi vatyí chahá xaan ndo tunyee iñi aña ra Tito. Vatyí vaha xaan tyiñuhú ndo chi ra. ¹⁴Catyí chi ra Tito cha cumañi ca cahun ra nu nyicú ndo vatyí vaha cutyaso ndo tuhun cha sacuhin chihin ra. Ta vityin sii cuñí vatyí chinó cava tuhun cahín chihin ra. Maa maa ri cha ndicha cahín chihin ndo. Ta tyicuan caa ndicha tucu tuhun cha catyí chi ra Tito. ¹⁵Ta cuñí xaan ra chi ndo vatyí nichón iñi ra vatyí nyoho sacuví ndo tandihí cuí cha catyí ra chi ndo. Ta cuhva cha chaḡ ra, ndahvi sahá ndo chi ndo nuu ra. Ta vaha xaan caḡan ndo chihin ra. Ta vaha xaan

quichahá ndo chi ra. ¹⁶Ta sii xaan cuñí vatyí chité tyi tyicuan ri sacuví ndo cha vaha.

**Tahán chi tyinyeé yo chi ñu
yihí cuenda Nyoo chihin
cha iyó vaha iñi yo**

8 Ta vityin yañi, cuñí ndi nacatyí ndi chi ndo vatyí cuaha xaan tyinyee Nyoo chi ñu yihí cuenda ra, ityi Macedonia ihya. ²Vasí cuaha xaan tindoho nyehé ñu, soco sii xaan ca cuñí ñu chihin Nyoo. Ta vasi ndahvi ñu soco cuaha cha iyó chi ñu chahá ñu, tari maa cha tyayii ñu. ³Ta yuhu cuví noo cha ndaa vatyí nyehí tyi chihin cha iyó vaha iñi ñu chahá ñu yoso cuhva cha iyó chi ñu. Ta nyacua yaha ca chahá ñu. ⁴Chacú ndahvi xaan ñu nuu ndi tyi nacuhvá ndi cha tyinyeé tucu maa ñu chi ñu tahan yo nya Jerusalén. ⁵Cuaha ca sacuví ñu cha nuu cha yihí iñi ndi. Vatyí cha xihna ca cha sacuví ñu, nacuhvá cuenda ñu chi ñu chi Nyoo chihin cha ñi vaha iñi ñu. Ta quichahá vaha ñu tuhun Nyoo cha sacote chi ñu, vatyí yucuan cuhva cuñí maa Nyoo. ⁶Ta cha nyehí tyi tyehe caa chinyacuvi ñu Macedonia ihya, yucuan chaha catyí chi ra Tito vatyí na sandihí ndihí ra tyiño vaha cha quichahá ra cha nacaya ra xuhun nu nyicú ndo. ⁷Nyoho vaha xaan sacuví ndo tandihí ri. Chinó xaan iñi ndo chi Nyoo. Vaha xaan sañahá ndo tuhun ra. Ta vaha cutuñí iñi ndo. Ta ñi xaan iñi ndo sacuví ndo tyiño nuu ra. Ta vaha xaan ñáyivi cuví ndo chihin ndi. Ta tyicuan caa tucu tahán chi cha tyinyeé ndo chi ñu ndahvi ñu yihí cuenda Nyoo noo cuhva vaha xaan.

⁸Ñima tyi catyí chi ndo tyehe caa ta cuñí ndo tyi cha saniñí chi ndo. Soco cha cuñí vatyí nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi ndicha vaha ñáyivi cuví ndo chihin tahan ndo. ⁹Vatyí cha chitó

maa ndo yoso cha cuñí Sutu Mañi yo Jesucristo chi yo. Vatyí maa ra tyayíi xaan ra. Soco sandundahví ra chi ra cha catyí yo tacuhva vatyí cuví sandutyayíi ra chi yo.

¹⁰ Chahí tuhun ihya chi ndo cha cuenda cha vaha chi maa ndo. Na sañihi ndo chihin tuhun cha quichahá ndo quiyava. Ñima tacuhva sacuví ri ndo, soco sacuví ndo chihin cha iyó vaha íni ndo. ¹¹ Ta tari chahá ndo chihin cha iyó vaha íni ndo, tyicuan caa sacuví tucu ndo vityin. Ta cuhva ndo yoso ri cuhva cha iyó chi ndo. ¹² Vatyí tatu noo ñáyivi níi vaha íni ñu, cuñí ñu cuhva ñu yoso ri cuhva cha iyó chi ñu, Nyoo naquehén ra cha chahá ñu. Vatyí Nyoo ña chicán ra cha ñahri iyó chi yo.

¹³ Ñima cha cuñí vatyí nyehe ndo tindoho cha cuenda cha tyinyeé ndo chi inga ñu tacuhva ma nyehe ca ñu cuan tindoho. ¹⁴ Soco vityin cha iyó chiin chi ndo, tahan chi cha tyinyeé ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehe caa tahán chi tyinyeé chi tahan ri yo tacuhva tyi ninoo yo ta ni inga yo ma nyehe yo tindoho. ¹⁵ Vatyí tyehe caa catyí chi tuhun Nyoo: “Ra cha cuaha xaan cumí, ña ndoó ca chi ra. Ta ra cha chiin ri cumí, ña cumañí chi ra”, catyí tuhun Nyoo.

Ra Tito chihin ra tahan ra tyaá ra cuhva cuhun ra ñuu Corinto

¹⁶ Soco tyahvi nyoo chi Nyoo vatyí chahá ra cha vaha coo añima ra Tito tyi chicá xiñi ra tuhun ndo tari chicá xiñi yuhu. ¹⁷ Ta quehén ra tuhun cha catyí chi ra cha cuhun ra nu nyicú ndo. Tyi cha yihí xaan íni tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha íni maa ra.

¹⁸ ñn ri chihin ra Tito tachí ndi chi noo ra yañi yo. Ta vaha xaan hermano cuví ra, ta tyicuan caa catyí tandihi ñáyivi

yihí cuenda Nyoo. ¹⁹ Ta siin ri nacachí vaha maa ñu yihí cuenda Nyoo chi ra yañi yo ihya vatyí cuhun ra chihin ndi cunyaca ndi xuhun chi ñu ndahvi nya Jerusalén. Ta cuñí ndi sacahnú ndi chi Sutu Mañi yo cha sacuví ndi tyiño ihya. Ta suri sañahá ndi vatyí cuñi xaan ndi tyinyeé ndi chi tandihi ñu yihí cuenda Nyoo. ²⁰ Ta cuñí ndi sacuví ndi tyehe caa tacuhva cha ma quihi yuhu ñáyivi tuhun ndi cha cuenda cha nacayá ndi xuhun cha cuacuhva ndi chi ñu ndahvi. ²¹ Ta nducú xaan ndi cuhva sacuví ndi noo cuhva cachi. Tatu ñáá noo cha cuasacuvi ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandíhi.

²² Ta chihin ra Tito ta inga yañi yo cuan, vachí inga tucu ra yañi yo, vatyí nyehé ndi vatyí níi xaan íni ra. Ta vityin yaha ca cuhva, vatyí vaha cuñí ra nyehé ra chi ndo cha cuenda cha chinó xaan íni ra tyi cuñí ndo sacuví ndo cha vaha nuu Nyoo. ²³ Tatu yóó cha ndaca tuhun tuhun ra Tito, catyí ndo chi ñu tyi ra tahin cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyí ndo chi ñu vatyí maa ñu yihí cuenda Nyoo saquichí chi ra. Ta vaha xaan sacuví ra tyiño nuu ra Cristo. ²⁴ Yucuan chaha sañaha ndo chi ra ihya vatyí ndicha ndo cha cuñí ndo chi ra. Tyicuan ta coto tandihi ñu yihí cuenda Nyoo vatyí tahán chi cha cahín tuhun ndo tyicuan caa.

Nu chahá ra Pablo tuhun yoso caa cuatyinyeé ñu chi ñu ndahvi ñu yihí cuenda Nyoo nya Jerusalén

9 Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñí chi cha sacuhin tuhun chi ndo. ² Vatyí cha chité cha vaha caá añima ndo. Yucuan chaha chihin cha sii cuñí nacatyí chi ñu ityi Macedonia

ihya, vatyi nyoho ñu ityi Acaya, nya ta quiyava quichaha cuñí ndo tyinyeé ndo. Ta cuaha xaan ñu Macedonia cunií ca iñi ñu cha tyinyeé tucu maa ñu. ³Soco suvita ri yuhu cutachi chi yañi yo ihya nu nyicú ndo. Vatyi sanumi ndo ta sacaya ndo xuhun, tari cuhva catyí vatyi yihí iñi ndo sacuví ndo. Vatyi tacuhva cha ma catyi ñu Macedonia ihya vatyi ña ndicha cha cahín siqui ndo cha cuenda cuan. ⁴Vatyi coto cuhun nya noo ra Macedonia chihin, ta nyehe ra vatyi ñahri maa nacayá ndo. Ta cuquehin ticahan nuu cha cuenda cha ñahri cumi ndo. Ta vihi ca maa ndo. Vatyi cha yaha catyi vatyi cuatyinyee ndo. ⁵Yucuan chaha cuñí mai vatyi vaha cha cuhun xihna ca ra yañi yo ihya nu nyicú ndo tacuhva tyinyeé ra chi ndo cha sacañá tahan ndo xuhun cha yihí iñi ndo tyi cuhva ndo. Tacuhva tyi quivi quichi soco tandihi ta cha iyó vaha. Vatyi cha iyó vaha iñi maa ndo cuví, ta ñima noo cha saniñi ndi chi ndo.

⁶Ta ñicohon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó. ⁷Ta tahan tahan yo cuñí chi cuhva yo yoso cuhva quichi cuvi añima yo. Ñima chihin cha ña nií iñi yo o chihin fuerza. Vatyi Nyoo cuñí ra chi ñu cha chahá chihin cha sii cuñí. ⁸Nyoo cuví cuhva ra cuaha, ndihi ndoo ndihi cuiti nuu cha vaha chi ndo. Vatyi tyicuan ta coo tandihi ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihi ri nuu chiñuhú chi ñu. ⁹Tuhun Nyoo catyí chi tyehe caa: Minoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyí chi.

¹⁰Nyoo chahá ra chiti tachí yo. Ta chahá tucu ra cha cachi yo. Cuhva tucu ra cuaha ca chiti tachi ndo ta cuhva ra

cuhva chi. Ta chihin cha chahá ndo, cusacuvi ra tyi cuaha cha vaha cucunyaa añima ñáyivi. ¹¹Tyicuan caa ta coo tandihi ri nuu cha tyayii chi ndo, tacuhva cuvi tyinyee ndo chi tahan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyeé yo chi ñu. ¹²Vatyi cha tyinyeé yo tyehe caa chi ñu yihí cuenda Nyoo, uvi tahan cha vaha sacuví yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo. ¹³Maa ñu cusacahnu ñu chi Nyoo. Vatyi chihin cha tyinyeé ndo chi ñu, nyehé ñu vatyi ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyeé xaan ndo chi ñu ta chi tandihi ñáyivi. ¹⁴Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo. ¹⁵Tyahvi nyoo chi Nyoo vatyi chahá ra noo cha vaha xaan chi yo. Nyacua ña ñihí yo cuhva nacatyí yo.

Iyó ityi chi ra Pablo tyi saha ra cuenda chi ñu cha sacotq ra tuhun Nyoo chii

10 Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyi yihí ndo catyí ndo vatyi tatu ñáá tuhun sacoté chi ndo chihin tutu, ñilhi xaan cahín chihin ndo. Soco tatu nyaí chihin ndo, vita xaan cahín, catyí ndo. ²Vaha. Soco quivi cuhin nu nyicú ndo, ma saniñi ndo chii cha cahin chi ndo. Soco chité tyi cuñí chi cha sañahí chi suhva ndo yoso cuhva cha ñilhi cahín. Vatyi yihí ndo catyí ndo vatyi sacuví tari sacuví noo ra ña yihí cuenda Nyoo. ³Ndicha vatyi ñáyivi cuví ndi. Soco ña cañí tahan ndi tari cañí tahan ra ñayivi ihya. ⁴Vatyi cha xaan cha cañí tahan ndi chihin, ñima cha xaan ñayivi ihya cuví. Soco maa tunyee iñi Nyoo cuví, vatyi cuví chasaha ndi tandihi maa fuerza nyacua nya fuerza tatyí ña vaha. ⁵Ta tyicuan caa cuví

chasaha ndi chi tandihí tuhun cha cahán ñáyivi siquí tuhun Nyoo, ta tandihí cha cahnu sahá chii cha chasi nu quichahá yo tuhun Nyoo. Tandihí cuhva chicá xiñi yo siquí ñuhu ñáyivi ihya, chahá yo na cunyaca ñaha ra Cristo vatyí quichahá yo chi maa ra. ⁶Ta quivi cuquichaha vaha tandihí ndo chi ra Cristo, tatu nya nonga ndo ña cuñí ndo quichahá ndo, tyaá ndi cuhva cha tachi tuñi ndi chi ndo.

⁷Soco nyoho sahá ndo cuenda cuhva caá ri noo ñáyivi. Ta ña sahá ndo cuenda cuhva caá añima ñu. Ta tatu nya noo nyoho chitó vaha ndo vatyí cuenda ra Cristo yihí ndo, coto tucu ndo vatyí yihí tucu nyuhu cuenda ra. ⁸Vatyí vasi yaha cuhva cahín, ña tahán chi cha cucahan nui. Vatyí maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihi ca ndo tunyee iñi Nyoo. Ta ñima cha sativí chi ndo. ⁹Ña cuñí vatyí catyí ndo vatyí sayuhví chi ndo chihin cha cahín nu tutu cha sacuhín chi ndo. ¹⁰Vatyí yihí ndo catyí ndo vatyí nu tutu cha saquichí chi ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun cahan, catyí ndo. Ta tuhun cha cahín, maa maa ri tuhun cha ña chiñuhú cuví, catyí ndo. ¹¹Soco ñu cha catyí tyehe caa cuñí chi cha coto ñu vatyí tari cuhva cahín nu tutu, tyicuan caa cusacuvi tiquí nachai nu nyicú ndo.

¹²Ndicha ña cañá iñi ndi sandu inuu ri ndi chi ndi chihin ra casayaá chi tyi cahán ra tuhun maa ra. Vatyí casacuví ra cha ña tahán chi. Vatyí nyehé ra cuhva chicá xiñi maa ra ta cuhva cuahan inga ra, ta cuñí maa ra tyi vaha cuahan ra. Ta ña cutuñí iñi ra tyi tahán chi nanducú ra cuhva cuñí Nyoo. ¹³Nyuhu ma sacahnu ndi chi ndi chihin cha ña tahán chi chi ndi. Nyoo cuví ra sañahá ñáá cuví tyiño cha tahán chi cha sacuví ndi. Ta maa ra chahá cha quichi ndi nya nu ny-

icú ndo Corinto chiña. ¹⁴Tyehe ta ñima xihna ca ndi sacotó tuhun Nyoo chi ndo, ña tahán chi sahá ndi cuenda chi ndo. Soco tahán maa chi vatyí xihna ca maa ndi chaa ndi nu nyicú ndo chihin tuhun ra Cristo. ¹⁵Soco nyuhu ña sayaá ndi chi ndi chihin tyiño sahá inga ra. Ña catyí ndi tyi tyiño maa ndi cuví. Soco yihí iñi ndi vatyí cunachino vaha ca iñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahán chi chi ndi. ¹⁶Ta yihí iñi ndi cha cahan ndi tuhun ra Cristo chihin ñáyivi nya ndihí ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyí ñáyivi vatyí cuyaa ndi chihin tyiño sahá inga ra.

¹⁷Soco tatu nya noo yoó cuñí yo cuyaa yo, na cuyaa yo soco chihin Sutu Mañi yo. ¹⁸Vatyí nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

11 Vaha tyehe ta cunyeé ndo chiin cha ñima ri tuhun cha cuacatyí chi ndo. (Vasi ña tahán chi cha sacoté tuhun mai, soco cuñí chi cha nacotó ndo yoso caa cuñí ra cuan sandaví ñaha ra chi ndo.) Ta yucuan chaha vasi yoso ca caa soco cunyee ndo cha cuacatyí chi ndo. ²Vatyí cuiño xain chi ndo. Ta maa Nyoo chahá cha cuiñe chi ndo, vatyí mai ican tyihí chi ndo ityi ra Cristo. Ta cuñí tyi cuñí ndo chi ra tari noo ñaha tyivaa cha cuñí xaan ña chi noo ri maa ra cha cuatandaha ña chihin. ³Soco chicá xiñi cha cuenda ndo, coto cuví chi ndo tari cuví chi cu Eva. Vatyí sandaví ñaha coo chihin maña ti chi ña. Ta coto casandaví ñaha ra cuan chi ndo. Ta coto ndusiin caa cuhva nacacá xiñi ndo tuhun

ra Cristo. Ta sandihi ndo tuhun cha sacahnú ndo chi noo tuhun ri maa ra. ⁴Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyí ñima tuhun ra Jesús cha sacotó ndi chi ndo cuví. Ta vaha xaan cuñí ndo nacacá xiñi ndo siin ca tuhun cha ña chachí tahan chihin tuhun Vatyí li Nyoo cha naquehen ndo quivi xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra. ⁵Soco tuví iñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra. ⁶Vasi ña ñihí vahi cuhva cahín, cuñí maa ndo. Soco cutuñí vaha iñi tuhun Nyoo. Ta yucuan sañahá ndi chi ndo chihin tandihi cuhva sacuví ndi.

⁷O cuñí maa ndo vatyí ña vaha cuhva sacuví quivi cha cahín tuhun ra Cristo chihin ndo. Vatyí ña quehín yahvi chi ndo. Ta sandundahví chii cha cuenda cha cuñí cha cacu ndo. ⁸Ñáyivi inga vehe ñuhu tyinyee ñu chii. Vatyí maa ñu chahá xuhun chii. Ta yuhu quehín xuhun cuan ta sacuví tyiño nuu ndo. ⁹Ta quivi cha chinyai chihin ndo ña chahí tindoho chi ni noo ndo vasi iyó cha chiñuhú chii. Vatyí ra hermano cha quichi coyo nya ityi Macedonia, ican ra chahá tandihi cha chiñuhú chii. Ta sahá vavahi cuenda chii vatyí ña cuñí cuhve tindoho chi ndo. Ta tyicuan ri sacuvi que. ¹⁰Vatyí chitó vahi tyi maa maa ri tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo ñu ityi Acaya chiña, cha vaha cuñí cha ña chiquén cha coo yahvi chi ndo. ¹¹¿Ñáa tuhun cha cahín tyehe caa? ¿Atu cha cuenda cha ña cuñí chi ndo? Ñima. Nyoo chitó ra yoso cha cuñí chi ndo.

¹²Ta cuasacuví que tari cuhva sacuví mai. Vatyí ña cuñí cuhve ityi chi ra cachicá noo yanga vatyí cacatyí ra tyi sacuví ra tari cuhva sacuví ndi soco ña

ndicha. ¹³Vatyí cacatyí ra cuan vatyí apóstol cuví ra. Soco ña ndicha ra. Vatyí cuví ra noo ra sandaví ñaha ta nasahá ra chi ra tari noo ra apóstol ra Cristo. ¹⁴Ta ihya ñima cha iyo cuñí yo cuví. Vatyí cuihna cuví nasaha ra chi ra tari noo ángel cha xiño tuví chihin cha ndichin Nyoo. ¹⁵Yucuan chaha ra cha nyicón chi ra ña vaha, nasahá tucu maa ra chi ra tari noo ra cha sacuví cha vaha. Soco coo quivi cutachi tuñi Nyoo chi ra cha cuenda cha ña vaha cha sacuví ra.

Tindoho cha nyehé ra Pablo nu chicá noo ra tyiño Nyoo

¹⁶Inga chaha catyí tiqui chi ndo vatyí ni noo ndo ta ma caca xiñi ndo vatyí loque cha cahín tyehe caa. Soco tatu tyicuan caa chicá xiñi ndo, saña ndo chii na cahin chihin ndo tari noo ra loco. Vatyí tyicuan caa ta cuví sacahnu tucu yuhu chiin chii. ¹⁷Ñima Sutu Mañi yo catyí chii vatyí sacahni chii tyehe caa. Soco cahín tari cahán noo ra loco. ¹⁸Vatyí cuaha ra cha cacatyí vatyí tyiño Nyoo cachicá ra, ta ñima, vatyí cahnu xaan casahá ra chi ra. Yucuan chaha cusacahnu tucu yuhu chii ñandihi. ¹⁹Nyoho, chitó xaan ndo, cuñí maa ndo. Ta quiyí ri tyasohó ndo nu cahán ra cuan. Ta tondo xaan cacuví ra. ²⁰Soco nyoho ñahri cuenda ndo cha saniñi ra chi ndo cha sacuví ndo tyiño nuu ra. Suhú ra chi ndo ta ña tuví iñi ndo. Sandaví ñaha ra chi ndo. Ta ña cuñí nyehe ra chi ndo. Ta nyacua cañí chihin ndaha ra chi ndo. Ta maa ndo cunyeé xaan ndo cha sacuví ra chi ndo. ²¹Vasi cahán nuu ndi soco cua catyí ndi, nyuhu vita xaan cuñí ndi yucuan chaha ña cañá iñi ndi sacuví ndi chi ndo tyicuan caa.

Soco inga ra cuan cañá ndicha cuii iñi ra sacotó ra tuhun maa ra. Ta yuhu tucu cañá iñi vasi cahín tari noo ra loco. ²²Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra,

ican cuví tucu yuhu. Ta tatu vachí ra tata ra Abraham, suri vachi tucu yuhu. ²³Ta tatu ra sacuví tyiño nuu ra Cristo cuví ra, vihi ca yuhu. Vatyí yaha ca cuhva sacuví tyiño nuu ra Cristo. Vasí cahín tari noo ra loco vatyí catyí tyicuan caa. Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohí chihin ñii ican saha ra cuan. Ta cuaha ca chaha ñohí vehe caa ican saha ra cuan. Ta cuaha chaha cha cha yatyin cúvi, soco ña chihí. ²⁴Ta ohon tahan chaha cacañi ra Israel chii chihin ñii. Cha noo chaha cañi ra chii, oco chahun cumi tahan chaha sahvi ra ñii chate. ²⁵Ta uñi chaha cañi ra chii chihin yutun. Ta noo chaha cacañi ra chii chihin yuu. Ta uñi tahan chaha nyee barcu cha yihí. Ta chichi cha uñi tahan chaha cuan, noo chaha ndojí nu tyañuhu noo ñuu ta noo quívi. ²⁶Cha cuaha xaan cha cuví chii nu chica noi. Ta cha cuaha chaha cuñi tyañi chihin yuvi ndutya. Ta cuaha cha cuví chii. Quita ra suhu nu cuahin. Nyacua nya ra ñui, ra Israel, ta satasí ñni ra chii. Ta ra inga ñuu ñandihi. Ta cuaha cha cuví chii ityi chichi ñuu, ityi nu chiquí, ityi nu tyañuhu. Ta cuaha cha cuví chii mahñu ra cha catyí vatyí hermano cuví ta ñima hermano cuví ra. ²⁷Ta ñihi sahá tyiñe ta chitati. Ta cuaha xaan chaha ña quixi. Yahí soco: soco xita ta soco ndutya. Cuaha chaha sahí ayunar, o ña chachí ta nanduqui chí Nyoo cuví cuan. Cuaha chaha yahí cha vichin. Ta ni sahme ta ñahri.

²⁸Ta siin ri nyaá siqui vatyí saní que ñni tandíhi ndo: nyoho ta ñu inga ñuu cha yihí cuenda Nyoo. ²⁹Vatyí tatu noo ndo vita cuñí ndo, yuhu tari cha vita cuñí cha cuenda ndo. O tatu sacoo ñu cuatyí nya noo ndo, yuhu quehín tisihí ta ticahan nuu. ³⁰Tatu cuñí chí cha sacote tuhin tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyí sañahá chí tyi ñahri maa

fuerza mai iyó chii. ³¹Nyoo sutu Sutu Mañi yo Jesucristo, tahán chí cha sacahnú yo chí ra tyicuan ri maa. Ta chító maa ra vatyí ndicha cha cahín, ñima cuendu cahín. ³²Quívi chinyají Damasco (ñuu nu nicachico yihí barda) ra cha cuví gobernador cha sacuví tyiño nuu rey Aretas ñuu Damasco cuan, cuatyaa ra chí sindaro yuvehe cahnu ñuu cuan, tyi casahá cuenda ra. Vatyí tatu quite yuvehe ñuu cuan catiin ra chí ta cunyaca ra chí vehe caa. ³³Soco ñáyivi iyó chaha barda cuan iyó ventana ñu. Ta ityi ventana sanoó ñu chii. Yihí chichi noo tica cahnu. Ta tyicuan caa sacacu Nyoo chí ndaha gobernador cuan.

Noo cha chaha Nyoo vatyi nyehe ra Pablo

12 Ñahri maa ñihí chihin cha cahín tuhun mai, soco cuanacatyí cha sañaha Sutu Mañi yo chii. ²Ñohó nui chí noo ra cha yihí cuenda ra Cristo. Ta cha iyó uchi cumi cuiya quehen Nyoo chí ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chíni tuñi xiñi ra. Ña chité. Nya ri ca maa Nyoo chító ra. ³⁻⁴Soco chité vatyí ra cuan chinyaca Nyoo chí ra nya nu iyó ñáyivi vaha, ñu cha chíhi. Ña chité tatu chahan ra cuan chihin coño ñuhu ra o chihin cha chíni tuñi xiñi ra. Noo tuhun ri ca maa Nyoo chító. Ta nu chahan ra cuan chíni ra tuhun xehe. Ta ñahri ityi iyó chí ñáyivi cha nacatyí ñu tuhun xehe cuan. ⁵Tahán chí sacahní chii chihin cha sañahá Nyoo chí quívi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii. ⁶Tatu cuñí tiquí cahín tuhun mai, ñima noo tuhun tondo ri cuví. Vatyí maa maa ri cha ndicha cuacatyí. Soco ma catyí vatyí coto cahnu xaan sahá ñáyivi chí. Vaha ca nyehe ñu cuhva vaha iyé ta cuhva

vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñí Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuihna tindoho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuví cuyai chihin cha sañahá Nyoo chii. ⁸ Ta cha uñi chaha chiquen chi Sutu Mañi yo na tinyaa ra tindoho cuan siqui. ⁹ Soco maa Sutu Mañi yo catyí ra chii tyehe caa: “Chahí tandihí cha vaha cha iyó chii chuun. Vatyí yucuan cuví cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chi ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha sii xaan cuñí cha ñahri fuerza mai iyó chii. Vatyí tyicuan caa ta cuví cunyaa tunyee iñi ra Cristo chihin. ¹⁰ Yucuan chaha sii xaan cuñí cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuví chii, soco sii xaan cuñí cha nyehí tindoho cha cuenda maa ra Cristo. Vatyí tatu ñahri fuerza mai iyo chii, soco ñiñi ca cuñí chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹ Cahín tari noo ra loco. Soco maa ndo cuñí ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuví yuhu, soco nyaca cuví ra cha catyí tyi apóstol cuví ra, ta ña ndicha ra. Cuñí maa ra tyi vaha xaan ca ra cha nuu inga ra chicá tyiño Nyoo. ¹² Nyehe ndo yoso caa tyiño Nyoo cha sacuví mahñu ndo. Ta chihin cha cama iñi ta cunyei tandihí tindoho cha nyehi. Ta cuaha xaan milagru sañahá Nyoo chi ndo tacuhva coto ndo vatyí ndicha cha cuví yuhu noo ra chicá tyiño maa ra.

¹³ ¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihí ndo. Noo ri cha ña sacuví chihin nyoho cha ña cuñí cuhve tindoho chi ndo. Saha ndo ticahnu iñi chii tatu ña vaha cuhva sacuví.

¹⁴ Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri tindoho tyaí siqui ndo. Vatyí ñima cha iyó chi ndo vachí nan-duquí. Chi maa ndo cuví cha cuñí yuhu. Vatyí sutu, ican tahan chi cuhva cha chiñuhú chi sehe. Ta ñima sehe nducú cha chiñuhú chi sutu. ¹⁵ Yucuan chaha yuhu nyacua sii cuñí cusanaí cha iyó chii cha cuenda cha vaha chi ndo. Ta nyacua sii cuñí cuhve ñáyivi cha cuenda ndo. Soco ta caa ri vatyí tatu cuñí que chi ndo, maa ndo ña cuñí vaha ndo chii.

¹⁶ Ta vasi chitó cachi ndo vatyí ña chahí tindoho chi ndo, soco yihí ndo catyí ndo vatyí sandaví ñahi chi ndo ta ña tuví iñi ndo. ¹⁷ ¿Atu sandaví ñahi chi ndo chihin nya noo ra cha tachí nu nyicu ndo quivi cuan? ¹⁸ ¿Atu sandaví ñaha ra Tito chi ndo quivi tachí chi ra chihin inga yañi yo cuan nu nyicu ndo? Ña sandaví ñaha ra chi ndo. Vatyí nyuhu ña tuhvá ndi sandaví ñaha. Vatyí iin ri cuhva iyó ndi. Ta iin ri cuhva sacuví ndi.

¹⁹ Vasi chicá xiñi ndo vatyí cuahan ndi tumañi iñi chi ndi cha cuenda tuhun cha cahán ndi ihya, soco ñima tyicuan caa. Vatyí tandihí tuhun ihya cahán ndi cha cuenda cha vaha chi maa ndo tacuhva cohon nuu ca ndo chi Nyoo. Vatyí ndicha cha cuñí ndi chi ndo. Ta cahán ndi soco chihin nuu Nyoo ta cha cuenda maa ra Cristo. ²⁰ Chicá xiñi coto iñi ndaa iñi noo nyicú ndo ta chaí. Ta ma cutahan iñi cuhva nyicú ndo. Ta maa ndo ma cutahan iñi ndo cuhva cucahin chi ndo. Yuhví coto coo tisihí, coto nya ndo quichí cuví iñi ndo cha chii noo tahan ndo, coto nya ndo cuxaán ndo chi tahan ndo, coto nducú ndo maa maa ri cha

vaha chi maa ndo, coto nya ndo ñii ca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyi ña cachi ña ndaa nyicú ndo. ²¹ Ta yuhví coto cha cuhin inga chaha nu nyicú ndo, Nyoi cuhva ra cha cucahan nui cha cuenda nyoho. Ta chicá xiñi coto quita ndutya nui cha cuenda cha nyacuví ndo. Vatyí yihí ndo sacuví ndo cuatyí nu quichí quiví. Ta nya vityin ta ña ndu uví iñi ndo cha ca iyó ndo chihin ñusihi ta ñima ñasihi ndo cuví, ta iyó ndo chihin rayíi ta ñima yíi ndo cuví. Ta ña sandihí ndo tuhun cha sacuví ndo ñáá ndihi cha ña vaha.

Chahá ra Pablo tuhun chi ñu Corinto, na saha vaha ñu cuenda chi ñu tatu vaha cuahán ñu chihin Nyoo

13 Quiví cha cuquichi inga chaha nu nyicu ndo cuví chi chaha cu uñi. Yucuan ta cuvi cundaa tyiño ñu cha sacuví cuatyí. Soco cuñí chi uvi o uñi cha ndaa. ² Vatyí quiví chahin nu nyicú ndo cha cu uvi chaha, catyí chi ra sacuví cuatyí cuan, na sandihí ra tuhun. Ta vityin catyí tiqui inga chaha chi ra, ta chi tandihí ndo. Vatyí tatu cha quichi inga chaha, ta sacuví ca ndo cuatyí cuan, ma cundahvi cuñi nyehi chi ndo. ³ Tyicuan ta coto ndo cha cuñí xaan ndo coto ndo. Vatyí ndicha ndicha cha chihin fuerza maa ra Cristo cahín. Vatyí ra Cristo ñima noo ra ñima ri tuhun cuví ra. Yucuan chaha sañahá ra tunyee iñi ra chi ndo. ⁴ Ndicha vatyí chihí ra nu cruzi tari noo ra cha ñahri tunyee iñi iyó chii. Soco nandoto ra ta iyó ra chihin tunyee iñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco iin ri cuví ndi chihin ra Cristo. Ta iyó ndi chihin tunyee iñi maa Nyoo vatyí tyicuan caa ta cuvi tyinyee tucu nyuhu chi nyoho.

⁵ Saha ndo cuenda chi ndo tatu ñii vaha iñi ndo cuahán ndo chihin Nyoo.

Saha ndo cuenda vatyí ra Cristo ñohó ra ñima ndo tatu chinó vaha iñi ndo chi ra. Soco tatu ñima chihin cha ñii iñi ndo cuahán ndo chata Nyoo, ra Cristo ña nyaá ra chihin ndo. ⁶ Soco chitó vahi tyi coo quiví cunacoto ndo tyi vaha cuhva tyinyeeé ndi chi ndo tacuhva cuví cuhun vaha ndo chihin ra Cristo. ⁷ Ta chicán tahvi xaan ndi chi Nyoo chaha ndo, tacuhva vatyí ma sacuvi ndo cha ña vaha. Ñima cha cuñí ndi tyi catyí ñáyiví tyi vaha ndi. Soco cha cuñí ndi vatyí nyoho sacuví ndo maa maa ri cha vaha. Ñahri saha vasi catyí ñáyiví, an vaha, an ña vaha cuhva cha sacuví ndi. ⁸ Vatyí nyaá siqui ndi cha sacuví ndi cha vaha. Ma cuvi tixehe ndi tuhun ndicha. Noo ri cha cuví sacuvi ndi, cha sañahá ndi tuhun ndicha. ⁹ Yucuan chaha cusii xaan cuñí ndi cha ñahri fuerza maa ndi iyó chi ndi, ta cuhva tyi nyee cuñí ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cuhun ndo chihin Nyoo nyacua nya cha ñahri ca cumañi chi ndo. ¹⁰ Sacuhín carta ihya chi ndo cha ni ri ca cha cumañi quichi nu nyicú ndo. Vatyí sanduvaha ndo chi ndo. Tyicuan ta ma cuñi ca chi cha cahín chi ndo quiví chai nu nyicu ndo. Vatyí ndicha cha chahá Nyoo ityí chii cha sahí cuenda chi ndo. Soco chahá ra tyiño ihya chii vatyí sandunyeé que iñi ndo. Ta ñima cha sanducuihyá ndihi que iñi ndo.

¹¹ Ta nu ndihi cahín, yañi, catyí chi ndo, na nducu ndo cuhva nicoo vaha ndo ta sii cuñi ndo. Nanducu ndo cuhva coo cuiti ndo nuu Nyoo cha ñahri cumañi chi ndo. Na cunii iñi ndo, na coo vaha ndo chihin tahan ndo. Ta Nyoo ra cuñí xaan chi ndo, ta ra chahá cha taxi coo ñima ndo na cunyaa ra chihin ndo. ¹² Ta nacuhva maa ndo nocumi chi noo tahan ndo chihin cha sii cuñí ndo nyehé ndo chi ñu. ¹³ Ta vachí nocumi chi ndo sahá tandihí ñu yihí cuenda Nyoo nuu ihya.

¹⁴ Nacuhva Sutú Mañi yo Jesucristo cha vaha coo añima ndo. Ta nacoto ndo tyi Nyoo cuñí xaan ra chi ndo. Ta na cun- yaa Tatyí li ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ityi Galacia Cha Yihí Cuenda Nyoo

Ra Pablo tyaá ra noo carta chi ñu ityi Galacia cha yihí cuenda Nyoo

1 Yuhu ra Pablo cuví noo apóstol. Soco ñima ñáyivi tachí chii. Ta ñima rayii catyí vatyi ñihí yuhu tyiño ihya. Soco maa ra Jesucristo ta maa Nyoo Sutu yo chaha ra tyiño ihya chii. Vatyi ican Nyoo sanandoto chi ra Cristo mahñu ñu chihí. ²Yuhu ta tandihi yañi yo cha nyicú chihin, tyaá ndi carta ihya chi nyoho ñu yihí cuenda Nyoo tandihi vehe ñuhu Galacia. ³Nyoo Sutu yo ta Sutu Mañi yo Jesucristo nasoco ra chi ndo ta nacuhva ra cha taxi ri coo ñima ndo. ⁴Vatyi maa ra Jesucristo chaha ra ñáyivi ra tyiño nuu yo cha catyi cuatyí yo. Vatyi tacuhva sacacú ra chi yo mahñu ñu quiñi iyo cha iyó siqui ñuhu ñáyivi ihya vityin. Vatyi tyicuan caa tyaá maa Nyoo Sutu yo cuhva tyi sacuvi ra Cristo. ⁵Yucuan chaha na sacahnu yo chi maa Nyoo tyicuan ri maa. Ta na cuvi chi tyicuan caa.

Ñahri ca inga cuhva cuví cacu ñima yo

⁶Iyo xaan cuñí vatyi nyoho numi xaan cuahan sandoó ndo chi Nyoo, ra nacana chi ndo tyi nicoo vaha ndo chihin ra cha cuenda tumañi iñi cha sahá ra Cristo chi yo. Ta vityin siin caa ityi natyihi ndo cuahan ndo. Ta cuñi maa ndo tyi cucacu ndo chihin cuan. ⁷Soco ñahri ca inga cuhva cuví cacu ñima yo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chi yo. ⁸Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo ndi tuhun ra Cristo nuu ndo, ta siin caa, ta ñima tari cuhva sañaha ndi chi ndo quivi

cuan, Nyoo cutachi tuñi ra chi ndi. ⁹Cha catyí tuhun ihya chi ndo quivi cuan soco cuacatyí tiqui inga chaha chi ndo vityin. Tatu yóo cha cahán tuhun cha cacú ñima yo chihin ndo ta siin caa, ta ñima cuhva cha chiñi ndo quivi xihna ri, Nyoo cutachi tuñi ra chi ra cahán tyicuan caa.

¹⁰Cha catyí tuhun ihya chi ndo, ñima cha nduquí cuhva savahi chii nuu ñáyivi. Soco nduquí cuhva savahi chii nuu Nyoo. Tyehe ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduvi ra Pablo noo ra chicá tyiño Nyoo

¹¹Soco coto ndo tuhun ihya yañi, vatyi tuhun ra Cristo cha cahán yuhu, ñima tuhun cha ndichí xiñi ñáyivi cuví.

¹²Ñima ñáyivi sañaha chii. Yori sañaha chii. Soco suri maa ra Cristo sacotó chii.

¹³Vatyi nyoho chiñi ndo yoso caa chinyacuvi quivi cuan, quivi ñohi cuenda ñu Israel. Ta chitó ndo yoso caa cha xaan chica nyiquen chi ñu yihí cuenda Nyoo. Ta nduquí cuhva sativi cuhva chinó iñi ñu. ¹⁴Ta ñohi cuenda ñu Israel, yuhu cuví ra cuahan ityi nuu ca ta ñima ca suhva ca ra tahin cha in ri cuiya ndi. Vatyi cuñi xaan que sacuvi yoso cuhva chinyacuvi maa sutu chahni ta ityi chata ca. ¹⁵Soco nya ta ni cumañi caqui ta tyaá Nyoo cuhva tyi cusaha ra tumañi iñi chii. Ta nya cha chaa maa chi quivi cha tyaá ra cuhva, yucuan ta nacana ra chii. Vatyi cuñí xaan ra chii. ¹⁶Ta tyicuan caa sacuvi ra vatyi cohon nui chi Sehe ra. Tacuhva vatyi cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu ñima ñu. Ta quivi cha cuví tyehe caa, ña nduquí cuhva cha catyí ñáyivi chii ñáa cha tahán chi sacuvi. ¹⁷Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyi maa ra cha naha

cana Nyoo chi ra ta ñima ca yuhu. Soco chahin nya Arabia. Tyicuan ta cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chi ra Pedro. Ta ndoi chihin ra chahun quivi. ¹⁹ Soco ña nyehi chi inga apóstol. Noo ri ra Jacobo yañi Sutu Mañi yo nyehi. ²⁰ Ta chihin nuu Nyoo ta catyí chi ndo vatyí tuhun cha catyí chi ndo nu tutu ihya, cha ndicha cuví.

²¹ Cha yaha cha chahin Jerusalén ta chahin ityi Siria ta ityi Cilicia. ²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñoho nuu maa ra chii. ²³ Tacuhva cha cachini ri ra cahan ñu tuhun, vatyí catyí ñu: “Ra cha chica nyicon chi yo quivi cuan, vityin cahán noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyí ñu. ²⁴ Ta ra canyicu vehe ñuhu ra Cristo casacahnu ra chi Nyoo cha cuenda cha sacuvi Nyoo chihin tyicuan caa.

Ra nyisó tyiño vehe ñuhu Jerusalén, ndoó ra vaha cuhva sahá tyiño ra Pablo

2 Cha yaha cha uchi cumi cuiya, chahin Jerusalén inga chaha chihin ra Bernabé. Ta chahan ra Tito chihin ndi. ² Chahin nyicuan vatyí maa Nyoo sañaha chii vatyí tahán chi cuhin Jerusalén. Ta nacatyí chi ñu yoso caa sañahí tuhun ra Cristo chi ñu cha ñima ñu Israel cuví. Quita siin chihin ra cha canyiso tyiño vehe ñuhu, ta chahí cuenda chi ra yoso caa tuhvé cahin chihin ñu. Coto ma candoo ra vaha ta cacatyí ra vatyí yuhu sahá tyiño caha ri mai. ³ Soco candoo ra vaha. Vatyí ni ri chi ra Tito ta ña saniñi ra cha sacuvi ra costumbre circuncisión. Ta ra Tito ñima ra Israel cuví ra. ⁴ Ndicha vatyí quihvi xehe suhva ra cha catyí vatyí yañi yo cuví chi ra, soco ñima. Vatyí cuñi ra nyehi nyaa ra cuhva iyó yo. Vatyí libre

iyó yo cha cuenda ra Cristo Jesús. Soco cuñi ra cuan tyi cunyaca ñaha tucu ley chahnu chi yo. ⁵ Soco ni noo cuhva ta ña chaha ndi cha cunyaca ñaha ra cuan chi ndi. Vatyí cuñi ndi vatyí nyoho ma saña ndo cha ndicha tuhun ra Cristo cha cacu añima yo.

⁶ Soco maa ra canyisó tyiño vehe ñuhu, ñahri tuhun chaa chaha ra chii. Ta vasi cahnú tyiño canyisó ra cuan, soco cha cuenda chi yuhu, ñahri saha. Vatyí Nyoo ña sahá ra cuenda cuhva tyiño nyisó yo. Soco añima yo sahá ra cuenda. ⁷ Cha nuu cha catyí ra canyiso tyiño vehe ñuhu cuan chii ñáá ndihi tuhun, maa ra canacoto ra vatyí maa Nyoo tachí chii vatyí cahín tuhun ra Cristo chihin ñu cha ñima ñu Israel cuví. Tari tachí ra chi ra Pedro vatyí cucahan ra suri tuhun ra Cristo cuan chihin ñu Israel. ⁸ Vatyí suri maa Nyoo tachí chi ra Pedro tyi cuví ra apóstol cuenda ñu Israel. Ta tachí tucu ra chi yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuví nuu yucuan, nichón nuu ra vatyí Nyoo chahá ra tunyee iñi chii cha cahín tuhun ra Cristo chihin ñáyivi. Ta chaha ra ndaha ra chii, ta chi ra Bernabé vatyí candoo ra vaha cha sahatyiño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel. ¹⁰ Noo ri vatyí catyí ra chi ndi vatyí na nichon iñi ndi ta natyinyee ndi chi ñu ndahvi. Ta ican cuví cha nanducú xain cuhva sacuví tandihi quivi.

Ra Pablo cahán ra chi ra Pedro vatyí ña vaha cha nyacuví ra

¹¹ Soco quivi chahan ra Pedro ñuu Antioquía, cahan vavahi chi ra chihin nuu ra vatyí ña vaha cha nyacuví ra. ¹² Vatyí cha xihna ri vaha sacuví ra vatyí chachí ra chihin ñu cha ñima ñu Israel cuví, nyacua nya cha chaa suhva ñáyivi Israel cha tachí ra Jacobo. Tyicuan ta quichaha

ña chachí ca ra chihin ñu. Tyicuan caa sacuvi ra vatyí yuhví ra coto cahan ra itá ñni costumbre circuncisión cha chaꝥ coyo cuan chi ra. ¹³Tyicuan ta inga ra Israel cha yihí cuenda ra Cristo ndu ñin ri ra chihin ra Pedro. Ta sacuvi ra cha ña vaha cuan. Vatyí ndu uví yuhu ra tari ndu uví yuhu ra Pedro. Ta nyacua nya ra Bernabé ta ndutahan ra chihin ra. ¹⁴Soco nyehí vatyí ña vaha cuahán nyacuvi ra. Ñima tari cuhva catyí tuhun ra Cristo. Yucuan chaha catyí chi ra Pedro chihin nuu tandihí ñu canyicu cuan: “Yoho cuvún noo ra Israel. Ta iyón tari iyó ñáyivi cha ñima ñu Israel cuví. ¿Yoso caa cha cuñún saniñun chi ñu tyi sacuvi ñu costumbre cha sacuvi ñu Israel? Ta ni maun ta ña sacuví con”, catyí yuhu chi ra.

¹⁵Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví. ¹⁶Soco chitó yo vatyí ma cuví saváha yo chi yo nuu Nyoo chihin cha nanducú yo cuhva sacuvi yo ley chahnu cha tyaa ra Moisés. Soco nduvahá yo nuu Nyoo cha cuenda cha chinó ri ñni yo chi ra Jesucristo. Yucuan chaha chinó tucu ñni maa yo chi ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo cuhva sacuvi yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuvi yo cuhva catyí ley chahnu.

¹⁷Soco vityin tatu nducú yo cuhva nduvaha yo nuu Nyoo cha cuenda ra Cristo, cuñí chi catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chi catyí vatyí ra Cristo sacuví ra tyi iyó cuatyí yo vatyí sandoꝥ yo ley ta nachino ñni yo chi ra? Ñima. ¹⁸Soco tyehe ta naquehen tucu yo ley cha cha yahꝥ sandoꝥ yo, yucuan ndicha coo cuatyí yo. ¹⁹Vatyí ley cuan sañahá chi chii vatyí tahán chi cuví, ta yucuan chaha

sandihí tuhun cha nduqui cuhva caqui chihin ley cuan, ta chihí cha cuenda chi cuví cuan, tacuhva cuví coi cha cuenda Nyoo. ²⁰Yuhu, tari cha chihí nuu cruzi ñin ri chihin ra Cristo. Ta ñima ca ñayiví mai iyé soco ra Cristo iyó ra añime. Ta ñayiví ra cha iyé vityin, iyé soco chihin cha chinó ñni chi ra cha cuví ra Sehe Nyoo. Ican ra cuñí ra chii, ta chihí ra cha catyí cuatyí yuhu. ²¹Ña cuñí yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chi cuan.

Naquehén yo Tatyí Ii Nyoo cha cuenda cha chinó ñni yo chi ra Cristo

3 ¡Ñana cha tondo iyó nyoho ñu canyicu Galacia chiña! ¿Yóo cha sativí chi ndo vatyí ña cuñí ca ndo quichaha ndo tuhun cha ndicha? Cachi xaan chahꝥ ndi cuenda tuhun ra Jesucristo chi ndo. Ta cutuñi vaha ñni ndo ñáá cuenda chihí ra nu cruzi. ²Noo ri cuñí ndaca tuhin chi ndo. ¿Atu naquehen ndo Tatyí Ii Nyoo cha cuenda cha sacuví ndo cha catyí ley ra Moisés, o cha cuenda cha chinó ñni ndo tuhun ra Cristo cha chiñi ndo? ³¿Yoso caa cha tondo xaan iyó ndo vityin? Ta quiví xihna ri vaha xaan quichahꝥ ndo chi Nyoo chihin tunyee ñni Tatyí Ii ra. Soco vityin, ¿yoso caa cuñí ndo coo ndo ñayiví chaa chihin fuerza maa ndo? ⁴¿Atu cha caha ri nyehe ndo cha sacuvi Tatyí Ii Nyoo chihin ndo? Ñima cha caha ri cuví, cahví ñni. ⁵¿Ñáá tuhun chahá Nyoo Tatyí Ii ra chi ndo, ta sacuví ra milagru mahñu ndo? Ñima cha cuenda vatyí nducu ndo cuhva sacuvi ndo cha catyí ley, soco cha cuenda vatyí chinó ñni ndo tuhun ra Cristo cha chiñí ndo.

⁶Ra Abraham, chinqo ñni ra tuhun cahꝥ Nyoo chihin ra, yucuan chaha cuví ra noo ra vaha nuu Nyoo. ⁷Yucuan chaha tahán chi coto ndo vatyí ñu cha

ndicha cuví ñáyivi chi ra Abraham, ican ñu cuan chinó iñi ñu chi Nyoo. ⁸Ta cha naha ndoo tuhun Nyoo nu tutu. Ta catyí chi vatyi nu cuahán ca chi quivi, cusacuvi Nyoo tyi nduvaha ñáyivi cha ñima ñu Israel cuví nuu ra cha cuenda cha chinó iñi ñu chi ra. Yucuan chaha catyí Nyoo chi ra Abraham ta cha naha: “Tandihi ri maa ñu cunasoque cha cuenda maun”, catyí Nyoo chi ra. ⁹Yucuan chaha ñu cha chinó iñi chi ra Cristo, Nyoo nasocó ra chi ñu iin ri chihin ra Abraham, vatyi chinó iñi tucu maa ra.

¹⁰Ñu cha itá iñi ley cha tyaa ra Moisés, cutachi tuñi Nyoo chi ñu. Vatyi tuhun Nyoo catyí. “Tandihi ñu cha ña sacuvi tandihi cuii maa tuhun cha nyaá nu libru ley cuan, cutachi tuñi Nyoo chi ñu.”

¹¹Ta ndicha vatyi yori yo nduvaha yo nuu Nyoo cha cuenda cha itá iñi yo ley cuan. Vatyi tuhun Nyoo catyí chi: “Ra nduvahá nuu Nyoo cha cuenda cha chinó iñi ra, coo ra ñáyivi”, catyí tuhun Nyoo. ¹²Ta ley ra Moisés ña cu iin ri chi chihin cha chinó iñi yo chi ra Cristo. Vatyi catyí ley cuan: “Yóo ñu cha sacuvi tandihi cuii ley ihya, coo ñu ñáyivi cha cuenda cuan”, catyí chi.

¹³Ra Cristo natavá ra chi yo ndaha ley cha catyí tyi tahán chi cutuñi chi yo cha cuenda cuatyí yo. Vatyi maa ra nanduvi ra noo ra iyó cuatyí tyiño nuu yo. Vatyi catyí tuhun Nyoo: “Ñima ra vaha cuví ra cha chihí ta tacaá nu yutun.” ¹⁴Ty-icuan caa cuví tacuhva vatyi cha cuenda ra Cristo Jesús ta nasocó Nyoo chi ñáyivi cha ñima ñu Israel cuví, tari catyí ra chi ra Abraham tyi cunasoco ra chi ra. Ta chihin cha chinó iñi yo chi Nyoo, naquehén tandihi yo Tatyí Ii cha catyí Nyoo tyi cuhva ra chi yo.

Ley chahnu sañahá chi chi yo vatyi iyó cuatyí yo, soco ña sacacú chi chi yo

¹⁵Yañi, cuacuhve noo cuhva chi ndo, cuhva iyó yo siqui ñuhu ñáyivi ihya. Tatu noo ra catyí ra vatyi cucuhva ra cha cucuhva ra chi inga ra. Ta tatu cha yaha tyihí ra firma, yori cuví satani. Ta yori cuví natyiso suhva ca siqui. ¹⁶Ta vityin, Nyoo catyí ra tyi cucuhva ra cha cucuhva ra chi ra Abraham ta chi nonga ra cha vachi tata ra. Ña catyí nu tutu Nyoo vatyi cuhva ra chi cuaha ra vachi tata ra, soco chi nonga ri ra. Ta ican ra cuan cuví ra Cristo. ¹⁷Cha catyí yuhu, ican cuví ihya: Nyoo natyihí tahan ra tuhun chihin ra Abraham. Ta iin ri tuhun cahán ra. Ty-icuan ta yaha cumi ciento oco uchi cuiya ta cha ley cha tyaa ra Moisés. Soco ma cuvi casi ley cuan nu natyihí tahan Nyoo tuhun chihin ra Abraham. Ta ma cuvi casi chi nu naquehen yo cha catyí Nyoo tyi cuhva ra chi yo. ¹⁸Tyehe ta naquehén yo cha tahán chi chi yo cha cuenda ley ra Moisés, cha caha ri cuvi tuhun natyihí tahan Nyoo chihin yo. Soco vatyi Nyoo catyí ra chi maa ra Abraham vatyi cuhva maa ra chi ra.

¹⁹Tatu tyicuan caa, ¿ñáá cuenda vaha ley ra Moisés? Chaha Nyoo ley cuan soco cha yaha catyí ra tyi cuhva ra cha cucuhva ra chi yo. Vatyi ley cuan sanatuvi chi cuatyí yo. Ta ndoo chi nyacua nya quivi quichí ra Cristo ra cuví tata ra Abraham. Ta chi maa ra Cristo catyí Nyoo tyi cuhva ra cha cucuhva ra. Ta ángel Nyoo chaha cuenda ley cuan chi ra Moisés. Ta ra Moisés chaha ra chi ñáyivi. ²⁰Soco Nyoo noo tuhun ri maa ra cahán ra chihin ra Abraham quivi cuan. Ta ña chiñuhú cha nducu ra noo ra nacatyí tuhun cuan chi ra Abraham.

²¹¿Atu cuñí chi catyí vatyi ley cha tyaa ra Moisés ña chachí tahan chihin cha catyí Nyoo tyi cuhva ra chi

yo? Ñima. Soco tyehe ta cuví coo yo ñáyiví chaa cha cuenda ley cuan, yucuan ndicha nduvaha yo nuu Nyoo cha cuenda chi. Soco ma cuví. ²²Vatyí catyí nu tutu Nyoo tyi iyó cuatyí tandíhi cuii ñáyiví. Vatyí tyicuan caa ta ñu chinó íni chi ra Jesucristo cuví ñíhi ñu ñáyiví chaa cha catyí Nyoo tyi cuhva ra chi yo.

²³Ta ni cumañi ca quichi tuhun cha chinó íni yo chi ra Cristo, ley cuan chicumí chi chi yo tari cha ñoho yo vehe caa. Vatyí nyatú yo nyacua nya sañaha Nyoo chi yo yoso caa chino íni yo chi ra. ²⁴Ta ley cuan cuví tari noo ñu cha sahá cumi chi ra cuatyaa. Vatyí ley saha cumi chi yo tari ra cuatyaa nyacua nya quivi quichí ra Cristo. Ta cuví chinó íni yo chi ra ta nduvaha yo nuu Nyoo. ²⁵Ta vityin cha chaá quivi cha chinó íni yo chi ra Cristo, ña sahá cumi ca ley cuan chi yo tari noo ra cuatyaa.

²⁶Vatyí tandíhi yo cuví yo sehe Nyoo vatyí chinó íni yo chi ra Cristo Jesús. ²⁷Ta tandíhi yo condutyá yo ta ndu ñin yo chihin ra Cristo. Vatyí nyaá ra añima yo. ²⁸Ña ñíni xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayíi, an cuví yo ñusihí, soco ña chiñuhu ca cuan. Vatyí cha ñin ri cuví yo chihin ra Cristo, noo ri cuví yo chihin ra. ²⁹Ta tatu cuenda ra Cristo yihí ndo, ndícha cha ñáyiví vachi tata ra Abraham cuví ndo. Ta ñihí ndo cha catyí Nyoo chi ra Abraham tyi cuhva ra chi ra.

4 Cuacuhve minoo cuhva chi ndo. Noo ra cuehe tatu chihí sutu cue, ta sandoo sutu cue tandíhi cha tyayíi ra chi cue, ra cuehe ihya ma cuvi cotyíño ñaha cue cha tyayíi sutu cue. Nyacua nya quivi cuahnu cue ta cuvi cotyíño cue. Ta cha ni ri ca cha ta cuahnu ca cue, cuví cue tari noo musu ri. Vasi chi maa cue cuví tandíhi cha tyayíi sutu cue. ²Iyó ra cumí chi cue nyacua nya chaa cuiya cue cha catyí sutu cue, tyi naquehen cue

cha tyayíi cuan. ³Ta tyicuan caa cuví maa yo. Cha ni ri ca cha ta quichí ca ra Cristo, cuví yo tari noo musu ri chi cha nyacá ñaha siqui ñuhu ñáyiví. ⁴Soco quivi tahan chi, Nyoo tachí ra chi Sehe ra, sacacú noo ñaha sihi chi ra. Ta chinyacá ñaha ley chahnu chi ra. ⁵Tachí Nyoo chi ra tacuhva sacacú ra chi yo ndaha ley cuan. Vatyí tyicuan caa ta Nyoo naquehen cuenda ra chi yo tari sehe ra.

⁶Ta vatyí sehe ra nanduví yo, Nyoo tachí ra Tatyí lí ra Cristo cunyaa añima yo. Ta cha cuenda Tatyí lí ra caná chaa yo chi Nyoo ta catyí yo: “Sutu Mañi yuhu.” ⁷Yucuan chaha sehe Nyoo cuvun ta ñima ca noo musu ri. Ta cha cuenda cha cuvún sehe Nyoo, chahá ra cha vaha cha tahán chi chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸Quivi ta cohon nuu ca ndo chi Nyoo, cuví ndo musu noo cha ñima Nyoo cuví. ⁹Soco vityin ñohó nuu ndo Nyoo, o maa Nyoo ñohó nuu ra chi ndo. ¿Yoso caa cha cuñí ndo natiin tucu ndo noo tuhun ndahvi cha ñima ri tuhun, ta nanduvi tucu ndo musu inga chaha? ¹⁰Nyoho sanducahnú ndo quivi vico, quivi natyacú yoo, ta vico cuiya. ¹¹Yuhví xain coto vaha ñahri maa tuhun sahá tyiñe chihin ndo.

¹²Yañi, chacú ndahvi nuu ndo na nanduvi ndo tari mai (cha ña nyacá ñaha ca ley chii). Vatyí yuhu cha nanduví tari maa ndo, soco ñima cha sativí ndo chii. ¹³Vatyí cha chitó ndo quivi chahan nui ñuu ndo yihí noo cuehe chii. Ta chahá chi cuhva cahín tuhun ra Cristo chihin ndo. ¹⁴Ta cuehe cuan cuví tari noo prueba cha cuenda vatyí ña tyaa xiin ndo chii. Soco vaha naquehen cuenda ndo chii, tari noo ángel Nyoo, ta tari cha vatyí suri maa ra Cristo cuví. ¹⁵¿Nya nya ca sii xaan cuví chi ndo chihin

vityin? Vatyi yuhu cuví cha ndaa vatyi quiví cuan, nyacua caña iñi ndo catava ndo chiti nuu ndo ta cuhva ndo chii, tyehe ta cuví nduvahi chihin cuan. ¹⁶ Ta vityin, ¿atu cuñí maa ndo tyi nanduví yuhu noo ra cha xaan cahnu iñi ndo cha cuenda vatyi catyí cha ndicha chi ndo?

¹⁷ Ñáyivi cuan, cuñí xaan ñu chi ndo, catyí ñu. Soco ñima chihin cha vaha. Vatyi cha cuñí ñu cuan, cha sacanyaha ñu chi ndo chi ndi. Ta cunyicon ndo chi maa ñu. ¹⁸ Soco vaha cha cuñí yo chi ñáyivi, soco chihin cha vaha, ta tyicuan ri maa. Ta ñima iin yaha ri cuhva cha nyaa ri yuhu chihin ndo. ¹⁹ Sehe luhli, inga chaha nyehí tindoho ta cha uhvi cha catyi ndo. Tari noo sihi cha yihí cha uhvi chi ña tatu cuacacu sehe ña. Ta cunyehe que tindoho nyacua nya ndunyehe vaha ndo chihin fuerza maa ra Cristo. ²⁰ Vaha tyehe ta nyaí chihin ndo vityin vityin. Tacuhva cuví cahan vii chihin ndo inga cuhva. Vatyi ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

²¹ Nyoho cha cuñí ndo cha cunyaca ñaha ley ra Moisés chi ndo, catyi ndo chii. ¿Atu ta cuiñi ca ndo cha catyí ley cuan? ²² Catyí chi vatyi ra Abraham chiyo uvi tahan sehe ra. Noo sehe ra chiyo chihin ñaha cha cuví musu ñasihi ra. (Chinañi ña Agar.) Ta nonga sehe ra chiyo chihin cu Sara cha cuví ñasihi vaha ra. ²³ Cacú sehe ñaha cha cuví musu cuan tari cacú tandihi ra cuateyaa. Soco sehe ñasihi vaha ra Abraham cacú cue tacuhva chino cava cha catyí Nyoo chi ra Abraham vatyi cuhva ra noo sehe chi ñasihi ra. ²⁴ Ta chihin ihya iyó noo cha cuñi chi catyí chi chi yo. Nínduvi ñusihi cuan cuví ñu tari uvi tahan tuhun cha natyihí tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan

cuví ñu tari cu Agar, vatyi noo musu ri cuví tucu maa ña chihin sehe ña. ²⁵ Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quiví vityin. Vatyi ñáyivi ñuu cuan nyaá ñu ndaha ley chahnu. Tari noo musu ley cuan cuví ñu. ²⁶ Soco nya andivi iyó inga Jerusalén, cha cuví ñuu yo. Ta yori nyacá naha chi chi. Ta cuví chi tari sihi yo. ²⁷ Ta catyi tuhun Nyoo:

Cusiñi iñi yoho, ñaha sihi cha ña cuví coo sehe.

Yoho yori sehun.

Çana chaa chihin cha sii cuñun, yoho cha ña ñoho nuu cha uhvi cha cacu sehe.

Vatyi ñaha sihi cha sanando yii chi, coo ca sehe ña ta ñima ca ñusihi cha iyó yii, catyí tuhun Nyoo.

²⁸ Yañi, yoó cuví yo tari ra Isaac, ra cuví sehe cu Sara. Cuví yo sehe ra Abraham cuenda tuhun cha natyihí tahan Nyoo chihin ra. ²⁹ Ta ra cha cuví sehe ñaha cha cuví musu cuan xaan iñi ra chi ra Isaac cha cuví sehe ñasihi vaha ra Abraham. Tyicuan caa cuví tucu vityin. Ra cha cuñí vatyi sacuví yo cha catyí ley, xaan iñi ra ta chicán nyicon ra chi yo cha cuví yo ñáyivi nacacu chaa chihin Tatyí Ii Nyoo. ³⁰ Soco ¿ñáá cha catyí tuhun Nyoo? Catyí chi: “Tava ñehe chi ñaha cha cuví musu cuan chihin sehe ña. Vatyi sehe ña ma cuví naquehen cue cha tahán chi chi sehe ñasihi vaha ra Abraham”, catyí tuhun Nyoo. ³¹ Yucuan chaha, yañi, ñima tari sehe ñaha cha cuví musu cuan cuví yo. Soco cuví yo tari sehe ñasihi vaha ra Abraham.

Ñihi cuinanyaa yo chihin cha ña nyacá ñaha ca ley chi yo

5 Ra Cristo sacacu ra chi yo ndaha ley chahnu cuan. Yucuan chaha saha ndo cuenda coto nanduvi ndo musu inga chaha cuenda ley.

²Tyasoho ndo, yuhu ra Pablo catyi chi ndo. Tatu cuhva ndo cha saha ñu circuncidar chi ndo, ta cuñí maa ndo tyi cucacu ndo chihin cuan, ma cuvi tyinyee ra Cristo chi ndo. ³Cuñí catyi inga chaha chi ndo vatyi tandihí ra cha cuñí cacu chihin cha saha ñu circuncidar chi ra, cuñí chi vatyi sacuvi ra tandihí cuii cha catyí ley ra Moisés ñandihí. ⁴Tandihí nyoho cha nducú ndo nduvahá ndo nuu Nyoo cha cuenda ley cuan, cha sañá tahan ndo chihin ra Cristo cuví cuan. Ta sañá ndaha ndo tumañi ñi cha chahá Nyoo chi ndo. ⁵Soco yoó chihin cha tyinyeé Tatyí Ii Nyoo chi yo ta chinó ñi yo chi ra Cristo. Ta itá ñi yo nduvahá yo nuu Nyoo. ⁶Vatyi tatu ñi ri cuví yo chihin ra Cristo Jesús, ñahri tuhun cha sacuví yo costumbre circuncisión, o cha ña sacuví yo. Cha vale ca tatu chinó ñi yo chi ra Cristo. Ta chihin cha chinó ñi yo coo yo, chihin cha cuñí yo chi noo noo tahan yo.

⁷Nyoho vaha cuahán ndo quivi cuan. ¿Yóó cha sativí chi ndo? Ta ña tyasohó ca ndo cha ndicha. ⁸Tuhun cha sañahá ñu cuan, ñima tuhun Nyoo ra nacana chi yo cuví. ⁹Vatyi tari nandaá yuchan pan chihin chiin ri yuchan iya, tyicuan caa tucu noo ri ñáyivi quiñi caa cuví sativí ñu chi cuaha ñáyivi. ¹⁰Nyoo cutachi tuñi ra chi ñáyivi cha sativí chi ndo. Ñahri cuenda ra yóó ñu cuví ñu. Soco yuhu chitó vahi tyi Sutu Mañi yo cutyinyee ra chi ndo tacuhva vatyi nyoho ma caca xiñi ndo inga cuhva cha ña sañahí chi ndo.

¹¹Ta cha cuenda chi yuhu, yañi, tyehe ta catyí vatyi ñu chinó ini chi ra Cristo cuñí chi cha sacuvi ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihí nu cruzi cha catyi cutatyí yo. ¹²Soco ra sayangá chi ndo chiña, vaha cha quita ra nu nyicu ndo, tacuhva cha ma sayanga ca ra chi ndo.

¹³Vatyi nyoho, yañi, nacana Nyoo chi ndo vatyi coo ndo libre. Soco ñima cha cuenda cha iyó ndo libre ta cuví sacuvi ndo ñáá ndihí cha cuñí coño ñuhu ndo. Soco sacuvi ndo tyiño nuu tahan ndo chihin cha cuñí ndo chi ñu. ¹⁴Vatyi iyó noo tuhun Nyoo cha catyí chi: “Cuñi ndo chi tahan ndo tari cuñí ndo chi maa ndo”, catyí chi. Ta tatu ndicha ndicha cha cuñí yo chi tahan yo, ña yíi sacuví yo tandihí cha catyí ley chahnu. ¹⁵Saha ndo cuenda vatyi tatu cahán ndo ta sataśi ñi ndo chi tahan ndo, cutivi nu nyicu ndo.

Cuhva cuñí coño ñuhu yo ta cuhva iyó yo chihin Tatyí Ii Nyoo

¹⁶Cha cuñí catyi chi ndo ican cuvi ihya: Coo ndo chihin tunyee ñi Tatyí Ii Nyoo. Tyicuan caa ta ma cuvi ca sacuví ndo cuhva ña vaha cuñí ndo. ¹⁷Vatyi cha sacuví yo cha ña vaha cha cuñí yo, ñima cuhva cuñí Tatyí Ii Nyoo cuví. Vatyi Tatyí Ii Nyoo ña cuñí chi cha sacuví yo cha ña vaha. Ta coño ñuhu yo ña cuñí chi sacuví chi cuhva cuñí Tatyí Ii Nyoo. Ña nacachí tahan cha cuñí Tatyí Ii Nyoo chihin cha cuñí coño ñuhu yo. Ta yucuan chaha ma cuvi sacuvi yo cha cuñí yo. ¹⁸Soco tatu sacuví yo cha catyí Tatyí Ii Nyoo chi yo, ma cuvi ca cunyaca ñaha ley chi yo.

¹⁹Ña xehe caa ñu sacuví cuhva ña vaha cha cuñí coño ñuhu. Yihí ra, iyó ñasihi ra ta iyó inga ñu chi ra. Ta yihí ñu iyó yíi ñu ta iyó inga ra chi ñu. Ta yihí ñu sacuví ñu cha ña vaha chihin coño ñuhu ñu ta iyó viciu chi ñu. ²⁰Yihí ñu sacahnú ñu xitohyo. Yihí ñu sataśi ñu. Yihí ñu tasi cuñí nyehe ñu chi tahan ñu. Yihí ñu cañí tahan ñu. Yihí ñu cuiño ñu. Ta yihí ñu yatyin ñi ñu. Yihí ñu chicá xiñi ñu maa maa ri cha vaha chi maa ñu. Ta yihí ñu iyó división nu nyicu ñu. Vatyi cacañí tahan ñu. Ta tyicuan caa ta cusíñ ñu. ²¹Ta yihí ñu nyiyó ñi ñu cha tyayíi. Ta yihí ñu cachahñí chi tahan ñu. Ta yihí ñu

tuhva ñu chiñi. Ta yihí ñu chachí cuahyi ñu. Ta sacuví ñu cuaha ca cha sacuví ñu. Ta catyí chi ndo tari catyí chi ndo quivi cuan. Vatyí tandihí ñu cha sacuví tyehe caa ma cuvi naquehen cuenda ñu nu nyacá ñaha Nyoo.

²²Soco cha chahá Tatyí Ii Nyoo, ican cuví ihya: cha cuñí yo chi Nyoo ta chi tahan yo, cha sii cuñí yo, cha taxi cuñí añima yo, cha cama iyó yo chihin ñáyivi, cha masu iñi yo, cha vaha ñáyivi cuvi yo, cha ña cundihñi yo sacuví yo cha vaha chihin ñáyivi, cha chinó iñi yo chi ra Cristo. ²³Ta inga cha chahá Tatyí Ii Nyoo chi yo, ican cuví ihya: cha ndahvi sahá yo chi yo, cha ña sacuví yo cuhva cuñí coño ñuhu yo. Tatu sacuví yo tandihí cha vaha ihya, ni noo ley ta ma cuvi catyí chi tyi iyó cuatyí yo. ²⁴Ta yoó cha yihí yo cuenda ra Cristo Jesús, cha sandihí yo tuhun cha sacuví yo cuhva ña vaha cha cuñí coño ñuhu yo. ²⁵Ta tari cha iyó yo ñáyivi chaa cha cuenda Tatyí Ii Nyoo, tyicuan caa cuñí tucu chi cha quichahá yo cha saquehen ityi ra chi yo.

²⁶Ma cahnu saha yo chi yo. Ta ma sacañi tahan yo chi tahan yo. Ma quichi cuvi iñi yo cha chii inga tahan yo.

Tahán chi tyinyee yo chi tahan yo

6 Yañi, tatu nanyehé yo sacuví noo tahan yo cuatyí. Nya yo cha ñihi nyaá yo chihin Tatyí Ii Nyoo tyinyee yo chi ñu na ndunyeen ñu inga chaha. Soco cuñí chi cahán vii yo chihin ñu chihin cha vita iñi yo. Ta cuñí chi sahá yo cuenda chi yo coto nducu nyehe tucu cuhna chi maa yo. ²Na tyinyee yo chi tahan yo ñáá cha cuví chi ñu. Tatu tyicuan caa sacuví yo, quichahá vaha yo chi ra Cristo cuví cuan.

³Tatu nya noo yo cuñí maa yo vatyí cahnu ñu cuví yo, ta ñahri ñu cuví yo, suri chi maa yo sandaví ñaha yo. ⁴Ma saha yo tuhun tyi vaha yo tari vaha noo hermano cha vaha chicá chihin Nyoo.

Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusii cuñi yo. ⁵Vatyí tahán chi cunyeen noo noo yo ñáá ndihí cha tyisó Nyoo siqui yo.

⁶Ta cuñí chi tyinyee ndo chihin cha chiñuhú chi ra cha sañahá tuhun Nyoo chi ndo.

⁷Ta ma sandaví ñaha ndo chi ndo. Nyoo yori cuví cuacu nyaá chi ra. Vatyí tandihí cha tachí ñáyivi, ican cuan cunaquehén ñu. Vatyí tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihi ñu. ⁸Tatu noo ñáyivi nyacuví ñu cuhva ña vaha cha cuñí coño ñuhu ñu, suri maa cha sacuví ñu cusativí chi chi ñu. Soco tatu nyacuví ñu cuhva cuñí Tatyí Ii Nyoo, Tatyí Ii Nyoo cucuhva noo ñáyivi chaa cha ma naa ca maa tyi coo ñu. ⁹Yucuan chaha ma cutatu yo cha sacuví yo cha vaha. Vatyí tatu ma ndu uvi iñi yo, coo quivi ta naquehen yo cha vaha. ¹⁰Yucuan chaha tahan ri chaha cha chahá chi cuhva, na sacuvi yo cha vaha chihin tandihí ri ñáyivi. Ta cha xihna cuii ri sacuvi yo cha vaha chihin ñu yihí cuenda Nyoo.

Cusii xaan cuñí ra Pablo vatyí nyehé ra tindoho cha cuenda ra Cristo

¹¹Nyehé ndo ñana cha nahnu letra tyái chihin ndahi nu tutu ihya vityin. ¹²Ñu cha cuñí saniñí chi ndo vatyí sacuvi ndo costumbre circuncisión, saniñí ra chi ndo vatyí cuñí ra cuvaha ra nuu ñáyivi. Ña cuñí ra nyehe ra tindoho cha cuenda ra Cristo, ra chihí nu cruzi. ¹³Vatyí ni maa ra cha sacuví ra costumbre circuncisión cuan ta ña quichahá ra tandihí cha catyí ley. Soco cuñí ra cha sacuvi nyoho costumbre cuan. Vatyí tyicuan caa ta cuví sacahnu ra chi ra vatyí sacuví ndo cuhva catyí ra. ¹⁴Soco yuhu ña cuñí sacahni chii cha cuenda ñáá ndihí tuhun. Soco sii xaan cuñí cha

chihí Sutu Mañi yo Jesucristo nu cruzi cha cuenda yuhu. Vatyí cha cuenda cha chihí ra nu cruzi, tari quívi cha yaha chihí cha quiñi caa cha iyó ñayívi ihya. Ta cha yaha chihí tucu mai cha cuenda cuan. ¹⁵Vatyí tatu nyicón yo chi ra Cristo Jesús, ña niñi xaan cha sacuví yo costumbre circuncisión o cha ña sacuví yo. Noo cha niñi ca, cha nanduví yo noo ñayívi chaa. ¹⁶Tandihí ndo cha iyó ndo tyehe caa, ñaquehen ndo cha taxi ri coo añima ndo. Ta na cundahvi cuñi ra

nyehe ra chi tandihí ndo, ñu cha ndicha cuví ndo ñayívi cuenda ra.

¹⁷Cha vityin ta nu cuahán chi ityi nuu ca, ni nonga ndo ta ma cuhva ca ndo tisihi chii. Vatyí tandihí pehla cha nyaá coño ñuhi, cuñí chi catyi vatyí ndicha cha cuví yuhu noo ra chicá tyiño Sutu Mañi yo Jesús.

¹⁸Yañi, Sutu Mañi yo Jesucristo na nasoco chi tandihí ndo. Ta tyicuan caa na cuví chi.

Carta Cha Sacuhun Ra Apóstol Pablo Chi Náyivi Nuu Éfeso Cha Yihí Cuenda Nyoo

Nu sacuhún ra Pablo noo tutu chi ñu ñuu Éfeso cha yihí cuenda Nyoo

1 Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyai noo carta ihya chi tandihí ndo cha yihí ndo cuenda Nyoo ñuu Éfeso chiña, ta ní ñi ndo chinó ñi ndo chi ra Cristo Jesús. Ta ñi ri cuví ndo chihin ra. ² Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

Cha ñi ri cuví yo chihin ra Cristo, Nyoo nasocó xaan ra chi yo

³ Na sacahnu yo chi Nyoo, ra cuví Sutu Sutu Mañi yo Jesucristo. Vatyí nasocó xaan ra chi yo chihin tandihí nuu cha vaha cha iyó andiví cha cuenda cha ñi ri cuví yo chihin ra Cristo. ⁴ Vatyí nyata ni cumañi ca savaha ra ñuhu ñayiví ta nacachí vaha ra chi yo tyi cu ñi ri yo chihin ra Cristo. Vatyí tyicuan caa cundundí yo nuu ra chihin cha ñahri ca cuatyí yo. Cha cuenda cha cuñí ra chi yo, ⁵ ta nyata cha naha ta tyaa ra cuhva chi yo vatyí nanduví sehe ra chi yo cha cuenda ra Jesucristo. Tyicuan caa sacuví ra vatyí yucuan cuhva cuñí maa ra. ⁶ Yucuan chaha tyicuan ri sacahnú yo chi ra. Vatyí vaha xaan ñayiví cuví ra. Ta cahnu xaan tumañi ñi chahá ra chi yo. Vatyí sacu ñi ri ra chi yo chihin Sehe ra, ra cha cuñí xaan ra chi. ⁷ Ta cha cuenda cha cuñí xaan Nyoo chi yo, natavá ra chi yo ndaha ra ña vaha, tacuhva cha ma cutuñi chi yo. Vatyí chihin cha chatí ñi Sehe ra, sandachí ra cuatyí yo. Ta tyicuan caa sahá Nyoo ticahnu ñi chi yo. ⁸ Ta vatyí cahnu xaan tumañi ñi sahá ra chi yo, chahá xaan ra cha chiñi tuñi ra chi yo.

⁹ Ta chahá ra cha cutuñi ñi yo tuhun ra cha ña chito ñayiví. Vatyí sacotó ra chi yo yoso cuhva tyaa ra cuhva tyi sacuvi ra chihin tandihí cha iyó cha cuenda ra Cristo. ¹⁰ Vatyí coo quiví cuchino cava cha tyaa ra cuhva tyi sacuvi ra. Vatyí cusandu ñi ri ra tandihí cha iyó ihya ñayiví ta cha iyó andiví, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chi chi yo. Vatyí Nyoo nyata cha naha nacachí ra chi yo tyi cu ñi ri yo chihin ra Cristo. Tyicuan caa tyaa Nyoo cuhva tyi cusacuvi ra. Ta maa ra sacuví tandihí yoso cuhva nyehé maa ra tyi vaha. ¹² Ta tyehe caa sacuví ra tacuhva vatyí nyuhu cha nachino ñi ndi chi ra Cristo cha xihna ri, coo ndi soco cha sacahnu ndi chi Nyoo cha cuenda cha cahnu cuví maa ra. ¹³ Ta tyicuan caa tucu nyoho. Vatyí quiví chiñi ndo tuhun Nyoo cha ndicha vaha, catyí ñu chi ndo tuhun ra Cristo yoso caa sacacú ra chi yo. Ta chino ñi ndo chi ra. Ta ndu ñi ri ndo chihin ra. Ta tari cha tyaa Nyoo tuñi ra chi ndo cuví cuan, vatyí chahá ra Tatyí Ii ra cohon añima ndo, tari cuhva catyí ra tyi sacuvi ra. ¹⁴ Ta ican maa Tatyí Ii cuví cha chahá quiví ri Nyoo chi yo tacuhva cuví naquehen ca yo cha cucuhva ra chi yo. Vatyí tyinyeé Tatyí Ii ra chi yo nyacua nya quiví ndihí sacacu ra chi yo, cha cuví yo ñayiví chi ra. Ta tandihí ihya sacuví ra chihin yo tacuhva sacahnu yo chi ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahvi chi Nyoo, ña sandihí tuhun cha nacuhvé tyahvi nyoo chi ra cha cuenda ndo. Vatyí ñihí tuhun tyi chinó vaha ñi ndo chi Sutu Mañi yo Jesucristo. Ta cuñí xaan ndo chi tandihí ñu tahan yo ñu yihí cuenda Nyoo. ¹⁷ Chiquén chi Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chi ra nacuhva ra cha chiñi tuñi Tatyí Ii ra chi

ndo, tacuhva cutuñi iñi ndo cha sañahá ra chi ndo. Vatyí cohon nuu vaha ca ndo chi ra. ¹⁸Ta chiquén chi ra, na nuña ra cha chiñi tuñi xiñi ndo, na coto ndo ñáá cha cuñí ra cha naquehen ndo cha cuenda cha caná ra chi ndo. Ta na coto ndo ñana cha tyaqui ta tyayii cha chahá Nyoo chi yo ñu yihí cuenda ra. ¹⁹Ta chiquén chi Nyoo tyi cuhva ra cha coto ndo ñana cha cahnu tunyee iñi iyó chi ra, nyacua ña cuví tyicuhva yo. Ta ican cuan tyinyeé chi yo cha chino iñi yo chi ra. Ta suri maa chihin tunyee iñi ihya ²⁰Nyoo sanandoto ra chi ra Cristo. Ta cuatyaa ra chi ra chiyo vaha ra nya andivi. ²¹Ta yucuan cuví nu sacahnu xaan ca Nyoo chi ra Cristo cha nuu tandihi ca cha nyacá ñaha siqui ñuhu ñayivi ihya ta andivi ñandihí. Cuví ri tandihí rey, o cuví ri ra cuví tyiño nahnu, o cuví ri ángel andivi. Soco yori yóo ca ra cahnu ñayivi ihya ta niri ñayivi cha cua coo. Vatyí noo tuhun ri maa ra Cristo cuví ra cahnu cuví. ²²Ta tandihí cuii maa chahá Nyoo tyi cunyaca ñaha ra Cristo. Ta suri chi maa ra chahá Nyoo vatyí cuví ra xiñi o nuu chi ñu yihí cuenda ra. ²³Vatyí yoó, cha yihí yo cuenda ra, cuví yo coño ñuhu ra. Ta maa yo ta maa ra cuví chi noo coño ñuhu nanií ra. Ta maa ra cuví ra sandunanií tandihí.

Sacacú Nyoo chi yo cha cuenda cha cuñí ra chi yo

2 Nyoo chahá ra noo ñayivi chaa chi ndo tyi coo ndo quivi ndu iñi ri ndo chihin ra Cristo, vasi nicaa ni iñi ndo cuatyí quivi cuan. Ta tari maa cha chihí aña ndo tyi ñahri maa ñayivi Nyoo chinyaa aña ndo. ²Ta chinyacuví ndo cuhva nyacuví ñayivi ña ñohó nuu Nyoo. Ta chinyicon ndo chi cuihna ra cuví nuu. Ta ican ra cuví tatyí ña vaha cha tyiyuhú chi ñu ña quichahá nu cahán Nyoo. ³Ta suri tyicuan caa chiyo tucu yoó quivi cuan. Vatyí chinyacuví yo cha ña vaha

cha quichi cuví iñi yo cha cuñí coño ñuhu yo. Ta sacuví yo yoso cuhva chica xiñi yo. Ta cha cuenda tuhun cha chinyacuví yo tahán chi tachi tuñi Nyoo chi yo inuu ri chihin tandihí ca ñu sacuví cha ña vaha. ⁴Soco Nyoo cundahvi xaan cuñi ra nyehe ra chi yo. Vatyí cuñi xaan ra chi yo. ⁵Ta vasi cuaha xaan cuatyí yo quivi cuan, tari quivi cha chihí aña yo chihin cuatyí cuan, soco Nyoo chahá ra cha conyito aña yo noo ñayivi chaa, vatyí sacú iñi ri ra chi yo chihin ra Cristo. Ta cha cuenda tumañi iñi cha saha Nyoo chi ndo ta cacú ndo. ⁶Ta tari quivi cha sanandoto Nyoo aña yo quivi nandoto ra Cristo Jesús. Vatyí iyó yo noo ñayivi chaa cha chahá maa Nyoo tyi coo yo. Ta tari quivi cha cuatyaa ra chi yo andivi. ⁷Ta sacuví Nyoo tyehe caa tacuhva vatyí nu cuahán ca chi quivi cusañaha ra chi tandihí ñayivi yoso cuhva cha cahnu tumañi iñi chahá ra chi yo cha cuenda ra Cristo Jesús. Vatyí vaha xaan ñayivi cuví ra chihin yo tyi sacú iñi ri ra chi yo chihin ra Cristo. ⁸Vatyí cha sacacú Nyoo chi yo cuví chi noo cha chahá ra chi yo. Ta naquehén yo tumañi iñi cuan chihin cha chinó iñi yo chi ra. Ta cha sacacú Nyoo chi yo ñima noo cha cuví sacuví maa yo cuví. Vatyí yucuan cuví noo tumañi iñi cha sacuví ra chihin yo. ⁹Ñima cha cuenda cha sacuví yo cha vaha ta cuita iñi yo cha sacacú cuan chi yo. Tyehe ta cuví chi tyicuan caa, cahnu cusaha yo chi yo. ¹⁰Nyoo sacuví ra vatyí nduvahá aña yo chihin cha ndu iñi ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaá ra cuhva nu quichi quivi vatyí tyicuan ri sacuví yo cha vaha.

Cuví ri yo ñu Israel, o cuví ri yo ñu inga ñuu, soco cha cuenda ra Cristo iñi ri ñayivi chi Nyoo cuví tandihí yo

¹¹Yucuan chaha nichohon iñi ndo cuhva chiyo ndo nu quichi quivi, tyi

cuví ndo ñáyivi cha ñima ñu Israel cuví. Ta catyí ñáyivi Israel tyi ñu cha ñima ri tuhun cuví ndo cha ña sacuví ndo costumbre circuncisión tari sacuví maa ra. Ta cha cuenda cuan cuñí maa ra Israel tyi vaha ra nuu Nyoo ta nyoho ña vaha ndo. ¹²Ñicohon iñi ndo vatyí nu quichi chí, yori ra Cristo chinyaa ñima ndo. Ta ña iin ri cuví ndo chihin ñu Israel. Ta ña chito ndo tuhun cha tyihí tahan Nyoo chihin ra Abraham: tuhun cha catyí Nyoo tyi cuhva ra cha nicoo vaha yo chihin ra. Chiyo maa ndo ñuhu ñáyivi ihya chihin cha yori Nyoo nyaá chihin ndo, ta ña yihí iñi ndo cha cuñihi ndo. ¹³Ta quivi cuan cañi xaan chinyaa ndo chihin Nyoo. Soco vityin iin ri cuví ndo chihin ra Cristo Jesús. Maa ra Cristo chihí ra. Ta chati ñiñi ra cha catyi ndo. Ta yucuan chaha cuví cuyatyin ndo nuu Nyoo. ¹⁴Vatyí ra Cristo sanicoo vaha ra chí yo chihin Nyoo. Ta sandu iin ri ra chí ninduvi yo. Sandu iin ri ra chí nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvaha ra cuhva iyó yo. Vatyí tari noo cha sanduvá ra noo nama vehe cha nanyaa mahñu, cha chasi nu cu iin ri yo. ¹⁵Maa ra Cristo sandihí ra tuhun ley chahnu chihin cha chaha cuenda ra coño ñuhu ra tyi cúvi ra nu cruzi. Vatyí tandihí ley cuan sasiin chí chí yo. Tyi nyuhu sacuví ndi costumbre cha catyí ley cuan. Ta nyoho ña sacuví ndo. Soco ra Cristo sandu iin ri ra chí yo quivi chaha ra noo cuhva chaa tyi coo yo. Ta tyicuan caa sanicoo vaha ra chí yo. ¹⁶Vatyí chihí ra nu cruzi cha catyi cuatyí yo. Ta sacuví ra vatyí nanduvaha coo yo chihin Nyoo. Ta tyicuan caa sanaa ra cha ña cuñi nyehe yo chí tahan yo.

¹⁷Ra Cristo quichí ra ta cahan ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu Israel, ñu chitó tuhun Nyoo. Catyi ra chí yo vatyí na ni-

coo vaha yo chihin Nyoo. ¹⁸Vatyí chaha cha catyi cha chihí ra Cristo cha cuenda yo cuví natuhva ninduvi yo chí Nyoo Sutu yo. Vatyí noo ri Tatyí Ii ra nyaá ñima yo: an cuví ri yo ñu Israel, an cuví ri yo ñu cha ñima ñu Israel cuví. ¹⁹Yucuan chaha nyoho ña cuví ca ndo ñu inga ñuu. Soco nanduvi ndo ñáyivi ñuu Nyoo iin ri chihin tandihí ñu yihí cuenda ra. Nanduvi ndo ñáyivi chí ra. ²⁰Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyí suri maa ra Cristo cuví yuu cha ñiñi ca cha yihí chaha vehe cuan. ²¹Ta cha cuenda maa ra Cristo cuahan ndaa vehe cuan ta vehe cuan ican cuví maa yo iin ri chihin ra. Ta cuahan sandu iin ri ra chí tandihí yo ta nanduví yo tari noo vehe ii nu nyaá maa Sutu Mañi yo. ²²Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyí nyaá Tatyí Ii ra ñima tandihí yo.

Nyoo tachí ra tyiño chí ra Pablo vatyí cahan ra tuhun ra chihin ñu cha ñima ñu Israel cuví

3 Yucuan chaha yuhu ra Pablo ñohí vehe caa ihya vatyí sacoté tuhun ra Cristo Jesús chí nyoho cha ñima ñu Israel cuví ndo. ²Tahán chí natyihí tuñi iñi ndo tyi cahnu xaan tumañi iñi chahá ra chii cha cuenda cha vaha chí ndo, tyi sacoté chí ndo. ³Vatyí cha yaha catyi suhva chí ndo yoso caa sañaha Nyoo chii noo tuhun xehe. ⁴Ta cuhva cha sacuaa ndo tuhun cha yaha catyi chí ndo, cuví coto ndo yoso caa chaha Nyoo tyi cutuñi iñi tuhun ra Cristo cha ña chitó ñáyivi. ⁵Vatyí nu quichí chí, ña sañaha Nyoo chí ñáyivi, tari sañahá ra chí apóstol ta ra cacuví profeta cha vityin. Vatyí Nyoo chihin Tatyí Ii ra sañahá ra chí yo cha vityin. ⁶Ta tuhun xehe cuan, ican cuví ihya: vatyí nyoho cha ña cuví ndo ñu Is-

rael, iin ri cha cutahan chi chi ndo chihin nyuhu cha cuví ndi ñu Israel. Vatyí noo ri coño ñuhu ra Cristo cuví yo. Ta cuñihi yo cha catyí Nyoo tyi cuhva ra chi yo cha cuenda maa ra Cristo Jesús.

⁷Sahá Nyoo tumañi iñi chi yuhu vatyí chahá ra tunyee iñi ra chii tyi sacoté tuhun vaha ihya chi ñáyivi. ⁸Soco cha cuenda chi yuhu cuví noo ra luhlu, noo ra ndahvi ca cha nuu tandihi ca ñu yihí cuenda Nyoo. Soco sahá Nyoo tumañi iñi ihya chii. Vatyí tacuhva cahin tuhun ra Cristo chihin ñu cha ñima ñu Israel cuví. Ta sacoté chi ñu ñana cha tyayii cha cuñihi ñu cha cuenda ra Cristo. ⁹Tyatyíño Nyoo chii tyi sacoté chi tandihi ñáyivi yoso caa tyaa ra cuhva nyata ni cumañi ca savaha ra tandihi cha iyó. Ta cha naha ña chahá Nyoo cha coto ñáyivi tuhun ihya. ¹⁰Tyicuan caa cuví tacuhva vatyí vityin tandihi ra nyacá ñaha andivi cunyehe yoso caa cha vaha cha sacuví Nyoo chihin yo cha cuví yo ñu yihí cuenda ra. Ta cucoto ra tyi chiñi tuñi xaan Nyoo. ¹¹Tandihí ihya chachí tahan chihin cha tyaa Nyoo cuhva tyi sacuvi ra chihin Sutu Mañi yo Jesucristo cha cuenda cha vaha chi yo. ¹²Ta cha cuenda maa ra Cristo iyó chi ityi chi yo cha chaá yo nuu Nyoo chihin cha ña yuhví yo. Vatyí chinó iñi yo chi ra Cristo. ¹³Yucuan chaha chacú ndahvi nuu ndo tyi ma ndu uvi iñi ndo chi Nyoo cha nyehi tindoho cha cuenda ndo. Vatyí cuví chi cha cuenda cha vaha chi maa ndo. Ta cusii cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chi ra Cristo

¹⁴Yihí iñi yoso cuhva cha vaha cha tyaa Nyoo Sutu yo cuhva tyi cuhva ra chi yo. Ta yucuan chaha chicuñi chiti nuu ra. ¹⁵Maa ra cuví ra Sutu tandihí ñáyivi cuenda ra: ñu cha cuahan coyo andivi, ta ñu cha iyó ca siqui ñuhu ñáyivi. Tandihí yo cuví yo ñáyivi chi ra. ¹⁶Ta chiquén

chi ra na sandunyee ra iñi ndo chihin Tatyí li ra cha nyaá aña ndo. Vatyí maa ra cahnu xaan ca cha tyayii ra chahá ra chi yo. ¹⁷Ta na coo ra Cristo aña ndo vatyí chinó iñi ndo chi ra. Ta coo ndo chihin cha cuñi Nyoo chi ndo. Vatyí tari yihí vaha yoho noo yutun chichi ñuhú, tyicuan caa cunyaa vaha aña ndo chihin Nyoo. ¹⁸Tyicuan ta cuacoo tunyee iñi ra chi ndo tacuhva cuvi cutuñi vaha iñi ndo chihin tandihí ñu yihí cuenda ra vatyí cuñi xaan ra Cristo chi yo. Nyacua ña ñihí ca yo cuhva catyi yo yoso cuhva cha cuñi ra chi yo. ¹⁹Vatyí yaha xaan cahnu cuan. Nyacua ma cuvi cohon nuu yo yoso cha cuñi ra chi yo. Soco cuñi cha nacoto ndo yoso cha cuñi ra chi yo. Tyicuan ta ñahri ca cumañi chi ndo. Vatyí Nyoo nyaá maa ra chihin ndo.

²⁰Ta vityin na sacahnu yo chi Nyoo, ra cha iyó xaan ca tunyee iñi chii. Vatyí cuaha vavaha ca cha cuví sacuvi ra cha nuu cuhva cha chicán maa yo chi ra o cha nuu cuhva cha chicá xiñi yo. Vatyí suri chihin tunyee iñi ra cha iyó chi yo, sacuvi ra tandihí. ²¹Yoó ñu chino iñi chi Nyoo, na sacahnu yo chi ra tyicuan ri maa, ta tandihí tyembu cha cuenda cha sacuvi ra Cristo Jesús. Ta na cuvi chi tyicuan caa.

Cha cuenda Tatyí li Nyoo iin ri cuví tandihí yo cha yihí yo cuenda ra Cristo

4Yucuan chaha yuhu cha ñohí vehe caa cha cuenda Sutu Mañi yo chacú ndahvi nuu ndo na cachi coo ndo tari cuhva tahán chi coo ñu cha nacana Nyoo chii. Vatyí chi nyoho nacana Nyoo tyi cuví ndo ñáyivi chi ra. ²Ndahvi saha ndo chi ndo. Ta vaha çahan ndo chihin ñáyivi. Cama cuvi iñi ndo. Ta cunyee ndo ñáá cha sahá noo noo tahan ndo chi ndo chihin cha cuñi ndo chi ñu. ³Nducu ndo cuhva cha tyicuan ri cu iin ri ndo chihin tahan yo. Vatyí maa Tatyí li Nyoo

tyinyeé chi yo, na coo vaha yo chihin tahan yo. ⁴Vatyí iyó noo ri coño ñuhu ra Cristo. Ta ican cuan cuví tandihi yo. Ta tari cha noo ri Tatyí Ii Nyoo iyó, tyicuan caa tucu iyó noo cha chitó cachi yo tyi cunaquehen yo tyi nacaná ra chi yo. ⁵Ta iyó noo ri Sutu Mañi yo nyacá ñaha chi yo. Ta noo ri chi maa ra chinó iñi tandihi yo. Ta noo ri cha cuenda maa ra condutyá yo. ⁶Ta noo ri Nyoo iyó ta maa ra cuví ra Sutu tandihi yo. Ta maa ra nyacá ñaha chi tandihi yo. Ta chotyíño ra chi tandihi yo yoso cuhva cuñí maa ra. Ta nyaá ra añima tandihi yo.

⁷Chahá ra Cristo noo cuhva chi noo noo yo, vatyí sacuvi yo tyiño nuu ra yoso cuhva cuñí maa ra cuhva ra. ⁸Yucuan chaha cahán Nyoo tuhun ra Cristo nu catyí chi:

Cuví chasaha ra chi ra xaan iñi chi ra, ta nandaá xica ra andivi chihin ñu tava ra ndaha ra ña vaha.

Ta chahá ra cuhva yoso cuhva cusaha tyiño ñu tyiño nuu ra, catyí chi.

⁹¿Ta ñáá cha cuñí chi catyí cha nandaá xica ra cuan? Cuñí chi catyí vatyí noo xihna ra nya yuvi ca nu ñuhu ñayivi.

¹⁰Ra cha noo cuan, nandaá tucu ra nya nu sucun ca andivi. Vatyí tyicuan caa ta cuví sacutu ra tandihi maa ta cunyaa ra chihin yo tandihi ityi. ¹¹Ta suri maa ra Cristo chahá ra cha vaha chi yo. Chi suhva yo chahá ra tyi cuví yo apóstol ra. Ta chi inga yo chahá ra cha cuhva cuenda yo tuhun cha chahá ra chi yo, o saha yo profetizar cuví cuan. Ta chi inga yo chahá ra tyi sacoto yo chi ñáyivi yoso caa sacacú ra añima yo. Ta chi inga yo chahá ra cha quihi ndaha yo chi ñu yihí cuenda ra, ta chi inga yo chahá ra cha cuví sañaha yo tuhun ra chi ñu. ¹²Tyicuan caa chahá Nyoo tyiño chi yo vatyí cunyaa yo tyiño cha sandunyeé yo iñi tahan yo vatyí cuví yo coño ñuhu ra. ¹³Nyacua nya cu iñ vaha tandihi yo cha cuenda cha chinó vaha iñi yo chi

Sehe Nyoo. Ta cohon nuu vaha yo chi ra. Tyicuan caa ta cutu yo chihin tandihi cha vaha cha chahá ra Cristo chi yo. ¹⁴Yucuan ta ma cuvi ca yo tari ra cuatyaa. Vatyí totyehe ri chino iñi ndotyin ñáá noo tuhun cha ñima ri tuhun sandaví ñaha ñu chi ndotyin. Ta coto cutondo xiñi yo tyicuan caa chihin tuhun cha ña ndicha cha sañahá ñu sandaví ñaha. ¹⁵Soco cha nuu cha cuví yo tari ra cuatyaa, cuñí chi cha cahán yo cha ndicha chihin cha cuñí yo chi Nyoo ta chi ñáyivi. Ta ndunyeé ca añima yo chihin ndi cha vaha cha iyó chi Nyoo. Ta cuahnu yo chihin ra Cristo, cha cuví ra nuu chi yo. ¹⁶Ta cha cuenda ra Cristo tandihi yo cha cuvi yo coño ñuhu ra, iñ ri cuví yo. Tari yihí tahan noo coño ñuhu, ta sahá tyiño tahan tahan nu yihí tahan chi, yoso cuhva tyiño cha tahán chi chi, ta tyicuan caa tyinyeé chi chi coño ñuhu, na coo vaha chi ta cuahnu chi, ta tyicuan caa yoó, cuñí yo chi tahan yo ta tyinyeé yo chi ñu.

Ñayivi chaa cha tahán chi coo yo cha cuenda ra Cristo

¹⁷Ican ihya cuví cha chahí cuenda chi ndo, catyí Sutu Mañi yo. Ta cuñí chi cha quichaha ndo. Ma coo ca yo tari iyó ñu ña ñohó nuu chi Nyoo. Vatyí maa ri maa cha chiñi tuñi tondo chicá xiñi ñu. ¹⁸Ta ña cutuñí iñi ñu, tyi ñima ñayivi Nyoo iyó ñu. Vatyí ña chitó ñu, cha cuenda cha ndava añima ñu. ¹⁹Ña cahán ca nuu ñu cha sacuví ñu cha ña vaha. Ta nacuhvā cuenda ñu chi ñu chi cha quiñi caa. Cuaha xaan cha ña vaha quichi cuvi iñi ñu. ²⁰Soco ñima tyicuan caa cutuhvā yo. Vatyí ñima tyicuan caa cuhva iyó ra Cristo. ²¹Tatu ndicha tyi chiñi yo cha cahán ra chihin yo, ta cutuhvā yo cha ndicha cha sañahá ra chi yo, ²²ma coo ca yo cuhva chiyo yo quivi cuan. Vatyí chiyo yo ñayivi chahnu quiñi caa. Vatyí cha quichi cuvi iñi yo sandaví ñaha chi

chi yo. ²³ Nacuhva cuenda yo chi yo chi Nyoo na nasama ra cuhva chicá xiñi yo.

²⁴ Ta nacoo yo noo ñáyivi chaa chihin noo añima chaa cha savahá Nyoo. Ta cuvi yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma cahan ca yo cuendu. Cahan yo maa maa ri cha ndicha chihin tahan yo. Vatyí iin ri ñáyivi cuvi yo.

²⁶ Tatu cuxaan yo, saha yo cuenda coto sacuvi yo cha ña vaha. Ta suhva ri cuhva cuxaan yo. Ma cuxaan yo ndiyaca.

²⁷ Ta ma cuhva yo cuhva chi ra ña vaha.

²⁸ Ra cha tuhva suhu quivi cuan, ma suhu ca ra vityin. Soco saha tyiño vaha ra chihin ndaha ra. Tyicuan caa ta coo cha chii ra, tacuhva cuvi tyinyee ra chi ñu cha chiñuhú chii.

²⁹ Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahán yo.

³⁰ Ta ma cuhva yo tucuihya iñi chi Tatyí Ii Nyoo. Vatyí chaha Nyoo Tatyí Ii ra chi yo tari noo tuñi ra tyaá ra añima yo nyacua nya quivi ndihi sacacú ra chi yo.

³¹ Ta ma xaan cuñi yo. Ta ma cuxaan yo. Ta ma quihi tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xiñi yo. ³² Soco vaha ñáyivi cuvi yo chihin tahan yo. Ta cundahvi cuñi yo nyehe yo chi ñu. Ta saha yo ticahnu iñi chi ñu, tari Nyoo sahá ra ticahnu iñi chi maa yo cha cuenda ra Cristo.

Yoso caa tahan chi coo ñáyivi yihí cuenda Nyoo

5 Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuví chi yo. Ta cuñi xaan ra chi yo. ² Vita cuvi iñi yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachaha ra chi Nyoo ta cha naha, tyicuan caa chaha cuenda ra Cristo chi

ra cha cuenda yo. Ta sii xaan cuñi Nyoo cha cuenda cha chaha cuenda ra chi ra.

³ Soco vityin cha cuví yo ñáyivi yihí cuenda Nyoo, ña tahan chi sacuvi yo cha quiñi caa chihin coño ñuhu yo. Ni ña tahan chi cha cahán yo cha quiñi caa. Ta ni ma nyiyo iñi yo. ⁴ Ma cahan yo tuhun cha chahá ticahnu nuu. Ni ri ma cahan yo noo tuhun cha ñima ri tuhun. Vatyí ña tahan chi cahan yo cha tyicuan caa. Soco cha nuu cha cahán yo cha ña tahan chi, na nacuhva yo tyahvi nyoo chi Nyoo. ⁵ Vatyí cha chitó yo vatyí tandihi ñu cha sacuvi cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñusihi ta ñima ñasihi ra cuví, o ñu iyó chihin rayi ta ñima yii ñu cuví, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuví cuan. Vatyí tavá xiin yo chi Nyoo. ⁶ Ma cuhva yo cha sandavi ñaha ñáyivi chi yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chi ñu cha ña quichahá chi ra. ⁷ Ta ni ma cutahan yo chihin ñu cuan.

⁸ Vatyí chiyó yo nu ñaa iñi quivi cuan. Soco vityin iyó yo nu ndichin chihin Nyoo. Cachi coo yo tari tahan chi coo ñu chitó tuhun Nyoo. ⁹ Vatyí Nyoo sacundichín ra añima yo tacuhva cuvaha añima yo ta sacuvi yo cha vaha ta cha ndicha. ¹⁰ Saniñi yo cutuhva yo cuhva tahan iñi Sutu Mañi yo. ¹¹ Ma sacuvi yo cha nyacuví ñu nyicú nu ñaa iñi. Vatyí ñahri cha vaha ñihí ñu chihin cuan. Soco sacoto yo chi ñáyivi tyi ña vaha cuan. ¹² Vatyí cahán nuu yo cha cahán yo tuhun cha nyacuví ñu cuan cha xehe ri. ¹³ Soco quivi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihi cha ñohó xehe. ¹⁴ Yucuan chaha iyó nu catyí chi:

Yoho cha quixun, ndicuita mahñu nu nyicú ñu chihí chiña.

Ta ra Cristo cusacata ra ñuhu nu cuahún, catyí chi.

¹⁵ Yucuan chaha saha yo cuenda cuhva iyó yo. Ta ma coo yo tari noo ra soho. Coo yo tari noo ra chitó. ¹⁶ Ma sacunaa yo quívi yo. Na cahan yo tuhun Nyoo chihin ñáyivi. Vatyí vityin quiñi xaan caa ñáyivi iyó yo, ta ña naha ca iyó yo. ¹⁷ Yucuan chaha ma tondo xaan cohon ñi yo. Soco nandichi xiñi yo cuhva cuñí maa Sutu Mañi yo tyi sacuvi yo. ¹⁸ Ma coho yo ndixi. Vatyí ican cuan sativí chi yo. Soco cuhva yo na cunyaca ñaha vaha Tatyí Ii Nyoo ñima yo. ¹⁹ Cahan yo chihin tahan yo soco chihin cha sacahnú yo chi Nyoo. Cاتا yo salmo cuenda ra. Cاتا yo yaa cha chahá Tatyí Ii chi yo. Sacahnu yo chi Sutu Mañi yo chihin cha tandihi ñima yo. ²⁰ Tyicuan ri nacuhva yo tyahvi nyoo chi Nyoo Sutu yo cha cuenda tandihi maa, vasi sii cuñí yo, vasi nyehé yo tindoho. Nacuhva yo tyahvi nyoo chi ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

²¹ Quichaha yo nu cahan inga tahan yo cuenda ra Cristo. Vatyí sahá yo ñáyivi chi ra Cristo.

²² Nyoho ñu iyó yí quichaha ndo cha cahan Sutu Mañi yo. Ta tyicuan caa tucu quichaha ndo nu cahan yí ndo. ²³ Vatyí rayii ican ra cuví nuu chi ñasihi ra, tari cuhva cuví ra Cristo nuu chi ñu yihí cuenda ra. Ta suri maa ra sacacú ra chi yo cha cuví yo coño ñuhu ra. ²⁴ Soco tari tahan chi cha quichahá ñu yihí cuenda ra Cristo chi ra, tyicuan caa cuñí tucu chi cha quichahá ñusihi tandihi cha catyí yí ñu.

²⁵ Ta rayii cuñí chi cha cuñí ra chi ñasihi ra, tari cuñí ra Cristo chi yo cha yihí yo cuenda ra. Ta chahá ra ñáyivi ra cha catyí yo. ²⁶ Tacuhva vatyí sandundii ra ñima yo. Ndií ñima yo vatyí nacatya

ra quívi cha nachino ñi yo tuhun cahan ra ta condutya yo. ²⁷ Ndoq ñima yo tari ndoq noo sahma, ña yacua ca chi, ña tiyi ca chi. Vatyí ra Cristo sandundii ra chi yo cha cuví yo ñu yihí cuenda ra. Tacuhva cuví nacuhva cuenda ra chi yo chi Nyoo, soco vaha yo, ñahri ca cuatyí yo. ²⁸ Ta tyicuan caa tucu cuñí chi cha cuñí rayii chi ñasihi ra, tari cha cuñí ra chi coño ñuhu ra. Vatyí tatu cuñí ra chi ñasihi ra, tari cha cuñí ra chi maa ra cuví cuan. ²⁹ Vatyí yori noo yo cha ña cuñí nyehe yo chi coño ñuhu yo. Soco sacachí yo ta sacuihnó yo chi coño ñuhu yo. Ta ra Cristo suri tyicuan caa sacuví ra chihin ñu yihí cuenda ra. ³⁰ Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiqui ra. ³¹ Catyí tuhun Nyoo: “Rayii sandoó ra chi sutu ra ta chi sihi ra. Ta ndu ín ri ra chihin ñasihi ra. Ta noo ri nanduví ñu.” ³² Ta yuhu catyí vatyí ihya cuví noo tuhun xehe cha cahnú xaan. Ta cuñí chi catyí tyi ra Cristo ndu ín ri ra chihin ñu yihí cuenda ra. ³³ Ta siin ri cuñí tucu chi catyí vatyí tahan tahan ndo cuñí ndo chi ñasihi ndo, tari cuñí ndo chi maa ndo. Ta nyoho cha cuví ndo ñusihi, saha ndo ñáyivi chi yí ndo.

6 Nyoho cha cuví ndo sehe, tahan chi cha tyasoho ndo nu cahan sutu ndo ta sihi ndo. Vatyí cuñí ndo chi Nyoo. ²⁻³ Nu tutu Nyoo nyaá cha xihna ri sacuvi yo ta nañihi yo cha cucuhva Nyoo chi yo. Catyí chi: “Saha ndo ñáyivi chi sutu ndo, chi sihi ndo. Tyicuan caa ta sii xaan cuacoo ndo. Ta naha xaan cuacoo ndo ñáyivi ihya”, catyí Nyoo.

⁴ Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chi ñu, ta yoso caa quichaha ñu chi ndo ta chi Nyoo.

⁵ Ta nyoho cha cuví ndo musu, quichaha ndo chi chitoho ndo siqui ñuhu ñáyivi ihya. Saha ndo ñáyivi chi ñu. Quichaha ndo chi chitoho ndo chihin cha ñi ñi ndo. Tatu sacuví ndo tyicuan

caa, chi ra Cristo quichahá ndo cuví cuan.

⁶Ma saha tyiño ndo cuhva cha nyehe ri chitoho ndo tacuhva vatyí catyí ñu tyí vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñí Nyoo chihin cha ñi aña ndo. ⁷Chihin cha iyó vaha ñi ndo sacuvi ndo. Tari cha sahá tyiño ndo nuu Sutu Mañi yo ta ñi nuu ñáyivi. ⁸Vatyí cha chitó yo tyí tahan tahan yo, an cuví ri yo musu, an ñi nuu, soco cutiyahvi Sutu Mañi yo chi yo yoso cuhva cha vaha cha chinyacuví yo.

⁹Ta nyoho cha iyó musu ndo, suri vaha cgo ndo chihin musu ndo. Ta ma sayuhvi ndo chi ñu. Vatyí chitó ndo tyí ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andívi. Vatyí maa ra ña cachi ra chi yo.

Tunyeé ñi cha chahá Nyoo chi yo cha yihí yo cuenda ra

¹⁰Ta vityin sandunyeé yo ñi yo chihin cha ñi ri cuví yo chihin Sutu Mañi yo. Vatyí iyó xaan tunyeé ñi chi ra.

¹¹Ta tari noo sindaro sahá cuenda ra chi ra, tyicuan caa tucu yoó, nasaha cuenda vaha yo chi yo chihin tandíhi cha cuví tyinyee Nyoo chi yo. Tyicuan caa ta cuví chasaha yo chi cuihna. Vatyí nducú xaan ra cuhva sandavi ñaha ra chi yo. ¹²Tyicuan caa coo yo chihin tunyeé ñi Nyoo. Vatyí ñi nuu chihin ñáyivi cañí tahan yo. Soco cañí tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chi ñáyivi cha nyacuví cha quiñi caa. ¹³Yucuan chaha saha cuenda vaha yo chi yo chihin tandíhi cha cuví tyinyee Nyoo chi yo, tacuhva cuví chasaha yo chi ra ña vaha ñáá quívi nducu tiñ ra chi yo. Coto cana cava yo saha ra. ¹⁴Tari noo sindaro ñi nuu nanyaá ra chihin noo sincho yihí

chichi ra, tyicuan caa ñi nuu cuinanyaa yo chihin tuhun cha ndicha vaha. Tari cacú noo sindaro vatyí tyaá ra noo caa pecho ra, tyicuan caa Nyoo cusacacu ra chi yo ndaha ra ña vaha, tatu maa ri cha vaha sacuvi yo. ¹⁵Ta tari natyíhi sindaro bota chaha ra ta nyatú tuhva ra cha cuhun ra cuatyí, tyicuan caa cuatu tuhva yo chihin tuhun Nyoo. Na sacoto yo chi ñáyivi yoso caa nicoo vaha ñu chihin ra. ¹⁶Ta tari sindaro chasí ra chi ra chihin noo caa tacuhva ma ñi nuu nduva chi ra, tyicuan caa cuñí chi nachino vaha ñi nuu yo chi Nyoo tacuhva cha cuví chasaha yo tandíhi cha sacuvi ra ña vaha chi yo. ¹⁷Ta tari sahá cuenda sindaro xiñi ra chihin noo caa, tyicuan caa nacuhva cuenda yo chi yo chi Nyoo, na sacacu ra chi yo. Ta naquehen yo tuhun cha chahá ra chi yo. Vatyí tari noo mityí Tatyí Ii ra cuví tuhun cuan. Vatyí chihin tuhun ra sahá ganaa yo chi cuihna. ¹⁸Ta nyita ri cahan yo chihin Nyoo. Ta Tatyí Ii ra cuatyinyee chi yo tacuhva cacan tahvi yo chi ra. Ta cuacu ndahvi yo nuu ra. Ta tyicuan caa cuatu tuhva ri yo. Ta ma ndu uvi ñi nuu yo. Tyicuan ri cacan tahvi yo cha cuenda tandíhi ñu yihí cuenda Nyoo. ¹⁹Ta nacuatatu tucu ndo chahi, tacuhva vatyí ñi nuu que tuhun cahin. Ta ma yuhvi sacote tuhun ra Cristo chi ñáyivi. Vatyí ta cha naha ña chitó ñáyivi tuhun ra. ²⁰Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chii vatyí cahin tuhun ra chihin ra nyicú vehe caa ihya. Cacan tahvi ndo cha cuende, tacuhva cuví cahin chihin cha ña yuhví, tari cuhva tahán chi cahin.

Tachí ra Pablo chi ra Tíquico tyí cuhun ra nu nyicu ñu

²¹Ta ra Tíquico yañi yo, cunacatyí ra tandíhi tuhin chi ndo. Maa ra ñi nuu ñi nuu ra sahá tyiño ra cuenda Sutu Mañi yo. Ta cuñi xaan yo chi ra. ²²Tachí chi ra nu nyicú ndo tacuhva sacoto ra chi ndo

yoso caa iyó ndi ihya, tacuhva ndunii ca iñi ndo chino iñi ndo chi Nyoo. ²³Ta Nyoo Sutu yo ta Sutu Mañi yo Jesucristo nacuhva ra cha taxi ri coo añima tandihi ra yañi yo. Ta na cuhva Nyoo cha chinó vaha iñi ra chi ra. Ta vityin suri Nyoo

naꝓuhva ra cha cuñí ca ra chi ra ta chi ñáyivi. ²⁴Ta na nasoco ra chi tandihi yo cha nyita ri cuñí yo chi Sutu Mañi yo Jesucristo chihin cha nii iñi yo. Ta naꝓuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

1 Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandíhi ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandíhi ndo. ²Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo ñanima ndo.

Nu chicán tahvi ra Pablo chaha ñu yihí cuenda Nyoo ñuu Filipos

³Tahan ri cha nicohón iñi chi ndo, nacuhvá xain tyahvi nyoo chi Nyoo cha cuenda ndo. ⁴Ta chicán tahvi chi Nyoo cha cuenda ndo chihin cha sii cuñí ñanime. ⁵Vatyí nyata quivi xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyí iin ri tuhun ra Jesucristo sacotó yo chi ñáyivi. ⁶Quivi naquehen cuenda Nyoo ñanima ndo, maa ra chaha tunyee iñi chi ndo, na sacuví ndo tyiño nuu ra. Ta chité tyi tyicuan ri cuacuhva ra chi ndo nyacua nya quivi quichi ra Cristo inga chaha. ⁷Tahán chi cha caca xiñi tyehe caa cha cuenda ndo, vatyí cuñí xain chi ndo. Vatyí iin ri nasocó Nyoo chi yo. Vasi ñohí vehe caa, o vasi nanyaí nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo. ⁸Nyoo chitó ra vatyí cuñí xain chi tandíhi nyoho tari cuñí ra Jesucristo chi ndo. ⁹Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca

cha chiñi tuñi Nyoo chi ndo, ¹⁰tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quivi quichi ra Cristo. ¹¹Maa ra cutyinyee ra chi ndo. Ta tyicuan ri cusacuvi ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

Maa maa ri tyiño Nyoo sacuví ra Pablo vatyí ñohó ra Cristo ñanima ra

¹²Ta cuñí tyi coto ndo yañi vatyí tandíhi cha cuví chii tyinyeé xaan chi chii nu cahín tuhun Nyoo chihin ñáyivi. ¹³Vatyí chitó tandíhi sindaro vehe rey ta tandíhi inga ñáyivi ihya vatyí ñohí vehe caa cha cuenda cha nyiquén chi ra Cristo. ¹⁴Ta cuaha xaan ra yañi yo cuenda Sutu Mañi yo cunií ca iñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chi yo. Ta ñihí ca cacahán ra tuhun Nyoo chihin ñáyivi.

¹⁵Ta ndicha vatyí yihí ra, cahán ra tuhun ra Cristo soco cha cuenda cha tasi cuñí ra nyehé ra chii, o cuñí ra na cun-yicon ñáyivi chi ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra. ¹⁶Yihí ra cacahán ra tuhun ra Cristo cha cuenda cha cuñí ra chi ra. Vatyí chitó ra vatyí maa Sutu Mañi yo quichi nyaca ra chii ihya. Vatyí cotyíño ra chii, ta sacoté chi ñáyivi tyi ndicha cha sacacú ra ñanima yo. ¹⁷Soco inga ra cuan ñima cha ñi iñi ra cahán ra tuhun ra Cristo, soco cuñí ra cuhva ra tisihi chii nu ñohí vehe caa ihya. ¹⁸Soco cha cuenda chi yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sii xaan cuñí cha cuenda cuan.

¹⁹Ta cusii ca iñi vatyí chité vatyí chichi cha tandíhi cha cuví chii, Nyoo

cuasacacu ra chii. Tyahvi nyoo chi Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí li ra Cristo chii. ²⁰Chitó vahi vatyí Nyoo cutyinyee ra chii cha ma cucahan nui, ta ma yuhvi cahín chihin cha níí iñi tuhun ra Cristo. Ñahri cuende, an coo que ñáyiví, an cúvi, soco cuñí vatyí vityin ta ityí nuu ca saha ñáyiví cuenda cuhva iyé ta coto ñu tyi ra Cristo cahnu ca cuví ra. ²¹Vatyí cha cuenda yuhu tatu iyé, sacuvi tyiño nuu ra Cristo ihya siqui ñuhu ñayiví. Soco tatu cúvi, cuñihi cha tyaquí cha iyó andiví. ²²Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityí cuhin, an cuhin ityí andiví, an cuhin cucahan que tuhun Nyoo chihin ñáyiví, ña chité. ²³Yii xaan cote nya cha cuñí, vatyí iyó quiví cuñí cha coo que. Soco iyó quiví ña cuñí. Vatyí cha cuñí cunuhi cucunyai chihin ra Cristo. Vatyí vaha ca cuan. ²⁴Soco cha cuenda cha vaha chi nyoho, vaha ca cha ndoí chihin ndo. ²⁵Yucuan chaha chité vatyí cundoí suhva ca ñáyiví ihya. Vatyí cuñí chi cha tyinyeé que chi ndo tacuhva cuvi cuhun ca ndo ityí nuu ca ta cu sii cuñí ndo chihin cha chinó iñi ndo chi Nyoo. ²⁶Ta quiví cunyehe nu nyicu ndo, tyicuan caa ta cuvi cusii ca iñi yo cha iin ri cuví yo chihin ra Cristo.

²⁷Cuñí chi cha coo yo yoso cuhva tahán chi coo noo ñu yihí cuenda Nyoo. Vasi nyaí chihin ndo, o cañi nyaí, soco cuñí cote tuhun ndo vatyí nyoho vaha cuahan ndo chihin Nyoo. Ta iin ri sahá tyiño ndo tacuhva nachino iñi ñáyiví tuhun ra Cristo. ²⁸Ta ma yuhvi ndo ñáá cha sacuví ñu xaan iñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa ñu. Ta sañahá tucu chi chi yo vatyí cha cacú añima yo sahá maa Nyoo. ²⁹Vatyí tari chahá ra Cristo ityí chi yo cha chinó iñi yo chi ra, tyicuan caa tucu chahá ra cha

nyehé yo tindoho cha cuenda ra. ³⁰Iin ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehí tindoho, ta vityin suri chitó ndo vatyí ña sañé cha sahá tyiñe tuhun Nyoo.

Tyayii xaan ra Cristo, soco quichi cúvi ra tari noo ra ndahvi

2 Ndicha vatyí ra Cristo sanií xaan ra iñi yo cha iin ri cuví yo chihin ra. Ta vaha cuñí yo cha cuenda cha cuñí ra chi yo. Ta ndicha tucu vatyí nyaá Tatyí li Nyoo chihin yo. Ta ndicha tucu cha ndahvi cuñí yo nyehé yo chi tahan yo. ²Tatu ndicha tandihi ihya, cuhva ndo cha cusii cuñí chihin cha iin ri cuví ndo. Ta cuñi ndo chi tahan ndo tari cuñí ra Cristo chi ndo. Ta iin ri cuhva caca xiñi ndo. Ta iin ri cuhva sacuvi ndo. ³Ma sacuvi ndo cha vaha chi maa ri maa ndo, soco sacuvi ndo cha vaha chi ñáyiví ñandihí. Ta ma cahnu saha ndo chi ndo. Ndahvi saha yo chi yo. Ta tahan tahan yo saha yo tuhun vatyí vaha ca inga ñáyiví ta ñima ca maa yo. ⁴Ta tahan tahan yo caca xiñi yo cha cuenda cha vaha chi inga ñáyiví, ta ñima cha vaha chi maa ri maa yo.

⁵Caca xiñi ndo tari chicá xiñi ra Jesucristo.

⁶Vasi cuví ra Nyoo, soco ña cahnu saha ra chi ra ta ña quichi cuvi iñi ra cha sacahnú ñáyiví chi ra, tari sacahnú ñu chi Nyoo Sutu ra.

⁷Soco sandoq ra tandihi tunyee iñi ra ta tandihi cha tyayii ra iin chiyo xiin. Ta quichi nanduví ra noo ñáyiví ndahvi quiví cacu ra siqui ñuhu ñayiví.

⁸Ta ndahvi saha ra chi ra, vatyí nanduví ra noo rayii ri.

Ta chihin cha iyó vaha iñi ra ta quichaha vaha ra chi Nyoo nyacua chaha ra cha cahni ñáyiví chi ra.

Tari noo ra quini iyó saha ñu chi ra, vatyí nu cruzi chihí ra.

⁹ Yucuan chaha Nyoo sacahnú xaan ra chi ra.

Ta chahá Nyoo noo sivi chi ra, noo sivi cha cahnu xaan ca cuví nuu tandihi maa sivi.

¹⁰ Vatyí tacuhva tatu cuiñi yo sivi ra Jesucristo, tandihi yo ta cuiñi chiti yo. tandihi cha iyó andívi.

Ta tandihi cha iyó siqui ñuhu ñayivi, ta chichi ñuhú, cucuiñi chiti ta sacahnú chi ra.

¹¹ Vatyí tandihi cha iyó ta nacoto nuu vatyí ra Jesucristo cuví ra nyacá ñaha chi tandihi maa cha iyó.

Tyicuan caa cunyehe chi tyi cahnu xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin siqui ñuhu ñayivi ihya

¹² Yañi, cuiñi xain chi ndo. Ta tari cha quichaha ndo chii quivi chinyai chihin ndo, quichaha tucu ndo chii vityin cha cañi nyaí. Ndücu xaan ndo cuhva na nyehe ñáyivi tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra. ¹³ Vatyí maa Nyoo sacacú cha vaha aña ndo. Ta tyinyeé ra chi ndo tacuhva vatyí quichi cuví iñi ndo quichaha ndo nu cahán ra, ta sacuvi ndo cuhva cuiñi ra.

¹⁴ Tatu cuasacuvi ndo ñáá cha cuasacuvi ndo, ndücu ndo cuhva cha ma coo tisihi, ta ma cañi tahan ndo.

¹⁵ Tyicuan ta ma coo ni noo cuatyí ndo. Cuví ndo noo ñáyivi cachi iyó, cuví ndo ñáyivi ñahri cuatyí, tari tahán chi coo ñáyivi cuenda Nyoo mahñu ñáyivi quiñi iyó ihya. Cuiñi chi cha cuví ndo tari noo ñuhú cha sandichín nu ñaa iñi siqui ñuhu ñayivi ihya. ¹⁶ Cahán yo tuhun Nyoo chihin ñáyivi vatyí ican cuan chahá ñayivi chaa cha iyó yo. Sacuvi ndo tyicuan caa, tyicuan ta quivi cuquichi ra Cristo, yuhu vaha coo iñi cha cuenda nyoho, vatyí ña sacotó cahi tuhun Nyoo chi ndo. ¹⁷ Ta vasi cahñi

ñáyivi chi yuhu, cha catyi tuhun Nyoo, soco sii xaan cuiñi ta cuiñi cusii cuiñi ndo chihin vatyí tyicuan caa sacañá tahin cha cucuhva cuenda yo chi Nyoo, cha cuenda cha chinó iñi ndo chi ra.

¹⁸ Ta tahán chi cha cusii iñi tucu nyoho chihin yuhu ñandihí.

Nu tachí ra Pablo chi ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

¹⁹ Tatu Sutu Mañi yo ta cuiñi ra cutachi chi ra Timoteo quichi nyehe ra nu nyicú ndo. Ta quivi ndichi ra nu nyaí cusii xaan cuiñi. Vatyí cunacatyí ra chii yoso caa nyicú ndo. ²⁰ Vatyí noo tuhun ri maa ra chicá xiñi ra cha cuenda cha vaha chi maa ndo tari chicá xiñi yuhu. Ta yori yóó ca ra chicá xiñi tyicuan caa. ²¹ Vatyí tandihi ca ra, maa maa ri cha cuenda chi maa ra nanducú ra. Ta ña nanducú ra yoso caa cuhva cuiñi ra Jesucristo. ²² Chitó ndo vatyí ra Timoteo, vaha cuahan ra chihin Nyoo, ta cha cuenda chi yuhu cuví ra tari noo sehi. Ta tyinyeé xaan ra chii cha cahán ndi tuhun ra Cristo chihin ñáyivi. ²³ Ta nyaá sacuhin chi ra nu nyicú ndo. Soco nya coto xihne ñáá catyi ra cuví tyiño, tatu ña naha ca ñohí. ²⁴ Vatyí chitó vahi tyi Sutu Mañi yo numi ri cuhva ra cha cuhin cunyehe ni nyicú ndo.

²⁵ Ta vaha cha cunuhu ra Epafrodito yañi yo nu nyicu ndo. Tachí ndo chi ra vatyí quichi tyinyeé ra chii nu tyiño sahi. Ta tíñi tahan xaan ndi chihin ra ña vaha cha cuví ndi sindaro ra Cristo. ²⁶ Ta cuiñi xaan ra Epafrodito cunuhu ra nu nyicú ndo, vatyí chicá xaan xiñi ra cha chitó ndo tyi cuhvi ra. ²⁷ Vatyí ndicha cuhvi xaan ra ta cha yatyin maa cha cúvi ra. Soco Nyoo cundahvi cuiñi ra nyehe chi ra, ta chi yuhu ñandihí. Ta ña chahá ra cha cúvi ra. Ña cuiñi ra cha coo ca tucuihya iñi chii. ²⁸ Yucuan chaha yuhu cuiñi xain cha ndichi ra nu nyicú ndo.

Vatyi chité tyi nyoho cundusii xaan cuñi ndo cha nanyehe ndo chi ra. Tyicuan ta ma caca ca xiñi tuhun ndo. Vatyi cha nanyehé ndo chi ra tyi iyó vaha ra. ²⁹Yucuan chaha vaha naquehen ndo chi ra chihin cha sii cuñi ndo, vatyi yañi yo cha cuenda maa Sutu Mañi yo cuví chi ra. Ta tyicuan ri saha ndo ñáyivi chi yañi yo cha iyó tari caa cuhva iyó ra. ³⁰Vatyi cha yatyin maa cha cúvi ra cha cuenda cha sacuví ra tyiño ra Cristo. Soco ña yuhví ra vasi cúvi ra cha cuenda cha tyinyeé ra chii. Vatyi maa ndo ña cuví quichi tyinyee ndo chii vatyi cañi xaan nyicu ndo.

Nu sañahá ra Pablo yoso caa ndu ndii yo nuu Nyoo

3 Ta vityin yañi, cusii iñi ndo chihin Sutu Mañi yo. Cha cuenda chi yuhu ñahri sahá cha cha yaha tyai tuhun ihya chi ndo, cutyaa tiqui inga chaha. Vatyi cha vaha chi maa ndo cuví. ²Saha ndo cuenda chi ndo chihin ra cha quiñi iyó chiña. Nyacuví ra cuhva cuñi ra ña vaha. Vatyi catyí ra tyi cuñi chi sacuvi yo costumbre circuncisión ta cacu yo. ³Soco yoó noo circuncisión cha ndicha savaha Nyoo chi yo. Vatyi maa yo sacahnú yo chi ra chihin Tatyí Ii ra cha ñohó añaima yo. Ta cusii cuñi yo vatyi cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre. ⁴Tyehe ta cuví cacu yo chihin cha sacuví yo, yuhu vihi ca caquí cha nuu tandihi ñu sacuví tyicuan caa. ⁵Vatyi uña quivi ta saha ñu circuncidar chii. Vatyi tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta siin ri quichaha xain ley chahnu quivi cuan, vatyi fariseo cuví. ⁶Ta cha cuenda cha cuñi quichahi ley, ta chican nyicon xain chi ñu yihí cuenda ra Cristo. Ta ña cuñi nyehi chi ñu. Ta quichahi tandihi maa ley chahnu, vatyi nducu

xain cuhva quichahí nu cahán ley cuan. ⁷Soco tandihi cha cuñi mai vatyi vale xaan quivi cuan, vityin ña vale ca cuan. Vatyi maa ra Cristo cuví ra itá iñi. ⁸Ta siin ri tandihi cha sacuvi, chitó mai vatyi ña vale cha cuenda cha chicohón nui chi ra Cristo Jesús, Sutu Mañi yuhu. Vatyi yucuan cuví cha tyayiví xaan ca. Ta cha cuenda ra Cristo tandihi cha sacuvi ta ityi chata ca cuví chi noo cha ñima ri tuhun vityin. Yucuan chaha sandoi in chiyo xiin tandihi cuan. Vatyi cuñi cohon nuu que chi ra Cristo. ⁹Ta cha cuñi yuhu nacu in ri que chihin ra. Vaha iyé cha cuenda tyi chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyi chinó iñi tuhun cahán ra, vatyi sacacú ra chi yo. Ta cha cuenda cha chinó ri iñi yo, ra Cristo naquehén cuenda ra chi yo. ¹⁰Cha cohon nuu que chi ra Cristo yucuan cuví cha cuñi. Nyoo sanandoto ra chi ra Cristo chihin tunyee iñi ra. Ta cuñi tyi coo ca tunyee iñi cuan chii. Ta cuñi cunyeí tindoho cha tahán chi nyehí. Ta cuñi cha cúvi tandihi cha ña vaha cha cuñi coño ñuhi, tari chihí ra Cristo cha catyi cuatyí yo. ¹¹Vatyi nanducú xain cuhva cha cunandote noo ñayivi chaa chihin Nyoo nya andivi.

Cuhun ca yo ityi nuu ca chihin Nyoo

¹²Ñima tyi catyí chi ndo tyi ñahri ca cha cumañi chii, ta vaha xain. Soco cuahin ityi nuu ca. Vatyi cuñi naquehin cha chahá ra Cristo chii. Vatyi xihna ca maa ra naxita ra chii ityi ra. ¹³Yañi, ña catyí chi ndo tyi cha ñihí tandihi cha vaha cuan. Soco sanai iñi cha quichi ityi chata. Ta sañihí cuhin ityi nuu ca. ¹⁴Tacuhva tyi chaí nu nyaá cha tahán chi chii. Vatyi caná Nyoo chi yo nya andivi. Vatyi cunaquehen yo cha catyí ra chi yo vatyi cuhva ra cha cuenda cha in ri cuví yo chihin ra Cristo Jesús.

¹⁵Tyehe caa tahán chi caca xiñi tandíhi yo cha ñihi nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñi ñi ndo. ¹⁶Soco noo ri tyi cuñi chi cha quichahá vaha yo tuhun cha cha yaha sacoto Nyoo chi yo.

¹⁷Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo. ¹⁸Vatyi ticuñi chaha catyi chi ndo, saha ndo cuenda chi ra cuendu. Ta vityin catyi tiqui chi ndo inga chaha chihin cha chaquí cha cuihya ñi, vatyi cuaha xaan ra xaan ñi chi ra Cristo. Vatyi catyi ra tyi noo cha ña ñiñi xaan cuví cha chihí ra Cristo nu cruzi. ¹⁹Soco quivi quichi tucu ra Cristo, cahun coyo ra cuan anyaya. Vatyi sacuví ra cuhva cuñi coño ñuhu ra. Ta cahnu sahá ra chi ra chihin cha tahán chi coo ticahan nuu nuu ra. Ta itá ñi ra maa maa ri cha iyó ihya ñayivi ri. ²⁰Soco yoó nya andivi nyaá ñuu yo. Ta suri ityi cuan nyatú yo chi Sutu Mañi yo Jesucristo, ra sacacú chi yo. ²¹Ta cuquehen ra coño ñuhu pehe yo. Ta cusanan-duvi ra chi yo tari coño ñuhu maa ra. Ta chihin tunyee ñi cha iyó chi ra cha nyacá ñaha ra tandíhi, cusacuvi ra tyicuan caa.

Tyicuan ri na cusii cuñi yo chihin Sutu Mañi yo

4 Yañi, cuñi chi ndo. Ta cuñi xain nyehi chi ndo. Ta sii xaan cuñi chihin ndo. Ta chité tyi ña cahán cahi tuhun Nyoo chihin ndo. Vatyi ñi xaan ñi ndo nyicón ndo chi ra. Na cuinyaña ca ndo chi Nyoo chihin cha ñi ñi ndo.

²Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutu Mañi yo. ³Yoho, yañi, ñi ñun sahá tyiñon chihin, ta chiquén chuun na tyinyeun chi ñu tahan yo ihya. Vatyi tyinyee xaan ñu chii chihin cha

sacoto ñu tuhun Nyoo cha cacu añaima yo chihin ra Clemente ta suhva ca ñu ñandíhi. Ta nyaá sivi ñu nuu tutu Nyoo nya andivi.

⁴Ta tyicuan ri maa cusii ñi ndo chihin Sutu Mañi yo. Ta catyi tiqui chi ndo inga chaha, na cusii ñi ndo chihin ra. ⁵Ta tandíhi ñayivi na nyehe ñu chi nyoho vatyi ndicha noo ñayivi vaha cuví ndo. Ta ñicohon ñi ndo vatyi cha nyaña yatyin quivi quichi Sutu Mañi yo.

⁶Ta ma ndahvi xaan cuñi ndo ñáá ndíhi cha cuví chi ndo. Nyita ri nacatyí ndo chi Nyoo ñáá ndíhi cha cuví chi ndo. Ta çacan tahvi ndo chi ra ñáá ndíhi cha chiñuhú chi ndo. Ta yaha cuan ta nacuhva ndo tyahvi nyoo chi ra. ⁷Ta cha sacuví ndo tyehe caa, Nyoo cuhva ra cha taxi ri coo añaima ndo. Ta cahnu xaan ca cha vaha cuví cuan. Ta ni noo ñayivi ta ña cuví cutuñi ñi ñu yoso cuhva cha cahnu cuan. Ta cha taxi maa Nyoo cusaha cumi añaima ndo ta cha chiñi tuñi xiñi ndo. Vatyi ñi ri cuví ndo chihin ra Cristo Jesús.

Na caca xiñi yo maa maa ri cha vaha

⁸Yañi, nu ndíhi tuhun çaca xiñi ndo maa ri cha ndicha vaha, cha cachi iyó, cha ndoo iyó, cha ndii, cha ñahri cha quiñi caa, cha tyaqui, cha vaha. Çaca xiñi ndo maa maa ri maa cha vaha tacuhva cuví sacahnu yo chi Nyoo.

⁹Sacuvi ndo cha sañahí chi ndo. Tuhun cha chiñi ndo cahín, cha nyehe ndo chinyacuví, sacuvi ndo. Ta Nyoo ra chahá cha taxi coo añaima yo, cucunya ra chihin ndo.

Tyinyeé ñu Filipos chi ra Pablo chihin cha iyó chi ñu

¹⁰Sii xaan cuñi. Ta sacahní chi Sutu Mañi yo cha cuenda cha tyinyee ndo chii inga chaha. Ta chité vatyi tyicuan ri cuñi ndo tyinyeé ndo chii. Soco ña chahá chi cuhva chi ndo. ¹¹Ñima tyi catyi

chi ndo tyehe caa ta cuñí ndo tyi iyó cha chiñuhú chii, vatyi yuhu cha cutuhve cha cusii cuñí chihin ñáá ri cha iyó chi. ¹²Vatyi yuhu chité yoso caa coo ndahvi ta chité yoso caa coo tyayii. Vatyi cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha. ¹³Tandihí ta cuví chasahí vatyi maa ra Cristo cuví ra tyineé chii. ¹⁴Soco nyoho yañi vaha xaan cha tyinyee ndo chii chihin tindoho cha nyehé xain.

¹⁵Cha chitó nyoho ñu Filipos yoso caa cuví quivi quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyee ndo chii chihin xuhun, vatyi vaha xaan cuñí ndo cha cahín tuhun Nyoo chihin ndo. ¹⁶Ta siin ri cha ni ri ca cha chinyai Tesalónica, cuaha ri chaha tyinyee ndo chii. ¹⁷Ñima cha chicá xiñi cha cuenda cha cuhva ca ndo chii, soco cha cuñí vatyi nyoho coo ca cha vaha chi ndo nuu Nyoo. ¹⁸Ta vityin cuhva, ñahri cha cumañí chii. Ny-

acua ndoo ca cha sacuhun ndo chii chihin ra Epafrodito. Ta cha chaha ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra. ¹⁹Ta Nyoo cuhva ra tandihí cha chiñuhú chi ndo. Cha cuenda ra Cristo cucuhva ra tandihí cha vaha cha tyayii cha cumí ra nya andivi. ²⁰Chi Nyoo Sutu yo na sacahnu yo tyicuan ri maa. Ta na cuvi chi tyicuan caa.

Sacuhún ra Pablo nocumi chi ñu Filipos

²¹Chahí nocumi chi tandihí ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya. ²²Ta ñáyivi cha nyicú vehe ra nyacá ñaha ñuu Roma ihya, ta tandihí ca ñu yihí cuenda Nyoo ñuu ihya chahá ñu nocumi chi ndo.

²³Ta na nasoco maa Sutu Mañi yo Jesucristo chi tandihí ndo. Ta na cuvi chi tyicuan caa.

Carta Cha Sacuhun Ra Apóstol Pablo Chi ñáyivi Ñuu Colosas Cha Yihí Cuenda Nyoo

Nu sacuhún ra Pablo noo tutu chi ñáyivi ñuu Colosas cha yihí cuenda Nyoo

1 ¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo añaíma ndo.

Nu chicán tahvi ra Pablo chaha ñu yihí cuenda Nyoo ñuu Colosas

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo. ⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra. ⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andívi. Nya quívi chíñi ndo tuhun Nyoo cha ndicha vaha, quihi iñi ndo vatyí sacacú ra Cristo añaíma ndo. ⁶ Ta suri maa tuhun ra Cristo cha cañan ra Epafra chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chi ñu chi Nyoo, tari nacuhvá cuenda nyoho chi ndo ñandihí. Ta cuhva cha chíñi ndo tuhun ra Cristo, ta chito ndo vatyí ndicha vaha cha cuñí Nyoo chi yo. ⁷ Ican ihya sañaha yañi yo ra Epafra chi ndo. Vatyí iin ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo. ⁸ Maa ra sacoto tuhun ndo chi ndi, vatyí cuñí xaan ndo chi tahan ndo. Vatyí maa Tatyí li Nyoo chahá cha vaha coo añaíma ndo.

⁹ Yucuan chaha nyacua nya quívi chito ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chi Nyoo nacuhva ra cha chíñi tuñi ra chi ndo cha cuenda Tatyí li ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyi sacuví ndo. ¹⁰ Tyicuan caa ta cuví coo ndo tari cuhva tahán chí coo ñu yihí cuenda Nyoo. Ta na sacuvi ndo tari cuhva cuñí maa ra. Tacuhva sacuvi ndo tandihí nuu cha vaha ta cohon nuu vaha ca ndo chí ra. ¹¹ Ta chicán tucu ndi vatyí na sandunye ca ra chí ndo chihin tunyee iñi cahnú ra vatyí cuví cunyee ndo tandihí cui chihin cha cama iñi ndo. ¹² Ta chihin cha sii cuñí ndo, ta nacuhvá ndo tyahvi nyoo chí Nyoo Sutu yo, vatyí chahá ra cha coo ndo noo ñáyivi chaa. Vatyí natava ra chí ndo nu quiñi caa, ta nanyita ndo nu ndichin nu nyacá ñaha ra chí tandihí ñu yihí cuenda ra. Ta cuhva ra tandihí cha vaha cha tahán chí chí ñu yihí cuenda ra. ¹³ Nyoo tava ra chí yo nu ñaa iñi ta nacuhvá cuenda ra chí yo chí ra Cristo vatyí cunyaca ñaha ra chí yo. Vatyí ican ra Cristo cuví Sehe Nyoo. Ta cuñí xaan Nyoo chí ra. ¹⁴ Nasata Nyoo chí yo chí hin niñi ra Cristo ta saha ra tucahnú iñi cuatyí yo.

Nduvaha iyó yo chihin Nyoo cha cuenda cha chíñi ra Cristo cha catyi cuatyí yo

¹⁵ Nyoo, ña nyehé yo chí ra. Soco nanduví ra ñáyivi tacuhva cuví cohon nuu yo chí ra. Ta ican ra cuví Cristo Sehe Nyoo. Nya ta ni cumañi ca chino ñáyivi ta cha iyó maa ra Cristo. ¹⁶ Ta Nyoo chaha ra tyi savaha maa ra Cristo tandihí cha iyo andívi ta siqui ñuhu ñáyivi. Ta savaha ra cha cuví nyehe yo ta cha ña cuví nyehe yo. Savaha ra ángel. Ta savaha ra chí ra ña vaha ta chí tatyí ña vaha ñandihí. Ta tandihí cha nyacá ñaha siqui ñuhu ñáyivi ihya, maa ra savaha. Ta

tandihí ihya chingó chi tacuhva cotyiñó ra yoso cuhva cuñí maa ra. ¹⁷ Ra Cristo cha iyó maa ra nya ta ni cumañi coo tandihí maa cha iyó. Ta tyicuan ri chahá ra cha conyito tandihí maa cha savahá ra. ¹⁸ Ta maa yo cha yihí yo cuenda ra Cristo, iin ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuvi nuu chi yo. Ta ican ra cuví cha nandotó cha xihna ca. Yucuan chaha cuví ra nuu chi tandihí cha iyó. ¹⁹ Vatyí maa Nyoo cuñí ra tyi coo tandihí tunyee iñi ra chi ra Cristo. ²⁰ Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chahá Nyoo cha chihí ra Cristo. Ta chatí ñiñi ra nu cruzi. Vatyí cuñí ra cha nicoó vaha tandihí cha iyó siquí ñuhu ñayivi ta andivi chihin ra.

²¹ Ta nu quichí chi, xaan cuví iñi ndo chi Nyoo cuhva cha chicá xiñi ndo cha cuenda cha ña vaha cha chinyacuví ndo. ²² Soco Nyoo sanicoo vaha ra chi ndo chihin ra vatyí tachí ra chi Sehe ra, ra Cristo vatyí quichí cuvi ra nu cruzi. Ta nyehe ra tindoho chihin coño ñuhu ra ta chihí ra, tacuhva vatyí cuhva cuenda ra chi ndo chi Nyoo, soco ñahri ca cuatyí ndo. ²³ Yucuan chaha cuñí chi vatyí sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chiñi ndo tyi cusacacu ra ñima ndo. Ican tuhun ihya, cuví cha cacahán ra nicacahnu ñayivi. Ta sacuvi Nyoo vatyí yuhu ra Pablo tyinyeí cahín tuhun ihya chihin ñáyivi.

**Nu catyí ra Pablo vatyí nyaá siquí
ra cha sañahá ra tuhun ra
Cristo tandihí ri vehe ñuhu**

²⁴ Vityin cusii cuñí cha cuenda cha nyehí tindoho chihin coño ñuhi cha catyí ndo. Vatyí cha tyicuan caa sacañá tahin tindoho cha nyehe ca ra Cristo cha cuenda yo cha cuví yo coño ñuhu ra. ²⁵ Yuhu cuví noo ra cahán tuhun

ra Cristo vatyí tyicuan caa tyinyeí chi tandihí ñu yihí cuenda ra. Vatyí maa Nyoo catyí ra vatyí cahin tandihí tuhun ra cha cuenda cha vaha chi ndo. ²⁶ Sañahá tuhun cha ñohó xehe nya ta tyembu chahnu, nya ta ni cumañi ca chino ñayivi. Nyoo chicumi xehe ra. Soco vityin cuñí ra cha coto tandihí cuii maa ñu yihí cuenda ra. ²⁷ Ta chi ñu cha ñima ñu Israel cuví tari nyoho, cuñí Nyoo sacotó ra noo tuhun vaha xaan, noo tuhun xehe chi ndo. Ta tuhun xehe cuan ican cuví ihya, vatyí ra Cristo ñohó ra ñima ndo cha yihí ndo cuenda ra. Ta cha cuenda maa ra cuñihi ndo gloria nu cunyaa yo chihin Nyoo.

²⁸ Tuhun maa ra Cristo cahán ndi. Ta chahá ndi tuhun chi tandihí ñáyivi. Ta sañahá ndi chi ñu tandihí cha chiñi tuñi, tacuhva cuahnu ñu ta nyacua nya cha ñahri ca cumañi chi ñu cha iin ri cuví ñu chihin ra Cristo. ²⁹ Yucuan chaha tyi ní iñi sahá tyiñe chihin tunyee iñi ra Cristo ta ñihi xaan chotyíñó tunyee iñi cuan chii.

2 Vatyí cuñí cha coto ndo vatyí chicá xiñi cha cuenda ndo. Ta chicán tahvi xain cha cuenda tandihí ndo ta cha cuenda ñu Laodicea, ta tandihí inga ñu cha ta nyehe ca chii. ² Chiquén chi Nyoo na cumí ca iñi ndo, ta cu iin ri ndo chihin cha cuñí ndo chi tahan ndo. Ta cutuñi vaha ca iñi ndo yoso caa cohon nuu ca ndo chi ra Cristo. Vatyí ican ra cuví tuhun cumí xehe Nyoo ta cha naha. Soco vityin sacotó ra chí yo tuhun ihya. ³ Maa ra Cristo chahá ra tandihí cha vaha ta cha chiñi tuñi chi yo. Tatu ñohó nuu yo chi ra Cristo, ñohó nuu yo chi Nyoo. ⁴ Catyí chi ndo tyehe caa tacuhva cha ma sandavi ñaha ñáyivi chi ndo chihin tuhun tyaquí. ⁵ Vasi ña nyaí chihin ndo, soco cohon iñi ndo vatyí ñohó iñi tuhun ndo. Ta sii cuñí nyehi chi ndo. Vatyí vaha xaan cuhva cuahán iyó ndo. Ta ñi xaan iñi ndo cuahan ndo chata ra Cristo.

⁶Yucuan chaha tari chinó iñi ndo chi noo tuhun ri maa ra Cristo quivi ñañihí ndo chi ra, tyicuan caa cuñí tucu chi coo ndo ta iin ri cuvi ndo chihin ra. ⁷Ta cuinyañaa ca ndo chi ra. Ta quihí vaha yoho ndo chihin ra. Ta sanií ca ndo iñi ndo chihin cha chino iñi ndo, tari cuhva sañaha ñu chi ndo. Ta nyita ri nacuhvá ndo tyahvi nyoo chi Nyoo.

Ñayivi chaa cha chahá ra Cristo chi yo

⁸Saha ndo cuenda vatyi iyó ñáyivi cuñí ñu sandavi ñaha ñu chi ndo chihin tuhun cha ndichí ri maa xiñi ñáyivi, tuhun cha ña ndicha. Vatyi ñima chi ra Cristo chinó iñi ñu cuan. Noo costumbre ri nyicón ñu cuan. Ta nyicón ñu chi cha nyacá ñaha siqui ñuhu ñayivi ihya.

⁹Soco cha sañahá ñu cuan, ñima cha ndicha cuví. Vatyi Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyi maa ra Cristo cuví Nyoo. ¹⁰Ta cha nyaá ra Cristo chihin ndo, tyitú añima ndo chihin Nyoo. Ta ra Cristo ican ra cuví ra nuu chi tandihí ángel ta tatyí cuihna cha nyacá ñaha. ¹¹Quivi ñañihí ndo chi ra Cristo, quihví ra añima ndo. Ña nduvalhā ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyō tandihí cha ña vaha cha tuhva ndo sacuvi. Saha ra circuncidar añima ndo cuví cuan soco ñima chihin ndaha ra. ¹²Quivi condutya ndo chichi ndutya, tari quivi chihí ndo chihin ra Cristo cuví cuan. Tyicuan ta quita ndo chichi ndutya, tari quivi nandoto ndo chihin ra Cristo, vatyi chinó iñi ndo tyi Nyoo chihin tunyee iñi ra sanandoto ra chi ra Jesús. ¹³Nu quichí chi ña ñohō nuu ndo chi Nyoo. Vatyi sacuvi xaan ndo cuatyí. Ta cuví ndo tari noo ñáyivi chihí chihin cuatyí cuan. Ta ña saha ñu circuncidar chi ndo. Soco vityin Nyoo saha ra ticahnu iñi tandihí cuatyí ndo. Ta chaha ra cha coo ndo noo ñayivi

chaa chihin cha iin ri cuví ndo chihin ra Cristo. ¹⁴Sanatuví ley chahnu cuan cuatyí yo. Ta catyí chi tyi tahán chi cuhun yo anyaya vatyi ña quichahá yo chi chi. Soco ley cuan Nyoo sacuachiyō ra quivi chihí ra Cristo nu cruzi. ¹⁵Quivi cha chihí ra nu cruzi cuví chasaha ra chi cuihna ta chi tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyi cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

¹⁶Yucuan chaha ña tahán chi quihí yuhu ñáyivi chi yo cha cuenda cha chachí yo o cha chihí yo, o cha cuenda cha ña naquehén vaha yo noo quivi vico. Cuví ri quivi cha natyacu yoo, o cuví ri quivi nyitatu yo. ¹⁷Tandihí cuan cuví chi tari noo xiñahñu ri cha cuquichi ityí nuu. Ta vityin cha quichí ra Cristo ta ican ra cuví ra cha ndicha vaha sacacu chi yo. ¹⁸Ma cuhva ndo cha casi ñáyivi nu naquehen ndo noo cha cuacuhva Nyoo chi ndo. Maa ñu ndahvi sahá ñu chi ñu soco ña ndicha ñu, ta sacahnú ñu chi ángel. Ta sahá ñu tyi ñyehe ñu cha sañaha Nyoo chi ñu. Ta cahnu sahá ñu chi ñu chihin cha chicá xiñi ñu tuhun ñayivi ihya. ¹⁹Ñu cuan ñima chi ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chi ra, maa ra cuví nuu chi yo. Ta sandu iin ri ra chi yo chihin ra. Ta sacahnú ca ra chi yo chihin tunyee iñi ra tari cuhva cuñí maa Nyoo.

²⁰Tari quivi chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñayivi ihya chi ndo. ¿Ñáa tuhun cha iyó ca ndo tari caa iyó ñáyivi cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan. ²¹Vatyi catyí ñu chi ndo tyehe caa: “Ma tiun ihya chihin ndahun, ma cachun ihya. Coto

ma cacun”, catyí ñu. ²²¿Ñáá tuhun cha quichahá ca ndo tuhun cahán ñu cuan? Vatyí maa maa ri cha ndichí xiñi ñáyivi cuví. Vatyí nyayu noo cha ñin yaha ri cuví. Ma tiví ndo nuu Nyoo cha cuenda cha cachi ndo. ²³Ndicha vatyí costumbre ihya tari maa cha vaha cuví, cuñí maa ñáyivi. Vatyí sanyehé ñu tindoho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuví tinyaa cuan cha quiñi caa cha cuñí coño ñuhu ñu.

3 Chahá Nyoo noo ñáyivi chaa chi yo vatyí nandotó ra Cristo. Ta vityin nyaá ra chiyo vaha Nyoo andivi. Yucuan chaha na nducu yo cha vaha cha chahá Nyoo chi yo nya andivi. ²Çaca xiñi ndo cha vaha cha chahá Nyoo chi yo nya andivi. Ta ma caca xaan xiñi ndo tuhun cha iyó siqui ñuhu ñáyivi ihya. ³Vatyí nyoho cha yahá chihí ndo in caa ri chihin ra Cristo. Ta vityin iyó ndo ñin ri chihin ra chihin Nyoo. ⁴Ta quívi quichi tucu ra Cristo, ra chahá ñáyivi chaa cha iyó ndo, tyicuan ta cunyehe ñáyivi tyi cahnu xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaquí cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

⁵Yucuan chaha cuñí chi cha nanducú yo cuhva na cúvi tandihí cha quiñi caa cha quichí cuví ñni coño ñuhu yo. Ta ni noo yo ta ma coo ri maa yo chihin ñusihi o chihin rayii. Ta ma sacuvi yo cha ña vaha cha cuñí coño ñuhu yo, o inga cha ña vaha. Ta ma nyiyo ñni yo cha tyayii. Vatyí tari cha sacahnú yo xitohyo, o tavá xiin yo chi Nyoo cuví cuan. ⁶Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachí tuñi ra chi ñu

vatyí sacuví ñu cha ña vaha cuan. ⁷Ta suri tyehe caa chinyacuví tucu maa ndo quívi ña ñoho nuu ndo chi Nyoo. ⁸Soco vityin ma sacuvi ca yo tandihí cha ña vaha cuan. Ma cuxaan ca yo. Ma cahan uhvi ca yo chi tahan yo. Ta ma cahan cuehe yo chi tahan yo. Ta ma cahan ca yo cha quiñi caa. Ma quita tuhun quiñi caa yuhu yo. ⁹Ma ñni ca yo cuendu. Vatyí quívi ta ityi chata ca, quívi ña ñoho nuu yo chi Nyoo, tyicuan caa chinyacuví yo. Soco vityin ña nyacá ñaha ca tandihí cuan chi yo. ¹⁰Vatyí ñáyivi cha iyó yo vityin, ñáyivi chaa cuví. Noo ñáyivi chaa nanduví yo. Ta nduchaá ca yo tari cuhva caá Nyoo, ra savahá chi yo, nyacua nya cohon nuu vaha yo chi ra. ¹¹Ña ñni cha cuví yo ñu Israel, an ñu Grecia, an ñu inga ñuu. Ta ña ñni cha sacuví yo costumbre circuncisión, an cha ma sacuvi yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña ñni xaan ca tuhun cuan. ñni ca cha ñin ri cuví tandihí yo chihin ra Cristo, vatyí maa ra cuví tandihí.

¹²Nyoo cuñí ra chi yo ta nacachí vaha ra chi yo vatyí cuví yo ñáyivi chi ra. Yucuan chaha na coo yo ñáyivi chaa tari tahán chi coo ñu yihí cuenda ra. Na cundahví cuñi yo nyehé yo chi tahan yo. Na cuví yo ñáyivi vaha. Ndahví saha yo chi yo. Na cumasu ñni yo. Cunyee yo tandihí tisihi tindoho chihin cha siñ cuñí yo. ¹³Na cucama ñni yo chihin noo noo tahan yo. Ta saha yo ticahnu ñni chi tahan yo tatu ñáá cha sacuví ñu chi yo. Tari sahá ra Cristo ticahnu ñni chi yo, tyicuan caa cuñí chi cha sacuví tucu maa yo. ¹⁴Ta siñ ri cuñi yo chi tahan yo. Ta nducu yo cuhva coo vaha yo chihin ñu. Vatyí ican cuan cuví cha sacu ñin ri chi yo. Ta ican cuan cuví cha ñni ca. ¹⁵Ta cha taxi maa Nyoo na coo ñni yo. Vatyí ra Cristo nyacá ñaha chi yo. Nyoo nacana ra chi yo vatyí tacuhva ñin

ri cuví yo cuenda ra Cristo. Ta tyicuan ri ñacuhva yo tyahvi nyoo chi ra cha cuenda ihya.

¹⁶Ta tuhun ra Cristo na sacutu añima yo. Sañaha ca yo tuhun ra chi tahan yo. Ta sañi ca yo iñi tahan yo chihin cha chiñi tuñi Nyoo. Sacahnu yo chi Nyoo chihin cha cata yo yaa, o salmo. Ta caña yo yaa cha chahá maa Tatyí Ii Nyoo chi yo chihin cha ñi añima yo. Ta tyicuan ri ñacuhva yo tyahvi nyoo chi Nyoo. ¹⁷Tatu ñáá tyiño sahá yo, o ñáá tuhun cahán yo, sacuvi yo soco tari cha tyi tyiño maa Sutu Mañi yo Jesús sacuví yo. Ta ñacuhva yo tyahvi nyoo chi Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñáyivi

¹⁸Nyoho cha iyó yii ndo, cuhva ndo cha cunyaca ñaha yii ndo chi ndo. Vatyí yucuan cuhva tahán chi coo ndo, vatyí yihí ndo cuenda Sutu Mañi yo. ¹⁹Ta nyoho rayii, cuñi ndo chi ñasihi ndo. Ta ma nduxaan ndo chi ña. ²⁰Nyoho cha cuví ndo sehe quichaha ndo chi sutu ndo ta chi sihi ndo. Vatyí yucuan cuhva cuñi maa Sutu Mañi yo. ²¹Nyoho cha cuví ndo sutu ta sihi, ma cahan xaan ndo chi sehe ndo, vatyí coto nducuihya iñi chi. ²²Ta nyoho cha cuví ndo musu, quichaha ndo chi chitoho ndo. Ñima cuhva cha nyehé ri ra chi ndo quichaha ndo chi ra, tacuhva vatyí vaha cuñi ra nyehé ra chi ndo. Soco sacuvi ndo chihin cha tandihi añima ndo. Vasi ña nyehé ra. Vatyí Nyoo nyehé ra chi ndo. ²³Tandihí ri tyiño sacuví yo, sacuvi yo chihin cha ñi iñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi. ²⁴Vatyí chitó yo vatyí maa Sutu Mañi yo cucuhva ra noo cha tahán chi chi yo vatyí sacuví yo tyiño nuu ra Cristo. Vatyí ican maa ra cuví chitoho yo cha ndicha vaha. ²⁵Soco tatu sacuví yo cha ña vaha, Nyoo

cutachi tuñi ra chi yo cha cuenda cha ña vaha cha sacuví yo. Ta tandihí yo iñi ri ñáyivi cuví yo nuu ra. Vatyí Nyoo ña cachi ra ñáyivi cuñi ra.

4 Nyoho cha iyó musu ndo, cuñi chi tyi vaha ñáyivi cuví ndo chihin musu ndo. Ñicohon iñi ndo vatyí iyó tucu noo chitoho maa ndo nya andivi. Ta maa ra nyehé ra chi ndo.

²Ta tyicuan ri cañan tahvi ndo chihin cha ñi iñi ndo. Ta nacuhva yo tyahvi nyoo chi Nyoo cha cuenda tandihí maa. ³Cañan tahvi ndo chaha ndi, vatyí nanuña ca Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyí tari noo tuhun xehe cuví tuhun ra Cristo chi ñu, vatyí ña chitó ñu tyi ican ra cuví ra sacacú chi yo. Ta cha catyi tuhun ihya ñohí vehe caa. ⁴Cañan tahvi ndo chahi tacuhva cuví sañahí chi ñu yoso cuhva cuví cutuñi vaha iñi ñu tuhun ra Cristo, tari cuhva tahán chi tyi sacuví.

⁵Cachi coo ndo chihin ñu ña ñohó nuu chi Nyoo. Vatyí tyicuan caa ta cuví cahan ndo tuhun Nyoo chihin ñu. ⁶Cuñi chi vatyí ndatuhún yo maa maa ri cha vaha, ta cha cachi, (ta cha tahán iñi ñáyivi) tari tahán chi cunyacuvi yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáá noo tuhun ndacá tuhun ñu chi yo.

Nu sacuhún ra Pablo nocumi chi ñu ñuu Colosas cha yihí cuenda Nyoo

⁷Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra chi ndo yoso caa cuahán nyaí. ⁸Yucuan chaha tachí chi ra nu nyicu ndo vatyí nacatyí ra chi ndo yoso caa nyicú ndi. Ta sandunii ca ra iñi ndo. ⁹Ta chihin ra Tíquico vachi tucu ra Onésimo, yañi yo. Ta ñi iñi ra. Ta cuñi yo chi ra. Cuví ra noo ra ñuu ndo. Maa ra cunacatyí ra chi ndo tandihí cha cuví nu nyaí.

¹⁰ Ra Aristarco, ra tahn cha ñohó ndi vehe caa, saquichí ra nocumi chi ndo. Ta saquichí tucu ra Marcos, yañi cunducuatyi ra Bernabé, nocumi chi ndo. Ta cha sacote chi ndo tuhun ra Marcos. Tatu chaa ra nu nyicu ndo, vaha cahan ndo chihin ra. ¹¹ Vachi tucu nocumi chi ndo sahá ra Jesús, ra cha nañi tucu Justo. Ta chichi cha tandihi ñu Israel cha yihí cuenda Nyoo, uñi tahan ri ra ihya sahá tyiño ra tuhun Nyoo chihin. Ta nduniñi xaan ca iñi sahá ra. ¹² Vachi tucu nocumi chi ndo sahá ra Epafra, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chi Nyoo tyi nacaca vaha ndo chihin Nyoo. Nacuhva cuenda vaha ndo chi ndo chi Nyoo tacuhva cuvi sacuvi ndo cuhva cuñí ra. ¹³ Ta yuhu cuví cha ndaa vatyi ra Epafra chicán tahvi xaan ra cuenda ndo, ta cuenda ñu cha nyicu nya

ñuu Laodicea ta ñuu Hierápolis. ¹⁴ Vachi tucu nocumi chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumi chi ndo sahá ra Demas ñandihí.

¹⁵ Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfas ta chi tandihi ñu yihí cuenda Nyoo cha ndu iñ ri vehe ña. ¹⁶ Tatu yaha sacuahá ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuahá tucu maa ñu. Ta sacuahá tucu maa ndo carta cha sacuhin chi ñu Laodicea. ¹⁷ Catyi ndo chi ra Arquipo vatyi na sacuvi vaha ra tyiño cha chahá Sutu Mañi yo chi ra tyi sacuví ra.

¹⁸ Yuhu ra Pablo saquichí nocumi ihya chi ndo. Ta ma naa iñi ndo cha ñohí vehe caa. Ta Nyoo na nasoco ra chi ndo. Ta na cuvi chi tyicuan caa.

**Carta Cha Xihna Ri Sacuhun
Ra Apóstol Pablo Chi
Ñáyivi Nuu Tesalónica
Cha Yihí Cuenda Nyoo**

**Nu tyaá ra Pablo ta ra tahan ra noo
tutu chi ñu yihí cuenda Nyoo**

1 Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyi iin ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

**Vaha xaan chinó iñi ñu
Tesalónica cuan chi Nyoo**

²Tyicuan ri nacuhvá ndi tyahvi nyoo chi Nyoo cha cuenda tandihi ndo. Ta nyita ri chicán tahvi ndi cha cuenda ndo. ³Tyicuan ri yihí iñi ndi tuhun ndo nuu Nyoo Sutu yo ta nicohón iñi ndi vatyi ñi iñi ndo chinó iñi ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha ñi iñi ndo yihí iñi ndo cha cuañihi ndo cha cuenda ra Jesucristo. ⁴Vatyi chitó ndi tyi Nyoo nacachi vaha ra chi nyoho yañi. Ta cuñí xaan ra chi ndo. ⁵Vatyi quivi cahan ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí Ii chi ndi, ta cuaha xaan sacuvi ra chihin tunyee iñi ra. Ta cahan ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quivi chinyaa ndi chihin ndo. Tyicuan caa chiyo ndi cha cuenda cha vaha chi maa ndo.

⁶Ta quichaha iyó ndo cuhva iyó ndi, ta cuhva iyó Sutu Mañi yo. Vatyi natiiin

cuenda ndo tuhun Nyoo, vasi cuaha tindoho nyehe ndo cha cuenda cuan. Soco sii xaan cuñí ndo vatyi maa Tatyí Ii chahá tusii iñi cuan chi ndo. ⁷Ta cha tyicuan caa, tyinyee xaan ndo chi tandihi ñu yihí cuenda Nyoo nicahnu ityi Macedonia chiña ta nicahnu ityi Acaya ihya ñandihí, vatyi nyehe ñu cuhva iyó ndo chihin Nyoo. ⁸Ñima ityi Macedonia ta Acaya ri, soco tandihi ri ityi nu chiñí ñu tuhun ndo chitó ñu tuhun Sutu Mañi yo ta chitó ñu vatyi chinó xaan iñi ndo chi Nyoo. Ta yucuan chaha nyacua ña niñi ca cha cahan ndi tuhun Nyoo chihin ñu. ⁹Vatyi suri maa ñu nacatyí ñu chi ndi yoso caa cha vaha xaan tiin cuenda ndo chi ndi quivi cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha. ¹⁰Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andivi. Ican ra cuví ra cha sanandoto Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quivi sacutuñi ra chi ñáyivi.

Tyiño sahá ra Pablo ñuu Tesalónica

2 Nyoho yañi, chitó ndo vatyi ñima cha caha ri chahan ndi chicahan ndi tuhun Nyoo ñuu ndo. ²Vatyi chitó ndo yoso caa nyehe ndi tindoho saha ñáyivi ñuu Filipino cha ni cumañi ca chaá ndi ñuu ndo. Ta vasi nyehe xaan ndi tindoho ñuu cuan soco quivi chaá ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyivi ñuu ndo, soco tyinyee xaan Nyoo chi ndi ta sacoto ndi chi ndo yoso caa sacacú ra añima yo. ³Vatyi tuhun cha chahá ndi chi ndo maa maa ri cha ndicha cuví. Ta ñahri cha quini caa chicá xiñi ndi. Ta ni ñima cha cuñí ndi sandavi ñaha ndi chi ndo. ⁴Ñahri cha ña vaha cahan ndi, vatyi Nyoo nyehé ra chi

ndi, ta maa ra tyatyíño ra chi ndi vatyi sacoto ndi chi ndo yoso caa sacacú ra añima yo. Ta yucuan cuví cha cahán ndi tari cuhva tyatyíño ra chi ndi. Vatyi ña cuñí ndi cuvaha ndi nuu ñáyivi, soco nuu Nyoo cuñí ndi cuvaha ndi, vatyi maa ra nyehé ra ñáá cha caa añima yo. ⁵Ta nyoho chitó ndo vatyi ni noo chaha ña cahán ndi chihin tuhun tyaquí cha cuñí ndi sandavi ñaha ndi chi ndo. Ta ni ñima cha cuñí ndi saha ganaa ndi xuhun ta cahán ndi tuhun ihya chihin ndo. Nyoo cuví ra cha ndaa tyi ndicha cha cahín ihya. ⁶Ta ni noo chaha ña nanducu ndi cuhva cha sacahnu ñáyivi chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyi maa ra Cristo tachí ra chi ndi, soco ña cuñí ndi coso ndi siquí ndo cha tyicuan caa. ⁷Soco cuñí ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñí ndi tyinyee ndi chi ndo. ⁸Cuñí xaan ndi chi nyoho, ta cahvi iñi ndi vatyi ñima tuhun Nyoo ri cuhva ndi chi ndo, soco nyacua nya ñáyivi ndi ñandíhi, cha cuenda cha cuñí ndi chi ndo. ⁹Nyoho yañi, nichón iñi ndo yoso caa saha tyiño ndi quívi chinyicu ndi chihin ndo. Sahá tyiño ndi ñicahñu ta cha cuaa vatyi ña cuñí ndi coso ndi siquí ni noo ndo cha ni ri ca cha cahán ndi tuhun Nyoo chihin ndo.

¹⁰Ta nyoho cuví ndo cha ndaa, ta Nyoo ñandíhi, vatyi maa ri cha vaha ta cha ndaa chinyacuví ndi quívi chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñí Nyoo chinyacuví ndi, ta ña chaha ndi cuhva vatyi cahan ña vaha ndo siquí ndi. ¹¹Ta chitó tucu ndo yoso caa sanduní ndi iñi noo noo ndo chihin tuhun chaha ndi chi ndo. Sandunyeé ndi iñi ndo tari noo ra chihin sehe ra. ¹²Ta catyi ndi chi ndo nacachi coo ndo tari tahán chi coo ñu yihí cuenda Nyoo. Vatyi maa ra nacana chi ndo vatyi coo ndo nu nyacá

ñaha ra, ta nyehe ndo cha tyaquí gloria ra.

¹³Yucuan chaha tyicuan ri nacuhvá ndi tyahvi nyoo chi Nyoo, vatyi quívi chíñi ndo tuhun ra cha cahán ndi chihin ndo, natiñ cuenda ndo vatyi nacoto ndo tyi tuhun Nyoo cuví ta ñima tuhun ñáyivi ri. Ta ndicha cha tuhun Nyoo cuví, vatyi sacuví chi vatyi chino iñi ndo chi Nyoo ta nasama ndo cuhva iyó ndo. ¹⁴Yaha cuan ta nyehe tucu maa ndo tindoho saha ñáyivi ñuu ndo, tari nyehe tucu ñu yihí cuenda ra Cristo Jesús nicahnu ityi Judea. Tyicuan caa sanyehe tucu ñu Israel ityi Judea cuan tindoho chi ñáyivi tahan yo cuenda ra Cristo cuan. ¹⁵Ta ican ñu Israel cuan cachahñi chi Sutu Mañi yo Jesús tari cachahñi tucu ñu chi ra profeta, ra cachaha cuenda tuhun cahán Nyoo ta ityi chata ca. Ñu Israel cuan tava ñehe ñu chi ndi. Ñima cuhva cuñí Nyoo iyó ñu. Ta tasi cuñí ñu nyehe ñu chi tandíhi ñáyivi. ¹⁶Tatu cuñí ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndíhi tuhun cutachi tuñi xaan Nyoo chi ñu.

**Nu catyi ra Pablo vatyi cuñi
ra cunyehe ra nu nyicú ñu
Tesalónica inga chaha**

¹⁷Yañi, cha yaha cha quita ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha ñi iñi ndi cuñi ndi cunyehe ndi nu nyicú ndo inga chaha. ¹⁸Ta nducu ndi cuhva cuhun ndi soco ña cuví. Ta yuhu ra Pablo ñandíhi, cuaha xaan chaha nduquí cuhva cuhun ndi, soco tahan ri chaha cha cuñi ndi cuhun ndi ta ña chaha ra ña vaha. ¹⁹Soco ¿yóo chi ita iñi ndi? Ta ¿yóo chi cuenda cusí cuñi ndi, ta vaha cuñi ndi? ¿Atu ñima cha cuenda maa

ndo cusii xaan cuñí ndi nuu Sutu Mañi yo Jesucristo quívi quichi ra inga chaha? ²⁰Vatyi cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sii xaan cuñí ndi cha cuenda cuan.

3 Ta yucuan chaha ña cunyeē que cha ma cote yoso caa cuahan ndo chihin Nyoo. Ta natyaji iñi tyi ndoi ñuu Atenas. ²Ta tachí chi yañi yo ra Timoteo na cuhun ra cunyehe ra chi ndo. Maa ra sacuví ra tyiño nuu Nyoo vatyi iñ ri chihin ndi cahán ra tuhun yoso caa cacú añaima yo sahá ra Cristo. Tachí ndi chi ra nu nyicú ndo na sandunii ca ra iñi ndo ta sandunyeē ca ra iñi ndo tacuhva vatyi chinó ca iñi ndo chi Nyoo. ³Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindoho. Vatyi nyoho chitó ndo vatyi nyaá yo cha nyehe yo tindoho tyehe caa. ⁴Vatyi ta ninyaá ca ndi chihin ndo, catyi ndi chi ndo vatyi cha cuñí quichi quívi cha nyehé yo tindoho. Ta chitó vaha maa ndo tyi tyicuan caa cuví. ⁵Yucuan chaha ña cunyeē que cha cuñí cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó iñi ndo chi Nyoo. Vatyi yuhví coto sandavi ñaha cuhna chi ndo ta nandíhvi tucu ndo nu quiñi caa inga chaha. Vatyi tu tyicuan caa, cucunaa tandíhi tyiño sahá ndi nu nyicú ndo.

⁶Soco vityin cha nachaa ra Timoteo cha chahán ra nu nyicú ndo ñuu Tesalónica chiña. Ta nacatyí ra chi ndi vatyi níi iñi ndo chinó iñi ndo chi Nyoo. Ta cuñí xaan ndo chi tahan ndo. Ta catyí ra tyi tyicuan ri nicohón iñi ndo chi ndi ta cuñí xaan ndo nyehe ndo chi ndi, tari nyuhu, cuñí tucu maa ndi nyehe ndi chi ndo. ⁷Yucuan chaha, yañi, vasi cuaha cha cuví chi ndi ta nyehé ndi tindoho, soco vaha xaan cuñí ndi cha chitó ndi vatyi nyoho vaha chinó iñi ndo chi Nyoo ta ña sañá ndo chi ra. ⁸Tari quívi cha

nduchaa ñayívi ndi, cuñí maa ndi cuhva cha nacoto ndi vatyi nyoho ñihi cuahan ndo chihin Nyoo. ⁹Nyacua ña ñihí ndi cuhva nacuhva ndi tyahvi nyoo chi Nyoo cha cuenda ndo. Vatyi sii xaan cuñí ndi nuu Nyoo cha cuenda vatyi vaha cuahan ndo chihin ra. ¹⁰Chicán tahvi xaan ndi chi Nyoo ñicahñu ta cha cuaa, vatyi cuñí ndi cuhun ndi cunyehe maa ndi chi ndo. Tyicuan ta cuvi sandunanií ndi cha chinó iñi ndo.

¹¹Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cuhun ndi nu nyicú ndo. ¹²Ta na tyinyee ca Sutu Mañi yo Jesucristo chi ndo tacuhva cuñí ca ndo chi noo noo tahan ndo ta chi tandíhi ñáyivi tari cuñí nyuhu chi nyoho. ¹³Tacuhva vatyi cunii ca iñi ndo ta cunduvii ndíhi añaima ndo. Ta ma coo ca cuatyí ndo nuu Nyoo Sutu yo quívi quichi tucu Sutu Mañi yo Jesucristo chihin tandíhi ca ñu yihí cuenda ra.

Cuhva cha tahán iñi Nyoo cha coo yo

4 Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chi ndo, cuhva tahán iñi Nyoo. Ta sañihi ca ndo coo ndo tyicuan caa noo noo quívi.

²Nyoho cha chitó ndo yoso caa chahá ndi cuhva chi ndo tari chahá tucu maa Sutu Mañi yo Jesús cuhva chi ndi. ³Cha cuñí Nyoo, ican cuví ihya: Cha ñacuhva ndíhi ndo chi ndo chi ra tacuhva sanduvii ndíhi ra añaima ndo. Ta ni noo ndo ta ma coo ndo chihin noo ñaha síhi o rayíi tatu ñima ñasihi o yíi ndo cuví. ⁴Ta tahan tahan ndo cuñí chi coto ndo yoso caa coo ndo chihin ñasihi ndo. Coo vii ndo chihin ña chihin cha cuñí ndo chi ña. ⁵Ñima chihin cha quichi cuvi iñi ndo cha quiñi caa tari nyacuví ñáyivi cha ña ñohó nuu chi Nyoo. ⁶Ta ni noo ndo ta ma sandavi ñaha ndo chi yañi

ndo ta coo ndo chihin ñasihi ra. Vatyí Sutu Mañi yo, ñihi xaan tachí tuñi ra chi ñu sacuví tyicuan caa, tari cuhva catyí ndi chi ndo. ⁷ Vatyí Nyoo nacanã ra chi yo vatyí tacuhva sacuvi yo cuhva cuñí maa ra, ta ñima noo cuhva quiñi caa. ⁸ Ta yucuan chaha yóo ñu cha ña cuñí tyasoho tuhun ihya, ñima tuhun ñáyivi ri ña tyasohó ñu, soco tuhun Nyoo ña tyasohó ñu. Vatyí suri maa Nyoo chaha ra Tatyí li ra chi ndo. ⁹ Soco tuhun cha cuñí yo chi tahan yo, ña chihuhú cha tyai nu tutu ihya tuhun cuan. Vatyí suri maa Nyoo cha sañaha ra chi ndo vatyí cuñi yo chi tahan yo cuenda Nyoo. ¹⁰ Ta tyicuan caa cuñí ndo chi tandihi tahan yo nicahnu Macedonia chiña. Soco chacú ndahvi nuu ndo yañi, vatyí na cuñi ca ndo chi ñu noo noo quívi. ¹¹ Ndúcu ndo cuhva coo vii ndo. Ta ma tyihi ndo chi ndo nu ña tahán chi, soco iin ri tyiño maa ndo çaca xiñi ndo. Ta saha tyiño ndo chihin ndaha ndo tari cuhva catyí ndi chi ndo quívi cuan. ¹² Tyicuan caa sacuvi ndo tacuhva vatyí ñáyivi ña ñohó nuu Nyoo cuasaha ñu ñáyivi chi ndo. Ta ñahri cuacumañi chi ndo.

Yoso caa cucuvi quívi quichi Sutu Mañi yo Jesús inga chaha

¹³ Yañi, ña cuñí ndi cha ma coto ndo ñáá cha cuví chi ñáyivi chihí, vatyí coto nducuihya iñi ndo tari nducuihyá iñi ñáyivi cha ma tahan chi nyehe chi Nyoo. ¹⁴ Ta tari cha chinó iñi yo vatyí chihí ra Jesús ta nandoto ra, tyicuan caa chinó tucu iñi yo vatyí Nyoo cusandoto ra chi ñu ndíyi cha chinó iñi chi ra.

¹⁵ Yucuan chaha catyí ndi chi ndo tari sañaha Sutu Mañi yo chi ndi. Vatyí yoó cha nyitó yo nyacua nya quívi quichi ra, ñima xihna ca yo cuhun ican saha ñu cha yaha chihí. ¹⁶ Vatyí suri maa Sutu Mañi yo cunoo xica ra andívi, ta cucana chaa ra vatyí maa ra cuví ra nyacá ñaha. Ta cucana chaa noo ra cuví nuu chi ángel.

Ta cunativí trompeta Nyoo. Tyicuan ta ñáyivi cha yihí cuenda ra Cristo ta chihí ñu, xihna ca ñu cunandoto. ¹⁷ Yaha cuan ta yoó cha nyitó ca yo cundaa xica yo iin ri chihin ñu nu vico, nu cunañihi tahan yo chihin Sutu Mañi yo ityi andívi. Ta yucuan ta cucunyaa yo chihin ra tyicuan ri maa. ¹⁸ Yucuan chaha sanduniñi ndo iñi tahan ndo chihin tuhun ihya.

5 Soco ama o ñáá quívi cucuvi tuhun ihya, ña niñi cha cahin tuhun cuan chihin ndo yañi. ² Vatyí cha chitó vaha maa ndo vatyí ma tuvi ri iñi yo ta cuchaa quívi quichi tucu Sutu Mañi yo. Vatyí tari cuhva quihvi noo ra suhu vehe ñáyivi cha cha cuaa, tyicuan caa cucuvi. ³ Vatyí quívi cha catyí ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan siquí ñu. Tari noo ñaha sihi cha cuacacu sehe, sana iñi ña ta quihvi cha uhvi chi ña. Ta tyicuan caa cucuvi chi ñáyivi quívi quichi Sutu Mañi yo, vatyí ma cuví cono ñu. ⁴ Soco nyoho yañi, ñima ca nu ñaa iñi nyicú ndo ta catyí ndo vatyí sana iñi ndo ta cuchaa chi quívi Sutu Mañi yo, tari sana iñi ñáyivi tatu quihvi ra suhu vehe ñu. ⁵ Vatyí tandihi yo chitó yo yoso caa tahán chi coo yo vatyí Nyoo sandundichin ra añaima yo, ta ña iyó ca yo nu ñaa iñi tari ñu ña ñohó nuu Nyoo. ⁶ Yucuan chaha ma cuví yo tari inga ñu cuan. Tari quívi cha quixí ñu vatyí ña quichahá ñu cha ndichi Sutu Mañi yo. Soco yoó cuatu tuhva yo ta cachi coo yo. ⁷ Vatyí ñu quixí, quixí ñu cha cha cuaa, ta ñu chihí xaan ndixi, chihí ñu cha cha cuaa. ⁸ Soco yoó cha cuví yo ñu cuenda cha ñicahñu, nacachi coo yo. Ta tari noo sindaro sahá ra cuenda chi ra chihin noo cha tyaá ra pechu ra, tyicuan caa saha yo cuenda chi yo chihin cha ñi iñi yo chinó iñi yo chi Nyoo, ta chihin cha cuñí yo chi tandihi ñáyivi. Ta tari sindaro sahá cuenda ra xiñi ra chihin noo caa, tyicuan caa cuñí

chi cha sahá yo cuenda chi yo chihin cha yíhí ñi yo tyi cacu yo. ⁹ Vatyí Nyoo ña tyaa ra cuhva chi yo vatyí tachi tuñi ra chi yo, soco nacachi ra chi yo vatyí cacu yo cha cuenda Sutu Mañi yo Jesucristo. ¹⁰ Vatyí ra Jesucristo chihí ra cha cuenda yo vatyí tacuhva coo yo ñin ri chihin ra. Ñahri saha vasi cha chihí yo o iyó ca yo, soco tandihí yo coo yo ñin ri chihin ra. ¹¹ Yucuan chaha sandunií ca ndo ñi tahan ndo ta sandunyeec ca ndo ñi ñu, tari cuhva cuahan nyacuví ndo vityín.

Nu chaha ra Pablo tuhun chi ñu

¹² Soco yañi, chacú ndahvi ndi nuu ndo, na saha ndo ñáyivi chi ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chi ndo. ¹³ Cuñí chi cha saha xaan ndo ñáyivi chi ra chihin cha cuñí ndo chi ra. Vatyí sacuví ra tyiño Sutu Mañi yo. Ta vaha cco ndo chihin tahan ndo cuenda Nyoo.

¹⁴ Ta tyatyíñó ndi chi ndo yañi, vatyí cuhva ndo tuhun chi ñu cha ña cuñí saha tyiño. Ta sandunií ndo ñi ñu cha ña ñi ca ñi. Ta tyinyee ndo chi ñu vita cuñí vatyí ta chino vaha ca ñi ñu. Ta cucama ñi ndo chihin tandihí ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihí ñáyivi.

¹⁶ Tyicuan ri cusii cuñi ndo. ¹⁷ Ta cacan tahvi ndo tyicuan ri maa. ¹⁸ Nacuhva

ndo tyahvi nyoo chi Nyoo cha cuenda tandihí cha cuví. Vatyí ican ihya cuví cha cuñí Nyoo cha sacuvi yo cha cuví yo ñu chinó ñi chi ra Cristo Jesús.

¹⁹ Ma ndahva ndo ñuhu Tatyí Ii cha nyaá ñima ndo. ²⁰ Ma cuacu nyaa ndo tuhun Nyoo cha cahán noo ra cahán tuhun chahá Nyoo. ²¹ Tiiñ cuenda ndo tandihí cha cahán ra. Ta ñaquehen ndo cha vaha. ²² Cuachiyo ndo nuu tandihí cha quiñi caa.

²³ Ta maa Nyoo ra iyó cha taxi ri chii, na sanduvii ca ra ñima ndo tacuhva vatyí ñin ri chi maa ra nacuhva cuenda ndo chi ndo. Ta na cocumi ra ñima ndo ta cha chiñi tuñi ndo ta coño ñuhu ndo tacuhva vatyí ma coo ca cuatyí ndo quivi quichi tucu Sutu Mañi yo Jesucristo. ²⁴ Ra cha nacachi chi ndo, cuví cunyeec ñi yo chi ra, vatyí maa ra cusacuvi ra tandihí maa ihya.

Nu ndihí cahan ra Pablo ta chaha ra nocumi chi ñu

²⁵ Yañi, cacan tahvi ndo cha cuenda ndi.

²⁶ Ta nacuhva ndo nocumi chi tandihí yañi yo cuenda Nyoo.

²⁷ Tyatyíñé chi ndo chihin ndusu yuhu Sutu Mañi yo vatyí sacuahaha ndo carta ihya nuu tandihí tahan yo cuenda Nyoo.

²⁸ Ta na nasoco Sutu Mañi yo Jesucristo chi ndo. Ta na cuví chi tyicuan caa.

**Carta Cha Cu Uvi Cha Sacuhun
Ra Apóstol Pablo Chi
Ñáyivi Nuu Tesalónica
Cha Yihí Cuenda Nyoo**

**Nu tyaá ra Pablo ta ra tahan ra noo
tutu chi ñu ñuu Tesalónica
cha yihí cuenda Nyoo**

1 Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo. ²Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

**Nu catyi ra Pablo yoso caa
cusacutuñi Nyoo chi ñu iyó
cuatyí quivi quichi ra Cristo**

³Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó ñi ndo chi Nyoo noo noo quivi, ta siñ ri cuñí xaan ca ndo chi tahan ndo. ⁴Yucuan chaha siñ cuñí ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan ñi ndo ta vaha xaan chinó ñi ndo chi Nyoo cha ñi ri ca yahá ndo tandihi tindoho sanyehé ñáyivi chi ndo. ⁵Ihya sañahá chi yo vatyí vaha cuhva sacutuñi Nyoo chi yo, vatyí nu ndihi tuhun cusaha Nyoo tuhun vatyí naña tucu nyoho quihvi ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶Ta cha cuenda chi Nyoo, vaha cha cutiyahvi ra chihin tindoho chi ñu sanyehé tindoho chi ndo. ⁷⁻⁸Ta chi nyoho cha nyehé ndo tindoho sahá ñu, cuhva ra cha nyitatu ndo tari cuhva tucu

ra chi nyuhu, quivi cuquichi tucu Sutu Mañi yo Jesucristo nya andivi chihin ángel cha iyó xaan tunyee ñi ra chi, quichi ra chihin ñuhu cha cayú. Vatyí cutachi tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quichi sacacu chi yo. ⁹Ñu cuan, cundoho ñu ta ma ndihi maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnu cuví ra chihin tunyee ñi ra ¹⁰quivi cuquichi ra. Vatyí quivi cuan ñu yihí cuenda ra cusacahnu ñu chi ra, tandihi ri ñu chinó ñi ra. Ta mahñu ñu, ñohó tucu nyoho vatyí chinó ñi ndo cha ndaa cha chaha ndi chi ndo.

¹¹Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyivi nacachí ra. Ta chicán tahvi tucu ndi chaha ndo na tyinyee ra chi ndo tacuhva cuvi sacuvi ndo cha vaha chihin tunyee ñi ra. Ta tandihi tyiño sahá ndo nuu ra cuacacu vaha, suri cha cuenda tunyee ñi chahá ra chi ndo vatyí chinó ñi ndo chi ra. ¹²Tacuhva sacahnu ñáyivi sivi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnu ra chi ndo nuu ñáyivi cha cuenda tumañi ñi cha chahá Nyoo chi ndo cha cuenda ra.

Ra cha ñahri maa ley Nyoo iyó chi

2 Ta cha cuenda quivi cuquichi Sutu Mañi yo Jesucristo nu cusandu ñin ri ra chi yo, cuñí cahin vityin, nyoho yañi. Vatyí chacú ndahvi nuu ndo, ²ma vatyí xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chi ndo vatyí cha chaa quivi Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaa quivi cuan, ta cutyaa ra nu carta ta cucatyí ra tyi yuhu sacuhin carta cuan chi

ndo. ³Ni noo cuhva ma cuhva ndo cha sandavi ñaha ñu chi ndo. Vatyí cha ni cumañi ca chaa quiví cuan cuaha xaan ñu cusandihí ñu cha chino iñi ñu chi Nyoo ta cundicuita rayíi cha ñahri ley Nyoo iyó chi, ra cacu vatyí cunaa cuví ra cuan. ⁴Ican ra cuví ra xaan iñi chi Nyoo. Cundicuita ra siqui tandihí cha nyisó sivi Nyoo. Tandihí cuhva sacahnú ñáyivi chi Nyoo cunducuita ra siqui. Ta nyacua nya chichi vehe ñuhu cahnu Nyoo ta cucun- yaa ra ta cunyaca ñaha ra, cusaha ra tyí Nyoo cuví ra.

⁵¿Atu ña nicohón iñi ndo vatyí ta ni nyaa que chihin ndo cahin tuhun ihya chihin ndo? ⁶Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quiví tahán maa chi. ⁷Cha iyó tuhun cha ña quichahá ñáyivi chi Nyoo siqui ñuhu ñayivi, soco iyó xehe chi, vatyí iyó noo cha chasí, ta ña chahá cuan cha nducuaaha chi. Soco quiví canyaha cuan, cunduñihi cha quiñi caa cuan. ⁸Tyicuan ta cundicuita ra quiñi caa cuan ta Sutu Mañi yo cucahñi ra chi ra chihin tatyí yuhu ra ta cusanaa ra chi ra chihin cha xiño ra quiví cuquichi ra. ⁹Ra quiñi caa cuan, cuenda cuihna cuquichi ra. Ta tandihí tunyee iñi cuihna cucoo chi ra, ta cusandavi ñaha ra chi ñáyivi chihin seña ta milagru ta cha iyo. ¹⁰Tandihí ri nuu cha ña vaha cucoty- iño ra tacuhva cuví sandavi ñaha ra chi ñáyivi cha cucunaa. Vatyí ñu cuan ña cuñí ñu quichaha ñu cha ndicha tacuhva cuví cacu ñu. ¹¹Ta yucuan chaha cucuhva Nyoo vatyí cusandavi ñaha cha ña vaha cuan chi ñu. Ta cuchino iñi ñu cha ña ndicha. ¹²Tacuhva vatyí cutachi tuñi ra chi tandihí ñu vatyí ña cuñí ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cahñ ra Pablo tuhun ñu cha nacachí Nyoo vatyí cacu ñu

¹³Soco tyicuan ri cuñí chi cha nacuhva ndi tyahvi nyoo chi Nyoo cha cuenda nyoho yañi. Vatyí cuñí xaan Sutu Mañi yo chi ndo. Vatyí Nyoo nacachí ra chi ndo nyata quiví xihna ri vatyí cuacacu ndo cha cuenda cha sanduvaha Tatyí Ii ra añaima ndo ta cha cuenda cha chinó iñi ndo cha ndicha. ¹⁴Yucuan cuenda nacana Nyoo chi ndo quiví cahñ ndi tuhun ra chihin ndo tacuhva vatyí cuñihi ndo chiin cha cahnu cuví Sutu Mañi yo Jesucristo.

¹⁵Yucuan chaha sanñi ndo iñi ndo, nyoho yañi. Ta ma naa iñi ndo tuhun cha sañaha ndi chi ndo ta ni nyaa ca ndi chihin ndo. Ni ma naa iñi ndo tuhun cha tyaa ndi nu tutu cha sacuhun ndi chi ndo. ¹⁶⁻¹⁷Sutu Mañi yo Jesucristo ta Nyoo Sutu yo cuví ra cha cuñí chi yo. Ta cha cuenda tumañi iñi cha chahá ra chi yo sanduniñ ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha sii cuñi añaima ndo. Ta na sandunaniñ ra iñi ndo, tacuhva cuví cahan ndo ta sacuvi ndo tandihí nuu cha vaha.

Nu chicán ra Pablo na cacan tahvi ñu chaha ra

3 Nu ndihí tuhun, nyoho yañi, cacan tahvi ndo chaha ndi tacuhva vatyí numi ri chaa tuhun Sutu Mañi yo tandihí ri ityi. Ta na quichaha ñáyivi ta natiin cuenda ñu tari natiin cuenda nyoho. ²Cacan tahví tucu ndo tacuhva vatyí na cacu ndi ndaha ñáyivi ña vaha, ñu quiñi iyó. Vatyí ña tandihí ñáyivi chinó iñi ñu chi Sutu Mañi yo. ³Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tiin ra ña vaha chi ndo. ⁴Ta cunyeé xaan iñi ndi chi Sutu Mañi yo vatyí nyoho sacuví ndo tari cuhva catyí ndi chi

ndo, ta cusacuvi ca ndo. ⁵Ta vityin na tyinyee ca Sutu Mañi yo chi ndo tacuhva cuñi ca ndo chi ñáyivi tari maa ra cuñi ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeē xaan iñi ra nu nyehe ra tindoho.

Tahán chi cha saha tyiño yo

⁶Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñi saha tyiño, ta ña iyó ra cuhva sañaha ndi chi ndo. ⁷Vatyí nyoho chitó ndo yoso caa tahán chi coo ndo tari cuhva sañaha ndi chi ndo. Vatyí nyuhu ña chinyicu ndi chihin ndo cha ña sahá tyiño ndi. ⁸Ta ni ña chachj ndi cha chii ndo cha ña tyiyahvi ndi. Soco saha tyiño ndi ñicahñu ta cha cuaa vatyí ña cuñi ndi coso ndi siqui ni noo ndo. ⁹Vasi iyó chi ityi chi ndi cha cacan ndi cha tyinyee ndo chi ndi, soco nyuhu saha tyiño ndi vatyí cuñi ndi sañaha ndi noo cuhva vaha cunyicon ndo. ¹⁰Vatyí quivi chinyaa ndi chihin ndo, catyí ndi chi ndo vatyí ñu cha ña cuñi saha tyiño, ma cachi ñu. ¹¹Cahán ndi siqui ihya

vatyí ñihí ndi tuhun vatyí yihí ndo chicá noo yanga ri ndo ta ñahri maa tyiño sahá ndo. ¹²Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quivi.

¹³Yañi, ma cutatu ndo sacuvi ndo cha vaha. ¹⁴Tatu iyó noo ra ña cuñi quichaha tuhun cahán ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra. ¹⁵Soco ma cuxaan iñi ndo chi ra, soco cuhva ndo tuhun chi ra vatyí yañi yo cuví ra.

Nu ndihi cahan ra Pablo

¹⁶Sutu Mañi yo taxi ri iyó añima ra, ta suri maa ra na cuhva ra cha taxi ri coo añima ndo tandihi ri cuhva tandihi ri quivi. Ta ñacuhva ndo cha cunyaa vaha ra chihin tandihi ndo. ¹⁷Yuhu ra Pablo tyaí nocumi ihya chi ndo chihin ndahi, ta chihin letre. Ta tyehe caa tyihí firme nu tandihi carte. Ta tyehe caa tuhvé tyai. ¹⁸Ta Sutu Mañi yo Jesucristo na nasoco ra chi tandihi ri ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaa ra Pablo noo tutu chi ra Timoteo

1 Yuhu ra Pablo cuví noo apóstol chi ra Jesucristo vatyí tachí ra chíi na caque tyiño ra. Maa Nyoo cuví ra sacacú chi yo. Ta ican ra catyí tyi sacuvi tyiño ihya, ta Sutu Mañi yo Jesucristo ñandihí. Vatyí maa ra cuví ra cha yihí iñi yo. ²Tyaí tutu ihya chi yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahvi ra chuun. Ta na coo ca cha taxi ri añimon saha ra.

Nu sañaha ra Pablo chi yo yoso caa saha yo cuenda tuhun cha ña ndicha

³Quiví quite ñuu Éfeso chiña cha cuaquichi ityi Macedonia ihya, catyí chuun na ndoun Éfeso chiña ta catyun chí suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quívi cuan. ⁴Catyun chí ñu cuan vatyí ma tyaa ñu xiñi ñu tuhun tyisu, ni tuhun cha cuví chí noo noo sutu chahnu ñu. Vatyí cha nuu cha tyinyeé chí chí yo, satondó chí xiñi yo. Maa maa ri cha ñima ri tuhun cuví yuhu yo. Ña tyinyeé chí chí yo cha chinó iñi yo cha sacuví ca yo cha catyí Nyoo.

⁵Soco tuhun cha catyí maa yo chí ñáyivi, cha cuñi yo chí tahan yo chihin cha cacú añima yo cha sanduvaha Nyoo. Cuñi yo chí ñu chihin cha vaha chicá xiñi yo ta chihin cha ndicha chinó iñi yo chí Nyoo. ⁶Soco yihí ñu saña ñu tuhun ihya ta quita caxiin ñu chihin tuhun cha ñima ri tuhun. ⁷Cuñí ñu cuví ñu ñu sacuahá

cuenda ley chahnu Nyoo soco ni maa ñu ta ña cutuñi iñi ñu tuhun cahán ñu.

⁸Chitó yo tyi ley cuan, vaha chí, soco cotyiño yo tari cuhva tahán chí. ⁹Cuñí chí coto yo vatyí ni noo ley ña chicun-yaá chí cha cuenda ñu vaha. Soco nyaá chí cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyivi chí Nyoo. Nyaá tucu chí cha cuenda ñu chahñí chí sutu, chí sihi, ta cha cuenda tandihí ñu chahñí. ¹⁰Nyaá ley cuan cha cuenda ñu iyó chihin rayii o ñusihí ta ñima yii ña o ñasihí ra cuví. Nyaá chí cha cuenda ra ca iyó chihin tahan yii, ta cha cuenda ñu suhu cha chíi ñáyivi, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóó ñu cha ña nyicon cuhva cahan tuhún Nyoo. ¹¹Ta tuhun tyaquí xaan cha sacoto Nyoo chí yo cha cuenda ra Cristo, ican cuví tuhun cha nacuhva cuenda Nyoo chíi vatyí sacote chí ñáyivi. Maa ra cuví ra cha sacahnú yo.

Chahá ra Pablo tyahvi nyoo chí Nyoo vatyí nyehé ndahvi ra chí ra

¹²Nacuhvé tyahvi nyoo chí Sutu Mañi yo Jesucristo cha cuenda tunyee iñi cha chaha ra chíi ta nyehe ra chí tari noo ra chinó vaha iñi, ta natyaa tyiño ra chíi vatyí sacuví tyiño nuu ra. ¹³Tyehe caa sacuvi ra chihin vasi ta ityi chata ca yuhu cahan ña vahi siquí ra. Chicá nyiquen chí ra ta cahan cuehi chí ra. Soco Nyoo cundahví cuñi ra nyehe ra chíi, vatyí yuhu ta chino ca iñi chí ra, ta ña chite cha chiny-acuvi. ¹⁴Ta tyinyee xaan Sutu Mañi yo chíi. Ta chaha ra cha chino xaan iñi yo chí ra, ta cha cuñi xaan yo chí ñáyivi vatyí iin ri cuví yo chihin ra.

¹⁵Ta ndicha, cha ndicha vaha cuví tuhun ihya. Ta tahán chí cha chino iñi yo, vatyí ra Cristo Jesús quichí ra siquí ñuhu ñayivi ihya vatyí sacacú ra chí ñu iyó cuatyí. Ta yuhu cuví noo ra quiñi

caa ca cha nuu tandihi ñu cuan. ¹⁶Yucuan chaha xihna que tava Nyoo chii nu quiñi caa vatyí tacuhva sañaha ra Jesucristo chi ñáyivi tyi cuñí xaan ra chi ñu. Tacuhva vatyí nachino iñi ñu ta cucoo ñu noo ñáyivi chaa cha ma naa ca maa. ¹⁷Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihí iyó chi, ra cha ña cuví nyehe yo chi, ra cha noo ri maa ra cuví Nyoo ta chitó ra tandihi cha chiñi tuñi. Na sacahnu yo chi ra ta na cunyaca ñaha ra tyicuan ri maa. Ta na cuví chi tyicuan caa.

¹⁸Ihya tuhun चाहिं chuun, yoho Timoteo sehi, vatyí cañi tahan vahun chihin tatyí ña vaha chihin cha chinó iñun, ta chihin cha vaha cuñí añimon tyi chitón tyi vaha sacuvun noo cha sacuvín vatyí suri tuhun ihya cachaha ra hermano chuun chihin ndusu Nyoo. ¹⁹Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihi ra tuhun ihya, yucuan chaha caquita xiin ra. ²⁰Tyicuan caa sacuvi tucu ra Himeneo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahán chi sacuvi ra ta ma cahan ña vaha ca ra chi Nyoo.

Nu sañaha ra Pablo yoso caa cacan tahvi yo

2 Catyí chi ndo vatyí cha nuu tandihi ca, tahán chi cha cacan tahvi ndo chi Nyoo cha cuenda tandihi ñáyivi. Ta nacuhva ndo tyahvi nyoo chi Nyoo cha cuenda ñu. ²Cacan tahvi ndo cha cuenda ra cacuvi rey ta cha cuenda tandihi ra cacuví tyiño. Cacan tahvi ndo cha cuenda ra tacuhva cuví coo vaha yo, coo taxi yo, coo yo noo ñáyivi cachi nuu Nyoo ta nuu ñáyivi. Ta cusaha ñu ñáyivi chi yo. ³Vatyí ihya cuví cuhva tahán iñi Nyoo ra cha sacacú chi yo. ⁴Ta maa ra cuñí ra vatyí cacu tandihi ñáyivi. Ta cuñí ra cha nacoto ñu cha ndicha. ⁵Vatyí

iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyivi tari maa yo. ⁶Ta maa ra Jesucristo chaha ra ñáyivi ra tyiño nuu tandihi ñáyivi. Tyiyahvi ra cuatyí yo tacuhva cuví cacu tandihi yo. Ta chinq cava cuan quivi tyaa maa Nyoo cuhva. ⁷Cha cuenda ihya, tyatyíño Nyoo chii, vatyí cahin tuhun ra, ta cuví apóstol ra, tachí ra chii vatyí sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahín cuendu vatyí cuenda ra Cristo yihí.

⁸Yucuan chaha cuñí vatyí cacan tahvi rayii tandihi ri ityí. Ta na coo ra noo ñáyivi ndii. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha caca xiñi ra. Ta ma coo ra tisihi chihin ñáyivi. Ta ni ma xaan ra. ⁹Tyicuan caa tucu ñusihi. Cachi cuhva cuihno ñu, tari cuhva tahán chi cuihno ñu yihí cuenda Nyoo. Ta ma iyo xaan cuihno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaquí, o chihin sahna yahvi xaan sanduvii ñu chi ñu. ¹⁰Soco chihin cha cachi coo ñu ta chihin cha sacuvi ñu cha vaha na sanduvii ñu chi ñu, tari tahán chi sacuvi ñu nacuhva cuenda chi chi Nyoo. ¹¹Ta taxi ri cunyaa ñusihi ta tyasoho ñu tuhun Nyoo. Ta saha ñu ñáyivi chi ra chahá tuhun chi ñu. ¹²Vatyí ña चाहिं cha sañaha ñusihi. Ni ña चाहिं cha cunyaca ñaha ñu chi rayii. Soco taxi ri na cunyaa ñu. ¹³Vatyí xihna ca chi ra Adán savaha Nyoo ta yaha cuan ta chi cu Eva. ¹⁴Ta ñima chi maa ra Adán sandavi ñaha ra ña vaha, soco chi ñasihi ra cuví sandavi ñaha ra ta chicoo cuatyí ña. ¹⁵Soco ñusihi cucacu añima ñu cha cuenda cha sacacú ñu sehe ñu, ta sacuhnú vaha ñu chi chi. Soco tatu chinó vaha iñi ñu chi Nyoo ta cuñí ñu chi ra ta chi ñáyivi, ta cachi coo ñu nuu Nyoo ta nuu ñáyivi ñandihi.

Yoso caa tahán chi coo ra yihí ndaha chi ñu yihí cuenda ra Cristo

3 Ndicha tuhun ihya: Tatu minoo ndo cuñí ndo quindaha ndo chi ñáyivi yihí cuenda ra Cristo, vaha xaan tyiño quichí cuví iñi ndo sacuvi ndo. ²Soco ñiñi cuñí chi vatyi ra yihí ndaha vehe ñuhu cuví ra noo ra ñahri cuatyí iyó. Ta cuñí chi cha coo noo ri ñasihí ra. Ta cuñí chi cha cuví ra noo ra tyihí tuñi vaha iñi yoso caa cunyacuvi, noo ra vaha nuu ñáyivi. Ta cuñí chi vatyi vaha cuví ra chihin ñáyivi chaa vehe ra. Ta coto ra yoso caa sañahá ra. ³Ma cuví ra noo ra tuhvá chihí ndixi, ni ma cuví ra noo ra nanducú tisihi. Ta ma cuví ra noo ra nducu xuhun noo cuhva ña vaha. Soco cuñí chi cha vaha ñáyivi cuví ra, ta cuví ra noo ra ña tuhvá cañi tahan. Ta ma cuví ra noo ra cuñí xaan xuhun. ⁴Ta cuví ra noo ra yihí ndaha vaha ñasihí ta sehe: Noo ra nyacá ñaha chi sehe tacuhva vatyi quichaha ñu chi ra, ta saha ñu ñáyivi chi ra. ⁵Vatyi tatu ña chitó ra cunyaca ñaha ra vehe ra, ¿yoso caa cusaha cumi ra vehe ñuhu Nyoo? ⁶Ta noo ra nichaa chihin tuhun Nyoo ña tahán chi quindaha ra vehe ñuhu vatyi coto sacahnu ra chi ra ta tachi tuñi Nyoo chi ra, tari tachí tuñi ra chi cuihna vatyi cahnu sahá ra chi ra. ⁷Ta siin ri cuñí chi vatyi cuví ra noo ñáyivi vaha nuu ñu ityi chata, coto tahan ra ticahan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸Ta tyicuan caa tucu ra tyinyeeé chihin tyiño vehe ñuhu. Na cachi coo ra. Ma cuví ra noo ra cuendu, ta ma cuví ra noo ra tuhva chihí ndixi ñandíhi. Ta ni ma nyiyo iñi ra saha canaa ra xuhun chihin noo cuhva ña vaha. ⁹Cuñí chi vatyi cutuñí vaha iñi ra yoso caa tahán chi chino iñi yo chi Nyoo ta coto vaha ra

tyi vaha cuahan ra chihin Nyoo. ¹⁰Ta cuñí tucu chi cha nyehé xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu. ¹¹Ta tyicuan caa tucu ñusihí, cuñí chi vatyi cuví ñu ñáyivi vaha. Ma ñiñi ñu cuendu. Ta cachi coo ñu. Ta ñiñi cuñí ñu chihin tandíhi ri tyiño. ¹²Noo ra tyinyeeé chihin tyiño vehe ñuhu na coo noo ri ñasihí ra. Ta cuñí chi vatyi coto vaha ra cunyaca ñaha ra chi sehe ra ta ñáyivi nyicú vehe ra. ¹³Vatyi ra tyinyeeé, tatu vaha sacuvi ra tyiño cha tahán chi sacuvi ra, cuahan ca ra ityi nuu chihin Nyoo. Ta cuní ca iñi ra cahan ra tuhun cha chinó iñi ra chi ra Cristo.

Noo tuhun xehe cuenda cuhva chino iñi yo

¹⁴⁻¹⁵Yihí iñi cha cuhin cha numi ri cunyehe nu nyaún. Soco tatu cucuei, yucuan chaha tyafí ihya chuun tacuhva coto yoso caa tahán chi coo ñáyivi cuenda Nyoo. Vatyi maa yo cuví yo vehe ñuhu Nyoo nyitó. Ta cuñí chi vatyi sañihí ca yo sañaha yo cha ndicha cha cumí yo chi inga ñáyivi. ¹⁶Cha ndicha cuví vatyi yaha xaan cuhva cahnu tuhun xehe cha sanatuví Nyoo, vatyi coo yo tari iyó maa ra:

Nyoo nanduví ra rayíi ta chicoo ra chichi noo coño ñuhu tari maa yo.

Ta catyí Tatyí Ii vatyi vaha ra.

Ta nyehé ángel chi ra.

Ñicahnu ñuhu ñayiví cahán ñu tuhun ra.

Ta chinó iñi ñáyivi chi ra nicacahnu ñuhu ñayiví.

Ta cuanuhu ra nya gloria.

Nu catyí ra Pablo vatyi yihí ñu ma chino ca iñi ñu nu cuahan chi tyembu

4 Soco cahán cachi Tatyí Ii ta catyí chi vatyi nu cuandíhi tyembu yihí ñu ma chino ca iñi ñu chi ra Cristo vatyi cutyasoho ñu tuhun cahán tatyí ña vaha cha sandavi ñaha chi ñu. Ta cunyicon

ñu ndusu ñuhu cuihna. ²Cutyasoho ñu tuhun cahán ñu cuendu. Ta ñu cuendu cuan ña tuví ca iñi ñu cuhva nyacuví ñu vatyí cha ndundavá xaan añima ñu. Tari cha cayú añima ñu chihin noo caa ihñi ta ndundavá chi cuví cuan. ³Cucasi ñu cuan nu tandaha ñáyivi. Ta cucatyí ñu vatyí ña vaha cha cachi yo suhva nuu nyayu. Vasi chitó yo tyi tandihi nuu cha cachi yo, Nyoo savaha. Ta tandihi yo cha chinó iñi yo chi Nyoo ta chitó yo cha ndicha, cuví cachi yo ta nacuhva yo tyahvi nyoo chi ra. ⁴Vatyí tandihi cha savaha Nyoo ta vaha. Ta ña tahán chi catyí yo tyi ña vaha. Cuví cachi yo tatu nacuhva yo tyahvi nyoo chi Nyoo. ⁵Vatyí ndundií chi cha cuenda tuhun Nyoo ta cha cuenda cha chicán tahvi yo chi Nyoo.

Yoso caa noo ra vaha sacuví tyiño nuu ra Jesucristo

⁶Tatu sañahún tuhun ihya chi tandihi yañi yo, cua cuvun noo ra vaha cahán tuhun ra Cristo Jesús. Ta tuhun cha chinó iñi yo ta tandihi tuhun ra Cristo cha nyicón, cua tyinyee chi chuun. ⁷Soco ma quichahun tuhun cuendu, tuhun tondo cha iyó ñayivi ihya. Vaha ca saniñun chuun sacuvun maa maa ri cuhva cuñí Nyoo. ⁸Cha saniñí yo ndun- yee coño ñuhu yo tyinyeeé chi suhva chi yo. Soco cha saniñí yo sacuví yo cuhva cuñí Nyoo, tyinyeeé chi chi yo tandihi ri cuhva, vatyí tyinyeeé chi chi yo ñayivi ihya. Ta tyinyeeé tucu chi chi yo cha coo vaha yo nu cuchaa yo andivi. ⁹Ta ndicha, cha ndicha vaha cuví tuhun ihya ta tandihi yo tahán chi cha chinó iñi yo. ¹⁰Ta suri cha cuenda ihya sahá tyiño yo ta nyehé yo tindoho vatyí nyatú yo naquehen yo cha vaha cha chaha Nyoo nyito chi yo. Vatyí maa ra cuví ra sacacú chi tandihi ñáyivi, ta xihna ca chi yoó cha chinó iñi yo chi ra.

¹¹Ihya tuhun cua sañahun chi ñáyivi, ta cusaniñun chi ñu na cutuhva ñu. ¹²Cachi sahun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chi ñu chihin cuhva iyón, chihin cuhva cahun. Sañahun chi ñu, chihin cuhva cha cuñún chi Nyoo ta chi ñáyivi, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha. ¹³Cha ni ri ca cha cumañi chai nu nyicú ndo, sacuahha con tuhun Nyoo nuu ñu yihí cuenda Nyoo. Cuhva tuhun chi ñu ta sañahun chi ñu yoso caa caca vaha ñu ityi Nyoo. ¹⁴Sahun cuenda nyatu cha chaha Nyoo chuun quivi cha tyiso ra yindaha vehe ñuhu ndaha ra si- cun ta cahán ra yoso cuhva chahá Tatyí Ii Nyoo chi ra. ¹⁵Tyaa vaha xiñun tuhun ihya ta sacuvun. Tacuhva vatyí nyehe ñáyivi yoso caa cuahun ityi nuu ca chi- hin Nyoo. ¹⁶Saha cuenda chuun chi- hin cuhva iyón. Ta saha cuenda cuhva sañahún chi ñáyivi ta ñaha saña ndahun cha vaha. Tatu tyicuan caa sacuvún cua- cacun, ta cucacu ñu chiñí tuhun sañahun ñandihí.

Nu chahá ra Pablo tuhun chi ra Timoteo yoso caa cuhva ra tuhun chi ñu yihí cuenda ra Cristo

5 Ma cahun chi noo ra chahnu, soco cuhva tuhun chi ra tari cha sutun cuví chi ra. Ta chi ra tyivaa cuhva tuhun chi ra tari cha yañun cuví chi ra. ²Ta chi ñu chahnu tari cha sihun cuví chi ñu. Ta chi ñu tyivaa, tari cha cuhvon cuví chi ñu. Ta sacuvun chihin cha vaha chicá xiñun.

³Tyinyee chi ñu ndahvi ñu chihí yíi tatu yori ñáyivi chi ñu cha tyinyee chi ñu. ⁴Soco tatu iyó noo ñaha chihí yíi ta iyó sehe ña, o sehe ñañi ña, cuñí chi cha cutuhva xihna maa ñu cha tyinyee ñu chi ña. Na nichon iñi ñu yoso caa sa- ha cuenda sihi ñu chi ñu ta luhlu ñu. Ta

tyicuan caa tahán chi cha saha cuenda tucu ñu chi ña vityin. Vatyí cha tyehe caa vaha xaan, ta cha tahán iñi Nyoo cuví. ⁵Soco ñu chihí yíi cha ndoo noo tuhun ri maa, chi Nyoo tyihí ñu iñi ñu ta tyicuan ri chicán tahví ñu chi ra ñicahñu ta cha cuaa. ⁶Soco noo ñaha chihí yíi cha nducú tusii iñi cha iyó ñáyivi ihya, tari quivi cha chihí ña cha cuenda tuhun Nyoo cuví cuan, vasi iyó ña. ⁷Sacoto tuhun ihya chi tahan yo tacuhva cha ma ñihi ñáyivi cuhva cahan ñu chi ñu. ⁸Soco tatu yihí yo cha iyó ñáyivi chi yo cha chihí yíi ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quivi cha ña chinó iñi yo chi Nyoo cuví cuan. Ta cahnu ca cuatyí yo ta ñima ca ñu cha ña chinó iñi chi Nyoo.

⁹Nu tutu cha nyaá sivi ñu chihí yíi, na cunyaa sivi ñu, soco ñu cha yaha ca uñi xico cuiya. Ta cuví cunyaa sivi ñu tatu noo ri yíi ñu chiyo. ¹⁰Ta cuñí chi tatu ñohó nuu vaha ñáyivi chi ñu cha cuenda cha vaha cha sacuví ñu: tatu sacuahnu vaha ñu sehe ñu, tatu chaha ñu cha cachi ñu cha vehe ñu, tatu sacuvi ñu tyiño nuu yañi yo chihin cha tandihí añima ñu chihin cha ndahvi sahá ñu chi ñu, tatu tyinyee ñu chi ñu nyehé tindoho, tatu tyehe caa sacuví ñu tandihí nuu cha vaha, cuví cunyaa sivi ñu.

¹¹Soco ma tyihí ndo sivi ñu cha ta chaa ca uñi xico cuiya coto coo quivi ta quichi cuví iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo. ¹²Ta tyicuan caa cucoo cuatyí ñu vatyí ña sacuví ca ñu cuhva catyí ñu. ¹³Ta siin ri tatu chicá noo suchan ri maa ñu tahan tahan vehe ñáyivi. Ta ñima yucuan ri soco chicá noo ndihí ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahán ñu cha ña tahán chi. ¹⁴Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu.

Ta ma cuhva ñu ityi chi ñu xaan iñi chi yo vatyí cahan nyaa ñu chi yo. ¹⁵Tyehe caa catyí chuun vatyí yihí ñu cha saña ñu chi Nyoo ta na nyicon ñu chi ra ña vaha. ¹⁶Tatu noo ñu yihí cuenda Nyoo ta iyó noo ñáyivi chi ñu cha chihí yíi, cuñí chi cha tyinyee ñu chi ñu, tacuhva cha ma cuví ñu noo carga chi vehe ñuhu. Ta tyicuan caa ta cuví tyinyee ñu vehe ñuhu chi ñu chihí yíi cha ndicha ndicha chiñuhú chi.

¹⁷Ra chahnu ra nyisó tyiño vehe ñuhu, cuñí chi vatyí saha xaan ñu ñáyivi chi ra. Ta cha xihna ca chi ra cahán tuhun Nyoo ta ra sañahá chi ñu. ¹⁸Vatyí tuhun Nyoo catyí chi: “Ma tyihun yoho yuhu sindiqui nu saha tyiño ti tacuhva vatyí cuví cachi ti chiin.” Ta catyí tucu chi: “Iyó ityi chi ra cha sahá tyiño cha ñihí ra yahvi ra.”

¹⁹Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chi ñu tyaá cuatyí cuan. ²⁰Soco ñu sañihi ca sacuvi cuatyí cuñí chi cha catyí ndo chi ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhvi ñu sacuvi ñu cha ña vaha. ²¹Tyatyine chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachí ra. Ta catyí chuun vatyí quichahun cha catyí ihya ta ma cuhun tumañi iñi chi noo ra ta ni chi inga ra. ²²Ma numi xaan ri tyaá tyiño chi noo ra cha cuví ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvín ta ma cuhvon ityi chi cha ña vaha.

²³Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴Yihí ñáyivi quetuví ri cuatyí ñu cha cumañi ca cutuñi chi ñu. Ta yihí ñu nya cha yaha cutuñi chi ñu ta cuquetuvi cuatyí ñu. ²⁵Ta tyicuan caa tucu cha vaha cha sacuví yo, ña xehe caá. Soco vasi ña

tuví cha numi ri, ñima tyicuan ri cucohon xehe chi.

6 Ñu cha cuví musu cuñí chi cha saha vaha ñu ñáyivi chi chitoho ñu. Tyicuan ta ma ñihi ñáyivi cuhva cahan ña vaha ñu siquí Nyoo ni siquí tuhun ra, cha sañahá yo. ²Ta tatu noo musu iyó chitoho ra cha yihí cuenda Nyoo, ña tahán chi cha ma saha ra ñáyivi chi ra vatyí yañi ra cuenda Nyoo cuví chi ra. Soco ñihi ca cuñí chi cha sacuví ra tyiño nuu ra, vatyí chinó tucu iñi maa ra chi ra Cristo, ta Nyoo cuñí ra chi ra. Sañaha tuhun ihya chi ñu hermano ta cuhva tuhun chi ñu na sacuví ñu.

Cuhva iyó yo ta cusii cuñi yo

³Tatu iyó noo ra cha sañahá inga tuhun cha ña chachí tahan chi chihin tuhun vaha cha sañahá Sutu Mañi yo Jesucristo, ta ni ri chihin tuhun vaha cha cuahan sacuahá yo, ⁴cuví ra noo ra cahnu sahá chi. Ta tahán xaan iñi ra cuví yuhu ra siquí noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chi tahan, ta tuhun cha ña vaha cuñí nyehe chi tahan. ⁵Ta tyicuan ri cañí tahan ñu vatyí quiñi chica xiñi ñu, vatyí ña chitó ñu cha ndicha. Nyacua cuñí maa ñu tyí cusaha ganaa ñu xuhun chihin tuhun Nyoo. Ma cutahan ndo chihin ñu cuan. ⁶Ndicha vatyí cha sacuví yo cuhva catyí Nyoo ta ndoó yo vaha chihin cha cha chaha ra chi yo cuví chi tari noo cha tyayii iyó chi yo. ⁷Vatyí ñahri nyiso yo vachi yo ihya ñayivi. Ta ñahri cuiso yo cunuhu yo quivi cúvi yo. ⁸Soco tatu iyó cha cachi yo ta sahma ñihnoó yo, na cusii iñi yo, ta na ndoo yo vaha chihin yucuan ri. ⁹Soco ñu cuñí cutyayii, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativí chi chi ñu ta nu ndihi tuhun cutiví ndihi ñu ta cunaa

ñu. ¹⁰Vatyí cha cuñí xaan yo xuhun, yucuan cuví nu caña tandihi ca nuu cha ña vaha. Ta yihí ñu cha tyehe caa cuñí xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindoho.

Lucha cha iyó chi yo cha chino iñi yo chi Nyoo

¹¹Soco yoho cuvún noo rayii cuenda Nyoo. Caça cono chi tandihi cha quiñi caa cuan. Ta cuhun chata cha cuiti. Vaha cõun nuu Nyoo. Cunii iñun chihin ra. Cuñun chi ñáyivi. Cõo cha cama iñun chihin tandihi cha cuví chuun. Ta masu cuví iñun. ¹²Ñihi sacuvun tyiño nuu Nyoo vatyí tyicuan caa tahán chi tyi chinó iñi yo chi ra. Ta ma saña ndahun ñayivi chaa cha ma naa ca maa cha chaha Nyoo chi yo. Vatyí ican cuenda cuan nacana Nyoo chuun, quivi catyí cachun tyi chinó iñun nuu cuaha xaan ra cuví cha ndaa. ¹³Ta chihin nuu Nyoo, ra cha chaha ñayivi coo tandihi cha iyó, ta chihin nuu ra Cristo Jesús ra cha chaha vaha cuenda nuu ra Poncio Pilato, catyí chuun vityin, ¹⁴na sacuvun tandihi cha catyí chuun tacuhva ma cuhvon cuhva cha cahan ñáyivi chuun nyacua nya quivi quichi Sutu Mañi yo Jesucristo. ¹⁵Na chaa maa quivi, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihi ca ra cuví rey. Ta nyacá ñaha ra chi tandihi ca ra cha nyacá ñaha. ¹⁶Noo ri maa ra cuví ra ra ñahri tuhun chihi iyó chii. Ta iyó ra nu ndichin nu yori maa tuhva. Ta ni noo ñáyivi ta nyehe ca ñu chi ra. Ta ni ña cuví nyehe ñu chi ra. Chi maa ra na sacahnu yo. Ta na cunyaca ñaha ra tyicuan ri maa. Ta na cuví chi tyicuan caa.

¹⁷Ta ñu cha iyó cha tyayii chi ñayivi ihya, catyí chi ñu vatyí ma cahnu xaan

saha ñu chi ñu. Ta ma cuita iñi ñu chi cha tyayii cha iyó chi ñu. Vatyí coto coo quívi ta ndihi cha tyayii cuan. Soco na cuita iñi ñu chi Nyoo nyitó, vatyí maa ra cuví ra chahá tandihi. Ta cuaha chaha ra chi yo tacuhva cusii cuñi yo. ¹⁸ Cattyun chi ñu tyayii na sacuvi ñu cha vaha ta ñii iñi ñu cuhva ñu cha iyó chi ñu chihin cha ma uhvi cuñi ñu. ¹⁹ Tyicuan ta coo cha tyayii ñu andivi ta cutyinyee chi chi ñu nu cuahan ca chi quívi. Ta tyehe caa cuví coo ñu ñayivi cha ma naa ca maa.

**Nu ndihi chahá ra Pablo
tuhun chi ra Timoteo**

²⁰ Yoho Timoteo saha cumi vahun tyiño cha chaha Nyoo chuun. Ma tyaso-

hun tuhun cha siin caa, tuhun cha ñima ri tuhun. Ma quichahun tuhun cha catyí ñu vatyí cha chiñi tuñi cuví, vatyí ña ndicha. ²¹ Vatyí cha cuenda cuan yihí ñu cha quita caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuví chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaa ra Pablo noo tutu chi ra Timoteo

1 Yuhu ra Pablo cuví noo apóstol ra Jesucristo vatyí tachi ra chii na caque tyiño ra. Vatyí tyicuan caa cuñí maa Nyoo, tyi cuñí ra cha sacote chi ñáyivi vatyí chahá ra noo ñáyivi chaa chi tandihí ñu cha ndu iin ri chihin ra Cristo Jesús vatyí nacuhva cuenda ñu chi ñu chi ra. ²Tyái tutu ihya chi yoho Timoteo. Ta cuñí xain chuun tyi tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahvi ra chuun. Ta na coo ca cha taxi ri cuñi añimon saha ra.

Nu catyi ra Pablo chi ra Timoteo tyi nacatyí ra chi ñáyivi tyi cuenda ra Cristo yihí ra

³Tyicuan ri nicohón iñi tuhun yoho cuhva cha chicán tahvi chi Nyoo ñicahñu ta cha cuaa. Ta nacuhvé tyahvi nyoo chi ra cha cuendon. Nu maa ra sacuví yuhu tyiño chihin cha vaha chicá xiñi, tari sacuví tucu ñáyivi chii ta cha naha. ⁴Tyicuan ri nicohón xaan iñi chuun ta nicohón xaan iñi tuhun yoso caa chacun quivi cuachiye chiña. Ta cuñí xain nyehí chuun inga chaha ta cusí iñi chuhun. ⁵Vatyí nicohón iñi yoso caa chinó xaan iñi cu Loida chiton chi Nyoo, ta cu Eunice sihun ñandihí. Tyicuan caa tutu yoho chinó xaan iñun vityin.

⁶Yucuan chaha chahí tuhun chuun vatyí na saniun iñun ta cotyiño nyatu cha cahun tuhun Nyoo cha chahá ra chuun quivi tyisé ndahi sicun. ⁷Nyoo ña chahá ra cha yuhvi yo. Soco chahá ra noo tunyee iñi cahnu chi yo. Ta chahá ra

vatyí cuñí yo chi tahan yo. Ta chahá ra cha cunyaca ñaha vaha yo chi yo. ⁸Yucuan chaha ma cahan nuun cahun tuhun Sutu Mañi yo. Ta ni ri cha ma cahan nuu cha cuenda cha ñohí vehe caa cha cuenda ra. Soco chihin tunyee iñi chahá Nyoo chuun ta chihin cha iyó vaha iñun cunyeun tindoho cha vachi siqui yo cha cuenda tuhun Nyoo. ⁹Vatyí ican ra sacacu chi yo. Ta nacana ra chi yo vatyí coo yo noo ñáyivi ii. Ñima cha cuenda cha vaha cha sacuví yo ta nacana ra chi yo, soco vatyí tyicuan caa tyaa ra cuhva nyata ni cumañi ca chinó ñuhu ñáyivi. Vatyí nya quivi cuan cuñí ra chi yo cha iin ri cuví yo chihin, ra Cristo Jesús. ¹⁰Ta vityin cha quichi ra Jesucristo sacacu ra chi yo, nacoto yo vatyí tyicuan caa cuñí ra chi yo. Ta nu quichi ra, satani ra tandihí tunyee iñi cha iyó chi tuhun chihi. Ta chihin tuhun vaha cahan ra, tavá ra nu ndichin tuhun cha coo yo noo ñáyivi chaa cha yori cuví sativi.

¹¹Nyoo tyaa ra tyiño chii vatyí cahin tuhun ihya chihin ñáyivi. Tachi ra chii vatyí cuví noo apóstol chi ra, ta sañahí chi ñu cha ñima ñu Israel cuví. ¹²Yucuan chaha nyehí tandihí tindoho ihya. Soco ña cucahán nui vatyí chitó mai yóo chi chinó iñi. Vatyí nacuhva cuende chii chi ra, ta chitó vahi vatyí cuví saha cuenda ra chii nyacua nya quivi quichi tucu ra.

¹³Cunyicon tuhun vaha cha chahí chuun. Ta coun chihin cha chinó vaha iñun chi Nyoo. Tyicuan ri cuñun chi ñáyivi tahan yo. Vatyí yucuan cuví cha chahá Nyoo chi yo tyi iin ri cuví yo chihin ra Cristo Jesús. ¹⁴Ta maa Tatyí li cha iyó añima yo na tyinyee chuun ta saha cumun tuhun vaha cha chahá Nyoo chuun.

¹⁵Cha chitón vatyí tandihí ra ityi Asia chiña casando ra chii, tari ra Fígelo ta ra Hermógenes. ¹⁶Soco ra Onesiforo na nyehe ndahvi Sutu Mañi yo chi ñáyivi chi ra vatyí cuaha xaan chaha quichi

sandunyeer ra iñi. Ta ña cucahan nuu ra cha cuenda cha ñohí vehe caa. ¹⁷Soco quívi chinyaa ra ñuu Roma ihya, ña sandihí ra tuhun cha nanducu ra chii nyacua nya cha ñañihí ra chii. ¹⁸Sutu Mañi yo nacuhva ra cha ñihi ra tumañi iñi quívi cha cutuñi chi yo nuu ra. Chitó vahun yoso cuhva tyinyee ra Onesíforo chi yo nya ñuu Éfeso chiña.

Noo sindaro vaha ra Jesucristo

2 Ta yoho sehe luhli, sandunyeer iñun chihin tunyee iñi cha chahá ra Cristo Jesús chuun cha cuenda cha iin ri cuví yo chihin ra. ²Tuhun cha chiñun cha cahin nuu cuaha ñáyivi, ñacatyí chi ra cha ñi iñi chinó iñi chi Nyoo, ra cha cacuví sañaha chi inga ñu.

³Ta cunyeun tindoho tari noo sindaro vaha ra Jesucristo. ⁴Ni noo ra cuví sindaro ta ma cuví tyihi ra chi ra chihin inga tyiño. Vatyí cuñí chi sacuví ra maa maa ri cha catyí ra cuví nuu chi ra. ⁵Ta tyicuan caa tucu ra canyasiquí, ma saha canaa ra cha tahán chi saha canaa ra tatu ma cunyasiquí ra tari cuhva tahán chi. ⁶Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra. ⁷Çaca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihí.

⁸Ñicohon iñi tuhun ra Jesucristo, ra cha nandoto cha yahá nyehe ra tindoho ta chihí ra. Cuví ra tata rey David. Ta ican ihya cuví tuhun Nyoo cha cacu añima yo cha chahá ra vatyí cahin tuhun. ⁹Ta cha cuenda tuhun ihya cunyeí tandihí tindoho nyacua nuhñí chihin cadena tari noo ra quiñi iyó. Soco tuhun Nyoo ña nuhñí chi. ¹⁰Yucuan chaha cunyeí tandihí tindoho cha cuenda cha vaha chi tandihí ca ñu nacachí Nyoo chi, tacuhva vatyí cuví cacu tucu tandihí ñu. Chihin cha ndu iin ri yo chihin ra Cristo cuacacu yo ta cuñihi yo noo nu tyaqui

xaan cha ma ndihi ca maa. ¹¹Ihya cuví cha ndicha xaan:

Tatu cuví yo cha cuenda ra, coo tucu yo chihin ra.

¹²Tatu cunyeé yo tindoho, cucunyaca ñaha yo chihin ra.

Tatu catyí yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

¹³Tatu sandoo yo chi ra, soco maa ra tyicuan ri sacuví ra cuhva catyí ra.

Vatyí maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴Sanicohun iñi ñu tuhun ihya, ta cattyun chi ñu chihin nuu Sutu Mañi yo na sandihí ñu cha cuví yuhu ñu cha ñima ri tuhun. Vatyí cha cuví yuhu ñu tyehe caa, ñahri maa tuhun. Tyi sativí ñu chi ñu tyasohó tuhun cahán ñu. ¹⁵Saniñun ta cuhva cuendon chuun nuu Nyoo tari noo ra sahá tyiño vaha. Vatyí ñahri cha cucahan nuun tatu chotyíño vahun tuhun ndicha yoso cuhva tahán chi. ¹⁶Ñaha tyasohun tuhun cha ñima ri tuhun ñáyivi ihya. Vatyí ñahri maa tyinyee chi chi yo. Soco sativí ca chi chi yo nuu Nyoo ¹⁷vatyí tari quihvi xico ndiyi noo nu cahvi, tyicuan caa cuví tuhun cuan vatyí sativí chi chi yo. Ta cuaha ñu cuativí cha cuenda cuan. Ican cuví cha cuví chi ra Himeneo ta ra Fileto. ¹⁸Vatyí caquita caxiñ ra ityi vaha ta catyí ra vatyí tari quívi cha yahá nandoto yo ta ma nandoto ca coño ñuhu yo. Ta tyicuan caa satondo ra cuhva chinó iñi suhva ñu. ¹⁹Ta vasi yihí ñu nducaxiñ ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chi noo seña cha catyí: “Sutu Mañi yo ñohó nuu ra chi ñu cuenda ra.” Ta catyí tucu chi: “Tandihí ñu nyisó sivi ra Cristo na quita ñu nu quiñi caa.” ²⁰Chichi noo vehe cahnu, ñima maa maa ri ndaha ty-

iño chinq chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan choty-iño ñu chi nu vaha, ta yihí cuan cha chotyíño ñu nu ñima ri tuhun. ²¹Tyicuan caa tucu maa yo tatu ña tñn cuenda yo tuhun cha ñima ri tuhun ñáyiví ihya, cuví yo noo ñáyiví cha chotyíño Nyoo chi, tari noo vaso xuhun cuaan. Ta cuñí chi vatyí cundií vasu cuan, tyicuan ta cuví cotyíño ra chi yo cha cuenda tandihi nuu vaha.

²²Ma caca xiñun tari chicá xiñi ra tyivaa ñáyiví ihya. Vatyí maa maa ri cha quiñi caa chicá xiñi ra. Çoo noo ñáyiví cuití. Chino vaha iñun chi Nyoo. Cuñun chi Nyoo ta chi ñáyiví. Çoo taxi run chihin tandihi ñu yihí cuenda Nyoo, ñu cha chihin cha vaha añima chicán tahvi chi Sutu Mañi yo. ²³Ta ma quichahun tuhun cha ñima ri tuhun cha cuví yuhu ñáyiví. Vatyí chitón tyi chihin cuan cacú tisihi. ²⁴Ta noo ra sacuví tyiño nuu Sutu Mañi yo, ña tahán chi cañi tahan ra. Soco tahán chi cha vaha ñáyiví cuví ra chihin tandihi ñáyiví. Ta cuñí chi cha ñihi vaha ra cuhva sañaha ra tuhun Nyoo. Ta cuñí tucu chi cha cama cuví iñi ra chihin ñáyiví. ²⁵Ta chihin cha masu iñi ra cuñí chi cha sandundoo ra chi ñáyiví ndava iñi. Ta cuatu ra nasama Nyoo cuhva iyó ñu ta nacoto ñu cha ndicha. ²⁶Ta tyicuan caa ta cunducachi iñi ñu ta cuaquita ñu chichi ndaha ra cuví cuihna vatyí cha vityin nyacuví maa ra yoso cuhva cuñí ra chihin ñu.

Yoso caa cucoo ñáyiví nu cuandihí ca quívi

3 Ta cuñí tucu chi çoton vatyí nu cuandihí tyembu cuquichi quívi cha yíi xaan coo yo. ²Vatyí cucoo ñáyiví ñu cuñí xaan suri chi maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chi ñu. Cucahan ña vaha ñu siquí Nyoo. Ta ma quichaha

ñu nu cahán sutu ñu ta sihi ñu. Ma nacuhva ñu tyahvi nyoo chi Nyoo, ni chi tahan ñu. Ma quichaha ñu chi Nyoo. ³Ma cuñi ñu chi tahan ñu. Ma coo ticahnu iñi chi ñu chihin ñáyiví. Cuñi ñu cuendu. Ma cuví cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha. ⁴Cunaxico tuhun ñu chi tahan ñu. Ta ndava xaan cucuvi iñi ñu. Ta cucaña iñi ñu sacuvi ñu ñáá ndihi cha cuñí ñu. Ta maa maa ri cha quichi cuví iñi ñu cunanducu ñu, ta ma nanducu ñu chi Nyoo. ⁵Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vatyí chasí ñu cha sañahá Nyoo tunyee iñi ra. Ma cutahun chihin ñu caa tyicuan caa. ⁶Vatyí mahñu ñu ihya iyó ra cha quihvi ra chichi vehe ta sandavi ñaha ra chi ñusihí cha ñahri cha chiñi tuñi xiñi. Ta nyisó ñusihí cuan cuatyí, vatyí nyicón ñu tandihi cha quichi cuví iñi ñu. ⁷Tyicuan ri cuñí ñu coto ñu tandihi tuhun chaa soco ña cuví cutuñi iñi ñu ñáá cha cuví cha ndicha. ⁸Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyó ta cha naha. Ta cuñi ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha. ⁹Soco cuhva cunyacuví ñu ma cuví cutya chi vatyí ña xehe caa tyi cha ñima ri tuhun cuví cha cusacuvi ñu, tari cha chinyacuví ra Janes ta ra Jambres.

Nu ndihí tyatyíño ra Pablo chi ra Timoteo

¹⁰Soco yoho chitó vahun tyi yuhu ñima tyicuan caa iyé. Vatyí chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha cahán ñáyiví chii. Ta chitón yoso cha cuñí chi ñu. ¹¹Ta chitón yoso caa cun-

yeí tindoho nu chicán nyicon ñáyivi chii. Chiton cha cuví chii, tandihi tindoho cha nyehi cha catyi tuhun Nyoo ñuu Antioquía, ta ñuu Iconio, ta ñuu Listra. Soco Sutu Mañi yo sacacu ra chii chichi tandihi cuan. ¹²Cha ndicha cuví vatyí tandihi yo cha cuñi yo coo yo cuhva cuñi ra Cristo Jesús cunyehe yo tindoho saha ñáyivi. ¹³Soco ñu quiñi iyó ta ñu sandavi ñaha, quiñi xaan ca cunanduvi ñu. Vatyí cusandavi ñaha ñu chi ñáyivi ta cusandavi ñaha ñáyivi chi ñu.

¹⁴Soco yoho sañihun coun chihin cha cutuhvon. Vatyí chitón yóo cha sañahá chuun ta chitó vahun tyi cha ndicha cuví. ¹⁵Nya ta ni luhlun ta chitón cha nyaá nu tutu tuhun Nyoo. Ta yucuan cuví cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús. ¹⁶Tandihí tuhun cha nyaá nuu tutu Nyoo, ta maa Nyoo chahá. Ta tyinyeé xaan chi chi yo nacoto yo yoso caa tahán chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñayivi vaha nuu Nyoo. ¹⁷Tyehe caa tyinyeé tuhun Nyoo chi yo tacuhva vatyí cuví yo noo ra cuiti cuenda Nyoo. Ta cuatu tuhva yo sacuvi yo tandihí cha vaha.

4 Tyatyíne chuun nuu Nyoo ta nuu Sutu Mañi yo Jesucristo, vatyí maa ra cusandaa ra cuatyí ñu nyitó ta ñu chihí quivi quichi ra cunyaca ñaha ra chihin tunyee iñi ra. ²Çahan tuhun Nyoo chihin ñáyivi. Tyicuan ri sanñun sacuvun. Çahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, çatyí cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama iñun. Ta sañahun chi ñu yoso caa tahán chi coo ñu. ³Vatyí coo quivi ma cunyee ca iñi ñáyivi tyasoho ñu tuhun vaha. Soco cunducu ñu cuaha xaan ra sacuaha cha sañahá maa

maa ri cha tahan iñi maa ñu cuiñi ñu. ⁴Ta cusacuachiyo xiin ñu cha ndicha. Ta cucuñi ñu cuiñi ñu noo tuhun cha ña ndicha. ⁵Soco yoho saha cuenda chuun chihin cha vaha chica xiñun. Cunyeun tindoho. Çahan tuhun Nyoo chihin ñáyivi. Sacuvi vahun tyiño chahá Nyoo chuun.

⁶Yuhu cha cuñi cui ri nacuhva cuende ñayivi cha cuenda tuhun Nyoo, vatyí cha nyañaa yatyin tuhun chihi chii. ⁷Cha cañi tahin tari cuhva tahán maa chi ta cha sandihí tyiño cha chahá Nyoo chii. Ta ña sandihí tuhun cha chinó iñi chi ra. ⁸Ta vityin nu cuahan ca chi quivi, nyatú tuhva noo cha tahán chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihí ca ñu cha nyatú chi ra. Vatyí noo ri maa ra cuví ra vaha sacutuñi.

Nonga tyiño tyaa ra Pablo chi ra Timoteo

⁹Sañiñi ta quichun cha numi ri, quichi nyehun nu nyai. ¹⁰Vatyí ra Demas sandoo ra chii vatyí cuñi ca ra cha iyó ñayivi ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmaçia. ¹¹Noo ri maa ra Lucas nyaá chihin. Nanducu chi ra Marcos ta na quichi ra chuhun quivi quichun. Vatyí chihuhú xaan ra chii nu tyiño Nyoo. ¹²Tachí chi ra Tíquico ñuu Éfeso. ¹³Quivi quichun cuison sahama cocon cha sandoi ñuu Troas vehe ra Carpo. Tyicuan caa tucu libri, quihí ndahun quichi. Ta cha niñi ca tuti.

¹⁴Ra Alejandro ra cañi mityi cuan, cuaha xaan cha ña vaha chinyacuvi ra chihin. Ta maa Sutu Mañi yo cutyiyahvi chi ra cha cuenda cha chinyacuvi ra chihin. ¹⁵Saha cuenda chuun chihin ra. Vatyí xaan xaan cuñi ra siqui tuhun Nyoo cha cahán yo.

¹⁶Cha xihna ri quivi sacaquj chii nuu ra cuví tyiño, yori maa tyinyee chii. Casandoo noo tuhun maa ra chii. Na saha Nyoo ticahnu iñi chi ra cha cuenda cuan. ¹⁷Soco Sutu Mañi yo tyinyee xaan ra chii. Ta chahā ra tunyee iñi chii tacuhva cuvī cahan cachi tuhun ra nuu ñu, ta chiñj tandihi ñu cha ñima ñu Israael cuví. Ta sacacu Nyoo chii cha cachi ndicaha chii. ¹⁸Ta cuasacacu ca ra chii ndaha tandihi cha ña vaha. Ta cuasaha cuenda ra chii nyacua nya nachaa quivi cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuvi chi tyicuan caa.

**Nu ndihi cahān ra Pablo
ta chahā ra nocumi chi ñu**

¹⁹Ihya vachi nocumi chi cu Prisca ta chi ra Aquila ta chi ñáyivi chi ra Onesíforo. ²⁰Ndoo ra Erasto ñuu Corinto. Ta ndoo ra Trófimo ñuu Mileto vatyí cuhví ra. ²¹Sañiñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihi ca ñáyivi tahan yo cuenda Nyoo ihya.

²²Na cunyaa Sutu Mañi yo chuhun. Ta Nyoo na nasoco ra chi tandihi ndo.

Carta Cha Sacuhun Ra Apóstol Pablo Chi Ra Tito

Nu tyaa ra Pablo noo tutu chi ra Tito

1 Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vatyí tyatyíño maa ra chii vatyí tyinyei chí ñu nacachi maa Nyoo, na nachino iñi ñu chí ra, ta cohon nuu ñu cha ndicha, ta coo ñu cuhva cuñí Nyoo. ²Ta cuatu tuhva ñu coo ñu ñáyivi chaa cha ma naa ca maa andivi. Vatyí ta ni cumañi ca chino ñuhu ñáyivi ta catyi Nyoo vatyí cucuhva ra noo ñáyivi chaa chí yo. Ta maa ra ña cuendu ra. ³Ta vityin chaq quivi cha tyaa Nyoo cuhva tyi nacoto yo tuhun ra. Maa ra cuví ra sacacú chí yo, ta chaha ra tyiño chí yuhu cha cahin tuhun ra chihin ñáyivi. ⁴Sacuhín tutu ihya chuun, Tito, vatyí tari noo sehe vahi cuví chuun cha cuenda tuhun Nyoo, vatyí iin ri chinó iñi yo chí ra Jesucristo. Cuñí vatyí Nyoo Sutu yo ta Sutu Mañi yo Jesucristo, ra sacacú chí yo, na nasoco ra chuun, ta na nyehe ndahvi ra chuun, ta na coo ca cha taxi ri añimon sahá ra.

Tyiño chaha ra Pablo chí ra Tito tyi sacuvi ra ñuhu Creta

⁵Sandoj chuun ñuhu Creta vatyí sandaun tyiño Nyoo cha nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyi chuun. ⁶Vatyí ra nyisó tyiño ihya cuñí chí coo ra noo cuhva cha ma cahan ñáyivi chí ra. Noo ri ñasihi ra coo. Ta tandihi sehe ra cuñí chí cha chinó iñi ñu chí Nyoo, ta cachi coo ñu ta ma ndava iñi ñu tacuhva cha ma tyaa ñáyivi cuatyí siqui ñu. ⁷Vatyí ra yindahá chí ñu yihí cuenda Nyoo, Nyoo tyatyíño cuan chí ra. Yucuan chaha ñiñi cuñí chí vatyí cuví ra noo ra vaha. Ñima noo ra cahnu sahá

chii, ni ñima noo ra tyityi iñi, ni ñima noo ra tuhvá chiñi. Ñima noo ra quixin cuatyí, ni ñima noo ra cuñí xuhun cha ña saha ganaa vaha ra. ⁸Soco tyicuan ri sii cuví chí ra tatu chaa ñáyivi vehe ra. Ta tahan chí cuhva ra nu coo ñu. Cuñí chí cuví ra noo ra cha sacuví cha vaha. Noo ra chitó yoso caa nyaca ñaha ra chí maa ra. Na cuví ra noo ra ndaa iyó, noo ra sacahnú vaha chí Nyoo. Ta chitó vaha ra cuhva tahán chí sacuvi ra ta sañiñi ra sacuvi ra. ⁹Ta cunyicon vaha ra tuhun ndicha cha sañahá yo chí ra. Tyicuan ta coto ra sandunii ra iñi inga ñu chihin tuhun vaha ihya. Ta chí ñu catyi tyi ña ndicha tuhun cahan yo, coto ra yoso caa sañaha ra chí ñu tyi ña vaha cahán ñu siqui tuhun Nyoo. ¹⁰Vatyí cuaha xaan ra ndava iñi iyó. Cuaha ra cahán cha ñima ri tuhun, cuaha ra sandaví ñaha. Ta cuaha xaan ca ñáyivi Israel sacuví tyicuan caa. ¹¹Cuñí chí cha casi yo yuhu ra cuan, vatyí cuaha xaan ñáyivi satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahán chí.

¹²Ta suri maa noo ra Creta, noo ra chíñi tuñi, ra cahán nuu ñu catyi ra tyehe caa: “Ñu Creta, cuendu xaan ñu. Tari quití cuví ñu. Cuahyi ñu ta suchan ñu”, catyi ra cuan. ¹³Ta cha ndicha catyi ra cuan. Yucuan chaha cuñí chí cha cahan ñihun chihin ñu na saña ñu tuhun cuan, tacuhva vatyí vaha na chino iñi ñu chí ra Cristo. ¹⁴Tacuhva cha ma tyasoho ca ñu tyisu cha ñima ri tuhun cha canasavaha ri maa ñu Israel. Ta ni ma tyasoho ca ñu tuhun cahán ñáyivi cha ña cuñí coto cha ndicha.

¹⁵Cha cuenda ñáyivi cha vaha chicá xiñi, tandihi ta vaha chí ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chí ñu vatyí nyacua nya cuhva chicá xiñi ñu ta cuhva tuví iñi ñu ta ña vaha ta quiñi caa. ¹⁶Catyí ñu vatyí ñohó nuu ñu chí

Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quiñi yihí iñi ñu ta ndava iñi ñu. Ta ma cuvi sacuvi ñu noo cha vaha.

Tuhun vaha cha chaha Nyoo tyi sañaha yo

2 Soco yoho, sañaha tuhun vaha tari cuhva sañahá tuhun Nyoo chi yo. ²Sañahun vatyí ra chahnu, cachi çoo ra, tacuhva vatyí na saha ñáyivi ñáyivi chi ra. Ta tyicuan ri cachi caca xiñi ra. Vii çuhun ra chihin cha chino iñi ra. Cuñí chi cha cuñí ra chi Nyoo ta chi ñáyivi. Ta cunyeé iñi ra tandíhi. ³Ta tyicuan caa tucu ñu chahnu. Çatyí chi ñu na coo ñu noo cuhva cha tahán iñi Nyoo. Ta ma ñiñi ñu cuendu. Ma coho ñu ndixi. Ta na sañaha ñu cha vaha iyó ñu, ⁴na nyehe ñu nicaa tandaha. Tacuhva vatyí cuñi ñu chi yí ñu ta chi sehe ñu. ⁵Na caca vaha xiñi ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuvi ñu. Na cuhva ñu cha cunyaca ñaha yí ñu chi ñu tacuhva vatyí yori cuvi cahan ña vaha siqui tuhun Nyoo.

⁶Ta tyicuan caa tucu ra tyivaa. Çuhva tuhun chi ra na cacachi coo ra. ⁷Ta maun cuñí chi cha sañahun maa ri cha vaha chihin cuhva iyón chi ra. Sañahun chi ra chihin cha cachi ta cha ndaa. ⁸Maa ri tuhun vaha çahun tacuhva vatyí yori cuvi tyaa cuatyí sicun. Tyicuan ta ra xaan iñi chi ndo cucahan nuu ra vatyí ma ñihi ra cuhva cahan ña vaha ra siqui ndo.

⁹Çuhva tuhun chi ra yañi yo ra iyó chitoho, na caquichaha ra chi chitoho ra. Na sacuvi vaha ra tandíhi cha catyí ra. Ta ma na cahan ra nu cahan ra. ¹⁰Ta ma tiñ ri maa ra cha chii chitoho ra. Soco na saha vaha ra ñáyivi chi ra, tacuhva vatyí cunyehe ñáyivi vatyí vaha xaan tuhun Nyoo ra sacacú chi yo.

¹¹Vatyí Nyoo sañahá ra vatyí vaha xaan ñáyivi cuví ra. Ta cuñí ra sacacu ra chi tandíhi ñáyivi. ¹²Chihin cuan sañahá Nyoo chi yo vatyí na saña yo cha quiñi caa cha nyacuví ñáyivi ña ñohó nuu chi ra ta cha quichi cuvi iñi ñu. Ta cachi çoo yo siqui ñuhu ñáyivi ihya, tari cuhva cuñí Nyoo. ¹³Ta sañahá tucu ra chi yo yoso caa cuatu tuhva yo cha vaha cha cuñihi yo quivi quichi tucu ra Jesucristo. Vatyí cucusiñ xaan cuñi yo cuhva cha cunyehe yo cha tyaquí quivi quichi ra cuví Nyoo yo ra cahnu ca, ra cha sacacú chi yo. ¹⁴Chaha ra ñáyivi ra tyiño nuu yo tacuhva sacacu ra chi yo ndaha tandíhi cha quiñi caa. Ta sandundiñ ra chi yo tacuhva na cuvi yo ñáyivi cuenda ra, ta cha yaha tuhun cuan cuñí ra vatyí sacuvi yo maa maa ri cha vaha. ¹⁵Ican ihya cuñí chi sañahun chi ñáyivi. Sanduniun iñi ñu. Ta çahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaa ñu chuun.

Cuhva cha tahán chi sacuvi ñu yihí cuenda Nyoo

3 Sañicohun iñi ñu tahan yo cuenda Nyoo na quichaha ñu chi gobiernu ta chi ra cacuví tyiño. Ta chihin cha ñiñi iñi ñu na sacuvi ñu ñáá tyiño vaha cha catyí ra cuví tyiño tyi sacuvi ñu. ²Ta ma cahan ña vaha ñu siqui ni noo ñáyivi. Na taxi ri coo ñu. Vaha ñáyivi na cuvi ñu. Na masu cuvi añima ñu chihin tandíhi ñáyivi.

³Vatyí nyacua nya maa yo ta tyicuan caa cuví yo ta ityi chata ca. Tondo xaan chiyo yo. Ta ndava xaan cuví iñi yo. Ñahri noo ityi vaha chicá noo yo vatyí ra cuví cuilha sandahvi ñaha ra chi yo. Chinyaca ñaha cuhva ña vaha cha cuñí coño ñuhu yo chi yo. Ta chinyacuví yo tandíhi maa cuhva cuñí chi. Tandíhi cha iyó chi inga ñáyivi ta cuñí yo coo chi yo.

Tasi cuñi yo nyehe yo chi tahan yo. Ta ñáyivi ña cuñi nyehe ñu chi yo. ⁴Soco Nyoo vaha ñáyivi cuví ra ta sacacü ra chi yo. Yucuan cuví nu sañahá ra vatyi cuñí ra chi tandíhi ñáyivi. ⁵Ñima cha cuenda cha cachi iyó yo ta sacacü ra chi yo, soco cha cuenda cha ndahvi cuñí ra nyehe ra chi yo. Ta chihin ñíni ra Jesús nacatya yo cuatyí yo ta nacacü chaa yo, ta chahá Tatyí li ra noo ñáyivi chaa coo yo. ⁶Ta chahá xaan Nyoo cha coo Tatyí li ra añima yo cha cuenda maa ra Jesucristo ra sacacü chi yo. ⁷Chihin tumañi ñi cha chahá ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chahá ra chi yo, noo ñáyivi cha ma naa ca maa. ⁸Tandíhi tuhun ihya ndícha xaan. Ta cuñí vatyi cahun tuhun ihya nuu ñu chinó ñi chi Nyoo chihin cha ñi ñun, tacuhva na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi tandíhi ñáyivi tatu quichahá ñu. ⁹Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahán ñu vatyi ñu cuan ñañí xaan cuñí ñu coto ñu yoso caa vachi tata yo. Ma quichahun chi ñu cañí tahan cha cuenda ley cha tyaa ra Moisés ta cha naha. Ñahri maa tyinyeé cuan. Cha ñima ri tuhun cuví.

¹⁰Tatu iyó ñu cuñí ñu sacusiin ñu chi ñu nyicú vehe ñuhu, çana chi ñu noo chaha o uvi chaha ta çatyí chi ñu tyi ña vaha sacuví ñu. Ta tatu ña quichahá ñu, çasi nu quichi ñu. ¹¹Vatyi ma chihin yucuan ri chitón vatyi ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chi ñu.

Tyíño tyaa ra Pablo chi ra Tito

¹²Cutachi chi ra Artemas, o chi ra Tíquico nu nyaún. Quivi chaa ra, ndücu cuhva ta cühun ñuu Nicópolis vatyi cuñihi tahan yo yucuan. Vatyi tyái cuhva cuyahi yoo vichin yucuan. ¹³Ndücu cuhva tyinyeun chi ra Zenas ra chitó xaan ley, ta chi ra Apolos ta cühva cha chiñuhú chi ra nu cachicá noo ra tuhun Nyoo. ¹⁴Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chi inga ñu. Tyicuan ta ña caha ri nyicón ñu chi Nyoo.

Nu ndíhi cahán ra Pablo

¹⁵Tandíhi ra nyicu chihin, chahá ra nocumi chuun, Tito. Ta na cuhva nocumi chi tandíhi ñu cuñí chi ndi cha cuenda cha ñin ri cuví yo cuenda Nyoo. Na nasoco Nyoo chi tandíhi ndo.

Carta Cha Sacuhun Ra Apóstol Pablo Chi Ra Filemón

Nu tyaa ra Pablo noo tutu chi ra Filemón

1¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuvi sindaro ra Jesucristo chihin yo, ta chi cu Apia, ta chi tandihi ñu ndu iín ri vehun.³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyí ra Filemón vita xaan iñi ra ta chino vaha iñi ra chi Nyoo

⁴ Tyicuan ri nacuhvé tyahvi nyoo chi Nyoí cha cuendon nu nicohón iñi tuhun, nu chicán tahvi chi ra.⁵ Vatyí ñihí tuhun tyi chinó vaha iñun chi Sutu Mañi yo Jesucristo, ta cuñí xaun chi ra ta chi ñu yihí cuenda ra.⁶ Ñáyivi cha sacotón yoso caa kuhva chinó iñun chi Nyoo, nachino iñi tucu maa ñu chi ra ta vityin chicán tahvi cha cuenda ñu, na coto vaha ñu tandihi cha vaha cha chahá Nyoo chi yo cha cuenda ra Cristo Jesús.⁷ Sii xaan cuñí, ta vaha xaan cuñí añime vatyí cuñí xaun chi ñu tahan yo, ta sandunyeún iñi ñu.

Nu chicán ra Pablo noo tumañi iñi chi ra Filemón cha cuenda ra Onésimo

⁸ Vasi iyó chi ityi chii cha catyi chuun ñáá cha tahan chi sacuvun vatyí apóstol cuví, soco ña cuñí saniñi chuun.⁹ Vaha ca cha caquen noo tumañi iñi chuun cha cuenda cha cuñí yo chi Nyoo vatyí yuhu ra chahnu cuví ta ñohí vehe caa cha cuenda ra Cristo Jesús.¹⁰ Chiquén noo tumañi iñi chuun cha cuenda ra Onésimo

vatyi nanduví ra sehi cha cuenda Sutu Mañi yo nu ñohí vehe caa ihya.

¹¹ Quiví cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuvi vaha ra tyiño nuu maun.¹² Ta vityin sacunuhí chi ra chuun. Ta cuñí vatyí ñaquehen cuenda vahun chi ra tari cha mai cuví.¹³ Vasi cuñí cha ndoo ra ihya chihin, ta tyinyee ra chii tyiño nuu maun cha niri ca cha ñohí vehe caa cha cuenda tuhun Nyoo,¹⁴ soco ña cuñí cha ndoo ra tyiño nuun tatu ña ndoun vaha, vatyí tacuhva sacuvun tumañi iñi chii soco chihin cha iyó vaha iñun ta ñima ca chihin cha saniñi chuun.¹⁵ Ra Onésimo chahá xaan ra tisihi chuun quivi cuan, soco vaha xaan nanduví ra vityin, vasi yucuan cuenda canyahá ra chuun ta vityin nachaa ra nu nyaún vatyí cuacunyaa ra chuhun tyicuan ri maa¹⁶ soco ñima tari noo musu ri, soco tari noo ra vaha ca. Vatyí yañi yo cuví chi ra. Ta cuñí xain chi ra, ta vihi ca yoho, tahan chi cha cuñí con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihi.

¹⁷ Tatu ndicha cha ra tahun cuví chii, cuñí vatyí ñaquehun chi ra Onésimo tari cha chi yuhu ñaquehún.¹⁸ Tatu iyó cha sacuví ra chuun, o tatu yosoyicá ra chuun, tyiyahvi mai.¹⁹ Yuhu ra Pablo tyái tuhun ihya vatyí cutiyahvi cha yosoyicá ra chuun, cha nuu cha tahan chi catyi chuun vatyí yosoyicón nyacua nya ñayivun chii.²⁰ Chiquén chuun, yañi, na sandusiun iñi ta ñaquehun chi ra Onésimo chihin cha vaha. Sanduchaa añime chihin cha iin ri cuví yo cha cuenda ra Cristo.

²¹ Tyái tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun.²² Ta nonga cha chiquén chuun tatu ma sanduvahun chiin noo nu

cuví cunyai chihin ndo. Ta cuñí vatyí cā-
can tahvun cha cuende, na kuhva Nyoo
cha cuhin nu nyaá ndo.

**Nu ndihi cahan ra Pablo
ta chahá ra nocumi chi ñu**

²³Vachi nocumi chuun sahá ra
Epafra, ra ñoho chihin vehe caa cha

cuenda ra Cristo Jesús. ²⁴Ta vachi tucu
nocumi chuun sahá ra Marcos, ta ra
Aristarco ta ra Demas, ta ra Lucas, ra
catyinyeé chii chihin tyiño Nyoo.

²⁵Na nasoco Sutu Mañi yo Jesucristo
chuun. Ta na cuvi chi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehe ra

1 Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachahá cuenda tuhun cahán ra. ²Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaá ra ndaha Sehe ra. ñin ri cuví ra chihin Sehe ra ta savahá ra ñuhu ñayivi. ³Cha cahnu ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee ñiñi tuhun cahán ra, nyisó cuenda ra tandihi cha iyó. Ta cha yahá sandachí ra cuatyí yo, ta chicunyaá ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

Cahnu ca cuví Sehe Nyoo ta ñima ca ángel

⁴Ta tyicuan caa cahnu xaan ca nanduví Sehe Nyoo ta ñima ca tandihi ángel. Ta cahnu ca sivi chahá Nyoo chi ra ta ñima ca ángel cuenda ra. ⁵Vatyí Nyoo ña catyí ra ni noo chaha chi ni noo ángel tyehé caa: Yoho cuvún Sehi. Ta yuhu chahí ñayivi coun vityín. Ta ni ña cahán ra tuhun ni noo ángel tyehé caa: Yuhu cucuvi Sutu ra. Ta maa ra cucuvi Sehi. ⁶Soco quívi saquichí Nyoo chi Sehe nuu ra siqui ñuhu ñayivi, catyí ra: Na sacahnu tandihi ángel cuende chi ra. ⁷Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende, ta tari yaa ñuhú cuví ra sacuví tyiño nui, catyí Nyoo.

⁸Soco tuhun Sehe ra catyí ra tyehé caa: Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusii ñiñi chahí chuun, ta ñima ca chi ra tahun.

¹⁰Ta catyí tucu Nyoo chi Sehe ra tyehé caa:

Yoho, ra nyacá ñaha cuvún. Ta quívi xihna ri savahun ñuhu ñayivi ta chihin ndahun savahun andivi.

¹¹Maa ñuhu ñayivi ta andivi cundihí chi, soco yoho, cundoun tyicuan ri maa. Tandihí maa cuan cu cuchahnu tari sahma.

¹²Ta cunicava tahnu chi tari noo vestido.

Ta cunasama chi tari nasamá ñayivi sahma ñu.

Soco yoho suri maa ra cuvún tyicuan ri maa.

Ta ma ndihi maa ñayivun, catyí Nyoo chi Sehe ra.

¹³Nyoo ni noo chaha ña catyí ra chi ni noo ángel tari catyí ra chi Sehe ra tyehé caa:

Cunyaun chiyo vahi nyacua nya cha caquin chi ra xaan ñiñi chuun chahun.

¹⁴Soco tandihí ángel, tatyí cacuví ra ta tyaa Nyoo tyiño chi ra cha caca ra ta tyinyee ra chi ñu cucacu aña.

Cahnu xaan cuví tuhun cha sacacú Nyoo aña chi yo

2 Yucuan chaha vatyí cuñí chi cha quichahá xaan ca yo tuhun ndicha cha chihí yo, coto cunuhu yo ityí quíñi caa. ²Ta cha naha catyí Nyoo chi ángel,

na cuhva ra ley ra chi ra Moisés. Nyoo catyí ra tyi tahán chi quichaha ñáyivi. Ta ñu casacuví cuatyí ta ña quichaha ñu ley ra, tachí tuñi ra chi ñu tari cuhva catyí maa ley cuan. ³ Cahnú xaan cuhva sacacú Nyoo ańima yo. ¿Yoso caa cucacu ańima yo tatu sacunaa yo cuhva cuan? Cha xihna ri suri maa Sutu Mańi yo Jesucristo caħan ra tuhun yoso caa cuví cacu ańima yo. Ta yaha cuan ta ñu cha cachińi tuhun caħan ra, chitó ñu tyi ndicha ta canacatyí tucu ñu chi maa yo. ⁴ Ta siin ri, Nyoo sańaha cachi ra chi yo chihin cuaha milagru ta cha iyo, vatyí ndicha cha sacacú ra chi yo. Ta chaha ra Tatyí li ra chi yo siin siin cuhva, yoso cuhva cha cuńi maa ra. Ta chihin tandihi cuan sańaha ra chi yo vatyí ndicha cha sacacu ra ańima yo.

Ra Jesucristo cuví ra cha cua sacacu ańima yo

⁵ Nyoo, ña chaha ra cha cunyaca ñaha ángel chi ñuhu ñáyivi chaa cha caħan yo tuhun vityin. ⁶ Vatyí iyó noo nuu caħan chi nu tutu Nyoo tyehe caa:

Nyoo Suti ¿yóo ra cuví rayii vatyí nichon ińun tuhun ra?

¿Yóo ra cuví Sehe ra vatyí tĩn cuendon chi ra?

⁷ Vatyí suhva quivi, ndahvi ca sacuvun chi ra, ican saha ángel.

Soco yaha cuan sacahnú xaun chi ra. Ta saha xaun ñáyivi chi ra.

Ta chahun cha cunyaca ñaha ra siqui tandihi cha savahun.

⁸ Tandihí cuan natyaun ndaha ra.

Tandihi maa, Nyoo chaha cha cunyaca ñaha ra, cuví chi cuan. Soco nyehé yo vatyí cumańi ca quichaha tandihi cuan chi ra. ⁹ Soco nyehé yo chi ra Jesús vatyí suhva ri quivi, sanocuee Nyoo chi ra ican saha chi ángel. Soco cha cuenda cha cuńi xaan Nyoo chi yo, chaha cuenda ra chi ra Jesús cha cuví ra cha cuenda tandihi yo. Ta vityin saha xaan Nyoo ñáyivi chi

ra ta sacahnú xaan ra chi ra cha cuenda tindoho cha nyehé ra quivi chihí ra.

¹⁰ Tandihí maa cha iyó, cha cuenda maa Nyoo cuví. Ta maa ra savaha. Ta cuńi ra vatyí tandihí sehe ra ta chi maa ñu cucuvi tandihí cha tyaqui cha iyó gloria. Ta chihin tindoho cha sanyehé ra chi ra Jesucristo Sehe ra, sacuvaha ra chi ra. Vaha xaan quita ra. ¹¹ Sehe Nyoo cuví chi ra Cristo, ra sacacú ańima ñáyivi. Ta suri sehe Nyoo nanduví chi ñáyivi ñu chinó ińi chi ra. Yucuan chaha vatyí ña cucahan nuu ra Cristo catyí ra yańi ra chi ñu, vatyí iin ri sutu ra chihin ñu. ¹² Vatyí catyí ra Cristo nu tutu Nyoo tyehe caa: Cucahin tuhun maun chihin yańi.

Ta cucate yaa cuendon nu ndú iin ri ñu.

¹³ Catyí tucu ra tyehe caa:

Yuhu cuita ińi chi Nyoo.

Ta catyí tucu ra:

Ihya nyaí chihin sehi, cha chaha Nyoo chí, catyí ra.

¹⁴ Ta tandihí yo cha cuví yo sehe ra, coño ñuhu cuví yo ta yihí nińi yo, yucuan chaha ra Jesús ñandihi, suri coño ñuhu ta nińi ñáyivi nyiso ra suhva quivi, tacuhva cuví chaa tuhun chihí chi ra, ta tyicuan caa ta sataní ra chí cuihna, ra cha chiyó tunyee ińi chí cha cahńi chí ñáyivi. ¹⁵ Ta tyicuan caa sacacú ra chí ñu cha yuhví chí tuhun chihí. Chiyó ñu tari noo musu ra ña vaha vatyí yuhví ñu cha cuví ñu. ¹⁶ Cha ndicha vatyí ña quichí tyinyee ra chí ángel, soco chí ñáyivi tata ra Abraham quichí tyinyee ra. ¹⁷ Yucuan chaha cuńi chí cha nduví ra tari ñáyivi, tacuhva cuví ra noo ra ndicha cundahvi cuńi chí yo. Ta tyicuan caa cuví ra tata sutu cahnú cha cuenda yo nuu Nyoo. Ta tyicuan caa ta sacuachiyó ra cuatyí ñáyivi cha cuenda tindoho cha nyehé ra. ¹⁸ Vatyí maa maa ra nyehé tindoho quivi nducú nyehé ra ña vaha chí ra, yucuan chaha, vityin cuví tyinyee tucu ra chí maa yo tatu nducú nyehé ra ña vaha chí yo.

**Cahnu ca cuví ra Jesús
ta ñima ca ra Moisés**

3 Yañi, nyoho chaha cuenda ndo chi ndo chi Nyoo. Ta cuví tucu ndo ñu cha nacana Nyoo chii vatyí coo ndo chihin ra andivi. Ta cha cuenda cha nyehe ra Cristo Jesús tindoho tyiño nuu ndo, yucuan chaha, nyehe vaha ndo cuhva vaha iyó ra. Vatyí ican ra cuví ra cha saquichí Nyoo chi vatyí cuví ra tata sutu cahnu cuenda yo cha chinó iñí yo tuhun Nyoo. ²Ta maa ra quichaha ra tandihi cha catyí Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahan chi sacuvi ra nuu ñáyivi sehe Nyoo. ³Ta ra Jesucristo cahnu ca ra cuví ra, ta ñima ca ra Moisés. Vatyí noo ra cha savahá vehe, cahnu ca cuví ra ta ñima ca maa vehe cuan. ⁴Tahan tahan vehe, iyó ra savahá chi chi, soco Nyoo cuví ra cha savahá tandihi maa cha iyó. ⁵Ra Moisés, quichaha vaha ra chi Nyoo ta sacuvi ra tyiño nuu ra cha cuenda ñáyivi Israel ta cahan ra tuhun cha cusacoto Nyoo nu cuahan ca chi ityi nuu. ⁶Soco ra Cristo ra cuví Sehe Nyoo, suri quichaha vaha ra chi Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu sanií ca yo iñi yo cuhun yo ityi nuu chihin Nyoo ta itá iñi yo chi ra nyacua nya nu ndihi, ta tyicuan ri cusii cuñí yo nyatú yo cha cuñihi yo.

**Ñu chinó iñi chi Nyoo,
nyitatu ñu chihin Nyoo**

⁷Yucuan chaha cuñí chi saha cuenda yo chi yo, tari catyí Tatyí li Nyoo nuu tutu Nyoo tyehe caa:

Tatu chiñí ndo tuhun cahan Nyoo chihin ndo vityin,

⁸ma sandava ndo ñima ndo, tari sacuvi ñu ña quichaha chi Nyoo quívi canducú nyehe ñu chi ra nu chica noo ñu chiqui ndii cuan.

⁹Tyehe caa catyí Nyoo: Ñáyivi cuan nducú nyehe ñu chii, vasi chichi cha uvi xico cuiya nyehe ñu cha sacuvi.

¹⁰Yucuan chaha cuxain chi ñu, ta catyí tyehe caa: “Tyicuan ri chicá uvi iñi ñu,

ta ña cuñí ñu coto ñu ityi mai.”

¹¹Yucuan chaha cuxain chi ñu, ta catyí cachi chi ñu, vatyí ma quihvi ñu nyitatu ñu chihin, catyí Nyoo.

¹²Yañi, saha ndo cuenda chi ndo coto cu ña vaha ñima ndo ta coto yoso ri caa ta sandoo ndo chi ra cuví Nyoo nyitó cha cuenda cha ña chinó ca iñi ndo chi ra. ¹³Soco sanii ndo iñi tahan ndo tahan tahan quívi, cha ni ri ca cha chahá ca chi cuhva vityin, tacuhva vatyí ni noo ndo ta ma sandavi ñaha cha quiñi caa chi ndo, ta ndundava ñima ndo. ¹⁴Vatyí tatu sanií yo iñi yo chihin Nyoo nyacua nya nu ndihi ñáyivi, yucuan ta iin ri cuñihi yo cha vaha chihin ra Cristo.

¹⁵Catyí chi nu tutu Nyoo vatyí saha yo cuenda chi yo tyehe caa:

Vityin tatu nyoho ta chiñí ndo cha catyí Nyoo.

Ma sandava xaan ndo ñima ndo, tari sacuvi ñu ña quichaha chii, catyí Nyoo.

¹⁶¿Yóo ñu cha cachiñi tuhun cahan Nyoo ta ña tyasoho ñu? Tandihi ñu Israel cha tava ra Moisés Egipto ta cha naha, ican ñu cuan. ¹⁷Ta ¿yóo chi cuxaan Nyoo chichi cha uvi xico cuiya? Suri chi ñu cuan, ñu cha chicoo cuatyí. Ta cachiñi ñu nu chiqui ndii nu chica noo ñu. ¹⁸Ta yóo chi catyí cachi Nyoo tyi ma quihvi ñu, cunyitatu ñu chihin ra? Chi ñu cha ña tyasoho nu cahan ra. ¹⁹Nyehé yo vatyí ña cuví quihvi ñu cuan vatyí ña chingo iñi ñu chi ra.

4Yucuan chaha, cha ni ri ca cha iyó ca quívi cuví quihvi yo cunyitatu yo chihin Nyoo, cuñí chi saha yo cuenda

coto ma cuvi quihvi nya noo nyoho nu cunyatatu yo chihin Nyoo. ²Vatyí chiñi tucu yoó tuhun Nyoo cha sacacú ra añima yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndii ri maa ñu, ta ña chingo iñi ñu. ³Soco yoó cha chinó iñi yo, ican yo cuví ñu quihví nyitatu chihin Nyoo. Ta cha cuenda ñu ña chinó iñi cuví chi tari catyí Nyoo tyehe caa:

Yucuan chaha cuxain chi ñu ta catyí cachi chi ñu vatyí ma quihvi ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyí nyitatu Nyoo cha sandihí ra tyiño sahá ra nyata savahá ra ñuhu ñayivi. ⁴Vatyí yihí nu catyí chi nu tutu Nyoo cha cuenda quivi cu ucha nu ndihi vitya. Tyehe caa catyí chi:

Nyoo nyitatu ra nu cu ucha quivi, vatyí ndihí tyiño saha ra.

⁵Ta inga tucu chaha catyí chi nu tutu Nyoo tyehe caa:

Ni noo quivi ma quihvi ñu nu cunyatatu ñu chihin, catyí Nyoo.

⁶Ñu cuan, ñu cha xihna ri cachiñi tuhun cha sacacú Nyoo añima yo, ña quihvi ñu cha cuenda vatyí nacahnú ñu nu cahán Nyoo. Soco nyaá cha quihvi inga ñu.

⁷Vatyí cha yaha nacahnú ñu Israel cuan nu cahan Nyoo, natyaa tucu ra cuhva vatyí nya inga quivi cuví quihvi yo cunyatatu yo chihin ra, ta ican cuví quivi vityin. Ta cahán Nyoo tuhun quivi vityin chihin cha catyí ra David. Nyaá chi nu tutu Nyoo tyehe caa:

Vityin tatu nyoho ta chiñi ndo cha catyí, Ma sandava xaan ndo añima ndo, catyí Nyoo.

⁸Tyehe ta chinyaca ra Josué chi ñu Israel cuan nu cunyatatu ñu chihin Nyoo, ma cahan ca Nyoo inga chaha tuhun cha cuenda inga quivi. ⁹Soco nyaá ca nu cuví nyitatu ñu yihí cuenda Nyoo chihin ra. ¹⁰Vatyí ñu quihví nyitatu chihin Nyoo, ña chicá ca iñi ñu soco nyitatu añima ñu

tari nyitatu Nyoo quivi ndihí tyiño saha ra. ¹¹Cuñí chi saniñi yo chinó iñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vatyí ña cuñí ñu chino iñi ñu chi ra.

¹²Vatyí tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityi cha xaan ninduvi chiyo yuhu, ta nyee chi nyacua nya chichi añima yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá añima yo. Ta sañahá cachi Nyoo ñáá cha chicá iñi yo ta ñáá cha caá añima yo tatu vaha o ña vaha. ¹³Ñahri maa cha savahá Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuvi yo.

Ra Jesús cuví ra tata sutu cahnu cha cahán chaha yo nuu Nyoo

¹⁴Ra Jesús Sehe Nyoo, cuví ra tata sutu cahnu cha cuenda yo, vatyí quihvi ra nuu Nyoo ta cahán ra chaha yo. Yucuan chaha cuñí chi cha ma sandihí yo cha chinó iñi yo chi ra. ¹⁵Vatyí ra cuví tata sutu cha cuenda yo cuví naquehen ndahvi ra chi yo tatu cuihya cuñí yo chihin Nyoo, vatyí chitó tucu maa ra cha cuví tindoho cha nyehe yo vatyí nyehe tucu maa ra tandihí nuu tindoho, saha ra ña vaha cha nducu nyehe ra chi ra, soco maa ra Jesús, ñahri cuatyí ra chicoo. ¹⁶Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhví yo vatyí cuñí xaan ra chi yo, ta ndahvi cuñí ra nyehe ra chi yo. Ta cha cuenda cha vaha ñáyivi cuví ra, tyinyee ra chi yo nu nyehe yo tindoho.

5 Tandihí ra cuví tata sutu cahnu ca cuenda ñu Israel, ñáyivi cuví ra. Ta na cachí Nyoo chi ra vatyí cahan ra chaha tandihí ñu nuu Nyoo, ta cuhva cuenda ra cha chahá ñu chí Nyoo, ta cahni ra quití cha cuenda cuatyí ñu. ²Ta suri vachi quivi ndahvi cuñí ra cacuvi

sutu cha nducú nyehe ra ña vaha chi ra, yucuan chaha cuví cundahvi cuñi ra nyehé ra chi ñáyivi ña chitó maa, ta tyinyeé ra chi ñu quitá caxiin ityi vaha Nyoo, na ndu uvi iñi ñu cuatyí ñu. ³Ta cha cuenda cuatyí maa ra ta cha cuenda cuatyí ñáyivi, cachahñi ra quití ta chahá cuenda ra chi Nyoo na cahnya ra cuatyí ñu.

⁴Yori sacuvi ri maa sutu chi. Maa Nyoo cuví ra cana chi ra, ta chaha ra cha cuví ra tata sutu, tari sacuvi ra chihin ra Aarón ta cha naha. ⁵Ta tyicuan caa tucu ra Cristo, ñima maa ra sacuvi ra sutu chi ra, soco maa Nyoo chaha cha cuví ra, tari catyí maa ra tyehe caa:

Yoho cuví Sehi.

Yuhu chahí ñayivi coun vityin, catyí Nyoo chi ra Cristo.

⁶Tari catyí tucu ra chi ra nu inga nu cahán chi tyehe caa:

Yoho cuvún tata sutu tyicuan ri maa.

Cuvún tari ra Melquisedec.

⁷Ta quivi chiyo ra Cristo ihya siqui ñuhu ñayivi, chican tahvi ra chi Nyoo, ta chacu chaa ra ta cahan ra chihin Nyoo vatyí ican ra cuví ra iyó tunyee iñi chii cha sacacu chi ra ndaha tuhun chihi.

Ta Nyoo chiní ra tuhun cahan ra vatyí sacuvi ra tandíhi cha catyí Nyoo. ⁸Yucuan chaha vasi Sehe Nyoo cuví chi ra Cristo, soco cutuhva ra cha quichaha ra chi Nyoo chihin cha nyehé ra tindoho.

⁹Ta cha yaha cha sacuvaha Nyoo chi ra, tyicuan ta cuví ra ra sacacú aña ñáyivi tacuhva coo ñu chihin Nyoo tyicuan ri maa, tandíhi ñu cha quichahá tuhun cahán ra. ¹⁰Vatyí Nyoo tyaá tyiño chi ra cha cuví ra tata sutu cahnu, tari ra Melquisedec.

Yica xaan cha sandíhi yo cha chinó iñi yo tuhun Nyoo

¹¹Cuaha xaan nyaá cahan yo siqui tuhun ihya, soco yíi xaan nacatyí yoso caa cuahan, vatyí nyoho ña cuñi ndo

cutuñi iñi ndo. ¹²Cha naha xaan chinó iñi ndo chi Nyoo, cuñi chi cha cuví ndo ra sacuahá ta sañaha ndo chi inga ñu. Soco nyoho ni cuñi chi cha nacatyí tucu ndi inga chaha chi ndo tuhun cha xihna ri chiní ndo tuhun Nyoo. Tari cha lee cuví ndo chihin tuhun Nyoo, vatyí tari cha chaxin ca ndo cha nuu cha cachi ndo nyayu. ¹³Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo. ¹⁴Soco nyayu vaha cuví chi cha cuenda ñu chahnu chihin tuhun Nyoo: ñu cha cutuñi vaha iñi tuhun ra, nacotó ñu nya cha vaha ta nya cha ña vaha.

6 Yucuan chaha ma ndoo ri yo chihin cha xihna ri cutuhva yo tuhun ra Cristo, cuhun yo ityi nuu ca tacuhva cuvi yo ñáyivi chahnu chihin tuhun Nyoo. Ma ndoo ri yo chihin tuhun cha yaha cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuvi yo cha vaha, ta tuhun nachino iñi yo vatyí sacacú Nyoo chi yo. ²Ma ndoo yo chihin tuhun cha yaha sacuvi yo, tari cha condutya yo, tari cha tyisó yo ndaha yo siqui ñu chinó iñi chi Nyoo na nasoco ra chi ñu, tari tuhun cha cunandoto tandíhi ñáyivi cha yaha chihi, ta tari tuhun cha cucutuñi chi tandíhi ñáyivi nuu Nyoo ta yihí ñu cuhun ñu anyaya tyicuan ri maa. Ma ndoo ri yo chihin tandíhi cuan. ³Soco tatu Nyoo ta chaha ra, sacuvi yo ihya: cuhun yo ityi nuu ca.

⁴⁻⁶Vatyí ñu cha yaha naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihi ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhu ñayivi chaa. Tatu cha yaha naquehen cuenda ñu tandíhi cha vaha cuan noo chaha, ta yaha cuan ta sandíhi ñu cha chinó iñi ñu chi Nyoo, ma cuvi ca cha

ndu uvi iñi ñu inga chaha. Vatyí suri maa ñu tari cha tyaá ñu chi ra Cristo nu cruzi inga chaha, vatyí chahá ñu cha cuacu nyaa ñáyivi chi ra. ⁷ Añima ñáyivi cuví tari noo ñuhú nu sahá tyiño ñu, vatyí noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chi, cunasoco Nyoo chi ñuhú cuan. ⁸ Soco tatu cañá iñu ta cañá nyaha nuu chi, ñahri maa tuhun. Ta cusoco Nyoo chi ñuhú ña vaha cuan ta cucayu chi. Ta tyicuan caa tucu cucuví chi ñu cha sandihí cha chinó iñi chi Nyoo.

⁹ Yañi, vasi cahán ndi tyicuan caa, soco chitó vaha ndi vatyí nyoho sacuví ndo cha vaha, maa maa ri cha sacuví ñu cha cacú añima sacuví ndo, ta ña sacuví ndo tari ñu cuví tari ñuhú ña vaha cuan. ¹⁰ Vatyí Nyoo, ra vaha cuví ra, ta ma naa iñi ra cha sacuví ndo. Ta nyehé ra vatyí cuñí xaan ndo chi ñu yihí cuenda Nyoo, vatyí tyinyee ndo chi ñu, ta tyinyeé ca ndo chi ñu nya vityin. ¹¹ Cuñí ndi vatyí na cuní ca iñi ndo nyacua nya quichi Sutu Mañi yo, tyicuan caa ta cuñihi ndo tandihí cha nyatú ndo. ¹² Ña cuñí ndi cha cusuchan ndo, soco saha ndo cuenda chi ñu cha chinó vaha iñi chi Nyoo ta sacuví ndo tari sacuví ñu. Vatyí ñu chinó vaha iñi chi Nyoo chihin cha cama iñi ñu, ican ñu ñihí cha catyí Nyoo tyi cuhva ra chi yo.

¹³ Vatyí ta cha naha catyí Nyoo chi ra Abraham, vatyí cuhva ra noo cha cuhva ra chi ra. Ta Nyoo tyaá ra cuhva cha cuhva ra, ta noo ri tuhun cahán ra vatyí maa ra, Nyoo cuví ra. ¹⁴ Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chi ra Abraham. ¹⁵ Ta ra Abraham chihin cha cama iñi ra, nyatu ra tuhun cahán Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra.

¹⁶ Tatu noo ñáyivi cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri. ¹⁷ Ta yucuan chaha vatyí Nyoo minoo ri tuhun cahán ra, vatyí cuñí ra cha coto ñáyivi vatyí ndicha tuhun cahán ra, ta ña nasamá ra tuhun cahán ra. ¹⁸ Yucuan chaha iyó uvi tahan cha ma cuví nasama chi. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahán ra vatyí maa ra, Nyoo cuví ra. Ta Nyoo ña cahán ra cuendu. Yucuan chaha tandihí yo cha nyañaá yo chi ra, nii iñi yo cunyeé iñi yo chi ra, ta nyatú yo cha tyaá ra cuhva cha cuhva ra chi yo. ¹⁹ Tari noo barcu cha nuhñí noo caa vee, coto cuhun chi chihin tatyí, ta tyicuan caa quihí iñi yo cha sacacú ra Cristo añima yo. Ta cha quihí iñi yo chi ra, nuhñí yo chihin Nyoo ra nyaá inga chiyo cortina, o nya gloria cuví Cuan. ²⁰ Vatyí ra Jesús cha quihví ra yucuan ta nuña ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

Ra Jesús cuví tata sutu tari ra Melquisedec

7 Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quivi cha cuandichi ra Abraham cha chahán ra chicañi tahan ra chihin suhva ra cacuví rey, ta cuví chasaha ra chi ra, tyicuan ta quita ra Melquisedec ityi nuu ra ta nasoco ra chi ra. ² Ta ra Abraham uchi uchi tinyaa ra siquí cha saha ganaa ra nu chicañi tahan ra, ta chaha ra chi ra Melquisedec. Ta sivi ra Melquisedec cuan cuñí chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyivi.” ³ Ña catyí tuhun Nyoo yóo cha cuví sutu ra ta sihi ra, ni ña cahán chi tuhun yóo ñáyivi chi ra. Ni ri ña cahán chi tuhun ama cacu

ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴Soco, vityin nyehé ndo yoso cha cahnu cuví ra Melquisedec, vatyí ra Abraham tinyaa ra uchi uchi siquí cha saha ganaa ra chí ra cacuví rey cuan nu chicañi tahan ra, ta chaha ra chí ra Melquisedec. ⁵Tyehe ta tata ra Abraham cuví ra Melquisedec, ta cuví ra sutu, ma catyí yo tyí ra cahnu ca cuví ra. Vatyí nu cuahan ca chí ityí nuu ta suri maa ley Nyoo saniñi chí ñáyivi tata ra Abraham nacuhva ñu uchi uchi cha saha ganaa ñu chí ra cacuví sutu tata ra Leví, vasi tata ra Abraham cacuví chí ra tari maa ñu. ⁶Ta ra Melquisedec, ñima tata ra Leví cuví chí ra, ta ni ñima tata ra Abraham, soco vita ri tyí quehen ra uchi uchi siquí tandíhi cha ñihí ra Abraham. Ta nasoco ra Melquisedec chí ra Abraham, ra cha chaha Nyoo promesa chii. ⁷Ta chitó cachi yo vatyí cahnu ca cuví ra cha nasoco cuan, ta ñima ca ra cha nasoco ra chí. ⁸Nyehé yo vatyí cahnu ca ra cuví ra Melquisedec cha nuu inga ra caquehén cuenda uchi uchi siquí cha iyó chí ñáyivi, vatyí rayi ri cacuví ra cuan, ta tuhva chaa tuhun chihi chí ra. Soco tuhun ra Melquisedec cahán chí nu tutu Nyoo ta catyí chí tyí ñahri tuhun chihi iyó chí ra. ⁹Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chí caquehén cha uchi uchi siquí cha iyó chí ñáyivi. Soco tari quivi tyiyahví tucu ra Leví cuan uchi uchi cha saha ganaa ra chí ra Melquisedec cuví cuan, vatyí ra Abraham tyiyahví ra. ¹⁰Vatyí ra Leví, tata ra Abraham cucuvi chí ra, vasi ta cacu ca ra quivi chisatahan ra Melquisedec chí ra Abraham.

¹¹Ta ra cacuví tata ra Leví suri tata ra Aarón cacuví chí ra, ican ra cacuví sutu cuenda yo ñu Israel, ta cha cuenda ra cuan quichí ley chahnu Nyoo. Ta vi-

tyin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña ñiñi ca cha quichí ra Cristo ra cuví tata sutu tari ra Melquisedec, ta ñima tari ra Aarón. ¹²Vatyí tatu Nyoo ta nasama ra chí ra cuví sutu, cuñi tucu chí cha nasama ley ñandíhi. ¹³Ta Sutú Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chí ra. Ta ni noo ra vachi tata cuan ta ña tuhvá ra cuví sutu. ¹⁴Vatyí chitó vaha yo vatyí Sutú Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahán ra quivi cahán ra tuhun ra cacuví sutu.

¹⁵Ta yucuan nyehé vaha yo, vatyí Nyoo natyaa ra inga sutu tari ra Melquisedec. ¹⁶Ñima tari catyí ley quichí ra, vatyí ley catyí chí yóo chí tata cua quichi noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo chihin ra ta ñahri tuhun chihí nyisó ra. ¹⁷Vatyí ican ihya cuví cha cahán Nyoo tuhun ra: Yoho cuvún tata sutu tyicuan ri maa, Tari ra Melquisedec.

¹⁸Yucuan chaha sacuachiyo Nyoo ley chahnu cuan vatyí ña cuví maa tyinyee chí chí ñáyivi, ta ña chiñuhú. ¹⁹Vatyí ley cha chaha Nyoo chí ra Moisés, ña sanduvaha maa chí añaima yo. Ta vityin, tyiño nuu ley chahnu cuan, iyó inga tuhun vaha ca cha yihi iñi yo. Ta chihin ihya tuhvá yo chí Nyoo vatyí sanduvaha ra Cristo cuhva coo yo chihin Nyoo.

²⁰⁻²¹Nyoo tyaa ra cuhva ta tyanaha ra vatyí cuhva ra noo sutu cha cahnu ca chí yo. Soco sutu cha iyó vityin ña tyanaha Nyoo quivi tyiso ra chí ra. Vatyí nu tutu Nyoo catyí chí tyehe caa:

Sutu Mañi yo, iin ri tuhun cahan ra, ta ma nasama ra cuhva catyí ra tyehe caa:

“Yoho cuvún Sutú tyicuan ri maa, tari cuví ra Melquisedec”, catyí Nyoo.

²² Yucuan chaha ra Jesús chaha ra noo tuhun vaha ca chi yo, ta ñima ca tuhun cha xihna ri cuan. ²³ Vatyí cha cuaha xaan ra cacuví sutu, soco chaa chaa ri tuhun chihí chi ra. ²⁴ Soco ra Jesús ñahri tuhun chihí iyó chi ra, ta ña ndihi tuhun cha cuví ra sutu. ²⁵ Yucuan chaha tyicuan ri maa cuví sacacu ra añima ñu natuhvá chi Nyoo cha cuenda ra, vatyí iyó maa ra tyicuan ri maa, vatyí cacan tahvi ra chi Nyoo cha cuenda ñu.

²⁶ Yucuan chaha ra Jesús cuví sutu cha chiñuhú chi yo. Ta maa ra, ii ra, ñahri cha quiñi caa sacuví ra, ta ni ñahri cutatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andívi. ²⁷ Ñima tari inga ra cacuví tata sutu cuan, vatyí cuñi chi cha cacahni ra chi quití ta cuhva cuenda ra chi Nyoo ndi quivi. Ta cha xihna ri, na naa cutatyí maa ra, ta yaha cuan ta naa cuatyí ñáyivi. Soco ra Jesús noo ri chaha, chaha cuenda ra chi ra chi Nyoo na naa cuatyí tandihi yo. ²⁸ Ley Nyoo cha quehen cuenda ra Moisés, tyisó chi chi ra cacuví nuu chi tata sutu, soco ra iyó cutatyí cacuví ra. Soco yaha cuan ta chaha Nyoo noo tuhun chaa, ta iin ri tuhun cahán ra. Ta tyiso ra chi Sehe ra cha cuví ra Sutú cahnu ca, ta maa ra cuví ra noo ra vaha tyicuan ri maa.

**Natyihí tahan Nyoo tuhun
chaa chihin yo quivi chihí ra
Jesús cha cuenda yo**

8 Ta chichi cha tandihi cha cahín nu tutu ihya, ican ihya cuví cha niñi ca tuhun: Ra cuví tata sutu cahnu chi yo cuví ra noo ra vaha tyicuan ri maa, ta chicunyaá ra nu tyayu chichi gloria chiyo vaha Nyoo. ² Ta cuví ra Sutú noo nu cuví vehe ñuhu cha ndicha vaha nu nyaá Nyoo. Maa Sutú yo Nyoo savahá vehe cuan, ta ñima rayii. ³ Tandihí ra cacuví tata sutu tyiso Nyoo chi ra, vatyí cuhva cuenda ra ofrenda chi Nyoo

ta cahni ra quití na naa cuatyí ñáyivi chihin niñi ti. Ta yucuan chaha niñi cuñi chi cuhva cuenda tucu ra Jesucristo niñi ra chi Nyoo. ⁴ Tyehe ta siqui ñuhu ñayivi nyaá ra cuví ra sutu, ni ñima sutu cuví ra tatu tyicuan caa. Vatyí siqui ñuhu ñayivi, iyó ca ra cacuví sutu cha cachahá cuenda ofrenda chi Nyoo tari cuhva catyí ley cha tyaá ra Moisés. ⁵ Soco ra cacuví sutu siqui ñuhu ñayivi, sacuví ra tyiño nuu Nyoo soco tari cuhva cuví andívi. Cuví chi noo xiñahnu tyiño sahá ra Cristo. Ta chitó yo vatyí tyicuan caa, vatyí quivi cha cua savahá ra Moisés vehe ñuhu cuan ta cha naha, Nyoo catyí ra chi ra tyehe caa: “Saha vaha cuenda, ta savahun tari cuhva caá cha sañahi chuun quivi chinyaun nu yucu cuan”, catyí Nyoo chi ra. ⁶ Soco ra Cristo ra cuví sutu cahnu chi yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chi yo.

⁷ Vatyí tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha. ⁸ Soco Nyoo nyehe ra vatyí ña vaha maa sacuví ñáyivi cuan, ta cahán ra tuhun ñu nu tutu ra tyehe caa:

Cuchaa chi quivi vatyí cunatyihí tahin tuhun chaa chihin ñáyivi Israel ta ñu Judá, catyí Sutú Mañi yo.

⁹ Ñima tari natyihí tahin tuhun chihin ñáyivi chahnu ñu, quivi tñin ndaha ñu ta tave chi ñu ñuu Egipto.

Vatyí ña sacuví ñu tuhun cha natyihí tahin chihin ñu,

ta yucuan chaha sañe chi ñu, catyí Sutú yo Nyoo.

¹⁰ Tuhun cha cunatyihí tahin chihin ñu ñuu Israel nu cuahan ca chi, tyehe caa cucuvi, catyí Sutú Mañi yo:

Chichi cha chiñi tuñi xiñi ñu, cutyai ley mai, ta chichi añima ñu cutyai.

Tyicuan ta mai cucuvi Nyoo ñu, ta maa ñu cucuvi ñu ñáyivi chii.

¹¹ Tyicuan ta ña niñi ca cha sañahá ñu chi tahan ñu, ni chi yañi ñu, tacuhva vatyí cohon nuu ñu chi yuhu cha cuví Nyoo ñu.

Vatyí tandihi ñu, cucohon nuu ñu chii, nyacua nya ñu luhlu ca ta nyacua nya ñu chahnu ca.

¹² Ta casahi ticahnu iñi cha quiñi caa cha sacuví ñu.

Ta ma nicohon ca maa iñi cuatyí ñu, catyí Sutu Mañi yo.

¹³ Quiví cha cahán Nyoo tuhun cha natyihí chaa ra tuhun chihin yo, cuñí chi catyí vatyí cha sacuchahnu ra cha xihna ri cuan. Ta numi ri cundihi tuhun cha cuví cha chahnu cuan.

Nu sañahá chi yoso caa vehe ñuhu cha iyó siqui ñuhu ñayiví ta vehe ñuhu nu cuví andívi

9 Quiví natyihí tahan Nyoo tuhun cha xihna ri chihin ñáyivi, chahá ra cuhva chi ñu yoso caa sacahnu ñu chi ra, soco chichi noo vehe ñuhu cha nyaá siqui ñuhu ñayiví ihya. ² Tyehé caa chingo vehe ñuhu cuan: Chata noo cortina nyaá cuarto cha xihna ri nu tayucú cañileru, ta nanyaá mesa nu catuví pan ii. Ta chicunañi cuarto cuan Nu Ii. ³ Chata cortina cu uvi, yucuan cuví nu chicunañi Nu Ii Xaan Ca. ⁴ Ta yucuan nanyaá noo arta xuhun cuaan nu chahmí ra cutu. Ta nanyaá caja, cha natyihí tahan Nyoo tuhun chihin yo, ta iñi xuhun cuaan nicacahnu. Ta chichi cuan ñohó casitu xuhun cuaan cha ñohó maná. Ta ñohó yutun cha natyacú cha chindahá ra Aarón. Ta ñohó tucu yuu cha nyaá ndi uchi mandamientu. ⁵ Ta siqui caja cuan nyicú cha tari caa ángel, ta cuñí chi catyí vatyí nyaá Nyoo yucuan. Ta chihin ndichin ángel cuan cachasí ra nu cuví nu tuhva Nyoo sahá ra ticahnu iñi cuatyí

ñáyivi. Cha vityin ña cuví nacatyí ca ndi siqui tuhun ihya.

⁶ Ta tyicuan caa cuví vehe ñuhu cuan. Ta ndiquivi ri caquihví ra cacuví sutu chichi cuarto cha xihna ri nu nañí Nu Ii, tacuhva sacahnu ra chi Nyoo. ⁷ Soco cuarto cu uvi Nu Ii Xaan Ca cuan iyó maa minoo ra cuví nuu chi sutu, ta yucuan ra cuví quihví yucuan, noo chaha cha noo cuiya. Ta cuhva cha quihví ra, cuñí chi cuiso ra niñi quiti vatyí cuhva cuenda ra chi Nyoo cha cuenda cuatyí maa ra ta cuatyí ñáyivi. ⁸ Ta cha tyicuan caa sañahá Tatyí Ii Nyoo chi yo vatyí, ta cuví ca chaa yo nuu Nyoo vatyí ni nyaá ca cuarto cha xihna ri cuan. ⁹ Tandihí maa ihya cuví chi tari noo xiñahñu ri cha cuenda tuhun chaa cha chacun Nyoo vityin: vatyí noo cha chahá cuenda ñu chi Nyoo ña tyiñyeé chi chi ñu na caca vaha iñi ñu. ¹⁰ Vatyí tandihí cuhva sacuví ra cacuví sutu cuan cahán chi maa ri cuenda ñáá cha cuví cachi ñáyivi, ta ñáá cha cuví coho ñu, ta yoso caa cundundi coño ñuhu ri ñu. Ta catuví cuhva cuan, nyatu chi nya quivi cacun Nyoo inga cuhva vaha ca.

¹¹ Soco vityin cha yahá quichí ra Cristo ta maa ra cuví tata sutu cahnu cha cuenda tuhun vaha ca cha chacun Nyoo. Quihví ra chichi vehe ñuhu vaha ca, ta ndi ca, vatyí maa ra cuví sutu. Ta ñima rayi savahá vehe ñuhu cuan o cuñí chi catyí, ñima vehe ñuhu ñuhu ñayiví ihya cuví. ¹² Ra Cristo quihví ra vehe ñuhu nu cuví gloria Nu Ii Xaan Ca. Soco ñima ca cha cuhva cuenda ra niñi mbee luhlu, o becerro, soco niñi maa ra chahá cuenda ra. Ta tyicuan caa quihví ra noo ri chaha nu ndihi tuhun, ta tyicuan caa ta cuví sacacu ra chi yo tyicuan ri maa. ¹³ Niñi toro, ta niñi ndixihyu, ta ñiyaa becerro cha cachahmí ra nu arta, tuhva ra catyicú ra chata ñu ca iyó cuatyí, ta coño ñuhu ri ñu sandundi chi cuan nuu Nyoo. ¹⁴ Ta tatu tyicuan caa, ¡Ñana cha cahnu ca tunyee iñi iyó chi niñi ra Cristo! Vatyí

tyinyeē Tatyi li chi ra ta chaha cuenda ra chi ra chi Nyoo chihin cha ñahri cuatyí ra. Ta niñi ra sandachí chi cha ña vaha cha caá ñanima yo tacuhva ma cuita ca iñi yo ley cha chaha tuhun chihi chi yo, ta tyicuan caa ta cuví sacuvi yo tyiño nuu ra cuví Nyoo nyitó.

¹⁵ Yucuan chaha ra Jesucristo cuví ra cha cahán chaha yo cha cuenda tuhun chaa cha natyihí tahan Nyoo chihin yo. Ta cha cuenda cha chihí ra, iyó ticahnu iñi cuatyí cha sacuvi yo quívi chinyaca ñaha tuhun cha xihna ri cuan chi yo. Ta yoó, ñu nacana Nyoo chi cuví yo, cuví naquehen cuenda yo noo cha ma ndihi ca maa, cha catyi maa ra tyi cuhva ra chi yo. ¹⁶ Vatyí tatu iyó noo tutu cha sandoq noo ra chihi, ta catyi tutu cuan ñáá ndihi cha cuñihi ñáyivi chi ra tatu chihi ra; cuñí chi cha coto vaha ra cuví tyiño tatu ndicha cha chihí ra cha sandoq tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan. ¹⁷ Vatyí cha ñiri ca cha iyó ra cha sandoq tutu cuan, ma cuví cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuví quehen cuenda ñu. ¹⁸ Yucuan chaha chihí quití ta chatí niñi ti quívi natyihí tahan Nyoo tuhun cha xihna ri cuan chihin yo. ¹⁹ Quívi cuan, ra Moisés sacoto ra tandihí ley Nyoo chi tandihí ñáyivi. Yaha cuan ta quehen ra noo sahna cuaha cha chinó chihin xixi mbee ta chihin noo soco yutun cha nañí hisopo, satyijí ra nu niñi becerro ta nu niñi ndixihyu luhlu, nasaca ra chihin ndutya, ta tyicu ra chata libru ley Nyoo ta chata tandihí ñáyivi ñandihí. ²⁰ Tyicuan ta quichaha catyi ra chi ñu: “Ican ihya cuví niñi cha cuví cha ndaa vatyí natyihí tahan Nyoo tuhun chihin ndo”, catyi ra. ²¹ Ta suri tyicu tucu ra Moisés niñi nu cuví vehe ñuhu cuan, ta siqui tandihí cha cachotyíño ra yucuan nu casacahnú ra chi Nyoo. ²² Tyicuan

caa sacuvi ra vatyí catyi ley Nyoo tyi tandihí ta chihin niñi, cuñí chi ndundi nuu Nyoo. Ta catyi tucu chi vatyí ma saha Nyoo ticahnu iñi cuatyí tatu ma cati niñi.

Niñi ra Cristo, ican cuan tinyaa cuatyí yo

²³ Ta yucuan chaha cuñi chi cha sacuvi tata sutu tyicuan caa, vatyí ndundi tandihí cuan, vatyí cuví chi noo xiñahñu cha iyó ityi andivi. Soco tandihí cha cuenda ityi andivi, cuñí chi noo niñi vaha ca cha cuhva cuenda yo, ta ñima ca tari niñi quití cuan. Cuñí chi niñi ra Cristo. ²⁴ Vatyí ra Cristo ña quihvi ra chichi noo vehe ñuhu cha savaha ñáyivi cha cuví xiñahñu ri. Soco quihvi ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo. ²⁵ Ra cuví nuu chi sutu cuenda ñu Israel quihvi ra Nu li Xaan Ca cuan tahan cuiya vatyí cuhva cuenda ra niñi cha ñima niñi ra cuví. Soco ra Cristo, ña cuaha chaha cuñí chi cuhva cuenda ra chi ra. ²⁶ Vatyí tyehe ta tyicuan caa, cuaha chaha cuñí chi cha nyehe ra tindoho ta cúvi ra nyata chinó ñuhu ñáyivi ta nya vityin. Soco vityin cha cua cuyatyin cundihi tuhun ñáyivi, noo ri chaha quichi ra Cristo, ta chaha cuenda ra chi maa ra tacuhva vatyí cuví tinyaa ra cuatyí yo. ²⁷ Noo ri chaha, cúvi yo ta yaha cuan ta cucutuñi chi yo. ²⁸ Ta tyicuan caa tucu ra Cristo, noo ri chaha, chaha cuenda ra chi ra tacuhva tinyaa ra cuatyí cuaha xaan ñáyivi. Yaha cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10 Vatyí ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyí ley cuan, ma cuví maa sanduvaha chi chi ñu nanducú chi Nyoo. Vatyí

tahan cuiya ri chahá cuenda ra cuví nuu chi tata sutu cuenda ley chahnu niñi quití. Soco ma cuví cacu añima yo chihin cuan. ² Vatyí tyehe ta cuví sanduvaha ley cuan chi ñu, cundihi tuhun cha chahá cuenda ra niñi ndicuiya ri. Vatyí tatu cha ndundiñi ñu noo chaha cha cuenda tandihi maa, ma caca ca xiñi ñu vatyí iyó cuatyí ñu ta ña chiñuhú ca cha cuhva cuenda ra inga chaha. ³ Soco tahan cuiya ri chahá cuenda ra niñi, ta ican cuan sanicohón chi iñi ñu vatyí iyó cuatyí ñu. ⁴ Vatyí niñi toro ta niñi ndixihyu, ma cuví maa tinyaa chi cuatyí yo.

⁵ Yucuan chaha ra Cristo, quivi cuaquichi ra siqui ñuhu ñáyivi ihya, catyí ra chi Nyoo tyehe caa: Ña cuñún cha cahñi ñáyivi quití ta cuhva cuenda ñu chuun, yucuan chaha savahun noo coño ñuhu chii.

(Vatyí tyicuan caa ta cuví cuhva cuende chii chuun.)

⁶ Ta vatyí ña tahán iñun cha cahmi ñu quití ta cuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyí sacuvi cuhva cuñún, Nyoo Suti, tari cuhva cahán chi tuhun nu libru ley maun”, catyí ra Jesucristo.

⁸ Cha xihna ri, catyí ra Jesucristo vatyí Nyoo, ña cuñí ra cha cuhva cuenda ñu chi quití chi ra. Ni cha cahmi ñu quití cha cuenda cha tinyaa cuatyí ñu, ña cuñí Nyoo, catyí ra. Vasi maa ri tuhun cha catyí ley chahnu vatyí sacuví yo cuví, soco ña tahán iñi Nyoo, catyí ra. ⁹ Ta yahá cuan ta catyí tucu ra: “Ma yuhu vachi ihya, vatyí sacuvi cuhva cuñún, Nyoo Suti.” O cuñí chi catyí, sacuachiyó Nyoo cuhva chahnu cuan, ta nacuvi chi inga cuhva chaa ihya. ¹⁰ Nyoo sandundiñi ra chi yo vatyí ra Jesucristo sacuví ra cuhva cuñí Sutu ra, ta chahá cuenda ra coño ñuhu ra. Noo ri chaha chihí ra ta ndihí tyiño sahá ra.

¹¹ Tandihí ra cacuví tata sutu ñuu Israel, ndí quivi sacuví ra tyiño nuu Nyoo, ta tyicuan ri chahá cuenda ra suri maa cha tuhvá maa ra chahá cuenda chi Nyoo, vasi ña cuví tinyaa chi cuatyí yo.

¹² Soco ra Jesucristo, noo ri chaha chahá cuenda ra chi ra chi Nyoo cha cuenda cuatyí yo. Tyicuan ta chicunyaá ra tyayu gloria chiyo ndaha vaha Nyoo. ¹³ Ta yucuan nyatú ra nyacua nya cacun Nyoo chi ra xaan iñi chi ra chaha ra. ¹⁴ Vatyí chihin noo ri chaha cha chihí ra Cristo ta cuví sanduvaha ra añima ñáyivi cuenda Nyoo, tyicuan ri maa. ¹⁵ Ta suri tyicuan caa catyí tucu Tatyí Ii Nyoo chi yo. Vatyí cha xihna ri catyí ra chi yo nu tutu tuhun Nyoo tyehe caa:

¹⁶ Tuhun cha cunatyihí tahin chihin ñu quivi cuan, tyehe caa cucuvi, catyí Sutu Mañi yo:

Cutyai ley mai chichi añima ñu, ta cutyai chichi cha chiñi tuñi xiñi ñu, catyí Nyoo.

¹⁷ Ta yahá cuan ta catyí tucu ra:

Ma nicohon ca maa iñi cuatyí ñu, niri cha quiñi caa cha chinyacuví ñu, catyí Sutu Mañi yo.

¹⁸ Ta cha yahá sahá Nyoo ticahnu iñi cuatyí, ña cuñí ca chi cha cahñi ñáyivi chi quití, ta cuhva cuenda ñu chi Nyoo cha cuenda cuatyí ñu.

Cuñí chi nanducu yo chi Nyoo

¹⁹ Yucuan chaha yañi, cuví quihvi maa yo Nu Ii Xaan Ca cuan nu nyaá Nyoo, cha cuenda vatyí cha chatí niñi ra Jesucristo ta tinyaa ra cuatyí yo. ²⁰ Cha nuñá ra Cristo noo ityi chaa, ityi cuhun yo nu conyito añima yo. Vatyí maa maa cuhva cha chihí ra ta ndatá cortina cha chasí nu chinyaá Nyoo. Cha tahnya cortina, ican cuví cha chihí ra, tacuhva nuña ityi quihvi yo ta chaa yo nu nyaá Nyoo. ²¹ Ra Jesús cuví sutu cha nyacá ñaha nu cuví vehe Nyoo andivi. ²² Yucuan chaha cuñí chi nanducu yo chi Nyoo chihin noo cha

ndicha ta chihin cha nîi îni yo chinó îni yo chi ra, vatyî maa ra sandundiî ra ânîma yo, tacuhva ma quihî ca îni yo vatyî iyó cuatyî yo, vatyî tari cha nacatya ra coño ñuhu yo chihin ndutya cuii, na ndu ndîi yo nu Nyoo. ²³ Na cunîi ca îni yo chino îni yo chi Nyoo ta ma ndu uvi îni yo vatyî Nyoo cuhva ra cha catyî ra vatyî cuhva ra chi yo. ²⁴ Ta cuñî chi nanducu yo cuhva tyinyee yo chi tahan yo, na cuñî ca ñu chi tahan ñu ta sacuvi ca ñu cha vaha. ²⁵ Ña tahán chi quehen yo cuhva caá ñu cha sandihî cha quichi nu ndu îin ri yo, soco cuñî chi cha sandunîi yo îni noo noo tahan yo. Ta yaha ca cuhva cuñî chi tyinyee yo chi tahan yo vityin cha nyehé yo vatyî Sutu Mañî yo cha cuñî chaa quivi quichi ra ta cucutuñî chi tandihî ñáyivi.

²⁶ Vatyî tatu cha yahá chicohon nuu yo cha ndicha, ta ña quichahá yo ta tyicuan ri sacuvî ca yo cuatyî, ñahri ca cuhva coo ticahnu îni cuatyî yo. ²⁷ Ta cutachi tuñî Nyoo chi yo. Ta cutyihî ra chi yo nu cucayu ñáyivi cha xaan îni chi ra, ta cundihî tuhun ñu. ²⁸ Tatu noo ñáyivi Israel ña quichahá ñu cuhva catyî ley ra Moisés, ta chiyo uvi o uñî testigu, cúvi ñu cuan cha cuenda cuatyî ñu, ta yori cundahvi cuñî nyehe chi ñu. ²⁹ Ta nyaca cuvî ñu cha ña quichaha ca chi Sehe Nyoo ta sahá ñu tyi niñî ra cha sanduvahá ânîma ñu cha ñîma ri tuhun cuvî. Ta chihin niñî cuan natyihî tahan Nyoo tuhun chihin yo. Soco cahán ña vaha ñu siqui Tatyî li Nyoo cha chahá tumañî îni chi yo. Yaha ca cuhva cutachi tuñî Nyoo chi ñu cuan. ³⁰ Vatyî chitó yo vatyî Sutu Mañî yo, ican ra catyî ra tyehe caa: “Yuhu tahán chi tachi tuñî chi ñáyivi, yuhu catyî cha cuvi chi ñu.” Ta catyî tucu ra vatyî cutuñî chi ñu nuu ra. ³¹ Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñî ra chi yo cha cuenda cuatyî yo.

³² Soco ma naa îni ndo quivi natîin cuenda ndo cha ndichin Nyoo chichi ânîma ndo, vatyî quivi cuan cunyeey xaan îni ndo cha nyehe ndo tindoho cha cuenda ra. ³³ Yihî nyoho cahan ñáyivi chi ndo, ta sanyehe ñu tindoho chi ndo nu tuvi. Ta yihî nyoho uhvi xaan cuvî chi ndo cha nyehe ndo cha cuvî chi tahan ndo cha tyicuan caa, ta cunyeey xaan ndo. ³⁴ Ta cundahvi îni ndo chi ñu ñohó vehe caa, ta chihin cha sii cuñî ndo cunyeey ndo quivi tinyaa ñu cha iyó chi ndo, vatyî chitó ndo vatyî andivi iyó ca cha vaha ca cha cuenda ndo, ta ña ndihî maa cuan. ³⁵ Yucuan chaha ma sandihî ndo cha quihî îni ndo chi ra Cristo, vatyî nu cuahan ca chi ta cuñihî ndo cha vaha ca vatyî chinó îni ndo. ³⁶ Cuñî chi cha coo cha cama îni ndo tacuhva cuvî sacuvi ndo cuhva cuñî Nyoo, ta tyicuan caa ta naquehen ndo cha catyî ra tyi cuhva ra. ³⁷ Vatyî nu tutu Nyoo catyî chi tyehe caa: Ña naha ca ta cuquichi ra cha tahán chi quichi, ta ma cucuee ca ra. ³⁸ Ta catyî Sutu Mañî yo tyehe caa: “Ñu cha sanduvahî ânîma, chihin cha chinó ri îni ñu chi yuhu, ta conyito ânîma ñu. Soco tatu cunuhu chata ñu, ma cusii cuñî yuhu chihin ñu”, catyî Nyoo. ³⁹ Soco maa yo ña sacuvî yo tari sacuvî ñu cuanaá ânîma, vatyî ñu chinó îni chi Nyoo cuvî yo, ta tyicuan caa cucacu ânîma yo.

Cuhva cuñî chi cha chinó îni yo chi Nyoo

11 Cha chinó îni yo chi Nyoo ican cuvî cha chitó vaha yo tyi cuñihî yo cha nyatú yo, ta chitó vaha yo vatyî noo cha ndicha vaha cha ña nyehé yo vityin, cuñihî yo vatyî chinó îni yo chi Nyoo. ² Ñáyivi chiyo ta cha naha, chingo îni ñu chi Nyoo, ta yucuan chaha quita vaha ñu nuu ra.

³Cha cuenda cha chinó iñi yo chi Nyoo, ta chitó yo vatyí savaha ra ñuhu ñáyivi chihin tuhun cahán ra. Ta chító yo vatyí tandihi cha nyehé yo vityin, chino chi ta cha naha chihin cha ña tuhva yo nyehé.

⁴Cha cuenda cha chino iñi ra Abel chi Nyoo, ta chaha cuenda ra noo cha chaha ra chi Nyoo. Ta vaha ca cha chaha ra ta ñima ca cha chaha ra Caín, yañi ra. Ta yucuan chaha natiñ cuenda Nyoo chi ra tari noo ra vaha, ta natiñ cuenda ra cha chaha ra. Yucuan chaha vasi cha chihí ra Abel, soco tari quivi cahán ca ra tuhun chihin yo vityin, yoso caa tahán chi chino iñi yo chi Nyoo.

⁵Cha cuenda cha chino xaan iñi ra Enoc chi Nyoo, ta cuanuhu ra chihin Nyoo chihin cha ña chihí ra. Ta ña nañihí ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra.

⁶Soco ma cuvi sacuvi yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyí cucuhva ra cha vaha chi ñu nanducú chi ra.

⁷Cha cuenda cha chino iñi ra Noé chi Nyoo, ta quichaha ra tuhun cahan Nyoo, cha catyí Nyoo chi ra noo cha cucuvi ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savaha ra barcu cuan ta sacacu ra chi ñáyivi chi ra. Ta cha cuenda cha chino iñi ra chi Nyoo, sandoo ra cuatyí ñu siqui ñu cha ña quichahá chi Nyoo, na tachi tuñi ra chi ñu. Ta cha cuenda cha chino iñi ra Noé chi Nyoo cuvaha ra nuu ra.

⁸Ta cha cuenda cha chino iñi ra Abraham chi Nyoo, ta quichaha ra chi ra quivi cana ra chi ra. Yucuan chaha quita ra ñuu ra ta cuahan ra nu cucuhva Nyoo ñuhú cha cundoo chi ra. Quita ra ñuu

ra chihin cha ña chitó ra nya cuahan ra. ⁹Cha cuenda cha chinó iñi ra Abraham, yucuan chaha chiyo ra nu ñuhú cha ta cuhva ca Nyoo chi ra. Chiyo ra noo vehe sahma ri, ta suri tyicuan caa tucu ra Isaac, sehe ra, ta ra Jacob, sehe ñañi ra. Vatyí suri catyí tucu Nyoo chi ninduvi ra cuan tyi cucuhva ra ñuhú cuan chi ra. ¹⁰Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savaha ra, ta chicha cimientu tyihi ra chaha.

¹¹Ta suri chino iñi tucu cu Sara cha catyí Nyoo chi ña cha cucoo sehe ña. Ta vasi cha chahnu xaan ña, soco chaha Nyoo fuerza ra chi ña, ta chicoo sehe ña. Tyicuan caa cuví vatyí chino iñi cu Sara cha catyí Nyoo chi ña. ¹²Yucuan chaha vasi cha nyaña quivi cha cúvi ra Abraham, soco chicoo sehe ra. Ta yaha cuan cuaha xaan ñáyivi cacu cha cuví ñu tata ra. Tari cha cuaha tiño andivi, ta tari cha cuaha niyiti yuhu tyañuhu, vatyí ña cuví nacahvi yo.

¹³Tandihí ñu cuan cachihí ñu cha ni cumañi ca naquehen cuenda ñu cha catyí Nyoo tyi cuhva ra chi ñu. Soco vasi ta naquehen cuenda ca ñu ta chihí ñu soco nyehe cachi vaha ñu chihin cha chinó iñi ñu. Ta si xaan cuñí ñu. Ta chihin cuan cutuñí iñi ñu ta cahán ñu tuhun vatyí noo ñu yahá ri siqui ñuhu ñáyivi ihya cuví ñu. ¹⁴Vatyí ñu cacahán tyehe caa, cuñí chi catyí vatyí ni nanducú ñu noo nu coo ñu. ¹⁵Tyehe ta chicá ca xiñi ñu ñuu nu quita ñu, totypehe cuví cunuhu ñu nyicuan. ¹⁶Soco vatyí cuñí ñu noo ñuu vaha ca, o cuñí chi catyí nya gloria, yucuan chaha Nyoo ña cucahan nuu ra cha cuví ra Nyoo ñu. Vatyí cumí ra noo ñuu nu cuví coo ñu.

¹⁷Ta cha cuenda cha chino iñi ra Abraham chi Nyoo, yucuan cuenda quichaha ra nu cahan Nyoo ta tyaa ra cuhva cha cahñi ra chi sehe mañi ra ra Isaac, quivi

nducu nyehe Nyoo chi ra tu ndicha cha chinó iñi ra, vasi suri maa Nyoo catyí ra ¹⁸vatyi cuaha xaan ñáyivi cucuvi tata ra chihin ra Isaac cuan. ¹⁹Soco ña yuhvi ra Abraham cuacuhva cuenda ra sehe ra chi Nyoo, vatyi chitó ra vatyi Nyoo, iyó tunyee iñi chi ra nyacua nya cha sanandotó ra ndiyi. Ta tari quivi sanandotó Nyoo chi sehe ra, vatyi cha nyaá cha cua cahñi ra chi ra, ta nacuhva Nyoo chi sehe ra chi ra inga chaha.

²⁰Ta ra Isaac chinó tucu iñi ra chi Nyoo. Ta yucuan chaha catyí ra vatyi sehe ra, ra Jacob ta ra Esaú, cuñihi ra cha vaha nu cuahan ca chi. ²¹Ta ra Jacob chinó iñi ra chi Nyoo, cuhva cha cua cúvi ra. Ta catyí ra vatyi tahan tahan sehe ñañi ra, sehe ra José, cuñihi ra cha vaha. Ta sacahnú ra chi Nyoo nu nanyaá ra chihin yutun cha tuví ra. ²²Ta ra José ñandihí, chinó iñi ra chi Nyoo, ta catyí ra, cuhva cha cua cúvi ra, vatyi ñu Israel, ñáyivi chi ra, cu quita coyo ñu ñuu Egipto cuan nu cuahan ca chi. Ta sandoq ra tyiño chi ñu, vatyi na naquehen ñu yiqui ra quivi quita ñu ñuu cuan.

²³Cha cuenda cha chinó iñi sutu ra Moisés ta sihi ra chi Nyoo, yucuan chaha quivi cacú ra, nyehe ñu tyi noo cha lee tyaquí xaan cuví ra. Ta yihí iñi ñu cha cusacacu Nyoo chi ra ta ma cúvi ra, vasi catyí rey cuan vatyi cúvi ndii ra cuatyaa. Ta ña yuhvi ñu ta tixehe ñu chi cue uñi yoo. ²⁴Ta ra Moisés tucu, chinó iñi ra chi Nyoo. Ta quivi cha chahnú ra, ña cuñi ca ra cha cuvi sihi ra chi ñaha sehe rey ñuu Egipto cuan. ²⁵Ta ni ña cuñi ra ndoo ra ñuu Egipto cuan vatyi cusí iñi ra o cunyacuvi ra cha quiñi caa. Vatyi chitó ra tyi tuhun iñi yaha ri cuví cuan. Soco vaha taxin ca cuñi ra nyehe ra tindoho chihin ñáyivi cuenda Nyoo. ²⁶Ra Moisés, vaha ca cuñi ra cha nyehe ra ticahan nuu cuenda ra Cristo vatyi cahnu ca cha tyayii cuví cuan chi maa ra ta ñima ca tandihí cha tyayii cha iyó ñuu

Egipto. Vatyi chitó ra tyi cua cuhva Nyoo cha vaha chi ra. ²⁷Ta cha cuenda cha chinó iñi ra Moisés chi Nyoo, ta quita ra ñuu Egipto, ta ña yuhvi ra cha cuxaán rey cuan. Ta sanyee xaan ra iñi ra. Tari cha vatyi nyehe ra chi Nyoo cha ña nyehe yo.

²⁸Cha cuenda cha chinó iñi ra Moisés chi Nyoo ta sanducahnú ra vico cha cahñi ñu noo mbee luhlu, ta tachí ra nacahyu ñu niñi ti yuvehe ñu, tacuhva vatyi ma cahñi ángel Nyoo chi ni noo sehe nuu ñu Israel. ²⁹Ta cha cuenda cha chinó iñi ñu Israel chi Nyoo ta yahá sava ñu Tyañuhu Cuaha, tari cha yahá ñu noo ñuhú ityi. Ta cuhva cha cacuñi tucu ra Egipto cayaha ra, ña cuvi yaha ra vatyi nacasi Nyoo tyañuhu cuan siqui ra ta cachihí ra chichi ndutya cuan.

³⁰Ta cha cuenda cha chinó iñi ñu Israel chi Nyoo, ta chico ñu ucha tahan chaha chata ñuu Jericó, ta tandihí cuii maa nu sama chata ñuu cuan canacoyo. ³¹Ta cha cuenda cha chinó iñi cu Rahab, ñaha cata iñi cuan, chi Nyoo, ta ña chihí ña iñi ri chihin ñu ñuu ña, ñu ña quichahá chi Nyoo, vatyi maa ña, tyinyee vaha ña chi ra Israel, ra chahan coyo chinyehe tatu cuví chasaha ra tinyaa ra ñuu ña chi ra nyacá ñaha ñuu cuan.

³²¿Ñáá ca cha cuví catyi vityin? Cuaha xaan cuhva cucuñi chi chii tatu cahín tuhun ra Gedeón, ra Barac, tuhun ra Sansón, ra Jefté, ta tuhun ra David, ta ra Samuel ta tuhun ra cacuvi profeta Nyoo ta cha naha. ³³Cha cuenda cha cachino iñi ra chi Nyoo, ta yihí ra sahá ganaa ra chi inga ñuu nahnu. Ta yihí ra vaha xaan chinyaca ñaha ra ñáyivi cuenda Nyoo. Yihí ra ñihí ra cha catyi Nyoo tyi cuhva ra chi ra. Yihí ra chasi ra yuhu ndicaha. ³⁴Yihí ra ña cayu ra chihin ñuhú chichi horno nu catyihí ra chi ra. Yihí ra cacú ra cha cahñi ñáyivi chi ra chihin mityi. Yihí ra cha ñahri fuerza chi ra, soco candunyeē ra, ta chiyo xaan

fuerza chi ra chichi cuatyí cuan, ta cuví chasaha ra chi sindaro cuenda ñu xaan iñi chi ra. ³⁵ Ta chicoo suhva ñusihi, nandoto ñáyivi chi ñu.

Ta inga ñáyivi chihí ñu chihin cha cuaha xaan tindoho sanyehé ñáyivi chi ñu, soco ña sandoo ñu chi Nyoo vasi chihí ñu cha catyí ra, vatyí chitó ñu, vatyí tatu ma sandíhi ñu cha chinó iñi ñu chi Nyoo, cunandoto ñu ta cucoo ñu noo ñáyivi vaha xaan ca. ³⁶ Ta inga ñu nyehe ñu tindoho cha cahán nyaa ñáyivi chi ñu ta cañí ñu chi ñu. Ta inga ñu chinuhñí ñu chihin cadena ta cuahan ñu vehe caa. ³⁷ Yihí ñu chihin yuu chahñí ñáyivi chi ñu. Yihí ñu chahnyá ra chihin cierra chi ñu. Yihí ñu nducu nyehe ñáyivi chi ñu. Yihí ñu chihí ñu cha chahñí ñáyivi chi ñu chihin mityí. Yihí ñu chicá noo ñu ta ñahri sahma ñu. Chihin ñii mbeerí ta ñii ndixihyu ñihnoo ñu. Ndahví xaan ñu. Ta cuihya xaan cuñí ñu. Ta sanyehé ñáyivi cha ña ñohó nuu Nyoo tindoho chi ñu. ³⁸ Ta ñáyivi ña ñohó nuu Nyoo ña nañá ñu cha cu iin ri ñu chihin ñáyivi ndahví cuan vatyí vaha ñu nuu Nyoo. Chicá noo ndahví ñu ityí chiquí ndii, ityí yucu. Chiyó ñu chichi yavi yuu ta yavi ñuhú. ³⁹ Tandíhi maa ñu vasi cahan vaha Nyoo síqui ñu cha cuenda cha chinó iñi ñu chi ra, soco ña ñihí ñu cha catyí Nyoo cha cuhva ra chí ñu. ⁴⁰ Vatyí natyaa ra cuhva, cha cuhva ra nonga cha vaha ca chí ñu vatyí natyihí ra cuenda chí yo ta iin ri cutahan chí chí yo chihin ñu cuan.

**iin ri chi ra Jesús
tahán chi cuita iñi yo**

12 Tandíhi ñáyivi cuan quita vaha ñu vatyí chinqo iñi ñu chi Nyoo. Ta vityin chihin cuan sanduní ñu iñi yo ta nyatú ñu nyehe ñu tatu quita vaha yo. Yucuan chaha cuñí chí cha sacuachiyo xiin yo tandíhi cha sayangá chí yo, tandíhi cuatyí cha nyicón chí yo. Ta chihin cha cama iñi yo ta cuhun yo

ityí nuu ca chihin Nyoo. ² Iin ri chí ra Jesús quihí nuu yo, vatyí maa ra chaha ra cha chinó xaan iñi yo chí Nyoo, ta chaha ra tandíhi cuhva tahán chí chino iñi yo. Ta cha ni cumañi ca cúvi ra, chitó ra vatyí sii xaan cucuvi chí ra cha yaha cúvi ra. Yucuan chaha, chaha ra cha cahñi ñáyivi chí ra. Ña quichaha ra ticahan nuu cha cúvi ra tari chíhi noo ra iyó cuatyí, ta vityin nyaá ra chíyo vaha Nyoo gloria.

³ Saha ndo cuenda cuhva chíyo ra Jesús, vatyí nyehe xaan ra tindoho saha ñu iyó cuatyí. Yucuan chaha ma cutatu ndo, ta ma ndu uvi iñi ndo cha nyicón ndo chí ra. ⁴ Vatyí nyoho ta chaa ca ndo nyehe ndo tindoho cha cuenda cha cañí tahan ndo chihin cha quiñi caa, tari nyehe ra Cristo tindoho ta chíhi ra. ⁵ ¿Atu cha naa iñi ndo tuhun chaha Nyoo chí ndo tari cha sehe ra chí ndo? Catyí ra tyehe caa nu tutu ra:

Sehe luhli, ma cuxaun tatu saquehen ityí chuun.

Ma nducuihya iñun tatu cahín chuun.

⁶ Vatyí ra saquehén ityí yuhu chí, chaha cha cuñí chí ra, vatyí sehi cuví chí ra, catyí Nyoo.

⁷ Cunyee ndo ta cutuhva ndo tatu saquehen ityí ra chí ndo, vatyí Nyoo, sehe vaha ra saha ra chí ndo. Vatyí tandíhi ra iyó sehe, saquehén ityí ra chí sehe ra.

⁸ Vatyí tatu ña saquehén ityí Nyoo chí ndo, ñima sehe vaha ra cuví chí ndo, soco tatu saquehén ityí ra chí ndo, sehe vaha ra cuví chí ndo. ⁹ Ta siin ri, ta nyihi yo, sutu yo ihya ñáyivi saquehen ityí ra chí yo, ta saha yo ñáyivi chí ra. Ta nyaca cuví Nyoo, tahán tucu chí saha yo ñáyivi chí Sutu yo Nyoo, tyicuan ta coo añima yo tyicuan ri maa. ¹⁰ Sutu yo cuenda coño ñuhu yo, saquehen ityí ra chí yo suhva ri quívi, yoso cuhva cha cuñi chí. Soco Nyoo saquehén ityí ra chí yo cha cuenda noo cha vaha ca chí yo, vatyí sa ii ra chí yo tari maa ra, cha ii

ra. ¹¹ Ndicha vatyí ña tahán iñi yo cha ndohó yo vatyí uhvi chi yo. Soco chihin cha ndoho yo, cutuhva yo coo yo noo ñayiví vaha.

**Yica xaan tatu ma quichaha
yo cha catyí Nyoo chi yo**

¹² Yucuan chaha sandunyeer ndo iñi ndo, ta ma quihí iñi ndo cha ma cuví cunyicon ndo chi ra Cristo. ¹³ Ta ñanducu ndo cuhva coo vaha ndo chihin Nyoo, ñanducu ndo cuhva caca ndoo ndo chihin ra. Tyicuan ta maa ra cuhva ra fuerza chi ndo ta nduvaha ndo nuu Nyoo ta ma cucuihya ca cuñí ndo.

¹⁴ Saniñi ndo coo vaha ndo chihin tandihí ñáyiví. Ta coo ndo noo ñáyiví cachi. Vatyí tatu ña cachi iyó yo, chihin Sutu Mañi yo Nyoo, ma nyehe yo chi ra. ¹⁵ Saha ndo cuenda chi ndo coto yihí ndo, ma ñihí ndo tumañi iñi cha iyó chi ra. Ta saha ndo cuenda chi ndo, coto cuví ndo tari noo yutun cha chahá chití uva, ta coto quehen ñáyiví cha caá ndo ta tiví ñu nuu Nyoo. ¹⁶ Ta ni noo ndo ta maa coo ndo chihin ñáyiví tatu ñima ñasihí ndo o yíi ndo cuví. Ni ma cuñí ndo vatyí tuhun Nyoo noo cha ñima ri tuhun cuví, vatyí tyicuan caa sacuví ra Esaú, vatyí chihin noo nyayu ri, xico ra tandihí cha tahán chí chí ra cha cuví ra sehe nuu sutu ra. ¹⁷ Ta chitó ndo vatyí cha yaha cuan ta cuñí ra Esaú cha nasoco sutu ra chí ra, soco ña cuví ca. Ta vasi chacu vavaha ra, soco ña ñihí ca ra cuhva nasama ra cuhva cha chinyacuví ra.

¹⁸ Ta maa ndo chaa ndo nuu nyaá Nyoo soco ñima tari chaa ñu Israel cuan quiví chahan ñu noo yucu nu cuví yucu Sinaí. Ta yucuan nyehe ñu cayu ñuhu, ta nduñaa iñi, ta ñihí xaan tatyí. ¹⁹ Ta chiñí ñu nativí cutu cuihya ta cahan Nyoo chihin ñu. Ta ñu cha chiñí tuhun cahan ra, chacu ndahvi ñu tacuhva ma cahan ca ra chihin ñu, vatyí yuhvi xaan ñu ²⁰ cha

cuenda vatyí ña cunyeer iñi ñu tuhun cha chaha ra chí ñu. Vatyí catyí ra tyehe caa: “Tatu quihvi noo ñáyiví, cahñi ndo chí ñu chihin yuu o chihin lanza, cuví ri ñu ñáyiví o quití”, catyí Nyoo chí ñu. ²¹ Yuhvi xaan ñu cha nyehe ñu yucuan, vatyí nyacua nya ra Moisés ta catyí ra: “Ñihí xain chihin cha yuhvi”, catyí ra.

²² Soco yoó ña nyehe yo cha yuhvi cuan vatyí noo yucu cha nañí Sión nu cuví ñuu Nyoo nyitó chaa yo. O cuñi chí catyí ñuu Jerusalén cha nyaá andiví, nu nyicú cuaha mil ángel. ²³ Candú iin ri yo vatyí sacahnu yo chí Nyoo vatyí ndú iin ri tandihí ñu cha cuví sehe Nyoo cha nyicú sivi nu tutu nya andiví. Ta chaa yo nuu Nyoo cha cuví juee chí tandihí ñáyiví. Iin ri nyicú yo chihin ñima ñu vaha cha sanduvaha maa Nyoo. ²⁴ Ta natuhva ndo chí ra Jesús ra cuví ra cahán chaha yo vityin cha natyihí tahan Nyoo tuhun chaa chihin yo. Ta chati niñi ra. Ta ican chí chahá noo cha vaha ca ta ñima ca cha chahá niñi ra Abel. (Vatyí ra Abel chí chí ra ta tachí tuñi Nyoo chí yañi ra. Soco chí chí ra Jesús, ta iyó tucahnu iñi cuatyí yo.)

²⁵ Yucuan chaha saha yo cuenda coto ma quichaha yo chí ra cha cahán chihin yo. Vatyí ñu Israel cuan, ña cacu ñu cha ña cuñí quichaha nu cahan Nyoo quiví cahan ra nu cuví yucu Sinaí ihya siquí ñuhu ñayiví. Ta nyaca cuví yoó, ma cuví maa cacu yo tatu nacuhva yo chata yo chí ra cha cahán chihin yo nya andiví vityin. ²⁶ Quiví cuan ndusu Nyoo sacanda chí ñuhu ñayiví. Soco vityin catyí chí tyehe caa: “Noo ri ca chaha cusacande ta ñima ñuhu ñayiví ri, soco andiví ñandihí.” ²⁷ Ta cha catyí ra vatyí cusacanda ra nonga chaha, cutuñi iñi yo vatyí cucuachiyo tandihí cha nyaá ii ri cha savaha Nyoo. Ta cundoo cha ma cuví nacanda. ²⁸ Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na

nacuhva yo tyahvi nyoo chi ra, ta sacahnu yo chi ra chihin cha nii iñi yo, ta chihin cha saha yo ñáyivi chi ra, vatyí tyicuan caa tahán iñi ra. ²⁹ Vatyí Nyoo cuenda yo, cuví ra tari noo ñuhú cha chahmí tandihi, ta tyicuan caa cusanaa ra tandihi cha ña vaha.

Na coo yo cuhva tahán iñi Nyoo

13 Ma sandihi ndo cha cuñi ndo chi tandihi ñu yihí cuenda Nyoo tari cha tahan ndo chi ñu. ² Ta ma naa iñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chahá ndo nu coo ñáyivi; chi ángel, chahá ndo nu coo, ta ña tuví iñi ndo.

³ Ma naa iñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñáyivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñáyivi cuví ñu tari maa ndo.

⁴ Cha tandaha ndo, noo cha vaha cuví. Ta nyoho cha tandahá ndo tahán chi saha ndo ñáyivi chi yii ndo o chi ñasihi ndo. Vii coo ndo chihin tahan ndo, vatyí Nyoo cutachi tuñi ra chi ñu iyó yii ta iyó inga ra chi ñu, o ra iyó ñasihi ta iyó inga ñusihi chi ra.

⁵ Ma cuñi xaan ndo xuhun. Ndoqo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra. ⁶ Yucuan chaha cuví catyí yo chihin cha nii iñi yo: Sutu Mañi yo cuví ra tyinyee chíi, Ma yuhvi ñáá cha sacuvi ñáyivi chíi.

⁷ Nícohon iñi ndo chi ra cayihí ndaha vehe ñuhu, ra cacahán tuhun Nyoo chihin ndo. Nacaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chi Nyoo.

⁸ Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chi tyicuan ri maa. ⁹ Ma cuhva ndo cha sandavi ñaha ñáyivi chi ndo chihin tuhun siin caa cha sañahá ñu. Vaha ca cha cu nii iñi ndo chihin cha cuñi Nyoo chi yo, ta ñima ca tuhun cha sañahá ñu cuan: cha yica cha cachi yo. Ña tyinyee maa cuan chi ñu nyacuví tyicuan caa.

¹⁰ Iyó noo arta cha cuenda yo. Nu chati niñi ra Cristo nu cruzi, ican cuan cuví. Ta ñu cuñi cacu chihin cha quichahá ñu ley chahnu cha quichahá ra cacuví sutu ta cha naha, ma cuví tyinyee ra Cristo chi ñu. ¹¹ Ra cuví sutu cahnu cuenda ñu Israel chinyaca ra niñi quití Nu Ii Xaan Ca cuan cha cuenda cuatyí ñáyivi, soco coño ti chinyaca ra ityi chata ñuu vatyí cayu chi. ¹² Ta tyicuan caa tucu ra Jesús, tyaa Nyoo tyiño chi ra cha nyehe ra tindoho ta cúvi ra ityi chata ñuu Jerusalén, tacuhva vatyí sandundi ra chi yo chihin niñi ra. ¹³ Ma cahan nuu yo nyehe yo tindoho ticahan nuu cha cuenda ra Cristo, tari nyehe tucu maa ra cha cuenda yo quivi chahan ra chicúvi ra ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahán nuu yo nyehe yo tindoho cha cuenda tuhun ra. ¹⁴ Vatyí ihya siquí ñuhu ñayivi, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihi tuhun ñuhu ñayivi ihya. ¹⁵ Yucuan chaha vityin cha ñohó ra Cristo aña yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun cha cahnu cuví ra. ¹⁶ Ta ma naa iñi ndo cha sacuví ndo cha vaha. Ta tyinyee ndo chi tahan ndo chihin cha iyó chi ndo, vatyí ican ihya cuví cha tahán iñi Nyoo.

¹⁷ Quichaha ndo tuhun cahán ra casaquehén ityi chi ndo, ta cuhva ndo chi ndo cunyaca ñaha ra vatyí nyicú ra tyiño casahá cumi ra aña ndo. Ta coo

quivi cutahan chi cunacuhva ra cuenda tyiño casaha ra chi Nyoo. Nducu ndo cuhva sacuvi ndo cha vaha, tacuhva vatyí chihin cha sii cuñi ra cuhva ra cuenda ndo nuu Nyoo, vatyí tatu ña sacuví ndo cha vaha, chihin cha cuihya iñi ra cuhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñí aña ndi chihin Nyoo, ta cuñí ndi cha cacán tahvi ndo chaha ndi vatyí cuñí ndi sacuví ca ndi cha vaha. ¹⁹ Ta chiquén noo tumañi iñi chi ndo cha cacán tahvi ndo chiin chahi tacuhva vatyí nacuhva Nyoo cuhin cucunyai cha numi ri chihin ndo inga chaha.

**Nu ndihí cahan ra ta
nacuhva ra nocumi chi ñu**

²⁰ Nyoo ican ra iyó cha taxi chi ra, ican ra sanandoto ra chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chati niñi ra, ta chihin cuan naty-

ihí tahan Nyoo tuhun chaa cha ma ndihí ca maa chihin yo. ²¹ Na cuhva Nyoo cha vaha chi ndo tacuhva cuvi sacuvi ndo cuhva cuñí ra. Ta na sacuvi maa ra cha cuñí maa ra cha cuenda ra Jesucristo chihin tandihí maa yo. ¡Na sacahnu yo chi ra Cristo tyicuan ri maa! ¡Na cuvi chi tyicuan caa!

²² Yañi, chacú ndahvi nuu ndo, na cun- yee xaan iñi ndo chihin tuhun cha चाहí ihya chi ndo, vatyí ña cuaha xaan tyai nu tutu ihya chi ndo. ²³ Coto ndo vatyí ra yañi yo, ra Timoteo, cha quita ra vehe caa. Ta tatu nachaa ra cha numi ri, cuhun ra chihin, na cuhin cunyehi nu ny- icú ndo.

²⁴ Cuhva ndo nocumi chi tandihí ra sañahá chi ndo, ta chi tandihí ra yañi yo cuenda ra Cristo. Ñu Italia ihya, tachí ñu nocumi chi ndo.

²⁵ Ta Nyoo na nasoco ra chi tandihí maa ndo. Ta na cuvi chi tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

1 Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhín nocumi chi ndo cha cuví ndo cha uchi uvi ityi ñáyivi Israel ñu yihí cuenda ra Cristo. Ta quití cuatyí ndo siin siin ñuu.

Cha chiñi tuñi cha chahá maa Nyoo

²Yañi, cuñí chi vatyí sií cuví chi ndo tatu cuaha nuu tindoho nyehé ndo. ³Vatyí chitó ndo tatu nyehé ndo tindoho tari cha vatyí Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo. ⁴Saña ndo na quichi maa tindoho siquí ndo, vatyí ican cuví cha sacoo cha cama iñi ndo. Ta tatu cha chicoo cha cama iñi ndo ta cucuvi ndo noo ñáyivi chicha chihin tuhun Nyoo, ta cuacunye ndo tandihi cuii maa tindoho cha vachi ca siquí ndo.

⁵Tatu nya noo nyoho cumañi cha chiñi tuñi chi ndo, caçan ndo chi Nyoo. Ta Nyoo cuhva ra. Ta ñima chiin ri chahá ra chi ñu chicán chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chi yo. ⁶Soco cuñí chi caçan yo chi ra chihin cha chinó vaha iñi yo. Ta ma quihí iñi yo vatyí ma cuhva ra chi yo. Vatyí ñu cha ña chinó vaha iñi, cuví ñu tari ndutya yuhu tyañuhu cha tyandahá tatyí chii siin siin ityi. ⁷⁻⁸Ta tyicuan caa maa ñu cuan, siin siin cuhva chicá xiñi ñu, vatyí siin cha chicán ñu vityin ta siin cha chicán ñu tyaan, ta ña ñi iñi ñu sacuví ñu noo cha sacuví ñu. Ña tahán chi quihí iñi ñu vatyí cuñihí ñu cha cuacuhva Sutu Mañi yo chi ñu. ⁹Tatu iyó noo ra yañi yo, ndahvi ra, cuñí chi cusii cuñí ra vatyí Nyoo na-

coñehé ra chi ra. ¹⁰Soco tatu noo ra yañi yo, tyayii ra, cuñí tucu chi cha cusii cuñí ra tatu ndundahvi ra, vatyí ra tyayii cuví ra tari noo ita cha nyaá nu cuhu, vatyí ña naha maa chiyó chi. ¹¹Vatyí tatu cañá ñanyii ta ihñi vavaha cuhu cuan, na ityi chi. Ta ita cuan canacavá ri ta ndihi cha tyaquí chi. Ta tyicuan caa tucu ra tyayii, cuquichi tuhun chihí chi ra ta ndoó maa tyiño sahá ra.

Yoso caa cunyeé yo tindoho

¹²Ñana cha sií cuví chi ndo cha cunyeé ndo chihin cha cama iñi ndo ñáá tindoho cha vachí chi ndo. Vatyí tatu cunyeé ndo, cuñihí ndo tari noo corona. Vatyí Nyoo cucuhva ra chi ñu cuñí chi ra, cha coo ñu ñáyivi chaa chihin ra. ¹³Tatu nya noo nyoho quichí cuví iñi ndo cha sacuvi ndo cha ña vaha, ma cuñi ndo vatyí Nyoo sacuví cha caca xiñi ndo tyicuan caa. Vatyí Nyoo ña quichí cuví iñi ra sacuví ra cha ña vaha. Ta ni ña tyiyuhú ra chi yo cha sacuví yo cha ña vaha. ¹⁴Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí. ¹⁵Tatu cuhva xaan yo cuhva cha quihí tuhun ña vaha iñi yo, cuacoo noo quivi ta cuasacuvi yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuhaa tuhun chihí chi yo. ¹⁶Yañi yuhu, cuñí xain chi ndo. Ma sandavi ñaha ndo chi ndo. ¹⁷Tandihí cha vaha ta cha vii cha ñihí yo, quichi chi nya ityi siquí vatyí maa Nyoo chahá ra. Ta maa ra savaha ra ñuhú cha iyó andivi: tiño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra. ¹⁸Ta chahá ra ñáyivi chaa cha iyó yo cha cuenda tuhun ndicha cha cahán ra. Vatyí xihna ca yo cuví cha nduchaá cha nuu tandihí ca cha savaha ra. Vatyí tyicuan caa cuñi maa ra.

**Noo ityi cha ndicha cha
tahán chi cuhun yo**

¹⁹ Yucuan chaha yañi, noo noo yo ta cuñi chi cha yatyi cohon iñi yo cha tyasoho yo, soco cuñi chi cha ma yatyi xaan nacahán yo ta ma yatyi xaan cuxaan yo. ²⁰ Vatyí ñáyivi cha cuxaán, ña nyacuví ñu cha tahán iñi Nyoo. ²¹ Yucuan chaha saña ndo cha ña vaha ta cha quiñi caa cha cuaha xaan iyó siqui ñuhuh ñáyivi. Ta ñatiin cuenda vaha ndo chihin cha masu iñi ndo tuhun Nyoo cha tachí ra añima ndo. Vatyí tuhun Nyoo cuan iyó tunyee iñi chi chi yatyi sacacú chi añima yo. ²² Soco sacuvi yo yoso cuhva sañahá tuhun Nyoo. Ta ma cuiñi ri maa yo yatyi tatu tacuhva chiñi ri maa yo, suri chi maa yo sandavi ñahá yo. ²³ Vatyí ñu cha chiñi ri maa tuhun Nyoo ta ña sacuví ñu, cuví ñu tari noo ñu cha nyehé chi nu ino. ²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu. ²⁵ Soco inga ñu cha nyita ri tyasohó tuhun Nyoo, yatyi sacuví vaha ñu cha chiñi ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa siñ xaan cucuvi chi ñu. ²⁶ Tatu nya noo ñáyivi cuñi maa ñu yatyi ityi Nyoo cuahan ñu, soco ña nyatú yuhu ñu cahán ñu, suri chi maa ñu sandahvi ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví. ²⁷ Vatyí ityi ndicha, ityi vaha nuu Nyoo Sutu yo ican cuví ihya: Cha tyinyeé yo chi ñu nyehe tindoho, ñu yori sutu ta sihi, ta ñu chihí yí. Ta inga, cha sahá vaha yo cuenda chi yo coto sacuvi yo cha quiñi caa cha sacuví ñu ña ñohó nuu Nyoo.

**Ña tahán chi cuñi yo chi noo ñáyivi
ta chi inga ñu ma cuñi yo. Inuu ri
tahan chi cuñi yo chi ñu**

2 Yañi yuhu, nyoho chinó iñi ndo chi Sutu Mañi yo Jesucristo ra cha cahnu ca cuví, ta ña tahán chi cha vaha ca cahán ndo chihin noo ri ñáyivi, ta chihin inga ñu ma cahán ndo. ² Vatyí tatu quihvi noo ra tyayii nu nyicu ndo, yihí xehe xuhun cuan ndaha ra, ta finu sahma ra, ta quihvi tucu nonga ra cha ñihnó sahma chahnu ri. ³ Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chi ra: “Cunya ihya noo nu vaha.” Ta chi ra ndahvi cuan catyí ndo chi ra: “Yoho cuinanyaa yucuan o cunya ihya nu ñuhú”, catyí ndo chi ra. ⁴ Ña vaha tatu sacuví ndo tyicuan caa, yatyi ña inuu ri sahá ndo ñáyivi chi ñu, ta cha tyicuan caa, ña vaha cha chicá xiñi ndo.

⁵ Yañi, tyasoho ndo tuhun ihya. Nyoo nacachi vaha ra chi ñu ndahvi ihya ñáyivi, yatyi ta cuhva cuví ñu ñu tyayii chihin cha chinó xaan iñi ñu chi Nyoo, ta cuñihi ñu nu vaha nu nyacá ñaha ra. Vatyí ican ihya cuví cha catyí ra tyi cuhva ra chi ñu cuñi chi ra. ⁶ Soco nyoho chahá ndo ticahan nuu chi ñu ndahvi. Ta çatu ña chitó ndo yatyi ñu tyayii, ican ñu cuví ñu cha chahvi ndahvi chi ndo? Ta chinyacá ñu chi ndo nuu ra cuví tyiño. ⁷ Ta çatu ña chitó ndo yatyi ican ñu cuví ñu cahán ña vaha siqui ra Cristo? Ta cuenda ra Cristo yihí ndo.

⁸ Tatu ndicha cha sacuví ndo tandihi cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuñi ndo chi tahan ndo tari cuñi ndo chi maa ndo.” ⁹ Soco tatu chi noo ri ñu cuñi ndo. Ta chi inga ñu ña cuñi ndo, chicoó cuatyí ndo. Ta iyó cuatyí ndo nu ley Nyoo. ¹⁰ Vatyí tatu noo ñáyivi sacuví ñu tandihi cha catyí ley, ta cumañi ñu noo ri cha catyí chi, cuví chi tari cha

tandihi ley ña sacuví ñu. ¹¹ Vatyí Nyoo catyí ra vatyí ma coo inga ñusihí o inga rayíi chi ñu, tatu iyó yíi ñu o iyó ñasihí ra. Ta suri maa ra catyí vatyí ma cahñi yo. Yucuan chaha tatu noo ñu ña sacuvi ñu cuatyí cha ña iyó inga rayíi o inga ñusihí chi ñu soco chahñi ñu, suri ña quichahá ñu cha catyí ley. ¹² Soco yoó cucutuñi chi yo nu ley ra Cristo cha sacacú chi yo. Yucuan cuenda tahan chi nducu yo cuhva cahan yo ta nducu yo cuhva coo yo. ¹³ Vatyí ñu cha ña cundahvi cuñi nyehe chi inga ñu, Nyoo cusacutuñi ra chi ñu, soco ma cundahvi cuñi ra nyehé ra chi ñu. Soco ñu cha ndahvi cuñi nyehé chi inga ñu, cuquita vaha ñu cuhva cha cutuñi chi ñu.

¿Ñáá cha sacacú chi yo, cha chinó iñi yo o cha sacuví yo cha vaha?

¹⁴ Yañi, ñáá ri tuhun tatu catyí ndo vatyí chinó iñi ndo, soco ñahri cha vaha nyacuví ndo. ¿Atu cuví cacu ndo chihin cha chino iñi ri ndo chi Nyoo? ¹⁵ Vatyí tatu noo ñu tahan yo cumañi sahma ñu, cumañi cha cachi ñu, ¹⁶ ta minoo nyoho catyí ndo chi ñu: “Cughan ta Nyoo na cocumi ra chuun. Na coo ca sahmon ta cha cachun”, catyí ndo. Soco ña chahá ndo cha chiñuhú chi ñu. ¿Ñáá ri tuhun cuan? ¹⁷ Ñahri yahvi nyaa cha catyí yo vatyí chinó iñi yo chi Nyoo, ta ña tyinyeé yo chi tahan yo.

¹⁸ Vasi yíhi ndo cua catyí ndo: “Yoho chihin cha chinó iñun chi Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeí chi tahan yo.” Vaha. Soco yuhu catyí chuun, ¿atu cuví sañahun chii tyi ndicha chinó iñun chi Nyoo tatu ña vaha ñáyivi cuvín ta ña tyinyeún chi tahan? Ma cuví. Soco yuhu chihin cha tyinyeí chi tahan yo sañahí chuun vatyí chinó vaha iñi chi Nyoo. ¹⁹ Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuihna chinó tucu iñi ra cuan tyi

iyó noo ri Nyoo. Ta nihí ra chihin cha yuhví ra vatyí ma cacu ra. ²⁰ Ma tondo xaan caca xiñun. Na cutuñi iñun vatyí tatu chinó iñi yo ta ña sacuví yo cha vaha, ñahri yahvi nyaa cha chinó iñi yo.

²¹ Ra Abraham sutu chahnu yo, cuví ra noo ra vaha nuu Nyoo cha cuenda cha sacuví ra cha catyí Nyoo. Vatyí chahá ra chi sehe ra, ra Isaac chi Nyoo tari cuhva catyí Nyoo chi ra. ²² Nyeñun vatyí chinó iñi ra Abraham chi Nyoo ta chaha cha chinó iñi ra ta sacuví ra tuhun cha catyí Nyoo chi ra tyi sacuvi ra. Ta nu sacuví ra cuhva catyí Nyoo chi ra, yucuan cuví nu natuvi vaha cha chinó iñi ra chi Nyoo. ²³ Ta tyicuan caa chinq cava tari cuhva catyí nu tutu Nyoo tyehe caa: “Ra Abraham chinq iñi ra chi Nyoo ta yucuan chaha Nyoo saha ra tuhun tyi vaha ra nuu ra.” Ta iyó inga nu catyí chi: “Ra Abraham, nanduví ra amigo Nyoo.”

²⁴ Ta tyicuan caa nyehe yo vatyí vaha yo nuu Nyoo cha cuenda cha nyacuvi yo cha vaha, ta ñima cha cuenda cha chinó ri iñi yo chi ra. ²⁵ Ta tyicuan caa tucu cu Rahab ñaha cata iñi cha chiyo ta cha naha. Yahá cha sacuví ña cuatyí, sacuví ña cha vaha quivi chahá ña nu cacion xehe ra cha tachí ra Josué. Ta tyinyeé ña chi ra cha cuhun ra inga ityi. Ta cha cuenda cuan Nyoo saha ra tuhun tyi vaha ña. ²⁶ Ta tyicuan caa tucu cuví noo coño ñuhu ñáyivi. Tatu ñahri ca cha nyitó ñu yíhi chichi coño ñuhu cuan, ñahri ca vale chi. Ta tyicuan caa yoó, tatu ña sacuví yo cha vaha, ña vale cha chinó iñi yo.

Yoso caa saha cuenda yo cuhva cahan yo

3 Nyoho yañi, ma yatyí xaan quichi cuví iñi ndo cuví ndo noo ra sañahá tuhun Nyoo. Vatyí nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyí cuví, ta cuaha ca cuchi tuñi Nyoo chi ndi. ² Vatyí ni noo

yo ta ña sacuví yo maa maa ri maa cha vaha. Soco tandíhi yo cuaha ri cuhva sacuví yo cuatyí. Soco tatu noo yo cuví cunyaca ñaha vaha yo cuhva cahan yo tacuhva ma coo cuatyí yo cha cuenda cha cahán yo, cuñí chi catyí vatyí ñahri cuatyí yo vatyí cuví tucu cunyaca ñaha yo tandíhi coño ñuhu yo. ³Vatyí tatu tyíhi yo yoho yuhu caballo cuví cunyaca ñaha yo chí tí, vasi cahnú tí. ⁴Ta tyicuan caa tucu noo barcu cahnú, vasi cahnú chí soco chíhin noo vitu luhlu ri cha nyaá chata chí, cuví sacuhun ra chí chí nya ityí nu cuñí maa ra, vasi ñíhi tatyí. ⁵Ta tyicuan caa tucu yaa yo. Cuví chí noo cha luhlu ri. Soco cahnú xaan cahnú xaan nanduví noo tuhun luhlu ri cahan yaa yo. Tari nahnu cuví cayu chíhin ñuhú lee cha tyaa yo chíchi cuhu ta ndíhi maa yutun cayu. ⁶Vatyí tyicuan caa yaa yo tari noo ñuhú luhlu cuví chí. Ta cuví chí tari noo cha quiñi caa cahnú cha ñohó chíchi coño ñuhu yo, ta sativí chí chí coño ñuhu yo ta tandíhi cuhva iyó yo ñáyiví, vatyí suri maa cuihna, ican tyiyuhú chí chí. ⁷Ñáyiví cuví samasu ñu tandíhi ri nuu quití: saa, coo, ta quití cha iyó chíchi tyañuhu, ta samasú ñu chí tí. ⁸Soco yori cuví samasu yaa yo. Vatyí cuví chí noo cha ña vaha cha ña chahá chí cha cunyaca ñaha yo chí chí. Tari noo coo, tyaá tí chí ñáyiví, tyíhi tí venenu tí ta chíhi ñáyiví. Ta tyicuan caa yaa yo. ⁹Vatyí suri chíhin yaa yo sacahnú yo chí Nyoo Sutu yo. Ta suri chíhin cuan cahán ña vaha yo chí ñáyiví cha savaha Nyoo tari cuhva caá maa ra. ¹⁰Suri maa chíhin yuhu yo sacahnú yo chí Nyoo. Ta suri chíhin cuan cahán yo cha quiñi caa. Soco yañi, ña tahán chí cha sacuví yo tyicuan caa. ¹¹Vatyí, ¿atu cuví quita ndutya vixi ta ndutya uva noo ndohyo? Ma cuví. ¹²Yañi, ¿atu cuví quita papaya nuu noo tumangu, o cuví cuhva tupapaya noo mangu? Ma cuví. Ta

tyicuan caa ma cuví quita ndutya uhva ta ndutya vixi noo ndohyo.

Cha chíhi tuñi cha vaha ca

¹³Tatu yíhi ndo cha chitó ndo ta iyó cha chíhi tuñi chí ndo, sañaha ndo chíhin cha cachi iyó ndo. Ta sacuvi ndo cha vaha chíhin cha ma cahnú saha ndo chí ndo, vatyí iyó cha chíhi tuñi Nyoo chí ndo. ¹⁴Soco tatu iyó tuhun nyiyo ñiñi ña vaha chíchi añima ndo, sacuví ndo cha sacuvi ndo soco cha cuenda cha cuñí ndo cuvaha ndo nuu ñáyiví, ta cha tyicuan caa nyacuví ndo, ña tahán chí cuyaa ndo tyí iyó cha chíhi tuñi chí ndo, vatyí cha cuyaa ndo, sandaví ñaha ndo cuví cuan, ta tixehe ndo cha ndicha. ¹⁵Vatyí tatu chicá xiñi ndo tyicuan caa ñima cha chíhi tuñi Nyoo cuví cuan, soco cuhva chicá xiñi ñu ña ñohó nuu Nyoo cuví. Cuenda cuihna cuví. ¹⁶Vatyí tatu nyiyo ñiñi ndo ta cuñí ndo cuvaha ndo nuu ñáyiví, yucuan cuví nu ican ñima nyicú ndo. Ta iyó tucu tandíhi inga nuu cha ña vaha nu nyicú ndo. ¹⁷Soco tatu iyó cha chíhi tuñi Nyoo chí ndo, ndaa iyó ndo, cachi iyó ndo. Ta nanducú ndo cuhva coo vaha ndo chíhin ñáyiví chíhin cha vita ñiñi ndo. Ta vaha ñáyiví cuví ndo. Ta cachi vaha chicá xiñi ndo. Ta cundahví cuñi ndo chí ñáyiví. Ta nducú ndo cha vaha chí tandíhi ñáyiví chíhin cha ñiñi ndo. ¹⁸Tatu nanducú yo cha coo vaha yo chíhin ñáyiví, ta sañíhi yo coo taxi ri yo chíhin ñu, cuacoo yo noo ñáyiví cha cuítí.

Ma sacuvi yo cuhva cuñí coño ñuhu yo

4 ¿Ñáá tuhun iyó tisíhi nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñí coño ñuhu ndo. Vatyí tyicuan ri iyó cha cuñi ndo ta yucuan sacañi tahan chí ndo. ²Nyoho cuñi ndo coo ñáá ndíhi cha coo chí ndo. Ta ñahri iyó chí ndo. Tyicuan ta satsás ñiñi

ndo ta chahñí ndo tacuhva ñihi ndo. Iyo tahan ndo chihin cha nyiyo iñi ndo ñáa cha nyehé ndo soco ña cuví ñihi ndo. Tyicuan ta cañí tahan ndo. Iyó cuatyí nu nyicú ndo soco ña ñihí ndo cha cuñí ndo. Vatyí ña chicán tahvi ndo chi Nyoo. ³Ta tatu chicán tahvi ndo chi Nyoo, ñi ri ña ñihí ndo cha cuenda vatyí ña vaha chicán ndo. Vatyí cuñí ndo soco cha sanaa ndo cha caca noo ri maa ndo cuhva cuñí ñáyivi. ⁴Ña ndicha cha chinó iñi ndo chi Nyoo. ¿Atu ña chitó ndo vatyí tatu nyacuví ndo cuhva cuñí ñáyivi, ñu xaan iñi chi Nyoo cuví ndo vatyí ña nyacuví ndo cuhva cuñí Nyoo? Yucuan chaha tatu yihi ndo nyacuví ndo cuhva cuñí ñáyivi, ñu xaan iñi chi Nyoo cuví ndo. ⁵¿Atu cha caha ri catyí nu tutu Nyoo vatyí Tatyí li cha chahá Nyoo coo añima yo, cuñí xaan chi chi yo, ta cuiño xaan chi chi yo? Cuñí Nyoo cha ñin ri chi maa ra cua cuñí xaan yo. ⁶Soco tyinyeé ca ra chi yo tacuhva vatyí cuvi nacuhva ndihi yo chi yo chi ra. Yucuan chaha catyí tucu tuhun Nyoo vatyí Nyoo ña tahán iñi ra chi ñu cahnu saha chii. Soco tyinyeé ca ra chi ñu nacotó tyi chiñuhu ra chi ñu. ⁷Ican tuhun ñacuhva vaha ndo chi ndo chi Nyoo. Ma quichaha ndo nu cahán cuilhna chihin ndo. Ta maa ra cucacacano ra nyehe ra chi ndo. ⁸Tuhva yatyin ndo chi Nyoo ta maa ra tuhva yatyin ra chi ndo. Nyoho ñu iyó cuatyí, sandundií ndo chi ndo. Ta nyoho cha uvi nyaa xiñi ndo sandundií ndo iñi ndo ta cuhva ndo na sacutu Nyoo añima ndo chihin cha vaha, tyicuan ta cundundií ndo nuu ra. ⁹Cucuihya cuñi ndo. Cuacu ndo. Na ndichi xiñi ndo vatyí ña vaha cuhva iyó ndo. Cha nuu cha cuacu ndo chihin cha sií cuñi ndo cuacu ndo chihin cha cuihya iñi ndo. Ta cha sií cuñi ndo na nanduvi chi tucuihya iñi. ¹⁰Ndahvi saha ndo chi ndo nuu Sutu Mañi yo, ta maa ra cusanducahnu ca ra chi ndo.

Ma nyehe nyaa yo chi tahan yo

¹¹Yañi, ma cahan ña vaha ndo siqui noo tahan ndo. Vatyí ñu cha cahán ña vaha siqui noo tahan, o nyehé nyaa ñu chi ñu, siqui ley Nyoo cahán ña vaha ñu ta nyehé nyaa ñu. Vatyí tatu nyehe nyaun, juez nasahún chuun cha nuu cha quichahún nu cahán ley cuan. ¹²Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra sacacu chi yo, o sacunaa ra chi yo. Soco ¿yóó ñu cuví yoho vatyí nyehe nyaun chi inga ñu, ta sacutuñun chi ñu tari cha juez cuvún?

Ña chitó yo ñáa cha cucuvi chi yo tyaan, ta yucuan chaha ña tahán chi cahnu saha yo chi yo

¹³Vityin cuiñi ndo tuhun ihya, nyoho cha catyí ndo: “Vityin o tyaan cuhun yo ñuu cuan, o inga ñuu cuan. Ta yucuan cunyaa yo noo cuiya vatyí sahatyiño yo ta saha ganaa yo xuhun”, catyí ndo. ¹⁴Ta ni ña chitó ndo cha cucuvi tyaan. Vatyí ñáyivi cha iyó yo cuví chi tari noo vico nuhu vatyí noo ri cuhva yihi chi, ta tañi ri ta cha naa tucu chi. ¹⁵Soco tahán chi catyí ndo tyehe caa: “Tatu Sutu Mañi yo ta cuñí ra, coo yo ta sacuvi yo ihya o yucuan.” ¹⁶Soco nyoho nyee xaan ndo cuñí maa ndo ta cahnu sahá ndo chi ndo. Ta ña vaha tyicuan caa. ¹⁷Vatyí tandihi yo cha chitó yo sacuví yo cha vaha ta ña sacuví yo, chicoó cuatyí yo cha tyicuan caa.

Nu catyí ra Santiago ñáa cha cucuvi chi ñu tyayíí

5 ¡Cuiñi ndo tuhun ihya, nyoho ñu tyayíí! Cuacu ndo chihin cha cuihya cuñi ndo, canachaa ndo cha cuenda tindoho cha cunyehe ndo. ²Vatyí cha tyayíí cha sacayá ndo, cha cuñí tiví. Ta sahna finu ndo, ndii maa cha cuñi cachi tiquixin. ³Xuhun cuaan ndo ta xuhun

cuichin ndo cuxi vavaha chi. Ta yucuan chahá chi noo seña cha chinyacuví ndo. Ta tari quiví cha cucahmi chi chi ndo tari cayu ñuhu vatyí cucunaa ndo. Tyi sacayá xaan ndo cha tyayíi ndo tyi cotyiño ndo tyaan. ⁴Ta ña tyiyahví ndo yahví cha tahán chi chi ñu ndahví cha sahatyiño nu tyiño sáha ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chiñi ra tuhun cahán ñu ndahví cuan. ⁵Ihya siquí ñuhu ñayiví tyaquí iyó ndo, tyayíí iyó ndo. Ta sacuví ndo yoso cuhva cuñí maa ndo. Tari nduxahan quini cha cucúví, tyicuan caa nyoho, vatyí cucunaa ndo. ⁶Ta nyoho tyaa ndo cuatyí chaha ñayiví vaha. Ta chahñi ndo chi ñu. Ta ñu ndahví cuan ña cuví sacacu ñu chi ñu.

Cuatu yo chi ra Cristo chihin cha cama ñi yo

⁷Yucuan chaha, yañi, nyatú yo chihin cha cama ñi yo nyacua nya quiví quichi Sutu Mañi yo. Tari noo ra cha sahá tyiño chi cuhu nyatú ra nyacua nya cha coon savi cha xihna ri ta cha yaha savi nu ndihi, tyicuan ta naquehen ra ñáa cha tachi ra. ⁸Ican tuhun cuatu ndo chi Nyoo chihin cha cama ñi ndo. Ta cuni cha ñi ndo vatyí cha cuyatyin cha quichi Sutu Mañi yo.

⁹Yañi, ma tyaa ndo cuatyí chaha tahan ndo, coto tachi tuñi Nyoo chi ndo. Vatyí Nyoo, juez cuví ra. Ta cha cuñi quichi ra. ¹⁰Yañi, saha ndo cuenda cuhva chiyo ra profeta cha chaha cuenda tuhun Sutu Mañi yo ta cha naha, vatyí cuhva cha canyehé ra tindoho, cacunye xaan ra. ¹¹Chitó yo vatyí sii xaan cuñí ra cha cunye tandihí nuu tindoho. Tari ra Job. Chiñi ndo tuhun yoso caa cunye ra tindoho cha nyehe ra. Ta chitó ndo vatyí nu ndihi tuhun, cuaha xaan cha vaha chaha Sutu Mañi yo chi ra. Vatyí Sutu Mañi yo iyó xaan ticahnu ñi chi

ra. Ta cundahví cuñi ra nyehe ra chi yo. ¹²Soco yañi, ma tyanaha ndo tacuhva chino ñi ñayiví vatyí ndicha cha sacuví ndo. Ma tyanaha ndo ni tuhun andiví, ni tuhun ñuhu ñayiví, ni ma catyí ndo: “Chitó vaha maa Nyoo.” Tatu ndicha tuhun cahán ndo, ndicha catyí ndo. Soco tatu chitó ndo tyi ña ndicha, catyí ndo tyi ña ndicha, vatyí coto tachi tuñi Nyoo chi ndo.

¹³Tatu nya noo nyoho nyehé ndo tindoho, cacan tahví ndo chi Nyoo. Ta tatu nya noo ndo sii cuñí ndo, cata ndo yaa Nyoo. ¹⁴Tatu nya noo ndo cuhví ndo, cuñí chi cana ndo chi ra nyisó tyiño vehe ñuhu vatyí cacan tahví ra chaha ñu cuhví cuan ta tyihí ra acetye chi ñu chihin sivi ra Cristo. ¹⁵Ta tatu chinó vavaha ñi ra chi Nyoo cuhva cha chicán tahví ra, ñu cuhví cuan cucacu ñu. Ta Sutu Mañi yo cusanducuita ra chi ñu. Ta tatu sacuví ñu cuatyí, Nyoo cusaha ra ticahnu ñi cuatyí ñu. ¹⁶Yucuan chaha nahma ndo cuatyí ndo nuu tahan ndo. Ta cacan tahví ndo chaha tahan ndo vatyí na nduvaha ndo. Vatyí nu chicán tahví noo ra vaha chicá chihin Nyoo iyó xaan tunyee ñi Nyoo. ¹⁷Tari ra Elías ra profeta Nyoo ta cha naha. Cuví ra noo rayíi tari maa yo. Ta chicán tahví ra chi Nyoo vatyí ma coon savi. Ta ña coon savi uñi cuiya sisava. ¹⁸Yaha cuan ta nacacáñ tahví tucu ra chi Nyoo inga chaha. Ta nacoon savi inga chaha. Ta cuvaha chiti cha tachi ñayiví nu ñuhú.

¹⁹Yañi, tatu noo tahan ndo sandoo ñu tuhun ndicha Sutu Mañi yo, ta cuanuhu ñu ñayiví inga chaha, ta tatu tyinyeé ndo chi ñu na ndichi ñu ityí Nyoo inga chaha, ²⁰coto ndo vatyí cha tyinyeé ndo chi ñu sacuví cuatyí cuan na ndihví ñu ityí Nyoo inga chaha, sacacú ndo ñi ndahví cuan coto cuhun ñu anyaya. Ta sacuví ndo vatyí saha Nyoo ticahnu ñi tandihí cuatyí ñu.

Carta Cha Xihna Ri Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaq ra Pedro noo carta chi ñáyivi yihí cuenda Nyoo

1 Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyaí noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityí Ponto, ta Galacia, ta Capadocia, ta Asia ta Bitinia. ²Chi nyoho nacachí vaha maa Nyoo Sutu yo vatyí nyata cha naha chito ra vatyí tyicuan caa cuquichaha ndo chi ra. Maa Tatyí li tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundíí ndo chihin niñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

Noo cha yihí vaha iñi yo vatyí cuñihi yo

³Sacahnu yo chi Nyoo Sutu Sutu Mañi yo Jesucristo vatyí ndahvi cuñí ra nyehé ra chi yo ta chahá ra cha nacacu chaa yo inga chaha tacuhva coo yo ñáyivi chaa cha ma naa ca maa. Ta yucuan cuví cha chahá cha cuita iñi yo cha cuñihi yo vatyí cha nandoto ra Jesucristo. ⁴Ta Nyoo cuacuhva ra tandihi cha tahán chi chi yo cha cumí vaha ra nya andivi. Ta cuví chi noo cha ma naa ta ni ma tiví, ta ni ma ndahva chi tari ndahva ita. ⁵Ta vatyí chinó iñi yo chi Nyoo maa ra sahá cumi chi yo chihin tunyee iñi ra nyacua nya cacu ndihi añima yo. Ta cusañaha ra chi yo ñáá cha cuñi chi catyí cha cacú yo nu cuandíhi tyembu. Vatyí cha nyatú tuhva cuan chi yo.

⁶Ta yucuan chaha sii xaan cuñí ndo, vasi tahán chi cha nyehé ndo ndihi nuu

tindoho suhva quivi. ⁷Vatyí cha chinó iñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cundihi. Soco cuví nyehe yo chihin ñuhú tatu vaha chi, vatyí chihin cha ihñi cundutya chi ta cucayu cha ña vaha yihí chihin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó iñi ndo chi ra. Yucuan chaha nyehé ndo tindoho vityin. Soco tatu ña ndu uví iñi ndo cha chinó iñi ndo chi ra, cutuvi ndo nuu ra ta cusacahnu ñáyivi chi maa ra ta chi maa ndo quivi quichi Sutu Mañi yo Jesucristo inga chaha.

⁸Nyoho cuñí ndo chi ra Jesucristo vasi ta nyehe ca ndo chi ra. Ta vasi ña nyehé ndo chi ra vityin, soco chinó iñi ndo chi ra, ta sii xaan sii xaan cuñí ndo nyacua ña ñihí ca ndo cuhva catyí ndo yoso cuhva cha sii cuñí ndo. ⁹Vatyí cucacu ndihi añima ndo ta yucuan cuví cha cuñihi ndo vatyí chinó iñi ndo chi Nyoo.

¹⁰Siquí cuan canducú tuhun ra profeta Nyoo ta cha naha. Ta canducú xaan ra cuhva coto ra ñáá cha cuví cuan. Ta catyaa ra nu tutu cuenda tumañi iñi cha cucuhva Nyoo chi yo. ¹¹Ta Tatyí li ra Cristo sacoto chi chi ra ñáá ndihi tindoho cunyehe ra Cristo, ta yaha cuan yoso caa cusanducahnu Nyoo chi ra. Ta profeta cuan canducú xaan ra cuhva cacoto ra yóo ra cucuvi ra Cristo cha cucuvi chi tyicuan caa, ta ama cucuvi tuhun cha catyí Tatyí li chi ra. ¹²Soco sacoto Nyoo chi ra vatyí tyiño cha casacuví ra, ñima cha vaha chi maa ra cuví, soco cha vaha chi maa yo cuví. Ta ican cuví cha sacoto ndi chi ndo vityin. Vatyí chihin tunyee iñi maa Tatyí li cha saquichí Nyoo, cahán ndi tuhun ra Cristo nuu ndo yoso caa sacacú ra chi yo. Ta ángel cacuñi xaan ra cacoto ra tuhun ihya.

**Nacana Nyoo chi yo vatyi coo
yo noo ñayivi cachi**

¹³Yucuan chaha saha vaha ndo cuenda cha cua sacuvi ndo, ta cachi coo ndo. Quíhi vaha iñi ndo cha cuacuhva Nyoo chi yo cha cuenda cha cuñi ra chi yo. Cuaha cuacuhva ra chi yo quivi quichi ra Jesucristo inga chaha. ¹⁴Ta coo ndo tari noo sehe cha quichahá chi nu cahán sutu chi. Ma coo ndo tari chiyó ndo quivi ta ni cumañi ca cohon nuu ndo chi Nyoo. Vatyi cha ña vaha cha cuñi coño ñuhu ndo chinyaca ñaha chi chi ndo. ¹⁵Soco coo ndo noo ñayivi ndii, vatyi maa Nyoo, ra cha nacana chi ndo, ndii ra. ¹⁶Vatyi tyicuan caa catyí Nyoo nu tutu ra. “Cundi ndo vatyi mai ndii”, catyí Nyoo.

¹⁷Tatu tuhvá ndo chicán tahvi ndo chi Nyoo ta catyí ndo “Sutu Mañi yuhu” chi ra, saha ndo cuenda chi ndo ta saha ndo ñayivi chi ra cha ni ri ca cha iyó ndo siqui ñuhu ñayivi. Vatyi Nyoo ña sahá ra cuenda cuhva cahán yo. Soco sahá ra cuenda cuhva iyó noo noo yo, an cuví ri yo ñu tyayii, an cuví ri yo ñu ndahvi. ¹⁸Nyoo nasama ra cuhva chiyó ndo, vatyi cuhva cuan ña vaha, Cuhva cha sanandoo Sutu chahnu ndo chi ndo cuví. Ta chitó ndo tyi Nyoo tyiyahvi ra tacuhva cuví cacu añima yo. Soco ñima chihin xuhun cuaan o xuhun cuichin. Noo cha cundihi noo quivi cuví cuan. ¹⁹Soco cha tyiyahvi maa Nyoo chihin niñi ra Cristo. Ta yucuan cuví noo cha vaha xaan ca. Ta ra Cristo cuví ra tari noo mbee luhlu quití vaha, ñahri nu pehe ti, tyicuan caa ra Cristo, ñahri cuatyí ra soco chihí ra. ²⁰Ta nyata ni cumañi ca chino ñuhu ñayivi chicunya cuhva cha cucuvi chi ra Cristo tyehe caa. Soco ña cuví cha numi ri. Nyacua nya vityin nu cuandihi quivi, chinq cava tandihi cuan cha cuenda cha vaha chi

maa yo. ²¹Cha cuenda ra Cristo ta chinó iñi ndo chi Nyoo. Vatyi ican ra sanandoto chi ra Cristo cha yaha chihí ra. Ta sacahnu Nyoo chi ra. Ta yucuan chaha chinó vaha iñi ndo chi Nyoo tyi cunaquehen ra chi ndo.

²²Maa Tatyí Ii Nyoo tyinyeé chi ndo ta cuví quichahá ndo tuhun cha ndicha. Yucuan ta cuví cuñi ndo chi tahan ndo cuenda Nyoo chihin cha niñi iñi ndo. Tyicuan caa cuñi chi cha cuñi ndo chi tahan ndo chihin cha vaha yihí añima ndo ta chihin tandihi fuerza ndo. ²³Vatyi tari quivi cha nacacu chaa ndo, ñima tari cacu ndo chihin sutu ndo ihya ñuhu ñayivi, vatyi ra cuan numi ri chihí ra, soco nacacu chaa ndo chihin tuhun Nyoo cha ña tuhvá chihí vatyi tuhun Nyoo tyicuan ri maa iyó. ²⁴Vatyi tyehe caa catyí tuhun Nyoo:

Tandihi ñayivi iyó siqui ñuhu ñayivi
ihya cuví ñu tari cuhu.

Ta cha cahnu cha sacuví ñu cuví chi tari
ita.

Vatyi cuhu cuan na ityi, ta coyo ita cuan.

(Ta tyicuan caa ñayivi, chihí ri ñu.)

²⁵Soco tuhun Sutu Mañi yo tyicuan ri
maa iyó.

Ican cuví tuhun cha cahán ndi chihin
ndo: tuhun vaha cha sacacú Nyoo añima
yo.

2Yucuan chaha na sandoo yo tandihi
nuu cha quiñi caa. Ma sandavi ñaha
yo chi ñayivi. Ma saha ri maa yo tyi
vaha yo ta ña ndicha. Ma nyiyo iñi yo
nyehe yo cha iyó chi inga ñayivi. Ñahri
cuendu cahan yo. ²Soco tari cha lee cha
ni cacu, nanducú vavaha chi cha caxin
chi, tyicuan caa nducu ndo tuhun Nyoo
tacuhva vatyi chihin cuan cuahnu ndo
ta cohon nuu ca ndo chi Nyoo, nyacua
nya cacu ndihi añima ndo, ³tatu ndicha
cha nacotó ndo vatyi Sutu Mañi yo, vaha
xaan ñayivi cuví ra chihin yo.

Tari yuu nyitó, tyicuan caa cuví ra Cristo

⁴Sayatyin ca ndo chi ndo chi Sutu Mañi yo. Vatyí cuví ra tari noo yuu nyitó. Ñáyivi ña cuñi ñu cotyiño ñu yuu cuan. Soco Sutu Mañi yo cuví ra tari noo yuu tyaquí cha nacachi Nyoo. ⁵Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu iin ri ra chi ndo tacuhva cuví ndo tari noo vehe nu coo ra. Na cu iin ri ndo ta cuhva ndo cha sandu ii Nyoo chi ndo tacuhva cuví sacuvi ndo tyiño nuu ra. Ta maa maa ri tyiño cha sacahnú ndo chi Nyoo cucunyaa ndo. Vatyí yucuan cuví cha tahán iñi Nyoo sacuvi yo chihin tunyee iñi maa ra Jesucristo. ⁶Vatyí catyí tucu nuu tutu Nyoo tyehe caa:

Nyehe xihna, yuhu nacachi noo yuu cha chiñuhú ca ta tyaquí xaan ca, ta chaquín yuu cuan nu cuasavahi vehi nya Sión.

Ta ñu chinó iñi chi ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷Yucuan chaha, cha cuenda yoó cha chinó iñi yo chi ra Cristo ra cuví yuu cuan, chiñuhú xaan ra chi yo. Soco cha cuenda ñu cha ña chinó iñi chi ra, cuví ra tari noo yuu cha cahán Nyoo tuhun nu tutu ra ta catyí chi tyehe caa:

Yuu cha ña cacuñi ra casavahá vehe cotyiño ra, ican cuví yuu cha chiñuhú ca, catyí chi.

⁸Ta catyí tucu chi:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chi ñu, catyí chi nuu tutu Nyoo.

Tari cha nduvá ñu cuví cuan vatyí chiñi ñu tuhun Nyoo, ta ña quichahá ñu. Vatyí tyicuan caa nyaá vatyí cusacuvi ñu cuan.

Ñáyivi cha yihí cuenda Nyoo

⁹Soco nyoho cuví ndo ñáyivi nacachi vaha Nyoo. Ta tari tata sutu cuví ndo tyi sacuví ndo tyiño nuu Nyoo, ra nyacá ñaha. Ta cuví tucu ndo noo ñáyivi ii nuu Nyoo. Vatyí cuví ndo ñáyivi chi maa ra, tacuhva vatyí cahan ndo tuhun cha vaha cha sacuví ra. Vatyí maa ra natavá ra chi ndo nu ñaa iñi ta vityin cuahan ndo nu ndichin nu tyaquí. ¹⁰Ta quívi ca cuan, cuví ndo ñáyivi cha ñima ri tuhun. Soco vityin ñáyivi chi Nyoo cuví ndo. Ta quívi cuan yori cundahvi cuñi nyehe chi ndo, soco vityin Nyoo cundahvi cuñi ra nyehé ra chi ndo.

Nu catyí ra Pedro vatyí coo yo, soco sacuvi yo tyiño nuu Nyoo

¹¹Yañi, cuñi xain chi ndo. Chicá noo ndo siqui ñuhu ñáyivi ihya, soco ñima ca ra ñuhu ñáyivi ihya cuví ndo. Soco andívi cuví ñuu ndo. Yucuan chaha catyí chi ndo ma cuhva ndo ityi chi coño ñuhu ndo vatyí sacuvi ndo cha ña vaha cha cuñi chi. Vatyí tari quívi cañi tahan cuan chihin añima yo cuví cuan. ¹²Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahán ña vaha ñu siqui ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnu ñu chi Nyoo nachaa chi quívi cha cuquichi nyehe ra cha sacuví yo.

¹³Ta cha cuenda cha cuñi ndo chi Nyoo, quichaha ndo chi ra cuví tyiño ñuu nu iyó ndo. Quichaha ndo chi ra cuví tyiño, cuví ri ra rey cahnu ca, ¹⁴o cuví ri noo ra tachi rey chi vatyí tachi tuñi ra chi ra iyó cuatyí o tatu ñahri cuatyí yo ma tachi tuñi ra chi yo, soco cuatyí ra tyi vaha yo. ¹⁵Vatyí Nyoo cuñi ra vatyí chihin cha vaha nyacuví ndo ta sandihí ñu tondo cha cuví yuhu ñu, ñu cahán cha ña ndicha vatyí ña chitó ñu tuhun cahán ñu.

¹⁶Coo ndo tari cha yori nyacá ñaha chi ndo, soco ñima cha cuenda cuan ta cusacuvi tucu ndo cha ña vaha. Soco sacuvi ndo tyiño nuu Nyoo. ¹⁷Saha ndo ñáyivi chi tandihi ñáyivi. Cũni ndo chi ñu yihi cuenda Nyoo. Saha ndo cuenda vatyi Nyoo nyehé ra tandihi cha sacuvi ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

¹⁸Nyoho cha cuví ndo musu, cuhva ndo cha cunyaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra. ¹⁹Vatyí tatu cunyeé yo tindoho cha sanyehé ñáyivi chi yo cha cuenda cha sacuvi yo cha vaha nuu Nyoo, yucuan cuví cha chaá nuu Nyoo. ²⁰Soco tatu sacuvi ndo noo cha ña vaha ta tachí tuñi ñu chi ndo, ñahri maa tuhun cha cunyeé ndo tindoho cha nyehé ndo cha cuenda cuan. Soco tatu nyehé ndo tindoho cha cuenda cha sacuvi ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo. ²¹Vatyí nacana Nyoo chi yo vatyí coo yo tyehe caa. Vatyí tyicuan caa tucu nyehé ra Cristo tindoho cha cuenda maa yo, na cutuhva yo ta quehen yo cha caá ra. ²²Maa ra ni noo cuatyí ña sacuvi ra. Ni noo chaha ña sandavi ñaha ra chi ninoo ñáyivi. ²³Cuhva cha cahán ñu chi ra, ña nacahán xaan ra. Cuhva cha nyehé ra tindoho, ña tyanahá ra chi ñu. Soco natyaq ra chi ra ndaha Nyoo, vatyí Nyoo tuhvá ra sacutuñi ra chi ñáyivi chihin cha ndaa ta chihin cha ndicha. ²⁴Vatyí chata maa ra Cristo nicoso ndii maa cuatyí tandihi yo cuhva cha tacaá ra nu cruzi cuan. Tyicuan caa cuví tacuhva vatyí ma sacuvi ca yo cuatyí, ta coo yo noo ñáyivi vaha. Vatyí cha cuenda cha ñicuehe maa ra, yoó nduvaha yo. ²⁵Vatyí quívi cuan chicá noo ndo tari mbee cha cuanaá. Soco vityin nacuhva cuenda ndo chi ndo chi ra Cristo, ra cuví pastor cha sahá cuenda añima yo.

Yoso caa tahán chi coo ñu tandaha

3 Tyicuan caa tucu nyoho, ñu iyó yii. Quichaha ndo chi yii ndo. Vatyí tatu ña quichahá ra tuhun Nyoo soco cunachino iñi ra cha cuenda cha nyehé ra cuhva iyó ndo. Ta ña chiñuhú ri cha cuví yuhu xaan ndo chihin ra. ²Vatyí nyehé ra tyi cachi iyó ndo ta sahá ndo ñáyivi chi ra. ³Ta ma caca iñi ndo tuhun cha sandutyauqui ndo chi ndo cuhva nyehé ndo, cuví ri chihin cha iyo xaan sanduví ndo xiñi ndo, o cuví ri cha sandutyauqui ndo chi ndo chihin cha tyaa ndo xuhun cuaan chi ndo, o cuví ri cha cuihno ndo sahma vaha xaan. Ma nducu ndo tandihi cuan. ⁴Soco nducu ndo cuhva ndutyauqui ndo chihin cuhva vaha iyó ndo. Vatyí cha vita iñi yo ta cha taxi ri iyó yo, yucuan cuví cha quitá chichi añima yo. Ta yucuan ña tuhvá cuan tiví. Vatyí ñahri nonga cha tyauqui ca nuu Nyoo tari cuan. ⁵Vatyí tyicuan caa cuhva chiyo ñusihi cha yihí iñi chi Nyoo ta cha naha. Tyicuan caa sandutyauqui ñu chi ñu, ta quichahá ñu chi yii ñu. ⁶Tari cu Sara, quichahá ña chi ra Abraham yii ña. Ta catyí ña: “Tata”, chi ra. Ta nyoho tari sehe ña cuví chi ndo tatu sacuvi ndo cha vaha tari maa ña. Ta ñahri cha yuhví ndo.

⁷Ta tyicuan caa tucu nyoho ra iyó ñasihi. Cutuñi iñi ndo cuhva coo ndo chihin ñasihi ndo. Ta saha ndo ñáyivi chi ña, ñima vatyí yica ca ña cha nuu nyoho. Soco vatyí iin ri naquehen ndo tumañi iñi cha chahá Nyoo chi ndo. Ta yucuan cuví ñáyivi iyó ndo. Vaha coo ndo tyehe caa, tacuhva vatyí tiin cuenda Nyoo tuhun chicán tahvi ndo chi ra.

Nu catyí ra Pedro yoso caa tahán chi coo yo

⁸Nu ndihi tuhun, cuñí chi cha iin ri cuhva caca xiñi tandihi ndo. Ta cundahvi cuñi ndo nyehé ndo chi tahan ndo.

Cuñi ndo chi tahan ndo cuenda Nyoo tari cha yañi ndo cuví. Vita cañan ndo chihin ñu. Ta ma cahnu saha ndo chi ndo. Vaha ñáyivi cuví ndo. ⁹Ma sacuvi ndo cha ña vaha chihin ñu sacuví cha ña vaha chihin ndo. Ni ma cahan ndo chi ñu tatu cahán ñu chi ndo. Soco cha vaha sacuvi ndo chihin ñu. Vatyí Nyoo nacana ra chi ndo vatyí cunaquehen ndo cha vaha cha iyó chi ra. ¹⁰Vatyí catyí tuhun Nyoo tyehe caa:

Ñu cha cuñí coo noo ñáyivi chihin tusii iñi,

cuñí chi saha ñu cuenda cuhva cahán ñu.

Ta ma cahan ñu cha ña vaha,

ta ni ma cahan ñu cuendu.

¹¹ Ta cuñí chi cha sandoo ñu cha ña vaha ta sacuví ñu cha vaha.

Nanducu ñu cuhva coo taxi ri ñu.

Ta ma saña ñu.

¹² Vatyí Sutu Mañi yo sahá cuenda ra chi ñu vaha.

Ta tyasohó ra nu chicán tahvi ñu chi ra. Soco ñu sacuví cha ña vaha, xaan cuñí ra nyehé ra chi ñu.

¹³ ¿Yóo cha cuví sacuvi cha ña vaha chihin ndo tatu nyoho tyicuan ri nducú ndo cuhva sacuvi ndo cha vaha? ¹⁴Soco vasi nyehé ndo tindoho cha cuenda cha sacuví ndo cha vaha, soco cucusiñi cuñi ndo. Ta ni ma nayuhvi ndo tatu tyanaha ñáyivi chi ndo. ¹⁵Soco chichi añima ndo sacahnu ndo chi ra Cristo ta cuhva ndo na cunyaca ñaha ra chi ndo. Tyicuan ri caca iñi ndo tuhun Nyoo tacuhva vatyí tatu ndaca tuhun noo ñu chi ndo ñáá tuhun chinó iñi ndo chi ra, soco cuví nacuhva ndo cuenda chi ñu chihin cha ña cahnu saha ndo chi ndo ta chihin cha ndicha sahá ndo ñáyivi chi ra. ¹⁶Cachi cõo ndo tacuhva cha ma yuhvi añima ndo nuu Nyoo, vatyí tatu cahán ña vaha ñáyivi siqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cañan ñu siqui ndo. ¹⁷Tatu maa

Nyoo cuñí ra cha nyehé yo tindoho, vaha ca cha nyehé yo cha cuenda cha sacuví yo cha vaha ta ñima ca cha cuenda cha sacuví yo cha ña vaha. ¹⁸Vatyí suri ra Cristo nyehé ra tindoho ta chihí ra iñ chaha cuiri cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyí tyicuan caa nuña ra ityi nachaa yo ityi nuu Nyoo. Chihí coño ñuhu ra, soco nandoto tucu ra chihin Tatyí li ra. ¹⁹Tyicuan ta chihin Tatyí li ra chahan ra chicahan ra chihin añima cha ñohó vehe caa. ²⁰Ta ican ñu cuan cuví ñu ña quichaha chi Nyoo quivi chiyo ra Noé ta tyembu chahnu. Ta nyatú Nyoo chi ñu tandu uvi iñi ñu cuatyí ñu cha ni ri ca cha cuahan chino barcu cha savaha ra Noé. Soco ña cuaha ñu cacu quivi sahví ndutya ñuhu ñáyivi. Uña tahan ri ñu cacu chihin ndutya vatyí nandaa barcu nu ñohó ñu nu ndutya cuan. ²¹Ta tyicuan caa tucu maa yo tari quivi cacu yo chihin ndutya nu condutya yo. Cacu yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra añima yo ta sacacu ra chi yo cha cuenda cha nandoto ra Cristo. ²²Ta nanda xica ra andivi, ta nyaá ra chiyo vaha Nyoo. Nyacá ñaha ra chi ángel ta tandihí cha nyacá ñaha chi ñáyivi.

Na sacuvi yo tyiño nuu tahan yo yoso cuhva chaha Nyoo chi yo

4 Yucuan chaha tari nyehé ra Cristo tindoho chihin coño ñuhu ra, sandunye ndo iñi ndo tacuhva cuví cunye ndo nyehé tucu nyoho tindoho. Vatyí ñu nyehé tindoho chihin coño ñuhu, ña sacuví ca ñu cha quiñi caa cha cuñí coño ñuhu ñu. ²Tacuhva vatyí cuví coo ñu cuhva cuñí Nyoo. Ta ma sacuvi ca ñu cuhva cuñí coño ñuhu ñu. ³Vityin cha yaha chinyacuví xaan ndo cha quiñi caa nu quichi chi. Sacuví ndo cuhva tahan iñi ñu ña ñohó nuu Nyoo. Ta chiyo ndo

yoso cuhva cuñi ndo, cuaha viciu sacuvi ndo, cuaha cha quichi cuvi iñi coño ñuhu ndo cha quiñi caa chinyacuvi ndo. Chiñi ndo chihin ndixi. Maa maa ri vico chiyo ndo. Ta quiñi xaan sacahnu ndo xitohyo cha ña tahán chi sacahnú ndo. ⁴Ta vityin iyo cuñi ñu ña ñohó nuu Nyoo vatyí ña cutahán ca ndo chihin ñu ta ña sacuví ca ndo cha quiñi caa cuan. Ta yucuan chaha cahán ña vaha ñu siqui ndo. ⁵Soco nyaá nacuhva ñu cuenda chi ra cha nyatú tuhva quivi sacutuñi ra chi ñu nyitó ta chi ñu chihí. ⁶Yucuan chaha sacoto ra Cristo tuhun vaha chi ñu ndiyi ñandíhi. Vatyí tacuhva cuvi coo ánimo ñu tari iyó Nyoo, vasi cha cutuñi chi ñu tari cutuñi chi tandíhi ñáyivi iyó siqui ñuhu ñayivi quivi chihí coño ñuhu ñu.

⁷Soco cha cuyatyin cha cundihi tandíhi maa. Yucuan chaha cachi coo ndo ta cunyaa vaha ndo tyiño cha chicán tahvi ndo. ⁸Ta cha xihna ri tahán chi cha cuñi xaan ndo chi tahan ndo. Vatyí tatu cuñi yo chi tahan yo, cuaha xaan chaha cusaha yo ticahnu iñi chi ñu, tyi maa Nyoo cuñi ra chi yo ta cuaha xaan chaha sahá ra ticahnu iñi chi yo. ⁹Tatu chaá noo ñáyivi vehe ndo, vaha tyiñuhu ndo chi ñu ta ma cuñi ndo tyi sayangá ñu chi ndo. ¹⁰Ta tahan tahan yo na sacuvi yo tyiño nuu inga yo, yoso cuhva cha chahá Nyoo chi yo. Vatyí cuñi chi cha cotyiño yo siin siin cha vaha cha chahá ra chi noo noo yo cha cuenda cha vaha chi inga tahan yo. ¹¹Tatu chahá Nyoo vatyí ñihi vahun tuhun cahun chihin ñáyivi, cahan soco maa maa ri tuhun cha chahá Nyoo. Tatu chahá ra tyi sacuvun tyiño nuu ñáyivi, na sacuvun chihin fuerza cha chahá ra. Tandíhi cha sacuví ndo, sacuvi ndo tacuhva vatyí chihin tandíhi cha nyacuví ndo sacahnú ndo chi Nyoo cha cuenda ra Jesucristo. Chi maa Nyoo tahán chi sacahnu yo. Ta na cunyaca

ñaha ra chihin tunyee iñi ra tyicuan ri maa. Ta na cuvi chi tyicuan caa.

Cuví cusii cuñi yo tatu nyehé yo tindoho cha cuenda ra Cristo

¹²Yañi, cuñi xain chi ndo. Ma iyo xaan cuñi ndo tatu vachi tindoho ñihi siqui ndo. Ma cuñi ndo vatyí ña tahán chi nyehe ndo tindoho. ¹³Soco cusii cuñi ndo vatyí cuví nyehe ndo tindoho tari nyehe ra Cristo tindoho. Vatyí tyicuan caa ta cuvi cusii tucu cuñi ndo na nyehe ndo cha cahnu cuví ra quivi cuquichi ra. ¹⁴Tatu cahán ña vaha ñu siqui ndo vatyí nyicón ndo chi ra Cristo, cusii cuñi ndo, vatyí tyaqui xaan nyaá Tatyí li chihin ndo. Maa ñu cuan cahán ña vaha ñu siqui ra Cristo, soco nyoho sacahnú ndo chi ra. ¹⁵Soco tatu nyehé ndo tindoho cha tyicuan caa, vaha, ta ñima ca cha nyehé ndo tindoho cha cuenda cha chahñi ndo, o cha suhu ndo, o cha sacuvi ndo cha ña vaha, o cha tyihí ndo chi ndo nu ña tahán chi. ¹⁶Soco tatu nyehé ndo tindoho cha cuenda cha yihí ndo cuenda ra Cristo, ma cucahan nuu ndo. Soco sacahnu ndo chi Nyoo, vatyí chahá chi cuhva nyehe ndo chiin tindoho cha cuenda maa ra Cristo.

¹⁷Vatyí cha chaá quivi cha quichahá sacutuñi Nyoo chi tandíhi ñáyivi. Ta xihna ca chi yoó cha cuví yo ñu yihí cuenda ra. Soco tatu tyehe caa tachí tuñi Nyoo chiin ri chi maa yo, ¿yoso caa cucuvi chi ñu cha ña quichahá tuhun Nyoo? ¹⁸Tatu yii cacú ánimo ñu vaha, ¿yoso caa cucuvi chi ñu quiñi iyó, ñu iyó cuatyí? ¹⁹Yucuan chaha tatu nyehé ndo tindoho cuhva cuñi Nyoo, cuñi chi cha sañihi ca ndo sacuvi ndo cha vaha. Ta tyaa ndo ánimo ndo ndaha Nyoo. Maa ra savahá chi yo, ta maa ra ndicha tuhun cahán ra ta cusacuví ra tari cuhva catyí ra.

Nu chahá ra Pedro tuhun chi yo

5 Yucuan chaha chahí tuhun chi ra chahnu nu nyicú ndo. Vatyí ra chahnu cuví tucu yuhu. Ta cuví cha ndaa vatyí nyehí tandihí tindoho cha cuví chi ra Cristo. Ta cucutahin chihin tandihí ca ra quiví cunyicu yo chihin ra Cristo na quichi ra inga chaha chihin cha cahnu cuví ra. ²Tari noo ra sahá cumi mbee, tyicuan caa saha cumi ndo chi ñu yihí cuenda Nyoo ñu yihí ndaha ndo. Ta sacuvi ndo chihin cha iyo vaha iñi ndo tari cuhva cuñí Nyoo, ta ñima chihin fuerza. Ta ni ñima cha cuenda cha cuñí ndo xuhun. Soco sacuvi ndo tyiño chihin cha ñi iñi ndo. ³Ta ñima tari cha maa ndo nyacá ñaha ndo chi ñu sahá cumi ndo. Soco chihin cuhva vaha iyó ndo chihin Nyoo, sañaha ndo chi ñu cuví mbee sana Nyoo yoso caa tahán chi coo ñu. ⁴Ta quiví quichi ra cuví nuu chi ra sahá cumi mbee, cunaquehen ndo noo cha vaha, noo cha tyaquí cha cucuhva Nyoo chi ndo. Noo cha ma tivi ca maa.

⁵Tyicuan caa tucu nyoho ñu tyivaa, quichaha ndo chi ñu chahnu. Ta ñima iin ri maa ñu tyivaa soco tandihí ri ndo quichaha ndo chi tahan ndo. Ta ndahvi saha ndo añima ndo. Vatyí: Nyoo ña cuñí nyehe ra chi ñu cahnu sahá chi.

Soco tyinyeé ra chi ñu ndahvi sahá chii. ⁶Ndahvi saha ndo añima ndo nuu Nyoo. Ta cuhva ndo chi ndo na cunyaca ñaha ra chi ndo tacuhva cuví sacahnu ra chi ndo quiví cha tahán chi. Tyí maa ra iyó xaan fuerza chi ra. ⁷Cuhva ndo tandihí tindoho cha chicá xiñi ndo chi Nyoo. Vatyí maa ra ñiñi cuñí ra chihin ndo.

⁸Cachi cohon iñi ndo ta saha vaha ndo cuenda nya cha vaha ta nya cha ña vaha, vatyí cuihna, ra xaan iñi chi ndo, chicá noo ra tari noo ndicaha xaan nanducú ti

yóo chi cachi ti, tyicuan caa chicá noo ra ña vaha, nducú xaan ra cuhva saha ganaa ra chi ndo. ⁹Soco ñihi cuñanyaa ndo chihin cha ñi iñi ndo chinó iñi ndo chi Nyoo tacuhva cuví chasaha ndo chi ra ña vaha. Ta ñacoto ndo vatyí tandihí ñu ñohó cuenda ra Cristo nicahnu ñuhu ñayiví, nyehé tucu ñu cuan tindoho tari maa ndo. ¹⁰Soco Nyoo tyinyeé ra chi yo, ta cha yahá nyehe ndo tindoho suhva ri quiví, Nyoo cusanducuiti ca ra chi ndo, ñihi ca cunicunyyaa ndo chihin ra ta cunacuhva ca ra fuerza chi ndo. Ta ican Nyoo cuví ra chahá tandihí cha vaha chi yo ta maa ra cana chi yo tyí cu iin ri yo chihin ra Cristo tacuhva coo yo nu tyaquí chihin ra tyicuan ri maa. ¹¹Na sacahnu yo chi ra ta na cunyaca ñaha maa ra tyicuan ri maa. Ta na cuví chi tyicuan caa.

Nu ndihí chahá ra Pedro nocumi chi ñu

¹²Sacuhín carta ihya chi ndo chihin ra Silvano, yañi yo. Ta cha cuenda chi yuhu, maa ra cuví noo ra ñi xaan iñi nyicón chi ra Cristo. Tyai suhva nu tutu ihya chi ndo vatyí chahí tuhun chi ndo ta catyí chi ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñí ra chi yo. Ma saña ndo ihya.

¹³Vachi nocumi chi ndo sahá ñu yihí cuenda Nyoo nya nu cuví ityi Babilonia. Tari nacachi Nyoo chi maa ndo, tyicuan caa nacachi tucu ra chi ñu cuan. Ta vachi nonga nocumi sahá ra Marcos sehi cha cuenda Sutu Mañi yo.

¹⁴Cuhva ndo nocumi chi noo noo tahan yo chihin cha cuñí ndo chi ñu.

Na coo cha taxi ri cuñí añima tandihí ri ndo cha iin ri cuví ndo chihin ra Jesucristo.

Ta na cuví chi tyicuan caa.

Carta Cha Cu Uvi Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaá ra Pedro noo tutu chi ñu yihí cuenda Nyoo

1 Yuhu ra Simón Pedro sacuví tyiño nuu ra Jesucristo. Ta cuví noo apóstol chi ra. Cuñí chi catyí tyi tachí ra chii vatyí caque tyiño ra. Tyaí tutu ihya chi nyoho cha chinó iñi ndo chi Nyoo tari cuhva cha tyaquí chinó iñi nyuhu. Vatyí yucuan cuví cha chino iñi yo vatyí vaha ra Jesucristo, ra cuví Nyoo, ra sacacú chi yo. ²Na naquehen ca ndo cha vaha cha chahá Nyoo chi yo. Ta na coo ca cha taxi ri ñanima ndo cha cuenda cha ñohó nuu ndo chi Nyoo ta chi Sutu Mañi yo Jesús.

Yoso caa coo ñu yihí cuenda Nyoo

³Nyoo chihin tunyee iñi ra, chahá ra tandihí cha chiñuhú chi yo tacuhva cuví coo cachi yo nuu ra ta saha yo ñáyivi chi ra. Tandihí ihya ñihí yo cha cuenda cha chicohon nuu yo chi ra cha caná chi yo. Vatyí chicohon nuu yo tyi cahnu cuví ra ta tyaquí xaan cha sacuví ra. ⁴Ta chihin tandihí ihya, chahá ra cha catyí ra tyi cucuhva ra chi yo. Ta cahnu xaan ta yahví xaan nyaá cuan. Vatyí cha cuenda ihya nanduvi yo tari maa ra. Vatyí sacanyaha ra cha quiñi caa cha quichí cuví iñi yo, ta ma tiví yo tari tiví ñáyivi iyó siquí ñuhu ñáyivi ihya. ⁵Ta yucuan chaha cuñí chi cha chinó ca iñi yo chi Nyoo ta nducu yo cuhva cha coo cachi yo. Yaha cuan cuñí chi cha nducu yo cuhva ta cutuñi vaha iñi yo cuhva cuñi Nyoo chihin yo. ⁶Ta yaha cuan cuñí chi cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama iñi yo. Yaha cuan ta nducu yo cuhva cha cuñi ca coo yo nuu Nyoo. ⁷Yaha cuan ta nducu yo cuhva

cha cuñi yo chi tahan yo. Yaha cuan nducu yo cuhva cha cuvita xaan ñanima yo chihin tandihí ñáyivi.

⁸Tatu tyehe caa iyó ndo ta tyicuan ri nducú ndo cuhva cha coo tandihí ihya chi ndo, Nyoo cucotyíño xaan ra chi ndo. Ta tatu sacuvi ndo tyehe caa, ña caha xaan ri chicohon nuu ndo chi Sutu Mañi yo Jesucristo. ⁹Soco ñu cha ñahri ihya iyó chi, cuví ñu tari noo ra cuaa. Ña cutuñi iñi ñu cha tahán chi coto ñu. Ta naá iñi ñu tyi sandachí Nyoo cuatyí ñu ta ityi chata ca. ¹⁰Yucuan chaha yañi, saniñi ndo coo ndo tyehe caa. Tyicuan ta cundicha vaha tyi caná Nyoo chi ndo ta nacachí ra chi ndo. Vatyí tatu sacuví ndo tyehe caa, ma canacava maa ndo. ¹¹Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuví ra sacacú chi yo.

¹²Yucuan chaha cuasanicohon que iñi ndo tuhun ihya, vasi cha chitó ndo, ta ñi iñi ndo sacuví ndo tuhun ndicha cha cutuhva ndo. ¹³Ta cuhva cha cuñí mai, vatyí cha ni ri ca cha iyé, vaha sanicohin iñi ndo coto naa iñi ndo tuhun ihya. ¹⁴Vatyí chité tyi ña naha ca ta cusandoi ñáyivi ihya. Vatyí tyicuan caa sacoto Sutu Mañi yo Jesucristo chii. ¹⁵Soco cuasaniñi tacuhva vatyí tatu yaha chihí soco nicohón iñi ndo tuhun ihya.

Nu nacatyí ra Pedro yoso caa nyehe ra cha cahnu cuví ra Cristo

¹⁶Ñima tyisu ri canatava ndi quivi sacoto ndi tuhun ra Jesucristo chi ndo. Vatyí cha nyehe vaha ndi chihin chiti nuu ndi cuví. Vatyí nyehe ndi cha cahnu xaan cuví Sutu Mañi yo Jesucristo. Ta sacoto ndi chi ndo tyi iyó xaan tunyee iñi chi ra ta caquichi ra inga chaha. ¹⁷Vatyí nyehe ndi nu sacahnú xaan Nyoo Sutu yo chi ra. Ta tyaquí xaan tyaquí xaan cuví nu cahan Nyoo ta catyí ra: “Ícan ihya Sehi. Ta cuñí xain chi ra. Ta siñ cuñí chi-

hin ra”, catyí Nyoo tuhun ra Jesús quívi cuan. ¹⁸Ta nyuhu chiñi ndi ndusu Nyoo cha quichi ityi andívi quívi cha nyicú ndi chihin Sutu Mañi yo nu yucu ii cuan.

¹⁹Ta siin ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahán chi tuhun ra Cristo. Ta vaha sacuví ndo tatu quichahá vaha ndo tuhun ihya. Vatyí cuví chi tari noo ñuhu ndichin cha cayú nu ñaa iñi nyacua nya cundichin ta caña ra Cristo tari cañá tiñoó cahnu cha ñaa ca, vatyí sandichín ra añima yo. ²⁰Soco coo vaha ndo vatyí cha minoo tuhun ri yo, ma cuví catyí yo ñáá cha cuñí chi catyí noo tuhun cha nyaá nu tutu Nyoo. ²¹Vatyí ra cacuvi profeta ta cha naha, ña cahán ra cuhva cuñí ri maa ra. Soco cuhva cuñí Nyoo cahán ra. Ta Tatyí li saquehen ityi chi ra.

Ra casañahá cha ña ndicha

(Judás 4-13)

2 Soco cachiyo tucu ra profeta cuendu nu nyicu ñu Israel ta cha naha, cacatyí ra tyi cuví ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví satívi chi ndo. Ta cuacatyí ra tyi ña ndicha Sutu Mañi yo ra sacacu chi ra. Yucuan chaha numi ri cucunaa ra cuan. ²Ta cuaha xaan ñu cucunyicon ñu chi ra chihin cha quiñi caa cha sacuví ra. Ta cuaha xaan ñu cucahan ña vaha ñu siqui tuhun cha ndicha vaha ra Cristo. ³Ta chaha cha iyo cuñi ra xuhun, ta cusandavi ñaha ra chi ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chi ra vatyí cha naha iyó maa tuhun cha cunaa ra.

⁴Vatyí ni ri chi ángel cha chicoo cuatyí quívi cuan ta ña saha Nyoo ticahnu iñi. Soco tuchi ra chi ra anyaya. Ta sandoo ra chi ra nu ñaa iñi, nuñí ra chihin cadera nyacua nya quívi cutuñi chi ra nuu

Nyoo. ⁵Ta ni ña saha Nyoo ticahnu iñi chi ñu chiyo ta cha naha. Yucuan chaha tachi ra savi xaan siqui ñáyivi quiñi iyó cuan. Ta sacacu ra chi noo tuhun ri maa ra Noé, ra cha cahan tuhun vatyí coo yo noo ñayivi cachi. Ta cacu tucu ucha ca ñáyivi ñandihi. ⁶Ta tyicuan caa tucu sacunaa Nyoo ñuu Sodoma ta ñuu Gomorra. Vatyí chahmi ra nyacua nya cha ndihi maa nduvi ñiyaa. Tacuhva vatyí cunyehe ñáyivi quiñi iyó cha cucoo nu cuahan ca chi. ⁷Soco sacacu ra chi ra Lot vatyí cuví ra noo ra vaha nuu ra. Ta cuihya cuñi ra Lot nyehé ra cuhva iyó ñu quiñi iyó cuan. ⁸Ta ndi quívi cuihya cuñi añima ra Lot quívi chiyo ra ñuu cuan, cha cuenda cha nyehe ra ta chiñi ra cha quiñi caa nyacuví ñu cuan. Vatyí maa ra, ra vaha cuví ra. Ta maa ñu maa maa ri cha ña vaha nyacuví ñu. ⁹Ta tyicuan caa cuví sacacu Nyoo chi yo tatu iyó yo cuhva cuñi ra. Ta ñu quiñi iyó naquehen vaha Nyoo chi ñu vatyí cutachi tuñi ra chi ñu quívi cutuñi chi ñu nuu ra.

¹⁰Ta yaha ca cutachi tuñi Nyoo chi ñu nyicón cha ña vaha cha cuñi coño ñuhu, ñu ña cuñi cha cunyaca ñaha Sutu Mañi yo chi. Ta cahnu sahá ñu chi ñu ta sacuví ñu maa ri cuhva cuñi maa ñu. Ta ñu cuan ña yuhví ñu cahan ña vaha ñu siqui ra nahnu ca ican saha maa ñu cuví ri siqui ángel, cuví ri siqui tatyí ña vaha, cuví ri siqui Nyoo. ¹¹Soco ángel, cahnu ca cuví ra cha nuu ñáyivi, soco ña cacañá iñi ra cahan ña vaha ra siqui ra nahnu ca cuan chihin nuu Sutu Mañi yo.

¹²Soco ra cahán cuendu nu nyicú ndo cuví ra tari quití cha ña cutuñi iñi ta sacuví ti cuhva cuñi maa ti. Vatyí quití, ¿ñáá cuenda iyó ti? Iyó ti vatyí tiin rayii chi ti, ta cahni ra chi ti. Tyicuan caa maa ra cuan. Cacadán ña vaha ra siqui cha ña cutuñi iñi ra. Ta cucuvi ra tari chihí quití. ¹³Cunyehe ra tindoho tari sanyehé maa ra tindoho chi inga ñáyivi. Ta si xaan cacuñi ra chihin cha quiñi caá ny-

acuví ra nu tuví. Ticahan nuu chahá ra, tatu cha cutahan ra chihin ndo nu iyó ndo vico. Nyaá vavaha ra tusii iñi. Soco ña ndicha cuhva sañahá ra.

¹⁴Ta tandihi ri ñusihi cha nyehe ra ta quichi cuvi iñi ra. Ña chitatú ra cha casacuvi ra cha quiñi caa. Casandaví ñaha ra chi ñu ña ñihi nyaá chihin Nyoo. Yatyí xaan ra cha nducu ra cuhva maa maa ri cha cuenda maa ra. Nyaá cha cu-naa ndihi ra minoo quivi. ¹⁵Casandoo ra cuan ityi vaha ta naquehen ra ityi nu cucunaa ra. Casacuví ra tari sacuví ra Balaam sehe ra Beor. Vatyí cuñí ra Balaam saha ganaa ra xuhun chihin cha ña vaha cha nyacuví ra. ¹⁶Tyicuan ta noo burra nacahan ti chihin ra, tari cahán ñáyivi, ta ña chahá ti cha cuhun ca ra Balaam chihin cuhva loco chicá xiñi ra.

¹⁷Ta tyicuan caa tucu maa ra cha ny-icú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihi chi. Soco cha nyaá cha cohon ra nu ñaa iñi cahnu tyicuan ri maa cha cuenda cha nyacuví ra tyicuan caa. ¹⁸Yaa vavaha cahán ra soco tandihi tuhun cahán ra cha ñima ri tuhun cuví. Ta chihin vicio ta chihin cha quichi cuvi iñi coño ñuhu yo casandaví ñaha ra chi ñu cha yahá quitá mahñu cha quiñi caa. ¹⁹Ta tyiyuhú ndihi ra chi ñu na cunyacuví ca ñu cha quiñi caa vatyí yori nyacá ñaha chi ñu, catyí ra. Soco suri maa ra chahá ra cha cunyaca ñaha cha quiñi caa chi ra. Vatyí tatu chahá yo cha cunyaca ñaha noo cha cunyaca ñaha chi yo, musu cuan cuví chi yo. ²⁰Vatyí ñu cha chicohon nuu chi Sutu Mañi yo Jesucristo, ra sacacú chi yo, cha yahá sandoo ñu cha quiñi caa ñáyivi ihya. Soco tatu natiin tucu ñu tuhun ñáyivi ihya inga chaha, quiñi ca nanduvi ñu ta ñima ca ta cuvi maa. ²¹Vaha taxin ca tyehe ta ña chicohon nuu ñu ityi vaha cuan, ta ñima ca cha yahá chicohon nuu ñu ta nacuhva ñu

chata ñu tuhun cha chahá Nyoo chi ñu. ²²Soco cuví chi ñu tari cuhva catyí noo tuhun cha iyó ñáyivi: “Ina nduchan ti, ta nacachí tucu ti cha nduchan ti. Ta quiñi chityí ti, ta ndihví tucu ti nu nyahyu inga chaha.”

Quivi cuquichi tucu Sutu Mañi yo

3 Yañi, cuñí xain chi ndo. Ta ihya cuví carta cha cu uvi sacuhín chi ndo. Ta nu ninduvi tahan carta chahí tuhun chi ndo tacuhva vatyí caca vaha xiñi ndo. ²Ta ñicohon iñi ndo tuhun cha cahan ra cacuví profeta Nyoo, ta cha naha. Ta ñicohon tucu iñi ndo tuhun cha sañahá nyuhu chi ndo. Vatyí cuví ndi apóstol cuenda Sutu Mañi yo Jesucristo ra sacacú chi yo.

³Çoto xihna ndo vatyí nu cundihi ca chi quivi cuquichi ñáyivi cucuacu nyaa ñu tuhun Sutu Mañi yo. Cucoo ñu yoso cuhva cha quiñi caa cha cuñi coño ñuhu ñu. ⁴Ta cucatyí ñu: “Ra Jesucristo catyí ra vatyí cuquichi ra inga chaha. ¿Ta nya nyaá ra vityin? Vatyí nyata cachihí sutu chahnu yo ta nyata chino ñuhu ñáyivi ta nya vityin ta cuhva caa ri maa”, cucatyí ñu chi ndo. ⁵Vatyí maa ñu ña cuñí ñu coto ñu vatyí ta tyembu chahnu cahan Nyoo ta savahá ra andivi ta ñuhu ñáyivi. Quitá ñuhu ñáyivi chichi ndutya ta chihin ndutya chino chi. ⁶Soco cha yahá savahá Nyoo ñuhu ñáyivi ta suri chihin ndutya cuanaa ñáyivi cuan quivi coon savi xaan. ⁷Soco andivi ta ñuhu ñáyivi cha iyó vityin sahá cumi vaha Nyoo vatyí suri chihin ñuhu cucayu chi quivi cutuñi chi ñáyivi nuu ra. Tyicuan ta ñuhu cha cayu cuan cusanaa chi chi ñu ña quichahá chi Nyoo.

⁸Soco yañi, cuñí xain chi ndo. Ta cuñí vatyí ma naa iñi ndo vatyí cha cuenda Sutu Mañi yo noo quivi tari cha noo mil cuiya cuví cuan, ta cha noo mil cuiya tari cha noo quivi cuví cuan chi ra. ⁹Ñima cha ña cuñí ñaha Sutu Mañi yo quichi

ra. Vasi yihí ñu chicá xiñi ñu cha tyicuan caa. Soco Sutu Mañi yo nyatú ra chi yo vatyi ña cuñi ra cha cunaa ni noo yo. Cuñi ra vatyi tandihi yo ndu uvi iñi yo cuatyí yo ta nasama yo cuhva iyó yo.

¹⁰Soco quivi cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyi sana iñi yo ta cuquichi ra. Tyicuan ta cucunaa andivi. Iyo xaan cucachan cuhva cuan. Ta cucayu tandihi cha iyó andivi. Cundutya ndii cuii chihin cha ihñi xaan. Ta tyicuan caa cucayu tucu ñuhu ñayivi ta tandihi cha iyó nuu chi.

¹¹Ta tyicuan caa cutani tandihi. Yucuan chaha cuñi chi vatyi çachi coo yo tari cuhva cuñi Nyoo. ¹²Cuatú tuhva yo na chaa quivi quichi Nyoo. Nducu yo cuhva cha sanumi ra quichi ra. Quivi cuan cunaa andivi chihin ñuhu. Tandihi cha iyó cundutya chihin cha ihñi. ¹³Soco yoó nyatú yo noo andivi chaa ta noo ñuhu ñayivi chaa cha catyi Nyoo tyi cuhva ra. Ta maa maa ri cha vaha chi Nyoo cucoo yucuan.

¹⁴Yucuan chaha yañi, cha ni ri ca cha nyatú ndo na quichi Sutu Mañi yo, saníñi ndo tacuhva vatyi quivi quichi ra, vii iyó ndo chihin ra ta ñahri cha iñi ndo

ta ñahri cuatyí ndo. ¹⁵Ta tñin vaha ndo cuenda, vatyi Sutu Mañi yo nyatú ra chi yo vatyi cuñi ra vatyi cuaha ca ñáyivi cacu. Ta tyicuan caa tucu catyi ra Pablo yañi yo nu tutu cha sacuhun ra chi ndo. Vatyi chihin cha chiñi tuñi cha chaha Nyoo chi ra tyaa ra. ¹⁶Ta tandihi ri nu carta ra ta cahán ra tuhun ihya chihin ndo. Vasi yihí tuhun cha yii vavaha cutuñi iñi yo. Ta ñu cha ña cutuñi iñi, ñu cha ña ñihi nyaá chihin Nyoo, siin caa cuhva natyihí tuñi iñi ñu tuhun cuan. Ta suri tyicuan caa sacuví tucu ñu chihin tuhun cha tyaa inga ra nu tutu tuhun Nyoo. Siin caa cuhva natyihí tuñi iñi ñu. Ta cha tyicuan caa, sacunaá ñu suri chi maa ñu.

¹⁷Yucuan chaha yañi, vityin cha chitó ndo tuhun ihya cha ni cumañi ca cuvi, saha ndo cuenda chi ndo, coto cunyi-con ndo cuhva sandaví ñaha ra quiñi caa cuan, ta coto sandoo ndo cuhva vaha cha cuahan ndo. ¹⁸Soco çohon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iñi cha chahá ra chi ndo. Na sacahnu yo chi ra vityin ta tyicuan ri maa. Ta na cuvi chi tyicuan caa.

Carta Cha Xihna Ri Cha Tyaá Ra Apóstol Juan

Ñayiví chaa coo yo

1 Ihya tyaá ndi tuhun cha cha iyó maa quiví cha quichaha tandihi. Ta cuví chi tuhun cha chiñi ndi ta cha nyehe ndi chihin nuu ndi; vatyi nyehe ndi ta tiñ ndi chihin ndaha ndi. Ta ican tuhun ihya cuví tuhun cha chahá ñayiví chaa coo yo. ²Ñayiví chaa ihya quetuví quiví quichí ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayiví chaa cha ma naa ca maa ihya chi ndo. Vatyi ñayiví ihya, nyaá chi chihin Sutu yo Nyoo, ta vityin tuví chi nu nyicú yo. ³Nacatyí ndi chi ndo cha nyehe ndi ta cha chiñi ndi tacuhva na cu iin ri ndo chihin ndi, tari maa ndi, ndicha cuui vatyi iin ri cuví ndi chihin Sutu yo Nyoo ta chihin Sehe ra, ra Jesucristo. ⁴Ta tyaá ndi tuhun ihya chi ndo tacuhva na coo tandihi tusii iini cha chahá Nyoo chi ndo.

Nyoo, ñuhú ndichin cuví ra

⁵Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhú ndichin iyó nu nyaá ra. Ta ñahri cha ñaa iini, (ñahri cha ña vaha yihí iini ra cuví cuan). ⁶Tatu catyí yo vatyi iin ri cuví yo chihin ra, soco sacuví yo cha ña vaha, nu ñaa iini chicá noo yo cuví cuan. Sandaví ñaha yo. Ta ñahri tuhun ndicha cahán yo. ⁷Soco tatu nu ndichin iyó yo, tari maa Nyoo iyó ra nu ndichin, tyicuan ta iin ri cuví yo chihin tahan yo, ta niñi ra Jesucristo Sehe Nyoo, nacatyá chi ndii cuui maa cuatyí yo.

⁸Tatu catyí yo vatyi ñahri cuatyí yo, suri chi maa yo sandaví ñaha yo, ta ñahri cha ndicha nyaá añima yo. ⁹Soco tatu nahmá yo cuatyí yo nuu Nyoo, yihí iini

yo chi ra vatyi vaha ra ta ña sandavi ñaha ra, soco sacuví ra cuhva catyí ra, ta cusaha ra ticahnu iini cuatyí yo ta cusandachi ra ndii cuui maa cha quiñi caa yo. ¹⁰(Nyoo catyí ra tyi iyó cuatyí yo), ta tatu catyí yo vatyi ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá añima yo.

Ra Cristo cuví ra cahán chaha yo

2 Sehe nyihi, sacoté tuhun ihya chi ndo, tacuhva ma sacuví ndo cuatyí. Soco tatu chicoo cuatyí minoo ndo, ma yuhvi ndo, vatyi iyó ra cahán chaha yo nuu Nyoo. Ta ican ra cuví ra Jesucristo, ra vaha. ²Ta maa ra cuví ra chahnyá cuatyí yo, vatyi chihí ra tyiño nuu yo cha cuenda cuatyí yo. Ta ñima cha cuenda maa ri maa yo, soco cha cuenda tandihi ñáyivi.

³Tatu quichahá yo tuhun cahán Nyoo, ñohó nuu yo chi ra. ⁴Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá añima ra. ⁵Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha nii añima ñu. Ta cha tyicuan caa chitó yo tyi iin ri cuví yo chihin ra. ⁶Yóo cha catyí vatyi iin ri cuví chihin Nyoo, tahán chi coo ra tari cuhva chiyo maa ra Jesucristo quiví chica noo ra siqui ñuhu ñayiví.

Tuhun chaa cha cuñí yo chi tahan yo

⁷Yañi yo, ñima noo tuhun chaa sacoté chi ndo, soco cuví chi noo tuhun chahnu cha chitó ndo nyata quiví xihna ri. Ta ican tuhun chahnu ihya cuví tuhun chiñi ndo. ⁸Soco tari noo tuhun chaa cuví chi. Ta sacuví ra Cristo, ta chaha ra cha sacuví tucu maa ndo ñandihí. Ta cha tyicuan caa, cha ñaa iini cuahan nocuee chi. Ta cha ndichin Nyoo cha sandundichín chi.

⁹Ñu cha catyí vatyi nyaá ñu nu ndichin, ta ña cuñi nyehe ñu chi tahan ñu, ni nyaá ca ñu nu ñaa iñi. ¹⁰Ta ñu cuñi chi tahan, nu ndichin nyaá ñu. Ta ñahri maa cha cuví sanacava chi ñu nu cuatyí. ¹¹Soco ñu cha ña cuñi nyehe chi tahan, nu ñaa iñi nyaá ñu. Ta ña chitó ñu nya ityi cuahan ñu vatyi ña cuví nyehe ñu vatyi tari cha cuaa ñu.

¹²Sacuhín tuhun ihya chi nyoho, ra cuatyaa sehi. Vatyi cha yahá saha Nyoo ticahnu iñi cuatyí ndo cha cuenda cha chihí ra Jesucristo tyiño nuu ndo. ¹³Ta chi nyoho, cha cuví ndo sutu, sacuhín tuhun ihya chi ndo, vatyi ñohó nuu ndo chi ra iyó nyata cumañi cacu ñuhu ñayiví. Ta chi nyoho, ra tyivaa, sacuhín tuhun ihya vatyi cuví chasaha ndo chi ra ña vaha.

Ta chi nyoho, cha cuví ndo ra cuatyaa sehi, sacuhín tuhun ihya vatyi ñohó nuu ndo chi Sutú yo Nyoo. ¹⁴Sacuhín tuhun ihya chi nyoho cha cuví ndo sutu, vatyi ñohó nuu ndo chi ra cha iyó nyata cacu ñuhu ñayiví. Ta sacuhín tuhun ihya chi nyoho ra tyivaa vatyi nyaá xaan fuerza chi ndo. Ta tuhun Nyoo caá aña ndo. Ta cuví chasaha ndo chi ra ña vaha.

¹⁵Ma cuñi ndo cha quiñi caa cha iyó ñayiví ihya. Ni ma cuñi ndo cha iyó siqui ñuhu ñayiví. Vatyi ñu cuñi tandíhi ihya, ña cuñi ñu chi Nyoo. ¹⁶Vatyi tandíhi cha iyó ñayiví ihya, cha ña vaha cha quichi cuvi iñi coño ñuhu yo, ta cha nyehe yo ta quichi cuvi iñi yo coo chi yo, ta cha cuñi yo cuyaa yo chihin cha iyó chi yo, tandíhi ihya ñima cuhva chahá Sutú yo Nyoo chi yo cuví, soco maa maa ri cha chahá ñayiví ihya cuví. ¹⁷Ta ñayiví ihya cuahan sandíhi chi, chihin tandíhi cha quiñi caa cha quichi cuvi iñi ñayiví. Soco ñu cha sacuví cuhva cuñi Nyoo, tyicuan ri maa cuacoo ñu chihin ra.

Ra xaan iñi chi ra Cristo

¹⁸Sehe nyihi, cha nyaá yo nu cuandíhi quivi. Ta nyoho chiñi soho ndo vatyi vachi noo ra cha ña cuñi nyehe chi ra Cristo, ta vityin cha cuaha xaan ra ña cuñi nyehe chi ra Cristo iyó vityin. Yucuan chaha nacoto yo vatyi cha nyaá yo nu cuandíhi quivi. ¹⁹Maa ra nu nyicú yo quita coyo ra, vatyi ñima ra cuenda yo cuví chi ra. Vatyi tyehe ta ra cuenda yo cacuví chi ra, candoó ra chihin yo. Soco cuahan coyo ra tacuhva quetuvi vatyi ña tandíhi ñayiví ta cuenda yo cuví ñu.

²⁰Soco chi nyoho chahá ra Cristo Tatyí Ii Nyoo cunyaa aña ndo. Ta chitó ndo tandíhi. ²¹Sacuhín tuhun ihya chi ndo ñima cha cuenda vatyi ña chitó ndo cha ndicha, soco vatyi chitó ndo. Ta ni noo cuendu ma quita cahan ñu sacuví cha ndicha.

²²¿Yóo cha cuví ñu cuendu? Ñu catyí vatyi ra Jesus ñima ra Cristo cuví ra. Ta ñu cha catyí tyehe caa, ñu xaan iñi chi ra Cristo cuví ñu. Vatyi ña chinó iñi ñu chi Sutú yo Nyoo, ta ni ri chi ra Jesucristo Sehe Nyoo. ²³Tandíhi cuii ñu ña chinó iñi chi Sehe Nyoo, yori Sutú yo Nyoo nyaá chihin ñu. Soco ñu catyí vaha chi ñayiví vatyi ra Jesucristo cuví Sehe Nyoo, iñi ri cuví ñu chihin Nyoo ñandíhi.

²⁴Yucuan chaha nyoho, tuhun cha chiñi ndo nya quivi xihna ri, naquehen vaha ndo chichi aña ndo. Tatu ndoó chi chichi aña ndo, iñi ri cuví ndo chihin Sehe Nyoo ta chihin Sutú yo Nyoo ñandíhi. ²⁵Ta ra Jesucristo catyí ra vatyi cuhva ra noo ñayiví chaa cha ma naa ca maa coo yo.

²⁶Sacuhín tuhun ihya chi ndo cha cuenda vatyi cuaha xaan ra sandaví ñaha chi ndo iyó. ²⁷Soco ra Jesucristo chahá ra Tatyí Ii Nyoo cha cunyaa aña ndo, ta ña chiñuhú ca cha sañaha ni noo ñayiví chi ndo. Vatyi suri maa Tatyí Ii Nyoo sañahá chi ndo ndíi cuii maa

tuhun. Ta cha ndicha cuví, ñima cuendu cuví. Yucuan chaha sañihi ca ndo cu iin ri ndo chihin ra Cristo tari cuhva sañahá Tatyí li Nyoo chi ndo.

²⁸Ta vityin nyoho, ra cuatya seahi, cuiñyañaa yo chi ra Cristo tacuhva vatyí nachaa chí quiví quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta siin ri tacuhva cha ma tahan yo ticahan nuu nuu ra quiví quichi ra. ²⁹Cha chitó ndo vatyí ra Cristo vaha ra. Chitó tucu ndo vatyí tandihi ñu cha nyacuví cha vaha, sehe Nyoo cuví chi ñu.

Ñu cha cuví sehe Nyoo

3 Nyehe ndo, yoso cha cuñí Sutu yo Nyoo chí yo, vatyí nasaha ra sehe ra chí yo. Ta catyí ra: “Nyoho, sehi cuví chí ndo.” Yucuan chaha ñáyivi, ña cuñí nyehe ñu chí yo vatyí tyicuan caa tucu, ña cuñí nyehe ñu chí maa ra. ²Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo vatyí nachaa chí quiví quichi ra Jesucristo, cucuvi yo tari maa ra, vatyí cunyehe vaha yo chí ra tari cuhva caá ra. ³Ta tandihi yo cha nyatú yo cha cucuvi tyehe caa, nducú yo cuhva ta sandundí ca yo aña yo, tari ndii maa Sutu Mañi yo Jesucristo.

⁴Tandihí ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chí cuan. ⁵Cha chitó ndo vatyí ra Cristo quichí ra ñayiví tacuhva tinyaa ra cuatyí yo, ta maa ra ñahri cuatyí ra. ⁶Tandihí yo cha iin ri cuví yo chihin ra, ña sacuví yo cuatyí. Soco ñáyivi cha sacuví cuatyí, ta quehen cuenda ca ñu chí ra, ni ta cohon ca ra aña ñu. ⁷Sehe luhli, ñaha sandavi ñaha ñáyivi chí ndo, vatyí ñu cha sacuví cha vaha, vaha ñu, tari maa ra Cristo vaha ra. ⁸Soco ñu cha sacuví cuatyí, cuenda ra ña vaha yihí ñu. Vatyí ra ña vaha

sacuví ra cuatyí nyata quiví xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndii cui cha sacuví ra ña vaha.

⁹Tandihí yo cha cha yahá nacacu chaa yo, nanduví yo sehe Nyoo, ta ña sacuví ca yo cuatyí, vatyí ñayiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chí yo. ¹⁰Ta tyehe caa cuví nichon nuu yo chí ñu cha cacuví sehe Nyoo, ta ñu cuví sehe cuihna. Vatyí yóo ñu sacuví cha ña vaha o ña cuñí nyehe ñu chí tahan ñu, ñima ñáyivi cuenda Nyoo cuví ñu.

Na cuñi yo chí noo noo tahan yo

¹¹Vatyí ican ihya cuví tuhun cha chíñi ndo quiví xihna ri: Cha cuñi yo chí noo noo tahan yo. ¹²Ña tahán chí sacuvi yo tari cuhva sacuví ra Caín. Cuví ra noo ra cuenda ra ña vaha. Ta chahñi ra chí yañi ra. ¿Ñáá tuhun chahñi ra chí ra? Cha cuenda vatyí vaha cuhva sacuví yañi ra, ta maa ra Caín chinyacuví ra cha ña vaha.

¹³Yañi yo, ma iyo cuñi ndo tatu ña cuñí nyehe ñáyivi chí ndo. ¹⁴Yoó chitó yo vatyí tari minoo ra chíñi ta nandoto cuví yo vatyí iyó yo noo ñayiví chaa vatyí cuñi yo chí tahan yo. Ñu cha ña cuñí chí tahan, tari quiví ni cuví ca ñu tari noo ra chíñi, ta ta nandoto ca ñu. ¹⁵Yóo ñu cha xaan iñi chí tahan, tari noo ñu chahñi ñáyivi cuví ñu. Ta chitó ndo vatyí ni noo ñu chahñi, ma cuhva Nyoo ñayiví chaa cha ma naa ca maa coo aña ñu. ¹⁶Nicohón nuu yo ñáa cha cuví cha cuñí yo chí tahan yo vatyí ra Jesucristo sañahá ra chí yo. Vatyí maa ra cuñi ra chí yo, ta chahá ra ñayiví ra cha catyí yo. Ta tyicuan caa tucu maa yo, cuñi yo chí tahan yo ta cuhva yo ñayiví yo cha cuenda ñu. ¹⁷Ta tatu yihí yo iyó chíñi chí yo siqui ñuhu ñayiví ihya, ta nyehé yo cumañi cha cumañi

chi tahan yo, ta sahá ri yo cha ña nyehé yo, ¿atu cuñí yo chi Nyoo cha sacuví yo cha tyicuan caa? Ña cuñí yo chi ra cuví chi cuan. ¹⁸ Ra cuatyaa sehi, ñima chihin tuhun yuhu ri yo, cuñí yo chi tahan yo, soco na cuñí yo chi ñu chihin cha sacuví yo tumañi iñi, ta chihin cha nii iñi yo.

Yoso caa sacuví yo ta coo vaha yo chihin Nyoo

¹⁹ Tatu sacuví yo tyicuan caa, chitó yo tyi yihí yo tuhun ndicha. Ta vaha iyó yo chihin Nyoo. ²⁰ Tatu chichi añima yo ta tuví iñi yo tyi iyó cuatyí yo, vihi ca cuví Nyoo, chitó ra cha caá añima yo. ²¹ Yañi, tatu tuví iñi yo tyi ñahri cuatyí yo, ma yuhvi cuñi yo nyehe yo chi Nyoo. ²² Ta ñáá ri cha cacan tahvi yo cuacuhva ra chi yo, vatyi quichahá yo tuhun cahán ra, ta sacuví yo cuhva tahán iñi ra. ²³ Ta ican ihya cuví tuhun chahá ra chi yo: Cha chino iñi yo vatyi ra Jesucristo cuví Sehe ra. Ta cha cuñi yo chi noo noo tahan yo vatyi tyicuan caa tuhun cha chahá ra chi yo. ²⁴ Ta ñu cha quichahá tuhun chahá ra chi yo, iyó ñu cha iin ri cuví ñu chihin ra, ta maa ra iyó ra chichi añima ñu. Ta cha cuenda Tatyí Ii ra cha chahá ra chi yo, chitó yo vatyi nyaá ra chihin yo.

Tatyí Ii Nyoo ta tatyí ña vaha

4 Cuñí xain chi ndo, yañi. Ma chino iñi ndo tandihí ñáyivi cha catyí tyi cuenda Nyoo cahán ñu. Nyehe xihna ndo tatu nacachí tahan cha cahán ñu chihin tuhun Nyoo. Vatyi cuaha xaan ra cha catyí vatyi Nyoo sañahá chi ra. Soco ña ndicha. ² Soco tyehe caa cuví nicohon nuu ndo tatu Tatyí Ii Nyoo sacahán chi ra o ñima. Tandihí ra cha catyí vatyi quichí ra Jesucristo nya gloria ta cacu ra chihin coño ñuhu ñáyivi ihya, ican ra cuan, sacahán Tatyí Ii Nyoo chi ra. ³ Soco ndii cuii maa ñáyivi cha catyí vatyi ra Cristo ña chicá noo ra chihin coño ñuhu ñáyivi ihya, ñima Nyoo sac-

ahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chiñi ndo vatyi nyaá quichi cuan. Ta vityin cha chicá noo chi siqui ñuhu ñáyivi.

⁴ Ra cuatyaa sehi, ñáyivi chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyi cahnú ca ra Cristo, ra nyaá añima ndo ta ñima ca ra ña vaha, ra cha chicá noo siqui ñuhu ñáyivi ihya. ⁵ Maa ñu cuan, ñu cuenda ñáyivi ri ihya cuví ñu. Yucuan chaha cahán ñu tuhun ñáyivi ihya. Ta ñu cuenda ñáyivi ihya tyasohó ñu tuhun cahán ñu. ⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añima, ña cuñí ñu tyasoho ñu. Ta tyicuan caa cuví nicohon nuu yo chi ñu yihí Tatyí Ii Nyoo ta ñu yihí tatyí ña vaha.

Nyoo cuñí xaan ra chi tandihí ñáyivi

⁷ Yañi yo, na cuñi yo chi tahan yo, vatyi Nyoo sañahá ra chi yo yoso caa cha tahán chi cuñi yo chi ñu. Tandihí yo cha cuñi yo chi tahan yo sehe Nyoo cuví chi yo, ta ñohó nuu yo chi Nyoo. ⁸ Soco ñu cha ña cuñi chi tahan, ta cohon nuu ca ñu chi Nyoo, vatyi Nyoo cuñi xaan ra chi yo ta chi tandihí ñáyivi. ⁹ Ta sañahá Nyoo vatyi cuñi ra chi yo chihin cha chahá ra noo Sehe mañi ra tyi quichí ra siqui ñuhu ñáyivi ihya, vatyi cuhva ra noo ñáyivi chaa coo yo. ¹⁰ Nyehe xihna, yoso cha cuñi Nyoo chi yo. Ñima vatyi xihna ca yo cuñi yo chi ra, soco xihna ca maa ra cuñi ra chi yo. Ta tachí ra chi Sehe ra vatyi tacuhva cúvi ra tyiño nuu yo ta cahnú ra cuatyí yo.

¹¹ Nyoho yañi, tatu cuñi Nyoo chi yo cha tyicuan caa, tahán tucu chi cuñi maa yo chi tahan yo. ¹² Vasi ni nonga ñáyivi, ta nyehe ca ñu chi Nyoo, soco tatu cuñi yo chi noo noo tahan yo, Nyoo nyaá ra añima yo. Ta tyicuan caa nii vaha iñi yo cuñi yo chi ra. ¹³ Ta chitó yo vatyi nyaá

yo chichi ndaha ra, ta maa ra nyaá ańima yo vatyí chahá ra Tatyí Ii ra cunyaa ańima yo. ¹⁴Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyiví iyó siquí ñuhu ñáyiví. ¹⁵Tandíhi ñu nachinó ińi chihin cha ñi ińi ñu ta catyí ñu vatyí ra Jesús cuví ra Sehe Nyoo, Nyoo nyaá ra chichi ańima ñu. Ta maa ñu nyaá ñu chichi ndaha ra.

¹⁶Ta yoó cha nacoto yo ta nachino ińi yo tyi Nyoo cuńí ra chi yo, ta chi tandíhi ñáyiví. Ta ñu cha cuńí chi tahan, chichi ndaha Nyoo nyaá ñu. Ta Nyoo nyaá ra chichi ańima ñu. ¹⁷Vatyí tatu cuńí yo chi Nyoo chihin cha ñi ińi yo ma yuhví cuńi yo nyehe yo chi ra, nachaa chi quívi cutuńi chi tandíhi ñáyiví nuu ra. Vatyí tari cuhva iyó maa ra Jesucristo, tyicuan caa iyó yo siquí ñuhu ñáyiví ihya. ¹⁸Nyoo cuńí ra chi yo, ta tatu cuńí yo chi ra, ñahri maa cha yuhví yo. Tatu ñi ińi yo cuńí yo chi Nyoo ña nuńa ca nu quíhi tuhun yuhví ańima yo, vatyí Nyoo tava ñehe ra tandíhi maa cuan. Vatyí tatu yihí cha yuhví cuńi yo, yihí cha cuenda vatyí iyó cuatyí yo. Ta yuhví yo cha cutachi tuńi Nyoo chi yo. Vatyí tatu yuhví cuńí yo, yuhví yo vatyí ña cuńí vaha yo chi Nyoo.

¹⁹Yoó cuńí yo chi Nyoo vatyí xihna ca maa ra cuńí ra chi yo. ²⁰Tatu yoó cha catyí: “Yuhu cuńí chi Nyoo”, catyí ñu, soco ña cuńí nyehe ñu chi tahan ñu, noo ñu cuendu cuví ñu. Vatyí tatu ña cuńí nyehe ñu chi tahan ñu cha nyehé ñu, ¿atu cuví cuńí ñu chi Nyoo cha ña nyehé ñu? Ma cuví. ²¹Ta Nyoo chahá ra tuhun ihya chi yo: Ñu cha cuńí chi Nyoo, tahán chi cha cuńí tucu ñu chi noo noo tahan ñu ñandíhi.

Cha ñi ińi yo chinó ińi yo chi Nyoo sahá ganaa yo chi cha ña vaha

5 Tandíhi ñu chinó ińi tyi ra Jesús cuví Cristo cha saquichí Nyoo, sehe Nyoo cuví chi ñu; ta tatu cuńí yo chi noo sutu, cuńí tucu yo chi tandíhi sehe ra. ²Tatu cuńí yo chi Nyoo ta sacuví yo cha catyí ra, chitó yo vatyí cuńí tucu yo chi ñu sehe Nyoo. ³Vatyí cha cuńí yo chi Nyoo ican cuví cha quichahá yo tuhun chahá ra chi yo. Ta tandíhi tuhun cha chahá ra chi yo ña yíi sacuvi yo. ⁴Vatyí tandíhi yo cha cuví yo sehe Nyoo, cuví chasaha yo chi cha ña vaha cha iyó ñáyiví ihya chihin cha chinó ińi yo chi Nyoo. ⁵Nu cha chinó ińi vatyí ra Jesús cuví Sehe Nyoo, ican ñu cuan cuví chasaha chi cha ña vaha cha iyó ñáyiví ihya.

Tatyí Ii Nyoo cuví cha ndaa cuenda ra Jesús ra cuví Sehe Nyoo

⁶Ra Jesucristo quichí ra siquí ñuhu ñáyiví ihya. Ta chitó yo tyi ndicha cha Sehe Nyoo cuví chi ra nu condutyá ra, ta nu chatí ñińi ra ñandíhi. Nima noo ri nu condutyá ra. Soco nu chatí ñińi ra ñandíhi. Ta Tatyí Ii Nyoo cuví cha ndaa tyi tyicuan caa cuví. Ta maa ri cha ndicha cahán Tatyí Ii Nyoo. ⁷Iyó uńi tahan testigu cha nyaá andiví: Sutu yo Nyoo ta ra Cristo ra cuví Tuhun Cahán Nyoo, ta Tatyí Ii Nyoo. Ta nduńi tahan ihya cuví noo ri, ta iin ri cuhva cahán nduńi tahan. ⁸Ta iyó uńi tahan testigu siquí ñuhu ñáyiví ihya: Tatyí Ii Nyoo cha nyaá ańima yo catyí vatyí ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chatí ñińi ra Jesús, yucuan cuví cha cu uńi cha sańahá chi vatyí ra Jesucristo cuví ra Sehe Nyoo. Ta tyicuan caa nduńi tahan cuan iin ri cuhva cahán. ⁹Yoó tuhvá yo naquehen yo tuhun cahán ra cuví testigu siquí ñuhu ñáyiví ihya.

Soco Nyoo cahnu ca cuví ra ta ñima ca ra ñuhu ñayiví ihya. Ta ican ra catyí ra vatyí ra Jesús cuví Sehe ra. ¹⁰Ñu cha chinó iñi tyi Sehe Nyoo cuví chi ra Jesús, chitó ñu chichi añima ñu tyi ndicha. Ñu cha ña chinó iñi chi ra, tari quiví cha sahá ñu tuhun tyi Nyoo ra cuendu cuví ra, vatyí ña cuñí ñu chino iñi ñu cha cahán Nyoo tumañi iñi cuenda Sehe ra, ra Jesús. ¹¹Ta ican ihya cuví tuhun cahán Nyoo chihin yo: Catyí ra tyi chahá ra noo ñayiví chaa coo yo tatu chinó iñi yo vatyí ra Jesucristo cuví Sehe ra. ¹²Ñu cha nyaá Sehe Nyoo añima, iyó ñu ñayiví chaa ihya. Ta ñu cha yori Sehe Nyoo nyaá añima, ñahri ñayiví chaa cuan iyó ñu.

Nu ndihí cahan ra Juan ta chahá ra tuhun chi ñu

¹³Sacuhín tuhun ihya chi nyoho cha chinó iñi chi ra Jesús Sehe Nyoo, tacuhva coto ndo tyi cha iyó ndo ñayiví chaa cha ma naa ca maa.

¹⁴Cunyeé xaan iñi yo chi Nyoo vatyí chitó yo vatyí tatu chicán yo cha chicán yo chi ra ta cuhva cuñí ra cuví, maa ra chiñí ra tuhun cahán yo. ¹⁵Ta tatu chitó yo tyi chiñí ra tuhun cahán yo, chitó tucu yo tyi cha ñihí yo cha chicán yo chi ra.

¹⁶Tatu nyehé yo noo ñu tahan yo sacuví ñu noo cuatyí, soco noo cuatyí

cha ña sacunaá chi chi ñu nuu Nyoo, cuví cacan tahvi yo chi ra cha cuenda ñu. Ta cusaha ra ticahnu iñi cuatyí ñu tacuhva coo ca ñu nuu ra. Soco iyó noo cuatyí cha sativí chi ñáyiví nuu Nyoo. Ña tahán chi cacan tahvi yo cha cuenda ñu cha sacuvi cuatyí cuan. ¹⁷Tandihi cha ña vaha cha sacuví ñáyiví, cuatyí cuví. Soco iyó cuatyí cha ña sativí ndihí chi chi yo nuu Nyoo.

¹⁸Chitó yo vatyí ñu cha nacacu chaa sahá Nyoo, ña sañihí ñu sacuvi ñu cuatyí. Vatyí Sehe Nyoo sahá cuenda chi ñu ta ña chahá ra cha tiin ra ña vaha chi ñu.

¹⁹Ta yoó chitó yo tyi cuenda Nyoo yihí yo. Tandihí ca ñáyiví, cuenda ra ña vaha yihí ñu, vatyí nyacá ñaha ra chi ñu.

²⁰Chitó tucu yo vatyí cha quichí Sehe Nyoo. Ta chahá ra cha chiñi tuñi vatyí cohon nuu yo chi Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñayiví chaa cha ma naa ca maa. ²¹Nyoho ra cuatyaa sehi, saha ndo cuenda chi ndo chihin cha sacahnú ñáyiví, ta ni ñima Nyoo cuví.

Ta na cuví chi tyicuan caa.

Carta Cha Cu Uvi Cha Tyaꝥ Ra Apóstol Juan

Nu catyí ra Juan vatyí cuñí xaan ra chi ñu yihí cuenda Nyoo

1 Nyoo nacachí ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chi tandihi sehun. Ta cuñí xain chi ndo chihin cha ñi iñi. Ta ñima yuhu ri cuñí chi ndo soco tandihi ca ñu cha nacotó cha ndicha ñandihí. ²Cuñí chi ndo cha cuenda cha ndicha cha ñohó chichi ñima yo. Ta tyicuan ri maa cunyaa cha ndicha cuan chihin yo. ³Sutu yo Nyoo ta Sutú Mañi yo Jesucristo Sehe Nyoo na nasoco ra chi ndo ta na nyehe ndahvi ra chi ndo. Ta na coo cha taxi ri ñima ndo, chihin cha ndicha, vatyí cuñí xaan ra chi ndo.

⁴Sii xaan cuñí cha chité tuhun suhva sehun ta nyehí vatyí iyó ñu tari cuhva catyí cha ndicha, tari cuhva catyí Sutú yo Nyoo tyi sacuví yo. ⁵Ta vityin, Hermana, chacú ndahvi nuun, na cuñi yo chi noo noo tahan yo. Ican ihya cuví cha tyafí nu tutu ihya. Ta ñima noo tuhun chaa cha chaha Nyoo chi yo cha vityin ri cuví cha cuñí yo chi noo noo tahan yo. Soco ican ihya cuví tuhun cha catyí Nyoo chi yo nyata quivi xihna ri. ⁶Ta cha cuñí yo chi ra, ican cuví cha sacuví yo tandihi cha catyí ra chi yo. Ican ihya cuví cha catyí Nyoo tyi sacuví yo. Ta nyoho, chiñí ndo tuhun ihya nya quivi xihna ri. Na coo ndo chihin cha cuñí ndo chi Nyoo ta chi ñayivi.

Nu catyí ra Juan vatyí saha cuenda yo chi yo chihin ñu chicá noo sandavi ñaha

⁷Catyí chuun tyehe caa vatyí cuaha xaan ra casandaví ñaha cacticá noo ra nicahnu siqui ñuhu ñayivi. Cacatyí ra vatyí ña ndicha cha quichi cacu ra Jesucristo chihin coño ñuhu ñayivi ihya. Ra cacatyí tyicuan caa, sandaví ñaha ra chi ñayivi. Ta cuví ra noo ra xaan iñi chi ra Cristo. ⁸Yucuan chaha, saha ndo cuenda chi ndo chihin tuhun cha sañahá ra coto sacunaa ndo cha vaha cha sacuví ndo, ta coto ma ñihi ca ndo tandihi cha cuacuhva Nyoo chi ndo.

⁹Yóo ñu cha ña ndoó vaha chihin cha sañahá ra Cristo chi yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutú yo Nyoo ta ra Jesucristo Sehe ra chihin ñu cuan. ¹⁰Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañaha ra Jesucristo, ma cuhva ndo vehe ndo cunyaa ra, ni ma tyinyee ndo chi ra. ¹¹Vatyí tari quivi cha iin ri cha ña vaha sacuví yo chihin ra tatu naquehén cuenda vaha yo chi ra cuan.

Nu ndihi cahan ra Juan

¹²Cuaha xaan ca tuhun tyafí cuhva sacote chi ndo, soco ña cuñí sacote chi ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusii ca cuñi yo.

¹³Ihya vachi nocumi chuun sahá sehe cuhun. Nacachí tucu Nyoo chi maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyí ra Gayo vaha cuahan ra chihin Nyoo

1 Yuhu cha cuví ra chahnu vehe ñuhu, sacuhín carta ihya chí yoho, Gayo, vatyí yoho cuvún noo ra tahin cha cuñí xain chihin cha nii iñi.

²Yañi, chicán tahvi chí Nyoo cha cuendon vatyí na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tiin cuehe chuun. ³Vatyí cusii xaan cuñi quivi quichi coyo suhva ra yañi yo. Ta canacatyí ra vatyí cha ndicha vaha iyón cuhva cha sañahá ra Cristo. Ta ican cuví cha ndicha vaha. ⁴Ñahri ca cha sii cuñi tari cha chité vatyí sehi sacuví vaha ñu cuhva catyí tuhun ndicha.

⁵Cuñi xain chuun, yañi. Vaha xaan sacuvún, vatyí tyiñuhún chí ra yañi yo, ta cha vaha xaan ca cha sacuvún vatyí tyiñuhún chí ra yañi yo inga ñuu cha chaa vehun. ⁶Chihin nuu tandihi ñu vehe ñuhu canacatyí ra vatyí cuñi xaun chí ra. Ta sáha tumañi iñi, yoho Gayo, tyinyee con chihin cha chiñuhú chí ra yañi yo vatyí sañihí ca ra cuhun coyo ra nu cuahan ra. Vatyí tyicuan caa tahán iñi Nyoo cha sacuví yo. ⁷Vatyí tyiño nuu Jesucristo cachicá noo ra. Ta ña cacuñi ra cha tyinyee ñáyivi cha ña ñohó nuu Nyoo chí ra. ⁸Yucuan chaha vatyí maa yo tahán chí nyehe yo ñáá ndihi cha chiñuhú chí ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyí ra Diótrefes, ña vaha sacuví ra

⁹Yuhu sacuhin noo carta chí ñu nyicú vehe ñuhu, soco ra Diótrefes sacuví ri

maa ra nuu chí ra, ta ña tyasohó ra tuhun cahín. ¹⁰Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyí cahán ña vaha ra siqui yo. Ta siin ri tatu yóó hermano chaa, ña naquehén cuenda ra chí ra. Ta tatu ñu nyicú vehe ñuhu naquehén cuenda ñu chí ra, chasí ri ra, ta tavá ñehe ra chí ñu vehe ñuhu.

¹¹Cuñi xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyí ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chí Nyoo.

Nu catyí ra Juan vatyí vaha xaan cuhva chinó iñi ra Demetrio

¹²Tandihí ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chí tyi ra vaha cuví ra. Ta siin ri nyuhu tucu cuví ndi cha ndaa cha cuenda ra, ta nyoho chitó ndo vatyí tuhun ndicha cahán ndi.

Nu ndihi cahan ra Juan

¹³Cuaha xaan tuhun tyai cuhva sacote chuun, soco ña cuñi sacote chuun chihin tutu. ¹⁴Soco nyatí cuhin nu nyaún cha numi ri, tyicuan ta ndatuhun vaha ca maa yo. ¹⁵Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sahun tumañi iñi cuhvon nocumi chí noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Náyivi Yihí Cuenda Nyoo

Nu tyaq̄ ra Judas noo tutu chi ñu nacanaq̄ Nyoo chi

1 Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacanaq̄ Nyoo Sutu yo. Ta naquehén vaha ra chi ndo vatyi cuví ndo ñáyivi cuenda ra. Ta vityin cumí vaha ra chi ndo cha cuenda cha iin ri cuví ndo chihin ra Jesucristo. ²Nyoo na nyehe ndahvi ra chi ndo. Ta na cutuñi ca iñi ndo yoso caa cha cuñí ra chi yo. Ta na coo cuaha ca cha taxi ri cuñi añima ndo, saha ra.

Nu cahān ra Judas siqui ñáyivi cha sañahá cha ña ndicha

(2 Pedro 2.1-17)

³Cha naha xaan yihí iñi tyai noo carta chi nyoho yañi, vatyi cuñí cahin chiin siqui yoso caa sacacū Nyoo añima yo. Soco vityin cuñí chi cha tyaí tutu ihya chi ndo vatyi saniñi chi ndo cuniñi iñi ndo chihin tandiñi fuerza ndo ta cuhun ndo ityi nuu ca chihin cha chinó iñi ndo tuhun vaha cha chahā Nyoo chi yo. Vatyi noo ri chaha chahā ra ta iin caña ri chahā ra tandiñi cha tahán chi chi yo vatyi chinó iñi yo cha cuví yo ñu yihí cuenda ra. ⁴Vatyi yihí ra quihví xehe ra nu nyicu ndo. Ta cuñí ra sandavi ñaha ra chi ndo. Catyí ra vatyi cha yahā saha Nyoo ticahnu iñi chi yo ta yucuan chaha cuvi sacuvi yo yoso cuhva quichi cuvi iñi coño ñuhu yo. Soco ra canyacuví tyicuan caa, cuví ra noo ra cucunaa. Vatyi tyicuan caa catyí Nyoo nya tyembu chahnu, vatyi canyacuví ra cha quiñi caa cha ña tahán chi sacuvi ra. Vatyi ña caquichahá ra chi Nyoo ta ña

chinó iñi ra cha Nyoo cuví noo ra cahnu ca, ra nyacá ñaha chi yo. Ta ni ri ra Jesucristo Sutu Mañi yo, ña cahnu xaan cuví ra, cacatyí ra.

⁵Vasi cha chitó ndo cha sacuvi Nyoo ta cha naha, soco cuñí sanicohín iñi ndo vatyi Sutu yo Nyoo tava ra chi sutu chahnu yo ñu Israel ñuu Egipto, sacacu ra chi ñu ndaha ñáyivi ñuu Egipto cuan. Soco yahā cuan sanaq̄ ra tandiñi maa ñu cha ña chinó iñi chi ra. ⁶Ta tyicuan caa tucu ángel. Ii ra. Ñahri cuatyí ra. Soco suhva ra caquita ra nu cuatyaq̄ Nyoo chi ra cha cuenda cha ña quichahá ra chi ra. Yucuan chaha Nyoo cumí ra chi ángel cuan, nuhñí ra chihin cadena nu ñaa iñi. Nyatú ra cha sacutuñi Nyoo chi ra na chaa chi quivi cahnu. ⁷Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaq̄ cha chiyo nicachico ñuu cuan. Sanaq̄ Nyoo chi ñu cha cuenda cha quiñi caa cha chinyacuví ñu. Ca chiyó ri maa ra chihin ñusihi. Ta ñusihi ca chiyó ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyi rayi ca chiyó ra chihin tahan yi ra ñandihi. Soco cha cuenda cuan, nyehe ñu tindoho nu cayū ñu, quivi chahmi Nyoo ñuu ñu. Ta yucuan sañahá chi chi yo vatyi ñu sacuví cha quiñi caa, cucayu ñu chihin ñuhu cha ma ndahva ca maa.

⁸Ta tyicuan caa tucu ra cacuñí sativi chi ndo. Vasi cha chitó vaha ra cha sacuvi Nyoo ta ityi chata ca, soco maa ra chicá iñi ra vatyi tyaqui xaan cuacoo ra nu cuahan ca chi chihin cha nyacuví ra tyicuan caa. Soco ndahvi ra vatyi tari quivi cha tahán ra noo ñumahna tyaqui cuví cuan. Sativí ra coño ñuhu ra ta ña cuñí ra cha cunyaca ñaha Sutu Mañi yo chi ra. Ta cahán ña vaha ra siqui ra nahnu ca cha nuu maa ra, cuví ri siqui ángel, cuví ri siqui tatyí ña vaha, cuví ri siqui Nyoo. ⁹Soco ángel Miguel cha cuví ra noo ra cahnu nuu Nyoo, ta ña caña iñi ra sacuvi ra tyicuan caa. Vatyi quivi cañi

tahan ra chihin ra ña vaha cha cuenda coño ñuhu ra Moisés, ña caña iñi ra cahān ña vaha ra siqui ra ña vaha. Noo ri cha catyī ra chi ra: “Maa Sutu Mañi yo na tachi tuñi ra chuun cuenda cha ña vaha cha nyacuvún”, catyī ángel Miguel cuan chi ra. ¹⁰Soco ra cha sayangá chi ndo cuan, cahán cuehe ra vatyī ña chitó ra. Ta sacuví ra tari sacuví quiti. Vatyī quiti ña cutuñí iñi ti. Nyacuví ri maa ti cha cuñí coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativí ra chi ra.

¹¹ ¡Ndahvi ra ndahvi cuan! Vatyī quehen ra cha caa ra Caín. Ta cha cuenda cha cuñí ra saha ganaa ra xuhun, quitá caxiin ra tari quita caxiin ra Balaam. Ta cucunaa ra tari cuanaa ra Coré, vatyī chihī ra cuan cha cuenda cha nacahnū ra nu cahán ra cuví nuu chi ra. ¹²Ra cha sayangá chi ndo chahá ra ticahan nuu chi ndo nu ndu iñi ri ndo. Vatyī chachí ra ta chihí ra, chihin cha sii cuñí ra. Ta ña cahán nuu ra cha ña sahá ra ñáyivi chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyī chi, ta cuñí maa yo tyi cua coon savi, ta ña coón ra. Cuví ra tari noo yutun cha ña chaha chiti. Vatyī noo yutun cha ña chahá chiti cuví tun tari noo yutun chihī vasi nyitó tun. Ta siin maa cha cucúvi vaha tun vatyī cucahnya ñáyivi chi tun. Tari cha uvi chaha chihī tun cuví cuan. Ta tyicuan caa maa ra, tari cha uvi chaha chihī ra vatyī chitó ra tuhun vaha ta ña cuñí ra sacuvi. ¹³Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco iin yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa añima ñáyivi. Ta cuví ra tari tiñoo andivi cha cuanaa. Soco cha nyaá maa cha cundoo ra nu ñaa iñi cahnu tyicuan ri maa.

¹⁴Tuhun maa ra cuan cahān ra Enoc ta cha naha. Ra Enoc tata cu ucha ra Adán

cuví ra. Ta cahān ra tuhun cha chaha maa Nyoo chi ra, ta catyí ra: “Nyehe chi Sutu Mañi yo cha vachí ra chihin cuaha mil ángel cuenda ra ¹⁵vatyī nyehe ra cha sacuvi tandihī ñáyivi. Ta tachí tuñi ra chi tandihī ñu quiñi iyó cha cuenda tandihī cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyī ra Enoc ta cha naha. ¹⁶Ra cha sayangá chi ndo, ña ndoó ra vaha chihin cha chahá Nyoo chi ra. Cahán ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cahān vaha ra chihin noo ñáyivi soco cha cuenda cha cuñí ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷Soco nyoho yañi, ma quichaha ndo chi ra cuan. Soco ñicohon iñi ndo tuhun cha cahān ra apóstol cuenda Sutu Mañi yo Jesucristo. ¹⁸Cacatyī ra chi ndo vatyī nu cuasandihī ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra. ¹⁹Ta ican ra ihya cacuví ra cuñí sacusiin chi yo. Vatyī quichahá ra cuhva cuñí coño ñuhu ra ta ñahri Tatyī li Nyoo nyaá chihin ra.

²⁰Soco nyoho yañi, cunii ca iñi ndo chihin cha chinó iñi ndo chi ra Cristo. Ta çacan tahvi ndo chi ra chihin tunyee iñi Tatyī li maa ra. ²¹Ta tyicuan ri ñihi cuñyañaa ndo chi Nyoo, ta çoto ndo vatyī cuñí xaan ra chi ndo. Ta çatu tuhva ndo quivi chaa yo nu coo yo ñáyivi chaa cha ma naa ca maa. Vatyī ican cuví cha cuacuhva Sutu Mañi yo Jesucristo chi yo cha cuenda cha ndahvi cuñí ra nyehé ra chi yo.

²²Ta ndahvi cuñi nyehe ndo chi ñu cha ña nii vaha iñi. ²³Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhū. Ta chi inga ñu cundahvi cuñi ndo nyehe ndo

chi ñu, soco saha ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahama ñihno ñu ta ña vaha cha cuenda cha sacuví ñu cha quiñi caa.

**Nu ndihi cahān ra Judas ta
sacahnū ra chi Nyoo**

²⁴⁻²⁵ Noo ri Nyoo iyó, ta chiñi tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha

sahá cuenda ra chi yo ta sanduvií ra chi yo cha ñahri cuatyí yo coo quivi cunyaca ra chi yo nu nyaá ra chihin cha cahnu cuví ra. Ta sii xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyí cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihi. Nyacá ñaha ra ta ityi chata ca, vityin. Ta tyicuan ri maa cunyaca ñaha ra. Ta na cuvi chi tyicuan caa.

Cha Sañaha Ra Jesucristo Chi Ra Apóstol Juan

Cha nyehe ra Juan

1 Ican ihya cuví noo cha catyí Nyoo chi ra Jesucristo vatyí na sacoto ra chi ra casacuví tyiño nuu ra. Sañaha ra ñáá ndihi cha cucuvi cha numi ri. Noo ángel tachí ra Jesucristo vatyí sañaha ra chi yuhu ra Juan. ²Ta cahín cha ndaa ta cha ndicha cuenda tandihi cha nyehi. Ta cuví cha ndaa cuenda tuhun Nyoo ta cuenda tandihi cha sacoto ra Jesucristo.

³Sii xaan cuñí ñu sacuahá tuhun cha nyaá nu tutu tuhun Nyoo ihya. Ta sii xaan cuñí ñu chiñí tuhun cha cahán chi ta quichahá ñu, vatyí tandihi tuhun cha nyaá nuu tutu Nyoo, cha nyaña yatyin quívi cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴Yuhu ra Juan sacuhín tutu ihya chi ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí Ii ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chi ndo. Ta na coo cha taxi ri añima ndo sahá ra. Nyoo ican ra cuví ra iyó vityin, ta iyó maa ra quívi quichaha tandihi, ta ican ra cuquichi. ⁵Ta naquehen tucu ndo cha vaha cuan sahá ra Jesucristo ñandihí. Vatyí ican ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chi ra ta nyacá ñaha ra chi ra cacuví rey cha iyó siquí ñuhu ñayiví ihya. Ican ra cuví ra cha cuñí xaan chi yo. Ta sandachí ra cuatyí yo chihin niñi ra. ⁶Ta sacuví ra rey chi yo. Ta sacuví ra tata sutu chi yo tacuhva vatyí sacuví yo tyiño nuu Nyoo Sutú ra. ¡Na sacahnu yo chi ra. Ta na cunyaca

ñaha ra tyicuan ri maal! Ta tyicuan caa na cuví.

⁷¡Nyehe ndo! ¡Cha vachi ra Cristo nu vico andiví! Tandihí ñáyivi cunyehe ñu chi ra. Nyacua nya ñu cha sañicuehe chi ra ta cunyehe ñu chi ra. Ta tandihí ñu cucuacu chaa ñu chihin cha yuhví ñu na nanyehe ñu chi ra inga chaha vatyí suri maa ra cuví. Cha ndicha, tyicuan caa cucuvi.

⁸Catyí Nyoo:

—Yuhu cuví ra xihna cuiri, ta yuhu cuví ra cundoo nu ndihí tuhun —catyí Sutú yo Nyoo, ra iyó tandihí tunyee iní chi. Ican ra cuví ra iyó vityin. Ta iyó maa ra nu quichaha tandihí, ta ican ra cuquichi.

Noo cuhva tyaquí cha sañaha Nyoo chi ra Juan cuenda ra Cristo

⁹Yuhu ra Juan cuví yañi nyoho. Ta iin ri nyehé yo tindoho. Ta iin ri nyacá ñaha Nyoo chi yo. Ta iin ri cunyee xaan yo ñáá ndihi cha cuví chi yo vatyí tyinyeé ra Jesucristo chi yo. Ñoho yuhu vehe caa noo ñuhú cha nañí Patmos cha nyaá mahñu tyañuhu. Ñohí vehe caa cha cuenda vatyí cahín tuhun Nyoo cha quichí sañaha ra Jesucristo. ¹⁰Ta cuví chi noo quívi cha sacahnú yo chi Sutú mañí yo. Ta ñihí xaan chinyaá Tatyí Ii Nyoo chihin. Ta chiñí noo ndusu ñihí xaan ityi chate, tari noo ndusu cha ñihí xaan tari ndusu trompeta. ¹¹Ta catyí chi chíi tyehe caa:

—Yuhu cuví ra xihna cuiri, ta yuhu cundoi nu ndihí tuhun. Tyaá nuu noo libru tuhun cha nyehun, yoho Juan. Ta sacuhun chi ndi ucha vehe ñuhu cha nyicú ityi Asia. Sacuhun chi ñu nyicú vehe ñuhu ñuu Éfeso, chi ñu vehe ñuhu ñuu Esmirna, chi ñu vehe ñuhu ñuu Pérgamo, ta chi ñu vehe ñuhu ñuu Tiatira, ta chi ñu vehe ñuhu ñuu Sardis, ta chi ñu vehe ñuhu ñuu Filadelfia, ta chi ñu

vehe ñuhu ñuu Laodicea —catyí ndusu cuan.

¹²Tycuan ta nanyocave vatyi cuñí nyehí yóo chi ndusu cha cahán chihin cuan. Ta nanyehí ucha tahan cañileru xuhun cuaan. ¹³Ta mahñu ucha tahan cañileru cuan, nyehí chi noo ra cha caá tari caá noo rayíi ñuhu ñayiví ihya. Ñihnó ra noo sahma cañi nya nu chaha ra. Ta yihí ra noo sinchu xuhun cuaan, ta nya nu nyaá pechu ra chitahan sinchu cuan. ¹⁴Ta cuichin ixi xiñi ra, tari ixi mbee cuichin, tari cha cuichin catyi. Ta tari cha cayú ñuhú chiti nuu ra. ¹⁵Ta xiñó chaha ra tari xiñó noo caa cha nañí bronce cha tuhva nducuaaha nu cayú ñuhú chichi noo horno. Ta ñihi xaan ndusu ra tari ndusu cha cuaha vavaha yuvi nahnu. ¹⁶Ta yihí ndaha ra ucha tahan tiñoo andivi chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiñó vavaha, tyicuan caá nuu ra.

¹⁷Cuhva cha nanyehí chi ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyí ra chii:

—Ma yuhvun. Yuhu cuví ra xihna cuiuri, ta yuhu cundoí nu ndihí tuhun. ¹⁸Iquen cuví ra cha nyitó. Ta vasi chihí soco vityin cuacoí tyicuan ri maa. Ta iyó ityi chii cha catyi ama tahan chi tuhun chihí chi noo noo ñáyiví, ta iyó ityi chii cha catyi tatu cuhun ñu anyaya. ¹⁹Tyaa nu libru tandihí cha nyehún, cha iyó vityin, ta cha cucoo nu cuahan ca chi. ²⁰Ican ihya cuví tuhun xehe cuenda ndi ucha tiñoo andivi cha nyehún yihí ndaha chiyo vahi, ta cha cuenda ndi ucha cañileru xuhun cuaan cuan: Ndi ucha tiñoo andivi cuan cuñí chi catyi: ra cha cahán tuhun ucha tahan vehe ñuhu cuan. Ta ndi ucha cañileru cuan cuñí chi catyí ndi ucha vehe ñuhu cuan.

Tuhun cha sacuhun ra chi ñu nyicú vehe ñuhu ñuu Éfeso

2 Sacuhun tutu chi ra cahán tuhun chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyí ra cha yihí ndaha ucha tiñoo chihin ndaha chiyo vaha ra. Ta chicá noo ra mahñu ndi ucha cañileru xuhun cuaan: ²Yuhu chité tandihí cha sacuví ndo. Chité vatyi ñihi xaan tyiño sacuví ndo. Ta cunyeé xaan iñi ndo. Ta chité vatyi ña cunyeé iñi ndo nyehé ndo chi ñu quiñi iyó. Ta chité vatyi tuhva ndo nducu nyehé ndo chi ra cha catyi vatyi tyiño Nyoo chica noo ra soco ña ndicha ra. ³Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo. ⁴Soco iyó noo cha caá ndo nui. Vatyi ña cuñí vaha ca ndo chii tari quivi xihna ri. ⁵Yucuan chaha ñi-cohon iñi ndo nya maa maa cuví nu ña vaha sacuví ndo. Ta nasama ndo cuhva iyó ndo. Ta sacuvi ndo tari cuhva chiyo ndo quivi natiin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyí ndo, ma tinyai. ⁶Soco iyó tucu cha vaha nyacuví ndo. Vatyi ña cuñí nyehé ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñí nyehí yucuan. ⁷Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito añaima ndo. Ta yutun cuan nanyaá tun nya nu iyó Nyoo andivi, ta cuñihi ndo tandihí cha vaha cha iyó yucuan.”

Tuhun cha sacuhun ra Jesucristo chi ñáyivi nyicú vehe ñuhu ñuu Esmirna

⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: “Tyehe caa catyí ra cuví cha xihna cuiiri, ra cundo nu ndihi tuhun, ra cha chihí ta nandoto: ⁹ Yuhu chité tandihi cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin tuhun Nyoo, tyayii ndo. Ta chité yoso caa ñu cha catyí vatyi ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyi noo ityi ñu yihí cuenda ra ña vaha, ra nañi Satanás, cuví ñu. ¹⁰ Soco ma yuhvi ndo cha cunyehe ndo tindoho. Vatyi ra ña vaha cutiyi ra vehe caa chi suhva nyoho, vatyi cunducu nyehé ra chi ndo tatu cusaña ndo chi Nyoo. Ta uchi quivi cunyehe ndo tindoho. Soco cunyicon vaha ndo chi Nyoo nyacua nya quivi cúvi ndo. Ta yuhu cuhve ñayivi coo ndo chihin Nyoo. ¹¹ Ta nyoho cha cutuñi ñi ndo tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán chi cuhun ndo anyaya, nu cutachi tuñi Nyoo chi aña ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

¹² Sacuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan ndinduvi chiyo yuhu: ¹³ Yuhu chité tandihi cha sacuví ndo. Ta chité vatyi iyó ndo nu nyacá ñaha cuihna, ra nañi Satanás. Soco tyicuan ri chinó ñi ndo chii. Ta vasi nu canyicú ndo chiña chahñi ñu chi ra Antipas, ra cha cuví noo cha ndoo cuende, vatyi chiña chicá noo ra cha nañi Satanás cuan. Soco ni ri maa chahñi ñu chi ra, nyoho ña sandihi maa

ndo tuhun cha chinó ñi ndo chii. ¹⁴ Soco catuví suhva cha caá ndo nui: Vatyi nu nyicú ndo nya Pérgamo chiña, yihí ra cha ña cacuñi ra saña ra cuhva cha sacuví ra Balaam. Ta maa ra Balaam tyiyuhu ra chi ra Balac, na sacachi ra chi ñu Israel nyayu cha chiyo nu sachañu ñu chi xitohyo. Tyiyuhu ra chi ra nacatyi ra chi ñu vatyi ñahri caa cha coo ñu chihin tahan ñu vasi ñima yii ñu cuví, o vasi ñima ñasihi ra cuví. ¹⁵ Ta suri iyó suhva ñáyivi mahñu ndo cha ña cacuñi ñu saña ñu cuhva sañahá ra cuenda ra Nicolás. Ta yuhu ña cuñi nyehi cuhva sañahá ra cuan. ¹⁶ Yucuan chaha numi ri nasama ndo cuhva iyó ndo. Vatyi tatu ma nasama ndo cuhva iyó ndo, cuquichi siqui ndo cha numi ri ta cucañi tahin chihin ñu cuan chihin cha tari mityi cha quitá yuhi. ¹⁷ Ta nyoho cha cutuñi ñi ndo, tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cucunyaa noo sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira. Ta catyun chi ra tyehe caa: “Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañi bronce cha xiño xaan, tyicuan caa chaha ra: ¹⁹ Yuhu chité tandihi cha sacuví ndo. Ta chité yoso cuhva cha cuñi ndo chi ñáyivi. Ta chité cuhva cha chinó xaan ñi ndo chii. Ta tyinyeé ndo chi tahan ndo. Ta cunyeé xaan ñi ndo. Ta chité vatyi cuaha ca cha vaha sacuví ndo vityin ta ñima ca ta nu quichaha. ²⁰ Soco iyó noo cha caá ndo: Vatyi chahá ndo ityi chi ñaha

cha nañí Jezabel na sañaha ña chi ndo. Catyí ña vatyí cuenda Nyoo cahán ña. Soco chihin tuhun cha sañahá ña, sandaví ñaha ña chi ñu sacuví tyiño nui. Vatyí sañahá ña cha coo ñu chihin inga rayii o ñusihí ta ñima yii ñu o ñasihí ra cuví. Ta sañahá ña cha cachi ñu nyayu cha chiyo ñu sacahnü ñu chi xitohyo. ²¹ Yuhu cha nyatü xain cha nasama ña cuhva iyó ña, soco ña cuñí ña nasama ña. Vatyí ta sandoo ca ña cha iyó ña chihin rayii ta ñima yii ña cuví. ²² Ta vityin cua quehen noo cuehe chi ña. Ta cua cuhvi ña. Ta ma cuví nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindoho nyehe ñu. ²³ Ta cucahñi chi sehe ña. Ta tyicuan caa, coto tandihí ñu nyicú vehe ñuhu, vatyí yuhu chité tandihí cha chicá xiñi ñu, ta tandihí cha caá añima ñu. Ta chi tahan tahan nyoho cucuhve cha tahán chi chi ndo yoso cuhva cha sacuví ndo. ²⁴ Soco chi tandihí ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyafí inga tuhun cha yii síqui ndo. ²⁵ Soco ma saña ndo cuhva cha vaha nyacuví ndo nyacua nya quichi. ²⁶ Ta nyoho tatu cuví chasaha ndo chi ra ña vaha, ta sacuví ndo cuhva cuñí nyacua nya nu ndihí tuhun, cucuhve ityi chí ndo cha cunyaca ñaha ndo chi ñu ñuhu ñayiví. ²⁷ Tari chaha Suti ityi chii cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chi ñu. Tari tahvi cuatyí minoo quisi ñuhú, tyicuan caa cusacuvi ndo chihin ñu. ²⁸ Ta cuhve tiño cañu andiví cunyaa chihin ndo. Ta ican yuhu cuví cuan. ²⁹ Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chi nyoho, ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Sardis

3 ¹ Sacuhun tucu tutu chi ra cahán tuhun chihin ñu nyicú vehe ñuhu ñuu Sardis. Ta çatyun chi ra tyehe caa: “Tyehe caa catyí ra cha yihí ndaha ndi ucha Tatyí Ii Nyoo ta ndi ucha tiño andiví: Yuhu chité tandihí cha sacuví ndo. Ta vasi catyí ñáyivi tyi nyitó ndo soco cha cuenda chí yuhu, chihí ndo. ² Saha cumi vaha ndo chiin ri ca cha vaha cha iyó chi ndo. Vatyí cha cuñí ndihí tuhun nu nyicú ndo. Vatyí nyehí vatyí cha sacuví ndo, ña vaha maa nuu Nyoo. ³ Níçohon iñi ndo tuhun vaha cha cutuhva ndo. Cunyicon ndo cuhva cuan, ta ñasama ndo cuhva iyó ndo. Vatyí tatu ma naquehen vaha ndo cha vaha, sana iñi ndo ta cuquichi síqui ndo, tari tuhva ra suhu quichi. ⁴ Soco iyó suhva nyoho ñu Sardis chiña cha ña sacuví ndo cha quiñi caá. Ña sacanyahyu ndo sahma ndo cuví cuan. Ta maa ndo cucuihno ndo sahma cuichin chihin. Ta cucaca noo ndo chihin, vatyí tyicuan caa tahán chí chi ndo. ⁵ Ta nyoho tatu cuví chasaha ndo chí ra ña vaha, cucuihno ndo sahma cuichin chihin. Ta ma sanai sivi ndo nu libru ñu cuaconyito chihin Nyoo. Ta cunacoto nui chí ndo, chihin nuu Suti, ta chihin nuu ángel. ⁶ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chí nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

⁷ Sacuhun tucu tutu chi ra cahán tuhun chihin ñu nyicú vehe ñuhu ñuu Filadelfia. Ta çatyun chi ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha tucu rey David, ra cha nuñá yuvehe ta ni noo ñu ta ma cuví nacasi ñu. Ta tatu nacasi ra, ni noo ñu ta ma cuví nuña ñu. Tyehe caa catyí ra: ⁸ Yuhu chité

tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyi चाहि cha cahan ndo tuhun Nyoo chihin ñáyivi, ta yori cuví casi). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyi ña ñohó nuu ndo chii. ⁹Ta ñu cuenda ra ña vaha, ñu cuendu, ñu catyí vatyi ñu Israel cuví ñu, ta ñima, cusacuiñi chiti chi ñu nuu ndo, tacuhva coto ñu tyi yuhu cuñí chi ndo. ¹⁰Ta sacuví ndo cha catyí, vatyi cunyeve iñi ndo. Ta yucuan cuenda cusaha cuende chi ndo chihin tindoho cahnu cha cusaquichi siqui tandihí ñáyivi, vatyi cunducu cote chihin tandihí ñu iyó siqui ñuhu ñáyivi tatu cuñí ñu chii. ¹¹Numi ri cuquichi. Saha vaha ndo cuenda cuhva iyó ndo, coto yóo cha tinyaa premio cha cuñihi ndo. ¹²Nyoho tatu cuví chasaha ndo chi ra ña vaha, cahnu ca tyiño cucuvi ndo nuu Nyoi. Ta ma canyaha ca ndo nu nyaá Nyoo. Ta cutyai sivi Nyoi chi ndo, ta sivi ñuu Nyoi, ñuu Jerusalén chaa cha cusaquichi Nyoi nya andivi, ta suri cutyaa tiqui sivi chai chi ndo ñandihí. ¹³Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Laodicea

¹⁴Sacuhun tucu tutu chi ra cahán tuhun chihin ñu nyicú vehe ñuhu ñuu Laodicea. Ta catyun chi ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savaha tandihí cha iyó chihin Nyoo. ¹⁵Yuhu chité tandihí cha sacuví ndo. Ta chité vatyi ni ña cuñí vaha ndo chii. Ta ni ña cuñí tucu ndo saña ndihí ndo chii. Vaha tyehe ta saña ndihí ndo chii, o sañihi ndo quichaha ndo tuhun cahin, vaha. ¹⁶Soco vatyi chiin ri cuñí ndo chii, ta ni ña saña ndihí ndo chii, ta ni ña cuñí ndo sacuvi

ndo tuhun cahin, yucuan chaha cusanaa ndihí iñi tuhun ndo. ¹⁷Vatyi nyoho catyí ndo tyehe caa: Yuhu tyayii, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyi cuví ndo noo ra ña sii cuñí, noo ra ñahri iyó chi, noo ra ndahvi, noo ra cuaa, noo ra vityiyaa cuví ndo. ¹⁸Yucuan chaha चाहि tuhun chi ndo vatyi chi mai sata ndo xuhun cuaan vaha cha yaha ñu ñuhu ta ña cayú, tacuhva na cutyayii ndo. Ta chi mai sata ndo sahma cuichin vatyi cuihno ndo, tacuhva cha ma cucahan nuu ndo vatyi vityiyaa ndo. Ta tyihi ndo colirio chiti nuu ndo tacuhva na nanyehe ndo. ¹⁹Yuhu चाहि tuhun chi ñu cha cuñí xain chi. Ta tachí tuñi chi ñu ñandihí. Yucuan chaha catyí chi ndo, ñasama ndo cuhva iyó ndo ta sacuvi ndo cha vaha. ²⁰Yuhu nanyaí yuvehe añima ñáyivi ta sacachén. Tatu nya noo ñu chiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai. ²¹Cucuhve cha cunyata ndo chihin nu nyacá ñahi tatu cuví chasaha ndo chi ra ña vaha. Tari yuhu cuví chasahi chi ra, ta vityin nyaí chihin Suti nu nyacá ñaha ra. ²²Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chi nyoho ñu nyicú vehe ñuhu” —catyí ra Jesucristo.

Noo cuhva cha sacahnú ñu chi Nyoo nya gloria

4 Cha yaha tuhun cuan, ta nyehi noo yuvehe tacoho nya andivi. Ta noo ndusu cha tari caa ndusu trompeta chiñi cha cahán chihin cha xihna ri ta catyí chi chii:

—Ndaa ihya ta cusañahi chuun cha cuacuvi nu cuahan ca chi —catyí ndusu cuan chii.

²Ta caa cuhva ri cuan ta tuví iñi vatyi ñihi vavaha nyaá Tatyí Ii Nyoo chihin. Ta nanyehi noo tyayu nanyaá nya andivi. Ta nyaá noo ra nuu tyayu cuan.

³Ta ra nyaá cuan, xiño nuu ra tari xiño noo yuu vaha cha nañi jaspe ta cornalina. Ta nicachico yuhu tyayu cuan nyaá noo coo yahnyi, ta xiño ti tari yuu cha nañi esmeralda. ⁴Ta nicachico tyayu cuan nyehi oco cumi ca tahan tyayu. Ta nyicú oco cumi tahan ra cha vaha chahnu. Cañihnó ra sahma cuichin. Ta yihí corona xuhun cuan xiñi ra. ⁵Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihí xaan cahán savi. Ityi nuu tyayu cuan cayú ucha tahan ñuhu. Ta ucha tahan Tatyí li Nyoo cuví cuan. ⁶Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quitá ta tari caa ñáyivi caa. Ta cuaha xaan chiti nuu cuan nyicú, tari ityi nuu ta tari ityi chata. ⁷Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiqui caá. Ta cha cu uñi, tari caá nuu rayii caá nuu. Ta cha cucumi tari caá noo tasu cha cuahan ndava, tyicuan caá. ⁸Ta ndi cumi tahan cha nyitó ihya, tahan tahan chi ta nyaá iñu tahan ndichin chi. Ta nichahnu maa chi nyaá chiti nuu chi, tari ityi chata chi ta tari ityi chichi ndichin chi. Ta ndiyaca ta ñiyaca ta ña chicuita chi catyí chi tyehe caa:

Ra ii xaan cuvún, ra ndii xaan cuvún, ra ñahri cuatyí cuvún,
Sutu Mañi yuhu, Nyoo, iyó tandihi tunyee iñi chuun.

Ra cha iyó nu quichaha tandihi cuvún,
Ta ra iyó vityin. Ta ra cha nyaá cha cuquichi.

⁹Ta cachahá ndi cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahvi nyoo chi ra nyaá nu tyayu cahnu cuan, ra cha iyó tandihi tyembu. Ta tahan ri chaha cha casacuví chi tyicuan caa, ¹⁰ta ndi oco cumi ra cha vaha chahnu cuan chicuiñi

chiti ra ta casacahnú ra chi ra iyó tandihi tyembu. Ta catyihí ra corona ra nu tyayu cahnu cuan. Ta cacatyí ra tyehe caa:

¹¹Sutu Mañi nyuhu, Nyoo cuvún chi ndi.

Chi yoho tahán chi cha cuhva ndi gloria, ta sacahnú ndi chuun.

Ta tahán chi cha cunyaca ñahun.

Vatyí maun savahá tandihi cha iyó.

Ta cha cuenda cha iyó iñi maun ta chicoo tandihi, cacatyí ra.

Nu nyehé ra Juan noo libru ta noo Mbee Luhlu cha cuví ra Jesucristo

5 Tyicuan ta chiyo vaha ra cha nyaá nu tyayu cahnu cuan, nyehi yihí ndaha ra noo libru tari caá noo tutu cha natuvi yo. Ta nyaá letra ityi nuu ta ityi chata. Ta nyasí chi chihin ucha tahan sellu. ²Ta nyehi noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chi nuña libru ihya ta sacanyaha ra sellu ihya? —catyí ra.

³Soco ni ityi andivi ta ni ityi nu ñuhu ñáyivi, ta ni ityi chichi ñuhú, ta yori maa cha cuví nuña libru cuan. Ta ni cha nyehé ñu nuu, ta ma cuví. ⁴Ta yuhu chacu chaa xain, vatyí yori maa quitá cha cuví nuña libru cuan. Yori maa cuví sacuahá, ta yori cuví nyehé nuu chi. ⁵Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñi chi catyí, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶Tyicuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehi chi noo Mbee Luhlu. Nanyaá ti ta caa ti cha chahñi ñáyivi chi ti. Ucha tahan ndiqui ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí li Nyoo cha tachi

ra nicacahnu siqui ñuhu ñáyiví. ⁷Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan. ⁸Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicuiñi chiti ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuan tyitu yihí cutu. Ta cutu cuan cuví chi tandihi cha chican tahvi ñu cuenda Nyoo. ⁹Ta cachita ra noo yaa chaa, ta catyí ra tyehe caa:

Yoho cuví ra tahan chi cha quehun libru ihya, ta cahnyon ndi ucha sellu cha nyaá nu chi.

Vatyí chihun saha ñáyiví. Ta chihin niñun saton chi ndi vatyí coo vaha ndi chihin Nyoo.

Ta cuví ndi ñáyiví nuu nyihi ta nuu nahnu nicacahnu ñuhu ñáyiví, ñáyiví siin siin sahan cahán, ñáyiví siin siin tata.

¹⁰Chahun ityi chi ndi vatyí cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñáyiví iyó siqui ñuhu ñáyiví, cacatyí ra, chitá ra.

¹¹Yaha cuan ta nanyehi, ta chiñi ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehi. ¹²Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñáyiví, tahan chi cha cunyaca ñaha ra, ta naquehen cuenda ra cha tyayí.

Tahan chi naquehen cuenda ra cha chiñi tuñi.

Tahan chi cha naquehen cuenda ra tandihi tunyee ñi.

Tahan tucu chi cha cuhva yo gloria chi ra, ta sacahnu yo chi ra.

Ta cahnu xaan ca ra cuví maa ra, cacatyí ángel cuan.

¹³Ta chiñi tiqui cha cahán tandihi cha savaha Nyoo, tandihi cha iyó andiví, ta siqui ñuhu ñáyiví, tandihi cha iyó chichi ñuhú, ta chichi tyañuhu, tandihi cha savaha Nyoo catyí chi tyehe caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu. Ta nacuhva yo gloria chi ra.

Ta na cunyaca ñaha ra tandihi maa tyembu, catyí tandihi cha savaha Nyoo.

¹⁴Ta ndi cumi cha nyitó cuan catyí chi:

—¡Tyicuan caa na cuvi! —catyí chi.

Ta ndi oco cumi ra cha vaha chahnu cuan, cachicuiñi chiti ra ta casacahnu ra chi ra iyó tandihi tyembu.

Nu chahnyá ra Jesucristo ndi ucha tahan sellu

6 Tyicuan ta nyehi nu chahnyá ra cuví Mbee Luhlu cuan sellu cha xihna ri chichi cha ndi ucha tahan cuan. Ta chiñi cahán noo cha nyitó cha cumi tahan cuan, chihin noo ndusu cha tari caá cha cahán savi ta catyí chi:

—¡Ñaha, ta nyehun! —catyí chi chii.

²Tyicuan ta nanyehi ta nyehi noo caballo cuichin, ta ra yosó chi ti cuan ndaha ra noo arco. Ta ñihí ra noo corona quihí xiñi ra vatyí saha ganaa ra, ta cuasaha ganaa ca ra. ³Ta cuhva cha chahnyá ra cuví Mbee Luhlu cuan sellu cu uvi, chiñi cha catyí cha nyitó cu uvi cuan tyehe caa:

—¡Ñaha ta nyehun! —catyí cuan chii.

⁴Ta quitá inga caballo, tyacu cuaha. Ta ra cha yosó chi ti chicoq ityi chi ra vatyí tinyaa ra cha taxi ri iyó ñáyiví, tacuhva cahñi ñu chi tahan ñu. Ta ñihí ra noo mityi cahnu quíndaha ra. ⁵Ta cuhva cha chahnyá ra cuví Mbee Luhlu

cuan sellu cu uñi, ta chiñi cha catyí cha nyitó cu uñi cuan tyehe caá:

—¡Ñaha ta nyehun! —catyí cuan chii.

Ta nanyehi, ta nyehi noo caballu toon. Ta ra yosó chi ti, yihí ndaha ra noo ti-catya. ⁶Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru nuñi. Tyicuan caa tucu uñi litru cebada. Ta ma sativun acetye ta vinu —catyí ndusu cuan.

⁷Ta cuhva cha chahnya ra cuví Mbee Luhlu cuan sellu cu cumi, chiñi cha cahán cha nyitó cucumi cuan, ta catyí chi, tyehe caa:

—¡Ñaha ta nyehun! —catyí chi.

⁸Ta nanyehi ta nyehi noo caballu cuaan. Ta ra yosó chi ti nañi ra Tuhun Chihi. Ta chata ra vachi inga ra cha nañi Ra Nyacá Ñaha Nu Nyicú Ndiyí. Ta cañihí ra tunyee iñi cha cahñi ra chi cuaha xaan ñáyivi iyó siqui ñuhu ñáyivi. Vatyí chichi cha sava ñáyivi iyó siqui ñuhu ñáyivi, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta chihin cuehe, ta chihin quití xaan iyó siqui ñuhu ñáyivi.

⁹Cuhva cha chahnya ra cuví Mbee Luhlu cuan sellu cu ohon, nyehi xiu arta. Yucuan ñohó añima ñu cha chihí cha cuenda tuhun Nyoo tyi sacoto ñu tuhun ra chi ñáyivi. ¹⁰Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñáyivi cha chahñi chi ndi cha catyí tuhun maun? —catyí ñu.

¹¹Tyicuan ta cañihí noo noo ñu cuan sahma cuichin cuihno ñu. Ta catyí ra chi ñu na canyitatu ñu suhva ca quivi, nyacua nya cha caña tahan tandihí ca tahan ñu, ñu sacuví tyiño nuu ra Cristo, ñu cha tahán chi cucúvi tari cuhva chihí maa ñu.

¹²Cuhva cha chahnya ra cuví Mbee Luhlu cuan sellu cu iñu, nanyehi ta quichi noo cha taán cahnu. Ta nduñaa ñáyivi, tari sahma ñu nyaá tucuihya iñi, toon xaan nduvi. Ta yoo andivi cuan nanduvi tari niñi. ¹³Ta tiño andivi canacoyo ti nya nu ñuhu ñáyivi. Tari sanacoyo tu higo chiti yutya tun tatu yahá noo tatyí ñihí. ¹⁴Tari natuví yo noo tutu tyicuan caa cuanaa ri andivi. Ta tandihí yucu ta tandihí ñuhú cha nyicú mahñu tyañuhu nacanda chi ta nasama chi nu nyaá chi. ¹⁵Ta tandihí rey cha iyó siqui ñuhu ñáyivi iin ri chihin ra nahnu, ta ra tyayí, ta ra cacuví nuu chi sindaro, ta ra iyó xaan fuerza chi, ta tandihí ñu cacuví musu, ta ñu cha ña cuví musu, tandihí ri ñu cuan caquihvi xehe ñu chichi yavi yuu cha iyó yucu nahnu, ta chichi yavi ñuhú. ¹⁶Ta catyí ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andivi, coto tachi tuñi ra cuví Mbee Luhlu cuan chi ndi.

¹⁷Vatyí cha chaá quivi cahnu cha cutachi tuñi ra chi ndi. ¿Ta yóo cuví cha cuví cunye cuan? —catyí ñu.

Nu ñihí ñu Israel sellu cunya tyaan ñu

7 Cha yaha tuhun ihya ta nyehi cumi tahan ángel catayucú ra ndi cumi chiyo nu quichi tatyí siqui ñuhu ñáyivi. Ta ña chaha ra yaha tatyí cuan vatyí cava chi siqui ñuhu ñáyivi. Ni ña chaha ra cha cava chi nuu tyañuhu, ni siqui yutun catayucú nuu ñuhú. ²Ta nyehé tiqui inga ángel, vachi ra ityi nu caña ñanyí, ta nyisó ra sellu Nyoo nyitó. Ta ángel cuan canacha ra chihin cha ñihí ndusu ra chi inga cumi ca ángel cuan, ra cha ca iyó ityi chi vatyí casatívi ra nuu ñuhu ñáyivi ta nuu tyañuhu. Ta catyí ra chi ra:

³—Ma sativí ñaha ndo nuu ñuhu ñayiví, ni nuu tyañuhu, ta ni nuu yutun cha ñiri ca cha ta sañaha ca ndi yóó ñu cuví musu Nyoo, vatyi cutyaa ndi noo sellu tyaan ñu —catyí ángel cuan.

⁴Ta chiñi nacatyí ra yoso tahan ñáyivi tyaá ra sellu cuan: cientu uvi xico cumi mil tahan ñu Israel. ⁵Uchi uvi mil ñu tata ra Judá chicunyaá sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad, ⁶uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés, ⁷ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar, ⁸uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaá sellu Nyoo chi ñu.

Nu nyehe ra Juan chi ñu ñihno sahma cuichin

⁹Cha yaha tuhun cuan ta nanyehí ta nyehí cuaha xaan ñáyivi nyicú. Ta yori cuví nacahví chi ñu, vatyi nyicú ñáyivi tandihí ri ñuu nyihi ta ñuu nahnu iyó siqui ñuhu ñayiví. Ta nyicú ñáyivi siin siin sahan cahan. Ta nyicú ñáyivi tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihno ñu sahma cuichin. Ta cayihí ndaha ñu ndaha ñoo. ¹⁰Ta tandihí ñu chihin cha ñihi ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacu chi yo —catyí ñu canachaa ñu.

¹¹Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi cumi tahan cha nyitó cuan. Ta cachicuñi chiti ra chihin nuu ra nya nu ñuhú nuu ra nyaá tyayu

cuan. Ta casacahnú ra chi ra. Vatyi Nyoo cuví ra. ¹²Ta cacatyí ra:

Tahán chi tyehe caa chuun:

Sacahnú ndi chuun ta chahá ndi gloria chuun vatyi chiñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyi iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuví chi tandihí tyembu, catyí ra.

¹³Tyicuan ta noo ra cuví ra cha vaha chahnu cuan ndaca tuhun ra chii ta catyí ra:

—¿Yóó ñu cañihno sahma cuichin ihya? ¿Ta nya ityi quichi coyo ñu? —catyí ra.

¹⁴Ta yuhu catyí chi ra:

—Tata, yoho chitón.

Ta catyí ra chii:

—Ican ñu ihya cuví ñu cayaha nu tindoho cahnu. Ta canacatyá ñu cuatyí ñu, ta nducuiichin sahma ñu chihin niñi ra cuví Mbee Luhlu. ¹⁵Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyi cua cunyaa ra chihin ñu. ¹⁶Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmi ca ñanyii chi ñu. Ni ma sayanga ca cha ihñi chi ñu. ¹⁷Vatyi ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —catyí ra chii.

Nu chahnya ra Jesucristo sellu cu ucha ta quita noo ángel chihin noo cuu xuhun cuaan

8 Cuhva cha chahnya ra cuví Mbee Luhlu sellu cu ucha nu libro cuan,

ndutaxin ri nya andivi tari noo cha sava hora.

²Yaha cuan ta nyehi chi ndi ucha ángel catayucú ra nuu Nyoo. Ta caquehen cuenda ra ucha tahan trompeta. ³Yaha cuan ta quichi inga ángel chihin noo cuu xuhun cuaan cha tuhvá yihí cutu. Ta chicuinyaa ra ityi nuu arta cuan. Ta quehen cuenda ra cuaha xaan cutu, vatyi cuhva cuenda ra iin ri chihin cha chicán tahvi ñáyivi chi Nyoo. Nuú arta xuhun cuaan cha nyaá ityi nuu tyayu Nyoo, yucuan chaha cuenda ra. ⁴Ta quita ñuhma cutu cuan, nandaá chi nu nyaá Nyoo iin ri chihin cha chicán tahvi ñu cuenda ra. ⁵Tyicuan ta ángel cuan quehen ra cuu cuan. Tyicuan ta sacutu ra chihin titi ñuhu cha quita arta cuan. Ta tuchi ra siqui ñuhu ñayivi. Ta quichaha cahán savi, ta iyo cuví. Ta quihvi tacha, ta quichaha taan.

Nu tiví ángel trompeta

⁶Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyi cativi ra.

⁷Ángel cha xihna ri cuan quichaha tiví ra trompeta ra. Ta quichaha coon savi yuu ta saca ñiñi chihin chi, ta saca ñuhu cha cayú chihin. Ta cayú cha yatyin cha sava ñuhu ñayivi. Ta cha yatyin cha sava yutun cayú chihin tandihi cuhu cuii.

⁸Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhu mahñu tyañuhu. Ta cha yatyin sava tyañuhu cuan nduvi chi ñiñi. ⁹Ta cha yatyin sava quití cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰Ta ángel cu uñi tiví ra trompeta ra. Ta canacava noo tiñoó cahnu andivi, suri cayú ñuhu chi ti tari ñuhu ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo. ¹¹Ta tiñoó cahnu cuan nañi ti Ajenjo. Ta cha yatyin ri sava ndutya cha iyó, nandu-

vi chi Ajenjo cha cuví noo veneno cha uva xaan. Ta cuaha xaan ñáyivi chihí cha cuenda ndutya cuan, vatyi ndu uva chi. ¹²Ta ángel cu cumi cuan nativi ra trompeta ra ta cha yatyin sava ñanyii nduñaa, ta cha yatyin sava yoo, ta cha yatyin cha sava tiñoó andivi cuanaa ti. Ta cha cuenda cha nduñaa suhva ñanyii cuhva cuan, nduñaa cumi tahan hora cha noo noo quivi. Ta cha cuenda cha tiví yoo ta tiñoó, yucuan chaha ña cacuví sandichin chi cumi tahan hora cha noo noo ñuu.

¹³Yaha cuan ta nanyehi ta chiñi vatyi noo ángel ndavá ra mahñu andivi. Ta chihin cha ñihi ndusu ra ta catyí ra tyehe caa:

—¡Ndahvi cuví ñu iyó siqui ñuhu ñayivi vatyi nyaá tiví uñi ca tahan ángel trompeta ra! —catyí ángel cuan.

9 Ta ángel cu ohon cuan nativi ra trompeta ra. Ta nyehi chi noo ra cuan, tari tiñoó andivi caá ra. Ta canacava ra siqui ñuhu ñayivi. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi. ²Tyicuan ta nuña ra yavi cuan. Ta cuaha ñuhma nandaá tari maa ñuhma cha quitá chichi noo horno cahnu. Ta ñuhma cuan chasi chi nuu ñanyii ta nasaca noo chihin tatyí. Ta nduñaa ñayivi. ³Ta mahñu ñuhma cuan caquita coyo pinchi. Ta candava coyo ti siqui ñuhu ñayivi. Ta chicoo ityi chi ti vatyi tyaa ti chi ñáyivi tari tisuhma cha iyó siqui ñuhu ñayivi. ⁴Quehen ti tuhun vatyi ma satasi iñi ti, ni chi cuhu cha iyó nu ñuhu ñayivi, ta ni noo cuhu cuii, ta ni noo yutun, soco chi ñáyivi cha ñahri sellu Nyoo nyaá tyaan ñu. Chi ñu cuan cutyaa ti. ⁵Soco ñahri ityi iyó chi ti cha cahñi ti chi ñáyivi, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaá chi ñáyivi tyicuan caá. ⁶Ta quivi cuan ñáyivi cunanducu ñu

tuhun chihí. Soco ma nañihi ca ñu. Ta vasi cuñí ñu cúvi ñu, soco tuhun chihí cucono ri chi chi ñu vatyí ma cúvi ñu.

⁷Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuaan. Ta tari caá nuu rayii, caá nuu ti. ⁸Ta xixi xiñi ti tari caá xixi xiñi ñusihí caá. Ta tari caá noho ndicaha caá noho ti. ⁹Ta soo ti tari caa, tyicuan caa. Ta ñihí xaan cacahan ndichin ti. Tari cacahan cha cuaha xaan carreta caballu cuhva cha cachinó ti nu iyó cuatyí. ¹⁰Ta tari caá suhma ti-suhma caá suhma ti, vatyí yihí iñu. Ta chihin cuan cuví tyaá ti chi ñáyivi chichí cha ohon yoo. ¹¹Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo nañí ra Abadón. Ta chihin sahan griego nañí ra Apolión, ta cuñí chi catyí: Ra Sanaa.

¹²Yahá noo tindoho cuan, soco cumañi uvi ca.

¹³Ta ángel cu iñu cuan nativí ra trompeta ra. Ta chiñi noo ndusu cha quitá chichí ndi cumi ndiquí tutun arta xuhun cuaan cha nyaá nuu Nyoo. ¹⁴Ta ndusu cuan catyí chi ángel cu iñu cha nyisó trompeta cuan, tyehe caa:

—Ndachi chi ndi cumi ángel cha canuhñí yatyin yuhu yuvi cahnu Eufraates —catyí ndusu cuan.

¹⁵Tyicuan ta ndachí ndi cumi ángel cuan, vatyí cha nyatu tuhva xaan ra maa maa cuhva cuan maa maa quívi cuan, maa maa yoo cuan, maa maa cuiya cuan, vatyí cahñi ra chi cha yatyin cha sava ñáyivi iyó siqui ñuhu ñayivi. ¹⁶Ta chiñi yoso tahan sindaro chihin caballu ra, ta quitá uvi cientu millón tahan ra.

¹⁷Ta tyicuan caa nyehí caballu cuan chihin visión, cha sanyehé Nyoo chii. Ta pechu ra cayosó chi ti cuan, yihí noo caa tyacu cuaha, tyacu azu ta tyacu cuaan. Ta tari caá xiñi ndicaha caá xiñi ca-

ballu ra. Ta chichí yuhu ti quitá ñuhu ta ñuhma ta azufre. ¹⁸Ta cha yatyin sava ñáyivi iyó siqui ñuhu ñayivi cachihí chihin uñi tahan cha caquitá yuhu caballu cuan; ñuhu ta ñuhma ta azufre. ¹⁹Vatyí tunyee iñi cha iyó chi ti, chichí yuhu ti ta suhma ti nyaá. Vatyí tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chi ñáyivi.

²⁰Soco tandihí ca ñu cha candoo, cha ña cachihí chihin cuehe cuan, ña sacucuitá ñu cha sacuví ñu cha ña vaha. Ta ni ña sacucuitá ñu cha sacahnú ñu chi tatyí ña vaha ta chi xitohyo. Vatyí cuví cuan noo xuhun cuaan, xuhun cuichin, bronce, yuu, yutun. Cha ña cuví nyehe, ni ña chiñí ta ni ña cuví caca cuví cuan. ²¹Ni ña casandihí ñu cha chahñí ñu, ta cha satasí ñu. Ta ña sandihí ñu cha iyó ñu chihin rayii ta chihin ñusihí ta ñima yii ñu cuví, ta ñima ñasihí ra cuví. Ta ña sandihí ñu cha suhú ñu.

Ángel cha nyisó libru luhlu

10 Tyicuan ta nyehí inga ángel cha iyó xaan tunyee iñi chii, cha vachi noó ityi andiví mahñu noo vico. Ta noo coo yahnyí nyaá xiñi ra. Ta xiño xaan nuu ra tari ñanyii. Ta tari cha cayú ñuhu chaha ra, tyicuan caá. ²Ta yihí ndaha ra noo libru luhlu cha tanuña nuu. Ta chinanyaá ra chaha chiyo vaha ra nu tyañuhu. Ta chaha chiyo satyin ra chinanyaá ra siqui ñuhu ñayivi. ³Tyicuan ta ñihí xaan cana chaa ra, tari ndusu ndicaha cha nduxaan ti. Ta cuhva cha canachaa ra, chiñi ucha tahan ndusu cha siin siin caa tari cha cahán savi, tyicuan caa ndusu ra. ⁴Ta cha yahá cha chiñi cha cahán ndi ucha ndusu cuan, tyicuan ta cuatyai nuu tutu. Soco chiñi noo ndusu ityi andiví, ta catyí chi chii tyehe caa:

—Coçumi xehun tuhun cha chiñun cahán ndi ucha ndusu cuan. Ta ma tyaun nuu tutu —catyí ndusu cuan chii.

⁵Tyicuan ta ángel cha nyehi cha chañi nu tyañuhu ta siqui ñuhu ñayivi, nacoñehē ra ndaha chiyo vaha ra ityi andivi. ⁶Ta ángel cuan tyanaha ra vatyí cahan ra noo cha ndicha cuenda Nyoo, ra nyitó tyicuan ri maa, ra cha savaha andivi ta ñuhu ñayivi ta tyañuhu ta tandihi cha iyó nuu chi. Ta catyí ra:

—Ñahri ca cha cucuee. ⁷Vatyí cuhva cha cuquichaha tivi ángel cu ucha cuan trompeta ra, yucuan cuhva cuchino cava tuhun xehe cha yihí ñi Nyoo tyi sacuvi ra, tari cuhva sacoto ra chi ra casacuví tyiño nuu ra, ra cacuví profeta cuenda ra —catyí ángel cuan.

⁸Ta ndusu cha chiñi yuhu, cha quita ityi andivi, cahan tucu chi chihin inga chaha, ta catyí chi chii tyehe caa:

—Cuhun, ta quehun libru luhlu cha tanuña nuu, cha yihí ndaha ángel cha chañi nu tyañuhu ta nu ñuhu ñayivi —catyí chi.

⁹Tyicuan ta chahin nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta cahun, vixi xaan tari tyañuñu. Soco chichun cundu uva chi —catyí ra chii.

¹⁰Tyicuan ta quehin libru luhlu cha yihí ndaha ángel cuan, ta chachi. Vixi xaan tari tyañuñu. Soco cha yaha cha chachi, uva xaan nduvi chi chichi. ¹¹Tyicuan ta catyí ra chii:

—Cuñi chi cha cunacatyun inga chaha tuhun cha cahán Nyoo siqui ñayivi cuaha xaan ñuu nyihi ta ñuu nahnu, ta siqui ñayivi siin siin sahan cahan, ta siqui ra cacuví rey —catyí ra chii.

Uvi tahan ra cacuví cha ndaa

11 Tyicuan ta cachaha ra noo ndoo cha tari caá noo yutun cha tyicuhvá chi. Ta cacatyí ra chii tyehe caa:

—Nducuita ta tyicuhvon vehe ñuhu Nyoo ta arta ra, ta nacahvun yoso tahan ñu tuhvá sacahnú chi Nyoo yucuan.

²Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava. ³Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quivi. Ta cacuihno ra sahna tucuihya ñi.

⁴Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha siqui ñuhu ñayivi. ⁵Tatu yóo ñu cuñi satasi ñi chi ninduvi testigu cuan, cuquita ñuhu yuhu ninduvi ra, ta cahmi chi tandihi ñu xaan ñi chi ra. Ta tyicuan caa cucúvi ñu cuñi satasi ñi chi ra. ⁶Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahán Nyoo chi ñayivi. Ta iyó tucu ityi chi ra cha casananduvi ra ñiñi chi ndutya. Ta iyó tucu ityi chi ra cha casanyehe ra tindoho chi ñu iyó siqui ñuhu ñayivi chihin tandihi ri nuu cuehe, yoso tahan chaha cha cacuñi maa ra. ⁷Soco cuhva cha cua ndihí cuhva cuenda ra tuhun Nyoo chi ñayivi, cuquita noo quiti xaan yavi cono cuan, ta cucañi tahan ti chihin ninduvi testugu cuan. Ta cucuvi chasaha ti chi ra. Ta cucahni ti chi ra. ⁸Ta coño ñuhu ra cundoo maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduvi ñuu cuan, (cha cuenda cha ña vaha cha sacuví ñayivi ñuu cuan). ⁹Ta chichi cha uñi quivi sisava, cunyehe tandihi ñayivi coño ñuhu ra, ñayivi tandihi ñuu nyihi, ñayivi tandihi ri tata, ta ñayivi siin siin sahan cahán, ta ñayivi ndihi ri ñuu nahnu, cunyehe ñu coño ñuhu ra. Ta ma cuhva ñu cha quihí coño ñuhu ra chichi ñuhú. ¹⁰Ta ñu cha iyó siqui ñuhu ñayivi cu cusii xaan cuñi ñu cha cuenda cha cachihí ra cuan. Ta nyacua cutachi ñu regalo chi tahan ñu cha sii cuñi ñu, vatyí cachihí ninduvi rayii

cha cachahá cuenda tuhun cahán Nyoo chi ñu. Vatyí chahá xaan ra tindocho chi ñu cha cuhva cha cuñí maa ñu. ¹¹Soco cha yahá cha uñi quivi sisava, Nyoo sanandoto ra chi ra, ta candicuitá tucu ra inga chaha. Ta tandihi ñu nyehe canandoto ra, canayuhvi xaan ñu. ¹²Tyicuan ta ninduvi testigu cuan cachiñi ra noo ndusu ñihi xaan ityi andivi. Ta catyí chi chi ra tyehe caa:

—Ndaa ndo ityi siqui ihya —catyí ndusu cuan chi ra.

Ta candaá ra ityi andivi chichi noo vico. Ta canyehe ñu xaan iñi chi ra nu canandaá ra. ¹³Ta cuhva cuan quichi noo cha taan cahnu. Ta chichi ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihi chichi ñuu cuan chihí ucha mil ñáyivi cha cuenda cha taan cuan. Ta ñáyivi ña chihí, casacahnú ñu chi Nyoo, ra nyaá andivi, cha cuenda cha yuhvi ñu.

¹⁴Yahá tindocho cu uvi cuan, soco numi ri cuquichi tindocho cu uñi.

Nu tiví ángel trompeta cu ucha

¹⁵Ta ángel cu ucha nativí ra trompeta ra. Ta canatyacu ndusu ñihi xaan ityi andivi, ta catyí chi tyehe caa:

Tandihí nu nyacá ñaha rey siqui ñuhu ñayivi ihya, cha yahá nanduvi chi Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuñi chiti ra chihin nuu ra nya nu ñuhu. Ta casacahnú ra chi Nyoo.

¹⁷Ta cacatyí ra:

Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandihí tunyee iñi chii cuvún.

Yoho iyón vityin, ta iyón nu quichaha tandihí ta nya cha cuquichun.

Vatyí cha naquehen cuendon tunyee iñun.

Ta cha quichahun nyaca ñahun vityin.

¹⁸Ta ñáyivi tandihí ñuu nahnu cuxaán ñu.

Soco cha chaá quivi cha tachi tuñun chi ñu.

Ta cha chaá quivi cha cucutuñi chi ñu ndiyi.

Ta chuhvon cha vaha cha tahán chi chi ñu sacuvi tyiño nuun, ñu chahá cuenda tuhun cahún,

ñu cha nacuhvá cuenda añima chi maun, ta sacahnú ñu sivun.

Vasi cahnu ñu cuví ñu ta vasi ndahvi ñu.

Ta chaá cuhva cha sanaun chi ñu sativi chi ñáyivi siqui ñuhu ñayivi, cacatyí ra.

¹⁹Tyicuan ta nuña yuvehe ñuhu Nyoo cha nyaá andivi, ta chichi vehe ñuhu natuvi caja cuenda cha natyihí tahan ra tuhun chihin yo. Ta quihvi tacha. Ta vaa ri maa cuví, ta cahán savi. Ta chiyo noo cha taan. Ta ñihi xaan coon savi yuu.

Nu chicān nyicon noo coo cahnu chi noo ñaha sihi

12 Tyicuan ta tuví noo seña cahnu andiví. Vatyí quitá noo ñaha sihi ta siquí noo ña ñanyii tari cha ñihnó ña vestido. Ta chañí ña siqui yoo. Ta yihí noo corona cha uchi uvi tiño andivi xiñi ña. ²Ta ñaha sihi ihya ñohó sehe ña. Ta chacú cha vavaha ña chihin cha uhvi cha cacú sehe ña, vatyí nyehé xaan ña tindocho cha cua cacu sehe ña. ³Tyicuan ta quitá nonga seña ityi andivi. Ta nyehí noo coo cuaha cahnu. Ta nyaá ucha xiñi ti, ta uchi ndiqui ti. Ta tahan tahan xiñi ti yihí noo corona. ⁴Ta chihin suhma ti sanacoyo ti cha yatyin cha sava tiño andivi siqui ñuhu ñayivi. Ican coo ihya chicuñi ti nuu ñaha cha cua cacu sehe cuan, vatyí ta cha cacu ri cue ta cachi ti chi cue. ⁵Ta ñaha cuan sacacu ña noo rayii. Ta ican ra cuacun-

yaca ñaha tandihi ñáyivi iyó siqui ñuhu ñáyivi. Nihi xaan cua cunyaca ñaha ra tari cha chihin noo yutun caa vee. Ta cha yaha cacu ra, naxita Nyoo chi ra nu nyaá ra nu tyayu ra. ⁶Ta ñaha cuan chinq ña cuahan ña noo ñuhú ityi, nu sanduvaha Nyoo noo nu coo ña, vatyí yucuan cucuhva ra cha cachi ña cha ni ri ca cha noo mil uvi cientu uñi xico quiwi.

⁷Yaha cuan ta chiyo noo cuatyí nya andívi, nu cañi tahan ángel cahnú Miguel ta tandihi ángel cuenda ra chihin coo cahnú cuan. Ta coo cuan ta tandihi tatyí ña vaha cuenda ti, cacañi tahan chihin ra Miguel. ⁸Soco ña saha ganaq ti cha cañi tahan ti. Ta ña ñihí ca ti nu ndoo ti nya andívi chihin tatyí ña vaha cha candihi chihin ti. ⁹Tyicuan ta tava ñehe Nyoo chi ti, cuví ti Coo Chahnu, cha nañí cuihna ra cuví nuu, ra cha sandaví ñaha chi tandihi ñáyivi iyó siqui ñuhu ñáyivi. Maa ra ta tatyí ña vaha cuenda ra canacoyo ra nya nu ñuhu ñáyivi.

¹⁰Tyicuan ta chiñi noo ndusu ñihí nya andívi. Catyí chi tyehe caa:

—Cha chaq nu cacu añima yo vityin. Cha saha ganaa tunyee iñi Nyoo. Cha nyacá ñaha Nyoo yo vityin chihin ra Cristo Sehe ra. Vatyí cha tava ñehe ra chi ra cha tyaa xaan cuatyí siqui ra yañi yo ndiyaca ta ñiyaca nuu Nyoo. ¹¹Ta ra yañi yo cacuvi chasaha ra chi ra chihin niñi ra cuví Mbee Luhlu, ta chihin tuhun Nyoo cha cacahan ra tuhun chihin ñáyivi. Vatyí ña yuhvi ca ra cha cucúvi ra. ¹²Yucuan chaha cusii cuñi nyoho cha iyó ndo andívi. Soco jndahvi nyoho ñu iyó siqui ñuhu ñáyivi ta nu tyañuhu! Vatyí cuihna canacava ra nya andívi ta nyacua nya siqui ñuhu ñáyivi nu nyicú ndo. Ta xaan xaan ra vatyí chitó ra vatyí suhva ri ca quiwi ra nyaá.

¹³Ta cha nyehe coo cahnú cuan vatyí nacava ti nu ñuhu ñáyivi, chica nyicon ti chi ñaha cha sacacu sehe cuan. ¹⁴Soco ñaha cuan ñihí ña uvi tahan ndichin

nahnu tasu, tacuhva cuví ndava ña ta cono ña chi coo cuan nyacua nya ñuhu ityi cuan. Ta yucuan cuví nu cuñihí ña cha cachi ña chichi cha uñi cuiya sisava. ¹⁵Ta coo cuan tuchi ti ndutya chihin yuhu ti, vatyí cono noo yuvi cahnú, vatyí satyañi chi ñaha cuan. ¹⁶Soco ñuhu ñáyivi tyinyee chi ña, vatyí ndata chi ta quihvi yuvi cahnú cha tuchi coo cahnú cuan chihin yuhu ti. ¹⁷Ta cha cuenda cha ña cuví chasaha ti chi ña, cuahan ti cua cañi tahan ti chihin ñáyivi vachi tata ña, ñu cha quichahá tuhun cahnú Nyoo, ñu nyicón cha ndicha cha cahnú ra Jesucristo chihin cha niñi ñu.

Nu nyehe ra Juan uvi quití quiñi caa

13 Chicuinanyai nu ñiti yuhu tyañuhu cuan. Ta nyehi quitá noo quití quiñi xaan caa nuu tyañuhu. Ta nyaá ucha xiñi ti, ta uchi ndiqui ti. Ta tahan tahan ndiqui ti yihí noo corona. Ta xiñi ti nyaá noo tuhun cha cahnú ña vaha siqui Nyoo. ²Quití quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnú cuan chaha ti ityi chi quití quiñi caa cha cunyaa ti nu tyayu ti. Ta chaha ti ityi chi ti cha cunyaca ñaha ti chi ñáyivi. ³Ta noo xiñi quití quiñi caa cuan tari maa cha nyaá noo nu cahvi cahnú. Soco nu cahvi cuan nduvaha. Ta iyo xaan cuñi tandihi ñáyivi iyó siqui ñuhu ñáyivi. Ta nanyicón ñu chi quití quiñi caa cuan. ⁴Ta sacahnú tucu ñu chi coo cahnú cuan, vatyí chaha ti ityi chi quití quiñi caa cuan. Ta sacahnú tucu ñu chi quití quiñi caa cuan, ta catyí ñu:

—¿Yóo cha cuví chi tari cuví chi quití quiñi caa ihya? ¿Ta yóo cha cuví cañi tahan chihin ti? —catyí ñu.

⁵Ta ñihí tucu quití quiñi caa cuan ityi vatyí cahnú ña vaha ti ta cahnú quiñi caa ti siqui Nyoo. Ta cua cunyaca ñaha ti chichi cha uvi xico uvi yoo. ⁶Ta ty-

icuan caa sacuvj̄ ti. Cahān ti siqui Nyoo. Ta cahān ña vaha ti siqui nu nyaá Nyoo. Ta cahān ti chi ñu nyicú andiv̄i. ⁷Ta chicoḡ tucu ityi chi ti cha sacoo ti cuatȳi siqui ñu cuenda Nyoo nyacua nya cuv̄i chasaha ti chi ñu. Ta chicoḡ ityi chi ti siqui ñáyiv̄i ndih̄i ri tata, ñáyiv̄i siin siin sahan cahān, ñáyiv̄i tandih̄i ri ñuu nyih̄i, tandih̄i ri ñuu nahnu, ⁸tandih̄i ñu cha ma ñih̄i ñáyiv̄i chaa coo chihin ra cuv̄i Mbee Luhlu, ra cha chih̄i. Ma ñih̄i ñu vatyi nyata ni cumañi chino ñuhu ñáyiv̄i ta ñahri sivi ñu nyaá nu libru ra. Tandih̄i ñu cuan cusacahnu ñu chi quit̄i quiñi caa cuan. ⁹Ta ñu cutuñi iñi, na quichaha ñu tuhun ihya: ¹⁰Ñu cunyaca vehe caa chi inga ñu, suri cuhun tucu maa ñu. Ta ñu cha cachahñi chihin cha xaan, suri chihin cuan cucúvi tucu maa ñu. Yucuan chaha cuñi xaan chi cha cunye xaan iñi ñu cuenda Nyoo. Ta cuñi chi cha chino iñi ñu chi ra.

¹¹Yahā cuan ta nyeh̄i inga quit̄i quiñi caa. Quit̄a ti chichi ñuhú. Quit̄i ihya nyaá uvi ndiqui ti cha tari caá ndiqui mbee luhlu. Soco tari cahán noo coo xaan vavaha cahán ti. ¹²Ta nyacá ñaha ti tari nyacá ñaha quit̄i quiñi caa cha xihna ri cuan. Suri chihin nuu quit̄i cha xihna ri cuan nyacá ñaha ti. Ta tyiyuhu ti chi ñuhu ñáyiv̄i ta ñu iyó siqui na sacahnu ñu chi quit̄i quiñi caa cha xihna ri cuan, quit̄i cha nduvahā nu cahvi cahnu cha chinyaa chi ti. ¹³Ta cuaha xaan milagru sacuvj̄ ti. Nyacua cuv̄i sanacoyo ti ñuhu cayú ityi andiv̄i chihin nuu ñáyiv̄i. ¹⁴Ta sandav̄i ñaha ti chi ñáyiv̄i iyó siqui ñuhu ñáyiv̄i chihin seña cha cuv̄i sacuvi ti chihin nuu quit̄i quiñi caa cha xihna ri cuan. Ta tach̄i ti nachino noo xiñahñu quit̄i quiñi caa cha tahnyā cahvi chihin mityi, soco ña chih̄i ti. ¹⁵Ta quit̄i quiñi caa cu uvi cuan chicoḡ ityi chi ti cha cuhva ti cha conyito xiñahñu quit̄i quiñi caa cha xihna ri cuan, vatyi xiñahñu cuan cuv̄i cahān. Ta tach̄i xiñahñu cuan nacúvi

tandih̄i ñáyiv̄i ña cuñi sacahnu chi chi. ¹⁶Ta siin ri catȳi ti vatyi na cunyaa noo tuñi chi tandih̄i ñáyiv̄i, tandih̄i ñu nyih̄i, ñu chahnu, ñu tyaȳi, ñu ndahvi, ñu yori chitoho, ta ñu iyó chitoho. Ta cuncunyaa tuñi cuan ndaha chiyo vaha ñu o tyaan ñu. ¹⁷Ta yori maa cuv̄i sata ta xico tatu ñahri tuñi cuan nyaá chi ñu. O tatu ñahri sivi ti, o número sivi ti nyaá chi ñu. ¹⁸Tuhun ihya cuñi xaan chi cha chiñi tuñi. Ñu cutuñi iñi, na saha ñu cuenda número quit̄i quiñi caa cuan. Vatyi número noo raȳi cuv̄i. Ta número ra cuan ican cuv̄i iñu cientu uñi xico iñu.

Nu sacahnú cientu uvi xico cumi mil ñáyiv̄i chi Nyoo chihin cha chitá ñu

14Yahā cuan ta nyeh̄i chi ra cuv̄i Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñáyiv̄i cha nyaá sivi ra tyaan ta sivi Sutu ra. ²Tyicuan ta chih̄i noo cha cayu cha quichi ityi andiv̄i, tari cayu cuaha yuvi nahnu. Ta tari cahán savi cha ñih̄i xaan, o tari noo ndusu cha cuaha xaan ra casacuacú arpa. ³Ta cachitá ñu noo yaa chaa nuu tyayu Nyoo, ta nuu ndi cumi cha nyitó cuan, ta nuu tandih̄i ra cha vaha chahnu cuan. Ta yori cuv̄i cutuhva yaa cuan, iin ri maa cientu uvi xico cumi mil ñu cha cacu añima siqui ñuhu ñáyiv̄i. ⁴Ican ñu ihya cuv̄i ñu cha ña chicoḡ cuatȳi ñu chihin inga raȳi ta ni ri raȳi chihin inga ñusih̄i, vatyi ii ndoo ñu, ta nyicón ñu chi ra cuv̄i Mbee Luhlu tandih̄i ri ityi nu cuahan ra. Cacú añima ñu ta cuv̄i ñu ñu xihna ca chahā cuenda ñu chi ñu chi Nyoo ta chi ra cuv̄i Mbee Luhlu. ⁵Yori cuv̄i catyi vatyi cuendu ñu, vatyi ni noo cuendu ña tuhvá ñu cahān. Yucuan chaha ñahri cuatȳi ñu nuu Nyoo.

Tuhun cha sacotḡ uñi tahan ángel

⁶Tyicuan ta nyeh̄i inga ángel cuahan ndava ra andiv̄i. Ta nyisó ra tuhun Nyoo cha ma ndih̄i ca maa, ta ican tuhun ihya

cuví cha sacacú ra Cristo añima yo, Vatyí cusacoto ra tuhun ihya chi ñáyiví iyó síqui ñuhu ñayiví, ñáyiví ndihí ri ñuu nahnu, ta ndihí ri ñuu nyíhi, ta ñáyiví ndihí ri tata, ta ñáyiví siin siin sahan cahan. ⁷Ta ñihí xaan cahan ra ta catyí ra:

—Na yuhvi ndo chi Nyoo, ta sacahnu ndo chi ra. Vatyí cha chaá cuhva cha cua cutuñi chi ñáyiví. Sacahnu ndo chi ra savaha andiví ta ñuhu ñayiví, ta tyañuhu ta ndohyo ndutya.

⁸Tyicuan ta cuahan inga ángel cuan chata ra, ta catyí ra:

—Cha canacava ñuu Babilonia cahnu vityin, cha taní chi. Vatyí ñu iyó ñuu cuan sañaha ñu chi inga ñáyiví iyó síqui ñuhu ñayiví cha quiñi caa tari sacuví maa ñu. Tari quiví cha sacuiñi ñu chi ñu chihin vinu ña vaha cuví cuan.

⁹Ta nacahan ángel cu uñi chihin cha ñihí ndusu ra ta catyí ra:

—Tatu nya noo ñu sacahnú ñu chi quití quiñi caa cuan ta chi xiñahñu tí, o chahá ñu chi ñu cha cunyaa tuñi tí tyaan ñu, o ndaha ñu, ¹⁰cunyehe xaan ñu tindoho vatyí cutyihí Nyoo chi ñu nu ñuhú, ta nu azufre tari cha cusacoho Nyoo noo vinu xaan chi ñu. Ta chihin nuu ángel ta chihin nuu ra cuví Mbee Luhlu cucuví cuan. ¹¹Ta ñuhma cha quitá nu nyehé ñu tindoho cuan tyicuan ri maa cuquita chí. Ta ma nyitatu maa ñu ndiyaca ta ñiyaca nu cohon ñu yucuan, vatyí sacahnú ñu chi quití quiñi caa cuan ta chi xiñahñu tí, o chahá ñu cha cunyaa tuñi sivi tí chi ñu. ¹²Yucuan chaha ñu yihí cuenda Nyoo, ñu quichahá tuhun cahán ra, ñi ñi ñu chinó ñi ñu chi ra Jesús ta cuñí chi cha cunyehe xaan ñi ñu cha nyehé ñu tindoho sacuví inga ñáyiví.

¹³Tyicuan ta chiñi noo ndusu cha quichí ityi andiví, ta catyí chi chí tyehe caa:

—Tyaa tuhun ihya: “Vityin ta ityi nuu ca, síi xaan cucuví chi ñu chihí ta chinó ñi ñu chi Sutu Mañi yo.” Ndicha, catyí

Tatyí Ii Nyoo vatyí cunyitatu ñu chihin tyiño sahá ñu. Ta iin ri cuhun cha vaha cha sacuví ñu chihin ñu.

Nu cutachi tuñi Nyoo chi ñáyiví

¹⁴Tyicuan ta nanyehí ta nyehí noo vico cuichin. Ta síqui vico cuan nyaá noo rayíi cha ndicha cuii maa cha quichí nya gloria. Ta yihí noo corona xuhun cuaan xiñi ra. Ta yihí ndaha ra noo mityi cutya ta xaan. ¹⁵Ta quitá nonga ángel chichi vehe ñuhu ta cha canachaa ra chi ra nyaá síqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó síqui ñuhu ñayiví. Vatyí cha chaá cuhva, ta cha iyó síqui ñuhu ñayiví cha chityí chi —catyí ra.

¹⁶Tyicuan ta ra cha nyaá síqui vico cuan sayaha ra mityi ra síqui ñuhu ñayiví, ta nasataca ra cha iyó nuu chi.

¹⁷Tyicuan ta inga tucu ángel quitá chichi vehe ñuhu cha nyaá andiví. Ta nyisó tucu maa ra noo mityi cutya cha xaan vavaha. ¹⁸Ta nu nyaá arta quitá tucu nonga ángel cha iyó ityi chí cha cunyaca ñaha chí ñuhú cha cayú. Ta canachaa ra ta cana ra chí ra cha nyisó mityi cutya cha xaan cuan. Ta catyí ra chí ra:

—Saha tyiñon chihin mityi xaan cha nyisón chiña, ta na satacon vatu tichaha ndiví cha iyó síqui ñuhu ñayiví, vatyí cha chityí —catyí ra.

¹⁹Ta ángel cuan sayaha ra mityi ra síqui ñuhu ñayiví ta chahnya ra tichaha ndiví cha iyó síqui ñuhu ñayiví. Ta tyihí ra noo nu tyihí ra vatyí cucuhí ra ta quita ndutya chí. Ta cha tyehe caa cuñí chí catyí cha cutachi tuñi Nyoo chí ñáyiví. ²⁰Ityi chata ñuu cachahñi ra tichaha ndiví cuan, ta cuñí chí catyí vatyí cachihí cuaha xaan ñáyiví, ta nu cuví cuan, cama xaan cama xaan ñiñi ñu chati. Ta cha chí nya nu sucun nu nyaá frenu yuhu caballu ta tari cuhva noo uñi cientu kilómetro chinó ñiñi cuan.

**Nu quitā ángel chihin ucha ca
tahan tindoho cha cunyehe
ñáyivi nu ndihi tuhun**

15 Nyehe nonga seña cahnu andivi, ta yuhvi xain cuvī, vatyī nyehī ucha tahan ángel chihin ndi ucha tindoho. Chihin ihya cuvī nu ndihi tindoho vatyī cundihi cha cuxaan Nyoo chihin ñáyivi cha ña quichahá ñu tuhun cahán ra.

²Ta nyehe tiqui noo cha tari caa tyañuhu, xiño tari caá ino, nasaca chihin ñuhu cha cayú. Ta ñu cha yaha cuvī chasaha chi quitī quiñi caa cuan ta chi xiñahñu ti, ñu cuvī chasaha cha ma cunyaa número sivi ti cuan chi ñu, tandihi ñu tayucú ñu yuhu tyañuhu cha xiño cuan. Ta ndahá ñu arpa, cha chaha Nyoo chi ñu. ³Ta chitá ñu yaa ra Moisés, ra sacuvī tyiño nuu Nyoo, ta yaa ra cuvī Mbee Luhlu. Ta tyehe caa catyí ñu: Cahnu ta iyo xaan caá tandihi maa cha sacuvún.

Nyoo, Sutu ndi, iyó tandihi tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandihi ñáyivi iyó siqui ñuhu ñáyivi.

⁴¿Yóo cha ma yuhvi chuun, yoho Sutu Mañi nyuhu?

¿Yóo cha ma sacahnu chuun?

Vatyī noo tuhun ri maun cuvī ra ii.

Ta cuquichi coyo ñáyivi tandihi ñuu, ta cusacahnu ñu chuun.

Vatyī cha nyehe ñu cha vaha cha sacuvún, catyí ñu chitá cuan.

⁵Cha yaha tuhun ihya ta nanyehi nuña yuvehe ñuhu nya andivi nu cumi vaha ñu tabla cha nyaá ley. ⁶Ta chichi vehe ñuhu cuan quitā coyo ndi ucha ángel cha canyisó ndi ucha tindoho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan. ⁷Tyicuan ta noo cha nyitó cuan, chaha cuan noo noo copa

xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñáyivi. Ta ican ra iyó ra tyicuan ri maa. ⁸Ta chichi vehe ñuhu cuan chitū maa chihin ñuhma cha cuenda cha cahnu xaan cuvī Nyoo ta cha cuenda tunyee iñi iyó chi ra. Ta yori maa cuvī quihvi chichi vehe ñuhu cuan cha niri ca cha cumañi ndihi ndi ucha tindoho cha nyisó ndi ucha tahan ángel cuan.

**Copa cha yihí tindoho cha cua
saquichi ndi ucha tahan ángel cuan**

16 Tyicuan ta chiñi noo ndusu ñihi cha quitā vehe ñuhu nu nyaá Nyoo. Ta catyí chi chi ndi ucha ángel cuan:

—Cuahan ndo cua coyo ndo cha ñohó chichi copa chiña siqui ñáyivi iyó siqui ñuhu ñáyivi, vatyī Nyoo cutachi tuñi ra chi ñu —catyí ndusu cuan.

²Ángel cha xihna ri cuan chahan ra ta coyo ra cha ñohó chichi copa cuan siqui ñáyivi cha nyaá tuñi quitī quiñi caa cuan chi, ñu cha sacahnú xiñahñu ti. Ta quitā noo nu cahvi xaan chi ñu, ta uhvi xaan.

³Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduvī niñi tari niñi noo ndiyi, ta tandihi cha nyitó chichi tyañuhu cuan cachihī.

⁴Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutya ta cananduvī chi niñi. ⁵Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyī tachí tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihi. ⁶Vatyī maa ñu cachati ñu niñi ñáyivi cuendon ta niñi ra cacuvī profeta cuendon. Ta vityin yoho tari cha cunasacohun niñi chi ñu vatyī tyicuan caa tahán chi chi ñu —catyí ángel cuan.

⁷Ta chiñi tiqui vatyi cahan noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihi tunyee iñi chuun. Vityin cha yaha tachi tuñun chi ñáyivi chihin cha ndicha ta chihin cha ndaa —catyí cuan.

⁸Ta ángel cu cumi cuan coyo ra cha yihí chichi copa ra nu ñanyii. Ta chicoo ityi chi ñanyii cuan vatyi cahmi chi chi ñáyivi chihin ñuhu chi. ⁹Ta tandihi ñu, quiñi xaan chahmi ñanyii chi ñu. Soco ña canasama ñu cuhva iyó ñu, ni ña casacahnu ñu chi Nyoo. Ta cahan ña vaha ñu siqui Nyoo ra cuví sanyehe tindoho chi ñu tyehe caa.

¹⁰Ta ángel cu ohon cuan coyo ra cha yihí chichi copa ra siqui tyayu quití quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacua nacachi yihí ñu yaa ñu cha cuenda cha nyehé xaan ñu cha uhvi. ¹¹Soco ni tyicuan caa ta ña sandihí ñu cha sacuví ñu cha ña vaha. Ta cahan ña vaha ñu siqui Nyoo ra nyaá andívi cha cuenda cha uhvi chi ñu ta cha cuenda nu cahvi chi ñu.

¹²Ta ángel cu iñu cuan coyo ra cha yihí chichi copa ra siqui yuvi cahnu Eufates. Ta yuvi cuan na ityi chi tacuhva vatyi nuña noo ityi cha yaha ra cacuví rey cha vachi coyo ityi nu caña ñanyii.

¹³Tyicuan ta nyehí cha quitá yuhu quití quiñi caa cuan ta yuhu coo cahnu cuan ta yuhu ra cuví profeta cuendu. Vatyi caquitá coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan. ¹⁴Ican ihya cuví tatyí cuihna cha casacuví milagru nahnu. Ta quitá coyo chi vatyi sandu iin ri chi tandihi rey cha iyó siqui ñuhu ñáyivi, vatyi ca-cañi tahan ra quivi cusañaha Nyoo tyi iyó tandihi tunyee iñi chi ra. ¹⁵Ta catyí Nyoo:

—Nyehe ndo vatyi yuhu cha vachi tari noo ra suhu. Vatyi sana ri iñi ndo ta quihví ra suhu vehe ndo. Siñ xaan cucuvi chi ñáyivi nyatú tuhva ri quivi quichi. Ta

vii cumí ñu sahma ñu (o cuñí chi catyí añima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶Ta cundu iin ri ra cacuví rey nu nañí chi chihin sahan hebreo Armagedón.

¹⁷Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andívi nu nyaá Nyoo nu tyayu ra, quitá noo ndusu chaa xaan ta catyí chi:

—Cha cuví vityin —catyí ra.

¹⁸Tyicuan ta vaa ri maa cuví ta cahán savi ta quihví tacha. Ta ñihí xaan tañ siqui ñuhu ñáyivi. Ta ndaha chicoo ñáyivi siqui ñuhu ñáyivi, ta ña tuhva taan cha ñihí xaan tyicuan caa. ¹⁹Ta nu tañ cuan ndata ñuu cahnu cuan, uñi nu ndata. Ta tandihi ca ñuu siqui ñuhu ñáyivi canacoyo. Ta Nyoo nicohon iñi ra chi ñuu cahnu Babilonia cuan vatyi quiñi xaan sacuví ñu. Ta sanyehe xaan ra tindoho chi ñu vatyi cuxaan xaan ra chi ñu. ²⁰Tandihí ñuhú cha iyó chichi tyañuhu ta tandihí yucu, ndihí cuanaa.

²¹Ta nahnu xaan tucu savi yuu coon ityi andívi siqui ñáyivi. Ta vee xaan. Tari noo cha uvi xico kilu vee noo noo savi yuu cuan. Ta ñáyivi cahan ña vaha ñu siqui Nyoo cha cuenda tindoho savi yuu cuan, vatyi cuví chi noo tindoho cahnu xaan cha cuenda ñu.

Nu cua tachi tuñi Nyoo chi noo ñaha cata iñi

17 Tyicuan ta chichi cha ucha tahan ángel cha cayihí ndaha ucha copa cuan, quichí noo ra nu nyaí, ta catyí ra chii:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu. ²Vatyi ra cacuví rey siqui ñuhu ñáyivi casacuví ra cha quiñi caa chihin ña, ta ñáyivi cha iyó siqui ñuhu ñáyivi, tiví xaan ñu chihin cha quiñi caa cha sacuví ña —catyí ra chii.

³Tyicuan ta nyehi noo cha sañaha Tatyí li Nyoo chii, ta chinyaca ángel cuan chii chiqui ndi nu yori maa ñáyivi iyó, ta yucuan nyehi chi noo ñaha, yosó ña siqui noo quití cuaha quiñi caa. Ta nyicú sivi cha cahán ña vaha siqui Nyoo chi ti. Ta ucha tahan xiñi ti nyaá ta uchi ndiqui ti. ⁴Ta ñaha cuan ñihnó ña noo sahma tyacu nyaa ta tyacu cuaha. Ta cuaha xaan xuhun cuaan iñi chi ña, yuu tyaquí ta perla ñandihí. Ta yihí ndaha ña noo copa xuhun cuaan tyitú yihí chihin cha ña vaha ta cha quiñi caa cha sacuví ña. ⁵Ta tyaan ña nyaá noo sivi cha cuví noo tuhun xehe cha ña cutuñi iñi ñáyivi. Vatyí catyí chi: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñáyivi.” ⁶Tyicuan ta tuví iñi vatyí ñaha cuan chiñi ña chihin cha chihí ña niñi ñu cuenda Nyoo, ta ñu cha cachihi cha cuenda cha cahán ñu tuhun ra Jesús. Ta cha nyehi cuan, iyo xaan cuñí. ⁷Tyicuan ta catyí ángel cuan chii:

—¿Ñáá tuhun cha iyo xaan cuñún? Cua sacote chuun ñáá cha cuñí chi catyí tuhun xehe ñaha sihi ihya ta quití quiñi caa cha yosó ña, quití cha nyicú ucha xiñi ta uchi ndiqui. ⁸Quití quiñi caa cha nyehun cuan, cuví ti noo quití cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndihí tuhun ti. Ta ñáyivi iyó siqui ñuhu ñáyivi iyo xaan cucuñi ñu na nanyehe ñu chi quití quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehe chi ti cuan, cuví ñu ñu cha ñahri sivi nyaá nu libru Nyoo nyata quivi chinqo ñuhu ñáyivi. Ican libru cuan cucatyí yóo ñáyivi cunconyito tyicuan ri maa. ⁹Ihya cuví noo cha cuñí chi nacoto ndo: Ndi ucha xiñi ti cuan cuñí chi catyí ucha tahan yucu cha nyaá ñaha cuan siqui. ¹⁰Ta xiñi ti cuñí tucu chi catyí ucha tahan rey. Ta

ohon tahan rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quivi quichi ra nu ndihí, ña naha cucunyaca ñaha ra. ¹¹Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quití quiñi caa cha chiyo quivi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuvi nu cua ndihí tuhun ti.

¹²Ta ndi uchi tahan ndiqui cha nyehun cuan, cuñí chi catyí ndi uchi tahan rey cha cumañi ca cacunyaca ñaha. Soco cucoo ityi chi ra cha cunyaca ñaha ra noo ora, iin ri chihin quití quiñi caa cuan. ¹³Ndi uchi tahan rey cuan iin xaan ri cuhva cucaca xiñi ra. Ta cunacuhva ra tunyee iñi ra chi quití quiñi caa cuan. Ta tandihí ityi cha iyó chi ra cunacuhva ra chi ti. ¹⁴Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuvi chasaha ra chi ra. Vatyí ican ra cuví nuu chi tandihí ra nyacá ñaha. Ta cuví tucu ra nuu chi tandihí ra cacuví rey. Ta ñu nyicú chihin ra, Nyoo nacana chi ñu ta nacachi ra chi ñu. Ta ñi xaan iñi ñu nyicón ñu chi ra.

¹⁵Ta catyí tucu ángel cuan chii ñandihí:

—Tandihí tyañuhu cha nyehun cuan, cha nyaá ñaha cata iñi cuan siqui, ican cuví ñáyivi tandihí ñuu nyihi ta tandihí ñuu nahnu, ñu siin siin sahan cahán. ¹⁶Ta ndi uchi ndiqui cha nyehun xiñi quití quiñi caa cuan cha cuví uchi tahan rey cuan, ican ra cuan cuasatasi iñi chi ñaha cata iñi cuan. Ta cusandoo ra chi ña cha notuhun ri maa ña. Ta cusanduvi tyiyaa ra chi ña. Ta cucachi ra coño ñuhu ña. Ta cutyihí ra chi ña nu cayú ñuhu. ¹⁷Vatyí Nyoo sana ndaha ra añima rey cuan vatyí casacuvi ra cuhva cuñí maa ra. Vatyí iin ri cuhva cucaca xiñi ra,

ta cucuhva ra ityi chi quití quiñi caa cuan cha cunyaca ñaha ti tari rey nyacua nya chino cava tuhun cahán maa Nyoo. ¹⁸Ñaha sihi cha nyehun cuan, ican cuví ñuu cahnu cha nyacá ñaha chi tandihi ra cuví rey siqui ñuhu ñayivi.

Nu cua tiví ñuu Babilonia

18 Cha yaha tuhun ihya ta nyehi inga ángel cha vachi noó ityi andivi ta iyó xaan ityi chi ra. Ta ñuhu ñayivi ndichin xaan nduvi chihin cha ndichin ra. ²Ta ñihi xaan ndusu ra ta canachaꝝ ra, ta catyí ra:

—Cha yaha tuhun ñuu Babilonia cahnu cuan. Ta cha nanduvi chi nu iyó ra ña vaha. Vehe tandihi nuu tatyí ña vaha cha nanduvi. Ta taca saa ña vaha nanduvi ñandihí. ³Vatyí tandihí ñayivi tiví ñu cha cuenda cuatyí sacuvi ñuu Babilonia cuan. Ta ra cacuví rey, ra nyacá ñaha siqui ñuhu ñayivi tari cha cachiyó ra chihin ñaha cuan cha cuví ñuu Babilonia. Casacuvi ra cuatyí chihin ña. Ta ra cha cuahan cuanaxico ñuu Babilonia cuan candutyayii ra chihin cha xico ra chi ñu ñuu cuan vatyí tandihí cuhva ta sanaa ñu xuhun ñu chihin cha cata iñi ñu.

⁴Tycuan ta chiñi nonga ndusu ityi andivi. Ta catyí chi:

—Quita ndo ñuu chiña, nyoho cha cuví ndo ñayivi chii, tacuhva cha ma cutahan ndo sacuvi ndo cuatyí chihin ñu chiña, tacuhva ma cutahan ndo ndoho ndo tari maa ñu. ⁵Vatyí cha caá ticuiti cuatyí ñu ñuu cuan, nyacua cha chaꝝ chi nu nyaá Nyoo. Ta Nyoo cha nichon iñi ra cha ña vaha sacuvi ñu. ⁶Cuhva ndo chi ñu suri maa cha chaha ñu chi inga ñayivi. Ta uvi ca chaha sananyehe ndo tindoho siqui cha sacuvi ñu. Cuhva ndo noo tindoho cunyehe ñu cha ñihi uvi ca chaha ican saha cha chaha maa ñu chi inga ñayivi. ⁷Yucuan chaha cuhva ndo cha iyo xaan tahan ñu chihin ta sanyehe

xaan ndo tindoho chi ñu tari cuhva cha sacahnú xaan ñu chi ñu ta cusii xaan iñi ñu. Vatyí catyí ñuu cuan chichi añima chi: “Ihya nyaí tari noo reina. Ñima ñaha chihí yii cuví, ta ni ma cunyehe tindoho”, chicá iñi chi. ⁸Yucuan chaha chichi cha noo ri quivi cuquichi tindoho siqui ñuu cuan, cuquichi tuhun chihí, cuquichi tucuihya iñi ta coo tama ñuu cuan, ta cucayu chi chihin ñuhu. Vatyí iyó xaan tunyee iñi chi Nyoo Sutu yo ta cutachi tuñi ra chi ñu ñuu cuan.

⁹Ra cacuví rey siqui ñuhu ñayivi ihya tari cha cachiyó ra chihin ñaha cha cuví ñuu cuan, cuacu chaa ra, cunducuihya xaan iñi ra na cananyehe ra ñuhma cha cayú ñuu cuan. ¹⁰Ta nya sava ri cucuitayucu ra cha cuenda cha cayuhvi ra tindoho cuan. Ta cucatyí ra:

—¡Ndahvi yoho, ñuu cahnu Babilonia, ñuu cha chiyó xaan tunyee iñi chii! Vatyí noo tuhun cuhva ta chaꝝ tindoho nye-hún —cucacatyí ra.

¹¹Ta ra cha canaxicó ñáá ndihí cha canaxicó, suri cucuacu chaa ra ta cunducuihya iñi ra cha cuenda ñuu cuan. Vatyí yori ca sata cha canaxicó ra. ¹²Vatyí xicó ra xuhun cuaan, xuhun cuichin, yuu tyaqui, perla, sahma lino finu, sahma seda, ta sahma tyacu nyaa, ta tyacu cuaha. Ta nyisó tucu ra tandihí nuu vitu cha vixi chahán ta ñáá ndihí cha chinó chihin noho landa, vitu tyaqui, ta caa cha cuví bronce, ta caa cha cuví hierro, ta yuu cha cuví mármol. ¹³Ta nyisó tucu ra canela, ñáá ndihí ca cha vixi chahán, tari cutu, mirra, perfume, vinu, aceteye, yutyí paan finu, ta trigu. Ta suri nyisó tucu ra quití cuenda carga, ta mbee, caballo, carru. Ta nyacua nya añima ndahvi cha cuví musu ra ta caxico ra. ¹⁴Ta catyí ra chi ñayivi ñuu cuan tyehe caa:

—Ñahri ca cha tyaqui cha chiyó chuun, cha tahán xaan iñun. Ta cha

cuachiyo tandihi cha tyayiun. Ta ma cunañihi ca maun tandihi cuan —catyí ra.

¹⁵ Ra cha caxicó tandihi ihya, candutyayii ra cha cuenda cha satá ñu ñuu cuan cha xicó ra. Cañi cucuitayucu ra chihin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya iñi ra. ¹⁶ Ta cucatyí ra:

—¡Ndahvi ñuu cahnu cuan! Cuví chi tari noo ñaha sihi cha ñihnó sahma lino finu, sahma tyacu nyaa ta tyacu cuaha. Ta iyo yihi ña xuhun cuaan, ta yuu tyaquí ta perla. ¹⁷ ¡Vatyí noo tuhun ri cuhva ta ndihí cha tyayii xaan cuan! —cucatyí ra caxico cuan.

Ta tandihi ra cuví capitán cuenda barcu, chihin ñu cañoho chichi, tandihi ñu casahá tyiño nu tyañuhu, nya sava candoó ñu. ¹⁸ Ta cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáá nonga ñuu chiyo tari ñuu cahnu ihya? Ñahri ca —cucatyí ñu.

¹⁹ Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catyí ñu:

—¡Ndahvi nduví yo cha cuanaa ñuu cuan! Vatyí chihin cha tyayii ñuu cahnu cuan ndutyayii tandihi yo, ñu chicá noo nu tyañuhu chihin barcu. ¡Ta vityin noo tuhun cuhva luhlu ri ta cuanaa chi! —catyí ñu.

²⁰ Soco cusii cuñi nyoho cha cuenda ñuu cuan, nyoho cha iyó andiví, nyoho ñu yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cusii cuñi ndo vatyí cha cuenda ndo ta tachí tuñi Nyoo chí ñu cuan, ta cha cuenda cha ña vaha cha sacuví ñu chihin ndo.

²¹ Tyicuan ta noo ángel cha iyó xaan tunyee iñi chi, nacoñehę ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihi tuhun ñuu Babilonia cahnu, Ta ni inga ca chaha

ta ma nyehe ca ndo chí ñu. ²² Ta ma cuiñi con yaa ityi chichi ñuu cuan, vatyí yori ca cusacuacu arpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáá ndihi tyiño. Ta ni ma tyacu ca cha cayu molino. ²³ Ta ni nonga ñuhú tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxico cha chiyo ñuu cuan, ican ra cuví ra cahnu ca cuví nuu ñáyivi iyó siquí ñuhu ñayivi. Nyoho ñu Babilonia, sandaví ñaha xaan ndo chí tandihi ñáyivi iyó siquí ñuhu ñayivi chihin cha sataasi ndo.

²⁴ Vatyí cuaha xaan niñi ra cacuví profeta Nyoo iñi chichi ñuu cuan vatyí chahñi ñu chí ra. Ta iñi tucu niñi ñu cuenda Nyoo, ta niñi tandihi ñu cha cachahñi ñáyivi nicahnu ñuhu ñayivi.

19 Cha yahá cuan, ta chiñi noo ndusu cha cuaha vavaha ñáyivi nya andiví. Ta catyí ñu:

¡Cahnu xaan cuví Nyoo! Sutu Mañi yo, Nyoo cuví ra ra sacacu chí yo. Ta chí maa ra tahán chí cha sacahnu yo, tyi iyó xaan tunyee iñi chí ra.

² Vatyí vaha sacutuñi ra chihin cha ndaa ta chihin cha ndicha.

Tachí tuñi ra chí ñaha cata iñi cuan.

Vatyí sativí xaan ña chí ñáyivi iyó siquí ñuhu ñayivi chihin cha quiñi caa cha sacuví ña chihin ñu.

Ta yucuan chaha tachí tuñi ra chí ña, ta cha cuenda cha chahñi ña chí ñu sacuví tyiño nuu ra.

³ Ta quichaha catyí ñu inga chaha:

—¡Cahnu xaan cuví Nyoo! Ñuhma cha cayú ña, ma cucuita ca maa cha ndaa chí ityi siquí —catyí ñu.

⁴ Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñi chiti ra nya nu ñuhú. Ta casacahnú ra chí Nyoo nu nyaá ra nu tyayu ra. Ta catyí ra:

—¡Na cuvi chi tyicuan caa! ¡Cahnu xaan cuví Nyoo! —cacatyí ra.

⁵Ta nu nyaá tyayu Nyoo, tyacu noo ndusu, ta catyí chi:

Sacahnu ndo chi Sutu yo Nyoo
Tandíhi nyoho cha sacuví ndo tyiño nuu
ra,
ta quichahá ndo chi ra, vasi nyihi ndo, o
chahnu ndo.

Nu cua tandaha ra cuví Mbee Luhlu chihin ñáyivi chinó iñi chi ra

⁶Ta chini tiqui noo ndusu tari cha
cuaha vavaha ñáyivi cahán, tari ndusu
nu cuaha xaan yuvi ndutya, ta tari cha
ñihi xaan cahán savi. Ta catyí chi:

¡Cahnu xaan cuví Sutu yo Nyoo! Vatyí
cha quichahá nyaca ñaha ra ta iyó
tandíhi tunyee iñi chi ra.

⁷Na cusii cuñi yo ta na cutu yo chihin
tusii iñi. Na sacahnu yo chi ra.

Vatyí cha chaá cuhva cha cua coo yo vico
tandaha ra cuví Mbee Luhlu.

Ta yoó cuacuví yo tari noo ñasihi ra, cha
nyatú tuhva ri yo quivi tandaha yo
chihin ra.

⁸Ta maa yo cucuihno yo sahma linu
finu, ndii ta cuichin.

Vatyí sahma linu finu cuan cuñí chi catyí
cha vaha cha sacuví ñáyivi cuenda ra.

⁹Tyicuan ta quichaha catyí ángel cuan
chi:

—Tyaa tuhun ihya nu tutu: “¡Sii xaan
cuví chi ñu cha nyaá cuhun vico tandaha
ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha Nyoo
—catyí ra chii.

¹⁰Tyicuan ta chicuiñi chiti chaha án-
gel Nyoo cuan vatyí sacahni chi ra, soco
catyí ra chii:

—Ma sacahnu chii, vatyí musu Nyoo
cuví tucu yuhu tari yoho, ta tari tandíhi
ra yañi yo cha nyicón tuhun ndicha ra
Jesucristo. Chi Nyoo tahán chi sacahnu
yo —catyí ra chii.

Vatyí tuhun ndicha ra Jesús, ican cuví
cha chahá cuhva chi ra cacuví profeta, ra
cha cachahá cuenda tuhun cahán Nyoo
chihin yo.

Nu sañahá chi cuenda ra cha yosó caballo cuichin

¹¹Tyicuan ta nyehi tanuña andivi. Ty-
icuan ta tuví noo caballo cuichin. Ta ra
yosó chi ti nañi ra Ra Ndicha Cha Nii
Iñi Sacuvi Tyiño Nuu Nyoo. Vatyí chihin
cha ndaa sacutuñi ra chi ñáyivi, ta cañi
tahan ra chihin cha ña vaha chihin cha
ndaa. ¹²Xiño xaan chiti nuu ra tari cha
cayú ñuhu. Ta cuaha xaan corona yihí
xiñi ra. Ta nyaá noo sivi chi ra cha noo
tuhun ri maa ra chitó ra ñáá sivi nyaá chi
ra. ¹³Ta ñihno ra noo sahma iñi niñi. Ta
maa ra nañi ra Tuhun Cahán Nyoo. ¹⁴Ta
canyicón sindaro andivi chi ra, cañihno
ra sahma linu finu, sahma cuichin ta
ndii. Ta cayosó ra caballo cuichin. ¹⁵Ta
chichi yuhu ra nañi Tuhun Cahán Nyoo
cuan, quitá noo mityi cha xaan ni nduvi
chiyo yuhu, vatyí chihin tuhun cahán
ra cusañicuehe ra ñáyivi iyó siqui ñuhu
ñáyivi. Ta ñihi cunyaca ñaha ra chi ñu
tari chihin noo yutun caa. Maa ra cu-
tachi tuñi ra chi ñu tari noo ra cha sacun-
yihí tichaha ndivi chihin chaha ra. Ta
cusacoho ra vinu uva chi ñu, ta ihya cuñi
chi catyí tyi cuxaan Nyoo chihin ñu ta
cutachi tuñi ra chi ñu vatyí chaha xaan
ñu tisihi chi Nyoo ra iyó tandíhi tunyee
iñi chii. ¹⁶Ta nu sahma ra ta nu sihin
ra cuan nyaá letra cha catyí tyehe caa:
“Ihya cuví Ra cuví nuu chi tandíhi rey.
Ta ican ra cuví nuu chi tandíhi ra nyacá
ñaha.”

¹⁷Tyicuan ta nyehi chi nonga ángel
nanyaá ra nu ñanyii. Ta chihin tandíhi
fuerza ra canachaá ra chi tandíhi saa cha
candavá ityi andivi, ta catyí ra chi ti:

—Ñaha ndo ta candu iin ri ndo vatyí
cuxiñi ndo cha chahá Nyoo cachi ndo.
¹⁸Vatyí cachi ndo coño ra cacuví rey ta

ra cuví nuu chi sindaro ta chi ra ndachan xaan saha chii. Ta çachi ndo coño caballu ta coño ñuhu ra cha cayosó chi ti. Çachi ndo coño tandihi ra, vasi ra yori chitoho o ra iyó chitoho, vasi ra nyihi o ra chahnu —catyí ra chi saa.

¹⁹Tyicuan ta nyehi chi quití quiñi caa cuan ta chi ra cacuví rey cha iyó siqui ñuhu ñayivi chihin sindaro cuenda ra, vatyí candu iin ri ra vatyí cacañi tahan ra chihin ra yosó caballu cuichin cuan ta chihin sindaro cuenda ra. ²⁰Ta tijn ra chi quití quiñi caa cuan iin ri chihin ra cuví profeta cuendu cuan, vatyí chihin nuu quití quiñi caa cuan ta sacuvi ra cuendu cuan milagru, ta sandavi ñaha ra chi ñáyivi cha chaha chi cunyaa tuñi quití quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi ninduvi ra nu ñuhu cha cayú chihin azufre. ²¹Ta tandihi ca ñu cachihí ñu chihin mityi xaan cha quitá yuhu ra cha yosó caballu cuichin cuan. Ta tandihi maa saa, cachachi xaan ti coño ñu.

Nu sañahá chi cuenda noo mil cuiya

20 Cha yaha tuhun cuan ta nyehi chi noo ángel vachi noó ityi andivi ta yihí ndaha ra ndaha ticu yuvehe yavi cono cuan. Ta yihí tucu ndaha ra noo cadena cahnu. ²Ángel ihya tijn ra chi coo cahnu cuan, quití cha cuví Coo Chahnu cuan, cha cuví cuihna. Ta chahñi ra chi ti chihin cadena noo mil cuiya. ³Ta tuchi ra chi ti yavi cono cuan. Ta yucuan nacasi ra chi ti. Ta tyaq ra noo sellu yuvehe cuan tacuhva cha ma sandavi ñaha ca ti chi ñáyivi iyó siqui ñuhu ñayivi, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quivi.

⁴Yaha cuan ta nanyehi cuaha xaan tyayu tayucú. Ta nuu chi nyicú ñu cha chicoq ityi chi vatyí tachi tuñi ñu chi ñáyivi. Ta nyehi tiqui añima ñu chah-

nyá ñáyivi xiñi cha cuenda cha cahñ ñu tuhun Nyoo cha chaha cuenda ra Jesús chi ñu. Ta maa ñu, ña sacahnú ñu chi quití quiñi caa cuan, ni chi xiñahñu ti, ni ña chaha ñu chi ñu cha cunyaa tuñi ti tyaan ñu, ni ndaha ñu. Nyehi vatyí ican ñu ihya, canandoto ñu ta chicunyaca ñaha ñu chihin ra Cristo noo mil cuiya. ⁵Ican ñu ihya cuví cha nandoto cha xihna ca. Soco inga ityi ndiyi ña nandoto ñu nyacua nya cha yaha mil cuiya cuan. ⁶¡Sii xaan cuñi ñu ii cuenda Nyoo, ñu cha tahán chi nandoto cha xihna ri! Ta ma cuhun ñu tuhun chihi cuuvi nu cuví anyaya nu tachí tuñi Nyoo chi añima ña vaha. Vatyí cucuvi ñu sutu cha cuenda Nyoo ta cuenda ra Cristo. Ta cucunyaca ñaha ñu mil cuiya chihin ra. ⁷Ta cha yaha mil cuiya cuan, tyicuan ta cundachi cuihna nu ñohó ra vehe caa. ⁸Ta cuquita ra, ta cusandavi ñaha ra chi ñáyivi nicahnu siqui ñuhu ñayivi. Cuquita ra vatyí cusandavi ñaha ra chi ñáyivi Gog ta Magog, ñu xaan iñi chi Nyoo. Ta cusandu iin ri ra chi sindaro ñuu cuan vatyí cuhun ra cuatyí. Cuaha xaan ra, tari maa ñiti yuhu tyañuhu. ⁹Tyicuan ta cuahan coyo ra nicacahnu siqui ñuhu ñayivi. Ta cachasi cutya ra nu iyó ñu cuenda Nyoo ñuu Jerusalén nu cuñi xaan Nyoo. Soco Nyoo cusaquichi ra ñuhu ityi andivi ta cucahmi chi chi tandihi sindaro cuan. ¹⁰Ta cuihna cha sandavi ñaha chi ñu, cutuchi Nyoo chi ra chichi anyaya cahnu nu cayú ñuhu chihin azufre, nu tuchi tucu ra chi quití quiñi caa cuan ta chi ra cha cuví profeta cuendu. Ta yucuan cunyehe ra tindoho tyicuan ri maa ndiyaca ta ñiyaca.

Nu cua cutuñi chi ñáyivi nu tyayu cuichin nu nyaá Nyoo

¹¹Tyicuan ta nyehi noo tyayu cuichin cahnu. Ta nyehi chi ra nyaá nuu tyayu cuan. Ta chihin nuu ra ta cuanaa ñuhu ñayivi ta andivi. Ta ñahri ca maa nu cu-

cunyaa chi. ¹²Ta nyehi chi tandihi ñu ndiyi, ñu chahnu ta ñu nyihi, tayucú ñu nuu Nyoo. Tyicuan ta canuñá libru cha nyaá tandihi cha sacuvi ñu quivi chiyo ñu ñayivi. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyi cuan cuacutuñi chi ñu ñáá ndihi cha chinyacuvi ñu cha nyaá nu tandihi libru cuan. ¹³Ta tyañuhu nacuhva cuenda chi ndiyi cha cumí chi. Ta tandihi nu nyicú ñu chihí nu nyacá ñaha Tuhun Chihi, nacuhva cuenda chi ndiyi cha cumí chi. Ta tandihi ñu cuatahan chi chi ñu yoso cuhva cha casacuvi ñu. ¹⁴Tyicuan ta cundihí Tuhun Chihi cuan ta ñahri ca nu cuacunyicu ñu chihí, vatyí cutuchi Nyoo chi minduvi tahan cuan chichi anyaya cahnu nu cayú ñuhú. Ta ican ihya cuví Tuhun Chihi Cu Uvi. ¹⁵Ta yucuan tuchi ra chi ñu cha ñahri sivi nyaá nu libru cha cuenda ñáyivi cha cua conyito chihin Nyoo tyicuan ri maa.

**Nu nyehe ra Juan andivi
chaa ta ñuhu ñayivi chaa**

21 Yahá cuan ta nyehi noo andivi chaa ta noo ñuhu ñayivi chaa, vatyí andivi ta ñuhu ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan. ²Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaquí xaan nduvijí chi tari noo ñaha cha cua tandaha chihin noo ra, tyicuan caa nduvijí chi. ³Ta chini noo ndusu ñihi cha quita ityi andivi, ta catyí chi:

—¡Nyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuví ñu ñuu ra. Ta cua cunyaa ra chihin ñu. Ta cua cuví ra Nyoo cuenda ñu. ⁴Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca iñi ñu. Ma cuacu ca ñu vatyí ma nyehe ca ñu tindoho. Ta ma nyehe ca ñu cha

uhvi. Vatyí tandihi cha chiyo, cha yahá tuhun —catyí chi.

⁵Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchai tandihi maa cha iyó.

Ta catyí tucu ra:

—Tyaa tuhun ihya, vatyí tuhun cahín ihya, ndicha. Ta cuví cunii iñun vatyí tuhun cahín cuchino cava —catyí Nyoo chii.

⁶Yahá cuan ta catyí tucu ra chii:

—Cha tandihi chino cava vityin. Yuhu cuví ra xihna cuiri, ta yuhu cundoí nu ndihi tuhun. Ñáyivi cha ityi ndutya cha cuñí ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutiyahvi ñu. ⁷Ñu cha cuví chasaha chi ra ña vaha, cuñihi ñu tandihi ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi. ⁸Soco ñáyivi cha yuhví xaan, ñu cha ña chinó iñi, ñu cha quiñi iyó, ñu cha chahñi ñáyivi, ñu iyó chihin rayii, ta ñima yii ñu cuví, o ra iyó chihin ñusihí ta ñima ñasihí ra cuví, ñu tasi, ñu casacahnú xitohyo, ta tandihi ñu cuendu, tandihi ñu cuan, tahán chi cahun ñu chichi anyaya cahnu nu cayú ñuhú chihin azufre, nu cuví Tuhun Chihi Cu Uvi, nu tachi tuñi Nyoo chi añima ña vaha.

**Nu nyehe ra Juan yoso caa
cucuvi ñuu Jerusalén chaa**

⁹Tyicuan ta quichi noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyí ra:

—Ñaha, ta cusañahi chuun yóó ñu cuví ñu yihí cuenda ra Cristo, ñu cha cuví tari ñasihí ra, tyi ra cuví Mbee Luhlu cuví ra —catyí ra chii.

¹⁰Ta Tatyí Ii Nyoo chinyaca chii noo yucu cahnu ta sucun. Ta sañaha ra ñuu ii, ñuu Jerusalén cahnu cuan chii. Maa

maa cuhva cha vachi noó ñuu cuan ityi andívi nu nyaá Nyoo, sañaha ra chii. ¹¹ Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino. ¹² Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndí uchi uvi tahan sivi tata ñáyivi Israel nyaá yuvehe cuan. ¹³ Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii. ¹⁴ Uchi uvi tahan yuu yihí nu sama ra nu cacu chaha chi. Ta nuu yuu cuan nyaá sivi ndí uchi uvi apóstol cuenda ra cuví Mbee Luhlu.

¹⁵ Ta ángel cha cahán chihin cuan, yihí ndaha ra noo yutun xuhun cuaan, vatyí chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan. ¹⁶ Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuaan cuan. Ta tyicuhva ra, ta quitá uvi mil uvi cientu kilómetro. Ta inuu ri cha cañi ta cha sucun ta cha quehen. ¹⁷ Tyicuan ta tyicuhva ra nu sama nicachico ñuu cuan. Ta quitá uñi xico cumi metru cha cocon, tari tyicuhvá ñáyivi, tyicuan caa tyicuhva ángel cuan.

¹⁸ Chihin yuu jaspe samá yuhu ñuu cuan. Ta maa maa ri xuhun cuaan cuví ñuu cuan. Tari caá noo ino cha ndii vavaha, tyicuan caa. ¹⁹ Ta yuu cha cuví cimientu cuan tandihi ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda; ²⁰ ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu iin topacio; ta cha cu uchi crisoprasa; ta cha cu uchi iin jacinto; ta yuu cu uchi uvi cuví amatista. ²¹ Ndí uchi uvi yuvehe cuan cuví chi

uchi uvi tahan perla. Tahan tahan yuvehe cuan, ta chingo chi chihin noo ri perla. Ta nu cuví ityi cahnu ñuu cuan, maa ri maa xuhun cuaan cuví, tari ino cha xiño.

²² Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandihi tunyee iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu. ²³ Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan. ²⁴ Tandihí ñu cha cacu añima, cucaca noo ñu nu ndichin ñuu cuan. Ta ra cacuví rey siqui ñuhu ñáyivi cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan. ²⁵ Ta ma nacunyasi yuvehe cha ñicahñu, ta yucuan ma coo cha cha cuaa. ²⁶ Ta tandihí cha tyayii, ta cha cahnu, cha iyó siqui ñuhu ñáyivi cuchaa chi nya ñuu cuan. ²⁷ Soco ma cuví quihvi cha quiñi caa. Ni noo ñu sacuví cha quiñi caa, ni ñu cuendu ma cuví quihvi ñu. Noo ri maa ñu nyaá sivi nu libru ra cuví Mbee Luhlu cuquihvi ñu, vatyí cuconyito ñu chihin ra tyicuan ri maa.

22 Tyicuan ta sañaha ángel cuan noo yuvi cuii vavaha chii. Ndutya cha chahá cha conyito yo cuví. Cuii vavaha tari noo yutyí finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu. ² Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyivi iyó siqui ñuhu ñáyivi. ³ Ñuu cuan, ñahri maa cha ña vaha cucoo vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra. ⁴ Ta cunyehe ñu chi ra chihin nuu ñu. Ta cua

cunyaa sivi ra tyaan ñu. ⁵Ta ma coo ca cha cha cuaa yucuan. Ta ñu coo yucuan ma cuchinuhu ñuhu lámpara chi ñu, ni ñuhu ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

⁶Tyicuan ta catyí ángel cuan chii:

—Ihya tuhun ndicha cuví, ta cuví cuniiñun vatyí cuchino cava tuhun ihya. Ta suri maa Sutu yo Nyoo ra cahān chihin yuhu ra cacuví profeta cuenda ra ta cha naha, ican ra tachī ra chi ángel ra, vatyí sañaha ra chi ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

⁷—¡Cha cuñi quichi! —catyí ra.

¡Sii xaan cuñi ñu cha sacuví cuhva cahān tuhun Nyoo cha nyaá nu libru ihya!

⁸Yuhu ra Juan, chiñi tuhun ihya. Ta nyehi tandihi ihya. Ta cha yahā nyehi ta chiñi, chicuiñi chiti chaha ángel cha sañahā cuan chii, vatyí sacahni chi ra.

⁹Soco maa ra catyí ra chii:

—Ma sacahnun chii, vatyí yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihi ñu quichahá tuhun cha nyaá nu libru ihya. Chi Nyoo tahān chi sacahnu yo —catyí ra chii.

¹⁰Ta catyí tucu ra chii:

—Ma tixehun tuhun Nyoo cha nyaá nu libru ihya, vatyí cha cuyatyin quivi cha cuchino cava chi. ¹¹Soco saña chi ñu quiñi iyó, na sacuvi ca maa ñu cuhva cuñi maa ñu. Ta ñu sacuví cuatyí na sacuvi ca maa ñu. Soco ñu sacuví cha vaha, na sacuvi ca ñu cha vaha. Ta ñu ii, ñu nacuhva cuenda ñanima chi Nyoo, na cu ñi ca iñi ñu chihin ra —catyí ra chii.

¹²Ta Sutu Mañi yo catyí ra:

—Nyehe ndo. Cha cuyatyin quivi quichi. Ta cutiyahvi chi tahan tahan ñáyivi yoso cuhva cha sacuví ñu, tatu cha vaha o cha ña vaha. ¹³Yuhu cuví ra xihna cuiri ta yuhu cundoí nu ndihi tuhun, yuhu iyé nu quichaha tandihi ta cucoo que nu cundihi tuhun —catyí Sutu Mañi yo.

¹⁴Sii xaan cucuvi chi ñu sanduvii sahma o ñanima cuví cuan, vatyí coo ityi chi ñu cachi ñu chiti yutun cha chahá cha conyito ñanima yo tyicuan ri maa. Ta cuví quihvi ñu yuvehe ñuu cuan. ¹⁵Soco ñu cha sacuví cha quiñi caa, ñu tasi, ñu cha iyó chihin tahan, ta ñima ñasihí ra o yii ñu cuví, ñu chahñi ñáyivi, ñu sacahnú xitohyo, ta tandihi ñu ñii cuendu ta sandavi ñaha ñu, tandihi ñu cuan, cundoo ñu ityi chata ñuu cuan.

¹⁶Ta catyí tucu Sutu Mañi yo:

—Yuhu ra Jesús, sacuhin chi ángel cuende vatyí sacoto ra tandihi tuhun ihya chi ñu nyicú vehe ñuhu. Yuhu cuví ñáyivi chahnu chi rey David. Ta vachi tiqui tata ra ñandihí. Ta cuví tiqui tiño cahnu cha xiño, cha caña cha ñaa ca —catyí ra.

¹⁷Tatyí Ii Nyoo ta ñasihí ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chi ra:

—Ñaha —catyí ñu.

Ta ñu ityi ndutya cha conyito yo chihin, ta tandihi ñu cuñi quichi, na quichi ñu ta coho ñu ndutya cha chahá cha conyito ñanima yo, ta ñahri cutiyahvi ñu.

¹⁸Ta yuhu catyí chi tandihi ndo cha chiñi ndo tuhun Nyoo cha nyaá nu libru ihya, yuhu sacoté chi ndo noo tuhun ihya: Tatu nya noo ñáyivi sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siqui ñu. ¹⁹Ta tatu nya noo ñáyivi tinyaa ñu

suhva tuhun Nyoo cha nyaá nu libru ihya, Nyoo cu tinyaa ra cha tahán chi chí ñu cha nyaá nu libru cha cahán chi tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chí chí ñu cha vaha cha cahán nu libru ihya. ²⁰ Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyi cha cuñí quichi —catyí ra.

Ta yuhu catyí:

—Na cuvi chí tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihi ndo cha vaha chahá Sutu Mañi yo Jesucristo chí yo. Ta na cuvi chí tyicuan caa.